

# 001 靈寶領教濟度金書

經名：靈寶領教濟度金書。原題甯全真授、林靈真編。係宋元間靈寶東華派齋儀道法全書。書中屢見『大明國』字樣，可知最終編成於明初。原書正文三百二十卷並目錄一卷，嗣教錄一卷，總計三百二十二卷，是現存卷帙最多的道書。底本出處：《正統道藏》洞玄部威儀類。

## 目錄

### 卷一

- 壇幕制度品開度祈禳通用
- 三級壇圖
- 二十八宿燈圖
- 六幕圖
- 精思閣
- 金籙燈圖
- 內外壇陳設圖
- 靜默堂
- 監臨幕

### 卷二

- 將吏幕
- 上章壇
- 神虎幕
- 承受天醫諸司等幕
- 煉度幕
- 九獄燈圖
- 諸大地獄燈圖
- 九煉天尊壇圖
- 血湖燈圖
- 度星齋
- 安宅齋
- 玄靈璇璣齋
- 祈禳十迴度人道場
- 章官幕
- 三界醮壇圖
- 正度幕
- 茭郭
- 五苦燈圖
- 明真煉度燈圖
- 血湖道場陳設圖
- 青玄齋合用事件
- 預修黃籙齋
- 七曜齋
- 雷霆齋
- 壇信經例品開度祈禳通用
- 黃籙壇合用事件
- 修奉節目品
- 開度黃籙齋五日節目
- 明真齋三日節目
- 九天生神齋三日節目
- 青玄黃籙救苦齋三日節目
- 血湖道場一日節目
- 五鍊生尸齋三日節目

### 卷三

- 師友命過行道誦經道場節目
- 度星滅罪齋三日節目
- 祈禳黃籙齋五日節目
- 預修黃籙齋五日節目
- 祈禳自然齋三日節目
- 消災集福道場三日節目
- 安宅齋三日節目
- 七曜齋三日節目
- 璇璣齋三日節目
- 玄靈經懺道場二日節目
- 保病齋三日節目
- 傳度道場二日節目
- 雷霆齋節目
- 十迴度人經祈禳道場節目
- 聖真班位品開度祈禳通用
- 壇心三寶聖位
- 壇中層聖位
- 靜默堂聖位
- 承受幕聖位
- 仙曹幕神位
- 神虎幕神位
- 監生幕神位
- 壇上層十方聖位
- 六幕聖位
- 章官幕聖位
- 監臨幕神位
- 鍊度幕神位
- 天醫幕神位
- 澣濯幕神位

巾笥幕神位 解結幕神位

混元幕神位 驛吏幕神位

三官醮聖位 冥官醮神位六十分位

攝召全形靈官醮神位

卷四

聖真班位品開度祈禳通用

上層中列聖位 上層第二列聖位

醮班聖位

醮筵外左右幕聖位

開度醮聖位一百二十分位

卷五

聖真班位品

開度醮聖位六十分位

生神齋靈官醮神位三十六分位

九天開度醮神位六十分位

青玄鍊度醮神位三十六分位

青玄開度醮神位六十分位

血湖冥官醮神位三十六分位

血湖神虎幕神位

驛龍幕神位

紫庭幕神位 仙曹幕神位

度星三界醮神位六十分位

十迴度人醮神位六十分位

卷六

聖真班位品祈禳通用

上層中列聖位 上層第二列聖位

左右聖班三百六十分位

預修祈禳聖位一百二十

祈禳醮聖位六十分位

天曹受生醮神位

衆真監度醮神位

卷七

聖真班位品

安宅齋聖位

土府醮聖位三十六分位

七曜齋三界聖位六十分位

紫府醮聖位三十六分位

保命北帝紫府齋聖位六十分位

殞疫醮聖位 天蓬官將神位

天醫醮神位與天醫幕同

玄靈璇璣齋神位

上御筵十三位 左右班神位六十分位

壇前二幕神位 醮筵外幕神位

傳度三界醮神位

上御筵中列聖位

上御筵第二列聖位

左右班神位六十分位

雷霆齋三界神位

左右班神位六十分位

上御筵聖位

卷八

朝奏次序品開度祈禳通用

宿啓次序

卷九

朝奏次序品開度祈禳通用

朝謁次序

卷十

讚誦應用品開度祈禳通用

啓壇解壇頌 請謝六幕頌

明燈傳戒諸頌 燒香太極頌

投簡頌 焚詞頌

迎送諸真頌 三啓頌

登齋諸頌 大步虛詞

小步虛詞 玉清上清太清樂

五言散花詞 七言散花詞

卷十一

讚誦應用品開度祈禳通用

五方衛靈呪 三日九朝衛靈呪

一日三朝衛靈呪 五方總呪

五星都呪 璇璣齋衛靈呪

三朝大小願念 請送左右幕詞

三皈依三聞經 召魂諸章

卷十二

科儀立成品開度祈禳通用

九靈飛步上章儀

章官醮儀

卷十三之十四

科儀立成品開度祈禳通用

進拜朱表儀

金鍾玉磬儀

卷十五之十六

科儀立成品祈禳開度通用

禮金錄燈儀

補職說戒儀

卷十七之十八

科儀立成品開度祈禳通用

開啓祝幕儀

捲簾儀

立六幕儀

卷十九

科儀立成品祈禳開度通用

立真師幕儀 謝真師幕儀

立將吏監臨幕儀

謝監臨幕三獻儀

卷二十之二十一

科儀立成品祈禳開度通用

關發三獻儀

敕水儀

放生儀

施貧儀

卷二十二

科儀立成品祈禳開度通用

大禁壇儀 小禁壇儀

卷二十三之二十四

科儀立成品開度祈禳通用

豎遷神幡儀

豎告盟幡儀

豎回耀幡儀

豎命靈幡儀

卷二十五之二十六

科儀立成品開度通用

九卮燈儀

三官醮儀

冥府醮儀

鍊度醮儀

卷二十七

科儀立成品開度通用

分燈儀 頒玉札儀

卷二十八之二十九

科儀立成品開度通用

催召儀

召魂儀

醫治全形儀

全形儀

卷三十之三十一

科儀立成品開度通用

沐浴儀

呪食儀

卷三十二

科儀立成品開度通用

安鎮儀 起鎮儀

卷三十三

科儀立成品開度通用

破獄儀

卷三十四

科儀立成品開度通用

九幽燈儀 諸大地獄燈儀

卷三十五之三十六

科儀立成品開度通用

三塗五苦燈儀 請頒敕赦儀

醫治全形靈官醮儀

卷三十七之三十八

科儀立成品開度通用

宿啓儀

散壇儀

卷三十九之四十

科儀立成品開度通用

早陞壇誦經儀

午陞壇誦經儀

壇中行道告符儀

禮諸品懺儀

誦諸品經儀

藏棺儀

卷四十一

科儀立成品開度通用

真靈醮儀

十真君醮儀

起靈三奠儀

卷四十二之四十四

科儀立成品開度黃籙齋三日九朝

第一日三朝儀

卷四十五之四十七

科儀立成品

第二日三朝儀

卷四十八之五十

科儀立成品

第三日三朝儀

卷五十一之五十二

科儀立成品

宿啓儀

頒玉清大赦儀

卷五十三

科儀立成品開度黃籙齋用

六上轉經儀

卷五十四

科儀立成品開度黃籙齋用

謝恩設醮儀

卷五十五

科儀立成品開度黃籙齋用

投三簡儀

卷五十六

科儀立成品開度黃籙齋用

上十方懺悔儀

下十方懺悔儀

總懺十方儀

卷五十七

科儀立成品開度黃籙齋用

立諸司幕儀

卷五十八

科儀立成品開度黃籙齋用

散壇儀

卷五十九

科儀立成品開度黃籙齋用

九鍊返生儀

卷六十

科儀立成品淨供合用

玄都大獻玉山淨供儀

卷六十一

科儀立成品淨供合用

玄都大獻玉山淨供儀

卷六十二

科儀立成品孤魂供合

玄都大獻玉山淨供儀

卷六十三之六十四

科儀立成品淨供合用

大獻自然朝儀

大獻告札儀

大獻靈官醮儀

卷六十五之六十七

科儀立成品淨供合用

大獻三朝行道儀

卷六十八

科儀立成品淨供合用

大獻謝恩醮儀

卷六十九

科儀立成品淨供合用

玉清溟滓大梵甘露淨供儀

卷七十

科儀立成品淨供合用

甘露淨供壇前鋪水火池

卷七十一

科儀立成品九天生神齋合用

開啓變壇儀 頒赦儀

卷七十二

科儀立成品生神開度齋用

豎九天旛儀 發放召魂符命儀

卷七十三

科儀立成品生神齋用

靈官醮儀 分燈儀

卷七十四

科儀立成品生神開度齋用

催召儀 請神水召魂沐浴儀

卷七十五

科儀立成品生神齋用

宿啓儀 解壇儀

卷七十六之七十八

三朝行道儀

卷七十九之八十

科儀立成品生神開度齋用

九天懺儀 鍊度醮儀

散壇醮儀

卷八十一

科儀立成品生神開度齋用

鍊度儀

卷八十二之八十三

科儀立成品生神齋用

陞壇誦經儀 謝恩醮儀

卷八十四之八十五

科儀立成品生神齋用

青玄豎旛儀 告符追攝儀

分燈儀

卷八十六之八十八

科儀立成品青玄齋用

引魂朝禮沐浴儀

青玄破獄儀 上朱表儀

卷八十九之九十

科儀立成品青玄齋用

宿啓儀 散壇儀

卷九十一之九十三

科儀立成品青玄齋用

三朝儀

卷九十四

科儀立成品青玄黃籙齋用

懺方儀

卷九十五

科儀立成品青玄黃籙齋用

鍊度醮儀

卷九十六

科儀立成品青玄齋用

普度淨供儀

卷九十七

科儀立成品青玄黃籙齋用

普度淨供儀

卷九十八之九十九

科儀立成品青玄黃籙齋用

謝恩醮儀

設醮禮幕儀

醫治全形靈官醮儀

小開啓頒赦儀

卷一百

科儀立成品青玄救苦齋用

單朝儀

卷一百一之一百三

科儀立成品明真齋用

三朝行道儀

卷一百四

科儀立成品明真齋用

十方懺悔儀

卷一百五

科儀立成品明真齋用

謝恩醮儀

卷一百六

科儀立成品明真齋用

鍊度儀

卷一百七之一百八

科儀立成品明真齋用

傳戒儀

宿啓儀

卷一百九之一百十一

科儀立成品遷拔道場用

三朝行道儀

卷一百十二

科儀立成品遷拔道場用

單朝儀

設醮謝恩儀

卷一百十三

科儀立成品遷拔道場用

十方懺儀

卷一百十四

科儀立成品遷拔道場用

太極心法祭鍊儀

卷一百十五之一百十六

科儀立成品血湖道場用

冥官醮儀

血湖燈破獄儀

請降敕赦玉札立幕頒告儀

立六司幕召魂拯治沐浴朝禮儀

卷一百十七

科儀立成品血湖道場用

催召儀

卷一百十八之一百二十

科儀立成品五鍊生尸齋用

三朝行道儀

卷一百二十一之一百二十二

科儀立成品五鍊生尸齋用

謝恩醮儀

陰宅土神醮儀 十方懺儀

卷一百二十三之一百二十五

科儀立成品度星齋合用

三朝行道儀

卷一百二十六之一百二十七

科儀立成品度星齋合用

謝恩醮儀

官將幕三獻儀 關祝神燈儀

五方懺儀

卷一百二十八

科儀立成品度星十迴度人道場合用

第一時陞壇儀

第二時陞壇儀

第三時陞壇儀

第四時陞壇儀

第五時陞壇儀

第六時陞壇儀

卷一百二十九

科儀立成品度星齋用

真靈醮儀

十方懺儀

卷一百三十

科儀立成品度星齋用

經法鍊度儀

卷一百三十一

科儀立成品度星齋用

請經儀

卷一百三十二之一百三十五

科儀立成品師友命過合用

三朝行道誦經儀

設真靈醮儀

卷一百三十六

科儀立成品祈禳通用

分燈儀 北斗燈儀

卷一百三十七之一百三十八

科儀立成品祈禳通用

南斗燈儀

十一列曜燈儀

卷一百三十九之一百四十

科儀立成品祈禳通用

周天燈儀

紫府送星醮儀

卷一百四十一之一百四十二

科儀立成品祈禳通用

安鎮真文儀

起鎮真文儀

卷一百四十三之一百四十五

科儀立成品祈禳通用

二上陞壇誦經儀 早午

宿啓儀 散壇儀

卷一百四十六之一百四十七

科儀立成品祈禳通用

壇中告符儀 誦諸品經儀

禮諸品懺儀 真靈醮儀

卷一百四十八之一百五十

科儀立成品祈禳黃籙三日九朝

第一日三朝儀

卷一百五十一之一百五十三

科儀立成品

第二日三朝儀

卷一百五十四之一百五十六

科儀立成品

第三日三朝儀

卷一百五十七

科儀立成品

六上轉經儀

卷一百五十八

科儀立成品

上十方懺悔儀 下十方懺悔儀

總十方三光五嶽儀

卷一百五十九之一百六十

科儀立成品

投三簡儀 謝恩設醮儀

卷一百六十一之一百六十三

科儀立成品預修三日九朝

第一日三朝儀

卷一百六十四之一百六十六

科儀立成品

第二日三朝儀

卷一百六十七之一百六十九

科儀立成品

第三日三朝儀

卷一百七十

科儀立成品

謝恩醮儀

卷一百七十一

科儀立成品

三官醮儀

卷一百七十二

科儀立成品

十王醮儀

卷一百七十三

科儀立成品

天曹寄庫醮儀

卷一百七十四

科儀立成品

衆真監度醮儀

禮謝三官儀

禮謝十王儀

九幽燈儀

卷一百七十五

科儀立成品

二十方懺儀

投三簡儀

卷一百七十六

科儀立成品

安鎮真文儀

起鎮儀

卷一百七十七

科儀立成品

生神受度儀

卷一百七十八

科儀立成品

傳戒儀

卷一百七十九之八十一

科儀立成品自然齋

早朝儀

午朝儀

晚朝儀

卷一百八十二

科儀立成品

十方懺儀

禮四極儀

總懺十方四極儀

卷一百八十三之一百八十四

科儀立成品

謝恩設醮儀

自然一時行道儀

卷一百八十五之一百八十八

科儀立成品消災道場

一日三朝儀

三界醮儀

卷一百八十九之一百九十三

科儀立成品七曜齋

宿啓建壇儀

三朝儀

散壇儀

設醮儀

卷一百九十四之一百九十六

科儀立成品安宅齋

三朝儀

卷一百九十七之一百九十八

科儀立成品安宅

謝恩儀

土府醮儀

卷一百九十九之二百

科儀立成品安宅

九宮八卦燈儀

弧矢燈儀

卷二百一之二百三

科儀立成品保命齋

三朝儀

卷二百四之二百五

科儀立成品

保命禳瘟醮儀

北帝官將醮儀

卷二百六之二百八

科儀立成品

北帝三朝儀

卷二百九

科儀立成品資福齋

三朝儀

卷二百十

科儀立成品

天醫醮儀

資福設醮儀

卷二百十一之二百十三

科儀立成品璇璣齋

三朝儀

卷二百十四

科儀立成品璇璣齋

單朝儀

卷二百十五

科儀立成品

開啓變壇儀

宿啓儀

卷二百十六

科儀立成品

散壇儀

玄靈起鎮儀

卷二百十七

科儀立成品

開啓祝幕儀

轉經儀



設醮儀

卷二百十八

科儀立成品玄靈齋

宿啓儀

卷二百十九之二百二十一

科儀立成品玄靈齋

二朝轉經儀

卷二百二十二之二百二十三

科儀立成品

設醮儀

卷二百二十四

科儀立成品傳度齋

三朝儀

卷二百二十五

科儀立成品

除尸累服金液神符儀

卷二百二十六

科儀立成品

傳度醮儀

卷二百二十七

科儀立成品

謝恩醮儀

審奏祖師官將儀

卷二百二十八之二百二十九

科儀立成品雷霆齋

宿啓儀

卷二百三十之二百三十二

科儀立成品雷霆齋

三朝儀

卷二百三十三之二百三十四

科儀立成品雷霆齋

謝恩醮儀

總九方懺儀

卷二百三十五

科儀立成品十迴度人齋

第一時陞壇儀

第三時陞壇儀

第五時陞壇儀

卷二百三十六

科儀立成品

三十二天燈儀

卷二百三十七

科儀立成品祈嗣齋

三朝儀

卷二百三十八之二百三十九

科儀立成品祈嗣齋

設醮儀

卷二百四十之二百四十二

科儀立成品祈祿齋

三朝儀

卷二百四十三

科儀立成品

設醮儀

卷二百四十四

科儀立成品祈壽齋

三朝儀

卷二百四十五

科儀立成品

祈壽設醮儀

卷二百四十六之二百四十八

科儀立成品祈晴齋

三朝儀

卷二百四十九之二百五十

科儀立成品祈晴齋

設醮儀

卷二百五十一之二百五十三

科儀立成品禳災齋

卷二百五十四

監生醮儀

官將醮儀

科儀立成品

設醮儀

卷二百五十五

科儀立成品

火部醮儀

卷二百五十六之二百五十八

科儀立成品禳蝗齋

三朝儀

卷二百五十九

科儀立成品

禳蝗設醮儀

卷二百六十

紫英靈書品

真炁水火符

陰陽壇攝召亡人諸符

神虎追攝諸符 立獄諸訣

三真三天符

卷二百六十一

開度追攝品

神虎玉札玄冥隱書符

追魂諸符 鐵跡臺章

監魂引魂童子符

召神虎諸符 破獄都匠符

攝召魂魄芻身符

卷二百六十二

鍊尸生仙品

滅度鍊尸生仙科法

度生釋罪章 返魂更生章

壽山枕法 入棺大小殮諸符

棺槨諸符

卷二百六十三

煉度品

大洞玉符 三部八景符

十二經絡符 五帝玉司

五芽真文符

九天真炁九天陰陽符

煉度天尊九煉符

混洞赤文

卷二百六十四

煉度品

煉度符 四保舉符並誥

四鎮合同符 護戒諸符

監橋引魂托生符

給付亡魂符券籙誥

升度孤魂左右券

升度水溺券

卷二百六十五

煉度品

青玄赦罪符 破九獄符

策杖符 尋魂追攝諸符

煉真魂 水火煉魂受煉符

血湖煉魂符 十迴度人煉度符

三十二天符

卷二百六十六

符簡軌範品

靈寶登齋諸符 三皇內文

六十四卦真文

卷二百六十七

符簡軌範品

上章諸符 五方安鎮玉簡

五方真文并削過符

卷二百六十八

符簡軌範品

告盟解穢符 頒告諸符簡

黃籙三簡并投簡符

茭龍金龍 召十真君符

拔幽魂破地獄救苦符

破地獄諸符

生天寶籙 四保舉符

蕩滌血湖諸符 策杖旛諸符

卷二百六十九

符簡軌範品

召二十四類傷亡符

度產亡符 追攝傷亡符

解三尸五累諸符

大行梵炁符 大梵變食諸符

召六道四生符 召孤魂符

卷二百七十

符簡軌範品

九州孤魂符 去鎖開咽諸符

解諸類冤結 拔罪治病符

醫二十四類死魂符

全體出胎沐浴變衣變錢符

變化法食符

卷二百七十一

符簡軌範品 祈禳通用

五方赤書玉字 預修真文三簡

追遠煉神保命 十一曜符

北斗符 南斗符

五斗符

卷二百七十二

符簡軌範品

二十八宿六合天倉符

九煉天尊符

披黃受道還形復性符

辟水火保壽祿諸符

紫庭諸符 安宅辟土諸符

保命斷瘟驅瘟諸符

卷二百七十三

符簡軌範品

北帝齋七星隱文

除妖玉治病符 天蓬三十六將符

資福治病符

卷二百七十四

符簡軌範品

璿璣解厄諸符 七曜送星度厄符

北斗消災玉字 傳度仙誥版券

雷霆禱雨興雷符檄

祈嗣符 祈祿求官符

祈壽延年符 祈晴符

禳火驅蝗符

卷二百七十五

書篆訣目品 開度祈禳用。

發遣諸符 萬靈符

開天陞壇諸神符

羽蓋朱鳳玄龍符

節旛鳳鸞獅鶴符

發爐復爐六吏符

命魔解穢符 五方安鎮衛靈符

五方真文削過玉符

拜章遣章焚章諸符

十方飛天使者符

十方飛天神王符

卷二百七十六

書篆旨訣品

太液金液煉神符

救苦長生符 出離生死符

三天寶籙玉清玉簡

玉清金簡 金書寶誥

火府隱書 九幽獄白簡

三官玉簡 三炁流光符

拔幽魂符 破地獄符

九龍符 勅赦生天寶籙

青玄寶籙 蕩滌血湖符

四保舉符 芟龍金龍驛吏符

開陰曹符

青玄救苦十天玄化符

救苦回光符 慧光符

造策杖法

卷二百七十七

書篆旨訣品

書遣玉札

青玄追魂寶錄

三天勅誥

追攝諸符

神虎壇鐵跡臺光諸符

攝魂諸符

召魂將軍諸符

卷二百七十八

書篆旨訣品追攝用

靈寶召二十四類傷亡符

攝召三十六類傷亡符

卷二百七十九

書篆旨訣品

解三塗五苦符

溟滓甘露變食符

去鎖斷索開咽接續解冤諸符

拔罪解冤天醫治病符

醫二十四類病亡符

改形易貌全形符

出胎下胎蕩胎淨血尸符

捨邪離亡沐浴符

變衣天皇符

大洞十八獄符

卷二百八十

書篆旨訣品煉度用

三部八景符

十二經絡符

五帝玉司符

五芽并真文符

卷二百八十一

書篆旨訣品開度用

九天生神符

九天陽符

水火真符

建水池月魄真水合同符

建火冶日魂降真火合同符

引魂水火煉諸符

丹陽符

金液煉形迴尸起死符

五神混合煉身符

四鎮三元合同符

監橋引魂托生符

大九龍符

保元玉誥

升天券

監生超生流火庭符

卷二百八十二

存思玄妙品開度祈禳用

煉穢變神步罡

大羅默朝內誦

誦經分章發用

三十二天默朝

發遣破穢

禁壇開啓金玉捲簾安鎮衛靈陞壇

上章進表進拜心章出官

設醮降聖

修誦妙經

卷二百八十三

存思玄妙品

九天默朝

東極默朝

頒赦請光請杖豎旛

頒札召魂全形復氣

淋浴朝參

黃華東井日魂月魄施斛

卷二百八十四

存思玄妙品

水火煉度

九煉生尸

祭煉行持

青玄存思

生神存思

頒降符簡

藏棺解穢

呪獻法食

卷二百八十五

存思玄妙品祈禳齋

玄靈默朝

神霄默朝

預修生身受度 七曜璇璣存思

禳星度厄存思 安宅保命北帝存思

度星資福存思 雷霆祈禱存思

存思玄妙拾遺

卷二百八十六

存思玄妙品資福齋

天醫治二百四種病符

召天醫一十三科

卷二百八十七

誥命等級品開度祈禳齋

飛誥 簡誥

方函誥

卷二百八十八

誥命等級品開度祈禳用

可漏誥 散誥

摺角封誥

卷二百八十九

誥命等級品

飛告

卷二百九十

誥命等級品

給付魂靈符錄誥券

昇度幽魂左右券

升度水溺亡魂左右券

普度給付金錄

普度給付符錄誥文

卷二百九十一

誥命等級品祈禳用

三簡 祈禳符簡誥文

解二十四厄告文

七曜符誥券錄

卷二百九十二

旛蓋陳設品祈禳開度通用

三天九天旛符 三十二天旛符

告盟迴曜遷神命靈超度旛

九獄三塗五苦旛

九厄燈旛 召魂旛

煉度水火青紅旛

斛食諸旛 九天寶蓋

青玄召魂引魂旛

卷二百九十三

表榜規制品

啓六幕表 謝六幕表

捲簾通真表 上章五表

第二次表 言功表

卷二百九十四

表榜規制品

請水火表 大道表

通天拔亡表 黃錄九煉表

言功表

卷二百九十五

表榜規制品

九天生神表 五帝表

九天九表 九天言功表

卷二百九十六

表榜規制品開度十迴度人

十方天尊表

卷二百九十七

表榜規制品預修黃錄

九天尊表

卷二百九十八

表榜規制品青玄齋

通天救苦表 東極表

破獄表 言功表

卷二百九十九

表榜規制品

十方救苦

卷三百

表榜規制品祈禳十迴度人

十方天尊表

卷三百一

表榜規制品玄靈經懺

九晨表 啓謝二幕表

玄靈解厄表 禳檜星辰表

璿璣言功表 雷霆言功表

祈晴言功表

卷三百二

表榜規制品

傳度謝恩表

保胎表

祈壽表

禳蝗表

卷三百三

表榜規制品開度祈禳

誓將榜

諸司幕表

立謝真司幕疏

卷三百四

文檄發放品開度黃籙齋

齋主投詞

九牒一劄一關

卷三百五

文檄發放品開度黃籙

審告四奏七申

卷三百六

文檄發放品

奏狀

卷三百七

文檄發放品

正發牒劄

關一式

章官關

功曹關

立幕關

告札牒

關功曹

卷三百八

文檄發放品

三官北陰醮申關疏狀牒

宿啓告符牒關 九朝牒關

破獄牒關

宗祖功德牒

超生護送牒

卷三百九

文檄發放品

大煉牒申關狀

設醮表狀申關

回謝監壇諸司申狀公牒

卷三百十

文檄發放品

正度普度詞意狀牒

五煉生尸九天生神奏申牒關

卷三百十一

文檄發放品預修

預修詞意奏狀

卷三百十二

文檄發放品

預修申狀

卷三百十三

文檄發放品

預修牒劄關奏申狀表

卷三百十四

文檄發放品祈禳黃籙齋

祈禳詞意奏申牒劄表狀

卷三百十五

文檄發放品消災集福齋

消災詞意奏申牒劄關疏

安宅詞意奏申牒劄關疏

卷三百十六

文檄發放品保命齋

保命詞意奏申牒劄

七曜詞意奏申牒劄

玄靈詞意奏申牒劄關

卷三百十七

文檄發放品傳度醮

傳度詞意奏申牒劄

卷三百十八

文檄發放品

傳度牒劄 設醮申表關仙簡

審奏詞意

雷霆詞意奏申牒劄檄

度人詞意

卷三百十九

齋醮須知品

擇地擇日 申奏

建壇陞壇散壇設醮

卷三百二十

齋醮須知品

上章分燈 開度祈禳

總紀

靈寶領教濟度金書目錄

①此目錄與正文中細目不盡相符，姑仍其舊。

靈寶領教濟度金書嗣教錄

贊化甯先生

先生姓甯，名本立，字道立，諱全真。開封府人也。世裔莫詳。幼養於裴氏家，長猶從裴姓。然天性純孝，奉所生母尤謹。其資稟純異，敏於記憶。凡諸子百家、醫藥卜筮之書，無不該貫融會。善察天文躔度，猶工於風角鳥占卜術。家貧無以自給，為六部尚書令。每歎曰：吾性嗜沖寂，且聞至人多塵隱者，老子嘗為柱下史矣。吾切慕焉。會尚書王古入朝，雅知先生有道，檄充史掾尚書，嗣丹元真人東華嫡傳。又聞田靈虛遇陸簡寂於廬山，玄受三洞經教，與東華丹元玄旨。會合尚書，延致靈虛于家，俾先生典侍抄錄。先生既心與道契，一見輒解悟。凡宗旨秘文，必私錄副本。靈虛知先生宿有仙分，心切許之，勿訝也。先生亦未嘗敢請焉。一日靈虛言於尚書曰：裴氏子根器深重，骨相合仙，異日

當負大名，然振起吾東華教者，必此人也。欲以上道授之，俾其掌教，可乎？尚書亦欣然曰：此吾志也。遂授焉。自是修持不怠，能通真達靈，飛神謁帝，名振京師。遭靖康國難，大駕南巡。先生奉所生母以行，遂飄泊來南。凡所至處，人輒歸慕。前是，楊司命得道華陽，以《靈寶玄範四十九品》、《五府玉册符文》一宗印訣進于朝，詔藏秘府。司命登真，付於嗣法仕子仙，曰：爾嗣吾上道，慎勿輕泄。若遇緋衣人，則付之。後仕君於江南，時先生尚從裴姓，仕君曰：吾昔受先師緋衣之囑，今始悟緋衣者，子姓也。即以圖策心印付度。未幾母亡，號慟不已。時兄弟皆淪喪無嫡承，至是始復甯姓。紹興中既駐蹕吳會，十六年十一月，高宗皇帝將有事於南郊。及致齋，雨雪交作，上憂形于色。或奏請先生致禱焉。甲戌朝獻元廟，霽日麗空。乙亥享太廟，晚宿青成齋宮，風雪復作。上即封香，遣內使詣先生靖治，先生謝恩。訖，以為今去行禮，只一二時，須具章

奏。無及，乃取水噴壁中，光輒現。令齋香內使諦觀之，一上真降鑑，云是太皇萬福道君。先生命內使以上旨，懇切求一日之晴，以訖大禮。蒙道君首肯而退，即策騎回奏，及行次宮門，癡雲漸散。丙子清旦，上登壇行禮，於彩雲繚繞中，三台獨見。暨五鼓成禮，則風雪又如昨矣。廷臣付史館以紀其瑞，上從之。後恩平郡王迎至府中，建大齋，奉高廟密旨，附上二章緘竟而後付出。初不知所云何事，伏拜畢奏，蒙上帝睿旨，所陳忠孝二字，忠字未可行，孝字允所請矣。蓋高廟言恢復及靈嗣事也。三十八年，逆亮犯淮，江南事急，中外恟恟，羽檄交馳。高廟詔先生入殿庭，仍奏密章。拜畢，復誦章中所陳，不差一字。奏云：面奉虛皇上帝，降賜一箭。又有靈飛玉女，傳旨而出。曰：天亡此胡。三日後天下當太平。初言甚秘。及期，捷書果至，逆亮以其下作亂，中流矢死。上令學士院降詔，忽有天亡此胡，俾以身而送死之句。上大驚異，顧問學士曰：卿何有

天亡此胡之句。學士奏曰：臣夜來夢一金甲神人，語臣曰：上帝勅旨已下，天亡此胡。臣遂下一句綴之。高廟大喜，勅賜洞微高士。繼進贊化先生。賜資榮寵。是後朝廷凡有醮禮，皆屬先生主典之。左街道錄劉能真，初嗣先生上清靈寶大法，眷寵兩朝。以先生上章之驗，惡其壓己，嫉妬不平，於是有殺羿之心，大興謗訕。孝宗皇帝即位，初年起張魏公浚爲樞密使都督江淮兵馬，首命先生占之。先生曰：今日出師不利，相公將有險職之譴。張浚大怒，以爲訛言，阻遏重器。而劉能真黨於內豎謝安道、魯允修，及統制官陳瑤、李嶸，共陷先生，拘付後司獄，實欲置之死地。先生被囚十餘日，神色怡然。張浚問之，始無必殺之意，遂黥隸軍籍。不數月，張浚果失職，落樞密使都督，改江淮宣撫。先生以能真陷己，具章奏劾之帝師，有令臣求生不得，求死不得之語，正以咎師之罪。乃立誓曰：東華靈寶上道宗派，真真相授，不許傳黃冠。未幾，能真以譴死。

斯人也，開山御前三茅觀，內渡以來，傳道最先。背師若是，誠惡逆之子也。先生遂晦跡深遯，益勤修練。士夫慕其道而歸之者如市。浙右諸處士庶，多率錢建齋醮，或度幽魂，或弭兵戈，或祈晴雨，動有玄報，不可殫紀。天臺巾子山素有飛猴，爲郡之患。有吳崇哲者受其害，請先生治之。見《夷堅志丁集》第一卷侯將軍事。因受其崇之醜，一日際午，忽命家人篝燈，家人以日中告。始歎曰：吾受鬼贓，故獲所譴。典章表者，急書章謝罪，墨汙其紙者至再。先生曰：天省不允，無如之何。自是喪明。然於上道宗旨，無不默記。遠方學子慕道而求者，必預知其姓名及人品高下。經法篇帙散亂者，以手捫之，即知品目所在。即以崇代一宗，付玉牒趙義夫、寶婺蘭溪何淳真。何素宦族，爲國子進士，慕先生之教，不惜重貲，延于家塾。如宋扶、何德陽、王承之、章友直、宗妙道、胡元鼎、胡次裴、趙懷政、胡仲造、杜文豫，皆受學焉。先生晚年，惟留何淳真家。



淳熙辛丑孟秋，淳真適婺女。先生謂其家人曰：我欲蛻形玉闕矣，而淳真不歸，爲別何耶。既而歎曰：吾今定業盡矣，豈有黥面漢，而可以臣事玉清也耶。乃命家童取水洗之，肌肉如初。良久復曰：豈有一瞽目漢，而可以上朝玉清也。仍取水洗之，光明還初，取繡針以線度之。有侍婢曰：三娘子者，久在左右。先生顧謂之曰：三十年不見汝面，髮垂白如是矣。又曰：我今臣事玉清，可無愧矣。俄頃解化。人但見天樂清圓，甘露下降，彩雲滿空，異香盈室，禎祥異至，實中元日也。先生生於建中靖國之辛巳七月十八日午時，得年八十有一。諸弟子斂形蓋棺，托尸於永康之同山。嗣代趙義夫上章祈度，得都省批降，先生已證位開光救苦真人。其墓迄今林木鬱秀，呼爲甯仙塚。後有鄉宦仕于蜀，見先生冠華陽巾，遊於蜀郡，猶訊及江浙間諸門人弟子云。

### 水南林先生

先生姓林，諱偉夫，字君昭，法諱

靈真。世爲溫之平陽林坳人。祖竈，官至武經郎。父嗣孫，官至保義郎。母夫人徐氏，南宮舍人桃渚徐公儼夫之妹也。保義公篤好修行，家素富貴，與夫人舉案。次嘗曰：吾宗桂枝林氏，蕃衍昌大，詩書之澤未艾，何使我有伯道之戚耶。夫人每於清晨靜夜，必露香密禱焉。一夕，夫人夢洪水自南澆漲其境，孟載一嬰兒激波而至。夫人視曰：勿使溺也。遂撫抱之，而覺有感，隨娠。乃以宋嘉熙己亥九月二十八日，生公于里第。公幼穎夙悟，資稟不凡。既長，經緯史傳、諸子百家，若方外之書，靡不洞究。而於四輔三奇、《陰符》、《畢法》之旨，獨加意焉。公每撫語言，呐呐然若不出口。其爲文則雅致混混，問見曾出。鄉之諸父老，若侍郎平坡應公節嚴，右司雲振林公千之，尤器重之。以公之種學績文如此，大則可以鳴國家之盛，小則亦當校讎群玉府。乃累舉不第，卒授登仕郎將誠漕闈。適丁時艱，笑曰：黃梁舊事，毋乃似乎。於是棄儒從道，捨宅

爲觀。家貲鉅萬，如棄弊屣。追感先夫人洪水自南之夢，自號水南。遂榜其門曰水南福地。投禮提點復庵先生戴公燭爲師。取丹元方諸之義，扁其宅曰丹元觀。安撫肖梅徐公似孫寔爲書之。觀宇內外，威儀一新，雕珉盤礎鏤竦竊，與新宮之境何以異。公每曰：予學道于虛一先生林公，東華先生薛公，于茲有年矣。幸造道域，叅玄律。詎可韞所學，而不濟於世。乃紹開東華之教，蔚爲一代真師。以度生濟死爲己任，建普度大會者不一書。性合真筌，道開幽鍵，監觀有赫，來格來寧，猗歟盛哉。會元厄於劫火。公曰：無何有之鄉，廣漠之野，有是乎。乃深隱蕃芝山修洞，將彌千日。有自括蒼山回者曰：疇昔之夜，夢坳山有道士，趺坐誦經，神光大定，慶雲繽紛，則公之德行有諸內，必形諸外。道友間多誦言之。先代教主真人企其高，渴其道，命駕速，公甚敬。扣以真機玄奧，歷歷以對。真人喜溢于容。曰：永嘉有此高人哉。乃檄公爲溫州路玄

學講師，繼陞本路道錄。公自視欲然，乃退居琳宇，盡三洞領教諸科，及歷代祖師所著內文秘典，準繩正一教法，撰輯爲篇，目爲《濟度之書》一十卷。《符章奧旨》二卷。大而告天祝聖之文，小而田里檉穰之事，修齋奉醮，粲然畢備，如上會稽，睹千巖萬壑之秀，草木朦朧，雲興霞蔚。於是携文，徧歷名山，投簡紀信。載陟龍虎，禮謁當代教主真人，情愴語契。凡所撰集，遂徹慈覽，喜命掌箋記者錄藏之，復命本路玄司長貳爲倡鋟梓，以永其傳。且授以靈寶通玄弘教法師教門高士，住持温州路天清觀事，俾歸老焉。凡弟子受道於公之門者，在州里不下百餘人。在方外則天師門下高閑董公宗師，堂下閑閑吳公，金華謝公，括蒼兩峰周公，武林槃隱王公，吳門靜境周公，派孫有廬山鍾岳于公，赤城天樂趙公，武林廛隱方公，練溪巖谷周公，虛舟平公，竹外張公，此玄門之表表尤著者。其從游叅妙，肩摩踵接，未可一一記之，亦可謂一時授受之盛。公自住天

清，不復有遠遊興，斗室焚蘭，虛緣葆真。間有願學者進之無倦，忱得有教無類之意。乃一日貽書於天任曰：吾嗣教諸子，皆在遐方，而密邇相依襲香火之緣者，維子耳。今郡中中元齋事，子盍爲我贊助焉。夏夜候涼，與其師弟存一，徜徉廊廡間。曰：吾祖父壽不滿花甲，今我寓形人間，年符大《易》六十四卦之數，亦云足矣。因命酒待月，更闌興盡，入榻危坐。呼侍者曰：我將去矣。師弟存一操紙索偈。公曰：奚用人間語哉。及左右篝燈侍前，則已端然羽化。實大德壬寅六月之二十一日也。公鶴形松貌，冰潔玉立，望而知爲許長史、陶隱居行輩中人。獨賦性以直，持志以廉，爲事多不與世合，其畸於人而侔於天者乎。孤雲馬驟，烈冶波翻，其至人乎。蓋其死宜妙契玄同，於今日也。歟公之俗子伯祥，偕座下弟子，以殯之，七日，奉劍履歸里，將以是冬葬於蕃芝山之源。天任早幸登門，粗叨入室，公之行實，獲知詳委，敢叙次如上，以干立言君子

爲之銘。大德六年十月七日門人凝和通妙觀明法師玄學講師林天任狀。


靈寶領教濟度金書卷之一

洞微高士開光救苦真人甯全真授  
靈寶通玄弘教水南先生林靈真編

壇幕制度品

開度祈禳通用


虛皇壇總圖



齋壇之制三層：內壇高三尺，方廣一丈八尺，上安纂二十枚。中壇高一尺五寸，方廣三丈，上安纂二十四枚。外壇以平地為之，方廣四丈，安纂二十八枚。三層之外，方廣四丈六尺，安花柱

三十二枚。三層壇纂，並高一丈一尺。花柱高三尺，用竹為之，塗以朱漆，植于壇邊四周方木之上。其方木如壇。每層之木長一丈一尺，厚二寸，闊三寸，鑿深竅以安纂柱也。

內層壇圖



內壇高於中壇一尺五寸，以淨堅土築成。壇周圍各安方木，周植紅纂二十枚。兩纂夾開一門，周開十門。每門用牌額，兩旁雕飛仙日月牌，掛于門楣上。楣上纂頭，用斜杈作華表形，並以竹為之。纂頭刻木蓮花，或火珠形。纂用紅繩三度，周圍攔之。第一度於纂頭蓮花下連門攔之，第二度於蓮花

下低三尺攔之，第三度於第二度下低三尺攔之。第二度、第三度只攔餘門，不攔西北一門，留以備出入。又於纂頭四角相對處，交加紼縛以助牢固。兩纂之間，第二度紅繩下懸小綵幡，第三度紅繩下懸釣枝像生花。每纂第二度紅繩下指人手可到處，安一燈，以紅紗燈圈罩之。遇夜然點。纂頭蓮花下離纂相去三寸，懸木纂符幡，以竹橫標之。壇周圍用花帛裹碧色為上，不欲見土也。天門外造踏級二層，以備登降上下。

內壇十門牌額前面書門名，朱書天文四字于牌額後面。

- 東曰：青華元陽之門。朱書青榜。
- 南曰：洞陽大光之門。黃書赤榜。
- 西曰：通陰金闕之門。黑書白榜。
- 北曰：陰生廣靈之門。青書黑榜。
- 東北曰：靈通禁上之門。白書黃榜。
- 東南曰：始陽生氣之門。白書黃榜。
- 西南曰：元皇高晨之門。白書黃榜。
- 西北曰：九仙梵行之門。白書黃榜。
- 上方曰：大羅飛梵之門。青書白榜。

下方曰：九靈真皇之門。黃書青榜。天文

上	北西	南西	南東	北東	北	西	南	東
𠄎	𠄎	𠄎	𠄎	𠄎	𠄎	𠄎	𠄎	𠄎


下

壇纂二十枚，每纂各一符旛，自西北天門為始，左旋。東門用青帛，南赤，西白，北黑，四維黃，上玄下黃，各以所宜色書符。


七	六	五	四	三	二	一
𠄎	𠄎	𠄎	𠄎	𠄎	𠄎	𠄎

六十	五十	四十	三十	二十	一十	十	九	八
𠄎	𠄎	𠄎	𠄎	𠄎	𠄎	𠄎	𠄎	𠄎

中壇高於外壇一尺五寸，亦以淨堅木結成。壇周圍各安方木，周植紅纂二十四枚。惟四角開四門，餘並單纂。纂頭刻蓮花，門楣上掛牌額。自蓮花下三度，以紅繩攔之，只留地戶一門不



中層壇圖



攔。兩纂之間，懸綵旛枝花。仍每纂安一燈。離纂掛符旛，花帛裏壇，築踏級於地戶外，並如內層法。

中壇四門牌額書門名于前。又以朱書天文四字，于各牌之後。

天門。青書黑榜。地戶。黃書赤榜。

日門。黃書青榜。月門。黃書白榜。



天門  
天門


地戶  
地戶

日門  
日門


月門  
月門

壇纂二十四枚，每纂各一符旛，自東南地戶為始，左旋。東青，南赤，西白，北黑。每方各六旛。又以旛所宜色書符。






外壇就地面為之，周圍各安方木，周植紅纂二十八枚。惟正南開一門，餘並



外層壇圖



單纂。纂頭刻蓮花，門楣上掛牌額。自蓮花下三度，以紅繩攔之，只留南門不攔。兩纂之間，懸綵幡枝花。仍每纂安一燈。離纂掛符籙。並如中層法牌額。惟南門掛于門楣上。餘七枚標于單纂蓮花下。

外壇八門牌額書門名于前。又以朱書天文四字，于各牌之後。

東曰：震宮洞青之炁。青書黃榜。

南曰：離宮洞陽之炁。朱書白榜。

西曰：兌宮少陰之炁。白書青榜。

北曰：坎宮洞陰之炁。黑書赤榜。


東北曰：艮宮梵元之炁。黃書黑榜。

東南曰：巽宮梵行之炁。黃書黑榜。






西南曰：坤宮梵陽之炁。黃書黑榜。










西北曰：乾宮梵通之炁。黃書黑榜。












北東	南東	南西	北西
			


壇纂二十八枚，每纂各一符籙，自南門為始，左旋。依五方色，以帛為之。又以帛上所宜色書符。

一	二	三	四	五
				

六	七	八	九	十	十一	二十	三十	四十
								


五十	六十	七十	八十	九十	十二	一十二	二十二	三十二
								

四十二 五十二 六十二 七十二 八十二




以上三層，謂之齋壇。壇外四周，各廣三尺，以花柱攔之。周圍各安金錄燈，在花柱內。

金錄燈圖




天門上三十六燈，照三十六天。道戶上二燈，照住宅。地戶上二十四燈，照二十四戶。天門上二燈，照宅舍。十方十燈，照十方。八向九燈，照九宮。中宮寄二宮。八方八燈，照八卦。五方五燈，照五嶽。中嶽寄西南。中庭九燈，照九幽。寄南方。壇堂七燈，照七祖。寄南方。四面二十八座燈，照二十八宿。惟本命燈三，照三魂。行年燈七，照七魄。太歲燈一，照太歲。各安其方。大墓燈三，照大墓。小墓燈五，照小墓。各以本命，推大小墓所在安之。却移別燈，待疏密得宜。

二十八宿燈圖




三十六天燈，二十四炁燈，並三重錯綜安之。其三丘、五墓、三魂、七魄、九幽等燈，並如意造之。經無圖形也。

壇上陳設圖



壇內層及中層，並以厚軟薦席鋪三重，又以綵裯鋪其上。內層中列三寶牌位，四周列十方天尊牌位。上方次西北，下方次東南，並左旋。其三寶位高







壇前立左右幕在兩壁。如平常建齋，只立二幕，左六師，右三官。如建黃籙齋，則立六幕，左玄師，次天師，次監齋大法師；右五帝，次三官，次三師。每幕皆以幔圍之三面，中懸聖像，香花燈燭，供養如法。

### 靜默堂

今謂之靖室。飾以幔帷，中設法師本派祖、玄、真師，經、籍、度師聖像，香花燈燭，供養如法。兩傍設二高座，法師、都講居之。餘壇官及監齋以下，依序列坐兩廂。凡壇內及壇前行事，並自靜默堂出入，須擇近齋壇處為之。

### 精思閣

法師書篆符籙、看誦經呪之所。地宜幽僻，門可啓閉，中飾幔帷，奉安法師隨行香火及劍印之屬，懸靈寶官屬聖像于後，以香花燈燭，供養如法。

### 監臨幕

在壇前正門外之左右，係東嶽大判官、州縣城隍、司里域正神當處，威靈廟貌，請來監壇者。飾以幔帷，設像或立牌位，分左右班列于門外，香花燈燭，

供養如法。

### 將吏幕

在壇前近處。飾以幔帷，中設像或立牌，安奉法師隨行諸司將吏，香花燈燭，供養如法。

### 章官幕

在壇之近處。飾以幔帷，設章官牌位，香花燈燭，供養如法。

### 一章壇

在壇前天井中，露天築成，三層，如齋壇之制。上層高三尺，壇向天門。法師運神進章取旨，並於壇上行事。

### 三界醮壇圖



醮壇，即醮筵也。中間高，設三清座前，留數尺許，通人行。又設七御座，每位高牌曲几，香花燈燭，供養如法。蓋玉清為教門之尊，昊天為三界之尊，

各居一列，各全其尊。故也開度則東極救苦上帝、南極朱陵大帝，祈禳則東極青玄上帝、東極青華大帝。救苦即青玄，只避世間名字，拘忌耳。左右班列聖位，以外為尊，不立牌位。緣三班秩等差，難以世間管見測度。惟當付之降聖司，令自排高下可也。別立掌醮、降聖二位，先期請降，正為此耳。兩班醮筵，只聯案通排，香花燈燭，供養如法。自中至外，設三香案，外以備請聖用，次以盛黃道，中則總供養也。

### 神虎幕

開度通用

以近齋壇處為之。飾以幔帷，中懸聖像及牌位，香花燈燭，供養如法。前立陽耀通關、陰靈攝魄二壇，召魂幡植其中，榜文曉諭，掛于幕之前。

### 正度幕

以中堂鋪設，或懸遺像，或立神主，香花燈燭，供養如法。如未葬，則就靈座前為之。須先行藏棺儀，上藏棺表，然不可與齋壇相近。相去百二十步，可也。

承受幕，天醫幕，監生幕，驛吏幕，沐浴幕，巾笥幕，

解結幕，混元幕。

並近齋壇前爲之。飾以幔帷，中設牌位，香花燈燭，供養如法。榜文曉諭，掛于幕前。

### 鍊度幕

安奉鍊度官吏。中設牌位，飾以幔帷，香花燈燭，供養如法。榜文曉諭，掛于幕前。

### 茭郭


安在壇側幽曠之處。縛茭草爲之，周圍闊六尺，高一丈，四面開門，以簾蔽之，頂用茭蓋，大抵如屋之狀。召到幽魂，安此處，俟候鍊度。

### 三官醮筵

### 冥官醮筵

並隨儀陳設，事畢，撤去。


### 九獄燈圖



用淨砂半石，水洗淨，日乾。至破獄


日，以砂作獄九所。每所中安獄牌，上書獄名，如東方風雷獄之類。牌後插破獄幡，然三燈照之，圍以砂城。九獄之外，又總圍以大砂城。四方各開一門，每門設二燈。破九幽獄畢，又破豐都獄。豐都天獄二十四獄，三十六獄，只告符勅破，不立獄像也。

### 三塗五苦燈壇圖




亦用淨砂，鋪成三塗獄在內，以獄城圍之。中安一燈，周設九燈。五苦獄在外，亦以獄城圍之，周設十五燈，每處立牌幡如前式。內獄城植天尊號幡八首，外獄城植天尊號幡十六首，並周圍設之。

### 諸大地獄燈壇圖




亦以淨砂爲之，每獄四燈；獄外城八燈；共四十四燈。

### 明真鍊度壇圖明真齋獨用



鍊度壇隨意鋪設，中懸朱陵大帝聖像，前立高座，香花燈燭，供養如儀。次列鍊度官將牌位，鍊度醮於此設之。左立九天壇，右立五帝壇，各立牌位符幡，香燈列于几上。水火池，則以水盆盛水一器居右，以火鑪盛柳炭火一器居左，列于地面，用淨沙取巧，鋪作水火符，或流火亭雲氣之狀，務令新奇，在人無拘。次其前列給付符籙，及獻納錢馬，分于左右。又其前，則壇官法師、侍職宣科、道衆立班處也。


### 九鍊天尊壇開度黃籙齋獨用



大九鍊壇，依豁落斗，設九天尊位大


牌，高座，香花燈燭，供養如法。隨天尊所用符籙，各列于几前，設水火池於中央火鍊丹界天尊前，餘如上法。

### 道場陳設圖 血湖道場獨用



凡建齋開度產魂，先建血湖道場，召官吏蕩穢淨神，方可朝覲齋壇，快睹天光也。其法壇中設三清、太乙、元皇位，左右立神虎、驛龍二幕，外又立解結、監生、天醫、混元、澣濯、巾笏六幕。並各以幔帷三周。前垂簾，中安本幕合用物件。如監生幕，則立產室。天醫幕，則設藥鑪藥器。澣濯司，則立浴盆淨巾。巾笏司，則設粧盃等物。雖分為六幕，其監生幕又與天醫幕相通，澣濯幕又與巾笏幕相通，方可裏雖相通，外仍各垂簾，蓋女魂宜通俗安排。余昔日臨壇，親見報應矣。其神虎、驛龍二幕，與此六幕，各設牌位，供養如上法。

### 血湖燈壇圖




此燈於亡人卧床下，掘地深三尺，方六尺，作獄，染成紅沙鋪城。中植青旛，朱字書地獄名。無間五燈，血湖七燈，硤石三燈，產魂經由處一燈，溟泠穴一燈，周圍用二十八燈鋪之。

### 青玄齋獨用

#### 上層壇

以十方救苦天尊，易十方靈寶天尊，餘如上法。

### 鍊度壇圖



青玄鍊度壇，中設太乙像及鍊度官吏牌位，其前左右，立籙功、監察、移籍、

仙魂、專度、部衛六幕，各設官吏牌位，香花燈燭，供養如法。其水火池，又在六司幕之前，餘依科行之。

### 九天生神齋獨用

#### 上層壇

以九天帝改為天尊，易十方靈寶天尊牌。自鬱單無量天尊為首，在東北，次上上禪善在東，梵監須延在東南，寂然兜術在南，波羅尼密在西南，洞玄應聲在西，靈化梵輔在西北，高虛清明在北，無想無結無愛在中。只用九位，不用上下二方也。

### 鍊度壇

鍊度壇如明真之制。除五帝壇不用，則用九天帝大牌，高几，各以香花燈燭，供養如法。其方位則鬱單北，禪善南，須延東，兜術西，波羅中，應聲東北，靈化西南，高虛東南，無愛西北也，餘如上。

### 靈官幕醮獻時隨宜設之，事已撤去

### 十回度人道場獨用

#### 上層壇


即是十方靈寶天尊位，各於位側，添設十

方神主位，其牌位比天尊牌位令低小些。

### 玄曹幕

設於壇前，與壇相對，即鍊度諸司是也

### 鍊度幕



於法師座前，立水火池，池前立五帝壇，壇前立三十二天壇。各設牌位供養，餘如上法。

### 度星齋獨用

### 壇燈圖

東七宿三十三星，南七宿三十二星，西七宿五十星，北七宿六十三星，中北斗七星，並描於絳紗燈屏之上。屏後安一燈，隨方置之，香燭供養如法。其燈用淨沙染五色，各作一堆，燈盞安其上，凡五燈。

### 紫庭幕


就壇前近處爲之。中設牌位，香花燈燭，供養如法。

### 預修黃籙齋獨用

### 天曹壽生幕

獻壽生醮時陳設。事已則撤去也

### 受度壇圖



預修受度壇，中設衆真監度牌位，次依九靈設九天尊位，並香花燈燭，供養如法。法師高座在前，與九天尊相對。受度弟子又在高座前，每授符令，侍職遞與之。

### 關燈獨用

### 十一曜燈圖

### 北斗燈圖


### 南斗燈圖

### 周天燈圖

右三燈，並如常鋪設在道場前。如淨沙鋪之，不用米。十一曜十一燈，南斗六燈，北斗九燈。


### 安宅齋獨用

### 弧矢燈圖



弧矢燈六星，以淨沙鋪之，安於卓上，周圍以二十四燈鋪之。若平常關祝，則正鋪。若修造犯何方神殺興災，則以矢向其方射之。外周設二十四燈，凡按天象弧矢九星。

### 九宮八卦燈壇圖



九宮八卦燈，亦以淨沙鋪之，凡五十三燈。

### 七曜齋獨用

### 上層壇

壇上立七曜牌位，附於十方天尊牌位之旁。日附東北，月附東南，土附西南，木火金水則附四正也。

### 玄靈璇璣齋獨用

### 上層壇

壇上除十方天尊牌位不用，別用九星牌位：貪狼，南。巨門，東北。祿存，西。文曲，西北。武曲，東南。破軍，

東。左輔，西南。右弼，北。廉貞，則附西南也。若以九星飛宮法，隨月排定，尤妙。

### 雷霆齋獨用

#### 上層壇

壇上除十方天尊牌位不用，別用九宸牌位：長生，坎。青華，坤。普化，震。雷祖，巽。碧玉，中。洞淵，乾。六波，兌。可韓，艮。採訪，離。香花燈燭，供養如法也。


#### 雷壇

就壇前，以粉畫地為方壇三重。內重列鄧、辛、張三位，鄧在離，辛在震，張在巽。四角立四溟大神位。其前各安一缸盛水，以磚符鎮水中。壇心植旗，旗兩旁安劍令印式。中重列五雷使者位：東蔣，南畢，西華，北雷，中陳則附於坤位。外重列蠻雷使者位：東馬，南郭，西方，北鄧，中田亦附於坤位。每位並香花燈燭，供養如法。其法師所部雷將，依方位遍列中重。其城隍里域、當境廟貌、龍潭靈跡、當季行雷霆風雨神祇，並環列下重。務令疏密

得宜也。

### 祈禳十回度人道場合用

#### 三十二天燈圖



內層清微、禹餘、大赤三天也，外層三十二天也。共用三十六燈，餘以沙鋪成網氣。每燈各立一牌，清微，乾。禹餘，艮。大赤，離。其三十二天，皇曾天在北，乾位。以次順行周布，賈奔天在乾西。每燈各懸一幡，一書本天符，見後卷。

#### 靈寶領教濟度金書卷之一

### 靈寶領教濟度金書卷之二

洞微高士開光救苦真人甯全真授靈寶通玄弘教水南先生林靈真編

#### 壇信經例品

開度祈禳通用

#### 黃籙壇內合用

金龍十枚。各重一兩，長三寸六分。天子用上金，公侯用次金，士庶用銀銅塗金。缺者考屬陰官曹。

玉壁十枚。以圓玉為之，徑二寸四分，厚二分。缺者考屬九都曹。

鎮綵十段。東青九，南赤三，西白七，北黑五，四維黃各十二，上碧三十二，下黃三十一。天子以匹，諸侯以丈，士庶以尺。缺者考屬玄都曹。

本命繒。天子紫以匹，諸侯白以丈，士庶用納音色以尺，隨本命年數加一。缺者考屬玄都曹。

硯十箇，筆十管，墨十錠，紙十軸。每方十二幅，缺者考屬天官曹。

香華十盤。缺者考屬陰官曹。

米二斛四斗。缺者考屬天官曹。

油二斗四升。缺者考屬陰官曹。

炭二十四斤。缺者考屬陽官曹。

金錢二萬四千。缺者考屬玄都曹。

### 投龍簡合用

槿木簡三面。各長一尺二寸，闊二寸四分，厚二分。天子以玉爲之，餘人並用木，朱書五行。缺者考屬九都曹。

金龍三枚。式並同前。

玉璧三枚。天璧蒼色圓形，地璧黃色方形，水璧黑色六角形，並厚二分，徑二寸四分。缺者考屬九都曹。

金鈕二十七枚。徑九分，天子用上金，臣庶以銀銅塗金。缺者考屬陰官曹。

### 上章合用

鎮綵。天子紫，以匹數；王公本命色，丈數；士庶納青色，尺數，各隨年數。

鎮錢一千二百。天子用上金，王公用銀，士庶用銅。

祿米。天子三石六斗，王公二石四斗，庶人一石二斗。

鎮油。天子一石二斗，王公六斗四升，士庶二斗四升。

信香。天子一斤，王公半斤，士庶三兩。

紙一百張，筆墨硯各一，銀環一雙，龍頭書刀一副，金魚一雙，玉鴈一

雙，鎮柴五斤，鎮炭五斤，鹽一斤，豉一斤。

### 餘齋壇內合用

金龍五枚。五方用。

玉璧五枚。五方用。

本命繒鎮綵五段。五方用。

米炭油錢。並如前數。

### 修奉節目

#### 開度黃籙齋五日節目

諸建開度黃籙大齋，宜於百日前，齋主具詞詣法師，請建齋開度先亡。法師受詞，騰奏三天門下省，泰玄樞機三省。法師擇日，飛神金闕，面奏取旨。如未得俞旨，越數日又面奏，懇切控告。凡三次不允，則其人不當得度，法師宜辭齋主，以投詞還之。如已得俞旨，即具奏三天門下省，泰玄樞機三省，東極救苦天尊，玄師。申三官大帝，五嶽五山聖帝，酆都大帝，扶桑大帝，本派度師。牒本靖官將，東嶽地府水府掌亡人案，亡者所屬冥曹，某州社

令司，某州城隍司，某縣城隍司，里域真官，劄本家土地司命，預告齋意。仍申玄虛監察應感靈司符，致功曹三界符使，暨告盟旛，關聞十方。自此法師與齋主對齋，不交人事。每日法師默朝三天，爲亡者懺罪。誦《度人九章》、《九幽救苦生天》諸經，宣玉皇、東極、九幽諸天尊號，禮大小朝天、九幽、三官、三清諸懺，以此功德遍及幽冥，至建齋一月之先，法師再擇日審奏三天門下省，泰玄樞機三省，東極救苦天尊，玄師。申三官大帝，東嶽泰山府，酆都大帝，扶桑大帝，本派度師，牒本靖官將，東嶽地府水府掌亡人案主者，亡人所屬冥曹，某州社令司，某州城隍司，某縣城隍司，里域真官，劄本家土地司命，審告齋期。至建齋七日之先，正奏玉清大帝，上清大帝，太清大帝，昊天上帝，紫微大帝，天皇帝，救苦天尊，九幽拔罪天尊，十方靈寶天尊，朱陵大帝，雷霆九宸，后土皇地祇，九天上帝，五老上帝，三十二天上帝。玄師三天門下省，泰玄樞機三省，東華道

君，東華木公，西靈金母，青林道君。正申太陽帝君，太陰皇君，五星真君，北斗真君，南斗真君，二十八宿星君，三官大帝，四聖真君，九天諸司真君，天曹諸司真君，南宮列位真君，靈寶天仙內院，神霄真王府，南昌上宮，朱陵火府，青玄黃籙院，上清黃籙院，校量功德院，北魁玄範府，九天司命府，九天普度院，北極驅邪院，上清天樞院，上清童初院，上清天醫院，九天監生司，雷霆九司，三洞經籙符篆上清高真，天真皇人，妙行真人，大慈大悲二真人，普救真人，玄一三真人，太極左仙公沖應真人，靈寶經籍度三師，監齋大法師，三元真君，十方飛天神王，三天門下諸魔王，三天五帝大魔王，本派師祖，本派度師，三茅真君，五嶽聖帝，酆都大帝，洞天仙官，福地仙官，治化仙官，十宮真君，九壘土皇君，扶桑大帝，暘谷神王，四瀆源王，四海聖王，九江水帝，牒章奏司，沐浴司，巾笥司，鍊度司，玉山大變神王，本靖官將，地道功曹，五道大神，溟泠大神，九州社令

司，十方道都大主者，九幽地獄，三塗五苦獄，八難幽關地獄，八十一地獄，三十六地獄，二十四地獄，一十八地獄，三官地獄，地府諸獄，水府諸獄，大鐵圍山，無間硤石，血湖地獄，冥關幽路主者，地府水府東嶽掌亡人案，地府六道都案，亡人經由道路神祇，本州城隍司，本縣城隍司，里域真官，監壇某神，今年某季掌風雷雨部聖衆，劄本家土地司命，通告三界修齋事由，乞赦罪放魂，赴壇受度。是日立真師幕，次宣疏。次立將吏幕，宣榜。次立章官幕，宣榜。次進拜破酆都開業道朱章，第二日進拜素車白馬朱章，第三日進拜開通道路朱章，第四日進拜攝召亡魂朱章，第五日進拜沐浴全形朱章，第六日進拜普度幽魂朱章，第七日進拜九鍊生仙昇度亡魂朱章。七章既畢，即自次日爲始，肇建齋壇，質明行大禁壇儀，檢攝齋壇，內外清淨。次立六幕，先立玄師幕，次天師幕，次監齋大法師幕，次五帝幕，次三官幕，次三師幕，並請降宣表。次立監臨幕，神虎幕，天醫

幕，混元幕，解結幕，沐浴幕，巾笥幕，承受幕，驛吏幕，鍊度幕，並請降宣榜。午前行呼陰召陽儀。次開啓齋壇，召本司諸部官將翊衛。次奏三天門下省，泰玄樞機省，進呈玉清大赦及救苦簡，得旨頒行，遂迎登赦臺，先宣簡，次宣赦。午後發放召魂符札。次設三官醮，次設北陰醮。入夜，請光分燈。次關金籙燈。次宿啓告齋，行捲簾儀，上表入壇，安鎮補職，說戒宣禁，行宿啓儀，告行太上救赦生天寶籙，東極青宮九龍符命，玉清破地獄真符，玉清拔幽魂真符。次關燈破獄。次關三塗五苦燈。第二日清旦，升壇行道，上通天救苦表，告行神霄三簡。次升壇誦經。臨午，升壇行道，告行三官簡。次又升壇誦經。次豎立命靈幡。次發催召正度文檄。落景，升壇行道，告行九幽二簡。入夜，關九天生神燈，夜中召攝正度魂靈，及七祖九幽亡者身後冤仇，赴壇沐浴，全形醫治，解結呪獻。法食安奉。第三日清旦，升壇行道，告行虛皇十簡。次升壇誦經。臨午，升壇行道，



告行金書寶誥，三炷流光符命，玉元蕩滌血湖符命。次又升壇誦經。次豎回耀旛。次發催召孤魂滯魄文檄。落景，升壇行道，上請水火表，告行北陰十簡。入夜，關諸大地獄燈，夜中修設

玄都大獻玉山淨供。普召六道四生諸類幽魂，饗食受鍊，傳戒往生。第四日，清旦，行道，告行火府隱書九天內音。次升壇誦經。臨午，升壇行道，告行四保舉符命。次又升壇誦經。次具奏三天門下省，泰玄樞機三省，請旨，投三簡。落景，次豎遷神寶旛，升壇行道，上請水火表，告行長生簡，登真度命出離生死靈符。次豎超度旛。次引靈傳戒，燒獻財馬。夜中，設鍊度醮，鍊度正度魂儀，傳授符籙，發詣黃籙院，證果超生。第五日清旦，發請醮表狀。次散壇，上齋詞，上言功朱表，告行三簡還戒，納職起鎮。次辭三寶衆聖。次設醮，埋土簡。次辭玄師。次辭天師。次辭監齋大法師。次辭五帝。次辭三官。次辭三師，並上表徹幕。午後，誦醮中經。入夜，開啓醮壇請聖，

設謝恩醮，進醮中青詞表狀，獻經文車輦財馬，送真師。次發回監臨，齋生與法師交賀禮成。次遣至誠子弟，同法師親信道士，分往洞天福地、水府潭洞形勝處，投山水簡，設醮埋投如儀。

#### 明真齋三日節目

諸建明真大齋，宜於月日前騰詞，具奏三天門下省，泰玄樞機三省，太乙救苦天尊，玄師。申三官，東嶽地府水府，本派度師。牒本靖官將，某州社令司，某州城隍司，某縣城隍司，里域真官，劄本家土地司命，預告齋期。自後法師默朝，爲亡者懺罪，看誦經懺。至建齋前一日，具奏玉清大帝，上清大帝，太清大帝，昊天上帝，紫微大帝，天皇大帝，救苦天尊，十方靈寶天尊，后土皇地祇，九天上帝，五老上帝，三十二天上帝，玄師，三天門下省，泰玄樞機三省，申太陽帝君，太陰皇君，五星真君，南斗真君，北斗真君，三官大帝，九天諸司真君，天曹諸司真君，南昌鍊度司，上清天樞院，玄一三真人，靈寶經籍度三師，監齋大法師，三元真君，五

嶽五山聖帝，地府酆都大帝，水府扶桑大帝，十真君，本派度師，牒本靖官吏，地道功曹，五道大神，某州社令司，本州城隍司，本縣城隍司，里域真官，監壇某神，劄本家土地司命，遍告齋意，乞赦罪放魂，赴壇受度。是日設章官醮，進拜酆都赦罪朱章。建齋之日清旦，立真師幕。次行小禁壇儀。次立六師幕，三官幕，並請降上表。次立監臨幕，宣榜。午前行呼陰召陽儀。次開啓齋壇，召本司諸部官吏翊衛。午後進拜沐浴鍊度朱章。次頒宣太上勅赦生天寶籙。次發放召魂符札。入夜，請光分燈，宿啓告齋，安鎮補職說戒，告行救苦真符，東極青宮九龍符命，玉清破地獄真符，玉清拔幽魂真符。次關燈破獄，夜中發催召文檄，攝召正度魂靈，及亡者身後冤仇，本宗先遠滯識，赴壇沐浴，全形醫治，解結呪獻，法食安奉。次日清旦行道，上通天救苦表。次臨午行道，落景行道，上請水火表，告行登真度命出離生死簡，長生靈符。入夜，關諸大地獄燈，修設玉

清溟滓大梵甘露淨供，普召六道四生諸類幽魂，饗食受鍊，傳戒超生。第三日清旦，升壇誦經。臨午，又升壇誦經。次進拜升度亡魂朱章。落景，散壇，上言功表，還戒納職起鎮。次辭五師幕。次辭三官幕。並上表送聖。次引靈傳戒，焚化錢馬。入夜，設鍊度醮，鍊度正薦亡靈，傳授符籙，發詣南昌上宮，證果超生。夜中請聖，設醮謝恩，進獻青詞表狀財馬，發回監臨送，真師交賀。禮成如儀。

#### 遷拔道場二日節目

諸建遷拔道場，宜於期日，具奏三天門下省泰玄樞機三省，東極太乙救苦天尊。玄師。申北斗真君，南斗真君，七曜真君，三官大帝，九天諸司真君，天曹諸司真君，玄一三真人，五嶽五山聖帝，地府酆都大帝，水府扶桑大帝，本派度師。牒本州城隍司，本縣城隍司，里域真官，地道功曹，劄本家土地司命，遍告齋意，乞赦罪放魂，赴壇受度。是日立真師幕，次行小禁壇儀。午後，次發放召魂符札。入夜，分燈宿啓，立

天師幕，行宿啓儀，告行救苦簡，生天寶籙，九龍符命。次攝召正度靈儀，沐浴醫治，全形安奉。次日清旦行道，上通天救苦表，次轉誦真經。臨午行道，次拜通達幽冥遷拔亡靈朱章。落景行道，告行出離生死符，長生簡，送五師，入夜，修設經法祭鍊，普召六道諸類幽魂，與正度亡靈，一同受鍊發遣，詣東極注生宮，證果超生。夜中設三界醮，焚獻錢馬，送真師如儀。

#### 九天生神齋三日節目

諸建生神齋，宜於期日，具奏九天上帝，司命保生天尊，應元保運天尊，玄師，正一天師。申九天列位真人，九三十六真人，三官大帝，五嶽聖帝，酆都大帝，扶桑大帝，本派度師。牒九天五百靈官。本州城隍司，本縣城隍司，里域真官。本靖官將，劄本家土地司命，遍告齋意，乞赦罪放魂，赴壇受度。是日立真師幕，淨壇，次豎九天幡。次立六師幕，三官幕，並請降上表。午後，開啓齋壇。次頒玉皇寶赦。次發放召魂文牒。入夜，請光分燈，宿啓告

齋，頒行九天金書寶誥。次設靈官醮。次關祝九天神燈，夜中攝召正度亡魂，及祖宗冤仇，赴壇沐浴，全形醫治，呪食安奉。次日三朝行道，修設玉清溟滓甘露大梵淨供，普召六道四生諸類幽魂，饗食受鍊，傳戒超生。第三日早升壇，誦《生神章》。午後，散壇，上言功表。次辭六師幕，三官幕，並上表送聖。入夜，設鍊度醮。鍊度正薦亡靈，傳授符命，發詣朱陵火府，證果超生。夜中請聖，設謝恩醮，進獻青詞表狀財馬，送真師如儀。

#### 青玄黃籙救苦妙齋三日節目

諸建青玄黃籙齋，宜於期日，具奏青玄上帝，十方救苦天尊，玄師，正一天師。申救苦真人，大慧真人，十華真人，法解真人，注生宮真人，三官大帝，五嶽聖帝，酆都大帝，扶桑大帝，本派度師。牒本州城隍司，本縣城隍司，里域真官，本靖官將，青玄黃籙九司官吏，劄本家土地司命，遍告齋意，乞赦罪放魂，赴壇受度。是日立真師幕，淨壇。次豎遷神幡。次立六師幕，立三官幕，

並請降上表。午後，開啓齋壇，上通天救苦朱表。次頒九龍符命。次宣青玄寶赦。次發召魂文牒。入夜，請光分燈，安鎮補職，說戒宣禁，宿啓告齋，頒行大九龍符命。次關燈破獄，夜中攝召正度亡魂，及祖宗冤仇，赴壇沐浴，全形醫治，呪食安奉。次日三朝行道，修設青玄普度淨供，普召六道四生諸類幽魂，饗食受鍊，傳戒超生。第三日早升壇，誦《救苦經》。午後，散壇，上言功表，還戒納職起鎮。次辭六師幕，次辭三官幕，並上表送聖。入夜，設鍊度醮，上表鍊度正薦亡靈，傳符授戒。次引詣監察司，錄功司，次移籍司，仙魂司，次專度司，部衛司，發詣東極注生宮，證果往生。夜中設謝恩醮，獻錢馬，送真師如儀。

### 血湖道場一日節目

凡度產魂，形神汙穢，難以親近齋壇，須於建齋之先，擇日奏元皇上帝，太乙天尊，正一天師。申三官大帝，五嶽聖帝，酆都大帝，扶桑大帝，本派度師。牒五道大神，溟泠大神，血湖獄靈官，

本州城隍司，本縣城隍司，里域真官，本靖官將，劄本家土地司命，遍告齋意，乞赦罪放魂，赴壇受度。是日立真師幕，淨壇，進拜蕩滌血湖朱章。次啓聖請赦札。次立驛龍幕，頒赦。次立神虎幕，頒札召魂。落景，設血湖靈官醮。次關血湖燈破獄。次立六司幕，召魂赴壇。先詣解結司，次詣監生司，次天醫司，次混元司，次澣濯司，次巾笥司，解除垢穢，引詣靈座前，安奉呪食。次日以後，方建大功德開度也。

### 十回度人經法道場二日節目

十回度人經法道場，宜於期日，具奏三清大帝，三天門下省，十方靈寶天尊，三十二天上帝，玄師，泰玄樞機三省。申南昌上宮十方飛天神王，三官大帝，五嶽聖帝，酆都大帝，扶桑大帝，本派度師。牒侍經玉童玉女，本靖官將，仙曹諸司，本州城隍司，本縣城隍司，里域真官，劄本家土地司命，遍告齋意，乞赦罪放魂，赴壇聞經聽法。午後，立真師幕。次立玄師幕，開啓齋壇。次發放召魂符札。入夜，宿啓玄壇，關燈

破獄，攝召正度魂靈，及宗祖冤仇，赴壇全形，沐浴安奉。次日清旦，卯初第一時升壇，誦經上表告符。辰末第二時升壇，誦經。午初第三時升壇，誦經。未末第四時升壇，誦經。酉初第五時升壇，誦經。戌末第六時升壇，誦經，並告符上表。次設真靈醮。次講經。次奉行經法鍊度，傳授符錄，發詣南昌上宮，證果超生。送玄師及真師，如儀。

### 滅度五鍊生尸齋三日節目

諸建五鍊生尸齋，宜於期日，具奏玉清大帝，上清大帝，太清大帝，昊天上帝，紫微大帝，天皇帝，長生大帝，救苦天尊，十方靈寶天尊，后土皇地祇，九天上帝，五老上帝，三十二天上帝，玄師，三天門下省，泰玄樞機三省，申太陽帝君，太陰皇君，五星真君，南斗真君，北斗真君，三官大帝，九天諸司真君，天曹諸司真君，上清天樞院真君，北極驅邪院真君，玄一三真人，雷霆九司，靈寶經籍度三師，監齋大法師，三元真君，五嶽聖帝，酆都大帝，扶桑大

帝，十官真君，本派度師，本派祖師。牒本靖官吏，地道功曹，某州社令司，本州城隍司，本縣城隍司，里域真官，監壇某神，元所受經錄法部官將，劄本家土地司命，遍告齋意。建齋之日，清旦立真師幕。次行小禁壇儀。次立六師幕，三官幕，並請降上表。次立監臨

聖。次引靈傳戒，焚化財馬。入夜，設鍊度醮，鍊度正薦亡靈，傳授符錄，發詣南昌上宮，證果超生。夜中，請聖設謝恩醮，進獻青詞表狀財馬，發回監臨，送真師，發回元所部官將，如儀。

### 師友命過行道誦經道場節目

幕，宣榜。午前行呼陰召陽儀。次開啓齋壇，召本司所部官將翊衛。午後發放召魂符札。入夜，請光分燈，宿啓告齋，安鎮補職說戒，告行救苦真符，東極九龍符命，破地獄真符，拔幽魂真符。次關燈破獄，夜中發催召文檄，攝召正度亡魂赴壇，沐浴化衣，獻食安奉。次日，清旦行道。次臨午行道，進拜滅度鍊尸生仙朱章。次落景行道，上請水火表，告行登真度命出離生死簡，長生靈符，神霄三簡。入夜，修設玉清溟滓大梵甘露淨供，普召六道四生諸類幽魂，饗食受鍊，傳戒超生。第三日，清旦升壇誦經。臨午，又升壇誦經。次散壇，上言功表，還戒納職起鎮。次辭三官幕，六師幕，並上表送

宜於期日，具奏三清大帝，三天門下省，十方靈寶天尊，三十二天上帝，玄師，泰玄樞機三省。申南昌上宮，十方飛天神王，三官大帝，五嶽聖帝，酆都大帝，扶桑大帝，本派祖師，本派度師。牒本靖仙曹官將，侍經玉童玉女，羽化法師官將，州縣城隍司，里域真官，劄本家土地司命，遍告齋意。午後，立真師幕，玄師幕，開啓齋壇。次發放召魂符檄。入夜，宿啓玄壇，攝召正度赴壇，全形沐浴安奉。次日，清旦行道，誦《四正經》，上表告符。臨午，行道誦《四維經》，上表告符。落景，行道誦念《上下經》，上表告符，設真靈醮。入夜，鍊度，或設斛如常，或欲上章，宜於第一日午後也。

### 度星滅罪齋三日節目

明真度星滅罪齋，所以斷復連，度先亡，保見在。宜於期日，具奏玉清大帝，上清大帝，太清大帝，昊天上帝，紫微大帝，天皇大帝，救苦天尊，后土皇地祇，九天上帝，五老上帝，玄師，三天門下省，泰玄樞機三省。申七曜北斗真君，三官大帝，天曹諸司真君，南昌鍊度司，上清天樞院，紫庭真人，靈寶經籍度三師，監齋大法師，五嶽聖帝，酆都大帝，扶桑大帝，十殿真君，本派度師。牒本靖官吏，紫庭官將，溟滓大梵靈官，地道功曹，某州社令司，州縣城隍司，里域真官，監壇某神，劄本家土地司命，遍告齋意，乞赦罪放魂，赴壇受度。是日立真師幕，行小禁壇儀。次立六師幕，三官幕，並請降上表。次立監臨幕，宣榜。午前行呼陰召陽儀。次開啓齋壇，召本司諸部官吏翊衛。次頒宣太上敕赦生天寶錄，次發放召魂符札。入夜，請光分燈，宿啓告齋，安鎮補職說戒，告行救苦真符，九龍符命，玉清破地獄真符，拔幽魂真符。次

關證破嶽，夜中發催召文檄，攝召正度亡魂，及祖宗冤仇，赴壇醫治，呪食安奉。次日，清旦行道，上通天救苦表。臨午，行道，告行出離生死簡長生簡。次設章官醮，進拜斷絕復連朱章。落景，設紫庭幕醮。次升壇行道，關五斗燈，行斷絕法，上請水火表。入夜修設玉清大梵甘露淨供，普召六道四生諸類幽魂，饗食受鍊，傳戒超生。第三日，清旦臨午，並升壇誦經。次進拜升度亡靈朱章。落景，散壇，上言功表。次辭五師幕，三官幕，並上表送聖。次引靈傳戒，焚化錢馬。入夜，設鍊度醮，鍊度正薦亡靈，傳授符籙，發詣南宮，證果超生。夜中，請聖設謝恩醮，進獻青詞表狀財馬，發回監臨，送真師如儀。次日，醮紫庭官將，埋銅牛鐵簡，保護家宅，屬考召部。

### 祈禳黃籙齋五日節目

保身命，護家宅，資經營，宜修祈禳黃籙齋。預於三日前，具奏玉清大帝，上清大帝，太清大帝，昊天上帝，紫微大帝，天皇帝，青玄上帝，長生大帝，九

天上帝，五老上帝，三十二天上帝，后土皇地祇，玄師，三天門下省，泰玄樞機三省。申太陽，太陰，五星真君，南斗真君，北斗真君，二十八宿真君，三官大帝，四聖真君，九天諸司真君，天曹諸司真君，校量功德院，北極驅邪院，上清天樞院，玄一三真人，太極左仙公，沖應真人，靈寶經、籍、度三師，監齋大法師，本派度師，本派祖師，三茅真君，五嶽聖帝，酆都大帝，扶桑大帝，牒靈寶仙曹，本靖官將，九州社令司，州縣城隍司，里域真官，監壇某神，割本家土地司命，遍告齋意。建齋初日，清旦立真師幕，宣疏。次立將吏幕，宣榜。次立監臨幕，宣榜。以行大禁壇儀。次立六幕，並請降宣表。午後行呼陰召陽儀，開啓齋壇，召本司諸部官將翊衛。入夜，請光分燈。次宿啓告齋，行捲簾儀，上表入壇，安鎮補職，說戒宣禁，行宿啓儀。第二日，清旦升壇行道，告行辟水辟火符。次升壇誦經。臨午，升壇行道，告行保壽命保官祿符。次又升壇誦經。落景，升

壇行道，告行利夫妻利子孫符。入夜，關南斗燈、北斗燈、十一曜燈，設紫府醮，禳度行年星運。第三日，清旦升壇行道，告行進人口進財寶符。次升壇誦經。臨午，升壇行道，告行保田保蚕符。次又升壇誦經。落景，升壇行道，告行利六畜除萬病符。入夜，修設玄都大獻玉山淨供，普召六道四生諸類幽魂，饗食受鍊，往生仙界。第四日，清旦升壇行道，告行遣口舌遣官訟符。次升壇誦經。臨午，升壇行道，告行辟盜賊辟瘟疫符。次又升壇誦經。落景，升壇行道，告行解冤家解呪詛符。入夜，設土府醮，獻住宅土地司命神煞，保護宅舍，導迎和氣，辟斥不祥。第五日，清旦發請醮表狀。次散壇，上齋詞，上言功朱表，告行三簡，還戒納職起鎮。次設醮，埋土簡。次辭六幕，並上表徹幕。午後，誦醮中合獻諸經。入夜，開啓醮壇，請聖設謝恩醮，進獻醮中青詞表狀經文、車輦財馬。次送真師。次發回監臨。次法師遣至誠子弟，同法師親信道士，往投山水簡，設

醮如儀。若欲就壇中進拜，諸品朱章，自隨意添入無拘，却於正申狀內添三元真君狀。

### 預修黃籙齋五日節目

預修功德，懺罪祈恩，佩九戒一符，爲身後超昇地也。宜於建齋期三日之先，具奏玉清大帝，上清大帝，太清大帝，昊天上帝，紫微大帝，天皇帝，救苦天尊，九幽拔罪天尊，十方靈寶天尊，朱陵大帝，雷霆九宸，后土皇地祇，九天上帝，五老上帝，三十二天上帝，玄師，三天門下省，泰玄樞機三省，東華木公，西靈金母。申太陽帝君，太陰皇君，五星真君，南斗真君，北斗真君，二十八宿星君，三官大帝，九天諸司真君，天曹諸司真君，校量功德院使真君，上清天樞院，北極驅邪院，上清黃籙院，南昌上宮四聖真君，玄一三真人，太極左仙公，沖應真君，雷霆九司，靈寶經、籍、度三師真君，監齋大法師，三元真君，南天諸尊神，十方飛天神王，九天金籙無量壽生神君，本派祖師，本派度師，三茅真君，五嶽聖帝，酆

都大帝，十殿真君，扶桑大帝，牒靈寶仙曹章奏司，本靖官將，地道功曹，九州社令司，州縣城隍司，里域真官，監壇某神，劄本家土地司命，遍告三界修齋事由。是日立真師幕，宣疏。次立將吏幕，宣榜。次立章官幕，宣榜。次進拜，啓告玄穹朱章。又次日，午前行自然朝，頒宣勅赦生天寶籙，告行九龍符命，玉清破地獄、拔幽魂二符。午後發神虎玉札，進拜超度祖玄解釋冤債朱章。落景，設大獻靈官醮。入夜，修建玄都大獻玉山淨供，普召弟子宗祖冤仇，洎六道四生諸類幽魂，饗食受鍊，發遣超生。又次日，肇建齋壇，質明立監臨幕，行大禁壇儀。次立六幕，並請降宣表。午後行呼陰召陽儀。次開啓齋壇，召本司諸部官將戒誓翊衛。入夜，請光分燈。次宿啓告齋，行捲簾儀，上表入壇，安鎮補職，說戒宣禁，行宿啓儀。次關九幽燈。又次日正齋日分，清旦升壇行道。次升壇誦經。臨午，升壇行道。次又升壇誦經，進拜不經地獄朱章。落景，升壇行道。入夜，

設三官醮，行禮謝儀。次設北陰醮，行禮謝儀。又次日係正齋。第二日，清旦升壇行道。次升壇誦經。臨午，升壇行道。次又升壇誦經。次進拜南昌寄籍朱章。落景，升壇行道。入夜，設壽生醮，焚化填還及寄庫財馬。又次日係正齋。第三日，清旦升壇行道。次升壇誦經。臨午，升壇行道。次又升壇誦經。次進拜衆真監度朱章。落景，升壇行道。入夜，設衆真監度醮，奉行生身受度科法，傳授二符九戒，禮謝三寶。又次日，清旦發請醮表狀，次散壇，上齋詞，上言功朱表，告行三簡，還戒納職起鎮。次辭六幕，並上表徹幕。次埋土簡。午後，誦醮中合用經。入夜，開啓醮壇，設謝恩醮，進拜青詞表狀經文、車輦財馬。次發回監臨，送真師。又次日，齋主遣至誠子弟，同法師親信道士，分往投山水簡，醮獻如儀。

### 祈禳自然齋三日節目

諸啓建祈禳齋，宜於期日，具奏玉清大帝，上清大帝，太清大帝，昊天上帝，紫

微大帝，天皇帝，長生大帝，青玄上帝，后土皇地祇，九天上帝，五老上帝，三十二天上帝，玄師，三天門下省，泰玄樞機三省。申太陽帝君，太陰皇君，五星真君，二十八宿星君，南斗真君，

北斗真君，三官大帝，九天諸司真君，天曹諸司真君，北極驅邪院，上清天樞院，玄一三真人，靈寶經、籍、度三師，監齋大法師，三元真君，本派祖師，本派度師，東嶽聖帝，酆都大帝，扶桑大帝。牒本靖官將，本州城隍司，本縣城隍司，里域真官，監臨某神，劄本家土地司命，遍告修齋事由。次立真師幕，次行小禁壇儀。午後，立六師幕。次立三官幕，並請降上表。次行呼陰召陽儀。次開啓齋壇。落景，請光分燈，宿啓安鎮，補職說戒。次關南斗燈、北斗燈、十一曜燈，禳度行年星運。第二日，清旦行道。臨午，行道。午後，進拜某章。落景，行道。入夜，修設玉清大梵甘露淨供，普召六道幽魂，祖玄冤枉，受食往生。第三日，清旦升壇誦經。臨午，又升壇誦經。落景，散壇，

上齋詞，上言功表。次辭六師幕，三官幕，上表送聖。入夜，請聖設謝恩醮，進獻醮中青詞表狀財馬，送真師如儀。所拜章文隨事選用，難以預定。

#### 消災集福道場三日節目

諸修消災集福道場，宜於期日，具奏紫微大帝，長生大帝，天皇帝，后土皇地祇，九天上帝，五老上帝，三天門下省，泰玄樞機三省，玄師，七曜真君，南斗真君，北斗真君，九天諸司真君，天曹諸司真君，三官大帝，東嶽泰山聖帝，本派祖師，本派度師。牒本靖官將，本州城隍司，本縣城隍司，里域真官，劄本家土地司命，遍告齋意。是日立真師幕，次敕水淨壇，午後，開啓齋壇，立五師幕。入夜，分燈宿啓。次關北斗燈，設醮禳度行年星運。次日，早朝行道，次看誦諸品真經，次午朝行道。次晚朝行道，送五師。入夜，設三界醮，奏獻財馬，送真師如儀。

#### 安宅齋三日節目

凡人動土架屋，恐有觸犯土神，易生災患，宜修靈寶安宅齋。期日，具奏昊天

上帝，紫微大帝，天皇帝，后土皇地祇，玄師，三天門下省，泰玄樞機三省，五老上帝，申七曜真君，南斗真君，北斗真君，營室星君，土公星君，土公吏星君，土司空星君，危宿星君，弧矢星君，三官大帝，北極驅邪院真君，上清天樞院真君，靈寶經、籍、度三師，三元真君，本派祖師，本派度師，九壘土皇君，土府大帝。牒太歲尊神，八卦大神，九宮大神，蒼靈制魔君，州縣城隍司，本靖官將，里域真官，劄本家土地司命，遍告齋意。是日立真師幕，行禁壇儀。次立天師幕，三官幕。午後，開啓齋壇。入夜，分燈宿啓告齋。次關祝九宮八卦燈、弧矢燈。次日，三朝行道。午後，進拜鎮安家宅禳謝土氣朱章。入夜，設土府醮，安鎮五方。第三日，看誦真經。午後，解散齋壇，上言功表，上齋詞，送天師，送三官，徹幕。入夜，開啓醮壇，請聖設醮，奏獻青詞表狀財馬，送真師如儀。其未造作起土，已造作犯土興災，埋符禳鎮，屬考召部。

### 七曜齋三日節目

二景五星七曜齋，本屬上清部，以《十一曜消災經》為祖。按《靈寶四十九品》云：靈寶有二十四司，第五青羅消災玉司，青羅真人主之。以《十一曜消災經》為司舉治經。然則七曜齋，亦可屬靈寶部也。宜於期日，具奏昊天上帝，紫微大帝，天皇帝，五老上帝，三天門下省，泰玄樞機三省，玄師，申太陽帝君，太陰皇君，五星真君，南斗真君，北斗真君，天曹諸司真君，三官大帝，四聖真君，三元真君，六十甲子齋主，本命元辰，四維真君，靈寶三師，本派祖師，本派度師，牒本靖官將，里域真官，州縣城隍司，劄本家土地司命，遍告齋意。是日，立真師幕，禁壇。立六師幕，三官幕，並請降宣表。午後，開啓齋壇。入夜，分燈宿啓，關南斗燈、北斗燈、十一曜燈。次日，早朝行道，上南斗符。次午朝行道，上北斗符。午後，進拜延生解厄朱章。晚朝行道，上十一曜符。入夜，設紫府醮，禳禳行年運限。第三日，早誦諸品真

經，午後散壇，上齋詞，上言功表。次辭六師幕，三官幕，並上表徹幕。入夜，開啓醮壇，請聖設醮謝恩，奏獻青詞表狀錢馬。次送真師如儀。若庚運不利，合立匱蓋護身，自屬考召部。或欲依古齋法修奉，自從其便，但在科只為帝王安鎮國祚也。

### 璇璣齋三日節目

應修玄靈璇璣齋，宜於期日，具奏紫微大帝，玉皇尊帝，太微玉帝，北斗九皇玉晨君，玄師，正一天師。申九皇夫人，九陰內妃，道德諸君，六十甲子，三官大帝，齋主本命元辰，靈寶三師，元惠真君，本派祖師，本派度師。牒本靖官將，州縣城隍司，里域真官，劄本家土地司命，遍告齋意。是日，立真師幕，禁壇。次立元素幕，元惠幕，並請降宣表。午後，開啓齋壇。入夜，分燈宿啓安鎮，補職說戒如法，關北斗燈，進拜玄靈心章。次日，三朝行道。入夜，設紫府醮，禳度行年星庚，解厄消災。第三日，清旦升壇誦經，午後散壇，上齋詞，上言功表。次納職還戒，

起鎮如法，辭元素幕，元惠幕，並上表徹幕。入夜，開啓醮壇，請聖設醮，奏獻青詞表狀錢馬。次送真師如儀。如為人禳告病患，別有科法。

### 玄靈經懺道場二日節目

玄靈經懺，專為解厄消災設也。宜於期日，具奏斗中二帝九皇，玄師，正一天師，申夫人內妃，道德諸君，六十甲子，齋主本命元辰，九宮星君，牒本靖官將，里域真官，劄本家土地司命，遍告齋意。是日，立真師幕，洒淨。入夜，宿啓關北斗燈。次日，清旦升壇，誦南方、東北方、西方經，上表宣懺告符。臨午，升壇誦西北方、中央、東南方經，上表宣懺告符。落景，升壇誦東方、西南方、北方經，上表宣懺告符。入夜，設北斗醮，解厄消災，焚獻財馬，如儀解厄。

### 保病齋三日節目

保病有三種齋。疫病，宜修保命齋。邪祟，宜修北帝齋。時常體病，宜修資福齋。歷考齋法，禳疫癘有洞淵三昧齋，其禳邪祟北帝齋，禳體病資福齋，與三



味齋俱屬洞神部。今按《靈寶四十九品》云：靈寶有二十四司，第十一伏魔天寶壇玉司，五靈玄老主之，以《伏魔經》爲司舉治經。然則北帝齋、資福齋，亦可屬靈寶部也。其三昧齋不可用。今改修保命齋，亦本於《經法四十九品》有疫毒宜修保命齋之說。其異者，彼禮十一方三洞天尊，此禮十方靈寶天尊耳。凡修保命齋，宜於期日，具奏昊天上帝，紫微大帝，五老上帝，三天門下省，泰玄樞機三省，玄師。申七曜真君，北斗真君，齋主本命元辰，三官大帝，天曹諸司真君，四聖真君，三元真君，北極驅邪院，靈寶三師君，東嶽聖帝，三茅司命，本派度師。牒本靖官將，本州城隍司，本縣城隍司，里域真官，劄本家土地司命，遍告齋意。是日，立真師幕。禁壇，宣疏。次立六師幕，次立三官幕，並上表。午後，開啓齋壇。入夜，分燈宿啓。次關北斗燈。次設醮，禳度行年星庚。次日，清旦行道告符。臨午，行道告符，進拜斷瘟保病朱章。落景，行道告符。次設瘟疫醮。第三日，清旦誦諸

品真經，臨午散壇，上言功朱表，上齋詞。次辭六師幕，三官幕，並上表徹幕。入夜，開啓醮壇，設醮請聖，進獻青詞財馬。次送真師如儀。其資福齋、北帝齋同此修建。但資福齋，宜進拜保病解厄朱章，不設瘟疫醮，却設天醫醮。北帝齋宜進拜收邪斷怪解厄保命朱章，不設瘟疫醮，却設天蓬醮而已。至於埋符結界，匱蓋禳鎮等法，自屬考召部也。

#### 傳度道場二日節目

諸傳度甯宗師派下，濟生度死諸階秘法，補上清靈寶領教嗣師者。宜先期三十二日，具投詞詣度師，祈請傳度。度師受詞，騰奏三天門下省，泰玄樞機三省，玄師。擇日，飛神金闕取旨。如未得俞旨，又須面奏，懇切控告。凡三次審奏不允，則其人不合傳授，度師宜以投詞還之。如已得俞旨，即具奏三天門下省，泰玄樞機三省，玄師。申三官大帝，東嶽泰山聖帝，本派祖師，本派度師。牒本州城隍司，本縣城隍司，里域真官，本靖官吏。劄嗣法本家法院官將，遍告齋意。自此度師與弟子

對齋，每日默朝三天，爲弟子祈恩懺罪，斷斥魔障，先期三日，正奏玉清大帝，上清大帝，太清大帝，昊天上帝，紫微大帝，天皇大帝，太乙救苦天尊，雷霆九宸，朱陵大帝，十方靈寶天尊，東華上相，西靈元君，長生大帝，后土皇地祇，九天上帝，五老上帝，三十二天上帝，玄師，三天門下省，泰玄樞機三省。申太陽帝君，太陰皇君，五星真君，南斗真君，北斗真君，二十八宿星君，三官大帝，四聖真君，九天諸司真君，天曹諸司真君，靈寶天仙內院，神霄真王府，南昌上宮，朱陵火府，上清黃籙院，青玄黃籙院，上清童初院，上清天樞院，九天司命府，玄靈璇璣府，九靈飛步章奏司，北極驅邪院，北魁玄範府，九天普度院，上清雷霆九司，三洞經籙符章上聖高真，天真皇人，十方飛天神王，三界大魔王，三元真君，三茅司命真君，靈寶祖、玄、真三師，靈寶經、籙、度三師，科教祖、玄、真三師，本派歷代宗師，本派度師，五嶽聖帝，三十六洞天仙官，七十二福地仙官，二十

八治仙官，十大洞天仙官，九壘土皇君，地府十宮真君，酆都大帝，扶桑大帝，四瀆源王，四海聖王，九江水帝，牒靈寶仙曹青玄官吏，九天官吏，玄靈官吏，神霄官吏，童初官吏，玄範官吏，九靈官吏，普度官吏，九州社令司，本州城隍司，本縣城隍司，里域真官，嗣法本家法院官將，本靖官將，遍告傳度事意，乞差降諸司官將，剋期傳度。後三日，立真師幕，開啓玄壇，進拜祈恩謝過，傳法受道朱章。是夜，立五師幕，宿啓。次日，清旦、臨午、落景三時，行道，奉行斷尸累金液鍊形科法。次開啓醮壇，請聖設醮。第二獻後，對聖傳度。次奏獻詞表財馬，送真師如儀。越三日，弟子設醮進表，用新銜。餘同上法。

### 雷霆齋節目

天色亢旱，祈求雨澤，宜按太乙十神、五運六炁、彗星禽宿、六甲干支推衍，擇吉辰建雷霆齋。期日，具奏昊天上帝，紫微大帝，天皇大帝，長生大帝，青華大帝，洞淵大帝，六波帝君，雷祖大

帝，太乙碧玉大天帝，普化天尊，可韓丈人，應元保運真君，東華后土皇地祇，三天門下省，泰玄樞機三省。申七

接連九朝，必應其雷。壇中行持罡呪，自屬考召部。

### 十回度人經法祈禳道場節目

曜真君，北斗真君，二十八宿星君，九天上帝，天曹諸司真君，四聖真君，太乙十神真君，蓬萊都水司，玄虛監察應感靈司，雷霆九司，本派度師。牒本州城隍司，本縣城隍司，鄧、辛、張三帥，四溟大神，今年某季主風雷雨部聖衆，當境靈廟，某潭龍神，玉樞五雷院官吏，大洞飛捷官吏，五方蠻雷官吏，太乙碧玉內院官吏，劄本處土地司命，遍告齋意。次立真師幕，次行小禁壇儀。次立五師幕，三官幕，並請降宣表。午後，進拜謝過祈雨朱章。次開啓齋壇。入夜，奉行驅龍捲水秘法。翌日，早朝行道，牒龍潭，投鐵符。臨午，午朝行道。落景，晚朝行道。入夜，設雷霆官將醮。第三日，早誦雷霆諸經，午後散壇，上齋詞，上言功表，次辭五師幕，三官幕，並上表徹幕。入夜，開啓醮壇，請聖設醮，奏獻青詞表狀錢馬。次送真師如儀。若齋期已滿，雨澤未通，宜

此道場乃祈禳所用。宜於期日，具奏三清大帝，三天門下省，泰玄樞機三省，十方靈寶天尊，三十二天上帝，玄師。申南昌上宮，十方飛天神王，三官大帝，東嶽泰山府。牒侍經玉童玉女，本靖官將，本州縣城隍司，當境里域司，劄本家司命六神，遍告齋意。午後，立真師幕，次立玄師幕，次開啓玄壇。入夜，宿啓，關祝五斗神燈，即北斗燈襪度行年星運。次日，清旦卯初第一時，升壇誦經，告符上表。辰末第二時升壇，午初第三時升壇，未末第四時升壇，酉初第五時升壇，戌末第六時升壇，並誦經告符上表。次設真靈醮，次講經。入夜，或關三十二天燈，或設淨供，隨意修營。次送玄師及真師如儀。祈禳度人講經，多有件目，法師臨時隨齋主意講說也。

靈寶領教濟度金書卷之三

洞微高士開光救苦真人甯全真授  
靈寶通玄弘教水南先生林靈真編

聖真班位品

開度祈禳通用

壇心三寶聖位

中位：

太上無極大道。

左位：

三十六部尊經。

右位：

玄中大法師。

壇上層十方聖位

東方：

東方無極太上靈寶天尊。

南方：

南方無極太上靈寶天尊。

西方：

西方無極太上靈寶天尊。

北方：

北方無極太上靈寶天尊。

東北方：

東北方無極太上靈寶天尊。

東南方：

東南方無極太上靈寶天尊。

西南方：

西南方無極太上靈寶天尊。

西北方：

西北方無極太上靈寶天尊。

上方：

上方無極太上靈寶天尊。

下方：

下方無極太上靈寶天尊。

壇中層十方聖位

東北方：

日宮太陽大丹炎光鬱儀帝君。

西南方：

月宮太陰黃華素曜結璘皇君。

西北方：

星宮璇璣玉衡二十八宿周天分野星君。

君。

東方：

東嶽大靈蒼光青帝真君。

南方：

南嶽慶華紫光赤帝真君。

西方：

西嶽素光曜魄太明白帝真君。

北方：

北嶽鬱微洞淵無極黑帝真君。

西南方：

中嶽黃元太光含真黃帝真君。

東南方：

水府三河四海九江水帝十二河源真君。

君。

以上九位，又有經寶，便以壇心經寶為之。此係黃籙壇，上下二十方並用。若是明真壇，只用上十方。

壇前立幕聖位

六幕

左三，從北為始。右三，從北為始。

左一幕：

三天化主玄中大法師真君。

左二幕：

三天大聖都天大法師真君。

左三幕：

靈寶監齋大法師真君。

右一幕：

東方安寶華林青靈始老九炁天君。  
南方梵寶昌陽丹靈真老三炁天君。  
西方七寶金門皓靈皇老七炁天君。  
北方洞陰朔單鬱絕五靈元老五炁天君。

中央玉寶元靈黃老一炁天君。

右二幕：

玄都玉陽七寶紫微宮總主上真自然大聖上元一品賜福天官大帝君。  
中元太陽洞曜元君二品赦罪地官元虛洞靈皇帝君。

下元金靈洞陰大帝三品解厄水官洞真太皇元老皇帝君。

右三幕：

靈寶上古經師真君。  
靈寶上古籍師真君。  
靈寶上古度師真君。

二幕

左幕：

玄師中左。天師中右。經師左一。籍師右一。度師左二。監齋右二。

右幕：

天官中。地官左。水官右。

靜默堂神位

上清三洞四輔經錄法科祖師，玄師，真師。

本靖本派經師，籍師，度師，列位真人。

章官幕神位

開度祈禳通用

三天門下上章二十四真人，左上仙，右上靈，中上神，三大將軍，三天門下上官典者，引進仙官，某治建節監功大將軍，前部效功，後部效殺，驛庭令，驛庭丞，四部監功謁者，郎吏虎賁，察奸勾騎，都官僕射，天騶甲卒，天丁力士，治中主簿，治中校尉，雲中督吏，幹佐小吏，金光童子，典章從官，通章舍人，行章童子，元始小吏，玄都力士，九光玉伯，高車司馬，通章小吏，承章令史，通章書佐，部章督郵，呈章、通章、校章、定章、刺章、印章、部章諸從事，太初、太元、太真、太素、太玄、太乙、虛無直符直事，上仙上靈二官直使，正一功曹，左右官使者，陰陽神決吏，科畢赤符吏，剛風騎置吏，驛馬上章吏，進章

鳳凰騎，上章雲龍騎，言章風發騎，御章神龍騎，奏章飛龍飛虎騎吏，五方鎮章大將軍，奏章靈官，三界傳奏功曹，十二月奏章靈官，奏章大將，呈章進章靈官，玉清總召金闕上佐，發放九天御史大夫，九天通章使者，天樞發放司流金火鈴大將，麒麟麟索二天丁，開天符命使者，五帝六甲功曹，四直玉文功曹，運神會道功曹，靈飛丁甲玉女，靈寶功曹使者，玉童玉女，直符香官，諸天承受玉女，三天上奏靈官，飛章靈官，通章玉女，玉清八威治魔都統，神慧殺鬼都伯史，玉清總領鬼兵三天大元帥，九天尚父大元帥，玉清執麾左領神王，執幢右領大神，玉清鼓幢後部力士，執節前引天丁，玉清青龍、白虎、朱雀、玄武大神，命魔仗幡大帥，玉清擲火萬里大將軍，流鈴八衝大將軍，金鉞前戮大將軍，巨天後刑大將軍，屠割使者，風火征伐大將軍，剪截鬼穢大神，明檢鬼營大將，金馬驛程大神，列言上清錄事，某靖侍衛仙官主將副將，護道監壇都元帥，某靖諸省府院司所部通進

仙官神吏。

### 承受幕神位

諸天承受玉女，上奏靈官，九天上奏靈官，中天承受玉女，玉清發放大將軍，天樞發放司主吏佐吏，九天雲路正一功曹，開天符命使者，十方飛天使者，傳言奏事飛龍騎吏，三界直符使者，四直玉文功曹，地分傳奏神祇。

### 監臨幕神位

本州城隍司主者，本縣城隍司主者，某廟某神，係請來監臨者當境土地里域真官。請作監壇者，係當處威靈廟神，臨建壇專牒請來，齋事散言功推賞，或請東嶽判官一員，帶領兵馬，作監壇者。宜添一位於州城隍之上，題作東嶽差來監壇大判官。若黃錄壇，請降驅邪院官將，準此。

### 仙曹幕神位

以法師平昔所受濟度靈寶及南北院雷霆諸部頭目官將，設像及立牌供養。

### 鍊度幕神位

開度通用

南宮度人不死尊神，南極長生大君，南宮度世司馬大神，好生韓君丈人，靈寶九鍊真司官吏，鍊度仙曹官吏，朱陵火府火鍊大將軍，火鍊靈官，南昌上宮火鍊大將軍，火鍊靈官，南宮度命君，度魂化形君，大冥鍊屍君，十方猷威大神，丹靈大神，皓華大神，玄英大神，鍊度大神，變神大神，復相大神，正精大神，火府大神，返形大神，返魂大神，超生大神，丹天左衛大將軍，水池火沼使者，鍊度司主水大將軍，主火大將軍，火池神將使者童子，火鈴靈童，九光童子，水沼神將使者童子，黃華童子，流精玉女，青玄黃錄鍊魂官吏，火鍊童子玉女，黃華蕩形冶鍊玉女，鍊質明眸玉女，光容玉女童子，瑩身玉女童子，清神玉女童子，發光玉女童子，水火交光大將軍，水火合形大將軍，水火聚炁大將軍，聚神大將軍，九天火府度亡真人，火鍊丹界真人，九天水宮拔亡真人，水濟無邊真人，本靖主將副將，護道監壇將吏，九天守雄抱雌八大神將，青玄專度普度曲度司靈官。

如鍊度壇用，則添入朱陵、紫微、木公、金母、九天、五老、三十二天、太陽、太陰、南斗、北斗，共十二位。內三十二天，分二位。

### 神虎幕神位

北魁玄範府神虎追魂陽精輝明昭靈大帝，北魁玄範府神虎攝魄陰精輝靈威神大帝，雄左大力統制百節三魂玉曹玄伯何大神，雌右武鸞提魂攝魄飛符玉札主吏喬大神，神虎上部、中部、下部追魂使者，倒生玄司七玉女，玉清天道、地道、神道、人道、仙道、鬼道、業道功曹，靈寶如意萬司主，行玉札、顯魂、提魂三大神，玉清追魂攝魄七將軍，監魂童子，引魂童子，玉清對魂、整魂、尋魂、聚魂功曹將軍，陽耀通關陰靈攝魄監獄使者，神虎追魂攝魄三元夫人，四直追攝將軍，神虎追魂攝魄一十五員使者，神虎追攝諸部神吏，三界追魂使者，神虎玉司紫微金光郭大將，夜光玉女，八卦大神，大召小召真人，鄔屠將軍，神虎黑衣內院雷火劉將軍，火車嚴使者，黑衣左右追攝楊、李二大將，大

黑北冥受事官吏，玉都玄臺內省飛空追攝大使，直使雷將軍，內省追攝一呼董使者，一魂韓使者，金闕內臺五部攝魂天將，引魂大將，內臺聚魂大將，普召河沙大將，追魂大將，青玄左府夜光召魂神司玉女判吏，青玄引魂追魂尋魂司靈官功曹，黃籙院追魂攝魄功曹使者將軍，黃籙院統兵助法闡教通靈通天入地大將，北斗下十二時十二月主直玉札神將，太乙玄冥司追攝神將七真玉女，天蓬攝召司鄧將軍，報應劉使者，追魂召魂攝魂黃、李、柳三大將軍，普現曹、葉二大神，正一飛火院袁、雷、牛、白、朱五大將，洞神攝召司良宮天丁丘大神，靈寶如意萬司追二十四類幽魂五十七大神，九天普度院追三十六種傷亡諸大將軍，本靖主將副將，護道監壇諸司官吏，當境土地，里域真官，本家司命六神。

右神虎幕神位三十六，係余所受諸階追攝秘法，畢陳于此。若他法師不暇廣傳，只據所有諸部，立牌在幕中供養，不可拘此。

### 天醫幕神位

天醫尚藥靈官，主辨形候靈官，隨病製藥靈官，修合煨藥仙官，生形博士，復肌主者，治病功曹，收毒將軍，三五功曹，敷藥靈官，察藥論病靈官，請藥療病靈官，砭石小吏，扁鵲小吏，太醫仙吏，採藥童子。

### 監生幕聖位

九天監生大神，九天衛房聖母，九天定生大神，九天感化大神，九天定胎大神，易胎大神，九天助生君，順生君，速生君，全生君，六甲符吏，催生童子，保胎童子，速生童子，南昌分胎功曹，主產功曹，注死功曹，起死功曹。

### 澣濯幕聖位

靈寶澣濯司靈官，玉清通變攝魔屏穢靈官，丹天九鳳破穢靈官，五方五帝解穢仙官，天河東井君，院濯夫人，九天運穢神君，九天解穢神君，收穢神君，却穢神君，除穢神君，斷穢神君，滅穢神君，洗穢神君，蕩穢神君。

### 巾笥幕聖位

靈寶巾笥司靈官，青玄金木仙衣玉女，

### 金木仙帶玉女

### 解結幕聖位

靈寶解冤釋結靈官，五經博士，能談善說靈官，九天解冤釋結大神，靈寶如意、萬司、解冤、釋結四大神。

### 混元幕聖位

玉清六元運陽化陰大將軍，玉清七變混景大將軍，玉清八迴九合大將軍，玉清九光會靈大將軍，玉清十合陰陽大將軍，玉清十一合度大將軍，玉清十二運化大將軍，玉清十三陽光大將軍，玉清十四運度大將軍，玉清十五成陰變陽大將軍，玉清十六三景混成大將軍，玉清十七陰陽合靈大將軍。

### 驛吏幕聖位

玄都茭龍驛吏，玄都金龍驛吏，地府賫簡童子，火府賫簡童子，地道功曹，九龍符命使者，日直天丁。

### 三官醮六十聖位

玄都元陽七寶紫微宮總主上真自然大聖，上元一品賜福天官大帝君，中元太陽洞耀元君二品赦罪地官元虛洞靈皇帝君，下元金靈洞陰大帝三品解厄水

官洞真太皇元光皇帝君，上元左右都司仙官，中元左右都司仙官，下元左右都司仙官，上元紫微宮左府主生太陽火官，上元紫微宮右府主死太陰水官，上元紫微宮中府主生死罪錄官，上元太極左宮左府主生太陽火官，上元太極左宮右府主死太陰水官，上元太極右宮中府主生死罪錄官，上元太極右宮左府主生太陽火官，上元太極右宮右府主死太陰水官，上元太極右宮中府主生死罪錄官，中元洞空青靈宮左耐犯明晨府主生太陽火官，中元洞空青靈宮右紂絕陰天府主死太陰水官，中元洞空青靈宮中七非恬照府主生死罪錄官，中元南洞陽左宗天府主生太陽火官，中元南洞陽左宗天宮右宗靈府主死太陰水官，中元南洞陽左宗天宮中靈神府主生死罪錄官，中元北酆都右陰天宮左連宛泉曲府主生太陽火官，中元北酆都右陰天宮右泰殺九幽府主死太陰水官，中元北酆都右陰天宮中罪炁咸池府主生死罪錄官，下元暘谷洞源青華方諸宮左清源

靈泉府主生太陽火官，下元暘谷洞源青華方諸宮右九泉寒夜府主死太陰水官，下元暘谷洞源青華方諸宮中朔單青靈府主生死罪錄官，下元清泠左南水宮左靈劫府主生太陽火官，下元清泠左南水宮右長夜寒庭府主死太陰水官，下元清泠左南水宮中靈寶劫刃府主生死罪錄官，下元北酆都右羅酆宮左開度劫量府主生太陽火官，下元北酆都右羅酆宮右泉曲鬼神府主死太陰水官，下元北酆都右羅酆宮中通靈大劫府主生死罪錄官，上元明真監正梵行開靈禁神正神曹仙官，上元通明開明三都南上元功三靈曹仙官，上元明梵威靈太常太清宣威明都曹仙官，上元元元都太儀明法考正明威九都曹仙官，上元司正四明監天司殺盟天幽都曹仙官，上元威儀太陰下元監司監靈大明曹仙官，中元靈都維正靈威黃神洞元威仰曹仙官，中元靈紐嶽正洞天九都五集通明曹仙官，中元儀範九考南昌考算太陽明機曹仙官，中元都律九令招靈明都監天宣野曹仙官，中元

監令丘丞九炁中神司非九殺曹仙官，中元韓司執正督殺促考攝氣司殺曹仙官，中元計加主繫司微九幽開度寒夜曹仙官，下元水明清水烈火三明簡對水令曹仙官，下元明梵洞源檢會劫促水洞陽曹仙官，下元龍廢機會明劫機齡水梵罪福曹仙官，下元簡會促炁攝靈召龍九河列女曹仙官，下元開明度魂檢對清正北元考正曹仙官，下元九科四極幽夜長劫苦神三難曹仙官，下元五法萬掠毒刑長苦溟波無極曹仙官，上元考官考士考兵考吏，中元考官考士考兵考吏，下元考官考士考兵考吏，本州城隍司，本縣城隍司，主者當境土地，里域真官，玄壇直日香官，監醮靈官。

冥官醮左右班六十神位

左班

北陰玄天酆都大帝，地府泰素妙廣真君，地府洞明普靜真君，地府最聖耀靈真君，地府神變萬靈真君，地府飛魔演慶真君，東方道都大主者，西方道都大主者，東北方道都大主者，西南方道都

大主者，上方道都大主者，揚州社令司主者，青州社令司主者，兗州社令司主者，梁州社令司主者，雍州社令司主者，溟泠大神，地府掌亡人案主者，東嶽列曹僚佐七十四司案掾仙吏，九幽地獄主者，酆都一十八大地獄主者，酆都八十一大地獄主者，三塗五苦地獄主者，六道都案主者，巨天力士，執罰神兵，牛頭獄卒，酆都主執考罰冥官，幽路執罰勘罪掾吏，名山洞府考校罪魂主執掾吏，本州城隍司主者，當境土地，里域真官。

右班

東嶽天齊仁聖帝，地府陰德定休真君，地府玄德五靈真君，地府保宿昭成真君，地府無上正度真君，地府五化威靈真君，南方道都大主者，北方道都大主者，東南方道都大主者，西北方道都大主者，下方道都大主者，冀州社令司主者，徐州社令司主者，豫州社令司主者，荊州社令司主者，五道大神，東嶽掌亡人案主者，九州掌亡人案主者，地府三十六曹僚屬案掾仙吏，酆都三十

六大地獄主者，酆都二十四大地獄主者，酆都八難幽關主者，無間陝石地獄主者，考鬼治罪冥官，司錄、司命、司功、司殺冥官，東嶽主執考罰冥官，黃泉蒿里丈人，幽臺長夜主者，天下都大，城隍司主者，本縣城隍司主者，遠近廟貌威靈正直神祇。

攝召全形靈官醮神位

以混元天醫解結沐浴巾笥諸司神位，合併立牌，行事畢，仍分設在幕中。

靈寶領教濟度金書卷之三

靈寶領教濟度金書卷之四

洞微高士開光救苦真人甯全真授  
靈寶通玄弘教水南先生林靈真編

聖真班位品

開度祈禳用

上御筵

上層中列

玉清聖境虛無自然元始天尊妙無上帝。

上清真境虛皇玉晨靈寶天尊妙有上帝。

太清仙境萬變混沌道德天尊至真大帝。

上層第二列

在中列前，低中列五寸

太上開天執符御曆含真體道昊天至尊金闕玉皇上帝。

紫微中天北極大帝。  
紫微上宮天皇帝。

東極救苦青玄上帝。



神霄真王長生大帝。  
承天效法后土皇地祇。

以上並奏請，三清稱道慈，諸帝稱天  
慈，后土稱宸慈。並御座。

左右班三百六十位

左班

無上玉帝，虛無玉帝，太微天帝，九幽  
拔罪天尊，朱陵度命天尊，逍遙快樂天  
尊，度人無量天尊，轉輪聖王天尊，東  
方無極太上靈寶天尊，南方無極太上  
靈寶天尊，西方無極太上靈寶天尊，北  
方無極太上靈寶天尊，東北方無極太  
上靈寶天尊，東南方無極太上靈寶天  
尊，西南方無極太上靈寶天尊，西北方  
無極太上靈寶天尊，上方無極太上靈  
寶天尊，下方無極太上靈寶天尊，清微  
天帝君，禹餘天帝君，太赤天帝君，鬱  
單無量天帝，上上禪善無量壽天帝，梵  
監須延天帝，寂然兜術天帝，波羅尼密  
不驕樂天帝，洞元化應聲天帝，靈化梵  
輔天帝，高虛清明天帝，無想無結無愛  
天帝，東方太皇黃曾天帝，大明玉完天  
帝，清明何童天帝，元胎平育天帝，元

明文舉天帝，上明七曜摩夷天帝，虛無  
越衡天帝，太極濛醫天帝，西方元載孔  
昇天帝，大安皇崖天帝，顯定極風天  
帝，始皇孝芒天帝，太黃翁重浮容天  
帝，無思江由天帝，上揲阮樂天帝，無  
極曇誓天帝，九微太真玉保王金闕上  
相大司命，高晨師東海玉明青華小童  
道君，甲子天皇君，甲寅地皇君，甲申  
人皇君，太陽太丹炎光鬱明上真道君，  
東方歲星始陽上真青皇道君，南方熒  
惑丹火朱陽赤皇上真道君，中央鎮星  
中黃太皇上真道君，西方太白太素少  
陽白皇上真道君，北方辰星太玄陰元  
黑皇上真道君，北斗陽明太尉府據斗  
真人，玉皇九晨君，北斗陰精上宰府攀  
魁真人，玉皇北上晨君北斗真人，司空  
府履斗真人，玉皇主仙華晨君，北斗玄  
冥遊擊府步斗真人，玉皇玄上北蓋晨  
君，北斗丹元斗君、府躡紀真人，玉皇  
金魁七晨君，北斗北極太常府步綱真  
人，玉皇北辰飛華晨君，北斗天關上帝  
府乘龍真人，玉皇總靈九元北蓋晨君，  
北斗洞明玉帝府遊行三命真人，玉皇

帝尊九晨君，北斗隱元帝真府徘徊三  
陽真人，玉皇帝真元晨君，東方壽星，  
分角宿天門星君，亢宿天庭星君，大火  
分氏宿天府星君，房宿天駟星君，心宿  
天王星君，析木分尾宿天雞星君，箕宿  
天津星君，西方降婁分奎宿天將星君，  
婁宿天獄星君，大梁分胃宿天倉星君，  
昴宿天目星君，畢宿天耳星君，實沈分  
觜宿天屏星君，參宿天水星君，三天化  
主玄中大法師真君，三天扶教輔元大  
法天師，正一沖玄神化靜應顯佑真君，  
靈寶監齋大法師真君，靈寶經師真君，  
靈寶籍師真君，靈寶度師真君，九天尚  
父天蓬都元帥真君，九天佐翊天猷副  
元帥真君，九天上輔翊聖應感儲慶保  
德真君，九天遊弈靈應佑聖助順福德  
真君，青帝護魂君，赤帝養氣君，白帝  
侍魄君，黑帝通血君，黃帝中主君，東  
方無極飛天神王，南方無極飛天神王，  
西方無極飛天神王，北方無極飛天神  
王，東北無極飛天神王，東南無極飛天  
神王，西南無極飛天神王，西北無極飛  
天神王，上方無極飛天神王，下方無極

飛天神王，北魔非魔靈魔制魔太玄魔王，九天玉輔上宰四協侍宸真君，九天南昌度人不死尊神，度世司馬大神，好生韓君丈人，回骸起死監生大神，九天採訪應元保運真君，儲福定命真君，九天消灾散禍真君，保命續命真君，注祿注生真君，掌祿掌算真君，定祿生神、定貴見生、萬福運炁、定命延生真君，九天陽官曹、陰官曹、司命曹、司祿曹、司天曹、司錄曹仙官，三天門下上元道化真君，中元護正真君，下元定志真君，上清黃籙院使真君，靈寶天仙內院、九天司命府、九天普度院、青玄黃籙左府、上清童初府主宰真君，太上玄一寶輿真人，玉輿真人，綠輿真人，三清上境天真皇人，九天普度院三十六真人，後聖上傳白山宮太素真人，後聖上宰西城總真王真人，九州都仙太史高明大使，至道玄應神功妙濟真君祖師，南極紫真太極玉宸聖后，金闕上保檢仙司命東華道君，金闕大夫東華領真上清仙侯祖師，正一嗣師、係師、女師

真人，三洞四輔經錄中上聖高真主宰仙官，上元紫微宮左府主生太陽火官，右府主死太陰水官，中府主生死罪錄靈官，上元太極右宮左府主生太陽火官，右府主死太陰水官，中府主生死罪錄官，靈寶天仙內院六部仙官，赫奕仙曹，執職萬神，靈寶玄壇功曹使者，玉童玉女，左右龍虎君，直符香官，建齋所請天地神真，日月星宿，嶽瀆河海兵馬，正一章奏司、九靈飛步章奏司功曹從事官吏，北魁玄範府神虎追攝玉司玉女功曹官吏，靈寶如意萬司主召諸類幽魂諸大神、諸部官吏，朱陵火府南昌上宮鍊度官吏、天醫六職治官，靈寶解結司全形司官吏，玄都茭龍、金龍驛吏，地府、火府賫簡童子，九龍符命使者，地道功曹，玉山大變神王，六龍普變靈官，溟滓大梵靈官，玉清混元十二炁化生大將軍，上清天樞院、北極驅邪院宣勞效職仙靈官吏，本靖所佩三洞四輔諸部經籙仙真靈官，諸階符法將帥官吏，東嶽太靈蒼光青帝真君，南嶽慶華紫光赤帝真君，西嶽素光耀魄太

明白帝真君，北嶽鬱微洞淵無極黑帝真君，中嶽黃元太光含真黃帝真君，五嶽儲副正職佐命大神，十大洞天仙官，七十二福地仙官，二十八治仙官，華陽洞天童初院蕭閑堂易遷宮含真館仙官，本靖本派祖師、玄師、真師，名山洞府得道神仙，北陰玄天酆都大帝，太陰黑帝靈君，佐理玄滋天君，助理太一靈君，九壘三十六土皇君，中元洞空青靈宮左府主生太陽火官，右府主死太陰水官，中府主生死罪錄官，中元南洞陽左宗天宮左府主生太陽火官，右府主死太陰水官，中府主生死罪錄官，中元北酆都右陰天宮左府主生太陽火官，右府主死太陰水官，中府主生死罪錄官，中元四十二曹仙官，地府泰素妙廣真君，地府陰德定休真君，地府洞明普靜真君，地府玄德五靈真君，地府最聖耀靈真君，地府寶肅昭成真君，地府神變萬靈真君，地府無上正度真君，地府飛魔演慶真君，地府五化威靈真君，酆都紂絕陰天宮洞仙官，酆都奏殺諒事宗天宮洞仙官，酆都恬照罪炁天宮洞

仙官，酆都宗靈七非天宮洞仙官，酆都敢司連宛屢天宮洞仙官，酆都明晨耐犯武成天宮洞仙官，地府列曹諸司僚，屬案掾官吏，五道大神，東方道都大主者，南方道都大主者，西方道都大主者，北方道都大主者，東北方道都大主者，東南方道都大主者，西南方道都大主者，西北方道都大主者，上方道都大主者，下方道都大主者，南方火翳地獄主者，北方溟泠地獄主者，東南方銅柱地獄主者，西北方火車地獄主者，三塗五苦地獄主者，酆都二十四大地獄主者，陰府考鬼治罪冥官，巨天力士，執罰神兵，牛頭獄卒，五嶽二府掌亡人功德案受生案主者，地府掌亡人案主者，東嶽掌亡人案主者，九州掌亡人案主者，五嶽二府十方三界部衛亡人善導官吏，本州城隍司主者，當境土地，里域真官，正神監壇，某廟某神，東嶽差來齋壇彈壓吏兵，今年某季掌風雷雨部聖衆，玄虛監察，應感靈祇，玄虛四直功曹使者，玄壇監齋典吏，監醮香官，十方三界隨從降赴醮筵聖衆。

右班

玉虛上帝，太微玉帝，少微天帝，火鍊丹界天尊，法橋大度天尊，金闕化身天尊，隨願往生天尊，寶華圓滿天尊，東方玉寶皇上天尊，南方玄真萬福天尊，西方太妙至極天尊，北方玄上玉晨天尊，東北方度仙上聖天尊，東南方好生度命天尊，西南方太靈虛皇天尊，西北方無量太華天尊，上方玉虛明皇天尊，下方真皇洞神天尊，洞真天寶君，洞玄靈寶君，洞神神寶君，東方安寶華林青靈始老九炁天君，南方梵寶昌陽丹靈真老三炁天君，中央玉寶元靈元老一炁天君，西方七寶金門皓靈皇老七炁天君，北方洞陰朔單鬱絕五靈玄老五炁天君，東北方始青天君，東南方始丹天君，西南方始素天君，西北方始玄天君，南方赤明和陽天帝，玄明恭華天帝，曜明宗飄天帝，竺落皇笏天帝，虛明堂耀天帝，觀明端靜天帝，玄明恭慶天帝，太煥極瑤天帝，北方皓庭霄度天帝，淵通元洞天帝，太文翰寵妙成天帝，太素秀樂禁上天帝，太虛無上常融

天帝，太釋玉隆騰勝天帝，龍變梵度天帝，太極平育賈奕天帝，紫微元靈白玉龜臺九靈太妙夜光金真萬炁祖母，青金丹皇大道君，紫微垣帝座星君，太微垣帝座星君，天市垣帝座星君，太陰黃華素曜元精聖后，上黃神母元君，天乙紫炁道曜星君，太乙月孛彗星真君，神首羅喉建星真君，神尾計都墜星真君，南斗上相司命府寶光玉玄上真道君，南斗天相司錄府丹精玄明寶室上真道君，南斗天梁延壽府靈瑤寶耀赤天上真道君，南斗天同益算府景明碧虛真道上真道君，南斗天樞度厄府極真太玄寶仙玉皇太上上真道君，南斗天機上生府紫宸絳房玄玄大帝，上清道君，北斗天罡萬真節度奎光大帝君，上台司命虛精星君，中台司空六淳星君，下台司錄曲生星君，南方鶉首分井宿天井星君，鬼宿天匱星君，鶉火分柳宿天厨星君，星宿天庫星君，張宿天秤星君，鶉尾分翼宿天都星君，軫宿天街星君，北方星紀分斗宿天廟星君，牛宿天機星君，玄枵分女宿天女星君，虛宿天

卿星君，危宿天錢星君，陬訾分室宿天  
廩星君，壁宿天市星君，玉清上相大羅  
無極神公天君，泰玄上相天君，天機內  
相天君，天機上相天君，天樞使相天  
君，天樞左丞相天君，天樞右丞相天  
君，玄都元陽七寶紫微宮總主上真自  
然大聖，上元一品賜福天官大帝君，中  
元太陽洞耀元君二品赦罪地官元虛洞  
靈皇帝君，下元金靈洞陰大帝三品解  
厄水官洞真大皇元光皇帝君，東斗主  
算星君，西斗紀名星君，中斗大魁星  
君，青天魔王，赤天魔王，白天魔王，黑  
天魔王，黃天魔王，欲界大魔王，色界  
大魔王，無色界大魔王，天曹太皇萬福  
真君，定名玉曆真君，天曹延壽益算真  
君，扶衰度厄真君，消災散禍真君，天  
曹延生保命真君，生死錄籍真君，注生  
勾死真君，天曹司命、司錄、司非、司  
危、司罰、司刑、司殺、掌籍、掌算、財  
庫、祿庫真君，天曹司天曹掌仙錄、陽  
官曹掌民錄、陰官曹掌鬼錄、司錄曹掌  
算錄、司罰曹掌罪錄、司命曹掌生錄仙  
官，三天門下上章詞表靈官，直日曹治

引進仙官，上清天樞院、北極驅邪院、  
都天校量功德院、玉樞五雷院、玉府五  
雷院、一院三司主宰真君，東極大慈大  
悲救苦真人，大慧真人，注生宮真人，  
上清妙行真人君，后真人泉降真人，三  
天門下上章二十四真人祖師，太玄妙  
道沖虛聖伯真君，東嶽上卿司命神君，  
定錄右禁至道沖聖德祐真君，三官保  
命微妙沖惠仁祐真君，玉清元始法師，  
總仙上真祖師，太極太虛真人，太極左  
仙公，沖應孚祐真君，上清朱陽真人祖  
師，簡寂陸真人，清都張真人，廣成杜  
真人，三洞四輔符法中上聖高真主宰  
仙官，上元太極左宮左府主生太陽火  
仙官，右府主死太陰水官，中府主生死罪  
錄官，上元三十六曹仙官，靈寶施用仙  
曹三界所問仙曹，九鍊真司官吏，靈寶  
玄壇領仙監齋，金闕上佐御史大夫，承  
符傳檄官吏，建齋所請天官，開度諸章  
中仙靈官君神吏，青玄黃籙左右真司  
玉女、功曹將軍、使者官吏，靈寶玉都  
玄臺內省追攝諸部功曹官吏，九天普  
度院三十六將軍，守雄抱雌二大神將，

高上玉清神霄玉府鍊度官吏，靈寶濟  
濯巾笥變鍊攝化填堦給散司官吏，靈  
寶察命童子，護戒神王，五帝考官，六  
宮掾吏，太玄真一本際童子，發放童  
子，五靈啓道童子，黃籙院追攝鍊度諸  
部官吏，玉樞五雷院、玉府五雷院、雷  
霆都司宣勞效職仙靈官吏，本靖所部  
侍靖仙官、玉童玉女、主將副將，護道  
監壇諸大將吏，諸省府院司將吏兵馬，  
東嶽大生天齊仁聖帝，南嶽大化司天  
昭聖帝，西嶽大利金天順聖帝，北嶽大  
貞安天元聖帝，中嶽大寧中天崇聖帝，  
五嶽飛仙真人司命上真，三十六小洞  
天仙官，海上五嶽仙官，三十六靖盧仙  
官，東華方諸宮、青玄府、皇極宮、丹元  
宮、洞靈館仙官，本靖本派經、籍、度三  
師真人，洞天福地考校諸仙真，東霞丹  
林扶桑大帝，水府丹靈大帝，龜臺大  
帝，玄溟大帝，海上十洲三島仙官，下  
元暘谷洞源青華宮左府主生太陽火  
官，右府主死太陰水官，中府主生死罪  
錄官，下元南清泠左水會宮左府主生  
太陽火官，右府主死太陰水官，中府主

生死罪錄官，下元北酆都右羅酆宮左府主生太陽火官，右府主死太陰水官，中府主生死罪錄官，下元四十二曹仙官，水府暘谷神王，洞淵諸大龍王，東海昭聖廣德靈會王，南海洪聖廣利靈孚王，西海通聖廣潤靈通王，北海沖聖廣澤靈祐王，江瀆昭靈孚應威烈廣源順濟王，河瀆顯應靈源弘濟王，淮瀆長源溥濟王，濟瀆清源善濟王，九江水帝，三元水府福善順聖昭信王，五湖大神，七澤大神，十二河源仙官，十二溪真水府列曹諸司僚屬，案掾官吏，溟泠大神，冀州社令司主者，兗州社令司主者，青州社令司主者，徐州社令司主者，梁州社令司主者，雍州社令司主者，荊州社令司主者，揚州社令司主者，豫州社令司主者，東方風雷地獄主者，西方金剛地獄主者，東北方鑊湯地獄主者，西南方屠割地獄主者，中央普掠地獄主者，酆都三十六大地獄主者，酆都鐵圍山、硤石血湖、無間地獄三者，黃泉蒿里丈人，丘丞墓伯幽臺長夜主者，十方道掌亡人功德案受生案主

者，水府掌亡人案主者，十方道掌亡人案主者，當境五道社令司掌亡人案主者，五嶽二府十方三界亡人經由水陸關津神祇，本縣城隍司主者，當境遠近列廟神祇，齋主家土地司命六神，城隍司差來齋壇彈壓吏兵，太歲部下六十甲子諸官君，當境地分傳奏諸神祇，玄虛三界直符使者，玄壇受事功曹，直壇土地，玄壇守衛四靈神君，方隅禁忌一切明神。

#### 醮筵外左右幕各設二位

三天門下掌醮司真君天曹門下掌醮司真君。

三天門下降聖司真君天曹門下降聖司真君。

#### 開度醮左右班一百二十神位

御筵十位同。

#### 左班

九幽拔罪天尊，火鍊丹界天尊，逍遙快樂天尊，金闕化身天尊，度人無量天尊，十方靈寶天尊，鬱單無量天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞

元化應聲天帝，靈化梵輔天帝，高虛清明天帝，無想無結無愛天帝，東方太皇黃曾天帝，大明玉完天帝，清明何童天帝，元胎平育天帝，元明文舉天帝，上明七曜摩夷天帝，虛無越衡天帝，太極濛翳天帝，西方元載孔昇天帝，太安皇崖天帝，顯定極風天帝，始皇孝芒天帝，太黃翁重浮容天帝，無思江由天帝，上揆阮樂天帝，無極曇誓天帝，東華木公上相青童道君，上清日宮炎光鬱儀太陽帝君，東方木德歲星真君，南方火德熒惑星君，西方金德太白星君，北方水德辰門星君，中央土德鎮星星君，北斗陽明大尉府玉皇九晨君，北斗陰精上宰府玉皇北上晨君，北斗真人司空府玉皇主仙華晨君，北斗玄冥遊擊府玉皇玄上北蓋晨君，北斗丹元斗君府玉皇金魁七晨君，北斗北極太常府玉皇北辰飛華晨君，北斗天關上帝府玉皇總靈九元北蓋晨君，北斗洞明府玉皇府玉皇尊九晨君，北斗隱元帝真府玉皇帝真元晨君，北斗天罡萬真節度奎光大帝君，上台司命虛精星君，

中台司空六淳星君，下台司錄曲生星君，東方壽星，分角宿天門星君，亢宿天庭星君，大火分氏宿天府星君，房宿天駟星君，心宿天王星君，析木分尾宿天雞星君，箕宿天津星君，西方降婁分奎宿天將星君，婁宿天獄星君，大梁分胃宿天倉星君，昴宿天目星君，畢宿天耳星君，實沈分觜宿天屏星君，參宿天水星君，玉清上相大羅無極神公天君，三天扶教輔元大法天師正一靜應真君，泰玄上相天君，天機內相天君，天機上相天君，天樞使相天君，天樞左丞相天君，天樞右丞相天君，上元一品賜福天官大帝，中元二品赦罪地官大帝，下元三品解厄水官大帝，三元考治官吏，青帝護魂君，赤帝養炁君，白帝侍魄君，黑帝通血君，黃帝中主君，東方無極飛天神王，南方無極飛天神王，西方無極飛天神王，北方無極飛天神王，上方無極飛天神王，青天魔王，赤天魔王，白天魔王，黑天魔王，黃天魔王，九天王輔上宰四協侍宸真君，九天南昌度人不死尊神，度世司馬大神，好生韓

君丈人，回駭起死監生大神，九天採訪應元保運真君，儲福定命真君，九天消灾散禍真君，保命續命真君，注祿注生真君，掌祿掌算真君，定祿生神、定貴見生、萬福運炁、定命延生真君，九天陽官曹、陰官曹、司命曹、司祿曹、司天曹、司錄曹仙官，三天門下三元真君，上清黃籙院使真君，靈寶天仙內院、九天司命府、九天普度院、青玄黃籙左府、上清童初府主宰真君，玄一三真人，三清上境天真皇人，九天普度院三十六真人，後聖上傳白山宮太素真人，後元夫人，後聖上傳白山宮太素真人，後聖上宰西城總真王真人，九州都仙太史，至道玄應神功妙濟真君祖師，魏夫人、楊、許一真人祖師，嗣師、系師、女師真人，三洞四輔經籙中上聖高真主宰仙官，上元紫微宮左府主生太陽火官，右府主死太陰水官，中府主生死罪錄官，上元太極右宮左府主生太陽火官，右府主死太陰水官，中府主生死罪錄官，靈寶天仙內院六部仙官，靈寶玄壇功曹使者，玉童玉女，左右龍虎君，

建齋所請天地神真、日月星宿嶽瀆河海兵馬，正一章奏司、九靈飛步章奏司功曹從事官吏，北魁玄範府神虎追攝司玉女、功曹官吏，靈寶如意萬司主召諸類幽魂諸部官吏、天醫六職治官，靈寶解結司、全形司官吏，玄都茭龍、金龍驛吏，地府、火府齋簡童子，九龍符命使者，地道功曹，玉山大變神王，六龍普變靈官，溟滓大梵靈官，黃籙院追攝鍊度效職宣勞仙靈官吏，本靖經籙中神仙兵士，五嶽真君儲副正職佐命大神，十大洞天、七十二福地、二十八治仙官，華陽洞天童初院、蕭閑堂、易遷宮、含真館仙官，本靖本派祖、玄、真師，名山洞府得道真仙，地府酆都大帝，太陰黑帝靈君，佐理玄滋天君，助理太一靈君，九壘三十六土皇君，中元洞空青靈宮左府主生太陽火官，右府主死太陰水官，中府主生死罪錄官，中元南洞陽左宗天宮左府主生太陽火官，右府主死太陰水官，中府主生死罪錄官，中元北酆都右陰天宮左府主生太陽火官，右府主死太陰水官，中府主

生死罪錄官，中元四十二曹仙官，地府十宮朝王真君，酆都六洞天宮仙官，地府列曹諸司僚屬官吏，五道大神，十方道都大主者，九幽地獄主者，三塗五苦地獄主者，十八大地獄主者，陰府考鬼治罪冥官，巨天力士，執罰神兵，牛頭獄卒，本州本縣城隍司主者，監壇之神，城隍司差來彈壓兵馬，玄壇監齋監醮受事，直壇直日香官，十方三界隨從降赴醮筵聖衆。

右班

法橋大度天尊，朱陵度命天尊，轉輪聖王天尊，隨願往生天尊，寶華圓滿天尊，十方救苦天尊，東方安寶華林青靈始老九炁天君，南方梵寶昌陽丹靈真老三炁天君，中央玉寶元靈元老一炁天君，西方七寶金門皓靈皇老七炁天君，北方洞陰朔單鬱絕五靈玄老五炁天君，東北方始青天君，東南方始丹天君，西南方始素天君，西北方始玄天君，南方赤明和陽天帝，玄明恭華天帝，曜明宗飄天帝，竺落皇笏天帝，虛明堂耀天帝，觀明端靜天帝，玄明恭慶

天帝，太煥極瑤天帝，北方皓庭霄度天帝，淵通元洞天帝，太文翰寵妙成天帝，大素秀樂禁上天帝，大虛無上常融天帝，大釋玉隆騰勝天帝，龍變梵度天帝，太極平育賈奕天帝，西極金真萬炁祖母元君，上清月府皇華素曜結璘太陰皇君，天乙紫炁道星真君，太乙月孛彗星真君，神首羅喉建星真君，神尾計都墜星真君，南斗上相司命府寶光玉玄上真道君，南斗天相司錄府丹精玄明玉室上真道君，南斗天梁延壽府靈瑤寶耀赤天上真道君，南斗天同益算府景明碧虛真王上真道君，南斗天樞度厄府極真太玄寶仙玉皇太上上真道君，南斗天機上生府紫宸絳房玄玄大帝，上清道君，南方鶉首分井宿天井星君，鬼宿天匱星君，鶉火分柳宿天厨星君，星宿天庫星君，張宿天秤星君，鶉尾分翼宿天都星君，軫宿天街星君，北方星紀分斗宿天廟星君，牛宿天機星君，玄枵分女宿天女星君，虛宿天卿星君，危宿天錢星君，陬訾分室宿天廩星君，壁宿天市星君，玄中大法師，經師

真君，籍師真君，度師真君，監齋大法師真君，九天尚父天蓬都元帥真君，九天佐翊天猷副元帥真君，九天上輔翊聖應感儲慶保德真君，九天遊奕靈應佑聖助順福德真君，東斗主算君，西斗紀名君，中斗大魁君，東北方無極飛天神王，東南方無極飛天神王，西南方無極飛天神王，西北方無極飛天神王，下方無極飛天神王，欲界大魔王，色界大魔王，無色界大魔王，天曹太皇萬福真君，定名玉曆真君，天曹司命真君，司錄、司非、司危、司罰、司刑、司殺、掌籍、掌算、財庫、祿庫真君，天曹司天曹掌仙錄、陽官曹掌民錄、陰官曹掌鬼錄、司錄曹掌算錄、司罰曹掌罪錄、司命曹掌生錄仙官，三天門下上章詞表靈官，上清天樞院、北極驅邪院、都天校量功德院、玉樞五雷院、玉府五雷院、一院三司主宰高真，救苦真人，大慧真人，注生宮真人，上清妙行真人，上章二十四真人祖師，三茅真人，玉清元始法師，總仙上真祖師，徐、葛、鄭三真人祖師，陸、張、杜三真人，三洞四輔

符法中上聖高真主宰仙官，上元太極左宮左府主生太陽火官，右府主死太陽水官，中府主生死罪錄官，上元三十六曹仙官，靈寶施用仙曹，三界所問仙曹，九鍊真司官吏，靈寶玄壇領仙監齋，金闕上佐御史大夫，承符傳檄官吏，建齋所請天官，開度諸章中仙靈官君將吏，青玄黃籙院左右真司玉女、功曹將軍、使者官吏，九天普度院玄臺內省金關內臺追攝官吏，朱陵火府南昌上宮神霄玉府鍊度官君，靈寶澣濯司、巾笥司、變鍊司、攝化司、填堦給散司官吏，靈寶察命童子，護戒威神，五帝考官，六宮掾吏，太玄真一本際童子，發放童子，五靈啓道童子，天樞院、驅邪院、雷霆都司效職宣勞官吏，本靖諸省府院司將吏，五嶽聖帝，飛仙真人，司命上真，三十六小洞天仙官，海上五嶽仙官，三十六靖盧仙官，東華方諸宮、青玄府、皇極宮、丹元宮、洞靈館仙官，本靖本派經、籍、度師真人，洞天福地考校仙官，水府扶桑大帝，水府丹靈大帝，龜臺大帝，玄溟大帝，海上十洲

三島仙官，下元暘谷洞源青華宮左府主生太陽火官，右府主死太陰水官，中府主生死罪錄官，下元南清泠左水會宮左府主生太陽火官，右府主死太陰水官，中府主生死罪錄官，下元北酆都右羅酆宮左府主生太陽火官，右府主死太陰水官，中府主生死罪錄官，下元四十二曹仙官，暘谷神王，洞淵龍王，四瀆四海真仙，九江水帝，三元水府、十二河源、水府列曹仙官，溟泠大神，九州社令司主者，酆都二十四大地獄主者，三十六大地獄主者，血湖硤石無間地獄主者，黃泉蒿里丈人，丘丞墓伯幽臺長夜主者，當境土地，里域真官，遠近列廟神祇，齋主本家土地司命等神，今年某季掌風雷雨部聖衆，玄虛四直功曹，三界符使，地分傳奏神祇，玄壇守衛四靈神君，方隅禁忌一切神明。以上並照黃籙寫全銜內，假如北斗九位，宜寫九位全銜作一行，餘準此。掌醮降聖同前。

### 靈寶領教濟度金書卷之五

洞微高士開光救苦真人甯全真授  
靈寶通玄弘教水南先生林靈真編

#### 聖真班位品

開度醮左右班六十分位

御筵十位同

左班

東方無極太上靈寶天尊，南方無極太上靈寶天尊，西方無極太上靈寶天尊，北方無極太上靈寶天尊，上方無極太上靈寶天尊，九天自然生神上帝，東方八天度人上帝，西方八天度人上帝，上清日宮太陽帝君，上清木、火、金、水、土五德星君，北斗九晨九皇道君，東方角、亢、氏、房、心、尾、箕七宿星君，西方奎、婁、胃、昴、畢、觜、參七宿星君，玉清上相大羅無極神公天君，三天扶教輔元大法天師，正一沖玄神化靜應顯祐真君，泰玄上相天君，天機內相天君，天機上相天君，天樞使相天君，天

靈寶領教濟度金書卷之四



樞左丞相天君，天樞右丞相天君，上元一品賜福天官大帝，中元二品赦罪地官大帝，下元三品解厄水官大帝，九天陽官曹、陰官曹、司命曹、司錄曹、司天曹、司錄曹仙官，三天門下上元道化真君，中元護正真君，下元定志真君，玄一三真人，三清上境天真皇人祖師，三茅真人祖師，太極左宮仙翁，沖應孚佑真君，上元紫微宮左府主生太陽火官，

右府主死太陰水官，中府主生死罪錄官，上元太極右宮左府主生太陽火官，右府主死太陰水官，中府主生死罪錄官，靈寶六部仙官赫奕仙曹，靈寶玄壇功曹使者，玉女玉童，直符香官，正一章奏司、九靈飛步章奏司功曹從事官吏，本靖三洞四輔經錄仙真靈官，五嶽真君，十大洞天仙官，三十六小洞天仙官，本派祖、玄、真師，酆都大帝，黑帝靈君，佐理玄滋天君，助理太一靈君，九壘三十六土皇君，中元洞空青靈宮左府主生太陽火官，右府主死太陰水官，中府主生死罪錄官，中元南洞陽左宗天宮，左府主生太陽火官，右府主死

太陰水官，中府主生死罪錄官，中元北酆都右陰天宮左府主生太陽火官，右府主死太陰水官，中府主生死罪錄官，中元四十二曹仙官，地府十宮朝王真君，酆都六天宮洞仙官，十方道都大主者，九幽地獄主者，州縣城隍司主者，遠近廟貌神祇，功曹符使，太歲下六十甲子諸官君。

### 右班

東北方無極太上靈寶天尊，東南方無極太上靈寶天尊，西南方無極太上靈寶天尊，下方無極太上靈寶天尊，五方五老梵炁天君，南方八天度人上帝，北方八天度人上帝，上清月府黃華素曜結璘太陰皇君，上清紫炁、月孛、羅喉、計都四餘星君，南斗六司上生星君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，三天化主玄中大法師，靈寶監齋大法師真君，靈寶經師真君，靈寶籍師真君，靈寶度師真君，九天尚父天蓬真君，九天佐翊天猷真君，九天上輔翊聖真君，九天遊

奕靈應佑聖真君，天曹司命、司錄、司非、司危、司罰、司刑、司殺仙官，上章詞表靈官，東極救苦大慧真人，妙行真人，魏、楊、許三師真人，上元太極左宮左府主生太陽火官，右府主死太陰水官，中府主生死罪錄官，上元三十六曹仙官，靈寶施用仙曹，三界所問仙曹，靈寶領仙監齋上佐御史，承符傳檄官吏，玄壇所設玉山淨供宣勞效職諸部官吏，本靖諸省府院司將吏，主副監壇護道之神，五嶽五天聖帝，七十二福地仙官，海上五嶽真仙，本派經、籍、度三師真人，水府扶桑大帝，水府丹靈大帝，龜臺大帝，玄溟大帝，十洲三島仙官，下元暘谷洞源青華宮左府主生太陽火官，右府主死太陰水官，中府主生死罪錄官，下元南清冷左水會宮左府主生太陽火官，右府主死太陰水官，下元北酆都右羅酆宮左府主生太陽火官，右府主死太陰水官，中府主生死罪錄官，下元四十二曹仙官，四瀆四海龍王，九江水帝，十二河源仙官，九州社令司主者，東嶽諸司地獄主者，當境土

地之神，齋主家司命六神，玄壇監醮香官，守衛禁忌方隅神祇。

以上並照黃籙寫全銜，掌醮降聖如前。若五鍊生尸齋用之，則將先法師所受經法錄中各部仙靈官吏，易去本靖三洞四輔經錄諸部官吏，却將三洞四輔經錄，添于諸省府院司之上。

### 靈官醮三十六神位

生神齋用

左班

上奏靈官，主生主死靈官，掌度人不死府靈官，掌三元二十七府靈官，掌酆都十三宮洞靈官，掌酆都二十四大地獄靈官，掌東方劍樹地獄靈官，掌西方金鎚地獄靈官，掌東北方鑊湯地獄靈官，掌西南方屠割地獄靈官，掌上方風雷地獄靈官，掌酆都山寒池考獄靈官，治罪天憲考鬼靈官，主九府業道靈官，掌五嶽地獄靈官，掌生死簿察命都知司罪靈官，掌九州分野司過靈官，掌十二國分野校錄靈官。

右班

飛章靈官，掌九天靈官，掌回骸起死府靈官，掌三元百二十曹靈官，掌酆都十大地獄靈官，掌南方火坑地獄靈官，掌北方寒冰地獄靈官，掌東南方銅柱地獄靈官，掌西北方鐵丸地獄靈官，掌下方糞穢地獄靈官，考鬼萬死靈官，主生死罪考掠靈官，主寒夜泉曲府考鬼靈官，掌地府司罪六曹靈官，掌左右司簿司罪攝命攝魄司靈官，掌閻羅都案司罪靈官，掌六十甲子生人靈官。

### 九天開度醮神位

上九位御筵

鬱單無量天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞元化應聲天帝，靈化梵輔天帝，高虛清明天帝，無想無結無愛天帝。

左右班六十分位

左班

三天三寶帝君，九天丈人真王，元父道君，九天司命魂精帝君，上清日宮太陽帝君，上清木、火、金、水、土五德星君，

北斗九皇道君，九天列位真人，九天玉輔上宰九天度人不死尊神，九天好生韓君丈人，九天丈人儲福定命真君，三天化主玄中大法師真君，上元一品賜福天官大帝，中元二品赦罪地官大帝，下元三品解厄水官大帝，九天尚父天蓬真君，九天上輔翊聖真君，九天列曹仙官，九天司命府五百靈官，靈寶玄壇功曹使者，九天普度院三十六真人，三十六將軍，八大神將，官吏兵馬，五嶽五帝真君，本靖本派祖、玄、真師，酆都大帝，九壘土皇君，地府十殿朝王，六洞天仙官，十方道都大主者，酆都十方地獄，三十六大地獄主者，州縣城隍司主者，遠近廟貌神祇功曹符使，六十甲子靈官。

右班

九天元皇帝真元君，九天真母聖后元君，九天丞相魄靈帝君，上清月府太陰皇君，二十八宿星君，南斗六司上真道君，十方無極飛天神王，九天四協侍宸真君，九天度世司馬大神，九天回骸起死無量度人君，九天採訪使應元保運

真君，三天扶教輔元大法天師正一真君，靈寶經師真君，靈寶籍師真君，靈寶度師真君，九天佐翊天猷真君，九天遊奕佑聖真君，九天諸司兵馬，九天司命府諸大將衛真仙兵，本靖所部諸省府院司官君將吏，本靖主將副將，護道監壇將吏兵馬，五嶽五天聖帝，本派經、籍、度三師真人，水府扶桑大帝，海上五嶽十洲三島仙官，四海四瀆仙官，九江水帝，九州社令司主者，酆都鐵圍山、無間地獄、二十四大地獄主者，當境土地之神，齋主家司命六神，玄壇監醮香官，守衛禁忌方隅神祇。

以上依黃籙寫全銜，只用天曹掌醮司、降聖司。

### 鍊度醮三十六神位

青玄救苦齋用

左班

青玄黃籙鍊魂司鍊度靈官、將軍神吏，朱陵火府火鍊大將軍、火鍊靈官，南昌上宮火鍊童子，火鍊玉女，黃華鍊質明眸玉女童子，黃華清神發光玉女童子，鍊魂水火合形大將軍，鍊魂水火聚神

大將軍，金木仙衣仙車仙帶玉女，左右玄靈太素太仙玉女，左右崇正靈官，察訪檢會大魔王，玉清察符引證考問玉女，玉清察符八方隨化玉女，掌籍佐書功曹，主簿小吏，飛雲正吏，飛吏靈官，黃籙專度司太玄靈官功曹、玉女主簿，黃籙曲度司太玄靈官功曹、玉女主簿，左右押隊神吏太玄引領使者、覆勘功曹，九天普度院火府度亡真人，火鍊丹界真人，守雄抱雌二大將，八大神將仙吏。

右班

南昌上宮鍊度大將軍、鍊度靈官，黃華治鍊蕩形玉女童子，黃華光容瑩身玉女童子，鍊魂水火交光大將軍，鍊魂水火聚炁大將軍，金木鍊形合炁玉女，黃籙監察司命司左右通和大寧大定玉女，黃籙持符告命飛雲通遊移籍司神王功曹，玉清察符保舉告令玉女，玉清察符通玄符令玉女，掌籍仙官玉女，真人功曹，主簿小吏，黃籙院引魂錄功司錄功主吏提舉、太平玉女，黃籙仙魂司逍遙快樂自然清淨靈官，黃籙普度司

太玄靈官功曹、玉女主簿，太玄上奏引度靈官玉女、功曹主簿，水宮拔亡真人，水濟無邊真人，水火交鍊真人，本靖主將副將，護道監壇諸大將軍。

### 青玄開度醮神位

御筵十一位

東極青玄老君，運明保元上帝，太乙救苦天尊，東方玉寶皇上天尊，南方玄真萬福天尊，西方太妙至極天尊，北方玄上玉晨天尊，東北方度仙上聖天尊，東南方好生度命天尊，西南方太靈虛皇天尊，西北方無量太華天尊，上方玉虛明皇天尊，下方真皇洞神天尊。

左右班六十位

左班

九天自然生神上帝，東方八天度人帝君，西方八天度人帝君，上清日宮太陽帝君，上清木、火、金、水、土五德星君，北斗九皇道君，東方角、亢、氏、房、心、尾、箕七宿星君，西方奎、婁、胃、昴、畢、觜、參七宿星君，玉清上相大羅無極神公天君，三天扶教輔元大法天師正一真君，泰玄上相天君，天機內相天

君，天機上相天君，天樞使相天君，天樞左丞相天君，天樞右丞相天君，上元一品賜福天官大帝，中元二品赦罪地官大帝，下元三品解厄水官大帝，九天諸司上宰救苦、大慧二真君，祖師三茅真君，太乙玄生府主宰真君仙官，上清黃籙院使真君，上元三宮九府列位仙官，黃籙破符入獄出冥司官吏，黃籙東華上命夜光召魂神司官吏，黃籙領魂錄功司官吏，黃籙監察司命司官吏，黃籙專度普度曲度司官吏，玄壇效職宣勞，靈寶官屬諸司靈官，五嶽五帝真君，華陽洞天童初院蕭閑堂易遷宮含真館仙官，本派祖、玄、真師，北陰玄天酆都大帝，地府九壘土皇君，中元三宮九府四十二曹仙官，十王真君，六洞仙官，十方道都大主者，九幽地獄主者，州縣城隍司主者，功曹符使六十甲子靈官仙吏。

右班

五方五靈五老梵炁天君，南方八天度人帝君，北方八天度人帝君，上清月府太陰皇君，上清紫炁、月孛、羅喉、計都

以上並照黃籙寫全銜，掌醮降聖如前。

冥官醮三十六神位

血湖齋用

左班

北陰玄天酆都大帝君，地府太素妙廣真君，地府洞明普靜真君，地府最聖耀靈真君，地府神變萬靈真君，地府飛魔演慶真君，酆都紂絕陰天宮洞仙官，酆都恬照罪炁天宮洞仙官，酆都敢司連宛屢天宮洞仙官，溟泠大神，九幽地獄主者，大鐵圍山硤石地獄主者，血湖掌罪籍冥官，血湖翻體大神，血湖食心鬼王，血湖考吏獄卒鬼兵，某州城隍司主者，當境土地，里域真官。

右班

東嶽天齊大生仁聖帝，地府陰德定休真君，地府元德五靈真君，地府寶肅昭成真君，地府無上證度真君，地府王化威靈真君，酆都泰殺諒事宗天宮洞仙官，酆都宗靈七非天宮洞仙官，酆都明晨耐犯武成天宮洞仙官，五道大神，大鐵圍山無間地獄主者，大鐵圍山血湖地

獄主者，血湖掌冤對冥官，血湖擲尸神王，血湖啖腦鬼王，本州社令司主者，本縣城隍司主者，本家土地司命六神。

### 血湖神虎幕神位

北魁玄範府倒生玄司龜真素幄徐玉女，北魁玄範府主行玉札隱文周大神，北魁玄都顯聖威靈顯魂勒現吳大神，北魁玄都通靈顯佑催現執提提魂攝魄徐大神，無義斷恩收魂攝精解釋追攝王大神，正精火目攝炁聚善解對釋愆陸大神，震鼓喧雷閃日出電聚體長肌胡大神，直性梗靈淨濁淘穢生清徐大神，威靈通感眷義全形洗浣周大神，解釋冤愆生精致魄全形復體李大神，解釋冤對正魄生形致影長津復體馮大神，九天普度八門開度栢真人，九天普度收魂召魂金將軍。

### 驛龍幕神位

靈寶三炁流光符吏，靈寶蕩滌三元符吏，地道功曹，日直天丁，地分承受發放傳奏神祇。

### 紫庭幕神位

通星齋用

玉清斷疰陳將軍，玉清斷尸葛將軍，九天甘露將，九天補炁將，九天護命將，九天三十二員大將，本靖主將副將，護道監壇諸部大將，齋主家土地司命六神。

### 度星三界醮神位

上御筵十位同遷拔

左右班六十分

同遷拔，只北斗第九位下，添天罡全銜；東極二真人下，除妙行真人，添紫庭真人；章奏司改作玄壇追攝司，章奏司鍊度司宣勞效職仙靈官吏玉山淨供官吏，改作上清紫庭院宣勞效職仙靈官吏。

### 仙曹幕神位

十回度人道場用

衆真監度司，敕制地祇司，斷地逮役司，削死上生司，嚴校諸天司，十二河源司，上解祖考司，疾除罪簿司，落滅惡根司，不得拘留司，逼合鬼群司，時刻昇遷司，北都寒池司，部衛形魂司，度品南宮司，死魂受鍊司，仙化成人司，生身受度司，隨劫輪轉司，永度塗

苦司，超凌三界司，逍遙上清司，欣慶受度司，歷關諸天司，請滅三惡司，斬絕地根司，飛度五戶司，名列太玄司，魔王監舉司，無拘天門司，青帝護魂司，白帝侍魄司，赤帝養炁司，黑帝通血司，黃帝中主司，萬神無越司，擲火萬里司，千和萬合司，普受開度司，死魂生身司，身得受生司，上聞諸天司，名度南宮司，魔王保迎司，飛升太空司，過度三界司，魔王敬形司，制魔保舉司，拔出地戶司，五苦八難司，七祖升仙司，永離鬼官司，魂度朱陵司，受鍊更生司，普度天人司，無所不度司，諸天生門司，大勳保舉司，嚴攝北酆司，諸天書名司。

### 十回度人醮神位

上御筵十位同遷拔

左右班六十分

同遷拔，只改章奏司作玄壇追攝司，章奏司鍊度司宣勞效職仙靈官吏。

靈寶領教濟度金書卷之五

靈寶領教濟度金書卷之六

洞微高士開光救苦真人甯全真授  
靈寶通玄弘教水南先生林靈真編

聖真班位品

祈禳通用

上御筵

上層中列

玉清聖境虛無自然元始天尊。  
上清真境虛皇道君靈寶天尊。  
太清仙境混沌老君道德天尊。

上層第二列

太上開天執符御曆含真體道昊天至尊  
玉皇上帝。  
紫微中天北極大帝。  
紫微上宮天皇大帝。  
東極青華大帝。  
神霄真王長生大帝。  
東極青玄上帝。  
承天效法后土皇地祇。

左右班三百六十位

左班

無上玉帝，虛無玉帝，太微天帝，紫清  
降福天尊，九宮捍厄天尊，逍遙快樂天  
尊，長生保命天尊，消灾解厄天尊，東  
方無極太上靈寶天尊，西方無極太上  
靈寶天尊，東北方無極太上靈寶天尊，  
西南方無極太上靈寶天尊，上方無極  
太上靈寶天尊，清微天帝君，禹餘天帝  
君，大赤天帝君，九微太真玉保王金闕  
上相大司命高晨師，東海玉明青華小  
童道君，北斗高上玉皇尊帝君，北斗七  
晨元君，甲子天皇君，甲寅地皇君，甲  
申人皇君，太陽大丹炎光鬱儀上真道  
君，東方歲星始陽上真青皇道君，南方  
熒惑丹火朱陽赤皇上真道君，中央鎮  
星中黃太皇上真道君，西方太白太素  
少陽白皇上真道君，北方辰星太玄陰  
元黑皇上真道君，北斗陽明太尉府據  
斗真人玉皇九晨君，北斗陰精上宰府  
攀魁真人玉皇北上晨君，北斗真人司  
空府履斗真人玉皇主仙華晨君，北斗  
玄冥遊擊府步斗真人玉皇玄上北蓋晨

君，北斗丹元斗君府躡紀真人玉皇金  
魁七晨君，北斗北極太常府步綱真人  
玉皇北晨飛華晨君，北斗天闕上帝府  
乘龍真人玉皇總靈九元北蓋晨君，北  
斗洞明玉帝府遊行三命真人玉皇帝尊  
九晨君，北斗隱元帝真府徘徊三陽真  
人玉皇帝真元晨君，北斗元斗官天樞  
星魁精玄上真皇夫人，北斗玄魁宮天  
璇星虛精上玄皇夫人，北斗上精宮天  
璣星靈妃元皇夫人，北斗綱極宮天權  
星上靈神妃華皇夫人，北斗靈關宮玉  
衡星北上金蓋中皇夫人，北斗紫極宮  
開陽星安上神華元皇夫人，北斗運天  
宮搖光星玉華靈皇夫人，北斗空真宮  
洞明星太明常皇夫人，北斗常寶宮隱  
元星空玄變靈上皇夫人，東方壽星分  
角宿天門星君，亢宿天庭星君，大火分  
氏宿天府星君，房宿天駟星君，心宿天  
王星君，析木分尾宿天雞星君，箕宿天  
津星君，西方降婁分奎宿天將星君，婁  
宿天獄星君，大梁分胃宿天倉星君，昴  
宿天目星君，畢宿天耳星君，實沈分觜  
宿天屏星君，參宿天水星君，齋主自身

胎生年月日時運限本命元辰建生星君，三天化主玄中大法師真君，三天扶教輔元大法天師正一冲玄神化静應顯佑真君，靈寶監齋大法師真君，靈寶經師真君，靈寶籍師真君，靈寶度師真君，九天尚父天蓬都元帥真君，九天佐翊天猷副元帥真君，九天上輔翊聖應感儲慶保德真君，九天遊奕靈應佑聖助順福德真君，青帝護魂君，赤帝養炁君，白帝侍魄君，黑帝通血君，黃帝中主君，東方無極飛天神王，南方無極飛天神王，西方無極飛天神王，北方無極飛天神王，東北無極飛天神王，東南無極飛天神王，西南無極飛天神王，西北無極飛天神王，上方無極飛天神王，下方無極飛天神王，比魔非魔靈魔制魔太玄魔王，九天玉輔上宰四協侍宸，九天南宮度人不死尊神，度世司馬大神，好生韓君丈人，回骸起死監生大神，九天應元保運真君，儲福定命真君，消灾散禍真君，保命續命真君，注祿注生真君，九天掌祿掌算真君，萬福運炁真君，定命延生真君，定祿生神真君，定

貴見生真君，九天金錄無量壽生神君，九天陽官曹、陰官曹、司命曹、司錄曹、司天曹、司錄曹仙官，北斗中和延壽君，北斗明算保錄君，北斗賞善應願君，北斗消灾錄庫君，北斗注生掌籍君，北斗扶衰財庫君，北斗度厄赦罪君，北斗司錄司非君，北斗捍厄罰惡君，三天門上下元道化真君，中元護正真君，下元定志真君，靈寶天仙內院、九天司命府、上清童初院主宰高真，太上玄一三真人，後聖上保上傳上宰，九州都仙大史神功妙濟真君，魏、楊、許三真人，正一嗣師、系師、女師三真人，上元紫微宮左府主生太陽火官，右府主死太陰水官，中府主生死罪錄官，上元太極右宮左府主生太陽火官，右府主死太陰水官，中府主生死罪錄官，靈寶天仙內院施用仙曹，赫奕仙曹，三界所問仙曹，建齋所請天地神真，日月星宿岳瀆河海兵馬，本靖所受三洞四輔諸部經籙仙真靈官，諸階符法將帥兵馬，東嶽太靈蒼光青帝真君，南嶽慶華紫光赤帝真君，西嶽素光耀魄太明白

帝真君，北嶽鬱微洞淵無極黑帝真君，中嶽黃元太光含真黃帝真君，五嶽儲副正職佐命大神，十大洞天仙官，七十二福地仙官，二十八治仙官，華陽洞天童初院蕭閑堂易遷宮含真館仙官，本靖本派祖師、玄師、真師，名山洞府得道諸神仙，北陰玄天酆都大帝，太陰黑帝靈君，佐理玄滋天君，助理太乙靈君，中元洞空青靈官，左府主生太陽火官，右府主死太陰水官，中府主生死罪錄官，中元南洞陽左宗天宮左府主生太陽火官，右府主死太陰水官，中府主生死罪錄官，中元北酆都右陰天宮左府主生太陽火官，右府主死太陰水官，中府主生死罪錄官，中元四十二曹仙官，土府太皇上帝五方土府大帝，第一壘潤色地土皇君，第二壘剛色地土皇君，第三壘石脂色地土皇君，第四壘潤澤色地土皇君，第五壘金剛粟澤地土皇君，第六壘金剛鐵澤地土皇君，第七壘水制澤地土皇君，第八壘大風澤地土皇君，第九壘洞淵無色剛維地土皇君，地府泰素妙廣真君，地府陰德定休

真君，地府洞明普靜真君，地府玄德五靈真君，地府最聖耀靈真君，地府寶肅昭成真君，地府神變萬靈真君，地府無上正度真君，地府飛魔演慶真君，地府五化威靈真君，酆都紂絕陰天宮洞仙官，酆都泰殺諒事宗天宮洞仙官，酆都恬照罪炁天宮仙官，酆都宗靈七非天宮洞仙官，酆都敢司連宛屢天宮洞仙官，酆都明晨耐犯武成天宮洞仙官，地府列曹諸司僚屬案掾官吏，五道大神，十方道都大主者，本州城隍司主者，當境土地，里域真官，監壇監醮香官，東嶽差來彈壓吏兵，掌風雷雲雨部聖衆，玄虛監察應感靈祇，四直功曹使者，玄壇監齋典吏，十方三界隨從降赴醮筵一切聖衆。

右班

玉虛上帝，太微玉帝，少微天帝，福生無量天尊，八卦護身天尊，金闕化身天尊，大慈延壽天尊，寶華圓滿天尊，南方無極太上靈寶天尊，北方無極太上靈寶天尊，東南方無極太上靈寶天尊，西北方無極太上靈寶天尊，下方無極

太上靈寶天尊，洞真天寶君，洞玄靈寶君，洞神神寶君，紫微元靈白玉龜臺九靈太妙夜光金真萬炁祖母，青金丹皇大道君，北斗太微玉帝，北極玄卿大帝，北斗八景元君紫微垣帝座星君，太微垣帝座星君，天市垣帝座星君，太陰黃華素耀元精聖后上皇神母元君，天乙紫炁道星真君，太乙月孛彗星真君，神首羅喉建星真君，神尾計都墜星真君，南斗上相司命府寶光王玉玄上真道君，南斗天相司錄府丹精玄明寶室上真道君，南斗天梁延壽府靈瑤寶曜赤天上真道君，南斗天同益算府景明碧虛真王上真道君，南斗天樞度厄府極真太玄寶仙玉皇太上上真道君，南斗天機上生府紫宸絳房玄玄大帝上真道君，北斗天罡萬真節度奎光大帝君，上台司命虛精星君，中台司空六淳星君，下台司錄曲生星君，北斗太上宮變景逃元內妃，北斗中元宮保胎化形內嬪，北斗真元宮六遯七隱上元元母，北斗紐幽宮匿景藏光中元內妃，北斗綱神宮變體易形斗中大女，北斗紀明宮

隱迹散象斗中中女，北斗關會宮分影萬形斗中少女，北斗帝席宮化日月水火高皇左夫人，北斗上尊宮化金石山河高皇右夫人，南方鶉首分井宿天井星君，鬼宿天匱星君，鶉火分柳宿天厨星君，星宿天庫星君，張宿天秤星君，鶉尾分翼宿天都星君，軫宿天街星君，北方星紀分斗宿天廟星君，牛宿天機星君，玄枵分女宿天女星君，虛宿天卿星君，危宿天錢星君，陬訾分室宿天廩星君，壁宿天市星君，玉清上相大羅無極神公天君，泰玄上相天君，天機內相天君，天機上相天君，天樞使相天君，天樞左丞相天君，天樞右丞相天君，玄都元陽七寶紫微宮總主上真自然大聖，上元一品賜福天官大帝君，中元太陽洞耀元君二品赦罪地官元虛洞靈皇帝君，下元金靈洞陰大帝三品解厄水官洞真太皇元光皇帝君，東斗主算君，西斗紀名君，中斗大魁君，青天魔王，赤天魔王，白天魔王，黑天魔王，黃天魔王，欲界大魔王，色界大魔王，無色界大魔王，天曹府主太皇萬福真君，天



曹定名玉曆真君，天曹延壽益算真君，天曹扶衰度厄真君，天曹消災散禍真君，天曹延生保命真君，天曹生死錄籍真君，天曹注生勾死真君，天曹司命司錄真君，天曹司非司危真君，天曹司殺司罰真君，天曹掌籍掌算真君，天曹財庫祿庫真君，天曹掠剩使真君，天曹陽官陰官曹、司錄司罰曹、司天司命曹仙官，北斗萬福好生君，北斗續命定命君，北斗解厄烏操君，北斗益算掌算君，北斗散禍勾死君，北斗延生司命君，北斗勾陳華蓋君，北斗司危司罰君，北斗消災注壽君，三天門下上章詞表靈官，天樞院、驅邪院、校量功德院、五雷二院諸院使真君，天真皇人，三茅真君，徐、葛、鄭三真人，陸、張、杜三真人，上元太極左官左府主生太陽火官，右府主死太陰水官，中府主生死罪錄官，上元三十六曹仙官，靈寶領仙監齋、功曹使者、玉童玉女，直符香官承符傳檄官吏，玄壇執職宣勞，領齋召役仙靈官將吏兵，本靖所部侍靖，監壇護壇諸司官吏，諸省府院司將吏，東嶽天

齊仁聖帝，南嶽司天昭聖帝，西嶽金天順聖帝，北嶽安天元聖帝，中嶽中天崇聖帝，五嶽飛仙真人司命上真，三十六小洞天仙官，海上五嶽仙官，三十六靖廬仙官，東華方諸宮、青玄府、皇極宮、丹元宮、洞靈館仙官，本靖本派經師、籍師、度師真人，洞天福地考校諸仙真，東霞扶桑丹林大帝，水府丹靈大帝，龜臺大帝，玄溟大帝，下元暘谷洞源青華宮左府主生太陽火官，右府主死太陰水官，中府主生死罪錄官，下元南清泠左水會宮左府主生太陽火官，右府主死太陰水官，中府主生死罪錄官，下元北酆都右羅酆宮左府主生太陽火官，右府主死太陰水官，中府主生死罪錄官，下元四十二曹仙官，海上十洲三島仙官，水府暘谷神王，洞淵諸大龍王，東海昭聖廣德靈惠王，南海洪聖廣利靈孚王，西海通聖廣順靈通王，北海沖聖廣澤靈佑王，江瀆昭靈孚應威烈廣源順濟王，河瀆顯應靈源弘濟王，淮瀆長源溥濟王，濟瀆清源善濟王，荆江水帝，揚子江水帝，三川江水帝，松

江水帝，吳江水帝，湘江水帝，浙江水帝，楚江水帝，漢江水帝，三元水府福善順聖昭信王，五湖大神，七澤大神，十二河源十二溪真，三河仙官，水府列曹諸司僚屬案掾官吏，溟泠大神，九州社令司主者，本縣城隍司主者，遠近廟貌神祇，城隍司差來齋壇彈壓吏兵，本家土地司命六神，六十甲子，地分傳奏神員，三界直符使者，受事功曹，直壇土地，玄壇守衛，四靈神君，方隅禁忌一切神明。

並照開度黃錄寫全銜，掌醮降聖司同前。

#### 預修祈禳通用祈禳醮神位

上御筵十位同前

左右班一百二十分位

左班

紫清降福天尊，九宮捍厄天尊，逍遙快樂天尊，長生保命天尊，司命保生天尊，東方無極太上靈寶天尊，西方無極太上靈寶天尊，東北方無極太上靈寶天尊，西南方無極太上靈寶天尊，上方無極太上靈寶天尊，九天至真自然生

神上帝，東方八天度人帝君，西方八天度人帝君，東華木公上相青童道君，上清日宮太陽帝君，上清木、火、水、金、土五德星君，北斗九皇大道君，東方角、亢、氏、房、心、尾、箕七宿星君，西方奎、婁、胃、昴、畢、觜、參七宿星君，玉清上相大羅無極神公天君，三天扶教輔元上相，正一沖玄神化靜應顯佑真君，泰玄上相天君，天機內相天君，天機上相天君，天樞使相天君，天樞左丞相天君，天樞右丞相天君，上元一品賜福天官大帝，中元二品赦罪地官大帝，下元三品解厄水官大帝，東方無極飛天神王，西方無極飛天神王，東北無極飛天神王，西南無極飛天神王，上方無極飛天神王，青天魔王，赤天魔王，白天魔王，黑天魔王，黃天魔王，九天玉輔上宰四協侍宸，九天南昌度人不死尊神，南極長生大君度世司馬大神，好生韓君丈人，回骸起死監生大神，九天採訪應元保運真君，儲福定命真君，九天消灾散禍真君，保命續命真君，注祿注生真君，掌福掌算真君，九天定祿

生神真君，定貴見生真君，萬福運炁真君，九天金籙無量壽生真君，九天陽官曹、陰官曹、司命曹、司錄曹、司天曹、司錄曹仙官，北斗中和延壽君，北斗萬福好生君，北斗明算保祿君，北斗續命定命君，北斗注生掌籍君，北斗散禍勾死君，北斗扶衰度厄君，北斗延生司命君，三天門下三元真君，玄一三真人，後聖上保上傅上宰神功妙濟真君，魏、楊、許三真人，正一三師，三洞經籙神仙，上元紫微宮左府主生太陽火官，右府主死太陰水官，中府主生死罪錄官，上元太極右宮左府主生太陽火官，右府主死太陰水官，中府主生死罪錄官，靈寶天仙內院施用仙曹、赫奕仙曹，三界所問仙曹，建齋所請天地神真兵馬，本靖經籙仙真靈官，五嶽真君，十大洞天仙官，七十二福地仙官，二十八治仙官，華陽洞天童初院、蕭閑堂、易遷宮、含真館仙官，本派祖、玄、真師，名山得道仙衆，北陰酆都大帝，大陰黑帝靈君，佐理玄滋天君，助順太一靈君，九壘三十六土皇君，中元洞空青靈宮左

府主生太陽火官，右府主死太陰水官，中府主生死罪錄官，中元南洞陽左宗天宮左府主生太陽火官，右府主死太陰水官，中府主生死罪錄官，中元北酆都右陰天宮左府主生太陽火官，右府主死太陰水官，中府主生死罪錄官，中元四十二曹仙官，十王真君，六洞仙官，地府列曹僚屬案掾官吏，五道大神，十方道都大主者，本州城隍司主者，監壇某廟某神城隍差來齋壇彈壓吏兵，玄壇監齋監醮直日香官，十方三界隨從降赴醮筵聖衆。

右班

福生無量天尊，八卦護身天尊，金闕化身天尊，大慈延壽天尊，寶華圓滿天尊，南方無極太上靈寶天尊，北方無極太上靈寶天尊，東南方無極太上靈寶天尊，西北方無極太上靈寶天尊，下方無極太上靈寶天尊，五方五靈五老梵炁天君，南方八天度人帝君，北方八天度人帝君，西極金真萬炁祖母元君，上清月府太陰皇君，上清紫炁、月孛、羅喉、計都四餘星君，南斗六司上真道

君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，三天化主玄中大法師真君，靈寶監齋大法師真君，靈寶經師真君，靈寶籍師真君，靈寶度師真君，九天尚父天蓬都元帥真君，九天翊佐天猷副元帥真君，九天上輔翊聖保德真君，九天遊奕佑聖真君，南方無極飛天神王，北方無極飛天神王，東南無極飛天神王，西北無極飛天神王，下方無極飛天神王，欲界大魔王，色界大魔王，無色界大魔王，天曹太皇萬福真君，天曹定名玉曆真君，天曹延壽益算真君，天曹扶衰度厄真君，天曹消災散禍真君，天曹延生保命真君，天曹生死錄籍真君，天曹注生勾死真君，天曹司命司錄真君，天曹司非司危真君，天曹掌籍掌算真君，天曹財庫錄庫真君，天曹掠剩使真君，天曹陽官陰官曹、司錄曹、司罰曹、司天曹、司命曹仙官，北斗掌善應願君，北斗解厄烏操君，北斗消災錄庫君，北斗益算掌算君，北斗度厄赦罪君，北斗勾陳華蓋君，北斗司錄司非

君，北斗司危司罰君，三天門下上章詞表靈官，天皇真人，三茅真君，元始法師，徐、葛、鄭三真人，陸、張、杜三真人，三洞符法神仙，上元太極左宮左府主生太陽火官，右府主死太陰水官，中府主生死罪錄官，上元三十六曹仙官，玄壇領仙監齋金闕上佐御史大夫，承符傳檄官吏，玄壇效職宣勞官吏，本靖諸省府院將吏兵馬，五嶽五天聖帝，三十六洞天仙官，三十六靖廬仙官，海上五嶽仙官，東華方諸宮、青玄府、皇極宮、丹元宮、洞靈館仙官，本派經籍度三師真人，洞天福地考校仙真，水府扶桑大帝，水府丹靈大帝，龜臺大帝，玄溟大帝，海上十洲三島神仙，下元暘谷洞源宮左府主生太陽火官，右府主死太陰水官，中府主生死罪錄官，下元南清泠左水會宮左府主生太陽火官，右府主死太陰水官，中府主生死罪錄官，下元北酆都右羅酆宮左府主生太陽火官，右府主死太陰水官，中府主生死罪錄官，下元四十二曹仙官，暘谷四海四瀆神王，九江三元水府十二河源仙衆，

水府列曹僚屬官吏，溟泠大神，九州社令司主者，本縣城隍司主者，當境土地，里域真官，本家司命六神，掌風雷雨部聖衆功曹符使，地分傳奏神祇，玄壇守衛四靈神君，方隅禁忌一切明神。並照開度黃錄寫全銜，掌醮降聖司如前。

如前。

### 祈禳醮神位

上御筵十位同前。

左右班六十分位

左班

東方無極太上靈寶天尊，西方無極太上靈寶天尊，東北方無極太上靈寶天尊，西南方無極太上靈寶天尊，上方無極太上靈寶天尊，九天至真自然生神上帝，東方八天度人帝君，南方八天度人帝君，上清日宮太陽帝君，上清木、火、土、金、水五德星君，北斗九皇道君，東方角、亢、氐、房、心、尾、箕七宿星君，西方奎、婁、胃、昂、畢、觜、參七宿星君，玉清上相大羅無極神公天君，三天扶教輔元上相正一沖玄神化靜應顯佑真君，泰玄上相天君，天機內相天

君，天機上相天君，天樞使相天君，天樞左丞相天君，天樞右丞相天君，上元一品賜福天官大帝，中元二品赦罪地官大帝，下元三品解厄水官大帝，九天陽官曹、陰官曹、司命曹、司錄曹、司天曹、司祿曹仙官，三天門下上元道化真君，中元護正真君，下元定志真君，玄一三真人，三茅真君，徐、葛、鄭三真人，上元九府主生死罪錄仙官，靈寶天仙內院施用仙曹、赫奕仙曹，三界所問仙曹，建齋所請天地神真兵馬，本靖經錄符法中神仙兵士，五嶽真君，十大洞天仙官，三十六小洞天仙官，本派祖、玄、真師，北陰酆都大帝，太陰黑帝靈君，佐理玄滋天君，助理太一靈君，九壘三十六土皇君，中元九府四十二曹仙官，冥府十王真君，六洞仙官，十方道都大主者，本州城隍司主者，當境土地，里域真官，近遠廟貌神祇，功曹符使，六十甲子。

右班

南方無極太上靈寶天尊，北方無極太上靈寶天尊，東南方無極太上靈寶天

尊，西北方無極太上靈寶天尊，下方無極太上靈寶天尊，五方五老梵炁天君，西方八天度人帝君，北方八天度人帝君，上清月府太陰皇君，上清紫炁、月孛、羅喉、計都四餘星君，南斗六司上真道君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，三天化主玄中大法師真君，靈寶監齋大法師真君，靈寶經師真君，靈寶籍師真君，靈寶度師真君，九天尚父天蓬真君，九天翊佐天猷真君，九天上輔翊聖真君，九天遊奕佑聖真君，天曹太皇萬福真君，百司官典，三天門下上章詞表靈官，直日曹治引進靈官，三清上境天真皇人，魏、楊、許三真人，陸、張、杜三真人，上元三十六曹仙官，玄壇領仙監齋功曹使者，玄壇效職宣勞仙靈官吏，本靖所部侍靖仙官，諸省府院司將吏兵馬，五嶽聖帝，七十二福地仙官，海上五嶽仙官，本派經、籍、度三師真人，水府扶桑大帝，水府丹靈大帝，龜臺大帝，玄溟大帝，十洲三島神仙，下元九府四十二曹仙官，四

海四瀆龍王，九江十二河源仙衆，九州社令司主者，本縣城隍司主者，本家司命六神，所奉香火神祇，玄壇監醮香官，方隅禁忌一切明神。

並照開度寫全銜，掌醮降聖司如前。

天曹壽生醮神位

預修黃錄齋用

九天金錄無量壽生神君，天曹太皇萬福真君，天曹延壽益算真君，天曹司錄真君，天曹司命真君，天曹司非真君，天曹司危真君，天曹掌籍掌算真君，天曹財庫祿庫真君，天曹掌六十甲子受生真君，天曹掌十二生人財庫判官，天曹掠剩大夫，天曹諸司真君。

衆真監度醮神位

太上無極大道無上至真，三寶無上自然九天上帝，五方五老上帝，三十二天上帝，東華木公道君，西靈金母元君，上清十一曜真君，北極九府道君，南辰六闕道君，二十八宿真君，南宮度人不死尊神，南極長生大君，南宮度世司馬大神好生韓君丈人，靈寶護魂侍魄食炁通血中主君，靈寶注算紀名落死上

生大魁君，三元三官帝君，靈寶五師真君，九天諸司真君，九天金籙無量壽生神君，天曹諸司真君，天曹都大較量功德院使真君，玉清靈虛宮臨壇執職仙曹聖衆，青玄太乙玄府臨壇執職仙曹真衆，南昌上宮朱陵火府執職真衆，本靖諸省府院司執職真衆。

靈寶領教濟度金書卷之六

靈寶領教濟度金書卷之七

洞微高士開光救苦真人甯全真授  
靈寶通玄弘教水南先生林靈真編

聖真班位品

安宅齋用

御筵十位同前。

左右班六十分位

左班

東方無極太上靈寶天尊，西方無極太上靈寶天尊，東北方無極太上靈寶天尊，西南方無極太上靈寶天尊，上方無極太上靈寶天尊，無上自然九天生神上帝，上清日宮太陽帝君，上清木、火、土、金、水五德星君，北極九府道君，東方角、亢、氏、房、心、尾、箕七宿星君，西方奎、婁、胃、昴、畢、觜、參七宿星君，營室星君，蓋屋星君，土公星君，土史星君，玉清上相天君，泰玄上相天君，天機上相天君，天機內相天君，天樞使相天君，天樞左丞相天君，天樞右

丞相天君，三元三品三官大帝，九天玉輔上宰四協侍宸，九天應元保運真君，九天儲福定命真君，九天諸司列位真君，三天門下三元真君，三茅真人，徐、葛、鄭三真人，本靖經籙符法中將吏，五嶽真君，儲副正職，佐命大神，本派祖師、玄師、真師，列位真人，北陰酆都大帝，冥府十宮真君，酆都六洞仙官，九壘三十六土皇君，土府太皇大帝，五方土府大帝，住宅八卦所屬方隅禁忌星煞神君，住宅十干所屬方隅禁忌星煞神君，本州城隍司主者，本縣城隍司主者，近遠廟貌神祇，當境土地，里域真官，功曹符使，太歲尊神。

右班

南方無極太上靈寶天尊，北方無極太上靈寶天尊，東南方無極太上靈寶天尊，西北方無極太上靈寶天尊，下方無極太上靈寶天尊，五方五老上帝，上清月府太陰皇君，上清紫炁、月孛、羅喉、計都四餘星君，南辰六闕道君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，

危室星君，司空星君，弧矢星君，三天  
 化生玄中大法師真君，三天扶教輔元  
 大法天師，正一靜應真君，靈寶經師真  
 君，靈寶籍師真君，靈寶度師真君，靈  
 寶監齋大法師真君，北極法主四聖真  
 君，天曹太皇萬福真君，定名玉曆真  
 君，天曹司命司錄真君，司非司危真  
 君，天曹諸司列位真君，三天門下上章  
 詞表靈官，魏、楊、許三真人，陸、張、杜  
 三真人，本靖諸省府院司將吏兵馬，五  
 嶽五天聖帝，飛仙真人，本派經師、籍  
 師、度師，列位真人，水府扶桑大帝，四  
 海龍王，四瀆靈王，九江水帝，十二河  
 源仙衆，土府高皇四司五帝，十二仙  
 君，住宅四維所屬方隅禁忌星煞神君，  
 住宅十二支所屬方隅禁忌星煞神君，  
 本家土地司命六神，玄壇監醮香官，直  
 日受事功曹。

並照開度寫全銜，掌醮降聖同前。

土府醮三十六分位

左班

土府太皇上帝，南方土府大帝，北方土  
 府大帝，太歲尊神，太陰神后夫人，土

中功曹主簿土家令長神君，土中守衛  
 方隅青龍、白虎、朱雀、玄武神君，土府  
 子宮守坐飛鉤一切神君，土府寅宮守  
 坐飛鉤一切神君，土府辰宮守坐飛鉤  
 一切神君，土府午宮守坐飛鉤一切神  
 君，土府申宮守坐飛鉤一切神君，土府  
 戌宮守坐飛鉤一切神君，土府乾宮六  
 白守坐飛鉤一切神君，土府艮宮八白  
 守坐飛鉤一切神君，土府巽宮四碧守  
 坐飛鉤一切神君，土府坤宮二黑守坐  
 飛鉤一切神君，土府中宮五黃守坐飛  
 鉤一切神君，遊年造作干犯一切神君。

右班

東方土府大帝，西方土府大帝，中央土  
 府大帝，土府土公土母神君，土府三公  
 九卿丞相二千石土官，土中守衛方隅  
 勾陳、騰蛇、軒轅、招搖神君，土府丑宮  
 守坐飛鉤一切神君，土府卯宮守坐飛  
 鉤一切神君，土府巳宮守坐飛鉤一切  
 神君，土府未宮守坐飛鉤一切神君，土  
 府酉宮守坐飛鉤一切神君，土府亥宮  
 守坐飛鉤一切神君，土府坎宮一白守  
 坐飛鉤一切神君，土府震宮三綠守坐

飛鉤一切神君，土府離宮九紫守坐飛  
 鉤一切神君，上府兌宮七赤守坐飛鉤  
 一切神君，土府四維八面方隅分域一  
 百二十座神君，遊年典司禍福防禦一  
 切神君。

三界醮神位

七曜齋用

御筵十位同前。

左右班六十分位

左班

無上自然九天生神上帝，上清日宮太  
 陽帝君，東方歲星始陽青童上真道君，  
 西方太白太素少陰白皇上真道君，中  
 央鎮星中黃太皇上真道君，神尾計都  
 墜星真君，太乙月孛彗星真君，北極九  
 府九皇道君，東方角、亢、氏、房、心、  
 尾、箕七宿星君，西方奎、婁、胃、昴、  
 畢、觜、參七宿星君，玉清上相天君，泰  
 玄上相天君，天機上相天君，天機內相  
 天君，天樞使相天君，天樞左丞相天  
 君，天樞右丞相天君，三元三品三官大  
 帝，九天儲福定命真君，九天應元保運  
 真君，九天諸司列位真君，齋主本命元

辰本命真聖，本宿星官，三天門下三元真君，三清上境天真皇人，三茅真君，徐、葛、鄭三真人，本靖三洞四輔經籙符法將吏，五嶽真君，本派祖、玄、真師，北陰酆都大帝，九壘三十六土皇君，地府十宮真君，本州城隍司主者，當境土地，里域真官，功曹符使，六十甲子靈官。

右班

五方五老上帝，上清月府太陰皇君，南方熒惑丹火朱陽赤星上真道君，北方辰星太玄陰元黑皇上真道君，神首羅喉建星真君，天乙紫炁道星真君，三台華蓋星君，南辰六闕道君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，三天化主玄中大法師真君，三天扶教輔元大法天師正一真君，靈寶經師真君，靈寶籙師真君，靈寶度師真君，靈寶監齋大法師真君，北極法主四聖真君，天曹太皇萬福真君，定名玉曆真君，天曹諸司列位真君，齋主胎生八位星君，流年臨照身命運限列位星君，三天門下上章

詞表靈官青羅真人，魏、楊、許三真人，陸、張、杜三真人，本靖諸省府院司將吏兵馬，五嶽五天聖帝，本派經、籍、度師，列位真人，水府扶桑大帝，四海龍王，四瀆仙官，本縣城隍司主者，本家司命六神，玄壇監醮香官使者。

並照前寫全銜，掌醮降聖同前。

紫府醮三十六分位

左班

上清日宮太陽帝君，上清木、火、土、金、水五德星君，北極九府九皇道君，寶瓶宮土德星君，人馬宮木德星君，天秤宮金德星君，獅子宮太陽星君，陰陽宮水德星君，白羊宮火德星君，甲子金、丙寅火、戊辰木德星君，甲戌火、丙子水、戊寅土德星君，甲申水、丙戌土、戊子火德星君，甲午金、丙申火、戊戌木德星君，甲辰火、丙午水、戊申土德星君，甲寅水、丙辰土、戊午火德星君，齋主家胎生八位大小二運所屬星君，齋主流年臨犯沖照胎生二運星君，周天分野三百六十五度列宿乾象星曜。

右班

上清月府太陰皇君，上清紫炁、月孛、羅喉、計都四餘星君，南辰六闕道君，磨竭宮土德星君，天蠍宮火德星君，雙女宮水德星君，巨蟹宮太陰星君，金牛宮金德星君，雙魚宮本德星君，己巳木辛未土癸酉金德星君，己卯土辛巳金癸未木德星君，己丑火辛卯木癸巳水德星君，己亥木辛丑土癸卯金德星君，己酉土辛亥金癸丑木德星君，己未火辛酉木癸亥水德星君，身命二宮直年九限所屬星君，流年臨犯沖照身命九限星君，太歲尊神，傳奏神祇。

三界醮神位

保命北帝資福齋用

御筵十位同前。

左右班六十分位

左班

無上自然九天上帝，上清日宮太陽上帝，上清木、火、土、金、水五德星君，北極九府九皇道君，東方角、亢、氏、房、心、尾、箕七宿星君，西方奎、婁、胃、昂、畢、觜、參七宿星君，齋主本命元辰本命真聖，本宿星官，八相天君，三官

大帝，九天應元保運真君，儲福定命真君，九天諸司真君，天樞院驅邪院使真君，三元真君，三茅真君，徐、葛、鄭三真人，上元九府掌生死罪錄官，靈寶諸部仙曹，六部仙官，建齋所請天地神真，上清考召諸司驅邪院合干官將吏兵，本靖三洞四輔經錄神仙，五嶽真君，名山洞府得道神仙諸靈官，北陰酆都大帝，中元九府主生死罪錄官，中元四十二曹仙官，六洞仙官，十宮真君，本州城隍司主者，當境土地，里域真官，功曹符使，六十甲子靈官。

右班

五方五老上帝，上清月府太陰皇君，上清紫炁、月孛、羅喉、計都四餘星君，南辰六闕道君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，流年臨犯沖照身命所屬星君，靈寶五師真君法主，四聖真君，天曹太皇萬福真君，定名玉曆真君，天曹諸司真君，玉樞玉府五雷二院三司真君，三天門下上章詞表靈官，魏、楊、許三真人，陸、張、杜三真人，上

元三十六曹仙官，領仙監齋功曹使者，玉童玉女、直符香官，玄壇效職宣勞，領齋召役仙靈官吏，本靖侍靖諸省府院司官君將吏，五嶽聖帝，洞天福地考校仙真聖眾，水府扶桑大帝，下元九府主生死罪錄仙官，下元四十二曹仙官，四海龍王，四瀆大神，本縣城隍司主者，本家司命六神，玄壇監醮香官，直日受事功曹。

並照全銜寫，掌醮降聖同前。

瘟疫醮神位

東方青帝青瘟神君，南方赤帝赤瘟神君，西方白帝白瘟神君，北方黑帝黑瘟神君，中央黃帝黃瘟神君，天瘟地瘟神君，山瘟家瘟神君，井瘟竈瘟神君，陰瘟陽瘟神君，五瘟部從隊伍神眾，天曹主執五瘟聖眾，嶽府主執五瘟聖眾，當境主執五瘟聖眾，今年某季準天敕命行灾主令一切神明，本州城隍司主者，本縣城隍司主者，遠近廟貌權衡禍福聖眾，虚空監察看望隨喜聖眾。

天蓬官將聖位

九天尚父天蓬都元帥真君，九天翊佐

天猷副元帥真君，九天上輔翊聖保德儲慶真君，九天遊奕玄武佑聖助順福德真君，九元殺童大將軍，五丁都司大將軍，高刁北翁大將軍，七政八靈大將軍，太上皓凶大將軍，長顛巨獸大將軍，手把帝鐘大將軍，素梟三神大將軍，嚴駕夔龍大將軍，威劍神王大將軍，斬邪滅蹤大將軍，紫炁昇天大將軍，丹霞赫衝大將軍，吞魔食鬼大將軍，橫身飲風大將軍，蒼舌綠齒大將軍，四目老翁大將軍，天丁力士大將軍，威南禦兇大將軍，天驕激吏大將軍，威北銜鋒大將軍，衛我九重天將軍，劈尸千里大將軍，驅却不祥大將軍，敢有小醜大將軍，欲來見形大將軍，鑿天大斧大將軍，斬鬼五刑大將軍，炎帝烈血大將軍，北斗然骨大將軍，四明破骸大將軍，天猷滅類大將軍，神刀一下大將軍，萬鬼自潰大將軍，一炁都統大將軍，無義神王，飛鷹走犬二使者，三十萬兵神吏聖眾，北帝殺鬼一行吏兵。



天醫醮神位

與天醫幕神位同

祈禳醮神位

玄靈璇璣齋用

上御筵十三位

紫微中天北極大帝，高上玉皇尊帝，太微玉帝，北極玄卿大帝，北斗陽明大尉府據斗真人玉皇九晨君，北斗陰精上宰府攀魁真人玉皇北上晨君，北斗真人司空府履斗真人玉皇主仙華晨君，北斗玄冥遊擊府步斗真人玉皇玄上北蓋晨君，北斗丹元斗君府躡紀真人玉皇金魁七晨君，北斗北極太常府步綱真人玉皇北晨飛華晨君，北斗天關上帝府乘龍真人玉皇總靈九元北蓋晨君，北斗洞明玉帝府遊行三命真人玉皇帝尊九晨君，北斗隱元帝真府徘徊三陽真人玉皇帝真元晨君，北斗天罡萬真節度奎光大帝君。

左右班六十分位

左班

北斗七晨元君，北斗元斗宮天樞星魁精玄上真皇夫人，北斗玄魁宮天璇星

虛精上玄皇夫人，北斗上精宮天璣星靈妃元皇夫人，北斗綱極宮天權星上靈神妃華皇夫人，北斗靈綱宮玉衡星北上金蓋中皇夫人，北斗紫微宮開陽星安上神華元皇夫人，北斗運天宮瑤光星玉華靈皇夫人，北斗空真宮洞明星太明常皇夫人，北斗常寶宮隱元星空玄變靈上皇夫人，三台華蓋星君，斗中萬福好生君，斗中續命定命君，斗中度厄烏操君，斗中益算掌算君，斗中散禍勾死君，斗中延生司命君，斗中勾陳華蓋君，斗中司危司罰君，天蓬大元帥元應真君，黑煞大元帥元照真君，三天大法師元素真君，斗煞斗伐大將軍，斗擊斗敵大將軍，斗中黑煞威烈行罡都統大將軍，斗中天罡威劍萬丈大神王，斗中擎羊、陀羅二仙使者，斗中九省九府丞相真人，玉童玉女仙吏，本靖經錄法部諸省府院司官將吏兵，本州城隍司主者，當境土地，里域真官，本家司命六神。

右班

北斗八景元君，北斗太上宮變景逃元

內妃，北斗中元宮保胎化形內嬪，北斗真元宮六遯七隱上元元母，北斗紐幽宮匿景藏光中元內妃，北斗綱神宮變體易形斗中大女，北斗紀明宮隱跡散象斗中中女，北斗關會宮分影萬形斗中少女，北斗帝席宮化日月水火高皇左夫人，北斗上尊宮化金石山河高皇右夫人，斗中中和延壽君，斗中明算定祿君，斗中賞善應願君，斗中消灾祿庫君，斗中注生掌籍君，斗中扶衰財庫君，斗中度厄赦罪君，斗中司非司錄君，斗中捍厄罰惡君，天猷副元帥元景真君，玄武大元帥元和真君，中天大法師元惠真君，斗刺斗罰大將軍，豁落璇璣大將軍，中天三十二天大將軍，斗中解厄掌式諸靈官，斗中繡衣使者，通事舍人，斗中千乘萬騎仙官神吏，本派祖、玄、真師，經、籍、度師，列位真人，四直功曹，三界符使，香官使者。

以上並照前寫全銜，若欲禳禱行年，宜將道德官君後八位，合併入前八位，却添太陽、太陰、五星、四餘、東西南北宿、本命流年臨犯八位，入在

九夫人九妃之後。

齋壇前立二幕神位

左幕

三天大法師元素真君。

右幕

中天大法師元惠真君。

醮筵外設二幕神位

左幕

中天門下掌醮司真君。

右幕

中天門下降聖司真君。

三界醮神位

傳度道場用

上御筵中列五位

玉清聖境虛無自然元始天尊。

上清真境虛皇大道靈寶天尊。

太清仙境混沌老君道德天尊。

東華木公上相青童道君。

西極金真萬炁祖母元君。

上御筵第二列

太上昊天至尊金闕玉皇上帝。

紫微中天北極大帝。

紫微上宮天皇帝。

東極救苦青玄上帝。

高上神霄玉清真王南極長生大帝。

南極真王朱陵大帝。

承天效法厚德光大后土皇地祇。

左右班六十分位

左班

東方無極太上靈寶天尊，西方無極太

上靈寶天尊，東北方無極太上靈寶天

尊，西南方無極太上靈寶天尊，上方無

極太上靈寶天尊，無上自然九天上帝，

東方八天度人帝君，西方八天度人帝

君，上清日宮太陽帝君，上清木、火、

土、金、水五德星君，北極九府九皇道

君，東方角、亢、氏、房、心、尾、箕七宿

星君，西方奎、婁、胃、昴、畢、觜、參七

宿星君，玉清上相天君，泰玄上相天

君，天機上相天君，天機內相天君，天

樞上相天君，天樞左丞相天君，天樞右

丞相天君，三元三品三官大帝，九天諸

司真君，十方無極飛天神王，玄一三真

人，三茅真君，徐、葛、鄭三真人，三洞

四輔諸省府院司主宰仙衆，上元三宮

九府考校仙官，本靖經籙符法中所部

仙靈將吏主將副將兵馬，五嶽真君，儲

副正職，佐命大神，大小洞天仙官，三

十六靖廬仙官，華陽洞天童初府仙官，

北陰酆都大帝，中元三宮九府考校仙

官，中元四十二曹仙官，地府十宮真

君，酆都六洞仙官，地府諸司列曹僚屬

官吏，九州社令司主者，本縣城隍司主

者，當境土地，里域真官，本家司命六

神。

右班

南方無極太上靈寶天尊，北方無極太

上靈寶天尊，東南方無極太上靈寶天

尊，西北方無極太上靈寶天尊，下方無

極太上靈寶天尊，五老上帝，四梵天

君，南方八天度人帝君，北方八天度人

帝君，上清月府太陰皇君，上清紫炁、

月孛、羅喉、計都四耀星君，南辰六闕

道君，南方井、鬼、柳、星、張、翼、軫七

宿星君，北方斗、牛、女、虛、危、室、壁

七宿星君，三天化主玄中大法師真君，

三天扶教輔元大法天師正一真君，靈

寶經師真君，靈寶籍師真君，靈寶度師

真君，靈寶監齋大法師真君，法主四聖

真君，天曹諸司真君，五天三界大魔王，三清上境天真皇人，魏、楊、許三真人，陸、張、杜三真人，三洞四輔經籙法部仙靈官吏，上元三十六曹仙官，本靖侍靖仙官，玉童玉女，主將副將，諸省府院司吏兵，五嶽聖帝，飛仙聖衆，七十二福地仙官，二十八治仙官，海上五嶽仙官，華陽洞天童初府、蕭閑堂、易遷宮、含真館仙官，本派經、籍、度師真人，水府扶桑大帝，下元三宮九府考校仙官，下元四十六曹仙官，四海龍王，四瀆大神，水府諸司列位真人，本州城隍司主者，功曹符使，監醮香官，六十甲子靈官。

並照依前寫全銜，掌醮降聖同。

### 三界醮神位

雷霆齋用

上御筵中列十三位

玉清聖境元始天尊妙無上帝。

上清真境靈寶天尊妙有上帝。

太清仙境道德天尊至真上帝。

太上昊天至尊玉皇上帝。

高上神霄玉清真王南極長生大帝。

東極青華大帝。

九天應元雷聲普化天尊。

九天雷祖大帝。

上清紫微碧玉宮太乙大天帝。

六天洞淵大帝。

六波天主帝君。

可韓司丈人真君。

九天應元保運真君。

以上並寫全銜。

左右班六十分位

左班

無上自然九天上帝，東華木公上相青童道君，上清日宮太陽帝君，上清木、火、土、金、水五德星君，南辰六闕道君，東方角、亢、氏、房、心、尾、箕七宿星君，西方奎、婁、胃、昴、畢、觜、參七宿星君，玉清上相天君，天機上相天君，天機內相天君，三天化主玄中大法師真君，靈寶經、籍、度三師真君，三元三品三官大帝，九天諸司列位真人，太一五福真君，基民基少遊真君，玉府五雷院使真君，大洞飛捷雷司真君，玉府判府真君，玉府左右樸射玉樞使相真

君，上清司命玉府右卿雷霆都司元命真君，四溟大神，天曹主執雷霆風雨聖衆，五嶽聖帝，四海龍王，五湖大神，三河仙官，七澤大神，某潭龍王，天下都大城隍主者，本州城隍司主者，功曹符使，監醮香官。

右班

五方五老上帝，西極金真萬炁祖母元君，上清月府太陰皇君，北極九府道君，南方井、鬼、柳、星、張、翼、軫七宿星君，北方斗、牛、女、虛、危、室、壁七宿星君，泰玄上相天君，天樞使相天君，天樞左丞相天君，天樞右丞相天君，三天扶教輔元大法天師正一靜應真君，靈寶監齋大法師真君，法主四聖真君，天曹諸司真君，太一大遊四神，天一地一直符真君，玉樞五雷院使真君，太乙碧玉院真君，玉府左右侍中天雷上相真君，斗樞上相天君，五雷院使真君，蓬萊都水使者，鄧、辛、張三大元帥，今年行令主執雷霆風雨聖衆，水府扶桑大帝，四瀆大神，九江水帝，十二溪真，某廟神祇，某州社令司主者，當境

土地，里域真官，直壇土地神員，虛空  
監察應感神祇。

並照前寫全銜，掌醮降聖同前。

靈寶領教濟度金書卷之七

### 靈寶領教濟度金書卷之八

洞微高士開光救苦真人甯全真授  
靈寶通玄弘教水南先生林靈真編

#### 朝奏次序品

開度祈禳通用

#### 宿啓次序

衆官於靜默堂序立，焚解穢符。

衆念靜天地呪，法師變鍊如法。

次上真師幕香，三拜。

知磬舉：金真演教天尊。贊引法

師至左幕上香，再拜。啓白：

具位臣某謹焚香，上啓三天化主玄中大  
法師真君，三天大聖都天大法天師真  
君，靈寶監齋大法師真君。仰冀真慈，  
俯垂淵鑒。臣聞三洞流光，金格具存於  
齋律；九清設教，瓊科首肅於壇儀。  
雖洪恩雨露之無私，而玄憲雷霆之有  
赫，告盟伊始，證誓圖終。以今奉爲齋  
主某，崇建某齋幾晝夜，尅卜此宵，宿啓  
玄壇，依科修奉。其諸悃悞，已錄奏

聞，顧遊聖域而面墻，莫紹宗乘而入  
室，累功切切，寡過兢兢。聯事舉能，  
懼乏知人之藻鑒。膺符宣德，徒勤事  
帝之芻衷。行催鵠鷺之班，共對龍鸞  
之御。昭回宸渥，誓參贊於天工。赫  
奕朝章，顧涵容於師匠。所有臨壇六  
職及衆官姓名，謹具狀陳啓以聞，干冒  
師嚴，下情不勝戰慄屏營，至謹言。

直壇宣結盟狀。監齋白云：

登壇衆官，各揚乃職，務敦誠恪，冀獲  
感通，使幽顯蒙恩，天人稱慶。不恭乃  
職，科有明文。

焚結盟狀。知磬舉唱道讚：

道場衆等人各運心，皈命三寶一切念。

直壇舉三天尊號：黃籙開度天

尊，黃籙齋用。

明真感應天尊，明真齋用。

福生無量天尊，祈禳醮用。

知磬舉華夏贊，引法師至右幕，上  
香，再拜。次左旋，上右廂衆聖  
香。次上御位香，上左廂衆聖香。  
法師至都門前，念密呪存思：

四上功曹，龍虎使者，正一生炁，侍香

玉女。夜有所啓，願得開明。童子太玄少女，與我俱入黃房之裏，通達所啓，皆得上聞。

法師入都門，左旋至地戶。知磬率衆官立地戶外，法師密呪存思：

仙道渺莽，元始之家，我欲升壇，清神變慮。願得太上，賜我流霞之漿，布炁芬芳。臣今服之，可以步罡。五臟神君，直日香官，聞吾秘呪，亦各以安。

法師先進左足，入地戶。知磬率衆隨後。

法師引衆左旋，至天門外，華夏結聲。

法師上三師香，啓白。知磬舉：修齋，請三師。法師啓白。次面天門，密存思：

無上大羅，大羅玉清，玉清之家，度法真人。聞臣秘呪，度臣身形，取彼玉霞，以靜臣身，令臣步罡，行之帝鄉，上朝玉皇。

知磬舉：五靈安鎮天尊。法師舉：左足入天門。知磬舉：東方

九炁天君。法師旋行至東方。

知磬舉：東方真文，請師安鎮。

法師執東方真文香上熏，念真文畢，置案上，奠以金龍。法師啓白，焚符宣呪，衆和：安鎮東方。

知磬舉：南方三炁天君。法師至南方。五方同式

法師中立宣呪，畢，歸位。

侍職立師寶邊，宣科補職。

直壇隨職授簡，受者三拜受之。

知磬吟智慧頌，衆和之，旋行一周。

法師移班西面，衆官面東，並長跪。次伏地存思。知磬舉：

衆官等各各首體投地，默禮十方，方各一拜，從北為始。禮畢，周回十方，虔誠受戒。

衆官長跪，法師鳴尺說戒。

知磬吟奉戒頌，衆和之，旋行一周，歸位。法師宣禁直壇，以罰簡授監齋，三拜受之。

知磬舉：燒香頌。法師上十方香，從北為始，旋行一周。

直壇奠十方謁簡，從北為始。

法師上天寶臺香，直壇焚降真召靈符。法師閉目，靜思太上三尊

在玄都玉京山，左有三十六部尊經，右有玄中大法師、十真五帝、

群仙侍衛，如大朝會之儀，自玄虛中乘空下降，左右龍虎君，千乘萬騎，三界尊靈，群真侍衛。羅列在座。法師密呪：

玉華散景，九炁凝烟，香雲密羅，逕衝九天，侍香金童，傳言玉女，傳臣所奏，上聞帝前。令臣所啓，咸賜如言，今日

告齋，諸天臨軒。三界五帝，列言上清，執籙把籍，齊到帝前。開度云回骸起

死，無量度人。祈禳云延壽益算，度厄尊神，龍漢蕩蕩，玉清上清。

法師復位，拜。

都講舉：各禮師存念如法。

法師閉目，靜思經、籍、度三師所在之方。各心禮三拜，先祝經師云：

願師得仙道，我身升度。

次祝籍師云：

願師得飛仙，爲我開度七祖父母，早升天堂，我得仙道，升入無形。

次祝度師云：

願師得仙度，上登高真，與我開度五苦八難，名入仙錄，永成真入。今爲某事，啓建齋壇，伏願真師，隨心降現，通真達靈，真心洞明。招真金童，召靈玉女，爲我通達，真炁降臨。願揚妙化，我道合靈。

存思五色雲炁，從五臟出，如雲之升，匝滿齋壇，仙童立左，玉女立右，天仙兵馬衣緋衣處天門東，地仙兵馬衣軍隊之衣處地戶，飛仙兵馬衣羽衣處天門西，日官兵馬衣緋紅衣處日門，月官兵馬衣黃衣處月門，星宿兵馬隨方色衣處四方，五帝兵馬亦隨方色衣處其方旺位，各九億萬騎，監齋直事。三界官屬，羅列左右，雲氣匝覆齋主家門大小身形。又內思五臟，肺紅白色，七葉在喉嚨下。心紫赤色，如未開蓮花，上大下小，在肺下。肝蒼紫色，五葉，在心下。

脾黃如金色，在胃上。腎有兩枚，紫黑色，當臍夾脊。又思五嶽，各在五方。又思五星，東方歲星在左肘，西方太白在右肘，南方熒惑在額上，北方辰星在兩膝間，中央鎮星在心前，各如其方色。又思五帝，冠冕隨方服色，在其方備守。身中映蓋一體，體作黃金色，真炁從夾脊而上，至肝肺後出，高衝頸上，周護身中，稱滿一體，頂生圓像，光明朗照十方，身中了然，洞見內外。法師宣五方衛靈呪，逐方存思。直壇焚五方衛靈符。

都講唱：鳴法鼓二十四通。法師叩齒集神，以八為節。八通上聞玉清境，次八通上聞上清境，八通上聞太清境。次發爐，直壇焚發爐符。

無上三天玄元始三炁，掐中指中太上道君，移中指根召出，移至一指。根臣身中三五功曹，左右官使者，侍香金童，傳言玉女，五帝直符，直日香官，各三十二人

出。勒至上指<sup>②</sup>甲下，彈訣，再歸中指<sup>③</sup>中出者嚴裝。關啓玄壇天帝神君，當召此間土地，里域真官正神，急上關啓，臣今奉爲入齋意。以今宿啓告齋，願得玉清道炁，靈寶妙光，下降流入臣等身中。即使玄壇清靜，內外成真，天無氛穢，地絕妖塵，琳琅振響，十方肅清，萬魔不干，真誠上徹。今臣所啓，速達徑御太上無極大道至真玉皇上帝御前。彈訣<sup>④</sup>出。

都講舉：各稱法位。

法師稱職宣科：

具位奉行某齋法事，小兆臣某與臨壇官衆等，今故燒香，願以是功德，上爲七世父母，天子王侯，土地官長，經師、籍師、度師，及山林巖棲學真道士，同學門人，九親姻族，天下人民，蜎飛蠹動，跂行蠃息，一切衆生。今故燒香，皈身皈神，皈命十方至真自然無極大道。乞丐原赦前生今世、生死宿罪重過，得免離三惡之道，五苦八難九厄之中。臣身得道真，飛行虛空，白日升天，侍衛道君，逍遙無上金闕七寶自然宮殿，永與

道合。所啓玄感應聲，上御至真無極道前。

知磬舉：禮十方，從北為始，衆官每方各一拜。

至心皈命禮北方無極太上靈寶天尊。

次東方，至下方，並同。

知磬舉：禮足各長跪，皈命虔誠懺悔。

法師長跪，宣坐懺。衆官各長跪。

臣法衆等，至心皈身皈神皈命十方無極太上靈寶天尊。以今宿啓告齋焚香，懺悔修齋。弟子某及臣法衆等，自從曠劫以來，至于今日，或身形所犯，四肢舉措，動違戒律，不依經典。或心業所犯，志念不專，情浮意動，馳騁不息。或口業所犯，善惡返論，綺言飾非，華辭惑衆。因今懺悔，並乞蕩除。皆願臣等及修齋弟子，身入至仙，會道合真，神合真寂，洞入自然，性命合道，玄會無爲，志心稽首，禮謝無上至真三寶。

法師拜起立，

知磬舉三啓頌。次舉三禮：

志心稽首禮太上無極大道，

志心稽首禮三十六部尊經，志心稽首禮玄中大法師。

都講舉：重稱法位。

法師宣銜至重誠，衆和：上啓。

法師宣至臣聞，長跪。至謹，當宣奏。知磬跪三寶前宣詞，宣至即

謹投，法師長跪。次宣至大道銜，

法師拜伏，衆官皆伏。宣至謹詞，

法師拜起，衆官並起。法師宣科

至以聞，拜。

知磬舉天尊號，

法師長跪。小啓畢，面地戶立。

當職告符簡，

法師遣符簡，衆念元始符命，至道

遙上清。當職宣符關，就地戶焚

之，衆念度符頌，法師復位。

都講舉小十二願，衆和：結句。

法師復爐，直壇焚復爐符。

香官使者掐已文左右龍虎君，侍香諸靈

官，當令臣建齋之所，自然生金液丹碧

芝英，百靈衆真，交會在此，自己文歷下二

指<sup>⑤</sup>根，回至中文香火爐前。令臣學道得

道，求仙得仙，齋主受福，幽顯沾恩。

十方仙童玉女，侍衛香烟，傳臣向來所啓之誠，速達徑御太上無極大道至真玉皇上帝御前。

法師拜起，直壇收十方謁簡。

知磬舉出堂頌，贊引法師自天門出，左旋出地戶，出都門。密呪：

玄上太陰，八窗開明，夜有所啓，少女

通靈，事畢復位，萬神潛寧。

贊引歷右幕上香，旋行過壇後，至

師幕上香致拜，長跪小啓。密

祝：

臣重誠上啓，臣向來奉爲齋主某，崇建某齋，宿啓行道。切慮俯仰未備，存念不周，五帝書愆，四司糾過，莫逃譴責，竄賴涵容，庶使宸澤下臨，齋忱上御。臣不勝激切，屏營之至。

法師拜起，知磬舉向來頌：

向來宿啓功德，上祈天澤。開度云開度亡靈。祈禳云保佑平安。同賴善功，證

無上道一切信禮。

表白宣白隨意，知磬舉：監齋糾

過。

監齋三拜上香，長跪啓師，隨壇官

有無過失言之，三拜起。如壇官有過當罰，則秉誠端簡，明言其過，以罰簡中本簡授之，知磬舉：罪消黑簿天尊，壇官如數拜訖，以罰簡還監齋，退立。

知磬舉天尊號。贊引法師回靜默堂，衆官序立。法師上香三拜。

知磬舉：皈依至道，回拜師真，用集良因，福流開度云亡者，衆和：願得往生。祈禳云齋主。衆和：願得長生。

知磬舉宿啓事竟，衆官復位。

法師引衆官就坐。

法師復神咽液起。

揖散已如常儀。

### 靈寶領教濟度金書卷之八

①②③⑤指：底本作「旨」，當爲「指」之誤。

④訣：底本作「夬」，當爲「訣」之誤。

### 靈寶領教濟度金書卷之九

洞微高士開光救苦真人甯全真授靈寶通玄弘教水南先生林靈真編

#### 朝奏次序品

開度祈禳通用

#### 朝謁次序

衆官於靜默堂序立，焚解穢符。

衆念靜天地呪，法師變鍊如法。

上真師幕香，再拜。

知磬舉：金真演教天尊。贊引法師至玄師幕序立，上左幕香，知磬

唱道。

直壇舉天尊號。

知磬舉華夏，贊引法師上右幕香，

再拜。法師左旋，上右廂衆聖香，

上御位香，次上左廂衆聖香，至都

門序立，法師中揖，念密呪存思：

四明功曹，通真使者，傳言玉女，侍香

玉女，爲我通達，道室正神，上元生炁，

入我身中。此係朝入戶呪，早午朝同，晚與宿啓

同。

法師入都門，至地戶，知磬率衆官立地戶外，法師中揖，念密呪存思：

仙道渺莽，元始之家，我欲升壇，清神變慮。願得太上，賜我流霞之漿，布炁芬芳。臣今服之，可以步罡。五臟神君，直日香官，聞吾秘呪，亦各以安。

法師先進左足，入地戶，知磬率衆官隨後。法師左旋至天門，念呪存思：

無上大羅，大羅玉清，玉清之家，度法真人。聞臣秘呪，度臣身形，取彼玉霞，以靜臣身。令臣步罡，行之帝鄉，上朝玉皇。

法師先進左足，入天門，徑至東方上香，周回十方，先四正，次四維上下。直壇奠十方謁簡，從東為始。法師上香畢，即奠之。法師次上天寶臺香，華夏結聲。知磬舉燒香頌，直壇焚降真召靈符，法師存三寶下降，密呪：

玉華散景，九炁凝烟，香雲密羅，徑衝



九天。侍香金童，傳言玉女，傳臣所奏，上聞帝前。令臣所啓，咸賜如言，今日修齋，諸天臨軒。三界五帝，列言上清，執籙把籍，齊到帝前。開度云回骸起死，無量度人，祈禳云延壽益算，度厄尊神，龍漢蕩蕩，玉清上清。

法師致拜起，

都講舉：各禮師存念如法。

法師存祝三師。同宿啓。只改肇建齋壇，作修齋行道。

法師思神，清旦行道，思青雲之炁，匝滿齋壇，青龍二頭，獅子二頭在前，又龍二頭，獅子二頭在後，合八道，處巳未丑亥之位，龍外獅內，仙童玉女，天地日月星宿，五帝兵馬羅列。青炁從肝中出如雲之升，青龍、獅子，在炁中，雲炁兵馬官屬，並往齋主家門，一如宿啓。

日中行道，思赤雲之炁，匝滿齋壇，朱雀二頭，鳳凰二頭在東，又雀二頭，鳳二頭在西，合八頭，處寅辰戌申之位，雀外鳳內，仙童玉女，

仙馬羅列。赤炁從心出如雲之升，朱雀、鳳凰，在赤炁中，餘同宿啓。日入行道，思白雲之炁，匝滿齋壇，白虎二頭，麒麟二頭在四方，合八頭，處子午卯酉之位，虎外麟內。仙童玉女，兵馬羅列，白炁從肺出如雲之升，白虎、麒麟在白炁中，餘並同宿啓。

又思五臟，五嶽，五星，五帝，並如宿啓。早午晚朝同

法師宣衛靈呪，衆和：與道合真。都講舉：鳴法鼓二十四通。法師扣齒集神同宿啓。次發爐，直壇焚發爐符。

無上三天玄元始三炁，掐中指中太上道君，移中指根召出移至二指根，臣身中三五功曹，左右官使者，侍香金童，傳言玉女，五帝直符，直日香官，各三十二人出。勒至上指甲下，彈訣，再歸中指中出者嚴裝，關啓玄壇天帝神君，當召此間土地，里域真官正神，急上關啓。臣今奉爲齋意。以今升壇行道，願得玉清道炁，靈寶妙光，下降流入臣等身中。即使玄壇清

靜，內外成真，天無氛穢，地絕妖塵，琳琅振響，十方肅清，萬魔不干。真誠上徹，令臣所啓，速達徑御，太上無極大道，至真玉皇上帝御前。彈訣出

都講舉：重鳴法鼓二十四通，簡閱吏兵行事。法師叩齒如數，長跪出官，衆官各長跪。

謹出臣身中掐中指中文玉門紫戶三十九闕上真靈官，三部八景二十四真，五體真官，丹元真人，上清虛无自然左右領仙玉郎，飛仙玉虛侍郎，各二十四人出，五帝五色元皇，太真飛龍功曹，上元功曹，飛行功曹，各二十四人出。玉虛飛仙使者，太仙使者，神仙使者，上元使者，各二十四人出。玉虛金童玉女，飛行金童玉女，八節直言直事，各二十四人出。三天執法開化陰陽功曹，度道消災散禍解厄君，各二人出。所佩籙中某治建節監功大將軍，前部效功，後部效殺，驛庭令，驛庭丞，四部監功謁者，上仙上靈二官，直使正一功曹，左右官使者，陰陽神訣吏，科車赤符吏，剛風騎置吏，驛馬上章吏，飛龍

驛吏，各二人出。自中文周歷十二宮，剔訣，再掐定出者嚴裝顯服，冠帶垂纓，整其威儀。領仙玉郎，冠飛玄玉冠，衣九色龍文虎衣，執命魔靈幡，立左。玉虛侍郎冠九晨玉冠，衣五色飛仙羽衣，執九色靈幡，立右。飛龍功曹，冠九德通天之冠，衣九色鳳衣，腰帶虎書，執召神之符，在上。飛仙功曹，冠九德通天之冠，衣五色羽衣，腰帶金鈴，執攝煞之律，在下。飛仙使者，冠飛天玉冠，衣五色斑文之衣，手執金符建節，在前。神仙使者，冠朱陽玉冠，衣九光飛仙之衣，手執玉版持幢，在後。玄黃太真功曹使者，冠帶羽服金真鳳章豁落七元，手執玉案，對立臣前。正一功曹，弁朱陽之幘，冠通天之冠，衣阜紈單衣，腰帶龍頭之劍。捧持謁簿使者，弁玄陰之幘，冠九德之冠，衣絳章單衣，腰帶虎符。賚執玉版直事功曹，住立四方。正一功曹，住立中央。治病功曹，營衛臣身。左官使者在後，右官使者在後。陽神訣吏立左，陰神訣吏立右，上部功曹住立上方，中部功曹住立臣身，促炁

功曹催促十方，上部使者遠望上天，中部使者遠瞻八方，都官使者而繞臣身。郎吏虎賁，察奸勾騎，都官僕射，天驕甲卒，天丁力士，治政執正吏，收神食神吏，收鬼食鬼吏，收炁食炁吏，收精食精吏，收邪食邪吏，誅符破廟吏。從以太空，自然檢天。輔仙飛玄騎，輔真飛騰騎，輔仙飛行騎，輔帝騰空騎，輔靈騰虛騎，飛輪策轡騎，飛仙騰空騎，飛瓊羽蓋策空騎，龍轅綠駟策轡騎，制地飛騰騎，流光耀雷騎，飛光擊雨騎，興雲降雨騎，耀擊追電騎，執即金光騎，並皆屯駐臣前後左右，嚴裝事竟，羅列鹵簿。受臣口中詞語，分別開啓玄壇土地，四面真官，三洞官屬，監齋侍經，官君將吏，上下八方，中央四面，天官地祇，洞天福地，五嶽四瀆，九江八極，名山大川，三界官吏，日月星宿，璇璣玉衡，五帝真君，四司監察，九部考問，玄元始炁，太歲太陰，甲子諸官君，無極無窮、無高無淺、無下無深、無幽無顯、無量無數真官，正炁乾皇，九宮八卦，六甲真人，諸廟神祇，根源本始，土

地之主，社稷將吏，一時嚴裝。與臣等身中功曹使者，飛龍騎吏，某靖仙官，玉童玉女，諸省府院司仙靈官吏，同誠上啓太上無形無名虛無自然至真大道元始天尊，虛皇玉晨大道君，萬變混沌玄元老君，諸君丈人，十方無極道德衆聖，大帝天帝，靈寶監齋諸官君。自此分開度、祈禳各不同。如開度則云臣等迹染六塵，身棲五濁，乘非履過，逐境耽華，叨際明師，獲聆至化，佩瑤圖而凝妙，修瓊笈以游玄，負荷淵深，提携春育，憲天弘道，濟世立功，證誓丹青，微盟金石，凡有皈向，所合關聞。今有齋主某，痛念亡故某人，奄忽一朝，沈淪九夜，冤輪旋運，業網周回，非賴宸恩，曷凌鬼趣。恭賚法信，備罄精誠，乞就某處，崇建某齋幾晝夜，解消結滯，懺滌愆尤，拔擢陰儀，逍遙陽境，恩資家國，化洽人天，澤被幽冥，功沾品彙。臣等玄班莅職，丹籍登名。盍罄愚衷，上裨聖化。今謹洗心靜念，澄志凝真，建設壇場，遵依典範，皈神十極，稽顙三元。俾所度某人，罪對停閑，冤憎和釋，離苦升樂，

度命登真。謹爲上請三洞天仙兵馬，地仙兵馬，真人兵馬，神人兵馬，日月星宿兵馬，九宮五帝兵馬，三河四海兵馬，各九億萬騎，三十二天監齋直事，侍香玉童，散花玉女，五帝直符，傳言奏事，飛龍騎吏，各三十二人，一合來下，監臨齋所。爲臣通達丹忱，羅敷玄

賦，皈命十方無極世界，已得道大聖衆，至真諸君丈人。乞幽靈受度，眷屬蒙恩，普及含生均陶惠澤，行道畢竟，謁言仙官，功曹使者，飛龍騎吏，分別關啓，以時上達，列啓事竟，各還臣身，復於宮室。後召復到，一如故事。如祈禳則云臣等身棲浮俗，迹染囂塵，三業紛紜，六情浩蕩，幸逢化日，快暢玄風，窺久親之梯階，探長生之關鍵，秉修鳳籙，佩奉龍文，濟世立功，承天宣化，凡有皈向，敢不敷陳。今有齋主某人，爲某事請命玄穹，冥心紫極。乞依三洞品格，崇建某齋幾晝夜，洗滌愆非，和同冤對，消灾度厄，集福迎祥，澤被人天，功覃幽顯。臣等身躬聖教，職忝玄司，盍運丹誠，上祈皇鑒。謹爲澄心靜念，滌

慮清神，肅建壇場，精修齋直，敷陳法信，率勵羽流，懺悔三元，皈依十極，輸誠效悃，請福祈恩。俾齋主某人，萬願從心，千灾滅迹，謹爲上請三洞天仙兵馬，同前。至諸君丈人，解厄除愆，延生保命，過度三灾，衆苦之中，普及幽冥，均沾善利。行道事竟，謁言仙官，功曹使者，飛龍騎吏，分別關啓，以時上達。列啓事竟，各還臣身，復於宮室。後召又到，一如故事。

法師衆官，各致拜起立。  
都講舉：各稱法位。各官各密宣名銜。  
法師宣銜，至同誠。衆和：上啓。  
法師宣科，知磬宣詞，宣至即日謹投，法師長跪，宣至大道銜，法師衆官皆拜伏，宣至謹詞，法師再拜起，衆官並起。  
法師宣科，至初捻上香，衆吟初捻香讚，直壇焚初捻香符。  
香徑御玉清宮，遍玉清聖境，成華蓋，供養大羅元始天尊。  
法師旋行一周，上三寶香。畢，歸

位致拜，再宣科，至保天長存，衆和：與道合真。法師再宣科，至二捻上香，衆吟二捻香讚，直壇焚二捻香符。  
香徑御上清宮，遍上清真境，成寶蓋，供養玉晨大道君。

法師旋行一周，二上香如前，歸位致拜。次宣科，至升入無形。衆和：與道合真。  
法師再宣科，至三捻上香，衆吟三捻香讚，直壇焚三捻香符。  
香徑御太清宮，遍太清仙境成雲蓋，供養混元道德天尊。  
法師旋行一周，三上香如前，歸位致拜。  
法師宣科，至升入無形。衆和：與道合真。  
知磬舉：禮東方，  
臣衆等志心皈命東方無極太上靈寶天尊，已得道大聖，衆至真諸君丈人，九炁天君，東鄉神仙諸靈官。長跪，虔誠懺悔。  
法師引當職道士，詣東方長跪，上

香，宣懺，畢。衆和：與道合真。知磬舉：南方三炁。法師引當職道士，詣南方長跪，上香，宣懺如前。

次西方七炁，北方五炁，東北梵炁，東南梵炁，西南梵炁，西北梵炁，上方一炁，下方九壘土皇君。

若係黃籙齋，又添三光五嶽水府經寶十方。

日宮至真大聖，日宮夫人，炎光童子，丹霞玉女，日中神仙諸靈官。

月宮至真大聖，月宮夫人，圓光童子，散輝玉女，月中神仙諸靈官。

諸天星宿，璇璣玉衡，周天三百六十五度，河漢星真，星中夫人，星中神仙諸靈官。

東嶽泰山青帝真君，飛仙真人，名山洞府得道神仙諸靈官。

南嶽衡山赤帝，西嶽華山白帝，北嶽恒山黑帝，中嶽嵩山黃帝。並如東嶽

扶桑大帝，暘谷神王，三河四海九江水帝，十二河源江河淮濟水府神仙諸靈官。

至真無上三十六部尊經寶符玉章玉童

玉女，侍經神仙諸靈官。

知磬舉唱，當職道士宣懺。並同前。

日宮東北，月宮西南，星宮西北，五嶽並按其方，中嶽在西南，水府東南，並就中層壇禮懺，惟經寶就經牌前行之。若風雨晦冥，不可稽延。十方五嶽三光，並宜總懺。

總十方

十方無極太上靈寶天尊，至諸君丈人梵炁天君，十鄉神仙諸靈官。

總三光

日月星官至真大聖，夫人，玉女，宮中神仙諸靈官。

總五嶽

五嶽五帝真君，飛仙真人，名山洞府得道神仙諸靈官，水府經寶。不總並就三寶前宣懺

知磬舉：高功都講，那班命魔。

法師旋行，至鬼門面酉立。

都講旋行，至天門面東立，次舉：

衆官等各思九色圓像，咽液命魔密呪，

直壇焚命魔符。

法師叩齒三通，咽液三過，存日月

在己面上，左日右月，對面少仰去向九寸。日紫色，赤光九芒；月白色，黃光十芒。直來，自鼻孔入金華洞房宮，係兩眉間却入五寸。出頂後，薄入玉枕。作九色圓像，照映十方。又叩齒三通，咽液三過，念密呪：

黃中策炁斬妖宗，密制強精斷邪翁。太上有命太上房，急召北帝諸玉宮。受承威命宣魔王，五炁翁鬱與命衝。秘藏玉文方玄隆，三天運明，六天運終，賢者哉。

都講舉：按步虛旋遶。

知磬舉：十大步虛。每首終，各散花唱義一拜。衆官第一首依位立，第二首至第九首依序旋行，第十首復歸位。每一首知磬舉第一句，自第二句以下，衆和之。旋行步虛丁罡，面朝三寶法師。自第一首歸位，第二首以下，每首旋行至末句指，行到本位拜，衆官隨處拜。

知磬舉：

臣衆等志心皈命太上三尊，十方衆聖，

禮經如法。

衆吟三啓頌，知磬舉三禮：

志心稽首，禮

太上无極大道。

志心稽首，禮

三十六部尊經。

志心稽首，禮

玄中大法師。

衆官各三拜。都講舉：重稱法位。衆官各密稱名銜。法師宣銜，至重誠上啓，衆官皆拜。法師宣至臣聞，長跪大謝，衆官各長跪。法師宣科至以聞與，衆官各一拜起。如告符，知磬舉靈符赦罪天尊。節次同宿啓，都講方舉願念。如不告符，則竟舉願念，都講唱願念。早朝十念，午朝大十二願，晚朝小十二願。法師復爐，直壇焚復爐符。

香官使者。同宿啓，只改宿啓告齋，作升壇行道

次法師一拜，直壇收十方謁簡，知聲舉：出堂頌。贊引法師自天門左旋，出地戶都門，密念：

出陰入陽，萬神開張。行道事畢，請閉

黃房。侍香玉女，明備神宮。早午朝並用此呪，晚朝同宿啓。

次至右幕，上香致拜。旋行至壇後，至師幕序立，上香一拜，長跪，小啓密呪，並同宿啓，只改宿啓行道，作升壇行道。

法師拜起，知磬舉向來讚：

向來行道，功德，上祈天澤。同宿啓

表白宣白隨意，知磬舉：監齋科過。監齋三拜，上香，長跪，隨壇衆有無過失言之。知磬舉天尊號，贊引法師回靜默堂，衆官序立，法師上香三拜。

知磬舉：

皈依至道，回拜師階以今。同宿啓

知爐云：行道事竟，衆官復位。

法師引衆官序立就坐，

法師復神咽液，

衆官揖散，如常儀。

靈寶領教濟度金書卷之九

### 靈寶領教濟度金書卷之十

洞微高士開光救苦真人甯全真授靈寶通玄弘教水南先生林靈真編

#### 讚頌應用品

開度祈禳通用

#### 啓壇頌

渺渺空無象，悠悠感至靈。敬則承天貺，泄則被魔精。吉凶隨運轉，否泰應緣生。道不貴珠玉，神惟感至誠。丹情盡勤苦，懇禱竭玄情。自然通大道，皆得降真靈。捻香陳所願，稽首冀嘉貞。天尊常湛寂，回心禮杳冥。

#### 解壇頌

太空包有象，至道窈無形。承和通妙炁，感應達衷情。倏忽周八極，依稀降萬靈。微香陳素悃，委質表丹誠。遠汎翔鸞蓋，遐攀綺鳳旌。烟宮高鬱鬱，霞閣上亭亭。瓊駕出霄漢，金龍入太清。甘露降人世，景福被幽冥。

請玄師頌

科律嚴章奏，精誠享百神。投詞陳悃願，潔醮答高旻。俯盼垂雲駕，冥心啓上真。玄師都教主，奉請降凡塵。

請天師頌

太上傳符籙，初因過鶴鳴。積功超玉簡，列位侍三清。接引章詞奏，克隨凡庶情。修齋當奉請，願俯鑒精誠。

請監齋頌

寶號留塵世，仙階列上清。三千功已滿，八百行先成。禮懺修真福，監齋作證盟。今宵雲馭降，祥祉被含生。

請天官頌

妙道垂真教，修齋立福田。結壇朝上聖，建醮會高仙。注念通霄極，精心感上玄。天官乘寶輦，彩仗下凡筵。

請地官頌

翼翼陳丹悃，兢兢仰紫虛。祈通塵下志，願達土皇君。潛應垂真佑，遐臨赦罪書。地官來下降，俄擁五雲輿。

請水官頌

方便開真化，慈悲立聖科。虚心修妙會，調炁詠靈歌。默念祈淵府，丹誠通

大羅。水官龍駕降，雲錦起滄波。

請五帝頌

五帝居仙品，糾彈善惡因。祥光臨宇宙，惠澤濟沈淪。發露祈真佑，冥心感聖賢。存亡俱快樂，享福永無垠。

請經師頌

入靖修黃籙，嚴裝啓上仙。奏章先達御，詞款欲關宣。寶籙因師度，威儀太上傳。經師來下降，奏請列群仙。

請籍師頌

肅肅祈清福，誥誥結寶齋。登壇須此夜，行道續徘徊。有願仍雖啓，皈心道眼開。籍師來下降，仙仗下瑤臺。

請度師頌

經戒丹心稱，虔誠召百神。捻香祈至聖，持戒請仙真。清詠凌朝啓，精思入夜勤。度師來下降，保護結齋人。

送玄師頌

上帝命真仙，修齋黃籙壇。諸天來下降，焚香懺罪愆。祈恩行道畢，齋事已周圓。洪福留人世，玄師上九天。

送天師頌

齋福已精嚴，表牒上九天。至誠通感

應，闔門得延年。掌籍諸天衛，章詞達御前。祖宗咸升度，嗣胤慶榮遷。三天扶教主，事畢奏功圓。

送監齋頌

靈壇崇法席，允賴下監臨。糾過兼書善，真仙亦仰欽。行當驅道騎，縹渺五雲深。生存當有賴，更復濟幽沈。

送天官頌

妙範修齋直，明科洗罪根。瞻穹崇上善，瀝懇致微言。既納依投靖，蒙垂覃宥恩。天官還玉府，寶駕入金門。

送地官頌

靜會朝元罷，三塗結福田。真恩宣五嶽，誠悃奏三天。徹席停宗範，解壇送列仙。地官回嶽府，高涉五雲駟。

送水官頌

宣演靈音畢，諸仙返上穹。靈光除橫厄，甘露降真風。復命驪龍駕，遙還太室宮。水官歸洞府，福祿賜無窮。

送五帝頌

仙仗來霄極，尊臨列五方。檢氛吹羽節，鸞輅駐清楊。齋事將圓徹，回輿返上蒼。流恩無不遍，豈但感馨香。

### 送經師頌

經法雖微妙，崇奉悉因師。凡有立善者，咸得頻禮之。氣運功易就，心慢悔難追。若能勤繫念，朝夕自仙飛。

### 送籍師頌

道以齋爲重，法以朝爲常。不修不奉者，安能達帝鄉。有骨入仙品，自然開紫房。玄武排靈駕，但見金殿堂。

### 送度師頌

迢迢玉京山，玄都何巍巍。朗朗長夜開，真人乘步虛。大道由人弘，心至神自歸。修齋行道畢，稽首辭三師。

### 明燈頌

太上散十方，華燈通精誠。諸天悉皆照，諸地皆朗明。我身亦光徹，五臟生華榮。炎景朝太虛，遐想通玉京。丹精寄太元，玄陽空中響。貪形滅苦根，幽妙至真想。垂華不覩實，因緣永無象。我身亦如之，乘化托流景。夜光表丹陽，迢迢照虛空。諸天普光顏，諸陰即自滅。我神亦聰明，常玩智與慧。逍遙通道運，遷謝任天勢。舉形躡空洞，夜燭燥流萃。

### 智慧頌

智慧生戒根，真道戒爲主。三寶由是興，高仙所崇受。汎此不死舟，倏忽躋大有。當此說戒時，諸天皆稽首。智慧起本無，朗朗超十方。結空峙玄霄，諸天挹流芳。其妙難思議，靈感真密通。有有竟无有，無無无不容。智慧常觀身，學道之所先。眇眇任意肆，自然錄我神。天尊常擁護，魔王爲保言。晃晃金剛軀，超超太上仙。

### 奉戒頌

道爲無心宗，一切作福田。立功無定主，本願各由人。虛己應衆生，注心莫不均。大聖崇至教，亦由雨降天。高凌靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

### 還戒頌

天尊大慈悲，說戒度衆生。威德被幽顯，困報感真靈。諸天來稽首，群魔自束形。過去超八難，見在保千齡。齋福行當息，相共送虔誠。流梵逸雲唱，

飛香雜烟馨。瓊鳳乘丹輦，金龍駕綠輶。生死皆快樂，家國悉安寧。

### 燒香頌

學道當勤苦，歛信運丹誠。燒香皈太上，真炁雜烟馨。惟希開大有，七祖離幽冥。

### 太極頌

道以齋爲先，勤行登金闕。故設大法橋，普度諸人物。宿世恩德報，道心超然發。身飛升仙都，七祖咸解脫。

### 投簡頌

太上法微妙，簡錄度人天。元始告符命，時刻獲升仙。傳授救沈溺，方得自儵然。書名金錄簡，逍遙玉帝前。

### 度簡頌

赤明開元圖，和暢通上虛。元始敷靈章，十部飛天書。開度九幽祖，萬遍道自居。玉阜秀瓊林，生死福德盧。自無黃錄簡，苦根焉得除。旋行誦靈章，五靈還相扶。

### 焚詞頌

衆生多障難，大道實矜憐。濟度垂科教，咸令懺罪緣。罪愆遍地府，釁結已

聞天。發露祈真佑，冥心感聖賢。虔恭禮三寶，願得早生天，壽長年。焚詞歸上界，奏名玉帝前。

### 焚疏頌

聖德流科教，修齋福壽長。延生移玉簡，請命奏金章。罪名銷北府，生籍注南昌。見存皆快樂，過去生福鄉。

### 迎真頌

天尊御天龍，百萬神仙騎。雲起自逍遙，玉音成鼓吹。花嚴如意珠，聖化不思議。惟願降瑤壇，福被群生類。

### 送真頌

回輶五雲輿，騰駕九章歌。倏忽沖天遠，醮壇香炁多。玄恩覃宇宙，福祿遍山河。緬想神仙路，逍遙上大羅。

### 送直符頌

仰啓直符使，幽顯路潛通。乘雲馳奏牘，遠涉三界中。紫清金闕邃，玄都水府宮。奏傳資瞬息，端簡俟真風。

### 普獻頌

普獻無邊聖，香烟散十方。願乘七寶臺，垂光五濁世。運度人天衆，咸令上法橋。同會證無爲，勤修不退轉。

### 北帝頌

善哉元始尊，衆生慈父母。傾光紫微宮，曲映九幽戶。峨峨丘寒庭，回照廓冰浦。炎炎烈火獄，沛然洒法雨。圓通大哀智，常善濟衆苦。拔度長夜魂，今得稽首禮。

### 三啓頌

樂法以爲妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世享大福。鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

### 又度簡頌

稽首皈依道，歸心元始尊。至真妙應主，開化飛玄門。妙戒怡五靈，金書驚萬神。察命定錄籍，靈符度苦魂。乘雲朝玉帝，齋契玄中人。

### 學道讚

學仙行爲急，奉戒制情心。虛夷正炁

居，仙聖自相尋。若不信法言，胡爲棲山林。

### 七真讚

太上玄虛宗，弘道尊其經。俯仰已得仙，歷劫無數齡。巍巍大聖德，寂寂因無生。霄景結空構，乘虛自然征。日月爲炳灼，安和樂未央。

學仙絕華念，念念相因積。去來亂我神，神躁靡不歷。滅念停虛閒，蕭蕭入空寂。請經若飢渴，持志如金石。保子飛仙路，五靈度符籍。濟我六度行，故能解三羅。清齋禮太素，吐納養雲芽。逍遙金闕內，玉京爲予家。自然生七寶，人人坐蓮花。仰嚼玄都柰，俯酣空洞瓜。靈顏耀朱日，奚計年劫多。法鼓會群仙，鳴鍾徵大魔。

靈風扇奇花，燦爛開繁襟。天真撫雲璈，衆仙彈靈琴。雅歌三天景，散慧玉華林。七祖升福堂，由此步玄音。前世福未足，斯須邈難尋。信道情不盡，圖飛乃返沈。太上無爲道，弘之在兆心。



學道由丹信，奉師如至親。挹景伴清輝，孜孜隨日新。衆人不得度，我身大我身。大願有重報，玄德必信然。陰德罪至深，對來若轉輪。

學道亦甚苦，晨夜建福田。種福由植樹，積篋而成山。子能耽玄尚，飄爾升清天。修爾無爲道，當爲結大緣。太上至隱書，名爲智慧篇。拔苦由人材，超俗以得真。靈姿世不奇，時若淵中蓮。

人行各有本，皆由宿世功。立德務及時，發願莫不從。善惡俱待對，倚伏理難窮。賢士奉法言，道亦在兼忘。解是大智慧，上爲太極翁。寶蓋連玉佩，命駕御九龍。金華擎洞經，捧香戀仙童。嘯歌徹玄都，鳴玉和瓊鐘。

竦身凌太清，超景逸雲霄。保扶持法言，遊玄極逍遙。萬劫猶昨夜，千春如晨朝。巍峨蔭雲華，手攀寶林條。香烟自然生，玄階莫扶搖。靈旛應時散，繁想應時消。滅智弘大混，無爲爲清謠。

### 華夏讚

勤行奉齋戒，誦經制六情。故得乘空飛，耀景騰玉清。精心奉齋戒，吐納鍊五神。內德冠諸天，轉輪成上仙。

### 大步虛詞

稽首禮太上，燒香歸虛無。流明隨我回，法輪亦三周。玄願四大興，靈慶及王侯。七祖生天堂，煌煌耀景敷。嘯歌觀太漠，天樂適我娛。齋馨無上德，下仙不與儔。妙想明玄覺，誦誦巡虛遊。

旋行躡雲綱，乘虛步玄紀。吟詠帝一尊，百關自調理。俯命八海童，仰携高仙子。諸天散香花，蕭然靈風起。宿願定命根，故致標高擬。歡樂太上前，萬劫猶未始。嵯峨玄都山，十方宗皇一。岌岌天寶臺，光明爛流日。煒燁玉華林，精璨耀朱實。常念餐元精，鍊液固形質。金光散紫微，窈窕大乘逸。俯仰存太上，華景秀丹田。左顧提鬱儀，右盼携結璘。六度冠梵行，道德隨日新。宿命積福慶，聞經若至親。天

挺超世材，樂誦希微篇。沖虛太和氣，吐納流霞津。胎息靜百關，寥寥究三便。泥丸洞明景，遂成金華仙。魔王敬受事，故能朝諸天。皆從齋戒起，累功結宿緣。飛行凌太虛，提携高上仙。

控轡適十方，旋憩玄景阿。仰觀劫仞臺，俯盼紫雲羅。逍遙太上京，相與坐蓮花。積學爲真人，恬然榮衛和。永享無期壽，萬春奚足多。大道師玄寂，升仙友無英。公子度靈符，太一捧洞章。舍利耀金姿，龍駕欵來迎。天尊盼雲輿，飄飄乘虛翔。香花若飛雪，氛靄茂玄梁。頭腦體金闕，携手遨玉京。鵝樹玄景園，煥爛七寶林。天獸三百名，獅子巨萬尋。飛龍躑躅鳴，神鳳應節吟。靈風扇奇花，清香散人襟。自無高仙才，焉能耽此心。嚴我九龍駕，乘虛以逍遙。八天如指掌，六合何足遼。衆仙誦洞經，太上唱清謠。香花隨風散，玉音成紫霄。五苦一時迸，八難順經寥。妙哉靈寶囿，

興此大法橋。天真帝一宮，靄靄冠耀靈。流煥法輪綱，旋空入無形。虛皇撫雲璈，衆真誦洞經。高仙拱手讚，彌劫保利貞。

至真無所待，時或轡飛龍。長齋會玄都，鳴玉叩瓊鐘。十華諸仙集，紫烟結成宮。寶蓋羅太上，真人把芙蓉。散花陳我願，握節徵魔王。法鼓會群仙，靈唱靡不同。無可無不可，思與希微通。

步虛詞

太極分高厚，輕清上屬天。人能修至道，身乃作真仙。行溢三千數，時丁四萬年。丹臺開寶笈，金口爲流傳。大梵三天主，虛皇五老尊。尚難窺竅妙，豈復入冥玄。寶座臨金殿，霞冠照玉軒。萬真朝帝所，飛鳥躡雲根。濛濛如細霧，冉冉曳銖衣。妙逐祥烟上，輕隨彩鳳飛。幾陪瑤室宴，忽指洞天歸。伫立扶桑岸，高奔日帝輝。旋步雲綱上，天風颯爾吹。飄裾凌斗柄，秉拂挹參旗。獅子銜丹綬，麒麟導翠輜。飛行周八極，幾見發春枝。

綠鬢魏丹幘，青霞絡羽衣。晨趨陽德館，夜造月華扉。搏弄周天火，韜潛起陸機。玉房留不住，却向九霄飛。水暎魔宮懾，燈開夜府明。九天風靜默，四極烝澄清。嘯詠朱陵曲，翱翔白玉京。至誠何以祝，國祚永安榮。

玉清樂十首

地居天上接空居，萬象森羅遍八區。功用不知誰主宰，絳霞丹霧闕清都。

其二

碧落空懸黍米珠，十方勃勃入無餘。聞經喜慶難言說，九色龍騰八景輿。

其三

羽童呼吸辟非烟，烟氣徘徊綠室前。造化弗從身外得，自根自本即三天。

其四

帝景相將會玉洲，明真層觀紫雲浮。掣開三八黃金鎖，無極虛皇在上頭。

其五

白玉飛符下紫庭，華幡三舉召群靈。攀條咀嚼空青藥，五體金光射日星。

其六

連昌臺下海揚波，得道高仙始得過。

下格小仙追莫及，邕邕遙聽八鸞和。

其七

玉色雲營鬢鬢屯，三三洞戶敞瓊門。何方道士通朱表，玉女飛函達至尊。

其八

上景三元妙色精，絳宮久已列仙名。更從太混存唯一，縹緲雲車駕羽明。

其九

真陽館裏烝徘徊，昇降二宮密往來。生死不干浮世事，相將五老上金臺。

其十

三華太素自然生，雲裏芙蓉灼灼明。絳室金房虛寶座，太微童子下相迎。

上清樂十首

紫清天上育華林，絳實朱柯綠葉深。咀嚼繁英身不老，下觀烏兔換光陰。

其二

元君八素號青靈，錦帔緋裙住玉城。把握帝符司道籙，袂除塵累濟群生。

其三

高上皇人宴紫霄，擷芳常引八鸞條。肌膚表裏琉璃徹，映照三途萬苦消。

其四

九日宮中四老真，廣霞山上宴仙賓。  
鳴鐘鼓瑟行靈醕，碧落融融別有春。

其五

浮絕山連白玉京，金華樓共日華明。  
五真結就圓珠炁，骨似丹瓊貌似嬰。

其六

秀華峰下五靈都，元景神君握化樞。  
真火有功能造化，銷融五苦出迷途。

其七

赫赫瞳瞳日九輪，六淵宮殿紫元君。  
霞冠錦帔端居暇，披拂祥烟著紫文。

其八

佳氣青葱覆紫空，青精羽駕命元童。  
逆風浩蕩三千里，七返香烟處處通。

其九

流汨池中大寶蓮，開花十丈映池泉。  
嗅香飲水無飢渴，綽約金華葉上仙。

其十

萬仞霞山峙玉虛，四司冠劍護靈都。  
衆真稽首持天樂，腰佩仙皇逸籙符。

太清樂十首

太乙元君掌列仙，彤輝絳彩射芝田。  
功圓會遇刊名籍，可但洪崖笑拍肩。

其二

五節清香夜半焚，天人玉女盡遙聞。  
味同炁合遙相應，絳節霓旌下五雲。

其三

太極元君翠翻車，萬魔奔走聽神符。  
九龍縱步齊驤首，時見空中吐火珠。

其四

藥珠宮裏七言成，十一真君一一名。  
雲擁蒼虬歸火府，風隨素虎出滄瀛。

其五

金闕明光後聖君，流精煥彩結丹雲。  
不因太上相傳授，安得人間有玉文。

其六

元景巖巒聳太空，超超仙室在霞中。  
九雲變化俄離合，羽駕飄飄不可窮。

其七

東井中涵皓月精，群龍奮躍運金罍。  
仙人灌沐知何代，惟見玻瓈透骨明。

其八

渺渺三津遶帝川，川連紅霧霧連天。  
玉靈仙母時游息，侍衛森羅日月軒。

其九

九靈玉館接崑崙，山隔流綱不可親。

囑付紫蘭令說與，紅塵何苦弊精神。

其十

左右靈妃運甲庚，琳宮八景鍊華精。  
常陽宴罷歸何處，擲火流金事克成。

白鶴詞十首

胎化靈禽映九天，雪毛丹頂兩相鮮。  
世人莫認歸華表，來瑞昇平億萬年。

其二

瑶臺風靜夜初分，仰啄驚鳴露氣新。  
太液徘徊歸未得，曾於往劫作麒麟。

其三

靈鶴翩翩下太清，玉樓金殿曉風輕。  
昂昂不與雞爲侶，時作冲天物外聲。

其四

三山碧海路非遙，來瑞清都下紫霄。  
霜雪羽毛冰玉性，瑶池深處啄靈苗。

其五

金火純精見羽儀，長隨王母宴瑶池。  
玉壇夜醮神仙降，飛過維山人不知。

其六

五雲宮殿步虛長，斗轉璇霄夜未央。  
白鶴飛來通吉信，清音齊逐返風香。

其七

一聲嘹唳九皋禽，換骨輕清歲月深。  
遼海等閑人不識，大羅天上有知音。

其八

白毛鮮潔映霜華，丹頂分明奪絳砂。  
千六百年神炁就，飛鳴長伴玉仙家。

其九

蓬萊會散列仙歸，羽駕飄然白鶴飛。  
明代爲祥人慣見，何須樂府詠金衣。

其十

玉宇沈沈瑞霧開，香風未斷鶴徘徊。  
奇姿迴與青田別，定是仙人次第來。

七言散花詞

南斗攔珊北斗移，衆星蒨璨月華輝。  
元始傳言齊授籙，道君開教盡皈依。

其二

小有洞中千歲草，玉京山上萬年桃。  
九龍閣上集真聖，大仙臺畔步虛謠。

其三

三真玉女持花節，一雙童子捧金爐。  
月帔珠穿九彩綬，雲裾香透六銖衣。

其四

靜掃蓬萊山上路，相邀王母下瑤臺。  
五色祥雲隨步起，六銖仙服著身來。

其五

日月相催人漸老，不如修道學長生。  
昨朝暫到崑崙頂，人間早已數千年。

其六

昨日朝元過紫微，玉壇風冷杏花稀。  
碧桃疑我傳消息，何事人間更不歸。

其七

五色彩雲隨步起，六銖仙服着身來。  
三島羽人朝玉闕，九天仙子下瑤臺。

其八

五色雲中呈彩鳳，一爐香鼻見朱烟。  
三島神仙來入座，十洲鸞鶴引沖天。

五言散花十首

絳節徘徊引，天花散漫飛。高仙無染  
着，片片不沾衣。

八陛旋瓊級，千花暢錦英。綠停併紫  
柰，煥麗不知名。

淺淺黃金萼，勻勻白玉英。天風隨羽  
駕，吹滿九重城。

綽約榮空際，繽紛落座隅。韶華長不  
老，何處覓仙都。

淨侶吟仙曲，人人讚善哉。萬花興供  
養，飛舞自天來。

寶藥開琪圃，珍柯在紫微。不教蝴蝶  
採，長共彩鸞飛。

聖境三千歲，仙花始一開。如何金籙  
會，併奉列仙來。

几席延颿馭，香燈建寶壇。丹心無可  
獻，碎錦洒雲端。

碧綠相差次，紅黃迭淺深。化工應自  
失，雕琢本無心。

洞案爐烟起，無爲道德香。同根無異  
炁，噴鼻更芬芳。

凡散花，每兩句爲一首，上一句吟  
畢，繼吟散花禮三字，方吟下一句。

吟畢，繼吟滿道場聖真前供養八字。

靈寶領教濟度金書卷之十

靈寶領教濟度金書卷之十一

洞微高士開光救苦真人甯全真授  
靈寶通玄弘教水南先生林靈真編

讚頌應用品

開度祈禳通用

五方衛靈呪

九炁青天，明星大神，煥照東方，洞映  
九門。轉燭陽光，掃穢除氛。開明童  
子，號曰玄卿。備衛我軒，上對帝君。  
收魔束妖，討捕凶群。奉承正道，赤書  
玉文。九天符命，攝龍驛傳。普天安  
鎮，我得飛仙。

三炁丹天，煥景流光，熒星轉燭，洞照  
太陽。上有赤精，合契虛皇。開明童  
子，號曰華芳。總禦火兵，備守玉堂。  
斬邪束妖，剪截魔王。北帝所承，風火  
衝當。流鈴交換，翊衛壇場。正炁流  
行，敢有猖狂。我享上功，坐運魁罡。  
億劫長存，保天無疆。  
七炁素天，太白流精。光耀金門，洞朗

大冥。中有素皇，號曰帝靈。保神安

鎮，衛我身形。斷絕邪源，王道正明。

宮殿整肅，三景齊并。道合自然，飛升

紫庭。靈寶符命，普衛萬生。元皇正

炁，來合我身。功加一切，天地咸寧。

五炁玄天，元始徘徊。辰星轉燭，洞煥

大微。墨靈尊神，號曰層威。統冠飛

天，仙裾羽衣。備守五門，檢精捕非。

敢有干試，豁落斬摧。玉符所告，神真

八威。邪門閉塞，正道流輝。三光映

照，我身無衰。策空駕浮，舉形仙飛。

黃炁中央，調理乾坤。陶鎔陰陽，總統

玄真。鎮星吐輝，流耀九星。開明童

子，號曰天璘。陽炁焰上，朱煥炎精。

洞照內外，運我身形。百邪摧落，攝役

鬼靈。中山神呪，普天使聞。五靈安

鎮，身飛上清。

三日九朝衛靈呪

金真綠霞，煥映三天。飛雲丹霄，諸天

控輶。晨輝啓旦，陰翳俱蠲。九微震

空，五星回旋。萬仙應感，自然妙玄。

杳冥散景，分形億千。蒙昧光耀，瑞降

壇乾。生死蒙恩，灌鍊金泉。魔王恐

懼，合景三田。

謠歌空洞，帝君存壇。五帝校錄，受符

三官。備衛四門，束魔去奸。流鈴擲

火，除穢焚殘。身佩金書，鍊液芝顏。

玄虛素合，心動三關。騎獅跨鶴，控龍

乘鸞。萬星守舍，千魔不千。道炁長

存，萬仙悉安。

神光朗耀，瑞氣帀旋。箕斗澄輝，芝宇

晏然。玉眸金真，寶壇純乾。變夜作

晝，回子午前。太華流彩，丹鳳飛圓。

息魔滅奸，高步祥烟。天真普集，齊到

帝前。

五星虛映，煥景神庭。包羅無象，合炁

羣靈。潛形杳默，周遊五經。揚威耀

日，役使甲丁。却妖除禍，滌穢消氛。

萬魔恐怖，龍虎飛奔。紫靈交覆，萬炁

齊并。

黃中策炁，斬馘妖宗。遏絕邪源，制斷

魔蹤。太上符命，召制神功。萬靈斯

格，却禍除凶。王炁三輪，洞運真風。

紫戶含瓊，大度無終。左命青腰，右攝

芝童。逍遙飄景，總御九空。玄壇應

機，乘炁虛沖。萬真普降，濟度無窮。

金真空降，神虎檢營。玉帝披霞，諸天命靈。九晨回駕，萬魔束形。九微迸烟，神威攝精。流金擲火，百惡消并。神輝耀夜，洞映長庚。聖道蕩蕩，十方肅清。保制劫運，元亨利真。

天書敷羅，下盼太微。元化生成，靈烟九回。八景六周，聖運所持。左賓赤方，右啓帝扉。東華南府，灌鍊辟非。回輪日耀，轉盼月輝。今日大慶，萬道同歸。玄壇正炁，保天無衰。普告三界，驛龍風馳。

元始虛皇，集炁居中。三境洞杳，肇生穹窿。七轉九虛，混合回風。變化萬神，天地開通。吉日行道，萬魔敬從。晨輝朗照，默運元功。執節建麾，散花太空。十方普度，劫運無終。玄陰七靈，九炁合形。魂精魄爽，二景回輪。飛光赫奕，煥耀長春。日月吐輝，回合華英。大梵流布，奔飛炎鈴。魔王受事，朝謁帝京。含靈普濟，廣惠幽冥。玉文敷告，萬炁騰升。

一日三朝衛靈呪

青陽虛映，耀日回靈。神虎辟邪，飛天

流鈴。摧奸滅試，萬魔束形。九微回道，八威攝精。千真校錄，三元蕩消。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲策龍。謠歌慶會，散花太空。神化冥運，四極安隆。伏御帝前，罔有不恭。

五星高耀，瑞炁飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪伐惡，道炁周流。神光照夜，陰翳俱收。萬神降格，扇景乘飆。群生咸遂，惠遍神州。

五方總呪 開度通用

五靈列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金錄定籍，玉字除殃。朱陵鍊質，飛神太蒼。三官九

府，無極神鄉。普受開度，上生天堂。

五星都呪 祈禳通用

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。刊名玉簡，錄字帝房。乘飆散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。

璇璣齋衛靈呪

晨精朗耀，紫烟御空。星壇煥映，變化雲宮。日魂月魄，離坎翼中。金真嘯命，神虎辟艷。吉日行事，八威鼓從。玉華羅敷，徘徊飛虹。天光下盼，道炁豐降。含靈普濟，流慶無窮。

早朝十念

一念爲道四大合德，齋主七世父母，免墮幽苦，上升天堂，衣食自然。一念帝王國主，道化興隆，庠序濟濟，皇教恢弘，威儀翼翼，普天所瞻，民稱太平，四夷賓伏，妖惡自滅，聖賢自生。三念法師功德大建，教化明達，俱獲飛仙。四念同志學人，早得仙道，更相開度。五念九親和睦，好尚仁義，貴道賤財，行

爲物範。六念損己布施，道士及饑寒者，天下人民，各得其所。七念蠕動跂行，一切衆生，咸蒙成就。八念赦貫前生今世罪對，立功補過。九念家門隆盛，宗廟有人，世生賢才。十念尊受經師，不敢中怠，平等一心，廣度尅獲上仙，白日登天，拜見太上，永成真人，雲車羽駕。和：與道合真。

### 午朝十二願

一願大道淡泊虛無，安閑空寂，澄清自居，廣開法門，教道頑夫，皆蒙惠澤，精苦自修，預以同學，普得升度，與天相保，長存無憂。

二願諸天結炁澄清，高虛廣覆，保真固靈，炁候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民具從，養生安死，惠周十方，禾稼滋植，營運日豐，咸得厚載，萬類皆從。

四願日月二景高明，無有孛蝕虧盈，安清光照諸天，洞消暗冥，保固劫運，世

祚和平，普加潤澤，惠洒衆生。

五願星辰與日齊光，轉燭照耀，即映十方，各安其位，經緯直行，保鎮家國，無有災傷，四海寧一，普天興昌。

六願四時隨節推遷，景炁和調，無有災患，疫毒消滅，普天安平，五穀豐熟，國富民歡。

七願浮雲結炁，聚烟飛空，高澄蔭覆，玄玄隱則無爲，散則彌天，神仙同居，結友衆真，惠流一切，興國愛民，普濟衆生，人同劫年。

八願風雨流洒無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫名。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。

十二願螽飛蠢動，已生未生，咸蒙安

全，普得生成，皆見元氣，受陽之形，草木果林，經冬不零，一切救度，靡不鮮榮。和：與道合真。

### 晚朝十願

一願大道流行，普天懷德。二願一切有生，咸皆悟道。三願九夜悲魂，一時解脫。四願孤魂無依，咸得受生。五願天下太平，五穀豐熟。六願臣忠子孝，君仁父慈。七願四海通同，冤親和釋。八願潛胞處卵，咸得生成。九願積疾新疴，旋即痊愈。十願孤露衆生，豐衣足食。

### 小十二願

一願乾坤明素，二願氣象清玄，三願聖君萬壽，四願化洽八埏，五願天垂甘露，六願地發祥烟，七願四時應候，八願萬物生全，九願家多孝弟，十願國富才賢，十一願齋功廣被，十二願善瑞日臻。

### 請左右幕詞

修齋行道，奉請某師真君，降臨壇所。

右某師換易：玄師真君，天師真君，經師真君，籍師真君，度師真

君，監齋真君，天官帝君，地官帝君，水官帝君，青靈始老帝君，丹靈真老帝君，皓靈皇老帝君，五靈元老帝君，元靈元老帝君。雲輿已降，鶴駕來臨，齋事功圓，還當奉送。

### 送左右幕詞

修齋事畢，仰荷玄恩，至心稽首，拜辭某師真君：雲輿弗駐，鶴駕難留，後有齋修，還當奉請。

### 三皈依

志心皈依十方道寶，當願衆生起心回向，一切信禮。志心皈依十方經寶，當願衆生心開悟解，受持讀誦。志心皈依十方師寶，當願衆王普上法橋，無有障礙。

### 三聞經

萬罪蕩除，善芽增長。聞經已後，惟願衆生。深入法門，皈依信禮。

永斷執迷，常歸正教。

### 召魂諸章

#### 陽斗章

陰陽推運兮，劫數更遷。生死周流兮，孰愚孰賢。輪轉無窮兮，上元造化。未出三界兮，拘於神變。魁魍東斗兮，魍魎西轉。魍魎南辰兮，魍回北面。陰靈陰靈兮，茫茫沒沒。陽魂陽魂兮，碌碌幽幽。天地冥兮萬鬼潛，天地動兮萬鬼爽，天地靈兮萬鬼長，陰陽運兮鬼神享，太乙召兮何遲遲，先至後至律有常。感此徬徨附我旛，賜汝靈書歸上清。急急如太乙玄冥夫人律令攝。

#### 陰斗章

五行所造兮，復歸於五行。四大假合兮，還歸於大空。或陰或陽兮，運天地之根宗。天地冥兮萬鬼潛，天地動兮萬鬼爽，天地靈兮萬鬼長，陰陽運兮鬼神享，太乙召兮何遲遲，天一北祚召汝魂，太乙紫元攝汝魄，冥海冥波冥昧神，不問八極鬼與精，感此徬徨附我旛，賜汝靈書歸上清。急急如太乙玄冥夫人律令攝。

#### 又斗章

胎光、爽靈、幽精三魂，皈空皈真天地正，真炁再使汝成形。此是五行造化精，無藏無避無逃形。一呼速至現真形，感此徬徨附我旛，賜汝靈書歸上清。急急如太乙玄冥夫人律令攝。

#### 青玄尋魂章

大陰冥冥黑波重，中有羅酆六天宮。萬鬼成群痛哀泣，悲惱毒烈大惡崇。無上洞音徹九夜，飄飄吹下慈悲風。吹向冤苦召億魂，聞者奔赴寶壇中。

#### 召六道章

北酆萬鬼群，六道苦沈淪。江海山嶽中，幽魂長冥昏。太乙玄元壇，玉音降至尊。普召悉來赴，咸悟如生存。

#### 生神偈

太微回黃旗，無英命靈旛，攝召長夜府，開度受生魂。明梵飛玄景，開度長夜魂，遊爽赴胡歸，炁炁返故根。符命通冥漠，靈旛揚曉風，遷神超北府，飛鳥上南宮。靈音振空洞，死魂離幽裔，感爽無凝滯，去留如解帶。



靈寶經偈

三官北酆兮，明檢鬼營。不得容隱兮，金馬驛程。普告無窮兮，萬神咸聽。三界五帝兮，列言上清。急急如本章律令。

元始符命兮，時刻昇遷。北都寒池兮，部衛形魂。制魔保舉兮，度品南宮。死魂受鍊兮，仙化成人。急急如本章律令。

敕制地祇兮，侍衛送迎。拔出地戶兮，永離鬼宮。魂度朱陵兮，受鍊更生。是謂無量兮，普度無窮。急急如本章律令。

開通道路偈

天尊降旨下瑤臺，童子傳言地獄開。業海愛河皆息浪，鑊湯爐炭變寒灰。真符告下羅酆去，陰府迎將淨魄來。觀聽法音消罪戾，永離苦海出輪回。

朝禮偈

大有玉清宮景無窮壇下亡靈，謹致恭朝帝宗大聖元始天尊。七寶紫微宮景無窮壇下亡靈，謹致恭朝化宗大聖靈寶天尊。

太清太極宮景無窮壇下亡靈，謹致恭朝教宗大聖道德天尊。

傳戒三寶偈

稽首皈依道，大羅元始尊。杳冥開祖劫，混沌立天根。願垂清淨法，開度此亡靈。和：往生神仙界。

皈依最上法，三洞大乘經，奉用薦亡靈。和：往生神仙界。

皈依超妙境，諸天得道師，奉用薦亡靈。和：往生神仙界。

靈。和：願往生極樂。三清界，三清界，惟願薦亡靈升太清。

三清樂

仙境道德尊，五靈元老君，留教度亡靈。和：願往生極樂。三清界，三清界，惟願薦亡靈升太清。

真境靈寶尊，玉晨大道君，傳教度亡靈。和：願往生極樂。三清界，三清界，惟願薦亡靈升太清。

聖境逍遙路，逍遙路，亡者駕雲輿升太虛。和：願往生極樂。三清界，三清界，惟願薦亡靈升太清。

堪歎三偈

堪歎南柯夢，南柯夢，一夢夢，南柯能幾何。和：大聖元始天尊。

堪歎三偈

堪歎莊周夢。莊周夢，一夢夢，莊周能幾何。和：大聖靈寶天尊。堪歎黃梁夢。黃梁夢，一夢夢，黃梁能幾何。和：大聖道德天尊。

五方童子偈

奉請東方青靈啓道童子，手執青蓮花，接引此亡靈。和：往生神仙界。奉請南方金輝啓道童子，手執紅蓮花，接引此亡靈。和：往生神仙界。奉請西方真覺啓道童子，手執白蓮花，接引此亡靈。和：往生神仙界。奉請北方開明啓道童子，手執碧蓮花，接引此亡靈。和：往生神仙界。奉請中央妙光啓道童子，手執黃蓮花，接引此亡靈。和：往生神仙界。

靈寶領教濟度金書卷之十一

### 靈寶領教濟度金書卷之十二

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

祈禳開度通用

#### 九靈飛步上章儀

燒香頌 各禮師

九天上仙，道化常生。神室太景，霞映珠瓊。逸宅丹元，受事玉清。十轉九回，七混五成。神輝共耀，振策黃庭。道達三變，錄神合靈。玉帝散慧，隱玄羽經。千神傾輪，五星命真。帔朱巾羽，森列帝庭。左命神虎，右佩金兵。九天征伐，煥擲火鈴。滅魔破祆，辟邪却精。風火赫震，六天摧傾。豁落北酆，九魔沈零。失道者誅，順道者生。上帝有令，敕衛神兵。千邪滅試，萬鬼敢停。敢有千試，以付天丁。有祆則戮，有毒則刑。保神守衛，攝邪戮精。六天已誅，威振萬靈。寶神驅穢，霄朗

三清。萬真受事，俱會帝庭。六象淵和，七景輝明。神風散魔，道場肅清。神威蕩鬼，玉帝祝生。九天垂命，攝真御靈。請奉皇命，仙道克成。

#### 鳴法鼓二十四通

無上玄元太上道君，召出臣身中三五功曹，左右官使者，侍香金童，傳言玉女，五帝直符，直日香官，各三十二人出。出者嚴裝。關啓玄壇天帝神君，當召此間土地，里域真官正神，臣今奉爲，齋意祈恩玉闕，進拜朱章。願得玉清道炁，靈寶妙光，下降流入，臣等身中。即使紫精鬱勃，玉關開明，五老輔根，萬帝攝真，體圓珠映，乘景驂晨，金光煥奕，御炁上清。令臣所啓，速達徑詣太上無極大道無形無名虛無自然金闕玉陛下。

#### 請稱法位

具位臣某與臨壇官衆等，謹同誠上啓，虛無自然元始天尊妙無上帝，太平金闕前聖虛皇玉晨大道君，太平金闕後聖萬變混沌玄元老君，玄都玉京上帝高真萬天上帝，東華上相木公青童大

道君，九靈太真金母丹皇大道君，太上丈人，天帝丈人，九炁丈人，上相丈人，青龍宮太乙玄生帝君，鳳凰閣諸天司命道德衆尊，少昊金樓太上三師君，天曹門下四司君，玄冥宮太真門下太乙靈妃君，太陽炎光鬱明上皇道君，太陰黃華素曜聖后元君，南辰六闕上真道君，北極九府上真道君，三元三官大帝君，五老五靈天帝君，玄中大法師，三天大法師，玉清上相大羅無極神公，泰玄上相天機，內相天機上相，天樞使相，天樞左相，天樞右相，天曹諸司真君，天曹門下上官典者引進真官，上章詞表真官，上章二十四真人，三天門下上仙道化真君，上靈定志真君，上神護正真君，十方至真飛天神王，五嶽真君，東嶽上卿司命神君，太平下教二十四真人，南極紫真太極玉宸聖后，金闕上保檢仙司命東華道君，金闕大夫東華領真上清仙君，三洞三乘經錄法中上聖高真、神仙將吏，流傳至教經籍度師，得道真人，正一嗣師、係師、真人，太歲尊神，土地主執，三界官屬一切威

靈。

臣聞綠霞八浮，瓊羽翼金華之邃。紫烟九素，雲珠聯玉映之崇。耀流日於鬱羅，藹飛霄於劫仞。清微高拱，儼天寶而煥圓華。碧落空凝，湛晨輝而騰秀朗。皆無無上真之境，廓玄玄中澄之微。惟祖炁之凝，精分三華谷。瞻神光之胤，粹聯九泥城。玉京象天晨金霄之奇，瓊闕列洞陽元景之妙。玄峰澄寂，運八緯以雲昇。丹室虛靈，昭七經而日煥。非內非外，無形無名，臣以稟炁太無，流形妙有，刊玄圖於西禁，帝渥羅敷，定紫策於東儲，師恩鬱勃。寄影烟林之邃密，棲心雲漢之飛翔。結節流披，玉蘂嚼空青之寶，精神泰定，金花全虛白之珍。流珠期煥於經文，鳴玉敢敷於道炁。緬惟下教，盍翼上乘。金石初忱，快睹三天之聖日。丹青終誓，宜弘九地之真風。今有某人爲某事拜某章，上扣紫虛，下披丹悃。蒼蒼正色帝闕，羅虎豹之嚴。渺渺大羅天陛，肅龍鸞之衛。茂八騫而飛雲翥，藹華三秀而祥霧玲瓏，徒心企於鴻

釐，曷面敷於龍御。仰冀玄尊錫慶，上聖流恩，煥黃道以周回，敞玄關而洞朗。流鈴振響，攝浩炁於霄衢。仗幡衛嚴，掃剛風於雲路。令臣神光洞煥，梵炁彌羅，步金霞而芝玉凝真，靈虛參混。乘瓊烟而黍珠入妙，定慧雙圓。飛豁落於靈臺，覲玄丹於華蓋。臣無任瞻天，望聖激切，懇祈之至謹，稽首再拜。

### 重鳴法鼓二十四通

### 簡閱吏兵行事

謹出臣身中玉門紫戶、三十九闕上真靈官，三部八景二十四真，五體真官，丹元真人，上清虛無自然左右領仙玉郎，飛仙玉虛侍郎，各二十四人出。五帝五色元皇，太真飛龍功曹，上元功曹，飛行功曹，各二十四人出。玉虛飛仙使者，太仙使者，神仙使者，各二十四人出。玉虛金童玉女，飛行金童玉女，八節直言直事，各二十四人出。某治建節監功大將軍，前部效功，後部效殺，驛庭令，驛庭丞，四部監功謁者，上仙上靈二官，直使正一功曹，左右官使

者，陰陽神決吏，科車赤符吏，剛風騎置吏，驛馬上章吏，飛龍騎吏，各二人出。出者嚴裝顯服，冠帶垂纓，整其威儀。領仙玉郎，冠飛玄玉冠，衣九色龍文虎衣，執命魔靈幡，立左。玉虛侍郎，冠元晨玉冠，衣五色飛仙羽衣，執九色靈幡，立右。飛龍功曹，冠九德通天之冠，衣九色鳳衣，腰帶虎書，執召神之符，在上。飛仙功曹，冠九德通天之冠，衣五色羽衣，腰帶金鈴，執攝煞之律，在下。飛仙使者，冠飛天玉冠，衣五色斑文之衣，手執金符建節，在前。神仙使者，冠朱陽玉冠，衣九光飛仙之衣，手執玉版持幢，在後。玄黃太真功曹使者，冠帶羽，服金真鳳章豁落七元，手執玉案，對立臣前。正一功曹，弁朱陽之幘，冠通天之冠，衣阜紈單衣，腰帶龍頭之劍，捧持謁簿。二官使者，弁玄陰之幘，冠九德之冠，衣絳章單衣，腰帶虎符，齋執玉版建節，持幢立臣前後。狼吏虎賁，察奸勾騎，都官僕射，天騶甲卒，天丁力士，治正執正吏，收神食神吏，收鬼食鬼吏，收炁食

炁吏，收毒食毒吏，收邪食邪吏，收精食精吏，治中主簿，治中校尉，雲中督吏，幹佐小吏，金光童子，典章從官，通章舍人，行章童子，元始小吏，玄都力士，九光玉伯，高車司馬，通章小吏，承章令史，通章書佐，部章督郵，典錄功曹，典錄小吏，呈章從事，通章從事，校章從事，定章從事，刺章從事，印章從事，齋章從事，太初直符直事，太無直符直事，太素真符直事，太真直符直事，太玄直符直事，太一直符直事，虛無直符直事，五帝直符直事，四直直符直事，五行直符直事，六律直符直事，七政直符直事，八卦直符直事，九宮直符直事，四部監章從事，進章鳳凰騎，上章雲龍騎，言章風發騎，御章神龍騎，奏章飛龍飛虎騎，某靖侍靖仙官，金童玉女，靈官功曹，諸省府院司通進仙官神吏。一時嚴裝，羅列鹵簿，屯駐圍繞，受臣詞語，分別關啓玄壇，土地四面真官，三洞威神，三寶官屬，三五功曹，左右官使者，侍香金童，傳言玉女，五帝直符直日香官，左右龍虎君，侍衛靈

官，三天承章典者，三天飛章靈官，三天通章玉女，三天捧香素女，三天承受玉女，十天上承受玉女，三十二天承受玉女，二天上奏靈官，諸天傳奏靈官，左右繡衣二使者，十方飛天使者，傳言奏事飛龍騎吏，在時受事應感仙靈，道上二玄三元四始甲子諸官君將吏。並乘玉輦綠轅，雲駟瓊輪，羽蓋飛虬之乘，飛行紫虛，上登三天之上，金闕玉殿，瓊房丹室。為臣同誠，上啓太上無形無名虛無自然至真大道無上玄尊金闕玉陛下。臣以昌運欣逢，慶基夙挺。神凝九室，睹三元以珠聯。雲藹三宮，羅九真而璧合。御震靈之寶座，佩景霄之神鋒，林壑怡神，樊籠息影，爰念乾坤化育，蓋證質於玄功。經緯生成，宜恢宏於洪範。學真宴坐，翊教經行，凡有歸投，理宜敷告。今為某人某事拜某章，祈三天之惠澤，宏九地之慈恩。臣謹依元降九靈飛步祕典，騰箋飭函，依科操進。伏望功曹使者，受事仙靈，洞覽翹勤，對臣料理，務契玄格，上詣金門，龍

文。

宣章 校章 封章

刀瑤環，金魚玉鴈，舒鎮洞案，請省章

文功曹，運神會道功曹，承受典吏。

謹上請五方五炁鎮章大將，奏章靈官，十二月奏章靈官，奏章大將，十二月呈章靈官，點檢進章靈官，三界傳奏功曹，報應呈章靈官，通章從事，玉清總召三界金闕上佐發放，九天御史大夫，天樞發放司主吏佐吏，流金火鈴大將，九天雲路正一功曹，開天符命使者，九天通章使者，通進仙吏。

謹上請上清靈飛太玄玉女，青腰玉女，玄精玉女，絳宮玉女，太素玉女，黃素玉女，順炁玉女，足月玉女，開心玉女，寄房玉女，得喜玉女，曹澤玉女，金晨玉童，太華玉女，玉清妙華金童，紫光玉女，神府繡衣玉童，繡衣玉女，諸天五色玉童，繡衣玉女，洞天、洞玄、洞靈飛行侍香玉童，散花玉女，靈官仙吏。謹上請玉清八威治魔都統，神慧殺鬼都伯史，總領鬼兵三天大元帥，九天尚父執麾左領神王，執幢右領大神，鼓樓後部力士，執節前引天丁，麒麟天馬大神，命魔仗幢大帥，玉清擲火萬里大將軍，玉清流鈴八衝大將軍，金鉞前戮大

神，巨天後刑大將，玉清屠割使者，風火征伐大將軍，剪截鬼穢大神，明檢鬼營大將，金馬驛呈大神，列言上清錄事，靈虛辨魔護道仙靈官吏。

謹上請玉清唯一將軍，雄一將軍，大洞將軍，黃室將軍，白雲將軍，隱道將軍，真諱將軍，龍騎將軍，鳳車將軍，總監大將軍，統兵大將軍，發放大將軍，伏魔大將軍，九天越天大將軍，正天大將軍，九道大將軍，九綱大將軍，營門大將軍，五蓋大將軍，玄老大將軍，玄留大將軍，周天大將軍，中玄大將軍，五元大將軍，蓋天大將軍，中律大將軍，還天大將軍，中域大將軍，中微大將軍，中庭大將軍，中建大將軍，東夷老青領將軍，青始車騎除逆伏衛兵，南越老赤領將軍，赤玄車騎扁鵲伏衛兵，西氏老白領將軍，白玄車騎捍厄鐵輪兵，北羌老黑領將軍，墨玄車騎反甲逆鱗兵，中央秦老黃領將軍，黃始車騎部領黃雲兵，太上西域兵營門兵，南溪兵，督天兵，發地兵，虎賁兵，柱天兵，施天兵，中宮五營兵，九元中野兵，九天文

人，五方五蓋兵將帥騎吏。

謹上請太玄自然三洞天仙兵馬，地仙兵馬，神仙兵馬，飛仙兵馬，真人兵馬，神人兵馬，日月星宿兵馬，九宮五帝兵馬，五嶽四瀆兵馬，三河四海兵馬，金龍飛龍騎，遊龍神龍騎，驛龍雲龍騎，躍龍騰龍騎，太空自然輔仙飛玄騎，輔真飛騰騎，輔神飛行騎，輔帝騰空騎，輔靈騰虛騎，飛輪策空騎，飛仙騰空騎，飛瓊羽蓋策轡騎，龍轅綠駟策轡騎，制地飛龍騎，流光耀電騎，興雲降雨騎，耀激追電騎，執節金光騎，飛龍騎吏。

謹上請雷霆都部署負天欵火律令大赤元帥鄧將軍，九天遊奕北極正一魁神純真元帥馬將軍，護道崇寧威烈關將軍，昭武翊靈正佑溫將軍，部領威烈億乘萬騎，本靖諸省府院司將吏兵馬。臣御錄膺符，昭圖佩券，空常飛步，履魂魄於二辰。儀璘高奔，灌精華於八素。振珮璫而旋運，妬離坎以奔飛。混景融三，御神光於丹闕。回嬰守一，攝生氣於玄關。將騰碧落之崇，肆覲清都

之邃。凌空背土，期肅衛於軒輪。御炁飛神，庸戒嚴於室宅。以今飛龍後從，驛馬前驅，梵炁彌羅，煥金光而上映。元綱流演，舒絳彩以高征。願章奏之，職司與翊衛之官屬。中嚴鹵簿，外辦鉞麾，八威森擲火之揚，四張儼流金之煥。應感倏忽，與臣同昇，恭按威儀，遣章操伏。

遣章

謹遣臣身中三十九真，三部八景，五體真官，小吏書佐，功曹使者，神吏衆官，顯服嚴裝，整其威儀，爲臣護持某人某章一通，操詣三天，分別進對。若有謬誤，尋文註改，毋令上官典者有所譴却。速達徑詣太上無極大道無形無名虛無自然金闕玉陛下，慎勿稽停。當令所請者下，所濟者度。若有下官故炁，於道路雲霧中斷截臣章文，使不得上達者，錄付天一北獄，依玄都鬼律治罪，以明天憲。臣伏在案前，須待玄恩報應。

迎章焚

高功升神

道衆舉：焚章頌

進呈畢 重稱法位

具位臣某謹重誠，上啓太上無極大道三清上聖，十極高真，玄都玉京萬天上帝，東華西靈道君，太一玄生帝君，諸天司命，道德衆尊，太上三師君，天曹四師君，太一靈妃君，南辰北極，三官大帝，五老大帝，玄中大法師，三天大法師，泰玄樞機三省上相天君，三天門下上章典者，三元真君，飛天神王，三界官屬，一切真靈。

臣聞霄衢寥廓，雲層稱浩劫之家。神室虛靈，日耀映玄都之界。合三微而朱霞羅絡，儻七變而丹霧回旋。炁映玉清，既回靈於混沌。精凝金極，宜入妙於虛無。臣以幽密留青，熙夷養素，運丹珠於秀谷，玄景恢張。朝翠玉於華京，清光密邇。雖敷陳而激越，懼塵冒以凌兢。荷道雷霆，曲涵雨露，聖澤昭天而玄黃丕冒，神釐燭地而幽顯咸資。喜慶難言，懽樂無量。更願三華鬱秀，八景紛輪。開卿雲甘露於青冥，融霽月光風於黃混。群靈舞手，萬類懽顏。瞻獅座於始青，神交澄寂。返貌輪於

大赤，景定虛圓。臣不勝依戀，屏營之至，謹稽首拜拜。

納官

臣上章事竟，向來所出身中玉門紫戶仙真靈官，並從衆妙門而入，在左還左，在右還右，九真備守，五老保關，重扉幽密，玉室彌綸，功曹檢押，毋令差互。後召又到，一如故事。

十二願 復爐

香官使者，左右龍虎君，侍香諸靈官，當令臣上章之所，自然生金液丹碧芝英，百靈衆真，交會在此，洞案爐前。令臣體耀金輝，斬伐胞根，七玄拔擢，百關備仙，解除死籍，宴坐泥丸，東華記字，策景虛玄，十方仙童玉女，接待香烟。傳臣向來所啓之言，速達徑詣太上無極大道無形無名虛無自然金闕玉陛下。

出堂頌

章官醮儀

步虛 洒淨

燒香頌

請稱法位

具位領九靈飛步章奏事姓某，謹焚香上啓三天門下上元道化真君，中元護正真君，下元定志真君，上章二十四真人，某治建節監功大將軍，前部效功，後部效殺，驛庭令，驛庭丞，四部監功謁者，上仙上靈二官，直使正一功曹，左右官使者，陰陽神決吏，科車赤符吏，剛風騎置吏，驛馬上章吏，飛龍騎吏，進章鳳凰騎，上章雲龍騎，言章風發騎，御章神龍騎，奏章飛龍飛虎騎，狼吏虎賁察姦勾騎，都官僕射，天騶甲卒，天丁力士，治正執正吏，收神食神吏，收鬼食鬼吏，收炁食炁吏，收毒食毒吏，收邪食邪吏，收精食精吏，治中主簿，治中校尉，雲中督吏，幹佐小吏，金光童子，典章從官，通章舍人，行章童子，元始小吏，玄都力士，九光玉伯，高車司馬，通章小吏，承章令史，通章書佐，部章督郵，典錄功曹，典錄小吏，呈章通章諸從事，太初諸部直符直事，四部監章從事，三天承章典者，三天飛章靈官，三天通章玉女，諸天承受玉女，二天上奏靈官，諸天傳奏靈官，五

帝功曹，六甲功曹，運神會道功曹，四直玉文功曹，靈飛丁甲玉女，靈寶赫奕仙曹，某靖侍靖仙官，玉女玉童，主將副將，護道監壇，諸大元帥，諸省府院司仙靈官吏，在時用事一切威靈。伏聞玄元始分，太無之粹密拱清微。天靈神凝，妙有之精潛符皇極。運神機而玄關入妙，鼓靈籥而丹室澄真。西閩流華，飛步希奇於三五。東諸胤秀，高奔變化於億千。昭昭身外之身，奕奕象中之象。以今奉爲某人進拜朱章，仰瞻藥闕，冒奏葵忱。策驛馬以前驅，金光朗映。駕飛龍而上邁，瓊彩流明。惟資翊衛之功，庶證感通之妙。敢陳瀹祭，庸罄丹衷。伏望劍佩陸離，御靈風於碧落。旂旄璀璨，乘梵炁於玄虛。無辭稅駕之勞，少慰停輪之請。某不勝激切，望恩之至，謹當奉請。

請聖 初獻

具位臣某謹重誠，上啓章中官吏，一切威靈。伏聞旋斗歷箕，仰存三於靈寶。入乾出巽，宣正一於玄元。惟九靈入妙之真，實三洞又玄之奧。丹皇啓運，

紫虛膺圖。大赤天中，俯運而玉蓮混景。始青境上，仰瞻而珠黍浮空。探玄經緯之靈關，凝妙雌雄之聖域。以今某人進拜某章，自惟濁質，具抗塵容。惟道集虛，莫混日飛月奔之妙。因定發慧，未符雲藏風靜之機。匪肆覲於天顏，曷昭宣於民欲。伏望恪遵青律，嚴護朱函。萬里虹梁，賴翊扶而飛度。九重雲闕，憑導從以高登。翠節委蛇，丹旌赫奕。真人房肅，朝元之仗霞映虬輪。學士院隨，拱極之班日輝獅座。覲清光於密邇，導紫氣以遙敷。某不勝虔禱之至。

亞獻

某重誠上啓，章中官吏，一切威靈。伏聞凌空背土，泠然氣映於蒼圓。謁景升神，湛若神交於紫漢。非內非外，無去無來，仰紫關虎衛之嚴，企玄曹蟬聯之貴。飛駟下邁，既寂感以雲從。翼轅上征，更潛昭而日赫。伏望流鈴滅試，握節徵魔。威策黃中，掃剛風於九醜。令嚴丹甲，攝遊炁於八衝。前驅資律令之神，後從藉赫奕之將。承受

內禁，發放中樞。各殫佐命之勤，庸導升神之邃。三元金鑰，毋呵阻於霄衢。四直玉文，徑奔衝於雲路。庶得騫林印武，芝陸承顏。筆煥朱衣，共仰靈光之浩蕩。綸飛黃幅，咸蒙道氣之扶搖。旋珮環而雲斂青冥，回鹵簿而風清黃道。等憑聖武，為壯威神。朗玄覺於靈華，三真羅絡。凝丹元於澄寂，萬氣虛圓。某不勝懇禱之至。

終獻

以今四氣朗清，三華洞煥，將身朝於金闕，庸面禮於玉墀，顧惟玄局之森羅，盍玃素箋之謹飭，青龍宮玄生左府，鳳凰閣道德衆尊。少昊金樓，天曹門下，暨玄冥太真之館，皆靈飛通進之司。悉進章文，仰希傳導，願迂留於英蕩，俟整辨於衛儀，同步虛無，徑登大有。倘功勤之昭著，當效報之駢蕃。某不勝虔祝之至。

送聖頌

靈寶領教濟度金書卷之十二

靈寶領教濟度金書卷之十二

洞微高士開光救苦真人甯全真授  
靈寶通玄弘教水南先生林靈真編

科儀立成品

祈禳開度通用

進拜朱表儀

步虛 洒淨

燒香頌

各禮師

宣衛靈呪

九天有命，奉命玉清。召集萬神，俱會帝庭。太乙下觀，雙星翊形。監察萬邪，理炁攝生。青帝之道，整飭神兵。七神秉鉞，天戈右征。威劍前驅，煥擲火鈴。檄命甲騎，武卒天丁。風火齊戰，斬伐邪精。上威六天，下攝魔靈。仙皇秉節，莫敢稽停。赤書符命，萬神咸遵。

鳴法鼓二十四通

各稱法位

具位臣某，與臨壇官衆等，謹同誠上啓太上無極大道虛無自然元始天尊，太上虛皇玉晨大道君，萬變混沌玄元老君，玄都玉京上帝，高真萬天上帝，東華上相木公道君，西靈太妙金母元君，太上丈人，天帝丈人，九氣丈人，上相丈人，太陽上皇道君，太陰聖后元君，南辰六闕上真道君，北極九府上真道君，三元三官帝君，五老五靈帝君，玄中大法師，三天大法師，玉清上相大羅無極神公，泰玄上相，天機內相，天機上相，天樞使相，天樞左相，天樞右相，天曹諸司真君，天曹門下上官典者，引進仙官，上章詞表靈官，三天門下上仙上神上靈真君，十方至真飛天神王，五嶽真君，太平下教二十四真人。三洞三乘經錄法中神仙將吏，流傳至教經、籍、度師，得道真人，正一嗣師、系師、真人，太歲尊神，土地主執，三界官屬，一切威靈。臣聞丹谷凝虛，耀金光於絳日。玄峰回妙，混玉彩於朱霞。黃庭流偃月之輝，紫戶煥靈烟之景。英元內拱，羅九室以珠聯。儀璘旁昭，會三



宮而璧合。上契虛無之聖境，下符妙有之神廬，飛步乘颿，精思御炁。臣以遊心塵外，寄跡寰中。七經騰碧玉之輪，鬱羅日近。八緯運玄珠之駕，華蓋雲開。佩師渥於丹圖，膺帝恩於紫策。兢兢寡過，切切立功。緬惟下教以騰芳，盍贊上乘而毓秀。今有某人伏爲某事，乞進朱表，仰瞻碧落，上煥玄虛。七寶瓊臺，金闕貫清微之界。三華琅座，玉京凝紅映之區。靈光燦而鬱勃，通明，真景旋而彌羅長耀。輝輝炁運，拱劫仞以虛圓。朗朗神交，御泥丸而妙密。伏願紫關洞徹，黃道昭回。九靈飛鳴玉之聲，奔飛浩炁。八威振流金之武，嚴攝罡風。乘霏霧以高躋，登長虹而直上。流珠御景，拱獅座之威顏。金華乘晨，綴螭坳之班列。階升奕奕，几奏依依。遂微臣造請之忱，副齋主皈依之願。臣下情不勝激切，望恩之至，謹稽首再拜。

### 重鳴法鼓

謹出臣身中玉門紫戶三十九闕上真靈官，三部八景二十四真，五體真君，丹

元真人，上清虛無自然左右領仙玉郎，飛仙玉虛侍郎，各二十四人出。五帝五色元皇，太真飛龍功曹，上元功曹，飛行功曹，各二十四人出。玉虛飛仙使者，太仙使者，神仙使者，各二十四人出。玉虛金童玉女，飛行金童玉女，八節直言直事，各二十四人出。某治建節監功大將軍，前部效功，後部效殺，驛庭令，驛庭丞，四部監功謁者，上仙上靈二官，直使正一功曹，左右官使者，陰陽神訣吏，科車赤符吏，剛風騎置吏，驂馬上章吏，飛龍騎吏，各二人出。出者嚴裝顯服，冠帶垂纓，整其威儀。領仙玉郎，冠飛玄玉冠，衣九色龍文虎衣，執命魔靈幡，立左。玉虛侍郎，冠元晨玉冠，衣五色飛仙羽衣，執九色靈幡，立右。飛龍功曹，冠九德通天之冠，衣九色鳳衣，腰帶虎書，執召神之符，在上。飛仙功曹，冠九德通天之冠，衣五色羽衣，腰帶金鈴，執攝煞之律，在下。飛仙使者，冠飛天玉冠，衣五色斑文之衣，手執金符建節，在前。神仙使者，冠朱陽玉冠，衣九光飛

仙之衣，手執玉版持幢，在後。玄黃太真功曹使者，冠帶羽服金真鳳章豁落七元，手執玉案，對立臣前。正一功曹，弁朱陽之幘，冠通天之冠，衣阜紈單衣，腰帶龍頭之劍，捧持謁簿。二官使者，弁玄陰之幘，冠九德之冠，衣絳章單衣，腰帶虎符，齋執玉版建節，持幢立臣前後。狼吏虎賁，察奸勾騎，都官僕射，天驕甲卒，天丁力士，治正執正吏，收神食神吏，收鬼食鬼吏，收炁食炁吏，收毒食毒吏，收邪食邪吏，收精食精吏，某靖侍靖仙官，玉童玉女，主將副將，護道監壇諸大元帥，諸省府院司仙靈官吏，在時用事一切威靈，一時嚴裝羅列鹵簿，屯駐圍繞，受臣詞語，分別關啓，玄壇土地，四面真官，三洞威神，三寶宮屬，三五功曹，左右官使者，侍香金童，傳言玉女，五帝直符，直日香官，左右龍虎君，侍衛靈官，三天承受玉女，十天承受玉女，三十二天承受玉女，三天上奏靈官，諸天傳奏靈官，左右繡衣二使者，十方飛天使者，傳言奏事飛龍騎吏，在時受事應感仙靈，道上

二玄三元四始甲子諸官君將吏。並乘玉輿綠轅，雲駟瓊輪，羽蓋飛虬之乘，飛行紫虛，上登三天之上金闕玉殿瓊房丹室，爲臣同誠，上啓太上無形無名虛無自然至真大道無上玄尊金闕玉陛下。臣以下愚冥昧，上聖提携，奉天章以翫藹回風，膺帝圖而光明流日。六天辟斥，乘紫極之靈威。九地朗披，藉清微之妙炁。承符佐運，金石微盟，生德開光，丹青證誓。今有某人進拜某表，祈三天之惠澤，宏九地之慈恩。臣謹依元降祕典，騰箋飭函，依科操進，伏望功曹使者受事仙靈，洞覽翹勤，對臣料理，務契玄格，上詣金門，龍刀瑤環，金魚玉鴈，舒鎮洞案，請省表文。

宣表 封表 遣表

謹遣臣身中三十九真，三部八景五體真官，小吏書佐，功曹使者，神吏衆官，顯服嚴裝，整其威儀，爲臣護持。某人某表一通，操詣三天，分別進對。若有謬誤，尋文註改，毋令上官典者有所譴卻。速達徑詣太上無極大道無形無名虛無自然金闕玉陛下，慎勿稽停。當

令所請者下，所濟者度。若有下官故炁，於道路雲霧中，斷截臣表文，使不得上達者，攝付天一北獄，依玄都鬼律治罪，以明天憲。臣伏在案前，須待玄恩報應。

焚詞頌 操伏畢

重稱法位

具位臣某，謹重誠上啓太上無極大道三清上聖，十極高真，玄都玉京萬天上帝，東華西靈道君，南辰北極上真道君，三官五老大帝，玄中大法師，三天大法師，泰玄樞機三省上相天君，三天門下三元真君，飛天神王，三界官屬，一切真靈。臣聞靈光圓映於崑崙，十華普照。道炁回旋於玄牝，七覺丕彰。雖玄元始之分靈，實精炁神之混景。青房紫戶，衛雌一之重扉。玉室金樓，超函三之密徑。淵乎微妙，微矣希夷。臣以玄雲流明，真風披扇，飛丹元於豁落，覲玄極於虛無。曲荷慈觀，俯垂睿聽，塵冒寬女青之律，宣揚煥空碧之綸。澤被圓方，福覃幽顯。更願三靈化育，萬物生成。日重暈，月重輪，開

旋圖之瑞象。書同文，車同軌，耀金鏡之祥符。泰階平而玉宇飛浮，端門闢而金書煥耀。虛靈四啓，湛然昭出有之功。定慧雙圓，寂爾返又玄之妙。臣無任瞻戀，皈依之至，謹稽首頓首，再拜以聞。

十二願

- 一願乾坤明素，二願氣象清玄，
- 三願聖人萬壽，四願化洽八埏，
- 五願天垂甘露，六願地發祥烟，
- 七願四時應候，八願萬物生全，
- 九願家多孝悌，十願國富才賢，
- 十一願齋功廣被，
- 十二願善瑞日臻。

復爐

香官使者，左右龍虎君，侍香諸靈官。當令臣上表之所，自然生金液丹碧芝英，百靈衆真，交會在此，洞案爐前。令臣體耀金輝，斬伐胞根，七玄拔擢，百關備仙，解除死籍，宴坐泥丸，東華紀字，策景虛玄。十方仙童玉女，接待香烟，傳臣向來所啓之言，速達徑詣太上無極大道無形無名虛無自然金闕玉陛下

下。

出堂頌

靈寶領教濟度金書卷之十三

靈寶領教濟度金書卷之十四

洞微高士開光救苦真人甯全真授

靈寶通玄弘教水南先生林靈真編

科儀立成品

祈禳開度通用

金鐘玉磬儀

立班 上香

以今焚香，供養神霄辟非大將軍，神霄禁壇大將軍。悉仗真香，普同供養。伏以三炁徘徊，藹寥陽之帝所。九氛羅絡，控鬱絕之神鄉。潛騰丹赤之夷微，昭徹玄黃之沖漠。若稽玉範，式御金章。希聲奏而九合陽精，隱韻碎而十和陰耀。鸞鳴鳳唱，步虛揚八素之音。虎嘯龍吟，空洞耀七靈之詠。神輝四闢，霄映六通。紫精蒨燦於華林，光凝象外。玄景輪困於騫樹，氣煥天中。鳴玉而方緯潛孚，扣瓊而圓經密應。珠幢翠葆，逶迤移龍尾之班。羽蓋金旌，容與侍獅頭之座。雲層降瑞，

風澤呈祥。三極凝清端，聽履上星辰之貴。九霄恢廓耀，垂衣昭雨露之榮。需丹闕之生生，暢清都之化化。臣等扣頭紫陛，歸命玄壇，仰罄精誠，庸符肸蠶，稽首皈依無極大道。

振金鐘二十五聲

伏以圓虛含象，陽韻凝和，黃中融無極之聲，逸響廓太空之量。玄通沖漠，大音密契於鬱羅。淵默回旋，雅觀潛符於劫仞。真機谷應，妙景靈澄，鏗鏘而華蓋雲開，縹緲而流精霞映。九重感聖，十極迎仙，肅運玄功，昭諧釐事，召陽神呪，恭對披宣。

元梵恢漠，九霞映空。丹靈顯著，五緯交通。真陽激徹，韻合玄宮。元始徘徊，群仙敬從。萬氣齊仙，隱微降衷。道生自然，變化無窮。和：與道合真  
宣召陽神符  
擊玉磬三十聲

伏以浮陰凝潤，方景溫澄，表玉界而梵唱凌空，列瑤壇而靈音徹野。恢張妙有，幅圓之幽宰迎和。冥合虛無，泉壘

之陰靈契妙。輕清表質，縹緲依聲。感六合之風雲，蔭八紘之雨露。無象之象，自然而然，影響旁昭，精誠斯格。召陰神呪，恭對披宣。

高上太虛，瓊宮紫房。玄壇制器，玉磬琳琅。霞霄振舉，乾坤合張。陰生梵唱，流演玄綱。慶雲生門，普濟存亡。克成高仙，永處福鄉。和：與道合真。

宣召陰神符

鐘磬交振三十六聲

伏以金聲玉振，凌虛九奏以舒徐。陽關陰通，混景三成而鬱勃。上儀翠漠，下格黃輿。風舞流蘇，龍篋映千枝之麗。雲旋鹵簿，猊籌騰百和之芳。雲路祥開，霄衢光動。禁壇授鉞，肅十地之魔靈。辟非揚旌，蕩六天之紛浩。玄音朗徹，威振昭回。玄壇密象於紫宸，綠界潛移於丹禁。通真達靈神呪，恭對披宣。

混合二氣，表陰著陽。金和動瑞，玉潤靜昌。交感上下，格于十方。杳振玄宮，環珮鏘揚。靈符所告，

嚴肅壇場。秘範重宣，萬神開張。和：與道合真。

宣禁壇辟非二將軍符

振金鐘九聲

盥潔披天衣，清風襲霞裾。端念陟雲臺，飛神騰太虛。時至當鳴鐘，和合契希夷。瓊音徹玄都，金鐘藹紫微。萬騎雲間逸，九華空外飛。鳳凰翩翩翔，獅子縱橫馳。和：與道合真。

振玉磬六聲

稽首禮十方，虛契在三清。天尊住虛空，恍惚本無形。湛然自靈應，常能感精鉞。西妃拊瓊磬，齊和崆峒聲。地獄無罪魂，天庭奏善名。一振琅音響，萬神稽首聽。和：與道合真。

伏以胚臍剖運，高厚殊形，九九而陽清上浮，六六而陰濁下奠。杳冥莫測，潛無聲無臭之機。磅礴難窮，取有象有滋之數。鈞天備舉，梵唱敷揚。鏘金而韻徹天中，戛玉而音旋地表。龍蟠雲聚，虎伏風凝，周回感召之玄，鼓舞

和同之妙。以今三靈虛映，四氣朗清，開碧玉於人間，降紫金於天上。鯨鍾薦瑞，召十華赫奕之尊。鳳磬含和，迎九野繽紛之衆。塵清萬象，慶溢群昌。廓幽顯以神交，溥古今而氣合。和鸞將御，振鷺催班，結志同誠，旋行贊詠。

交振大鐘磬各四十九聲

步虛旋遶 向來

又金鐘玉磬科

伏以蒼蓋垂精，藹雲營而流響。黃輿胤粹，蔭風澤以虛寥。根鴻濛凝氣之先，宗溟滓分靈之後。仰峨帝所，碧霞羅絡於瑶林。俯渺神鄉，幽梵周回於玄闕。圓方標象，清濁殊形，期肸蠁之潛孚，徹澄寥之密格。迎和制器，金鐘玉磬以琳琅。觀象舒壇，翠葆珠幢而掩藹。青鸞霄舞，丹鳳雲吟。洞章流六奏之音，下開鬱絕。梵唱逸九成之韻，上徹寥陽。敷瑞氣於八遐，融神光於三極。天無氛穢，華京延翠玉之尊。地絕妖塵，雲陛耀紫金之貴。陽畿拱北，陰壘朝東。臣等拜首雲墀，傾心月陛。按清微之秘範，宏丹極之玄章。

聽履上星辰，擁鳳琚而几奏。垂衣昭  
雨露，覲龍宸以階升。高厚交孚，神人  
允穆。曲輅鴻厖之澤，少旌燕雀之情。  
恭闡洪儀，庸宣丹範。

### 振金鐘

伏以圓虛高映，清邃淵澄。含元氣之  
淳和，鯨金鼓鬣。象太空之沖漠，龍玉  
揚鬢。靈風激振於希聲，法雨流滋於  
陽韻。九霄朗徹，迎羽蓋以徘徊。三  
景煥明，輅霓旌而赫奕。光涵元聖，慶  
混陽靈。高凝無極之真，洞煥有生之  
妙。

元範恢宣，九霞映空。丹靈顯著，  
五緯交通。真陽激徹，韻合玄宮。  
元始徘徊，群仙敬從。萬氣齊仙，  
隱微降衷。道生自然，變化無窮。  
和：與道合真。

### 振玉磬

伏以方涵潤潔，靜粹端溫。凝中正之  
奇材，泗浮球瑞。煥泓澄之異稟，崑胤  
琳珍。清音振肅於鸞臺，隱韻飄揚於  
鳳篋。聲馳六合，來冥宰之颯車。響  
答九幽，輅陰靈之自駕。惟靜感靜，以

和召和。等碧玉以輝輝，入黍珠而勃  
勃。

高上太虛，碧宮紫房。玄壇制器，  
玉磬琳琅。霞霄振舉，乾坤合張。  
陰生梵唱，流演玄綱。慶雲生門，  
普濟存亡。克成高仙，永處福鄉。  
和：與道合真。

### 鐘磬交振

伏以玉虛回運，金剛混凝。圓清體乾  
健之資，羽嬰鼓奏。方厚表坤柔之德，  
神姤揚鳴。徹三界以雲羅，擁十華而  
霧集。謠歌空洞，流金辟斥於魔靈。  
幢節飛玄，戛玉奔澄於醜爽。二儀煥  
耀，四炁朗清。交神景於太無，拱靈光  
於妙有。

混合二氣，表陰著陽。金和動瑞，  
玉潤靜昌。交感上下，格于十方。  
杳振玄宮，環珮鏘揚。靈符所告，  
嚴肅壇場。秘範重宣，萬範開張。  
和：與道合真。

伏以陽經陰緯，中凝感召之機。地魄  
天魂，內胤和同之妙。五億聲聞而氣  
應，三千音朗以神交。玉宇霞明，擁華

芒於霓所。金書雲煥，散靈彩於星壇。  
肅八方之威神，會三靈之仙聖。風雲  
混合，出虛左列於珠鏞。水月森羅，同  
和大張於碧落。光光互映，景景交融。  
鳴九鳳於寶林，翠圓寒樹。唱八鸞於  
璇漢，朱耀芙蓉。臣等肅對九清，恭疏  
五濁。啓琅函之秘典，宣寶笈之沖科。  
通天地人，期溥慈雲於九軌。耀玄元  
始，庶凝湛露於八圓，盍贊真風，仰依  
道氣，領袖凌雲之侶，羽儀偃月之儔。  
結志同誠，旋行讚詠。

### 斂大鐘磬

靈寶領教濟度金書卷之十四

靈寶領教濟度金書卷之十五

洞微高士開光救苦真人甯全真授  
靈寶通玄弘教水南先生林靈真編

科儀立成品

祈禳開度通用

禮金籙燈儀

立班 上香

伏以混沌未分，旋無色無淵之妙。鴻濛既判，昭有形有氣之殊。圓清上運於陽光，方濁下凝於陰暗。域羅五億，渾淪仙聖之都。界布三千，磅礴鬼神之府。判晦明於經緯，別晝夜於陰陽。恢廓霄景之翳昏，昭合晨輝之晃朗。幽開黑鬱，顯契紫虛。自非千枝璀璨以流華，曷俾三極陸離而散彩。是以科遵金籙，著然燈之威儀。教啓瓊囊，昭降光之品格。蘭篝建設，蓮炬恢張。擷兔摛烏，燦一天之星斗。遊龍躍鳳，舞六合之烟雲。絳霞上耀於玉霄，丹虹下明於金粟，外符法炬，內映心燈。

生五藏之華榮，煥八圓之粲麗。淪疏塵翳，輝宅舍於福鄉，辟斥注殃，超祖玄於道境。有求皆吉，無願不符。今有齋主某人，蠲潔蓬廬，鋪張芝陛。澄清夜氣，敷神焰以熒煌。晃朗朝華，廓朱氛而煒燁。勤拳虎拜，稽顙龍宸。伏願玄澤旁流，降紫金之妙相。洪恩曲蔭，現白玉之毫光。照燭陰鄉，開明陽境。華燈互映，千灾隨燼以銷鎔。寶炬交騰，萬福逐膏而煥萃。提先亡於不夜，昌後胤於長春。普及冥昧之鄉，均化光明之界。恭遵瑤笈，式演瓊科。法衆運誠，稱揚功德，燈光無盡天尊。

伏以地闢天開，廓神輝而洞照。陽生陰長，昭靈景以回旋。內外互融，表裏瑩徹，謹遵金籙品格，肅建然燈威儀於道戶上。然一燈以照住宅，爲齋主消灾度厄，安鎮宅神，伏願福鄉日永，壽域春融，瑞氣籠葱，掃門庭之徵咎，祥光煥爛，襲步武之休符，稽首皈依，虔誠讚詠。

正一陽光，焰上朱烟。開明童子，

一十二人。洞照一宅，回及我身。百邪摧落，殺鬼萬千。光明朗徹，達真通靈。昇入無形，與道自然。

和：願得長生。

伏以輝燦八遙，藹蘭臺之麗色。彩凝四極，燦芝室之祥光。陽華玲瓏，陰靈炳煥。謹遵金籙品格，肅建然燈威儀於本命上。然三燈以照三魂，爲齋主制邪度厄，拘守三魂。伏願三宮靜默，六府虛圓。北極流華，洗紛葩於命樹。南辰耀景，固純嘏於生根。稽首皈依，虔誠讚詠。

陽光洞明，三魂自生。總錄百神，長附我形。日中齊景，永保無傾。

和：願得長生。

伏以萬象含輝，凝雲英之紫鳳。二儀耀景，敷霞藥之丹虬。剌剌俱融，塵塵不立。謹遵黃籙品格，肅建然燈威儀於行年上。然七燈以照七魄，爲齋主安神却禍，制魄除邪。伏願七神回籍，五氣彰符。視履天開，威精靈而伏匿。敦頤帝錫，調榮衛以融怡。稽首皈依，虔誠讚詠。

明燈攝光，遊精不飛。七魄安守，萬神總歸。月中齊景，長處光輝。

和：願得長生。

伏以光燦銀缸，映長生之粟藥。芳騰瑤鼎，呈不死之靈芽。上徹雲層，下流風澤，謹遵金籙品格，肅建然燈威儀於太歲上。然一燈以照神明，為齋主某人除落災害，福慶來臻。伏願光凝泰宇，德契乾元，玉燭開祥，迎四時之和氣。金莖薦瑞，蕩八極之妖氛。稽首歸依，虔誠讚詠。

太陽流輝，光焰四方。洞照我身，七圍九重。內朗外明，洞達太空。

和：願得長生。

伏以破暗續明，藉天光之高映。乘晨照夜，開地禁之低迷。有感斯通，無幽不燭。謹遵金籙品格，肅建燃燈威儀於大墓上。然三燈以照遠代五墓，為齋主拔度先亡，托生淨域，斷絕注訟，解除伏連。伏願重陰散翳，長夜生輝。超北府之形神，惡根殄瘁。敦南宮之性識，善果羅敷。稽首皈依，虔誠讚詠。

太陰冥冥，萬劫無期。陽光洞煥，下照枯骸。魂度光明，鍊景反胎。得生淨境，歡樂熙怡。

和：願得長生。

伏以三景開明，廓神鄉而朗照。八圓流映，象帝所以飛芒。與道合真，無文不度。謹遵金籙品格，肅建然燈威儀於小墓上。然五燈以照近代丘墓，為齋主拔度先亡神爽，得生天堂，利祐見存，福祚興昌。伏願玄雲塞死，惠露開生。萬妄俱消，度黑艷而超邁。一真獨露，昇碧漢以逍遙。稽首皈依，虔誠讚詠。

長夜冥冥，萬劫無開。景潛太陰，七魄蕩飛。朱靈童子，太陽洞輝。

照明魂魄，神爽同歸。

和：願得長生。

伏以晨華流映，闢五苦以超凌。陽景飛浮，廓三途而朗照。普令幽夜，俱證生方，謹遵金籙品格，肅建然燈威儀於壇堂。然七燈以照七祖父母幽魂苦爽，得生天堂。伏願青華授記，朱火證真。債訟冰清，流慶基於後裔。注殃

日散，襲福祉於先猷。稽首皈依，虔誠讚詠。

天回地轉，代謝相催。九幽生光，七祖無虧。太陽開度，死魂應歸。明燈續夜，枯骸生輝。

和：願得長生。

伏以照徹十方，流神光於寥廓。開明九夜，騰靈景於幽陰。蓮炬生華，蘭膏呈彩。謹遵金籙品格，肅建然燈威儀於中庭。然九燈以照九幽罪魂，為齋主拔度九幽先亡罪爽，睹見光明。伏願寒庭噓暖，夜壑乘晨。起死回骸，操慈航而利涉。登真度命，秉慧燭以躋攀。稽首皈依，虔誠讚詠。

九幽冥冥，萬劫無光。長夜閉魂，元始未彰。華燈續明，下照土皇。

開度七祖，上生南昌。洞照一宅，

世為仙王。和：願得長生。

伏以陽燧凝華，煥三宮之明景。鬱儀流彩，映九府之祥光。遐邇俱明，臣纖無隱。謹遵金籙品格，肅建然燈威儀於天門上。然二燈以照宅舍，為齋主驅邪捕害，保護合門。伏願紫樞衍慶，

蒼昊垂休。椿桂凝芳，耀歡聲於霽月。  
芝蘭胤秀，萃喜氣於光風。稽首皈依，  
虔誠讚詠。

陽光開明，朱烟焰飛。太光童子，  
備守炎扉。洞照宮宅，四窗八開。  
驅鬼捕邪，萬精斬摧。三界敬護，  
世世不衰。羅真交會，日月同輝。  
和：願得長生。

伏以華蓋騰輝，耀燈燈而交換。太微  
布化，凝景景以互融。上極太虛，旁通  
有截。謹遵金錄品格，肅建然燈威儀  
於地戶上。然二十四燈，以照二十四  
生氣，為齋主延齡益氣，安福迎祥，注  
上生名，削除死籍。伏願金花潤曉，玉  
樹酣春。道契天機，削黑編於東岱。  
德蠲地累，注丹籍於南昌。稽首皈依，  
虔誠讚詠。

三部八景，合成我身。二十四氣，  
以成我神。明燈自照，上聞太玄。  
身度水火，與氣自然。八景齊光，  
願得成仙。和：願得長生。

伏以乘巽履乾，輝靈光於玉室。面離  
背坎，煥陽氣於霄衢。有感斯通，無文

不立。謹遵金錄品格，肅建然燈威儀  
於八方。然八燈以照八卦，為齋主照  
明八達，開映八宮，八方開通，八神密  
衛。伏願五路通達，四極澄清。策氣  
翼扶，輅輦祺於宅舍。保神安鎮，消魔  
癘於家庭。稽首皈依，虔誠讚詠。

三景煥明，八卦開窗。天氣靜閉。  
太陰隱光。華燈照冥，萬願皆從。  
身入光華，永享無窮。  
和：願得長生。

伏以碧落光浮，影上搖於河漢。玄虛  
彩轉，芒遙映於虹霓。奕奕神燈，煌煌  
靈景。謹遵金錄品格，肅建然燈威儀  
於四面中央。然九燈以照九宮，為齋  
主度九宮灾厄，成九宮仙君。伏願業  
山烟散，定水光凝。九壘書勤，奏仙名  
於太赤。五靈度苦，削罪性於女青。  
稽首皈依，虔誠讚詠。

九五分立，天地開張。玄光潜伏，  
太陰太陽。明我華燈，上照九宮。  
玄夜開朗，我願吉昌。  
和：願得長生。

伏以消陰啓陽，廓神燈之照燭。麗天

煥地，燦靈景之回煌。三極輝明，十華  
朗照。謹遵黃錄品格，肅建然燈威儀  
於十方。然十燈以照十方，為齋主照  
明十極，招真降靈，書名十天，解釋灾  
厄。伏願凝真三素，毓妙九靈。名簡  
帝圖，享太平之嘉運。行書神錄，脫繁  
襲之妖氛。稽首皈依，虔誠讚詠。

天開地閉，玄陰不明。焰上朱烟，  
為我通真。十方尊神，朗鑒我形。  
魂魄洞輝，自然元精。  
和：願得長生。

伏以象映華堂，調金經而並煥。形輝  
碧漢，等玉緯以交明。星斗陸離，風雲  
肅靜。謹遵金錄品格，肅建然燈威儀  
於四面。然二十八燈，以照二十八宿，  
為齋主削除死籍，益上生名，南斗延  
年，北斗落死。伏願景星呈彩，流曜韜  
威。壽比嵩衡，度五靈之祿籍。福同  
溟渤，刊一極之仙圖。稽首皈依，虔誠  
讚詠。

明星太煥，光流十門。玄精下映，  
九幽徹昏。我然華燈，乘光上聞。  
願得青蓋，照我形魂。和：願得長



生。

伏以垂象著明，紀神輝於二景。憲天布化，耀靈彩於三華。上照諸天，下開列壘，謹遵金籙品格，肅建然燈威儀於天門上。然三十六燈，以照三十六天，爲齋主開度七祖父母，昇入天堂。伏願天關布澤，地軸承恩。斷生死根，登逋臺而縱步。超陰陽域，升騫圃以治神。稽首皈依，虔誠讚詠。

龍漢蕩蕩，三氣乘玄。梵行渺渺，彌羅大千。悠悠長魂，仰望綿綿。今日明燈，我願飛仙。與我七祖，同昇諸天。和：願得長生。

伏以亘天徹地，昭丹焰之輝煌。表陰著陽，極黃垓之汗漫。堪輿並照，遐邇交明。謹遵金籙品格，肅建然燈威儀於五方。然五燈以照五嶽，爲齋主書名仙籍，保鎮身形。伏願萬緣烟靡，千慶雲升。行滿三千，鎖洞天之日月。疇符九五，消福地之風波。稽首皈依，虔誠讚詠。

五嶽靈山，安鎮五方。五帝尊神，神仙之宗。今日然燈，上照天王。

記我命籍，度入仙宮。七祖解脫，

同昇太空。和：願得長生。

燈光無盡天尊

向來關燈金籙簡文然燈威儀，功德周圓。伏願華燈不夜，丹炬長春。經緯三辰，增靈光之照耀。華夷四塞，均神景之熒煌。泉曲煥明，幽臺皎麗。飛潛動植，咸鼓舞於陽精。人鬼龍仙，悉歡呼於帝澤。群生攸遂，品物敷寧。爲如上緣，志心稱念。燈光普照天尊，不可思議功德。

靈寶領教濟度金書卷之十五

靈寶領教濟度金書卷之十六

洞微高士開光救苦真人甯全真授  
靈寶通玄弘教水南先生林靈真編

科儀立成品

祈禳開度通用

補職說戒儀

侍職立師寶前，啓白

伏以建齋行道，威儀夙列於三元。分任設官，俯仰聿符於四極。諸天臨軒而校錄，衆真侍座以監觀。職守所縻，步趨宜謹。況玉律備統攝之令，而金科垂銓舉之文。宜罄厥誠，登瑤壇而變理。各典所署，敷瓊笈以宣揚。選授毋輕，鑒觀有翼。

先補一人為高功。其職也道德內充，威儀外備，天人歸嚮，鬼神具瞻，躡景飛章，承顏宣德，惠周三界，禮絕衆官。今齋主已預齋信幣禮，請某人充直壇，以職簡授之。跪受簡，三拜。

次補一人為都講。其職也洞輔該通，法度明練，讚唱儀矩，領袖班聯。立壇步趨，陞座講說，昭符人望，默契天心。今某人充直壇，以職簡授之。跪受簡，三拜。

次補一人為監齋。其職也總握憲章，典領科禁，糾正壇職，振肅朝綱，周密察非，從容授簡，有嚴有衛，毋濫毋墮。今以某人充直壇，以職簡授之。跪受簡，三拜。

次補一人為侍經。其職也嚴潔几衽，整齊卷軸，開函啓奏，收積敷陳，調和衆音，表儀庶職，觀聽允睦，幽顯交懽。今以某人充直壇，以職簡授之。跪受簡，三拜。

次補一人為侍香。其職也精飾鼎彝，嚴潔案席，巡行爇炷，終始芬芳，玄鑒昭彰，丹誠露達，毋或中絕，有越初忱。今以某人充直壇，以職簡授之。跪受簡，三拜。

次補一人為侍燈。其職也整辦缸篝，精嚴燈燭，高下照徹，內外輝華，際夜續明，乘晨收焰，上明道

境，下煥幽鄉。今以某人充直壇，以職簡授之。跪受簡，三拜。

如上所補，皆道參洞輔，學貫樞機。通曉齋科，非白簡初真之輩。練明經法，匪黃冠後進之流。惟黜陟之既明，宜賢否之勿溷。以德相尚，豈云遷就於人情。惟道相尊，詎曰觀望於勢位。各敦素守，共暢玄綱。有三官五帝之檢身，有九府四司之臨女。天威惕若，壇禁森如，毋自冒於科條，庶克逃於憲律，一如靈寶玄壇律令。

### 智慧頌

智慧生戒根，真道戒為主。三寶由是興，高仙所崇受。汎此不死舟，倏忽濟大有。當此說戒時，諸天來稽首。

轉班高功西向，壇衆東向，各伏地。

衆官等各各首體投地，默禮十方，方各一拜，從北為始，禮足周回十方，虔誠受戒。

高功說戒長跪

衆官各長跪

天尊告太上道君曰：今當普說法音，

開悟群生，為諸男女解灾却患，請福度命，拔諸苦根。使生者見道，身脫八難。死者懽樂，飲食天堂，早生人中，轉輪聖王之家。修齋求道，皆當一心奉請十戒，諦受勿忘，專心默念，洞思自然，毋得雜想，撓亂形神。能如是者，便當靜聽。

第一戒者，心不惡妬，無生陰賊，檢口慎過，想念在法。

第二戒者，守仁不殺，愍濟群生，慈愛廣救，潤及一切。

第三戒者，守正讓義，不淫不盜，常行善念，損己濟物。

第四戒者，不欲不色，心無放蕩，正潔守慎，行無點汙。

第五戒者，口無惡言，言不華綺，內外中直，不犯口過。

第六戒者，斷酒節行，調和性氣，神不損傷，無犯衆惡。

第七戒者，不得嫉人勝己，爭競功名，每事遜讓，退身度人。

第八戒者，不得評論經教，訾毀聖文，躬心承教，常如對神。

第九戒者，不得鬥亂口舌，評詳四輩，天人咎恨，傷損神氣。

第十戒者，舉動施爲，平等一心，人和神穆，行常使然。

以上十戒能持否。

衆答云：能持。

天尊言：修奉清戒，每合天心，常行大慈，願爲一切，普度厄世，慊慊尊教，不得中怠。寧守善而死，不爲惡而生。於是不退，可得拔度五道，不履三惡，諸天所護，萬神所敬，長齋奉戒，自得度世。

天尊言：道尊法妙，人身亦貴。故道開法門，遺戒經文，以度人身。人身既度，上與道同。宜爲精行，持齋奉戒，夷心靜默，志念分明，一意皈嚮，專想不二，滌蕩六腑，過中不味，內外清虛，每念自然。是直齋日拈香啓願，應心上徹，四天司邏，十部威神，即下履行，觀聽法音，監映爾心。如戒行道皆，列功諸天，禍福立彰，道不負人，勤行諦受，勿使魔言。

天尊言：建齋行道，四天帝王皆駕飛

雲綠輶，八景玉輿，侍從真人玉女，手把華幡，前導鳳歌，後從鈞天，白鶴獅子，嘯歌嚙嚙，燒香散花，浮空而來，瞻禮上道，觀聽法音，天王下降，萬靈朝焉，如是豈可不盡其法焉。當先授十戒，然後行道，庠序雅步，靜心閑意，坐起卧息，不離儀格，天真懽喜，列言上清，可謂得道，方寸之間矣。

#### 奉戒頌

道爲無心宗，一切作福田。立功無定準，本願各由人。虛己應衆生，注心莫不均。大聖崇正教，亦由雨降天。高陵靡不周，常卑故成淵。海爲百川王，是能捨龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

#### 歸位 衆官平坐，宣禁威儀。

齋法清虛，威禁至重，同齋學士，務契威儀。太極法師，具存禁戒。今當宣演，開示未聞，監齋糾率衆官，面受罰簡，有違科禁，必罰毋停。修齋主人，當洒掃屋宇，每令潔淨，丁敕大小，內外寂靜，不可使香油缺乏，法用有虧。

道士登齋，各齋巾褐版履，不得臨時交換彼我，公事有缺，勿得牽引非己之服。

道士登齋起居，皆當關白監齋，禮法師一拜，禮香三拜而去，還亦如之。若到齋堂，履屨不整，罰油二斤，準禮二十拜。

若坐起不庠序，罰油半斤，準禮五拜。

若不正坐，罰朱半兩，準禮五拜。

若臨行法事，與外人交言，罰香一斤，準禮二十拜。

若翻覆香火，罰香半斤，準禮十拜。

若講及世務，罰香一斤，準禮二十拜。

若言語戲笑，罰朱一兩，準禮十拜。

若綺言低睡，罰朱半兩，準禮五拜。

若翻覆燈油，罰香二斤，準禮四十拜。

若巾褐不整，罰香半斤，準禮十拜。

若都講讚唱失儀，罰香一斤，準禮二十拜。

若執糾見過不彈私隱，罰油六斤，準

禮六十拜。

若侍經不整飾，高座觸物有缺，罰香半斤，準禮十拜。

若侍香香烟中絕，罰油四斤，準禮四十拜。

若侍燈燈火中滅，罰香一斤，準禮二十拜。

若齋主內外不相檢飭，音聲高厲，罰油五斤，準禮五十拜。

若聽經倚據不執簡，罰香一斤，準禮十拜。

若不注念清虛，心想怠倦，為衆所覺，罰油三斤，準禮三十拜。

若出入齋堂，不關白監齋，罰油二斤，準禮二十拜。

若垂髮馳步，罰香一斤，準禮二十拜。

若讀經或亂，請問敗句，罰油三斤，準禮三十拜。

若唱善聲不齊，罰油二斤，準禮二十拜。

若升壇不洗手漱口，罰油二斤，準禮二十拜。

若起坐揖遜失儀，罰油半斤，準禮五拜。

若旋行不依次第及逆行，罰香半斤，準禮十拜。

若起行來及還坐，不禮經三拜徑去者，罰香一斤，準禮二十拜。

若臨燒香突行，罰油一斤，準禮十拜。

若齋主供辦觸事有缺，罰香一斤，準禮二十拜。

若受關不啓上，罰油三斤，準禮三十拜。

若齋次因起居逃遯不返，為衆所糾，罰香五斤，準禮一百拜。

若犯威儀，彈罰不伏者，啓告三寶，退出齋次。

若下坐衆官法事有虧，從一至三，依科彈罰，從三已上，退出齋次，執糾不彈，與犯同罪。

若上座法師於事有虧，從一至三，依科彈罰。從三已上，斷功一百日，不得又在法座。

凡此禁戒，皆玄都上官明科舊格。戒

其惰慢，檢其愆違。建齋之時，四天帝王天真上聖，親降齋所，瞻履行道，察其行藏，觀其誠志。若有過失，即勅四司五帝，詔下三官，隨事糾舉，加其灾考。天尊大聖哀念世愚，不欲使其因齋獲罪，故開糾罰之門，使其知過而能改，罪亦消焉。受罰之者責己，甘心恭敬聽命，勿得飾非喧競，干冒真靈。如此則弘整紀綱，解消殃咎，落罪名於既往，延福祉於將來。得不翼翼小心，虔虔夕惕，若親奉大聖，躬朝國君。即真靈感通，福祥臻集。登齋之士，勉而戒之。

如不宣禁，則云登齋，衆官久詣壇律，盍遵天職，各整朝章，所有罰簡三十六條，更不宣示。

靈寶領教濟度金書卷之十六

靈寶領教濟度金書卷之十七

洞微高士開光救苦真人甯全真授

靈寶通玄弘教水南先生林靈真編

科儀立成品

祈禳開度通用

開啓祝幕儀

法師上香

臣聞一元肇運，範圍經緯，以生成三洞，開圖橐籥，陰陽而化育。故凡麗於名數，孰有外於陶鎔。仰惟大造之涵容，俯鑒小心之激切。以今恭焚道香，德香，無爲香，無爲清淨香，清淨自然香，妙洞真香，靈寶慧香，超三界香，三景真香，滿瓊樓玉京，遍周天法界。無量寶香，遙瞻供養太上無極大道虛無自然元始天尊，妙無上帝，虛皇玉晨大道君靈寶天尊，妙有上帝，萬變混沌玄元老君道德天尊至真大帝，玉皇大天尊玄穹高上帝，紫微中天北極大帝，紫微上宮天皇帝，高上神霄玉清真王長

生大帝，東極青玄上帝，后土皇地祇，十方靈寶天尊，九天生神上帝，三十二天上帝，五方五老上帝，東華上相木公道君，西靈太真金母元君，日宮太陽鬱儀帝君，月宮太陰結璘皇君，南辰六闕上真道君，北極九府上真道君，五方五德上真道君，周天二十八宿真君，天地水三官帝君，泰玄樞機三省上相天君，九天諸司真君，天曹諸司真君，三天化主玄中大法師真君，三天大聖都天大法天師真君，靈寶經、籍、度師真君，靈寶監齋大法師真君，北極四聖真君，三天門下三元真君，三天門下上章詞表靈官，十方無極飛天神王，五天三界大魔王，三洞四輔經籙法科上聖高真、神仙將兵，本靖諸省府院司將吏兵馬，五嶽五帝真君，五天聖帝，洞天福地靖廬治化名山洞府得道真仙，祖、玄、真師列位真人，經籍度師列位真人，北陰玄天酆都大帝，東霞丹林扶桑大帝，地水職司、城隍社令、里域土地監察神祇，侍衛宣通，無鞅聖衆，三界官屬，一切真靈。仗此靈香，普同供養。香乃玉

華散景，九炁凝烟，香雲密羅，徑衝九天。當願侍香金童，傳言玉女，與臣通達，上聞帝前，所啓所願，咸賜如言。以今奉爲某人某事，崇建某齋，仰荷玄恩，圓成齋福，尅卜今宵，恭陳三界。清醮一座，若干分位延奉真旂，庸酬宸貺，屬茲瓊筵，肆啓瑤範，將宣宜昭格於虛無，庸恢張於妙有。欲望慈光密映，真澤潛孚。翠葆珠幢，縹緲雲飛於輦路。丹旌清蹕，翩翩霞映於霄衢。三界齊臨，萬仙拱衛，共鑒葵傾之切，庸歆芹采之供。班序齊周，壇場告備，雲鏞逸響，月籟流明，恭對道前，關行法事。

十方靈寶天尊 洒淨

宣檢攝妖氛符

十方靈寶天尊

詣掌醮司幕 上香

某謹上啓三天門下掌醮司真君，天曹門下掌醮司真君，醮筵翊衛一切威靈。仰冀高明，俯垂采覽。以今齋主某人，披心大梵，稽首上玄。盡齋戒沐浴之誠，潔蘋蘩蘊藻之薦。尚祈聖造，曲賜

靈通。臣仰惟六甲行厨，三華妙席。雲霞錯落，金玉駢羅。慮人間烟火之供，非天上希微之饌。難延颯馭，徒冒憲章。欲望聖慈，特施妙化。神奇靈變，等龍鳳之珍羞。整辦鋪陳，象瓊瑤之宴集。伶華朗徹，符寶拱嚴。容某會道運元，招真攝景。庶萬真而周遍，俾三界以懽怡。某不勝懇祈之至。

焚六十四卦真文

丹霞耀靈，黃華素精。元皇鬱勃，三景交并。非烟羅絡，流金火鈴。驅除萬穢，整部天兵。化工神運。玄景開明。碧落空歌，山川耀平。九天翊衛，遏絕邪精。靈場清淨，寶芝自生。奇葩散彩，種來閩城。靈菓流芳，根產玉京。瓊卮玉罍，羅列層層。霞漿雲饌，杳藹芳馨。光騰鳳炬，座列龍屏。紫雲異香，入戶穿櫺。俯歆凡庶，恭薦虔誠。遙瞻閭闔，隊仗紛迎。天人稱大慶，靈祉自來并。和：與道合真。

十方靈寶天尊

詣降聖司上香

某謹上啓三天門下降聖司真君，天曹門下降聖司真君，三界符使，四直功曹。仰冀真慈，俯垂采覽。以今齋主某人，披心大梵，稽首上玄，盡齋戒沐浴之誠，致蘋蘩蘊藻之薦。尚祈聖造，曲賜感通。某仰惟縹緲鬱羅，龍葱劫刃。紫雲倩粲，碧霧四旋。慮紛葩五濁之庭，非曲密九清之境。難延颯馭，徒冒憲章。欲望聖慈，特爲奏請三清上聖，七御至尊，三界諸司，十華聖衆。各嚴鹵簿，俯降道場。容臣降真召靈，合神攝景。普集玄虛之衆，均臨廣大之筵。某不勝懇祈之至。

焚三皇內文

天衢漠漠，靈雲颯颯。星河耿耿，神風飛烟。玉殿瑤光，洞徹三元。蒼澤鬱鬱，丹耀懸懸。三天鳳輦，九帝龍駟。寶旛珍蓋，碧輿朱軒。金鸞翻翻，瓊鳳翩翩。玉童玉女，霞衣雲肩。五帝大魔，九真飛天。龍裙虎袂，雲冠颯烟。悉臨黃道，瑞氣環旋。清都列聖，紫府群仙。森羅萬象，俯降芳筵。步虛玉韻，

空音瓊篇。九霄蕩蕩，八景乾乾。證明壇界，降福除愆。洪恩施品類，惠澤遍山川。和：與道合真。

十方靈寶天尊

卷簾儀 上香 啓白  
臣聞金闕玉房，紫烟聳鬱羅之妙。瓊林琪樹，碧霞旋劫刃之玄。凝三素以峨峨，混九靈而眇眇。雲階七仞，升龍朗耀於青琅。月陞九成，翔鳳盤旋於玄璐。雉扇擁流瓊之宸，鸞旂飄曳玉之庭。梵炁回旋，御太虛而散耀。神光洞朗，煥無色以通明。上聖攸宗，下仙莫邇。以今伏爲某人崇建某齋，恭遵丹笈，肅建玄壇。象玄都寶界之崇，彷彿玉京神山之邃。變凡作聖，霓旌光列於螭坳。化幻成真，霄蓋回旋於獅座。降翠華之寶御，鳴清蹕之琅音。珠箔玲瓏，中拱虛無之聖。綉幃絢爛，內迎妙有之尊。仰芝陛以崇嚴，企騫墀而峻極。臣等簪紳效職，劍履趨朝。願潔己以階升，鸞行肆覲。庶傾心而几奏，龍御揚休。願惟堂陛之截然，況復屏帷之肅若。敢干風憲，自速天章，具有

表文，謹當宣奏。

### 宣表

表文敷露，聖鑒昭彰。願洪造之穰穰，副丹誠之懇懇。天威咫尺，曲垂與進之恩。民欲鋪張，庶滿對揚之願。珠簾高捲，翠箔齊張。再拜皈依，玉音稽首。

### 法事

玉鈎褰翡翠之簾，光依日月。金陛御狻猊之所，班會風雲。靈光奕奕以回旋，神景輝輝而嘯朗。班聯玉筍，聿殫事帝之恭。座列金芝，庸罄承天之敬。敢遵丹笈，式暢玄科。法衆運誠，恭趨玉陛。

### 靈寶領教濟度金書卷之十七

## 靈寶領教濟度金書卷之十八

洞微高士開光救苦真人甯全真授  
靈寶通玄弘教水南先生林靈真編

### 科儀立成品

祈禳開度通用

### 立六幕儀

上香 啓白

具位奉行某齋法事嗣法弟子某，焚香上啓三洞四輔經錄法科祖、玄、真師列位真人，經、籍、度師列位真人。仰望師慈，俯垂省錄。伏以齋法精嚴，校錄列臨軒之聖，玄功妙密，糾彈尊御幕之真。修奉云初，皈依敢後。以今奉爲某人崇建某齋，玄壇肇建，丹笈將宣，先立幕以告齋，靈風遐扇。期臨壇而證度，聖力宏宣。欲望申錫慈觀，曲矜愚悃。特爲聞奏五靈尊聖，三元帝君，靈寶玄師，正一教主，監齋列幕，主宰高真。揖三炁之靈芒，承流中陛，擁九華之寶御，駐景前帷。提獎宗乘，圓成齋福。

某不勝虔祝之至。

### 道經師寶天尊

上香

具位奉行某齋法事臣某，謹焚香供養三天化主玄中大法師真君，靜老天尊。伏以道貫一乘，仰玄元之法雨。教宏三洞，尊靈寶之慈雲。主張夙籍於師垣，陶冶願歸於聖域。臣先據某人爲某事，其諸情悃，已錄奏聞。今將肇啓瑤壇，恪宣寶範。傾光御氣，希辭藥闕之鴻濛。定令頒符，式煥芝圖之鬱勃。銘心激切，稽首凌兢。法衆運誠，修齋奉請。

修齋奉請玄師，降臨壇所。

雲輿已降，鶴駕來臨，齋事圓成，還當奉送。

請玄師頌

科律嚴章奏，精誠享百神。投詞陳悃願，潔醮答高旻。俯盼垂雲駕，冥心啓上真。玄師都教主，奉請降凡塵。

獻茶酒 散花

某謹上啓玄中大法師真君，切以清微應化，鼓聖楫於三靈，黃籙垂文，駕法橋

於六合。亶繇護翊，敢罄懇祈。以今伏爲某人爲某事，自愧顛蒙，曷扣龍宸而僊澤。恪期覆蔭，庶通蟻悃以宣慈。啓壇表文，謹當敷奏。

宣表

表文控露，淵聽昭回。冀颯馭以遲留，撫旂帷而款駐。萬真受事，開黍珠出教之玄。八景流華，敷騫玉成真之妙。齋功告備，靈貺旁孚。某不勝虔禱之至。

道經師寶天尊

上香

具位奉行某齋法事嗣法弟子某，焚香上啓三天扶教輔玄大法天師，沖玄神化正一靜應顯佑真君。伏以龍漢凝玄，啓虛無之聖運。鶴鳴演妙，敷靈寶之真乘。提携亶賴於宸慈，主宰夙繇於師造。某先據某人爲某事，今將肇啓玄壇，恪宣寶範。開天扶教，夙承丹禁之綸恩，御景啓途，願降清都之羽仗。銘心激切，稽首凌兢。法衆運誠，修齋奉請。

修齋奉請天師，降臨壇所。

雲輿已降，鶴駕來臨。齋事圓成，還當奉送。

請天師頌

太上傳符籙，初因過鶴鳴。積功超玉簡，列位侍三清。接引章詞奏，克隨凡庶情。修齋當奉請，願俯鑒精誠。

獻茶酒 散花

某謹上啓三天扶教輔玄大法天師真君。切以九清輔極，張聖瑟於玄黃。三籙開光，闡神機於經緯。亶繇護翊，敢罄懇祈。以今伏爲某人某事，自惟性亶控伺，期籍三天而領教。誠敷汪穢，庶提十地以歸真。啓壇表文，謹當敷奏。

宣表

表文控露，淵鑒昭明。冀暫駐於檐帷，爲曲留於輪蓋。紫微啓秘，傾葵徼濟下之恩。碧漢流輝，采菲副由中之禱。齋功告備，靈貺旁孚。某不勝虔禱之至。

道經師寶天尊

上香

具位奉行某齋法事嗣法弟子某，焚香上啓靈寶監齋大法師真君。伏以法出三

乘，溥慈悲之蕩蕩。道彰七部，仰靈寶之玄玄。證臨既賴於師尊，懇禱莫殫於愚賤。某先據某人爲某事，今將肇啓玄壇，恪宣寶範。飛空駕景，願移彩仗於九霄，綴武依光，庶徼洪釐於三極。銘心激切，稽首凌兢。法衆運誠，修齋奉請。

修齋奉請監齋，降臨壇所。

雲輿已降，鶴駕來臨，齋事圓成，還當奉送。

請監齋頌：

寶號留塵世，仙階列上清。三千功已滿，八百行先成。禮懺修真福，監齋作證盟。今宵雲馭降，祥祉被含生。

獻茶文 散花

某謹上啓靈寶監齋大法師真君。切以九陽御極，開紫掖以疏恩。三籙披圖，建玄班而輔化。亶繇護翊，敢罄懇祈，以今伏爲某人爲某事，自惟玉律精嚴，莫罄芻衷於帝所。金科敷落，難頒芝渥於神鄉。啓壇表文，謹當宣奏。

宣表

表文控露，淵聽昭回。冀敕勒以停輪，



爲徘徊而駐幕。萬真翊衛，微紫金澤潤之恩。四氣朗清，符碧玉緬平之瑞。齋功告備，靈貺旁孚。某不勝虔禱之至，

道經師寶天尊

上香

具位奉行某齋法事嗣法弟子某，焚香上啓五方、五靈、五老帝君。伏以一炷流光，敷玄元之鳳篆。五靈毓粹，尊靈寶之龍文。糾臨既藉於聖謨，寅亮敢陳於愚悃。以臣先據某人爲某事，今將肇啓瑤壇，恪宣寶範。持幢建節，願迂清衛以前驅。校錄授符，爲霈玄恩而下邁。銘心激切，稽首凌兢。法衆運誠，修齋奉請。

修齋奉請五帝，降臨壇所。

雲輿已降，鶴駕來臨。齋事圓成，還當奉送。

請五帝頌

五帝居仙品，糾彈善惡因。祥光臨宇宙，惠澤濟沈淪。發露祈真佑，冥心感聖賢。存亡俱快樂，享福永無垠。

獻茶酒 散花

某謹上啓五方、五靈、五老帝君。切以教尊三籙，流惠露於幅員。權冠十華，佐真風於霄極。亶繇護翊，敢罄懇祈。以今伏爲某人爲某事，自惟清律霜明，式冒朝章之俯仰。丹衷冰履，惟期宸貺之提携。啓壇表文，謹當宣奏。

宣表

表文控露，淵鑒昭回。冀鹵簿之遲留，向庭帷而迂駐。開張萬範，權衡舒無上之恩。混合百神，簪紱證又玄之妙。齋功告備，靈貺旁孚。某不勝虔禱之至。

道經師寶天尊

上香

具位奉行某齋法事嗣法弟子某，焚香上啓天、地、水三元三官帝君。伏以五大垂精，煥希微之洪範。三元輔佐，典靈寶之玄綱。威儀既宰於宸嚴，燮理願依於聖造。某先據某人爲某事，今將肇啓瑤壇，恪宣寶範。執籙把籍，願提丹筆以明清。振轡飛輪，冀下紫垣而赫奕。銘心激切，稽首凌兢。法衆運誠，修齋奉請。

修齋奉請三官，降臨壇所。雲輿已降，鶴駕來臨。齋事圓成，還當奉送。

請天官頌

妙道垂真教，修齋五福田。結壇朝上聖，建醮會高仙。注念通霄極，精心感上玄。天官乘寶輦，彩仗下凡筵。

請地官頌

翼翼陳丹悃，兢兢仰紫虛。祈通塵下志，願達土皇君。潛應垂真佑，遐臨赦罪書。地官來下降，俄擁五雲輦。

請水官頌

方便開真化，慈悲立聖科。虛心修妙會，調氣詠靈歌。默念祈淵府，丹誠通大羅。水官龍駕降，雲錦起滄波。

獻茶酒 散花

某謹上啓天、地、水三官帝君。切以科尊黃籙，敷鴻澤以昭天。望峻清曹，翊龍宸而御地。亶繇護翊，敢罄懇祈。以今某人爲某事，自惟臨下昭昭，曷冒雷霆於白簡。受中昧昧，莫微雨露於彤庭。啓壇表文，謹當敷奏。

宣表

表文控露，淵鑒昭回。冀曲駐於前茅，為迂留於右幕。神功嚴校，開圓方有脚之春。祖氣輝流，霈幽顯無垠之澤。齋功告備，靈貺旁孚。某不勝虔禱之至。

道經師寶天尊

上香

具位奉行某齋法事嗣法弟子某，焚香上啓靈寶經、籍、度三師真君。伏以帝啓金書，結飛玄而闡妙。神彰玉宇，開靈寶以宣光。裁成夙藉於師圍，歸戴敢忘於聖囿。某先據某人為某事，今將肇啓瑤壇，恪宣寶範。凌空夙駕，願離紫府之班聯。翊教傳宗，重訂赤城之步武。銘心激切，稽首凌兢。法衆運誠，修齋奉請。

修齋奉請三師，降臨壇所。

雲輿已降，鶴駕來臨。齋事圓成，還當奉送。

請經師頌

入靖修黃籙，嚴裝啓上仙。奉章先達御，詞款欲關宣。寶籙因師度，威儀太上傳。經師來下降，奏請列群仙。

請籍師頌

肅肅祈清福，誦誦結寶齋。登壇須此夜，行道續徘徊。有願仍雖啓，皈心道眼開。籍師來下降，仙仗下瑤臺。

請度師頌

經戒丹心稱，虔誠召百神。捻香祈至聖，持戒請仙真。清詠凌朝啓，精思人夜勤。度師來下降，保護結齋人。

獻茶酒 散花

某謹上啓靈寶經、籍、度三師真君。切以齋崇黃籙，提九軌於慈航。恩輅綠羅，煥八圓於慧燭。宣繇護翊，敢罄懇祈。以今伏為某人為某事，自惟蛙井么微，徒暢玄風而佐理。虎關峻極，莫敷聖日以宣仁。啓壇表文，謹當宣奏。

宣表

表文控露，淵鑒昭回。願六幕之少留，俾丹輿而曲駐。玄龍翼乘，監真開不夜之天。丹鳳飛綸，煥號耀長春之地。齋功告備，靈貺旁孚。某不勝虔禱之至。

焚表 宣關

向來酌獻功德，上祈師造收錄，齋功為

上，因緣志心，稱念道經師寶天尊，不可思議功德。

謝六幕儀

華夏頌至玄師幕 上香

具位某上啓三天化主玄中大法師真君、靜老天尊。切以肅嚴黃籙，恪殫事帝之儀。誠徹紫樞，幸浹度人之澤。始繇覆蔭，終藉維持。某昨為齋主某人為某事，仰荷師恩，已圓齋福。重念某谷遷未遂牆面，徒慚降真召靈。慮玄章之風擾，運神會道。或丹憲之雲迷，淵涉兢兢。海涵切切，解壇表牘，謹用披宣。

宣表

表文具嚴，淵衷昭鑒。願霈岱溟之澤，肆寬鉞鼎之愆。彩霧後先，徒企靈光於碧漢。紫烟上下，惟敷道氣於黃垓。法衆運誠，修齋奉送。

修齋事畢，仰荷玄恩，志心稽首，奉送玄師。

雲輿弗駐，鶴駕難留，仰望雲霄，不勝攀戀。

送玄師頌

上帝命真仙，修齋黃籙壇。諸天來下降，焚香懺罪愆。祈恩行道畢，齋事已周圓。洪福留人世，玄師上九天。

華夏頌至天師幕 上香

具位某上啓三天扶教輔元大法天師，冲玄神化正一靜應顯佑真君。切以紫垣日近，恪攄九奏之恭。黃籙天開，幸衍八遐之澤。始繇覆蔭，終籍維持。某昨爲齋主某人爲某事，仰荷師恩，已圓齋福。重念某識倫象罔，迹混紛葩。丹範敷羅，莫回靈於玄妙。朱章奏對，曷混景於虛無。惟極再思，懼縈三禡。解壇表牘，謹用披宣。

宣表

表文具嚴，淵衷昭鑒。願衍洪厯之澤，恪旌螻蟻之忱。騰駕飛龍，法從莫攀於霄極。煥綸丹鳳，靈光願衍於寰瀛。法衆運誠，修齋奉送。

修齋事畢，仰荷玄恩，志心稽首，奉送天師。

雲輿弗駐，鶴駕難留，仰望雲霄，不勝攀戀。

送天師頌

齋福已精嚴，表牒上九天。至誠通感應，闔門得延年。掌籍諸天衛，章詞達御前。祖宗咸昇度，嗣胤慶榮遷。三天扶教主，事畢奏功圓。

華夏頌至監齋幕 上香

具位某上啓靈寶監齋大法師真君。切以紫霄啓運，肇宏玉笈之儀。黃籙開圖，迄備瑤壇之禮。始繇覆蔭，終藉維持。某昨爲齋主某人爲某事，仰荷師恩，已圓齋福。重念某道基學步，塵囿移情。龍宸承顏，莫昭宣於帝渥，駕班綴武，惟冒瀆於天儀。第極心兢，恪祈乎援，解壇表文，謹用披宣。

宣表

表文具嚴，淵衷昭鑒。願前非之電掃，許今是之雲臻。羽衛凌空，已覺鳴鞘於天上。鬱羅散渥，惟期飛綉於人間。法衆運誠，修齋奉送。

修齋事畢，仰荷玄恩，志心稽首，奉送監齋。

雲輿弗駐，鶴駕難留，仰望雲霄，不勝攀戀。

送監齋頌

靈壇崇法席，允賴下監臨。糾過兼書善，真仙亦仰欽。行當驅道騎，縹緲五雲深。生存當有賴，更復濟幽沈。

華夏頌至五帝幕 上香

具位某上啓五方、五靈、五老帝君。切以壇崇黃籙，幸徼芝御之臨。誠徹蒼圓，喜拜楓綸之煥。始繇覆蔭，終藉維持。某昨爲齋主某人爲某事，仰荷師恩，已圓齋福。重念某受資樗散，賦性棗昏。教演鸞函，慮未符於真格。班催鷺序，或有冒於朝儀。願追霜嚴，恪祈春育。解壇表牘，謹用披宣。

宣表

表文具嚴，淵衷昭鑒，願削玄曹之罪錄，特注青簡之勳圖。雲斂蕭臺，駐蹕已輝於祖氣。風清禁路，回鑾願錫於靈光。法衆運誠，修齋奉送。

修齋事畢，仰荷玄恩，志心稽首，奉送五帝。

雲輿弗駐，鶴駕難留，仰望雲霄，不勝攀戀。

送五帝頌

仙仗來霄極，尊嚴列五方。檢氛吹羽

節，鸞輅駐清揚。齋事將圓徹，回輿返上蒼。流恩無不遍，豈但感馨香。

華夏頌至三官幕 上香

具位某上啓天、地、水三官大帝。切以黃壇饗帝，聿嚴鳳氣之書；丹闕監真，欣拜龍光之寵，始繇覆蔭，終藉維持。某昨爲齋主某人爲某事，仰荷師恩，已圓齋福，重念某亡羊知愧，畫虎懷慚，律按女青，慮威儀之紛擾；科尊大赤，或法度之糾紆。惟賴吞雲，庶承湛露，解壇表牘，謹用披宣。

宣表

表文具嚴，淵衷昭鑒。願削非於黑簡，即校績於丹編。豹尾塵清，已泛玉虛之縹緲。獅頭光顯，期提金粟以彌羅。法衆運誠，修齋奉送。

修齋事畢，仰荷玄恩，志心稽首，奉送三官。

雲輿弗駐，鶴駕難留，仰望雲霄，不勝攀戀。

送天官頌

妙範修齋直，明科洗罪根。瞻穹崇上善，瀝懇致微言。既納依投請，蒙垂覃

宥恩。天官還玉府，寶駕入金門。

送地官頌

淨會朝元罷，三塗結福田。真恩定五嶽，誠悃奏三天。徹席停宗範，解壇送列仙。地官回嶽府，高陟五雲軒。

送水官頌

宣演靈音畢，諸仙返上穹。靈光除橫厄，甘露降真風。復命驪龍駕，遙還太室宮。水官歸洞府，福祿賜無窮。

華夏頌引至三師幕 上香

具位某上啓靈寶經、籍、度三師真君。切以瑤壇虎拜，恪遵黃籙之科。玉闕龍騰，已霽清微之澤。始繇覆蔭，終藉維持。某昨爲齋主某人爲某事，仰荷師恩，已圓齋福。重念某步趨由徑，警效及門。教雨涵濡，未鈎玄於洞輔。宗風揚歷，莫守黑於真元。冒典瓊科，懼縈玉律。解壇表牘，謹用披宣。

宣表

表文具嚴，淵衷昭鑒。誓日省而捨舊，期雲覆以知新。仰控青冥，已返三華之翠仗。俯提黃混，益綿萬葉之珠乘。法衆運誠，修齋奉送。

修齋事畢，仰荷玄恩。志心稽首，奉送三師。

雲輿弗駐，鶴駕難留，仰望雲霄，不勝攀戀。

送經師頌

經法雖微妙，崇奉悉四師。凡有立善者，咸得頻禮之。氣運功易就，心慢悔難追。若能勤繫念，朝夕自仙飛。

送籍師頌

道以齋爲重，法以朝爲常。不修不奉者，安能達帝鄉。有骨入仙品，自然開紫房。玄武排靈駕，但見金殿堂。

送度師頌

迢迢玉京山，玄都何巍巍。朗朗長夜開，真人乘步虛。大道由人弘，心至神自歸。修齋行道畢，稽首辭三師。

宣關 向來

靈寶領教濟度金書卷之十八

靈寶領教濟度金書卷之十九

洞微高士開光救苦真人甯全真授

靈寶通玄弘教水南先生林靈真編

科儀立成品

祈禳開度通用

立真師幕儀

步虛 洒淨 上香啓白

具位嗣法弟子某，謹焚香供養三洞四輔經錄法科祖、玄、真師列位真人，經、籍、度、師列位真人。恭望師慈，俯垂省錄。切以清微御混茫之運，玉字徘徊。赤明開溟滓之圖，金書敷落。羅三洞而上乘演妙，貫九清而下教舒玄。聖日輝華，萬派流芳於後覺。玄靈覆蔭，千燈濟美於前修。亶繇帝闕之綱維，實藉師垣之柱石。今有齋主某人爲某事建某齋，今當肇啓玄壇，肅敷丹範。結盟證誓，徼祖氣於九霄。招真召靈，霈靈光於十極。匪繇提獎，曷副虔祈。欲望朱鳳清塵，玄龍汎景。辭玲瓏之

藥館，曲映蟻忱。御縹緲之芝帷，恪敷鴻臚，翊扶玄教，護正齋功。法衆運誠，修齋奉請。

修齋奉請真師，降臨壇所。

雲輿已降，鶴駕來臨。齋事圓

成，還當奉送。

某謹上啓三洞四輔經錄法科祖、玄、真師列位真人，經、籍、度師列位真人。切以教闡玄元，瑤範開先於西蜀。齋嚴靈寶，瓊章丕振於東吳。提幽顯以乘晨，浹圓方而啓旦。孰主張是夙，欽道德之巍巍。式輔翼之期，罄忠誠之皎皎。以今奉爲某人建某齋，惠徼真馭，開朗宗乘。伏念某夙藉慶基，幸逢昌運。七經八緯，莫觀妙於黃房。四雌五雄，未凝玄於紫戶。疏烟林之步武，回塵棘之精神。切切惜分，悠悠進寸。況齋功妙密，羅萬帝以臨軒。壇律精嚴，檄千真而校錄。格未諳於俯仰，心莫契於威儀。豈輅洪禧，徒罹玄憲。敢冀曲提後學，許紹先猷扣清宸九虎之關，爲敷丹幅。降黃道六龍之御，請霈玄恩。庶得鳴玉召靈，流金

滅試。朱章露奏，輝輝登騫翠之林。丹笈霞披，勃勃恍玄珠之會。敷善功於遐邇，圓齋事於始終。疏牘啓壇，謹當敷露。

宣疏

疏文控露，師聽昭回。願風御之遲留，勒雲輿之暫駐。玄壇宣德，期克享於天心。丹闕頌恩，諒昭從於人欲。敷心激切，皈命勤渠。某不勝虔禱之至。

謝真師幕儀

華夏頌引至真師幕 上香

具位嗣法弟子某，謹焚香供養三洞四輔經錄法科祖、玄、真師列位真人，經、籍、度師列位真人。切以三洞開光，幽顯被如天之福。一乘演妙，古今蒙若水之機。告成幸備於齋功，歸美敢忘於師寶。某昨自某日爲某人建某齋，仰荷師恩，幸成釐事。尤慮某屠龍技拙，附鳳材疏。鴛鴦催班，進止有違於玉律。龍鸞拱御，對揚或冒於金科。三元五帝之刊圖，十極四司之校藉。冀敷雲錦，敢罄珠環。解壇疏文，謹當宣讚。

宣疏

疏牋敷落，師聽昭嚴，願回有造之恩，悉洗無涯之咎。曲提後學，許紹先猷，紫蓋凌霄，已越埃風於地大。清都宴景，誓宏化日於天長。法衆運誠，修齋奉送。

修齋事畢，仰荷玄恩，志心稽首，奉送真師。

雲輿弗駐，鶴駕難留，仰望雲霄，不勝攀戀。

向來

立左右二幕儀

華夏頌引至真師幕 上香

具位某，謹焚香上啓三洞祖、玄、真師列位真人，經、籍、度師列位真人。仰冀師慈，俯垂明證。切以壇律敷羅，降諸天而校錄。齋盟崇重，徼列聖以監真。肇宏修奉之規，控露皈依之請。以今奉爲某人修某齋，立幕告齋。登壇混景，欲望慈悲應感。智慧圓通，特與關告靈寶玄師正一教主，監齋真聖，三元帝君，經、籍、度師。僉垂鑒映。降玉垣之羽仗，護正玄功。承金闕之綸恩，誕敷丹渥。天人欣慶，遐邇瞻依，某不

勝虔祝之至。

華夏頌引至六幕 上香

具位某，焚香上啓三天化主玄中大法師真君，三天大聖都天大法天師，正一靜應真君，靈寶經師真君，靈寶籍師真君，靈寶度師真君，靈寶監齋大法師真君。恭望師慈，曲垂省覽。切以靈寶開光，祖氣雲羅於五億。玄元演妙，神功日赫於三千。惟道爲尊，无師不度。以今奉爲某人爲某事，今將肇啓玄壇，肅敷丹範。鸞旂迅景，願辭紫禁以遙臨。鳳輦飛霄，俯御青冥而下邁。翊扶正教，提獎宗乘。法衆運誠，修齋奉請。

修齋奉請六師，降臨壇所。

雲輿已降，鶴駕來臨，齋事圓成，還當奉送。

獻茶

具位某，上啓三天化主玄中大法師真君，三天大聖都天大法天師，正一靜應真君，靈寶經師真君，靈寶籍師真君，靈寶度師真君，靈寶監齋大法師真君。切以始青出教，彰聖海之汪洋。大赤

垂科，鑿帝江之浩蕩。匪繇宗主，曷遂開張。今有齋主某人爲某事，自惟蓬心內曲，徒招禍福由己之愆；葵志中迷，莫輅視聽自民之澤。具有表牘，謹用敷宣。

宣表

表文控宣，聖聰昭鑒。願停輪而款駐，即御幕以徘徊。玄之又玄，惠露涵濡於幽顯。上極無上，真風披拂於邇遐。齋福周圓，宸禧丕冒。某不勝虔祝之至。

華夏頌引至三官幕 上香

具位某，焚香上啓天、地、水三官帝君。恭望聖慈，曲垂省錄。切以道冠虛無，洞輔權衡於五劫。教尊靈寶，威儀主宰於三元。非誠莫通，惟德是輔。以今奉爲某人某事建某齋，仰瞻鳳闕，願旌蟻悃以時歆，俯邁龍輿，已御芝圖而日監。法衆運誠，修齋奉請。

修齋奉請三官，降臨壇所。

雲輿已降，鶴駕來臨，齋事圓成，還當奉送。

獻茶

具位某上啓天、地、水三官帝君。切以運昭騰勝，敷鴻貺以傳真。壇聳鬱羅，肅駕班而侍聖。匪繇宗主，曷遂開張。今有齋主某人某事，自惟紅塵日涉，莫明黍稷非馨之玄。紫氣天臨，徒輅茅茨不翦之譴。具有表牘，謹用敷宣。

### 宣表

表文控宣，聖聰昭鑒。願駐帷而容與，爲委轡以遲留。中有度人，經緯普躋於壽域。上無復祖，玄黃俱陟於福庭。聖澤昭融，齋功周備。某不勝虔祝之至。

### 謝左右幕儀

具位某上啓天、地、水三官帝君。切以日近瑤壇，喜拜玄元之澤。雲生瓊闕，幸親道德之光。敢證初忱，恪祈終惠。臣向來奉爲某人某事。仰荷恩光，克諧圓滿。重念某望洋凜凜，坐井卑卑。教闡三天，莫霈清微之雨露。齋敷九地，懼貽紫極之雷霆。亶冀鴻私，庶寬蚊負。表文扣謝，恭對披宣。

### 宣表

表牘控陳，聖聰昭鑒。願書功而捨舊，

庶改過以知新。綠輦丹輿，諒返靈光於天上。黃旗紫蓋，願敷祖氣於人間。法衆運誠，修齋奉送。

修齋事畢，仰荷玄恩。志心稽首，奉送三官。

雲輿弗駐，鶴駕難留，仰望雲霄，不勝攀戀。

華夏頌引至六幕  上香

具位某，上啓三天化主玄中大法師真君，三天大聖都天大法天師，正一靜應真君，靈寶經師真君，靈寶籍師真君，靈寶度師真君，靈寶監齋大法師真君。切以誠徹九關，喜際清光之邇。澤覃十極，幸承紫氣之臨。既畢朝儀，重殫野悃。某向來奉爲某人某事，仰荷恩光，克諧圓滿。重念某坎蛙鄙識，輟紉疏材。王陛承顏，莫暢玄釐之日。赫瑤墀綴，武慮嬰丹憲之霜。明第切心，兢亶祈乎援。表文扣謝，恭對披宣。

### 宣表

表牘控陳，師聰昭鑒。願削前非於黑簡，即宏今是於青編。碧靄九華，諒返丹青而容與，紫烟三素，永敷黃混於逍

遙。法衆運誠，修齋奉送。

修齋事畢，仰荷玄恩，志心稽首，奉送六師。

雲輿弗駐，鶴駕難留，仰望雲霄，不勝攀戀。

向來

### 立將吏監臨幕儀

華夏頌引至將吏幕  上香

具位某，焚香供養本靖諸省府院司仙官將吏。伏以道氣羅敷，廓虛無之聖化。神功赫奕，宏妙有之真機。玄壇既啓於齋盟，丹簡宜徹於靈貺。某先據某人爲某事建某齋，已騰詞而關告，諒飛馭以前來。爲詳激切之情，寅領監臨之職。今則芝儀告備，藥範將宣。雲騎周回，時行萬程而莅止，風驟迅邁，俱會一處以來游。法衆運誠，敬伸奉請。

請神

茶酒  上香

某上啓本靖諸省府院司仙靈官君將吏。切以西靈內禁，儼劍珮以雲羅。北闔中樞，煥旌旄而星列。庶府鷹揚於聖武，諸司虎視於神威。翊教三天，宣符

九地。凡齋修之建設，宜壇律之衛嚴。以今奉為某人恭校真科，惠徼洪蔭。欲望上遵帝令，下副民情。氣策黃中，徵萬魔而掃試。神交碧落，檄千真而致靈。玄壇榜文，謹當宣示。

宣榜

榜文敷露，聖聽昭回。願風幕之少留，俾雲旗而暫駐。衛真護道，勳崇三令之勤。舉賞言功，格煥九遷之寵。某無任懇禱之至。

華夏頌引至監臨幕

上香

具位某，焚香供養靈寶齋壇虚空監察，監臨、翊衛一切威靈。切以帝御天關，運樞機而制地。神司地禁，贊綱紀以承天。仰惟齋律之中嚴，盍仗靈威之外翼。先據齋主某人為某事建某齋，凡騰詞而關告，諒飛馭以來臨。願詳激切之情，為領監臨之選。今則芝儀告備，藥範將宣。畫戟前驅，擁虎符而迅邁。玄旗後從，驂駟駕以飛游。法衆運誠，敬伸奉請。

請神

茶酒

上香

某上啓靈寶齋壇虚空監察，監臨、翊衛

一切威靈。切以班崇九土，稟勇智以持衡。望峻一方，亶聰明而作鎮。視政春融之玉紱，宣仁天錫於金章。冰鑑無私，水衡有則。以今奉為某人為某事，欲望戒嚴部伍，警肅疆隅。故氣風清，徹葵忱於圓蓋。靈光日赫，徼芝渥於方輿。玄壇榜文，謹當宣示。

宣榜

榜文敷露，聖聽昭回。願英蕩之遲徊，勒檐帷而暫駐。監真衛法，坐殫勳績於皇壇。遷賞升階，行輅恩榮於紫極。某無任懇禱之至。

謝監臨幕三獻儀

步虛

洒淨

上香

某焚香上啓玄壇內外監臨翊衛一切真靈。切以玄壇日近，恪殫饗帝之恭。方幕雲聯，曾肅召神之禮。幸慶成於齋福，盍歸美於靈聰。爰露芹衷，惠延芝馭。洋洋左右，願少駐於珩琚。昭昭見聞，敢少稽於瑤玖。香風四舉，梵氣齊飛，法衆運誠，虔恭奉請。

請神

初獻

某上啓玄壇內外監臨、翊衛一切真靈。

切以三氣開圖，握神機於紫極。百靈受職，參帝紀於黃垓。況靈寶之齋修，布玄元之惠澤。功沾今古，化洽人天，凡有鋪陳，必勞翊衛。頃為某人崇建某齋，仰徼威神之重，僭露小心。幸敷聖武之隆，恪扶大教。達葵忱於帝所，敷芝澤於神鄉。九醜飛奔，有風靜雲藏之妙。八威奮迅，煥天開地闢之功。合幽顯以懽顏，溥邇遐而加額。恩隆溟岱，惠徼華夷。將遵徹幕之彝，諒遂回駟之喜。再陳菲禮，庸罄蕘言，執事恭陳亞獻。

亞獻

切以天官舉迂，按女青之玉格，地祇護衛，昭太素之金科。元勳既罄於玄壇，厚賞隨班於紫禁。誠通朱表，既騰景以告成。恩煥丹綸，必依光而陟品。某等羽儀八陛，領袖群工。慮塵網之未清，或玄機之尚鬱。受事陽局，易虧公正之心。效職陰曹，多昧慈仁之旨。悉祈委曲，普為申明。俾准格以宣勞，毋向隅而棄力。凡有懇禱，并賴維持。某不勝虔祝之至。



終獻 宣發回牒

文檄具宣，神聰委鑒。所冀中嚴，衛警外辦。凱旋飲至相歡，愈重神威於九鼎。告成有慶，多膺天祿於萬鍾。恭俟宸休，宏登真職。某不勝懇切之至。法衆運誠，虔恭奉送。

送神 回駟頌

回駟五雲輿，騰駕九章歌。倏忽升天遠，醮壇香氣多。玄恩覃宇宙，福祿遍山河。緬想神仙路，逍遙上大羅。

向來

靈寶領教濟度金書卷之十九

靈寶領教濟度金書卷之二十

洞微高士開光救苦真人甯全真授  
靈寶通玄弘教水南先生林靈真編

科儀立成品

祈禳開度通用

關發三獻儀

焚檢攝妖氛符

吾以月洗身，以日鍊真，仙人輔己，玉女佐形，二十八宿，與吾合并，千邪萬厭，逐水而清。

洞中玄虛，晃朗太无。八方威神，使我自然。靈寶符命，普告九天。乾羅荅那，洞罡太玄。斬妖縛邪，殺鬼萬千。中山神呪，元始玉文。持誦一遍，却鬼延年。按行五嶽，八海知聞。魔王束首，侍衛我軒。凶穢消蕩，道氣長存。

三上香


志心初捻上香，香徑御大羅天，遍大羅三境，乘雲蓋供養大羅三境尊。志心二捻上香，香徑御洞天宮，遍洞天

真境，乘華蓋供養洞天真境尊。

志心三捻上香，香徑御洞淵宮，遍洞淵水府，乘寶蓋供養洞淵水府君。

焚總召萬神符

玉清總召萬神符命



玉清始青，玉符告盟。告命三界，統攝萬靈，符到速追，符到速遵。女青詔書，如帝親行。上元天魔，中元地妖，下元水怪，敢有不順，拒逆張鱗，萬神斬首。不得留停，敕符往召。靈寶宮屬，執職萬神。速赴符來，速隨符至，玉帝敕書，仰行萬程。玉帝敕召，守待報應。急急如玉清總召萬神符命律令。

啓白

焚香供養三界符使，四直功曹，某靖主將副將，護道監壇，省府院司傳奏仙靈將吏，里域土地，司命正神。伏以龍漢開圖，煥始青之祖氣。鶴鳴啓運，敷太赤之靈光。亘三際而聖日舒明，蔭八

圖而神風鼓動。道尊靈寶，巍巍綱紀於清微。教闡玄元，奕奕權衡於紫極。丕顯潛昭之妙，肆張寂感之玄。丹禁高澄，孰與階升而御景。清曹拱列，可通函奏以凌虛。期肅扣於虎關，故惠傲於熊軾。伏望雲驂莅止，遵玉敕之崇嚴。月駟來游，赴瑤壇之峻極。鑒知芹采，恪聽葵衷。法衆運誠，依班奉請。

謹奉請侍靖仙官、玉童玉女，三天、十天、三十三天承受玉女，諸天上奏靈官，運神會道召靈功曹，降真召靈使者，降臨位座。

謹奉請十方飛天使者，傳言奏事，飛龍騎吏，九天上奏靈官，中天承受玉女，降臨位座。

謹奉請玉清總召三界內外金闕上佐發放，九天御史大夫，承符傳檄官吏，天樞承受發放司主吏佐吏，流金火鈴大將，降臨位座。

謹奉請九天雲路正一功曹，開天符命使者，玄虛當旛，三界直符使者，四直玉文功曹，降臨位座。

謹奉請本靖主將副將，護道監壇，傳奏仙靈將吏，降臨位座。

謹奉請城隍主者，土地里域真官正神，住居司命六神，降臨位座。

初獻 散花

伏以萬天萬地，拱翠玉於華京。一陰一陽，胤玄珠於丹谷。大無外，小無內，視不見，聽不聞。一氣交孚，自有和同之妙。萬神護翼，爰彰恍惚之玄。茲肅按於芝圖，庸若稽於藁簡。承受發放，象銀臺通表之司。直符功曹，承金闕驛馳之任。諸將扶持於雲路，群真森衛於霄衢。丹赤爰彰，玄黃攸徹。今齋主潔蠲蓬宇，疏瀹芋心。誦三洞之龍文，歸身歸神歸命。微九清之鴻祉，禮道禮經禮師。將建道場，先伸德悃。經華振響，迎寶霧以徘徊。梵唱流明，翻紫烟而縹渺。願暫停於鹵簿，庸少駐於檐帷。恪盡克誠，聿殫庸敬，執事恭陳亞獻。

亞獻

伏以四雌五雄，回風運東諸之緒。七經八緯，乘烟昭西禁之亥。幸天啓於

瓊章，荷師陶於寶簡。雖學真宴坐，期忘我以乘晨。然領教經行，盍度人而啓旦。庶功超於今古，而澤被於幽明。凡有皈投，盍爲關告。

宣齋意

其諸芻悃，已具藤牋。會道運元，雖混靈虛而飛化。通誠達信，亶資威武以通傳。庶帝貺以下敷，俾民情之上御。玉龍迅邁，風行碧落之中。金馬飛奔，電掣黃埃之內。無遠不屆，有碍皆通。葑菲不遺，願羅敷於帝貺。蘋蘩可薦，惟倚仗於神功。自慚設禮之勤，敢致投醪之敬，執事恭陳三獻。

終獻 散花

三獻已周，一忱畢露。所有文檄，謹用敷宣。


宣關 宣牒 宣劄

向來文檄，已具控陳。即冀氣策黃中，令嚴青甲。八威翼從，前驅嚴擲火之揚。九醜飛奔，後衛儼流金之煥。達心牋於帝所，呈意牘於神鄉。恪露懇祈，庶勳昭於日月，敢有干試，當束送於雷霆。佇俟感通，別當遷舉，謹伸奉

送。

### 焚開天符命

太上開天符命，今仰符中使者，正一功曹，流金火鈴大將，速為督護狀文，徑達道前。所過剛風灑炁魔界等處，不得妄有遏截。如違收付天獄，一如玉符告下施行。



黃中策炁，馘滅邪踪。剛風九醜，灑炁群凶。開天符命，九天徑衝。儻遏狀文，束送羅酆。流金火鈴，照徹黃中。龍虎騎吏，執奏雲宮。普天均慶，飛騰太空。一如告命，風火驛傳。

年 月 日吉時告下玉清上

相大羅無極神公。

### 敕水儀

伏以石景流明，挹黃華於東井。長庚孕秀，凝玄液於靈池。光分銀漢之輝，影湛金門之炁。掬來瑤鼎，五龍騰天一之精。洒以琅枝，九鳳淪大千之界。一塵不立，萬景俱融。期蠲潔於芝壇，

盍恢張於蘭範。

靈源無漏紛葩遠，風靜雲藏四炁清。

自然定水耀靈芒，洞煥玄黃成真境。

### 焚檢攝妖氛玉符

焚香上請日宮大聖鬱儀帝君，月宮大聖結璘皇君，天罡節度奎光帝君，願降真炁入法水。

焚香上請五方生炁，炁炁，道炁，自然正真之炁，華池真人，靈寶玉符通真、攝魔、屏穢靈官，九鳳破穢靈官，願降真炁入法水。

焚香上請天上直符解穢吏，地下直符解穢吏，年月日時直符解穢吏，本靖諸省府院司解穢吏，願降真炁入法水。

### 次揚枝淪水，周旋飛洒

清靜之水，日月華開，中藏北斗，內接三台，神水噴洒，禍去福來。

### 次念淨天地呪

### 旋行至壇前扣齒退

### 又敕水儀

伏以影湛瑤池，挹西崑而潤洒。光浮銀漢，流東渤以飛溶。生成標陰坎之功，經緯贊陽乾之造。散為雨露，融作

江河。天寶泉澄，耀八圓而彩映。空青枝洒，蕩六合以雲翻。景景光明，塵塵辟斥。三極滅爽，黃華飛東井之龍。四部刺姦，赤水奮南閭之鳳。對金彝而三爇，歌玉偈以重揚。

眇莽滄溟周覆載，瀾漫河洛顯圖書。百川派衍澤群芳，變化甘泉供經挹。飛洒紛葩清宇宙，摧妖滅爽試姦奔。神風靜默岳藏雲，上拯玄虛俱道境。

靈寶領教濟度金書卷之二十

# 靈寶領教濟度金書卷之二

十一

洞微高士開光救苦真人甯全真授  
靈寶通玄弘教水南先生林靈真編

## 科儀立成品

祈禳開度通用

### 施貧儀

步虛 洒淨 上香

伏以鑿混沌而分三極，人爲萬物之靈。陶洪濛而御兩儀，性稟五行之秀。本奚分於貴賤，初何別於富貧。惟資始資生，或計宿緣而輪轉。故受形受命，每隨業力以循環。三千珠履之豪華，綺羅映體。九十帶索之困極，韋布縈心。皇皇而推食誰憐，營營而解衣孰軫。是以真靈曲憫，仙聖垂憐。六度以布施爲先，萬行以喜捨爲尚。力到行方便，可令庶姓以同歡。仁散作陽和，當合萬方而共樂。今齋主某慶成釐事，負荷恩光，敬涓資財。普施貧乏，

以有有而資無有。厚德充周，俾生生而遂有生。仁恩廣大，仰冀三清上聖列帝高真。嘉彼慈悲，特垂鑒映。視人猶己，既衣被於光風。損己周人，庸甄陶於化日。敷羅丹果，種續玄功，稽首皈依無極大道。

### 吟頌

四民稟氣本皇天，受用周流是業緣。善積多生須富庶，惡熏宿劫易顛連。進糜惟感諄諄德，狹續宜懷耿耿恩。稽首玄元無上道，南宮計日紀瑤編。

伏以祖氣流行，昭輕清重濁沖和之位。靈光洞煥，通過去未來見在之關。凡此日之不料生，皆曩時之乏片善。幸逢齋醮，來集壇場。盍了了於靈扃，凝神解悟。勿昏昏於宿命，着意思惟。知齋主包容慈愛之心，成本來虛靈知覺之性。號物有萬，以人爲首，毋令顛頓於孤寒。凡施有五，以食爲先，忍使沈零於飢渴。瓊科煥耀，寶範彌羅。既承化育以勤渠，宜報生成而鬱勃。陰功昭著，福從讚歎中生。善果圓成，仁豈修持外鑠。上德不德，知恩報恩。

自然紀字於南曹，式符懇願。管取刊名於地府，永保期頤。稽首皈依無極大道。

### 吟頌

玄黃萬化握樞機，珍重陰功第一奇。濟乏扶危真意溥，賑飢活命實情施。今朝樂施來生福，後世榮華此日基。一飯不忘君子德，東華定祿與天齊。伏以布施作福田，法施莫先於財施。慳貪歸鬼道，心貪尤重於形貪。今齋主某，既捐金萊以賑賙，復仗真玄而開悟。財法二施，等無差別，心形兩貪，俱付虛空。自宜膺九五之祥，佇看樂半千之運。香花交散，燈燭爭輝。碧罄彌羅，普拯飢寒之輩，瓊鐘掩藹，頓資溫飽之徒。春滿八荒，陽生萬宇，不忍一夫之失所，毋令庶物之或遺。贊清微雨露之恩，善心圓滿。溥黃混日星之惠，福報昭彰。靈寶布施，神呪仰憑，清衆同爲宣揚。

### 宣呪

精進學仙業，布施第一義。若懷慳貪心，後世必淪墜。展轉三途中，飄流成

異類。見人飢渴者，哀憫猶如己。衣食若施與，感恩無不至。賢者識宿命，執心存利濟。作善天報之，生生當富貴。功成超九天，仙真自可冀。

向來捨施，功德無限。良因三寶證明，衆真加被。伏願恩周有截，德被無垠。士皆歡顏，奚止萬間之廣廈。民無飢色，宛同千頃之良疇。上報施生，旁資動植，悉歸正化，共贊真乘，爲如上緣。

### 放生儀

步虛 洒淨 上香

伏以一元判天地人物之形，道涵萬化。庶類布動植飛潛之象，品列三才。稟賦之資雖分，陰陽之情周具。貪生惡死，同趨利避害之心。渴飲飢餐，均求飽謀女之念。皆根源於元始祖氣，實肇分於太極真精。柰流俗之乖仁，徇世緣而非義。陸張水捕，合畢羅以掩群。射宿驚棲，設網罟而併命。憫彼微物，罹此何辜。今齋主某崇建寶齋，宣揚玉範，慶成釐事，負荷恩私。輒捐己財，誓贖生命。縱之林野，俾自在以逍遙。放之源泉，獲安閑而游泳，咸遂

有生之樂，用弘無上之恩。仰望三寶慈尊，九清上聖，俯從凡悃，曲映愚誠。察齋主隆天厚地之仁，爲增陰果，遂萬物戾天躍淵之性，永戴陽光。溥使寰區，同躋仁壽，稽首皈依無極大道。

### 吟頌

飛潛高下各流形，總是先天祖氣成。宿劫業因誰結習，今生異類且經行。遭逢網罟冤仇積，放贖林泉惠澤深。作善降祥增福報，前程袞袞被恩榮。

伏以轉煩惱作菩提，仁恩廣大。以神奇化臭腐，德厚充周。雖胎卵濕化之業報有殊，而生老病死之機緘則一。幸脫離於黑網，來會合於清壇。既向無生，則獲有生。已拜齋主携持之力，當由有念以至無念，共超大道希夷之關。悟多生趨向之非，識正情指歸之樂。隨緣展轉，趨覺地以安閑。任運逍遙，證福鄉而遊宴。永脫鱗介羽毛之苦，獲生清淨安樂之邦。恩不虛捐，當效珠環之報。德宜漸積，須堅金石之忱。稽首皈依無極大道。

### 吟頌

四生流浪久沈淪，業力膠纏本性昏。幸際恩光歸彼岸，宜回覺照脫迷津。惡都落滅冤愆罪，善地皈依惠愛仁。厚德無垠知感戴，密垂福慶萬齡春。

伏以集康寧好德之福，由積世之精修。憫蠢動含靈之情，本宿生之業對。六塵輪轉，萬劫循環，有地獄，有天堂，品類均明於趨向。無衆生，無壽者，飛潛同受於陶鎔。以今道氣旁周，靈光下燭。金鐘玉磬，琳琅振響於玄壇。寶篆銀缸，菡粲交輝於紫座。上帝溥昭天漏泉之澤，群生膺回骸起死之仁。翩翩雲飛，山深林密，洋洋川泳，海晏河清。皆由齋主向善心堅，好生志切。植今朝之陰福，結後日之良因。以茲放贖之切，罪消北府。藉此慈悲之力，名注南宮。陶九有於春臺，開八荒於壽域。靈寶戒殺神呪，仰憑清衆，謹爲讚揚。

### 宣呪

賢者戒其殺，亦莫懷殺想。衆生雖微，亦悉樂生長。如何害彼命，而用以自養。自養今一時，累汝自然爽。長

淪三途中，辛苦還復往。善惡本良緣，譬如聲與響。何不致此行，慈心以自獎。真人携手遊，逍遙觀無量。

向來放生，功德無限。良因仗三尊以證明，冀衆真之鑒映。伏願仁及草木，化洽蟲魚。盡宇宙高下之中，仁風披拂。極天地圓方之外，慧日舒明。悉令萬類之霑恩，不使一夫之失所。上報生成之德，旁敷化育之仁。凡厥有情，悉歸正道，爲如上緣。

靈寶領教濟度金書卷之二十一

靈寶領教濟度金書卷之二十一

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

祈禳開度通用

大禁壇儀

靈寶行持法師一人，立地戶上，  
三拜，上香，長跪

具位奉行禁壇法事臣某，誠惶誠恐，稽首頓首，再拜上言。臣聞一炁混成，凝神光而朗照。萬形恭峙，散靈景以飛流。玄風扇九陽之精，聖日闢六陰之粹。坤輿靜晏，彰寥廓之祥輝。乾蓋高凝，耀虛無之瑞彩。本來澄湛，奚有紛葩。自陰陽之炁交，致經緯之形擾。山澤烟霧，騰六合以溟濛。霄漠風雲，遍八紘而翳藹。戾氣或干於和氣，魔氛斯隔於清氛。是以飛火疏塵，流金滅試。南陵九鳳，洒空青之琅枝。東

井五龍，灌虛玄之瑤露。上開道境，下闢福鄉。俾妄翳以肅澄，庶真旂而降格。以今奉爲某人崇建某齋，疏瀹蓬宇，建植芝壇。切慮劫灰混凝，陰塵閉塞。四界八極，或乖氣之干凌。九宮十維，有幽氛之雜遝。匪繇蕩滌，曷格清虛。欲望玉敕遐頒，金符遙煥。宣十華之仙騎，策五梵之魔靈。命八方之威神，集五帝之兵馬，普乘道氣，俱會靈光。容臣合景宣揚，運真召役。彰山緬林平之妙，地絕妖塵。開雲藏風靜之奇，天無氛穢。提神鋒而嘯命，流法水以飛行。揮斥九圍，廓清四象。耀紫金於騰勝，開碧玉於浮黎。庶得諸天臨軒，萬真受事。龍墀光近，錫純嘏於青冥。駕陞班催，承蕃釐於黃混。無文不度，有感斯通。遂微臣宣德之忱，副齋主祈恩之願。臣無任懇祈之至，恭俟天恩，潛垂報應。

起身立，焚召四靈侍衛符

東方青龍，角亢之精。興雲吐霧，策雷駕霆。天矯千丈，周遊四溟，來侍吾左。

南方朱雀，衆禽之長。丹穴化生，碧霄流響。奇彩五色，神儀六象，來導吾前。

西方白虎，上應觜參。英英素質，肅肅清音。威攝衆獸，嘯動山林，來侍吾右。

北方玄武，太陰化生。虛危表質，龜蛇合形。盤游九地，統攝萬靈，來從吾後。

吾召四靈，四靈既集，即當遊，戴日挾月行九州，三十六將爲吾使，天地水官同其休。

#### 次丁罡三步，左手執水盂

是水也，石景分精，銀漢飛靈，氣孕黃華，光凝玄英，東井龍吐，北虛龜澄，影泱廣寒，瓶負長庚，流潤瑤沼，澄湛玉溟，祥融甘露，彩耀流星，塵祆辟斥，玄黃利貞。謹請靈寶主水玉童君，疾赴玄壇，聽宣號令。

#### 次右手執劍

是劍也，太白流芒，乾龍孕剛，光耀金門，氣稟中黃，雌雄分瑞，牛斗騰光，威制參虎，靈動奎商，聲振雷霆，質契雪

霜，七華凝中，三辰扶旁，遊精揮斥，陰陽允藏。謹請靈寶主劍玉童君，疾赴玄壇，聽宣號令。

#### 次劍水相向

吾劍非常劍，光馳寶匣，爍七政之龍文。吾水非常水，影搖瓊鍾，派九霄之鳳氣。躡雲綱而飛步，乘星紀以旋行。巡遊刺姦，豁落似麾於玉鉞。周流蕩穢，清涼如洒於金泉。謹召靈寶攝魔屏穢靈官，隨我神運，明檢內外，妖氛故氣，不得留停，一如靈寶玄壇律令。

焚檢攝妖氛符，焚召八方威神符

#### 次執劍水，旋行壇外，至東方立

蒼靈耀景，電激霆奔。飛空巨斧，變化天關。千妖萬邪，捕戮無蠲。乾闥坤肅，清蕩三元。謹請東方蕩穢威神江昌，綠衣仗劍，下降玄壇，檢魔蕩穢，急如律令。噴水。

#### 次至南方

朱火流煥，炎烟散精。蒼舌綠齒，威摧巨靈。丹旌命魔，秉鉞前征。敢有遏逆，塵飛艷刑。謹請南方掃穢威神王

唐，紫衣仗劍，下降玄壇，檢魔蕩穢，急如律令。噴水。

#### 次至西方

金門肅殺，太白流威。神兵萬萬，討姦捕非。巨獸重吻，黃旗散麾。雲營圍繞，羅布天機。謹請西方風散威神陳常，赤衣仗劍，下降玄壇，檢魔蕩穢，急如律令。噴水。

#### 次至北方

北營豁落，雙皇羽林。玄戈蒼甲，飛鈴流金。剪馘鬼姦，正道無侵。魔威披散，揚矛掃陰。謹請北方赫奕威神鍾房，白衣仗劍，下降玄壇，檢魔蕩穢，急如律令。噴水。

#### 次至東北方

五靈玄老，告命千真。周行刺姦，屠割无親。六目四臂，返甲逆鱗。九土社稷，疾閉魔氛。謹請東北浩極威神章龍，白衣仗劍，下降玄壇，檢魔蕩穢，急如律令。噴水。

#### 次至東南方

炎祝烈火，左嘯飛龍。明檢鬼營，嚴攝北艷。群魔束首，誅伐無蹤。皇道蕩

蕩，罔敢不恭。謹請東南烈焰威神袁涼，碧衣仗劍，下降玄壇，檢魔蕩穢，急急如律令。噴水。

次至西南方

太帝玉勅，飛鯨鼓鉦。紛紜隊仗，羅匝天兵。妖氛顯戮，摧破魔城。天光散妖，六合利貞。謹請西南解穢威神錢涼，黑衣仗劍，下降玄壇，檢魔蕩穢，急急如律令。噴水。

次至西北方

玄冥陰域，群兇吐威。巨天力士，金鉞前驅。趣校北帝，嚴攝摧誅。故氣幽閉，皇化巍巍。謹請西北肅清威神方洋，白衣仗劍，下降玄壇，檢魔蕩穢，急急如律令。噴水。

次旋行

洞中玄虛云云。

次焚召五帝大魔符，入都門，至中壇外東方

洞耀育元晶，青華開太明。布育九天氣，始生荐無英。扶陽通攝御，丹林合總真。積霄始暉上，鬱壘明霞晨。靈呪煥羅絡，衛育保形魂。混化合玄景，

仁惠消魔群。萬遍道已超，功當書上清。謹請青天魔王巴元醜伯，下降玄壇，攝魔屏穢，急急如律令。

次至南方

三氣藹靈閩，明虛煥玉丹。朱陵有帝真，華雲飛絳駟。統御萬界中，撫運超億千。執策按簡錄，洞章敷神篇。解結散禍根，流金摧兇姦。志能成此道，魔試俱無前。保度冥劫津，宴盼無窮年。謹請赤天魔王負天擔石，下降玄壇，攝魔屏穢，急急如律令。

次至西方

西靈回七度，太渺鬱明華。白元維我神，皇真御景霞。皎皎三素暉，昭昭破百邪。攝音延正氣，金晶育三田。鍊結固玉質，寶耀映瓊軒。魔精當滅試，速地無沈連。逸轡高清館，齊輪太上仙。謹請白天魔王反山六目，下降玄壇，攝魔屏穢，急急如律令。

次至北方

北玄天秀藹，太上紫皇居。總氣攝幽機，造化敷靈綱。下統虛危精，寶育天元房。靈通太妙神，纏羅衛百關。豁

落滅魔試，凶灾永不干。大道保自然，壽命無虧殘。萬劫享慶會，白日登雲輪。謹請黑天魔王監醜朗馥，下降玄壇，攝魔屏穢，急急如律令。

次至中央

混化歸沖妙，元皇總帝靈。真老閉黃閩，四御齊玄鈞。圓華太張上，同携堅玉君。結津固百骸，瓊耀擁胎仙。晨暉注明景，魔應自滅形。萬道保無虧，返老回童嬰。五會合一氣，飛馭超雲京。謹請黃天魔王橫天擔力，下降玄壇，攝魔屏穢，急急如律令。

次旋行

五帝大魔，萬神之宗。飛行鼓從，總領鬼兵。麾幢鼓節，遊觀太空。自號赫奕，諸天齊功。上天度人，嚴攝北酆。神功受命，普掃不祥。八威吐毒，猛馬四張。天丁前驅，大帥仗旛。擲火萬里，流鈴八衝。敢有干試，拒遏上真。金鉞前戮，巨天後刑。屠割鬼爽，風火無停。千千截首，萬萬剪形。魔無干犯，鬼無祆精。三官北酆，明檢鬼營。不得容隱，金馬驛呈。普告無窮，萬神



咸聽。三界五帝，列言上清。急急如律令。

次焚召十方飛天神王符，入地戶，至二壇外東方

東方碧霞林，耀圓煥晨華。流香凝三素，中有神王家。丹鈴揚八威，握節徵萬魔。下觀無極鄉，飛龍控綠羅。掃凶討姦逆，天一耀金戈。肅清霄衢廓，六虛收雲波。謹請東方無極飛天神王，下降玄壇，威制群魔，普掃不祥，急急如律令。

#### 次至南方

南方丹鳳城，三氣騰朱煙。神王御輪虬，瓊節黃金鞭。天兵遊太空，變化億萬千。群魔散雲營，流鈴威無前。法鼓趣丁甲，奮迅摧兇姦。振凱赤明界，炎洲朝萬仙。謹請南方無極飛天神王，下降玄壇，威制群魔，普掃不祥，急急如律令。

#### 次至西方

西方藥珠闕，素皇流精輝。離羅吐長庚，紫煙胤瑤畿。神王部金龍，萬騎縱橫馳。玉節召靈魔，朱矛滅遊尸。掃

蕩氛葩毒，萬精駭且悲。雲霄映空碧，剛風激清夷。謹請四方無極飛天神王，下降玄壇，威制群魔，普掃不祥，急急如律令。

#### 次至北方

北方廣寒宮，黑靈流玄雲。金童揚華旛，玉鈴鳴清鈞。天鋒森朱闕，神光冠華晨。翠節召遊奕，捕戮妖魔群。飛行駕龍御，束形無疏親。懽樂謠歌騰，威行耀金真。謹請北方無極飛天神王，下降玄壇，威制群魔，普掃不祥，急急如律令。

#### 次至東北方

東北方始青界，蒼精振靈風。下洞鬼門關，幽氛飛烟叢。神王持金麾，遊觀控玉龍。魔城摧堞雉，受命攝北豐。天丁萬萬群，擲火流八衝。妖滅精靈伏，祥景飛霄空。謹請東北方無極飛天神王，下降玄壇，威制群魔，普掃不祥，急急如律令。

#### 次至東南方

東南始丹天，梵氣羅玉虛。巽戶開地輪，萬陰流歸墟。玉帝勅神王，控節朱

龍車。召制素梟兵，揚鉞肅前驅。流金禦大魔，姦爽羅群誅。大千俱清淨，三元拱赤書。謹請東南無極飛天神王，下降玄壇，威制群魔，普掃不祥，急急如律令。

#### 次至西南方

西南始素境，人門映玉洲。東井浴瓊輝，月庭流光幽。神王御華城，太霄明霞浮。仗旛巡八遐，魔精兇威收。鳴金討妖逆，種族無遺留。豁落九天振，玉簡旌勳優。謹請西南無極飛天神王，下降玄壇，威制群魔，普掃不祥，急急如律令。

#### 次至西北方

西北始玄域，閭闔凌天關。下接崑崙丘，五城弱水環。俯觀六合遙，紅埃散黃寰。龍駟御神王，綠鉞來朱旛。周遊張天羅，擒戮兇妖奸。風火无逃形，乾坤萬氣煩。謹請西北無極飛天神王，下降玄壇，威制群魔，普掃不祥，急急如律令。

#### 次至上方

上方虛無界，宮闈結雲霞。清微崇天

中，通明映鬱羅。神虎曜九元，羽林鳴金牙。太一領藩衛，促徵神王車。摧魔飛流鈴，秉節戮奸邪。縱觀浩氣澄，五億流香華。謹請上方無極飛天神王，下降玄壇，威制群魔，普掃不祥，急急如律令。

次至下方

下方壘澤鄉，金剛轉天經。坤輿駕乾象，銀潢派滄瀛。夔龍翼神王，火鈴飛炎精。征伐萬鬼淵，勅攝威南兵。摧落兇邪源，掃蕩千魔城。仙君稽首禮，國土世安寧。謹請下方無極飛天神王，下降玄壇，威制群魔，普掃不祥，急急如律令。

次旋行入天門

十方至真飛天神王，長生度世無量大神，並乘飛雲，丹輿綠輦，羽蓋瓊輪，驂駕朱鳳五色玄龍，建九色之節，十絕靈旛，前嘯九鳳齊唱，後吹八鸞同鳴，獅子白鶴，嘯歌嚙嚙，五老啓途，群仙翼轅，億乘萬騎，浮空而來，傾光回駕，監真度生，急急如律令。

次自內壇出外壇，旋行

九天有命，上告玉清。促召千真，俱會帝庭。太一下觀，雙皇翼形。監察禦邪，理氣攝生。清帝之道，部整天兵。若有不祥，干試神明。七神秉鉞，天鋒右征。揮劍前驅，煥擲火鈴。左命甲騶，右領天丁。風火齊戰，伐邪絞精。上威六天，下攝魔靈。既威既攝，萬凶滅形。神威電掃，奸妖無生。仙皇建節，有命敢停。拒節違命，是誅是刑。各警各慎，保茲黃寧。九天有命，萬神敬聽。急急如律令。

次旋行至東方

元精混沌，青氣散分。神童十二，保鎮肝魂。二十四五，變化雲營。九竈九社，老木不淳。神虎吐毒，劍敕火焚。禍滅青煙，光景妖氛。識不馳妄，安保帝君。謹請東方青帝、青童君，從官兵馬九十萬衆，乘歲星真氣，浮空而來，鎮定東方，收滅木妖、木精、木厭，自東北界至東南界，入地萬丈，毋動毋作，急急如律令。

次至南方

赤明開圖，炎帝扇颯。三童一姪，煥散

浮飄。司明得失，萬帝宗朝。朱鳳吐火，金石化消。流鈴飛電，翦馘毒妖。束縛九醜，灰覆火燒。肅清皇祚，道德逍遙。謹請南方赤帝、赤童君，從官兵馬三十萬衆，乘熒惑真氣，浮空而來，鎮定南方，收滅火妖、火穢、火精、火厭，自東南界至西南界，入地萬丈，毋動毋作，急急如律令。

次至西方

金精一啓，太白七分。帝君靈符，流鍊素雲。召龍舞水，殺滅赫烟。長牙巨獸，討捕兇群。元皇正氣，來固我身。延年度世，飛神昇真。魂靈安鎮，我得自然。謹請西方白帝、白童君，從官兵馬七十萬衆，乘太白真氣，浮空而來，鎮定西方，收滅金妖、金穢、金精、金厭，自西南界至西北界，入地萬丈，毋動毋作，急急如律令。

次至北方

元光豁落，五氣流行。雙闕上帝，萬神化生。安鎮守智，噉食爽精。蒼龍吐電，摧破橫兵。晶明振劍，飛奔火星。三天力士，伏滅萬精。保安家國，道紀

昇平。謹請北方黑帝、黑童君，從官兵馬五十萬衆，乘辰星真氣，浮空而來，鎮定北方，收滅水妖、水穢、水精、水厭，自西北界至東北界，入地萬丈，毋動毋作，急急如律令。

### 次至中央

混沌元一，黃象紛馳。威覆黃老，變化嬰兒。養育九炁，胎生兩儀。日月上奔，星辰下垂。風火爭擊，刀劍亂施。六天九醜，膽破心離。太上符命，何敢不隨。有生安樂，入道無爲。謹請中央黃帝、黃童君，從官兵馬一十萬衆，乘鎮星真氣，浮空而來，鎮定中央，收滅土妖、土穢、土精、土厭，入地萬丈，毋動毋作，急急如律令。

### 次旋行

景中真王，威振九天。手捧三素，足踏九玄。金虎居西，飛龍繞乾。黃神秉鉞，綠齒揚鞭。璣衡五斗，平調七元。三天力士，殺鬼萬千。靈場清淨，斥絕魔烟。社稷里域，土地靈仙。門丞戶尉，司命職聯。恢揚皇化，翊扶威權。肅守隅界，玄澤昭宣。伏尸故氣，清蕩

無蠲。左提神鋒，右汲淵泉。八方飛洒，萬精號奔。齋功允備，懋績賓天。急急如律令。

### 次歸位，置劍水案上

### 秉簡長跪，啓謝

臣某謹重誠上啓，伏以制天御地，承帝化以權衡。攝陰迎陽，廓神功而橐籥。況靈虛昭禁壇之令，而玄元嚴破穢之文。威耀幅圓，既副葵傾之愜。恩歸穹昊，敢忘草結之忱。臣向來奉爲某人崇建某齋，請命彤庭，召神玄局。龍章飛煥，清浩氣於邇遐。鳳檢昭宣，攝妖氛於高厚。曲蒙善應，恪副真祈。凝道氣於芝壇，一塵不立。融神光於楓禁，萬景俱融。不勝雀躍之私，幸格鳳儀之瑞。更願河清海晏，丘靜林澄，天無彗孛之灾，開明三景。地乏疵癘之炁，涵育百昌。飛潛均樂於靈淵，動植俱陶於聖澤。臣下情不勝激切，酬恩之至，謹稽首再拜以聞。

### 小禁壇儀

### 立班地戶，上香，三拜，長跪

具位臣某，誠惶誠恐，稽首頓首，再拜上

言。臣聞五太未分，祖氣凝精於混沌。三才既判，神功胤粹於鴻濛。剛風激而陰滓結形，洪波鼓而劫灰兆質。天圓外運，地厚中浮，是爲五濁之神鄉，莫契九清之聖境。以今奉爲某人某事，修建道場。瑤壇四闕，降華京翠玉之尊。琅座三成，象浮黎玄珠之貴。將催班於龍尾，爰肆覲於螭頭。深慮華穢八飛，葩塵萬變。故氣昭騰於九地，道氣潛干。魔氛丕隔於六天，靈氛密混。莫格鸞和而應感，曷徵龍渥以昭宣。欲望帝澤旁敷，天恩下映。敕五龍神吏，降東井之甘泉。宣九鳳靈官，布南陵之陽液。八方洒蕩，五路揮澄。令臣會道運元，招真攝景。躡紀飛綱而旋步，右秉神鋒。乘經運緯以周行，左提靈缶。辟斥萬邪於寥廓，澄清百厭於虛無。風靜雲藏，四氣朗始青之妙。日旋月運，三華拱太赤之玄。耀騶甲於威神，格龍釐於元聖。蒙如丹禱，允拜洪恩。臣無任誠惶誠恐，稽首頓首再拜，恭俟天恩，潛垂報應。

起立，焚四靈侍衛符

十方肅清符

謹召東方青龍甲寅孟章將軍，乘攝提震碧之氣，來駐吾左。

謹召西方白虎甲申監兵將軍，乘參旗兌赤之氣，來侍吾右。

謹召南方朱雀甲午凌光將軍，乘太微離紫之氣，來導吾前。

謹召北方玄武甲子執明將軍，乘華蓋坎白之氣，來從吾後。

吾召四靈，四靈既集即當遊，戴日挾月行九州，三十六將為吾使，天地水官同其休。

次丁罡三步進前，左手捧水盂

是水也，受胎炎離，稟陽明之正氣。乘旺玄坎，凝太陰之真精。湛金池而影浸秋雲，澄銀漢而光涵霄露，派分河漢，流極滄溟，能清萬劫之姦塵，可滌十方之翳壻。

右捧劍

是劍也，受胎震青，膺少陽之正氣。乘旺兌白，凝粹陰之真精。鍊炎爐而光射斗牛，出瑤匣而影搖山嶽，功揮蛟室，瑞啓龍津，能摧三極之妖魔，可肅

八圍之姦魅。

次劍水相向

法水清泠蕩穢塵，神劍精熒驅魔氛。玄壇禹步周羅巡，左揮右洒列群真。

三九得七謁闈晨，乘乾履巽摧艷君。疾召威神敷玉文，隨吾周行躡飛雲，廓清覆載肅八門。謹召靈寶攝魔屏穢靈官，疾赴玄壇，宣通役使，所有元始符命，謹當宣告。

次告檢攝妖氛符牒

次焚召八方威神符

次執劍水，旋行至壇外東方

東方威神，蕩穢江昌。綠衣仗劍，清肅壇場。百邪摧落，木厭飛揚。斷除故氣，流惠無疆。急急如律令。

次至南方

南方威神，掃穢王唐。紫衣仗劍，鎮守離疆。辟斥火厭，清淨靈場。遊精遠伏，敢干天常。急急如律令。

次至西方

西方威神，風散陳常。赤衣仗劍，檢制玄黃。妖姦絕滅，金厭潛藏。敢有不順，收入魁罡。急急如律令。

次至北方

北方威神，赫奕鍾房。白衣仗劍，丁甲衛旁。魔氛水厭，帝命摧傷。遠去萬里，廓清神鄉。急急如律令。

次至東北方

東北威神，浩極章龍。白衣仗劍，掃滅邪宗。天威所指，百厭無蹤。六合澄泰，不贊神功。急急如律令。

次至東南方

東南威神，烈焰袁涼。碧衣仗劍，揮滅魔殃。土精厭魅，攝送魁罡。靈壇肅淨，洞煥天光。急急如律令。

次至西南方

西南威神，解穢錢良。黑衣仗劍，驅戮妖殄。五土滅厭，永斷不祥。天地清寧，萬梵開張。急急如律令。

次至西北方

西北威神，肅靜方洋。白衣仗劍，手控天章。伏尸厭蠱，遠避壇場。不得停留，天憲摧傷。急急如律令。

次旋行

洞中玄虛，晃朗太無。八方威神，使我自然。靈寶符命，尊告九天。乾羅蒼

那，洞罡太玄。斬妖縛邪，殺鬼萬千。中山神呪，元始玉文。持誦一遍，欲鬼延年。按行五嶽，八海知聞。魔王束首，侍衛我軒。凶穢消蕩，道炁長存。

次焚召五帝大魔符，入壇中至東方

鬱藹蒼精，洞景開明。始陽九炁，華停育魂。流英妙府，靈真上神。瓊碧雲冠，飛光羽裙。青腰玉女，太上真人。保度仙籙，消魔却氛。急急如青天魔王制邪律令。

次至南方

昌陽真老，赤靈尊神。統制丹天，檢制魔群。嚴駕朱鳳，三角之麟。上道太清，玄元之根。炎燹三炁，盤回絳雲。育養丹府，保制長存。急急如赤天魔王制邪律令。

次至西方

七靈浩氣，三素元真。中有黃老，制攝魔精。庚辛七將，七十萬兵。羽旗龍節，金虎雲奔。斷除妖妄，練育華英。與道長存，歷劫無傾。急急如白天魔王制邪律令。

次至北方

北陰鬱單，玄炁之宮。帝真靈會，驅神駕龍。室有玉女，夜光之童。掌握圖籙，攝制魔蹤。虛危合化，紫烟激風。寶晶練育，後天無終。急急如黑天魔王制邪律令。

次至中央

元皇上靈，沖妙之尊。混合真樸，造化元根。感激幽微，挺生大神。攝召萬炁，齊會華房。清蕩百魔，與道俱昌。保度却災，滅試除殃。急急如黃天魔王制邪律令。

次旋行

五帝大魔，萬神之宗。飛行鼓從，總領鬼兵。麾幢鼓節，遊觀太空。自號赫奕，諸天齊功。上天度人，嚴攝北酆。神公受命，普掃不祥。八威吐毒，猛馬四張。天丁前驅，大帥仗幡。擲火萬里，流鈴八衝。敢有干試，拒遏上真。金鉞前戮，巨天後刑。屠割鬼爽，風火無停。千千截首，萬萬剪形。魔無干犯，鬼無妖精。三官北酆，明檢鬼營。不得容隱，金馬驛程。普告無窮，萬神

咸聽。三界五帝，列言上清。急急如律令。

次焚召五帝兵馬符旋行至東方元精混沌，青炁散分。神童十二，保鎮肝魂。二七四五，變化雲營。九竈九社，老木不淳。神虎吐毒，劍勅火焚。禍滅青烟，光景妖氛。識不妄馳，安保定君。謹請東方青帝、青童君，從官兵馬九十萬衆，乘歲星真炁，浮空而來，鎮定東方，收滅木妖、木穢、木精、木厭，自東北界至東南界，入地萬丈，毋動毋作。急急如律令。

次至南方

赤明開圖，炎帝扇颯。三童一姪，煥散浮飄。司明得失，萬帝宗朝。朱鳳吐火，金石化消。流鈴飛電，翦馘毒妖。束縛九醜，灰覆火燒。肅清皇祚，道德逍遙。謹請南方赤帝、赤童君，從官兵馬三十萬衆，乘熒惑真炁，浮空而來，鎮定南方，收滅火妖、火穢、火精、火厭，自東南界至西南界，入地萬丈，毋動毋作，急急如律令。

次至西方

金精一啓，太白七分。帝君靈符，流鍊素雲。召龍儻水，殺滅赫烟。長牙巨獸，討捕兇群。元皇正炁，來固我身。延年度世，飛神昇真。魂靈安鎮，我得自然。謹請西方白帝、白童君，從官兵馬七十萬衆，乘太白真炁，浮空而來，鎮定西方，收滅金妖、金穢、金精、金厭，自西南界至西北界，入地萬丈，毋動毋作。急急如律令。

次至北方

元光豁落，五炁流行。雙闕上帝，萬神化生。安鎮守智，瞰食爽精。蒼龍吐電，摧破邪兵。晶明振劍，飛奔火星。三天力士，伏滅萬精。保安家國，道紀昇平。謹請北方黑帝、黑童君，從官兵馬五十萬衆，乘辰星真炁，浮空而來，鎮定北方，收滅水妖、水穢、水精、水厭，自西北界至東北界，入地萬丈，毋動毋作。急急如律令。

次至中央

混沌元一，黃象紛馳。威覆黃老，變化嬰兒。養育九炁，胎生兩儀。日月上奔，星辰下垂。風火爭擊，刀劍亂施。

六天九醜，膽破心離。太上符命，何敢不隨。有生安樂，入道無爲。謹請中央黃帝、黃童君，從官兵馬一十萬衆，乘鎮星真炁，浮空而來，鎮定中央，收滅土妖、土穢、土精、土厭，入地萬丈，毋動毋作。急急如律令。

次旋行

九天有命，上告玉清。促召千真，俱會帝庭。太一下觀，雙皇翼形。監察禦邪，理氣攝生。清帝之道，部整天兵。若有不祥，干試神明。七神秉鉞，天鋒右征。揮劍前驅，煥擲火鈴。左命甲騶，右領天丁。風火齊戰，伐邪絞精。上威六天，下攝魔靈。既威既攝，萬凶滅形。神威電掃，奸妖無生。仙皇建節，有命敢停。拒節違命，是誅是刑。各警各慎，保茲黃寧。九天有命，萬神敬聽。急急如律令。

次執劍水歸位，上香，長跪

臣謹重誠上啓，伏以道以清淨爲宗，故天寶煥檢營之令。教以慈悲爲主，故玉清昭禁壇之文，俾先事而耀玄科，毋後時而干青律。依依炁應，切切神交。

重殫一縷之忱，荐扣千鈞之聽。臣向來奉爲某事，仰徵龍御，壇場慮隔於魔氛。旁致虬輪，方隅恐浮於埃壒。仰依聖力，遍召威神。金簡昭宣，和炁遍八遐之遠。玉符飛煥，祥光融九軌之遙。土無異色以開祥，地絕妖塵而薦瑞。顧臣愚昧，冒代天工，深荷帝慈，曲符民欲。兩寶華於碧落，清蹕傳音。鳴瓊籟於玄虛，黃麾耀景。臣下情不勝激切，酬恩之至，謹稽首再拜以聞。

三拜，起身退

靈寶領教濟度金書卷之二十二

靈寶領教濟度金書卷之二

十三

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

豎遷神旛儀

步虛 洒淨 上香

具位臣某，恭蕪寶香，遙瞻供養太上無極大道玉清聖境元始天尊，上清真境靈寶天尊，太清仙境道德天尊，東極青玄老君，太乙救苦天尊，三界應感一切真靈。恭望洪慈，俯垂鑒映。伏以秉陽秉陰，一氣鼓太元之治。晝晝晝夜，群靈乘妙有之輪。輝紫極以裁成，耀赤書而保制。惟玄惟元惟始，同流凝覺海之津。曰精曰氣曰神，獨照混靈源之徑。自塵葩之風靡，致性藥之日漓。道德密而地網疏，罔知葆御。嗜慾深而天機淺，遂致顛躋。抱九死以

莫回，閱千生而無已。是以玉京元聖，金闕真尊，敷法雨以涵濡，布慈雲而覆育。香園駐景，旌東極救護之仁。黎土傾光，飛北都升遷之令。建明真之寶典，植遷神之華旛。左提右携，超金剛而辭有漏。前導後從，升玉虛而入無形。妙哉亭毒之功，至矣慈悲之化。今齋主某痛矜苦爽，深軫遊魂。齋按三天，肅玄壇而籲帝。恩沾九地，開瓊圃以提魂。爰依藥笈之琳琅，式建芝旛之縹緲。影搖碧落，朱竿高聳以騰蛟。光湛澄虛，絳練斜飛而舞鳳。映虹霓而天矯，擷烏兔以翩翻。太乙流華，彷彿凌霄之慧徑。大千耀彩，依稀騰景之飛梁。仰接金門，俯通鐵壘，貫玄黃而咸睹，廓幽顯以均瞻。回太微，命無英，九霄肆覲。通冥漠，飛明梵，三寶班朝。殫激切以前陳，罄皈依而稽告。法衆運誠，皈依奏請。

太乙救苦天尊

伏以碧霧玲瓏，耀騫林之七寶。蒼精混沌，挹蓮座之九華。慶雲流彩於赤圓，祥烟凝芒於玄曜。青童校錄，玉龍

飛度死之輪。丹聖檢符，金虎翼回生之令。遷神東極，度命朔單。超四景以逍遙，後三光而遊宴。法衆運誠，恭吟寶偈。

靈旛高掛漾朝陽，上接青華百寶光。絳彩凌颿翔碧漢，朱竿耀景挹丹皇。九幽啓旦慈光燭，三極乘晨聖澤昌。齊拱妙嚴升閣道，超凌劫石邁天長。

和：不可思議功德。

伏以炎光洞煥，耀流火之神庭。丹梵彌羅，鬱黃華之寶井。九鳳飛金於南上，五龍鳴玉於中池。紫蓋浮空，二氣煥靈洲之秀。瓊臺流景，萬真嚴寶御之華。鍊質丹靈，遷神朱火，翔九霄之妙景，消萬劫之聲塵。法衆運誠，再吟寶偈。

靈旛搖曳晚風微，高挹朱丹火玉墀。百尺鷹揚雲影動，千尋螭舞露光垂。騫林倩燦澄霄路，粟澤彷徨脫夜扉。觀此真光俱會悟，形神飛鍊自然池。

和：不可思議功德。

伏以雲層峨峨，仰鬱羅之流日。霞光奕奕，挹劫仞之靈風。翠條振響於瓊

林，朱實流光於瑤界。紫金凝妙，琅音揚八素之吟。碧玉流輝，寶座拱三華之唱。遷神無色，悟性真空。膺瑤策以更生，刊璇圖而起死。法衆運誠，再吟寶偈。

靈旛縹緲駕晴空，雲映虛無梵氣中。  
慧日籠晨翔碧鳳，神風披曉舞玄龍。  
影搖黑鬱華芒燦，光映清微玉彩瓏。  
遊爽期歸均快樂，似瞻華表返靈蹤。

和：不可思議功德。

伏以風旛匪動，動繇兼愛之慈心。水鴈非留，留表互融之妙體。一刹纔標於黃混，萬魂俱證於清虛。影響神交，鼓桴氣應。韻揚玉篋，步虛流空洞之音。香藹珠篝，梵唱協飛玄之妙。霏烟紛郁，寶霧回旋，融幽顯以均歡，合天人而稱慶。靈旛有呪，謹當宣揚。天尊開度，三界十方，四生六道，咸到道場。生神遷魄，萬劫不忘，旛之爲體，隨風飛揚。風之所被，各從其方，泉曲之府，寒夜之鄉。地獄餓鬼，旁及無鞅，皆得解脫，上升天堂。向來豎旛，功德並已周圓。伏願道氣

旁周，神光洞照。玉隆聽法，如細雨密霧而來。青梵登真，駕飛雲游烟而去。絕苦聲於地獄，享樂事於天堂。即俾亡故某，保固生根，斷除死蒂。一真了悟，頓超有漏之關。萬業消磨，疾詣無爲之岸。恩沾八表，仁被十華。爲如上緣，請聖明證。志心稱念：

三清無上天尊，十方靈寶天尊，  
九幽拔罪天尊，太乙救苦天尊。

和：不可思議功德。

豎回耀旛儀

步虛 洒淨 上香

具位臣某，恭焚寶香，遙瞻供養太上無極大道玉清聖境元始天尊，上清真境靈寶天尊，太清仙境道德天尊，東極青玄老君，太乙救苦天尊，三界應感一切真靈。恭望洪慈，俯垂鑒映。臣聞三洞流光，道散玄黃而御世。九清垂象，教敷紫赤以開圖。範圍化化之機，橐籥生生之鍵。陽靈朗耀，輝八極之禎祥。陽景飛華，廓九幽之膏澤。游宴福鄉之旦，周旋壽域之春。皆天心不冒於喬雲，故地性涵濡於甘露。緬懷苦魄，

愈極酸神。壇列輝光，象寥陽而璀璨。旛崇回耀，開鬱絕以玲瓏。中嚴宸極之隱名，旁列儀璘之顯象。委氣合氣，迎聖彩於十華。以神召神，攝靈光於二景。庸茲煥爛，破彼溟濛。亶回夜壑之幽，肆啓晨庭之燦。今齋主某伏爲入意，崇建某齋。一念激切，五體勤渠。期臣破暗之功，俾契回光之妙。爰披寶笈，肅建靈旛。雲錦囊開，宣日星之丹範。烟綃竿聳，迎雨露之玄釐。鳳簫騰垂蔭之華，龍篋協空歌之韻。諸天懽悅，列壘欣愉，法衆運誠，讚揚功德。天尊鬱勃玉毫光，下洞幽泉煥八方。左躡炎輝迎赤御，右提素曜覲西皇。風羅功製飛龍躍，霧縠功裁舞鳳翔。接引靈華開暗域，遊精啓道步天堂。

和：不可思議功德。

伏以寶梵遙宣，靈旛高舉。晚風曳玉影，浮五億之天。曉日籠金光，湛三千之界。緋烟罩而回旋旁舞，碧雲零而搖曳低垂。旛迎光以飛流，光隨旛而映照。黃華素曜，開火池毒霧之昏。太霞炎光，廓冰浦迷雲之暗。復靈明



之正性，回清靜之初心。有感斯通，無幽不格。法衆皈依，恭吟善頌。

面東方

靈旛耀太真，回風映青華。扶桑駕陽燧，煥爛流朱霞。下携無極爽，逍遙玉寶家。神光洞萬微，齊齡大地多。和：與道合真。

面南方

靈旛耀太空，飄飄舞朱英。鳴玉扣陽韻，炎光燭幽靈。生神翔碧漢，飛鍊流火庭。玄雲彌八遐，徘徊萬氣并。和：與道合真。

面西方

靈旛耀太虛，鬱藹招白元。真光啓三素，祥烟徹有玄。金剛欵搖落，振袂翔珠騫。雲生七寶臺，結嬰固丹田。和：與道合真。

面北方

靈旛耀太無，慈光浹幽都。飛龍鼓玄液，洞煥丘寒池。仰瞻瓊樓邃，飛步近鬱羅。香風扇十方，流鈴斥萬魔。和：與道合真。

面中央

靈旛耀太玄，八達蔭流精。空歌振瓊條，葳蕤舞飛鯨。金光御寒壑，回骸接漢升。永保玄元始，誰憂輪劫傾。和：與道合真。

伏以上帝垂慈，敷善心於十極。下民苦惱，淪惡性於三途。自非紫極之真光，曷拯黑風之妄暗。惟茲旛刹，實象梯梁。挹河漢之流精，見聞互映。飛虹霓之耀景，遐邇交融。熙熙下照於無垠，拂拂上華於有頂。十宮煥耀，六洞輝明，靈旛赦罪神呪，謹用宣揚。

天尊開度，三界十方，四生六道，咸到道場。生神遷魄，萬劫不忘，旛之爲體，隨風飛揚。風之所被，各從其方，泉曲之府，寒夜之鄉。地獄餓鬼，旁及無鞅，皆得解脫，上升天堂。

向來豎旛，功德並已周圓。伏願三晨朗煥，四象輝華。弗予耶尼之畿，光騰晝朗。浮提單越之域，明耀朝霞。即俾亡故某。乘功德光，滅煩惱暗。神超北闕，常遊珠黍以聞經。形鍊南宮，永憩翠騫而聽法。後天難老，與道合真。溥四生六道之繁，均超覺地。拯九壘

十宮之衆，俱悟靈天。爲如上緣，志心稱念：

三清無上天尊，十方靈寶天尊，九幽拔罪天尊，太乙救苦天尊。

和：不可思議功德。

豎告盟旛儀

步虛 洒淨 上香

具位臣某，恭焚寶香，遙瞻供養太上無極大道玉清聖境元始天尊，上清真境靈寶天尊，太清仙境道德天尊，東極青玄老君，太乙救苦天尊，三界應感一切真靈，恭望洪慈，俯垂鑒映。臣聞元始開圖，敷瓊房之妙韻。虛皇撫運，宏琅笈之玄章。流化日於八圓，振靈風於六合。上無復祖，九幽之科品昭昭。中有度人，三籙之威儀井井。上智啓回靈之教，下愚陶復性之恩，化育陰陽，裁成經緯，凡涓期而修奉，必先事以關聞。今齋主某卜取某日崇建某齋，開度某人，恭依壇律，預告齋盟。靈篆徘徊，廓十華而共睹。華旛縹緲，恢三祭以咸知。爲停黑鬱之威，俾輅清微之澤。雲鏞振響，月磬騰華。流梵唱

於清虛，光凝大混。藹鈞容於碧落，輝映真空。稽首皈依無極大道。

大聖元始天尊，大聖靈寶天尊，大聖道德天尊。

伏以天去地八萬四千，聖司綱紀。日繫月三百六十，神職權衡。雖群品之散殊，可一忱而應感。亭亭淨植，朝天竿聳於陞龍。翼翼翔飛，曳地綵翻於躍鳳。盤薄遍九垓之大，回旋周四極之遙。普見普聞，匪遐匪邇。悉佇聖恩之昭，漏期彰凡。惘於際蟠清衆，運誠皈依。讚詠：

普告三界，無極神鄉，泉曲之府，北都羅艷。三官九署，十二河源，今日吉慶，諸天臨軒。弟子告齋，請命玄元，上解祖考，億劫種親。疾除罪簿，落滅惡根，生身受度，劫劫長存。元始符命，風火驛傳，不得拘留，預釋苦魂。虛空監察，萬神咸聞，請依青律，莫不如言。伏以齋悃既敷，玄恩肆被。開明三景，似梵氣之彌羅。周回十方，若靈光之洞煥。風動旛動，而齋盟朗徹。聲應

谷應，而惠澤周流。謹召四直功曹，三界符使，玄虛受事，里域神祇，咸造玄壇，聽宣丹檄。

宣告盟符牒

天尊垂化玉京山，藥簡羅敷教雨頒。三極提封飛鳳策，百靈嘯命耀鸞關。齋期已徹寥陽邃，玄澤先希鬱絕寬。從此陽春回暖律，輪停五苦溥歡顏。

和：不可思議功德。

向來告盟功德，普已周圓。伏願圓蓋開祥，方輿薦祉。煥祥烟於死戶，死氣飛浮。流慶雲於生門，生神凝妙。夜壑罷業機之對，寒庭停冤網之羈。人鬼龍仙，悟有有無無之妙。飛潛動植，離生生化化之玄。溥及含靈，均登道岸。爲上因緣，志心稱念：

三清無上天尊，十方靈寶天尊，九幽拔罪天尊，太乙救苦天尊。

和：不可思議功德。

又豎命靈旛儀

步虛 洒淨 上香

具位臣某，焚香奏啓太上無極大道，無上至真道寶，無上至真經寶，無上至真

師寶，三界應感，一切真靈。臣聞金書御運，清微開七部之光。玉宇浮空，赤明煥十方之界。慈雲覆蔭，法雨涵濡。况三籙井井於威儀，而九幽昭昭於科品。將伸修奉，盍預奏聞。今齋主某已於某處修建某齋，開度某人靈魂，臣職在關，瞻理難拒。抑佇恢張於藥笈，先建立於華旛。證誓結盟，上徹三天之寥廓。停感息苦，下通九地之幽深。期肅迓於宸恩，庸溪承於齋福。朱竿高聳，素練低垂，法衆運誠，讚揚功德。

靈旛赦罪天尊

今日大慶，三界臨軒，小兆弟子，敢奏微言。修齋行道，七祖昇遷，植旛預告，上聞諸天。元始玉敕，希降重泉，三途九夜，萬罪咸原。剋時定令，齋期吉蠲，來朝壇陞，受鍊飛仙。十方一切，快樂無邊。和：與道合真。

伏以縹緲祥龍，舞千尋於碧落。翩翩舞鳳，搖百尺於玄虛。三極均瞻，群方快睹。靈風披拂，烟綃揚寶耀之光。梵氣彌羅，霧縠映彩霓之象。旌下民之悃懇，徹上帝之鑒觀。鶴赦希頒，預

開明於夜暗。龍符荐布，溥浩蕩於春光。伺建齋功，同超聖化。庶拯有情之類，均陶無上之緣。法衆運誠，讚揚功德。

### 靈旛赦罪天尊

普告三界，無極神鄉，泉曲之府，北都羅酆。三官九署，十二河源，今日吉慶，諸天臨軒。弟子告齋，請命玄元，上解祖考，億劫種親。疾除罪簿，落滅惡根，生身受度，劫劫長存。元始符命，風火驛傳，不得拘留，預釋苦魂。虛空監察，萬神咸聞，請依青律，莫不如言。和：與道合真。

### 宣符

伏以通齋誠於高厚，旛彩風飛。流帝渥於幽冥，壇光日皎，將按金科而戴事，先遵玉律以告盟。覬竭精誠，密符應感。檄十方而敬聽，關三界以知聞。魔試不干，佇看善功之廣大。蕃禧溥被，頓令齋悃之周圓。昭回骸起死之仁，慶度命更生之樂。蒙如丹禱，允荷洪恩。法衆運誠，稱揚功德。

### 靈旛赦罪天尊

元始開化，普植神靈，玉文敷落，長夜開明。今日普告，萬神咸聽，消愆五戶，赦罪九冥。敕制地祇，侍衛送迎，永離鬼官，上昇福庭。皆得受度，鍊化更生。和：與道合真。

向來豎旛告盟，功德周圓。伏願眇眇大羅，俯鑒丹誠之激切。塵塵刹土，仰瞻洪貺之羅敷。幽關無執對之聲，冥路有超凌之徑。普天同慶，極地相歡。爲如上緣，志心稱念。

三清無上天尊，十方靈寶天尊，

九幽拔罪天尊，太乙救苦天尊。

和：不可思議功德。

靈寶領教濟度金書卷二十三

## 靈寶領教濟度金書卷之二十四

洞微高士開光救苦真人甯全真授  
靈寶通玄弘教水南先生林靈真編

### 科儀立成品

開度通用

### 堅命靈旛儀

步虛 洒淨 上香

具位臣某，恭爇寶香，遙瞻供養太上無極大道玉清聖境元始天尊，上清真境靈寶天尊，太清仙境道德天尊，東極青玄老君，太乙救苦天尊，三界應感一切真靈。恭望洪慈，俯垂鑒映。伏以天高地厚，化機轉二氣之輪。陽昇陰沈，苦報鼓三官之筆。誰拯寒池之溺，俾回暖律之吹。大德生生，至仁蕩蕩。清微演教，宏三洞以回骸。赤明開圖，敷九幽而度品。昭哉玉範，至矣金章，惟攝召長夜之科，辭尊受度。而旌表重泉之信，旛列命靈。爲彼岸之慈航，

實窮途之慧燭。津梁駕景，柱石凌空。今有齋主某崇建某齋，開度某人。爰念慾海愛河，易失性天之精粹。罪山業壁，夙遮心地之冲和。營營荆棘以滋繁，逐逐桑榆而莫返。驚心烏織，轉眼駒馳。三塗極流浪之悲，五苦轉輪回之感。非繇極援，曷俾超騰，庸法象於天工，盍皈依於帝化。朱竿裊裊，垂虹隱映於霄衢。丹練飄飄，舞鳳騰凌於天宇。普十華而咸睹，巨九壘以俱瞻。消多生有碍之愆，洗累劫無名之垢。霏烟鬱秀，香霧凝華。隨梵響以琳琅，舞天花而散漫。憑茲妙利，用濟無邊。道衆運誠，稱揚功德。

大聖元始天尊，大聖靈寶天尊，

大聖道德天尊。

豎旛

伏以善生善死，仰金籙之昭昭。潛地潛天，建華旛之奕奕。上帝垂恩於九夜，下愚蒙惠於一朝。碧落初揚，目睹而冰消禹業。玄虛高映，心馳而風散千愆。絕憲章以前陳，部形魂而直上。八紘澤潤，六趣清夷。法衆運誠，恭吟

寶偈。

寶旛搖曳太虛中，雲影光浮漾彩虹。上拂三天承湛露，下通九地扇慈風。幽途不夜根塵淨，冥境長春業障空。共慶超凌今有路，十方快睹謝玄功。伏以紫陽啓運，敷種種度人之儀。黑壘昇神，示燁燁靈旛之式。燦華芒而耀日，飛綃影以迎風。遙接虎關，曲感宸恩之浩蕩。掃開犴室，疾除罪簿之周遭。十華拭目於法橋，六合歸心於道岸。迥超有漏，永證無爲。法衆運誠，恭吟寶偈。

靈旛縹緲跨祥雲，飛舞低垂遍刹塵。梵唱玲瓏金磬雅，霏烟紛藹玉鑪新。一竿高掛傳天詔，萬象咸瞻脫地輪。從此宿愆俱解散，慈悲接引出迷津。

伏以登真度命，九陰希睿澤之垂。昭天漏泉，三洞耀華旛之建。爲仙飛之標準，作冲舉之梯階。一刹彰施，聳鳳舞鸞翔之影。群方利樂，復龍吟虎嘯之根。離五苦以證神，檄萬神而稟命。聿嚴侍衛，不得拘留。清衆運誠，恭吟寶偈。

靈旛鼓舞徹三清，光照幽關夜不扃。曉日曈曨翻玉篆，天風披拂振金聲。慈航已駕皇恩重，苦海先登滯魄昇。今日提携皆極樂，逍遙劫石邁年齡。伏以拊寒庭而同一視，仁浹九圍。揚寶範以拯群迷，教遵三洞。孰指登天之徑，欣逢曳地之旛。感此徬徨，似認千年之華表。從茲解悟，頓消億劫之簡書。即穩步於青霄，式遊神於碧漢。靈旛赦罪神呪，謹用宣揚。

天尊開度，三界十方，四生六道，咸到道場。生神遷魄，萬劫不忘，旛之爲體，隨風飛揚。風之所被，各從其方，泉曲之府，寒夜之鄉。地獄餓鬼，旁及無鞅，皆得解脫，上昇天堂。

向來建立命靈寶旛，功德周圓。伏願三世法身，十方應號。拯六趣脫煩惱之網，慧日照融。揭群靈入希夷之門，慈雲覆蔭。地水化逍遙之境，人天登快樂之鄉。動植含生，飛潛遂性。咸悟虛無之景，頓超妙有之機。爲如上緣，志心稱念三清無上天尊，十方靈寶天尊，九幽拔罪天尊，太乙救苦天尊。

和：不可思議功德。

### 豎超度旛儀

步虛 洒淨 上香

具位臣某，恭焚寶香，遙瞻供養太上無極大道玉清聖境元始天尊，上清真境靈寶天尊，太清仙境道德天尊，東極青玄老君，太乙救苦天尊，三界應感一切真靈。伏以玉宇開圖，總制虛無之氣。金真演教，羅敷妙有之機。流慧日於八圓，扇慈風於十極。瓊科赫赫，寶範昭昭。回黃命靈，名著九章之典。遷神拔罪，號崇五苦之經。提幽途妙建於法橋，拯寒庭大開於慧徑。慈悲接引，方便提携。今有齋主某，深慮身涉紅塵，神遊黑壤。業機自識，驚心道岸之未登。憲網高張，回首昏衢之夙駕。三生莫釋，九死誰憐。非上昭於天光，曷下明於地暗。庸按飛騰之妙籙，恭揚超度之靈旛。萬日均瞻，三靈共仰。朱竿直上，流虹隱映於雲端。綵練斜飛，霏霧翱翔於雲際。祥風鼓動，梵氣周回。罪花隨夕以飄揚，善藥乘晨而開發。以茲旌表，用拯沈迷。法衆運

誠，讚揚功德，

### 靈旛赦罪天尊。

豎旛

伏以夜景茫茫，罪性墮三途之苦。朝陽燦燦，晨輝開五道之春。惟冀華旛，寶提幽爽。隨風斜指，翔龍飛躍於玄虛。映日低籠，舞鳳盤旋於碧落。目睹而千冤解悟，心注而萬罪清高。蓮座依光，形神肆覲。騫林駐景，步武高濟。懸登碧簡之名，永著青華之籙。玄科有頌，謹用讚揚。

華旛舞東青，流景飛雲芒，靈風揚玉籙，縹緲躡雲綱。俯垂九幽爽，凌霄禮虛皇，琅章詠空洞，歡樂殊未央。和：與道合真。

伏以三洞光明，浩浩建迷途之燭。九幽冥漠，沈沈翻苦海之濤。惟茲華旛，實開暗域。影搖百尺，虹霓閃爍以凌空。光舞千尋，河漢回旋而徹地。一刹高張於梯級，萬愆冀削於簡書。珠火陶魂，精神玉瑩。丹陵鍊質，表裏冰清。超三界之危機，脫五行之大數。玄科有頌，謹用讚揚。

華旛舞南丹，飄飄激十方，帝一回龍駕，嘯命攝此艷。七祖胞胎散，飛步躍天綱，玉童生萬神，逍遙萬億長。和：與道合真。

伏以九壘皈心，遙認碧虛之寶刹。百神受令，共揚紫極之恩綸。惟茲華旛，實超滯識。輕綃搖曳，神風揚八角之芒。溥穀飛浮，麗日映九光之景。隱隱登真之徑路，巍巍駕景之津梁。瑤圃翱翔，愆尤霧廓。崑臺游宴，結節雲消，即穩步於天關，永昇神於地域。玄科有頌，謹用讚揚。

華旛舞西崑，八達朗回旋，香林散神景，幽夜滅魔烟。靈光開五道，神虎徵九玄，宴樂明霞館，瓊律鍊自然。和：與道合真。

伏以內禁一堂，種種是開幽之典。泉臺六洞，依依徹度命之恩。惟茲華旛，實開冥路。一竿獨露，亭亭風舞於飛梁。萬象咸窺，赫赫霞衝於仙珮。散天花而煒燁，飄梵唱以琳琅。冰浦停威，蠲消障累。艷山稟命，部衛形魂。永辭報對之緣，早證虛無之妙。玄科

有頌，謹用讚揚。

華旛舞北玄，鬱鬱耀玉輝，開明長夜府，九祖振仙儀。惡根一時釋，沐浴映蘭池，遨遊來霄景，長齡天地齊。和：與道合真。

伏以上帝好生，玉笈耀度生之式。下民趨死，金科宏濟死之章。惟茲華旛，實迎爽魄。曉風低拂，飄飄鸞鶴之飛翔。晝日輕籠，落落蛟蛇之鼓舞。接群靈而冲舉，引十極以超凌。正色蒼蒼，駕玄騰景。大羅眇眇，飛空步虛。昇神日月以無終，駕景雲霄而有路。玄科有頌，謹用讚揚。

華旛舞碧霄，朗朗響靈風，琳琅流梵唱，真人乘六龍。招提艷庭河，永離八難中，朝登長樂館，夕憩太微宮。和：與道合真。

伏以祖氣彌羅於大混，化育無私。華旛直立於虛無，提携有賴。允表昇天之徑，普資出地之靈。六道四生見者，消愆滅罪。十宮九署睹者，離苦登真。免生死輪轉之機，脫水火陰陽之考。徬徨來赴，快樂飛昇，靈旛赦罪神呪，

謹用宣揚。

天尊開度，三界十方，四生六道，咸到道場。生神遷魄，萬劫不忘，旛之為體，隨風飛揚。風之所被，各從其方，泉曲之府，寒夜之鄉。地獄餓鬼，旁及無鞅，皆得解脫，上昇天堂。

向來豎旛超度，功德周圓。伏願萬範開張，群方利樂。開生門而塞死戶，道氣旁周。超北府而上南宮，靈光曲被。上窮圓蓋，下極方輿。鱗介羽毛，悉皈依於化日。飛潛動植，均覆育於仁風。為上因緣，志心稱念

三清無上天尊，十方靈寶天尊，九幽拔罪天尊，太乙救苦天尊。

和：不可思議功德。

靈寶領教濟度金書卷之二十四

### 靈寶領教濟度金書卷之二

#### 十五

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度通用

#### 九卮燈儀

步虛 洒淨

具位臣某，謹焚香遙瞻供養太上無極大道三清上聖，十極高真，九天生神鬱單無量天帝，九天生神上上禪善无量壽天帝，九天生神梵監須延天帝，九天生神寂然兜術天帝，九天生神波羅尼密不驕樂天帝，九天生神洞元化應聲天帝，九天生神靈化梵輔天帝，九天生神高虛清明天帝，九天生神無想無結無愛天帝，九天諸司真君，玄虛應感一切威靈。恭望洪慈，俯垂省錄。伏以道冠虛無，三寶徹天根之妙。氣恢空洞，九霄敷聖榦之玄。拱鬱羅而統御乾

樞，包朔單而彌綸坤壘。琅琅隱韻，凝萬神於生門。混混內音，提群靈於死戶。金簡耀黃垓之旦，玉符開黑絕之春。梵氣扶搖，運九陽之溟滓。靈光煥爛，華八景以鴻濛。翕張經緯之機，闔闢顯幽之會。元功不宰，聖化難名。今有齋主某崇建某齋，開度亡故某人。切慮陰翳久淪，陽靈易昧。稟蒼赤青綠黃白紫碧黑之生氣，天谷紛飛。凝胞胎魂魄臟腑竅景神之命元，地輪披散。非返真而攝聚，曷宴景以超凌。是以燈列九卮，科遵三洞。寶章敷落，降陽耀於雲層。玉篆徘徊，散陰氛於風澤。俾脫溟茫之境，逕登寥廓之都。芝炬熒煌，上接玉虛之燦燦。蘭缸煒燁，下通金粟之重重。月磬虛徐，雲鏞掩靄。振步虛於八素，流梵唱於十華。稽首皈依無極大道，

九天生神天帝。

旋行至東北方

伏以太霄御極，浮黎域拱於始青。混氣凝精，長樂舍開於空碧。統旋斗歷箕之度，應儻輪召運之期。萬物始終，

賓帝關而布惠。群精隱見，闢鬼路以宣威。上鎮陬維，下司良域。今有齋主某人，謹然東北卮神燈，布帝真胞命元元一黃演之氣，宣告玉光寶符，下開鑊湯地獄。爲亡故某人，溥及幽冥冤親，平等息毒，波炎火之苦，登長樂周帀之鄉。伏願開陽流光，胞元返本。精神運氣，超九地以逍遙。枯朽發烟，攝六天而震伏。更生福慶，長稟太平，謹誦鬱單無量天生神章。

混合空洞氣，飛爽浮幽寥。延康無期劫，眇眇離本條。苦魂沈九夜，乘晨希陽翹。大有通玄戶，鬱單降晨霄。黃雲凝靈府，陰陽氣象交。胞元結長命，惡根應化消。桃康合精延，二帝秀玉飄。灌溉胞命門，精鍊神不彫。九天命靈章，生神神自超。元君遏死路，司馬誦洞謠。一唱萬真和，九遍諸天朝。稽首恭劫年，慶此榮舊苗。

旋行至東方

伏以青霄御極，端始老於華林。洞氣凝精，羅開明於翠闕。扶桑耀羲輪之旦，芳騫騰龍紀之春。箕主七辰，拱紫

微而布政。木交九氣，乘青德以施仁。上震火維，下司地域。今有齋主某人，謹然東卮神燈，布帝真胎命元洞冥紫戶之氣，宣告玉光寶符，下開風雷地獄。爲亡故某人，溥及幽冥，冤親平等，息飛戈飄戟之苦，登華林惠靖之鄉。伏願陽明流光，胎元返本。玉輪輝煥，開九府以回靈。羽蓋空浮，應八門而度品。昏衢永離，福舍更生，謹誦上上禪善無量壽天生神寶章。

無量結紫戶，氣尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒史伯元，結胎守黃房。斬根斷死戶，熙頤養嬰童。禪善導靈氣，玄哺飛天芳。華景秀玉質，精鍊自成容。務玄育生上，羅列備明堂。太虛感靈會，命我生神章。一唱動九玄，二誦天地通。混合自相和，九遍成人功。大聖慶元吉，散華禮太空。諸天並歡悅，一切稽首恭。

旋行至東南方

伏以碧霄御極，回九梵於始丹。浩氣

凝精，翊三華於大赤。在碧霞妙嚴之界，有好生度命之尊。北拱太微，儼天闕而推籥。東聯冥渤，俯地軸以張機。化赫風雷，經輝角軫。今有齋主某人，謹然東南卮神燈，布帝真魂命元長靈明仙之氣，宣告玉光寶符，下開銅柱地獄。爲亡故某人，溥及幽冥，冤親平等，息履烟攀火之苦，登福田用賢之鄉。伏願始陽流光，魂元返本。神光流演，煥八極以飛仙。祖氣彌羅，廓九幽而罷對。疑神玉館，高步瓊林，謹誦梵監須延天生神寶章。

須延總三雲，玄元始氣分。落落大梵布，華景翠玉尊。明梵飛玄景，開度長夜魂。遊爽赴期歸，氣氣返故根。太帝號陽堂，字曰八靈君。九關綠回道，胎氣生上元。陵梵度命籍，太乙輔精延。泥丸敷帝席，三部八景分。魂生攝遊氣，九轉自成仙。琅琅九天音，玉章生萬神。三遍列正位，氣參八辰門。玄關遏死戶，靈鎮津液源。應會感靈數，明道潛回輪。慶此嬰兒蛻，稽首讚洞文。

旋行至南方

伏以丹青御極，煥流火於朱陵。旻氣凝精，耀炎輝於紫闕。宛利鎮南閭之境，重明統端化之郊。龍領軒轅，秉玄圖而佐政。鶉行綱紀，乘熒惑以和恩。照耀十華，長養萬物。今有齋主某人，謹然南卮神燈，布帝真魄命元碭尸冥演由之氣，宣告玉光寶符，下開火翳地獄。爲亡故某人，溥及幽冥，冤親平等，息吞火服炭之苦，登棄賢梵天之鄉。伏願太陽開光，魄元返本。疾除罪簿，刊仙簡以書勳。落滅惡根，登神庭而受鍊。永銷陰翳，高挹陽華，謹誦寂然兜術天生神寶章。

兜術天生神寶章。寂然無色宗，兜術抗大羅。靈化四景分，萬條翠朱霞。遊魄不顧返，一逝洞群魔。神公攝遊氣，飄飄練素華。榮秀椿劫期，乘運應靈圖。空洞生神章，瓊音逸九霞。一唱萬真會，騫爽合成家。九轉景靈備，鬱鬱曜玉葩。兜術開大有，一慶享祚多。上聖回帝駕，嬰兒歎以歌。不勝良晨會，一切稽首和。

旋行至西南方

伏以景霄御極，挹始素於月庭。景氣凝和，煥流金於地戶。當歷井捫參之分，藹飛綱躡紀之名。帝號太靈，運慈悲而度命。鄉臨仁靜，回肅殺以成人。下鎮黃輿，上承玄蓋。今齋主某人，謹然西南卮神燈，布帝真臟腑命元五仙中靈之氣，宣告玉光寶符，下開屠割之獄。爲亡故某人，溥及幽冥，冤親平等，息鋸鋒利刃之苦，登耀真善救之鄉。伏願上陽流光，藏元返本。北艷烟滅，秉慧燭以升神。東井波澄，超昏衢而毓質。黑編落字，丹簡刊名，謹誦波羅尼密不驕樂天生神寶章。

翻翻五帝駕，飄飄玄上門。遊步黃華野，回靈驕樂端。採集飛空景，舊爽多不存。太微回黃旗，無英命靈旛。攝召長夜府，開度受生魂。公子輔黃寧，總錄具形神。玉章洞幽虛，五轉天地分。氣鍊元臟腑，紫戶自生仙。數周衆真會，啓陽應感繁。玉女灌五香，聖母慶萬年。三界並歡樂，稽首禮天尊。

旋行至西方

伏以玉霄御極，峙鬱察於浮羅。遯氣



凝華，挹浩靈於太素。玉闔耀飛龍之駕，金門揚神鳳之旛。令生蓐收，流少陰而育物。帝尊太妙，司西極以施仁。天御七華，地成萬寶。今有齋主某人，謹然西卮神燈，布帝真靈府命元高真冲融之氣，宣告玉光寶符，下開金剛之獄。爲亡故某人，溥及幽冥，冤親平等，息金槌鐵杖之苦，登金光利益之鄉。伏願元陽開光，靈元返本。升玉虛境，等萬劫以超凌。辭金剛山，超三途而開泰。迄無輪轉，永契真常，謹誦洞元化應聲天生神寶章。

應聲無色界，霄映冠十方。回化輪無影，冥期趣道場。靈駕不待轡，朗然生神章。空洞諒無崖，玄爽亦爲疆。練胎返本初，長乘飛玄梁。斬畜喪天真，散思候履常。斬伐胞樹滯，心遊超上京。願會既玄玄，悟我理兼忘。介福九天端，交禮地辰良。混化歸元一，高結元始王。稽首儔靈運，長謝囂塵張。

#### 旋行至西北方

伏以琅霄御極，敷象闕於始玄。融氣凝精，翼虎關於碧落。御九重高澄之

界，俯八圓蒼莽之區。奎壁雙星，拱清微而贊化。璇璣七政，布紫極以承符。下總神鄉，旁司鬼域。今有齋主某人，謹然西北卮神燈，布帝真元府命元高仙洞笈之氣，宣告玉光寶符，下開火車之獄。爲亡故某人，溥及幽冥，冤親平等，息火輪風刃之苦，登真仙妙道之鄉。伏願正陽開光，竅元返本，升不死界，快步武以登真。度受生魂，鍊形神而入妙。保天無極，與道合真，謹誦靈化梵輔天生神寶章。

玄會統無涯，混氣歸梵輔。務猷運靈化，潛推無寒暑。乘數構貞條，振袂拂輕羽。瓊房有妙韻，汎登高神所。圓輪無停映，真仙參列序。上上霄衢邈，洞元深萬巨。秀葉翳翠霞，停蔭清泠渚。遨翫怡五神，繁想嘯明侶。五難緣理去，冲心自怡處。爽魂隨本根，寔寔空中佇。七誦重關開，豁滯非神武。運通由中發，高唱稽首舉。

#### 旋行至北方

伏以紫霄御極，崇光風於太玄。炎氣凝精，尊黑靈於北朔。清靜冠鬱單之

界，玄冥臨幽野之都。俯制羅酆，演元綱而布惠。仰昭閭闔，提陰境以施仁。坎鎮陰郊，蓬司枵位。今有齋主某人，謹然北卮神燈，布帝真華府命元真靈化凝之氣，宣告玉光寶符，下開溟泠之獄。爲亡故某人，溥及幽冥，冤親平等，息冰戟霜刃之苦，登真靈救度之鄉。伏願通陽開光，景元返本。檢十宮而度品，金馬驛程。攝六洞以飛仙，玄龍躍迅。長居道域，永爲種民，謹誦高虛清明天生神寶章。

清明重霄上，合期慶雲際。玉章散冲心，孤景要靈會。煥落景霞布，神衿靡不邁。玉條流逸響，從容虛妙話。靈音振空洞，九玄離幽裔。感爽無凝滯，去留如解帶。明識生神章，高遊無終敗。玄景曜雲衢，跡超神方外。應感無方圓，聊以運四大。研心稽首誦，衆聖共稱快。

#### 旋行至中央

伏以神霄御極，冠大梵於綠羅。演氣凝精，流元綱於紫極。托圓蓋無色之頂，統乾輪玄紀之巔。金闕玉房，耀靈

光而洞朗。瓊林瑤圃，拱毫相以端凝。五億攸宗，三千共仰。今有齋主某人，謹然中卮神燈，布帝真岳府命元自然玄照之氣，宣告玉光寶符，下開普掠之獄。為亡過某人，溥及幽冥，冤親平等，息刀山劍樹之苦，登玄都淨土之鄉。伏願萌陽開光，神元返本。金書妙有，敕帝所以送迎。玉匱宣輝，檢鬼營而部衛。惡根永謝，善性回元，謹誦無想無結無愛天生神寶章。

無結固無情，玄玄虛中澄。輪化無方序，數來亦叵乘。誰云無色平，峨峨多丘陵。冥心縱一往，高期清神徵。良遇非年歲，劫數安可稱。浮爽緣故條，返胎自有恒。靈感洞太虛，飛步霄上冰。津趣鼓萬流，潛凝真神登。無愛固無憂，高觀稽首昇。

伏以百千萬重，氣渾淪而包地。三十六數，形磅礴以承天。高澄羅朗耀之輝，凝濁結幽寥之邈。故金樓玉室，生神妙稟於陽。靈鐵壘銅，關死氣潛沈於幽翳。期提死蒂，俾復生根。亶藉玄虛鬱勃之輝，庶超澤壘冥濛之垢。

今則歌揚玉範，燈耀金葩。十華流演於玄綱，三極彌羅於梵氣。圓方壽域，幽顯福庭。伏願亡故某，萬氣返還，百神混合。回骸起死，轉地輪而北鬱削名。監真度生，乘天輻而南丹紀字。嘯朗九靈之府，旋行七寶之臺。永被宸恩，常遊聖境。寒庭夜壑，均照燭於晨曦。昧谷幽都，悉吹噓於暖律。百昌茂育，庶類懽愉。為如上緣，志心稱念：

九天生神天帝，燈光普照天尊。

和：不可思議功德。

靈寶領教濟度金書卷之二十五

靈寶領教濟度金書卷之二十六

洞微高士開光救苦真人甯全真授靈寶通玄弘教水南先生林靈真編

科儀立成品

開度通用

冥府醮儀

步虛 燒香頌

各禮師存念如法

衛靈呪

金真綠霞，煥映三天。飛雲丹霄，諸天控輶。晨輝啓旦，陰翳俱捐。九微震空，五星回旋。萬仙應感，自然妙玄。杳冥散景，分形億千。蒙昧光曜，瑞降壇乾。生死蒙恩，灌鍊金泉。魔王恐懼，合景三田。和：與道合真。

鳴法鼓二十四通

發爐

無上三天玄元始三炁太上老君，召出臣等身中三五功曹，左右官使者，侍香金

童，傳言玉女，五帝直符，直日香官使者，各三二十六人出。出者嚴粧。關啓玄壇天帝神君，當召此間土地里域真官正神。臣今正爾燒香，奉爲某宣齋意，其諸情愫，具載表文。以今關盟三界，普告十方。願得太上十方正真生氣下降，流入臣等身中。令臣所啓，速達徑御至真無極大道玉皇上帝御前。

### 請稱法位

具位奉行某齋法事某，與臨壇官衆等，同誠上啓地府北陰玄天酆都大帝，東嶽大生天齊仁聖帝，地府泰素妙廣真君，地府陰德定休真君，地府洞明普靜真君，地府玄德五靈真君，地府最勝耀靈真君，地府寶肅昭成真君，地府神變萬靈真君，地府無上正度真君，地府飛魔演慶真君，地府五化威靈真君，十宮僚佐，神靈官吏，溟泠大神，五道大神，十方道都大主者，九州社令司主者，東嶽地府掌亡人案主者，東嶽地府列曹主執，案掾神吏，酆都九幽地獄主者，三十六大地獄主者，一十八大地獄主者，三塗五苦無間硤石血湖主者，六道

都案主者，冥關幽路主執，推鞠憲令掾吏，本州城隍司主者，本縣城隍司主者，當境土地里域真官，遠近廟貌一切威靈。伏聞天地流形，鬱絕綱維於九地。陰陽御氣，羅酆主宰於六陰。列宮洞以雲聯，建曹僚而星燦。山州嶽瀆，昭昭參贊於神機。里域城隍，赫赫共宣於聖憲。雖煥雷霆之威令，常融雨露之仁恩。凡屬範圍，皆歸橐籥。今爲齋主某，開度亡故某。上祈聖澤，下拯幽魂。緬懷統制之威，盍展司存之敬。故陳禴祭，肅迓飄旂。伏望縹緲旌旗，肅前驅而來下。翩翩車馬，嚴後從以齊臨。不遺應感之私，式副翹傾之切。俯歆菲供，齊會蘭場。某無任激切之至，謹稽首再拜奉請。

### 請聖 初獻

### 重稱法位

具位某上啓地府北陰玄天酆都大帝，地府十宮真君，冥關幽路一切威靈。伏聞道契春生，啓慶雲於東極。威符秋殺，凝昏霧於北都。由群形有迷悟之分，故一氣有昇沈之異。定予定奪，廓

冰鑿以無私。權死權生，昭水衡而有準。雖司地禁，實握天章。今齋主某，仰慮亡故某，累劫以來，稟生之後，五賊翦鑿，一寇紛營。舌在堪誇，罔悟是非之顛倒。目誠可羨，豈思空色之回環。身貪錦繡以裝嚴，耳悅宮商而遊戲。經營縱意，業徒積於倉箱。暴殄任情，冤已尋於刀机。昧臨民之節操，失修己之綱常。圭黍必書，名久刊於黑簡。錙銖備錄，愆已掛於玄曹。茫茫四大之分離，杳杳九幽之遍歷。匪繇提拯，曷俾超凌。鶴赦羅敷，已陽回於夜壑。鴻恩汪滅，諒春滿於寒庭。仰承天尊之靈光，爲廓地祇之幽暗。罪無大小，均落滅於惡根。過有顯微，溥蕩除於業蒂。永辭黑鬱，徑上朱陵。蒙如丹禱之私，允藉洪恩之被。芝蘭散景，黍稷非馨。庸殫一縷之忱，恪副九光之燭。某不勝虔禱之至。

### 亞獻

具位某，謹上啓北陰玄天酆都大帝，地府十宮真君，冥關幽路一切威靈。伏聞千神效職，酆城乃職憲之都曹。萬

鬼成群，泉曲為群精之會府。羅山峻極，溟水幽深，中凝金碧之流輝，上聳空青而耀映。孰主張是，有北帝之神庭。式輔翼之，儼東皇之望嶽。鐵壘鑱千尋之峻，銅關張萬仞之崇。威令凜如，條章肅若。今齋主某，請命霄極，肆赦朔單，慈恩提應度之魂，膏澤被見囚之爽。三塗五苦，期均泱於陽華。六洞十宮，冀溥離於陰翳。冰靜波而火息焰，刀化樹而劍為騫。聖力弘施，釋囚繫於三十六獄。慈光浩蕩，寬繫維於八十一牢。開犴室以空虛，破狴關而清淨。即使亡故某，綸頒紫陛，綉耀黃垓。精爽飛流，竟覲騫林之境。形神悅茂，永辭金粟之都。善道逍遙，福堂遊宴。亶賴威靈之曲蔭，庶宣德澤以旁流。慙無及物之儀，筵開六甲。誓罄克誠之享，辭演五申。激切小忱，勤渠大造，某不勝虔祝之至。

終獻

具位某，上啓北陰玄天酆都大帝，地府十宮真君，冥關幽路一切威靈。伏聞帝有恩言，常昭宣於道日。神無虐政，

期翊贊於玄風。興懷長夜之蒼茫，亶藉陽晨之煥耀。澤期萬一，情罄再三。毋違上天嚴攝之章，庶應下民超凌之願。香殘翠鼎，諒雲馭之將旋。星散珠鎔，想風輿之欲返。旌旗雲逐，鹵簿星馳，辭焯燁之玄壇，歸幽寥之黑闕。莫殫控挽，恪冀鑒觀，某不勝依戀之至，謹稽首再拜，奉送

送聖

三官醮儀

法事同前

具位奉行某齋法事臣某，與臨壇官衆等，同誠上啓太上無極大道上元一品賜福天官大帝君，中元二品赦罪地官大帝君，下元三品解厄水官大帝君，三元三宮二十七府陰陽水火生死罪錄官，三元百二十曹仙官僚屬掾佐合會威靈。臣聞道判鴻濛，二極分羅於二氣。政敷混洞，三元列御於三靈。範圍紫極之神機，統制玄都之化籥。威儀翼翼，昭雨露以無私。憲令輝輝，煥日星而有赫。握司陰司陽之柄，秉主生主死之權。聖德春融，神威冬肅。以今齋主某

人，開度亡故某，提携幽爽，流演宸慈。惟宣德裁成，允藉三宮之仁，渥而體道，化育亶茲九府之慈。觀爰陳蘋藻之恭，恪寓藿葵之敬。伏願雲輿順動，離玉闕之森羅。風駟飛馳，御瑤壇之焯燁。千官雨集，萬騎雲從，鑒茲丹悃之誠，俯賜玄恩之被。臣不勝激切之至，謹稽首再拜，奉請

請聖

初獻

具位某謹上啓太上無極大道上元一品賜福天官大帝君，中元二品赦罪地官大帝君，下元三品解無水官大帝君，三元三宮二十七府陰陽水火生死罪錄官，三元百二十曹仙官僚屬掾佐合會威靈。臣聞紫微帝所，天官總主於上真。黑鬱神鄉，地官統司於下界。惟尾閭歸墟之境，接扶桑暘谷之源。越有水官，共參神職，班分上中下之品，氣稟青黃白之靈。九府蟬聯，列曹魚貫，各參機而佐理，共贊務以同寅。水火之考赫然，陰陽之錄炳若。今齋主某，切慮亡故某，三生蘊業，七世流愆，指垂霓而唾流星，斥疾風而喧暴雨。

未能三省，每怨忤於神靈。弗悟九思，常議盟於仙聖。節會乏朝修之典，元臘無懺謝之功。時積歲滋，散形神於二境。日深月累，凋性命於雨岐。冰池炎沼以爲心，劍樹刀林而喪膽。凡經校錄，悉藉權衡。故祈赦宥之恩，希降拯提之澤。清微妙氣，已頒玉簡之春陽。紫極真光，更布金符之晝景。願宣帝令，溥被真慈。執籙把籍而丹筆書名，宿愆滅對。鼓節麾幢而黑門攝魄，舊覺釋維。俾辭永夜之幽，寥獲證乘晨而快樂。香花舊燦，霞液輝煌，願容與於香筵，庶昭宣於卑悃。臣不勝虔祝之至。

#### 亞獻

具位某，上啓太上無極大道上元一品賜福天官大帝君，中元二品赦罪地官大帝君，下元三品解厄水官大帝君，三元三宮二十七府陰陽水火生死罪錄官，三元百二十曹仙官僚屬掾佐，合會威靈。臣聞一氣流光，著簡文於鳳籙。三真演妙，昭品格於龍章。皆自然教雨之敷，實煥乎玄雲之蔭。齋儀告備，壇

律孔昭。尤切切於升神，每拳拳而度命。凡有修奉，亶謝扶持。以今肇啓瑤壇，祈恩金闕。登真度品，豈惟提正度之魂。起死回生，所願澤無邊之爽。伏冀虬輪在御，鸞駕傾光，敕左右中三府之官聯，告神真靈列曹之職守。共揚帝澤，各歛神威。舊過新瑕，爲疾除於黑簿。陽愆陰罪，皆削落於玄編。慈風提五苦之輪，慧日絕三途之軌。考對烟收於泉曲，推研霧散於羅鄩。悉登智慧之舟，徑上虛靈之岸。沾錫福惠，俾經緯以長春。沐赦罪恩，看玄黃之不夜。下元解厄，上景凌雲。冤親俱證於騫林，遐邇悉朝於蓮座。蒙如丹禱，允拜洪恩，臣不勝懇禱之至。

#### 終獻

具位某上啓太上無極大道上元一品賜福天官大帝君，中元二品赦罪地官大帝君，下元三品解厄水官大帝君，三元三宮二十七府陰陽水火生死罪錄官，三元百二十曹仙官僚屬掾佐，合會威靈。臣聞帝恩穆穆，付科律於三宮。真聽昭昭，寬條章於九壘。既罄懇祈之

切，諒蒙應感之私。璧磬收聲，香已飄於蘭篆。瓊鐘息響，燭將散於蓮花。徒殫投轄之勤，莫挽回駟之馭。紫烟上下，靈光輝煥於青冥。彩仗後先，梵氣回旋於碧漢。無涯懇禱，不盡鋪陳，臣不勝虔禱之至。

#### 送聖

#### 鍊度醮儀

#### 法事同前

具位奉行某齋鍊度臣某，謹同誠上啓太上無極大道虛無自然元始天尊，太上玉晨虛皇大道君，萬變混沌玄元老君，九微太真玉明青童大道君，紫微元靈青金丹皇大道君，南極真王朱陵大帝，玉清真王長生大帝，無上三十二天上帝，至真九天生神上帝，五靈五老上帝，日宮鬱儀帝君，月府結璘皇君，南辰六闕道君，北極九府道君，十方至真飛天神王，南極度人不死尊神，度世司馬大神好生韓君丈人，回骸起死無量度人君，南昌上宮朱陵火府青玄黃籙左右真司，九天普度院仙官主宰，鍊度應感合會威靈。伏聞靈寶開圖，東極

煥陶魂之妙。神霄啓運，南昌昭鍊魄之玄。承祖氣於清微，散靈光於黃混。玄曹赫奕，佐離坎之神功。丹界森羅，廓乾坤之妙化。提三途而陰暉開夜，拯六洞而陽景乘晨。性命雙超，形神俱妙。以今齋主某，崇建某齋，開度亡故某。返真黑鬱，已銘紫極之恩。御景清虛。宣藉朱陵之澤。仰惟聖造，實握靈樞。將肅演於芝科，庸昭陳於菲薦。伏望雲幢月葆，耀梵氣以來臨。風騎烟轅，御太虛而莅止。聽陳懇款，共錫禎禧，臣不勝虔禱之至。

請聖 初獻

具位某，上啓三清上聖，十極至尊，三景高真，萬仙元聖，鍊度合會一切威靈。臣聞職覆職載，回靈昭起死之仁。司陰司陽，鍊景沛度生之澤。故朱火星羅於仙局，而黃華棋布於真僚。東井澄鮮，灌方諸之英粹。南閭輝煥，流陽燧之飛精。降九氣於一時生神，運五靈而千齡度命。玉符景徹，煥聚精會神之功。金簡仙飛，藉守雄抱雌之力。巍巍聖運，赫赫靈通。今齋主某，心涵

俗機，身縈世網，風翻定水，凝暗垢於靈源。雲擾業山，擁陰氛於覺地。六情動而心珠塵蔽，五賊蕩而性玉埃浮。等閑百體之分離，倏忽九幽之陷溺。冥途寂寂，鑠昏霧以幽寥。夜壑茫茫，閉迷烟而渺莽。霾雲互汨，晦盭交纏。惟知味濁以驚心，安悟靈虛而復性。凡輪回於五道，繇顛倒於六塵。非藉南宮陶冶之陽光，曷淪北都羈維之陰暗。紫泥煥令，諒頒降於真靈。丹陛宣符，願昭揚於神聖。敬據蟻悃，宣覬鴻私。恪停前幕之威，庸寓西鄰之敬，臣不勝虔懇之至。

亞獻

具位某，上啓三清上聖，十極至尊，三景高真，萬仙元聖，鍊度合會一切威靈。臣聞雲霞煥爛，昭玉宇於九清。風烟輝煌，啓金書於三洞。切切寒池之苦惱，渠渠炎沼之煩冤。甘露流華，湛清涼而浴質。祥曦耀景，廓矇昧以陶形。實帝真化育之恩，藉仙靈裁成之力。今齋主某，籲天罄禱，扣地勤拳，承生德於紫虛，提死魂於黃澤。今夕何夕，謹

遵鍊度之科。此時彼時，永遂超凌之志。伏願和同四象，混化二儀。玉兔東飛，乘戍龍而騰景。金烏四邁，策已虎以凝精。左英提鬱儀之輝，右元携結璘之彩。立黃華之寶井，建流火之神庭。接引陽靈，爲陶鎔於業垢。提携陰爽，俾灌沐於幽塵。九霄流鬱勃之光，五梵耀羅敷之粹。還元返本，俾萬竅以清明。養素回靈，使百神而整具。功該妙有，道契虛無。疾乘保舉之功，徑上虛玄之界。鍊形成神，鍊神成氣，永遊宴於玉京。散形成氣，聚氣成形，當飛翔於碧落。庶戴岱溟之深惠，丕參與蓋之玄功。珠翠光浮，愧莫殫於葵藻。翠籥香滿，誠敢罄於蘋蘩。願歆萬一之情，恪副再三之祝。臣不勝虔祝之至。

終獻

具位某，上啓三清上聖，十極至尊，三景高真，萬仙元聖，鍊度合會一切威靈。以今夜氣朗清，靈輝煥映。玉杓影轉，催夜漏之將中。銀漢光騰，映霄輪之在上。已鋪陳於壇席，行召役於班聯。

願承帝渥之慈悲，丕軫民情之憔悴。死魂受鍊，永辭幽暗之鄉。生氣登真，常處光明之界。當飛朱表，爲證玄功。法事周圓，別當奉送。臣不勝懇禱之至。

靈寶領教濟度金書卷之二十六

靈寶領教濟度金書卷之二

十七

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

分燈儀

步虛

高功詣三寶前

具位臣某，誠惶誠恐，稽首頓首，再拜奏  
啓玉清聖境元始天尊妙無上帝，上清  
真境靈寶天尊妙有上帝，太清仙境道  
德天尊至真大帝。仰冀洪慈，俯垂采  
錄。切以朝輝燦爛，煥陽景於十華。  
夜色朦朧，藹陰氛於九野。況三途之  
沉滯，與五趣之漂流。業垢支離，孰秉  
昏衢慈悲之燭。客塵束縛，誰張迷途  
智慧之燈。終天不睹於光明，浩劫永  
淪於幽暗。是以玄尊垂憫，師寶興憐。  
回耀飛光，著瓊章之典式。燃燈度命，

昭金錄之威儀。密假神輝，用開鬼趣。  
今有齋主某，崇建某齋，開度亡故某，羅  
敷丹悃，俯仗玄恩。遵寶範以宣揚，肅  
瑤壇而璀璨。仰賴九光聖彩，熒煌密  
映於蘭膏。三氣靈芒，晃朗潛通於蓮  
炬。變凡爲聖，與道合真。上照諸天，  
增陸離於經緯。下明列壘，散鬱勃於  
寰瀛。俾泉曲以長春，極羅艷而不夜。  
九幽息苦，庶獄停酸，恭對道前，加持  
燈果。

大聖元始天尊

臣聞清微御運，宸光照耀於無方。天寶  
流恩，惠澤周迴於有截。焯燁玉毫之  
散景，昭彰金相之騰輝。慾界色界無  
色界，徹大羅天。虛無洞煥潤澤粟，澤  
大風澤。巨綱維地，寥廓開明。徑提  
九夜之魂，疾上三華之景。還明破暗，  
藉玄氣以扶搖。起死迴骸，企神功之  
錯落。萬靈共仰，一炬初燃。

點玉清前燈

太空無象，神化無方，巍巍大梵，龍漢  
延康。元始毫相，朗映流光，慧光下  
燭，開泰幽鄉。諸天洞耀，八景含芒，

沉魂溥度，利澤無疆。

### 大聖靈寶天尊

臣聞禹餘啓化，依依五劫之津梁。靈寶垂光，赫赫萬方之柱石。示玄珠而流精鬱勃，揭玉鑑而寶器昭回。三界上雲層，峨峨恢張陽梵。八維表風輪，混混開廓陰霾。是無極之靈輝，破有情之業累。真光照夜，羅艷被乘晨希陽之仁。元氣開幽，寒庭獲飛空步虛之樂。雙枝呈瑞，兩炬齊明。

### 點上清前燈

陰陽代序，元始居中，神光下映，三極流通。變化回耀，二景溟濛，玄黃呈彩，玉晨飛虹。重昏幽暗，惡業消融，天地開泰，萬化飛空。

### 大聖道德天尊

臣聞太赤開圖，正一舒光於慧日。神寶御世，函三洞映於慈雲。耀朱實而蒨燦流輝，育紫精而徘徊示象。配日月星宿循環之景，落落高張。開地水火風渙散之魂，巍巍大梵。廓萬遍無垠之惠，散九圍有脚之春。續景還陽，始氣布洪鈞之澤。變夜作晝，雲風陶黃

垓之和。三炬光明，九幽恩動

### 點太清前燈

元始集神，洞照回光，天上地下，煥耀雲芒。三途開泰，八妙乘陽，諸天懽悅，虎嘯龍驤。晃朗心珠，耀映八荒，長夜寒泉，蒙恩飛揚。

### 燈光無盡天尊

臣聞一生二，二生三，三生萬物。地法天，天法道，道法自然。降三天無量之慧光，拯十極有情之昏暗。朱燼明而一朝晃朗，丹心徹而九夜昭融。假玉笈以宣通，憑金符而播告。幽關肆闢，共瞻碧落之輝輝。冥路宏開，咸仰清虛之燦燦。回輝神呪，謹爲宣揚。九陽至精，三天道明，日月神華，星光合明。三華寶耀，混合群精，三寶發華，慧光發神。長降飛玄，下燭幽明，慧光一照，遍徹十方。三塗罷對，五苦停酸，火山息焰，冰消雪扃。刀化玉樹，劍變騫林，鐵城摧毀，魂升玉清。臣今上請，願賜開明，日月靈童，星光真人。一十二員，稽首奉行，分燈慧光，照徹寒庭。和：與道合真。

赤明開圖，運度自然，開明三景，億劫之先。今日大願，沉魂受鍊，重昏幽暗，永閉寒泉。欲請慧光，照燭幽關，冰寒溫和，爐炭息焰。刀山劍樹，永斷攀懸，回光十方，照耀諸天。蠲消五累，業除勾連，三晨洞輝，永劫元元。開明童子，承恩上願，三光玉女，請如斯言。和：與道合真。

### 流光法界天尊

### 遍照內外 明燈頌旋遶

正一陽光，燄上朱煙，開光童子，一十二人。洞照天下，回及我身，百邪摧落，殺鬼萬千。光明朗徹，達真通靈，昇入無形，與道自然。和：願得長生。向來分燈破暗，功德周圓。伏願神燈朗映，夜燭煥流。旁徹無垠，顯破暗開



幽之妙。下通有間，昭停酸息苦之功。即使亡故某人，乘此光華，頓消障累。拔出地戶，永辭陰夜以逍遙。無拘天門，疾證陽華而快樂。三途昭朗，五道開明。稽首無極大道，志心稱念燈光溥照天尊。和：不可思議功德。

### 頌玉札儀

華夏贊，引捧玉札至道前

法師上香長跪

具位臣某，誠惶誠恐，稽首頓首，再拜上言。臣聞天地之大德曰生，仁周三極。日月之容光必照，恩動九幽。能提溟漠之靈儀，宣藉虛無之聖澤。重敷丹赤，上扣紫清。以今奉為某人崇建某齋，開度亡故某。輪迴有生，循環無始。慾海滾千尋之浪，四大各離。昏衢揚萬仞之塵，三塗斯墮。羅酆杳杳，鬱絕沉沉。期攝形魂，覲金容而受鍊。惟憑將吏，宣玉札以開光。曾露奏於朱章，諒風行於玄敕。俯矜素悃，曲運洪恩。茲臨召役之期，再切忱恂之請。伏望慈悲應物，視聽自民。頌紫英龍虎之章，付臣遵奉。宣玄曹雌雄之吏，

佐臣行持。庶幽路以丕承，俾冥途而敬聽。開關啓道，希雷霆有赫之威。攝魄召魂，施雨露無私之化。拳拳皈命，翼翼馳神，臣不勝激切，祈恩伺命之至。

靈通感應天尊 引札至神虎幕

普獻頌

普獻無邊聖，香烟散十方。願乘七寶臺，垂光五濁世。願度亡靈衆，咸令上法橋。同會證無爲，勤修不退轉。

洒淨

上清靈寶玄壇，焚香關啓某靖靈寶追攝總局諸部仙靈官吏，城隍里域，監臨翊衛，虛空鑒察一切威靈。悉仗真香，溥同供養。伏以元始開圖，扇慈風於八極。虛皇御運，煥慧日於九垓。北魁端神虎之曹，東極設飛龍之吏。諸司棋布，列職星羅。皆上贊於紫宸，庸下提於黑鬱。混元鐵券，乘晨嘯命於神真。靈寶金符，照夜駿奔於山嶽。敷帝師昭天漏泉之澤，佐乾坤迴骸起死之恩。凡伸開度之忱，宣藉維持之造。今有齋主某人，矜茲爽識，墮彼幽冥，請命帝庭，已降開幽之玉勅。歸心聖域，

更祈破暗之玄威。諒體德音，聿飛神馭。茲罄忱恂之禱，庸伸召役之儀。風馬雲車，迅玄虛而莅止。金戈玉鉞，馳碧落以來臨。法衆運誠，志心奉請。

至心奉請北魁玄範府神虎追魂陽精輝明昭靈大帝，陰精輝靈威神大帝，雄左大力統制百節三魂玉曹玄伯何大神，雌右武鸞提魂攝魄飛符玉札主吏喬大神，三部追魂使者，神虎一十五員使者，倒生玄司七玉女、七將軍，五道功曹，監魂童子，引魂童子，對魂盧功曹，聚魂劉將軍，尋魂馬將軍，整魂太乙君，神虎玉司紫微金光郭大將軍，追魂攝魄大將，太玄夜光玉女，八卦追魂聚魂大神，聚魂使者，聚形使者，北斗豁落大將軍，大召小召真人，三界追魂攝魄趙將軍，引魂童子王女，監獄使者，北斗太乙玄冥司追魂神將，七真玉女，十二時主直，玉札神將，陽耀通關、陰靈攝魄神將，黃籙院統兵，助法聞教通靈通天入地追魂攝魄功曹使者一十五員，使者一百二十五員，追魂將軍，入天地諸獄追魂十使者，青玄左府夜光

招魂神司玉女判吏，引魂追魂尋魂司靈官功曹，金闕內臺五部攝魄天將，玉都玄臺內省升天入地入水入火飛空追攝大使，十一月追魂將軍，合屬吏兵，惟願雲車仙仗，俯降來臨，今日今時，召魂顯現。

志心奉請某靖主將某，副將某，護道某，監壇某，諸省府院司追攝官吏，惟願雲車仙仗，俯降來臨，今日今時，召魂顯現。

志心奉請當境土地、里域真官，遠近廟貌祀典神衆，惟願雲車仙仗，俯降來臨，今日今時，召魂顯現。

初獻 散花

伏以九霄錫慶，天開西壁之金章。三洞流光，神授東華之玉篆。左右列雌雄之職，陰陽分魂魄之曹。孰典樞機，允茲威武。玄旌耀日，御三界以星馳。鐵騎嘶風，廓八紘而雷動。無遠弗屆，有礙皆通。今有齋主某，崇建某齋，開度亡故某人。切慮苦海飄流，迷途馳騁。飛客塵於五蘊，報障誰矜。擁業垢於七情，惡根自滓。致鼓三官之筆，

遂沈六洞之區。玉律金條，凜女青之考對。銅關鐵壘，慘混黃之拘維。長夜幽幽，寒丘寂寂，獄吏舞文而含冤莫訴，鬼官奮武而茹苦無源。非憑攝召之威，曷副超凌之望。天閻密扣，恩綸下龍尾之墀，地域遐開，敕詔赦虎頭之戶。欲伸激切，期藉宣揚。覬采燭於葛衷，庶承流於楓禁。宣靈寶旨，形魂部衛於北酆。乘功德光，爽魄攝提於下界。勤拳有請，懇禱無違，執事恭陳亞獻。

亞獻 散花

伏以度南宮而除罪簿，帝渥恢張。攝北酆而檢鬼營，神威煥耀。既上承於芝檢，諒下副於葵忱。猶慮泉曲神鄉，朔單幽域，有間無間之禁垣峻極，天一太一之牢檻森嚴。六洞十宮，霜肅推研之令。三官九府，雷轟訊鞫之威。或山川嶽瀆之攸司，或里域城隍之列職。黃泉幽路，黑壤冥關。悉資神聖之雄，爲攝形魂之正。冤莫冤於三世四負，親莫親於九祖七玄。願假威靈，溥行攝召。排空馭氣，遵火令而去若

飛雲，破幽入冥，奔流鈴而迅猶掣電。追呼五道，管領四生，均乘金闕之慈光，來沐玄壇之惠澤。聞經聽法，坐令狂室之春生。度命登真，行睹豹關之日。近敷心切切，俟命渠渠。執事，恭陳終獻。

終獻 散花

三獻既周，一忱畢露。玄壇符檄，謹用宣告。

法師宣告

伏以榮膺璽紱，典領樞機。結三部於三田，混七元於七戶。光舒甲乙，氣貫癸壬。佩北祚之符章，握中魁之造化。指呼三極，嘯命羣靈。徼長夜之魂，來陟陽明之界。神威煥耀，風火無停。敢有不承，酆刑赫奕。比者躬朝金闕，面奉玉音。降敕詔以攝魂靈，頒符章以役仙吏。汝等分靈兆質，結氣稟形。既聞召以來臨，宜叶恭而盡瘁。上遵帝命，下副民情。我運北魁，徑開陰府。大聖使者，玉女將軍，承此真光，隨我前進。所有玉札，敬爲頒行。汝宜欽承，一如靈寶玄壇律令。

宣玉札

宣青玄追魂符籙

宣牒

伏以龍章誕布，三天垂湛露之恩。駟騎載馳，九地仰震霆之令。願恭乃事，爰疾其驅。時行萬程，極侍衛送迎之喜。普告三界，無拘留逼合之憂。帝有恩言，神毋曠職。恪期感應，不負勳庸。速去速來，明彰報應。

靈寶領教濟度金書卷之二十七

靈寶領教濟度金書卷之二

十八

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

催召儀

步虛

洒淨

上香

上清靈寶玄壇炷香，關啓某靖靈寶追攝總局諸部仙靈官吏，城隍里社，監臨翊衛，虛空鑒察一切靈祇，仗此寶香，普同供養。伏聞化機轉生死之輪，循環萬劫。道氣貫陰陽之域，化育君靈。煥七星以檢北酆，役三元而頒玄範。威張天政，霜明嘯命之權。勅制地祇，雷動追呼之令。上窮碧落，下洞黃泉。啓路開關，使超凌之有便。捉魂攝魄，宜時刻以無違。頃爲齋主某人，開度亡故某人。奏對彤墀，頒行丹詔。徼仙僚而策役，迎爽魄以昇遷。冀運洪慈，克

符素悃。今則籟沉漏寂，夜氣無塵。斗轉星移，天光有耀。寶鐸琳琅於風際，靈幡縹緲於空中。芝饌橫陳，蘭湯顯設。宜疾行於告召，期立副於感通。激切申言，高明丙鑒。清衆運誠，志心奉請。

至心奉請北魁玄範神虎大神，玉女功曹，將軍使者。惟願雲車俯降，仙仗來臨，今日今時，召魂顯現。

至心奉請青玄黃籙追攝靈曹守雄抱雌九天官吏。惟願雲車俯降，仙仗來臨，今日今時，召魂顯現。

至心奉請玄臺內省如意萬司攝魄召魂仙靈官將。惟願雲車俯降，仙仗來臨，今日今時，召魂顯現。

至心奉請本靖總制主將副將，護道監壇，諸司官將。惟願雲車俯降，仙仗來臨，今日今時，召魂顯現。

至心奉請城隍社令，翊衛監臨，里域靈祇，虛空主執。惟願雲車俯降，仙仗來臨，今日今時，召魂顯現。

三獻 散花

伏以萬帝溥好生之德，惠露沾濡。九

幽溪度死之仁，祥烟蒙藹。仰威靈之有翼，布聖武以無方。呼陰召陽，控飛雲於汗漫。升天入地，驂風駟於幽陰。頒金符而獄吏丕承，開鐵圍而鬼官敬聽。巍巍神勇，赫赫機衡。傾爲齋主某，開度亡故某。矜彼魂儀，墮茲冥漠，請紫禁提携之令，仗玄曹召攝之威。諒宣德以承符，各效勤而受事。茲也神光照夜，元氣開幽。清微宣皇極之輝，赤圓示紫金之相。蔭慈雲於三界，洒法雨於十方。感此傍徨，時則可矣。從茲部衛，禮亦宜之。猶慮一旦沉淪，百神解散，三途渺莽，六洞幽沉。山川嶽瀆之神庭，里域城隍之陰域，積冤莫釋，宿業猶羈。或顛倒於四生，或漂流於五道。悉祈顯現，竄賴搜尋。約束關津，火令馳而必無□□。戒嚴道路，天威布而孰敢拘留。期氣氣返於几筵，俾神神朝於黼座。願聽懇禱，佇副翹傾。玄壇公文，謹當宣示。

宣催召牒

青律森嚴，昭抽魂之帝敕。玄班赫奕，運攝魄之神功。盍擲火以流鈴，即鞭

雲而躍電。指揮冥路，呼嘯幽扃。仰承綸綍之威，俯召形魂之正。敢有過截，束送雷霆。毋輒稽違，自干憲令。速至速至，升旛現形，一如靈寶玄壇律令。

八門開度天尊八十一聲

法師運神 行持如儀

召魂儀

吟偈

玉京降旨下瑤臺，童子傳言地獄開。業海愛河皆息浪，鑊湯爐炭代寒灰。真符告下羅酆去，陰府迎將淨魄來。觀聽法音消罪戾，永辭苦海出輪迴。

伏以玉清道氣，覆三極以生春。太乙真光，照九幽而不夜。靈旛颺曉，梵唱凌霄。見之者似駕法橋，傍徨來赴。聞之者如登道岸，疾速遙臨。況紫英之鳳篆，頌宜而青玄之龍符，赫奕。左提右攝，陽關陰開。咨爾靈儀，幸離冥漠。尅時定令，無違青律之條章。附旛現形，盍體玄壇之號令。毋迷毋滯，速赴速來，攝召秘章，謹當宣誦。太微迴黃旗，無英命靈旛，攝召長夜

府，開度受生魂。和：不可思議功德。

歌陽斗章

陰陽推運兮，劫數更遷。生死周流兮，孰愚孰賢。輪轉無窮兮，上元造化。未出三界兮，拘於神變。魁魁東兮，魑魍西轉。魑魍向南兮，魑魍北面。陰靈陰靈兮，茫茫沒沒。陽魂陽魂兮，碌碌悠悠。天地明兮，萬鬼潛。天地動兮，萬鬼爽。天地靈兮，萬鬼長。陰陽運兮，鬼神享。太一召汝何遲遲，先至後至律有常。感此傍徨附我旛，賜汝靈書歸上清。急急如太一玄冥夫人律令攝。

伏以二氣良能，孰測鬼神之情狀。五神妙合，可還形氣之根源。靈光奕奕於中天，梵唱泠泠於雲際。晚風淅瀝，若聞警效之音。夜月淒迷，如見步趨之影。宜歌陽護，庸格陰游。庶彰應感之機，密契招來之切。符命通冥漠，靈旛颺曉風，遷神超北府，飛馬上南宮。和：不可思議功德。

歌陰斗章

五行所造兮，復歸於五行。四大假合

兮，還歸於太空。或陰或陽兮，任天地之根宗。天地冥兮，萬鬼潛。天地動兮，萬鬼爽。天地靈兮，萬鬼長。陰陽運兮，鬼神享。天一北祚召汝魂，太一紫元攝汝靈。冥海冥波冥晦神，不問八極鬼與精。感此徬徨附我旛，賜汝靈書歸上清。急急如太一玄冥夫人律令攝。

伏以將天氣以制天魂，體包空洞。開鬼關而來鬼爽，迹遍虛空。極前後三際以追尋，溥上下四方而提攝。非遠非近，由一氣之潛交。若有若無，恍萬神之默備。以接陽春，克離陰闕。上乘恩澤之華，下副孝思之切。

明梵飛玄景，開度長夜魂，遊爽赴期歸，氣氣返故根。和：不可思議功德。

### 歌斗章

胎光爽靈幽精，三魂皈空皈真。天地正真氣，再使汝成形。此是五行造化精，無藏無避無逃形。一呼速至現真形，感此徬徨附我旛，賜汝靈書歸上清。急急如太一玄冥夫人律令攝。伏以天地運陰陽，每有生而有滅。精

神致魂魄，宜無去以無來。神威呼嘯於十華，火令招提於八極。雲飛風迅，共瞻華表以徬徨。電掣霆奔，即認靈幡而恍惚。今申請召願，疾歸來鑒。茲激切之誠，恪享薦修之孝。

志心奉請亡故某人靈魂，惟願仰承道寶力，今夜今時來附靈旛。和：受茲開度功德。

志心再請亡故某人靈魂，惟願仰承經寶力，今夜今時來附靈旛。和：受茲開度功德。

志心三請亡故某人靈魂，惟願仰承師寶力，今夜今時來赴靈旛。和：受茲開度功德。

洞章韻徹，幸魂識之期歸。梵唱聲徹，諒形神之莅止。天恩浩浩，聖力巍巍。猶念萬劫循環，億齡輪轉。三生四負，寧無執對之冤仇。九族六親，未免纏縈於恩愛。非溥受於開度，或有礙於超凌。齋福羅敷，法門廣大，重吟寶偈，庸召真儀。

太陰冥冥黑波重，中有羅酆六天宮。萬鬼成群痛哀泣，悲惱毒列大惡崇。

無上洞音徹九地，飄飄吹下慈悲風。吹向冤苦召億魂，隨音奔赴寶壇中。

志心奉請亡故某人，前生今世，捨身受身，宗祖姻親，仇讎冤對，一切男女等魂。惟願仰承三寶力，今夜今時，來赴齋壇。和：受茲開度功德。

開鬼關而提魂魄，疾速歸來。赴旛影而顯神儀，徬徨莅止。宣藉慈悲之澤，宜生慶幸之心。伏願亡故某，覺海昭明，真源瑩朗，隨神光而緩步，朝天陞以登真。至於眷屬姻親，冤仇黨類，班分男女，朋進道場。均承超度之功，可遂飛仙之樂，法衆運誠，玉音引導。

慈悲接引天尊。

引旛詣法師座前醫治。

靈寶領教濟度金書卷二十八

# 靈寶領教濟度金書卷之二十九

洞微高士開光救苦真人甯全真授  
靈寶通玄弘教水南先生林靈真編

## 科儀立成品

開度通用

### 全形儀

步虛

洒淨

回靈養素天尊

伏以招魂黑鬱，幸承帝力之提携。濯質黃華，宣賴神功之廣大。惟冥關之久滯，恐祖炁之莫完。五體飄揚，百關蕩失。或生前之疾傷屯否，或死後之形體支離。非假攝聚以生全，曷俾和平而快樂。德音飛煥，威令駿奔。恭依召役之科，為運神靈之化。全形復質，監真度生。然後灌沐蘭湯，參朝楓陛。玉符所告，如律奉行。見前亡靈冤親等衆，各宜整肅，恭俟天恩。

### 回靈養素天尊

準上帝敕，謹請天醫功曹一行官吏。疾赴壇前，為係薦亡靈調理精神，安全榮衛一如靈寶玄壇律令。

### 宣治病功曹符

治病功曹，承奉九天，扁鵲官吏，天醫神仙。尚藥童子，神應寶玄，丹芝療治，玉晶延年。萬病速除，千災莫干，傳尸鬼債。邪鬼復連。五疰速滅，病者安然，神霄敕下，百邪得痊。

### 回靈養素天尊

### 宣天醫使者符

玉帝至真，玉皇上君，太一司命，桃康大神。五藏神君，各喜安寧，神聖功巧，敷藥靈官。天醫下降，拯救魂爽，五藏元君，流鈴大神。香鍊汝體，制汝神魂，心肝脾肺，腎齒耳靈。元皇正炁，灌沐汝身，四百四病，元亨利貞。

### 宣焚亡者生前所患符

準上帝敕，謹召玉清玄一六陽混元十二炁化生大將軍，一行官吏。疾赴壇前，為係薦亡靈返陰生陽，化生經絡，一如靈寶玄壇律令。

### 宣焚生腎生炁精符

以炁之聚，神之最靈，混神六合，生化腎經。身運自水，大道生明，亡魂受化，久故復生。急急如元始上帝律令。

### 回靈養素天尊

### 宣焚生心生神生榮生志符

赤帝之宮，聚炁為王，散亂無動，百神歸降。萬國朝禮，一體定康，亡魂受化，道相堂堂。急急如元始度人律令。

### 回靈養素天尊

### 宣焚生肝生魂生筋骨符

青炁鬱秀，輔翼萬仙，百骸之首，肝府為先。神精形聚，炁化成仙，亡魂受化，道德自然。急急如元始度人律令。

### 回靈養素天尊

### 宣焚生肺生魄生胃生毛符

一白之炁，混合肺房，長意生志，父子無忘。玉樓相串，金室同堂，亡魂受化，反生福堂。急急如元始度人律令。

### 回靈養素天尊

### 宣生脾生肌肉生意生四肢符

帝君有命，敕下中黃，安鎮榮衛，肢體宣光。安魂侍鎮，使神無藏，亡魂受

化，反生福鄉。急急如元始度人律令。

回靈養素天尊

宣焚生膀胱生尿管符

青黑之炁，交結膀胱，鎮於靈府，毫竅混康。玉清攝景，泥丸附旁，亡魂受化，聚魄神昌。三魂安泰，大道生光。急急如元始度人律令。

回靈養素天尊

宣焚生小腸生水道符

赤白之炁，二氣交從，結成腸腑，與胃相通。大腸合度，經絡和中，亡魂受化，改體容隆。急急如元始度人律令。

回靈養素天尊

宣焚生膽生精生汗符

靈炁所聚，神炁混康，鎮於膽腑，赤書交光。精魄自樂，魂形堂堂，亡魂受化，玉膽生芒。急急如元始度人律令。

回靈養素天尊

宣焚生大腸生谷道符

黑白之炁，結生大腸，混合表裏，一體同堂。光散萬國，交樂七廊，亡魂受化，改貌形芒。急急如元始度人律令。

回靈養素天尊

宣焚生胃生水源符

黃淡之炁，胃管生津，安鎮神室，一體生光。魂魄歸伏，神精效靈，亡魂受化，大道同明。急急如元始度人律令。

回靈養素天尊

宣生三焦三宮符

淡白之炁，三焦無藏，生津自然，往來混昌。重樓通道，骨節開張，亡魂受化，更生人鄉。急急如元始度人律令。

回靈養素天尊

宣生心生胞絡生百脉符

黃白之炁，結胞絡生，五谷所變，一體光明。神寧魄淨，靈炁魂清，亡魂受化，與道合并。

回靈養素天尊

準上帝敕，謹請靈寶玄局青帝護魂君，白帝侍魄君，赤帝養炁君，黑帝通血君，黃帝中主君，聚魂功曹，聚炁功曹，聚形功曹，還魂功曹，復魄功曹，合形功曹，合靈功曹，一行官吏。疾赴壇前，為係薦亡靈，中理五氣，混合百神，一如靈寶玄壇律令。

宣焚全形符

東方紅杏育蒼英，南方襪膈養炎精。

西方摩真司瑞澤，北方墨黑度玄津。

中央靈寶玄元始，五炁旋虛妙入神。

癱攣跛痾蒙伸曲，耳目無聰返慧明。

自害自刑俱復體，墮胎傷折得回魂。

中毒夭亡皆強體，雷嗔暗馘得全靈。

青帝護魂肝木旺，赤帝養炁心火亨。

白帝侍魄生成肺，黑帝通血腎玄清。

黃帝中主脾土安，梵炁彌羅自合真。

起死回骸鍊離坎，白骨成人萬炁明。

濟度垂死无生滅，九和十合結胎嬰。

五老運靈監受度，逍遙變化宴上清。

回靈寶養素天尊

金液玉精，拯百骸而具體。黃房紫戶，妙一炁以生神。荷帝師曠蕩之恩，感仙靈威神之力。心無苦惱，身有光明。雖形魂可遂於超騰，奈冤累猶懷於執對。幸承丹渥，均會玄壇。宜體道化之慈悲，休分秦越。共識法門之平等，勿起愛憎。三毒波澄，六塵烟散。無人無我，齊登解脫之鄉。為友為朋，均證逍遙之路。玉符所告，如律奉行。見前亡爽，普及冤親。各宜整肅，恭伺

天恩。

### 解冤釋結天尊

準上帝敕，請靈寶解冤釋結靈官，五經博士，能談善說靈官，如意萬司解釋冤對三大神，疾赴壇前，為係薦亡靈，開釋仇讎，和同冤對，一如靈寶玄壇律令。

### 宣焚解冤符

陰景長夜，幽幽冥冥。億劫天光，黑風飄零。元始開化，諸天齊明。玉符所至，萬神敬聽。解冤釋結，執對和平。孽垢消蕩，斬絕地根。身乘玉虛，開度福庭。

### 宣焚和釋冤對符

符命開度，大神衍行。冤仇執對，和釋來臨。明承符命，不得留停。長夜開泰，溥睹光明。齊同慈愛，異骨成親。

### 宣焚拔擧解冤符

靈寶符命，焚蕩罪緣。冤恨消散，宿債停輪。解釋冤結，永滅惡根。北司銷籍，鍊化成人。慈光灌育，上升玉庭。百體虛明，千冤開悟。一真澄寂，萬類消鎔。回祖炁以返還，滅惡根而容與。

盍蕩黃華之水，更聽綠字之章。克保仙飛，永超塵劫。見前靈爽，普及冤親，共赴蘭湯，慈悲引導。

### 醫治全形科

伏以成象成形，混沖和而立人極。善生善死，凝恬淡以葆天常。百神羅絡於華房，萬炁周流於玄谷。本無虧欠，寧有疾傷。自業機鑿混沌之根，而塵網溷陰陽之祖。寒暑燥濕，鼓二堅以乘危。地水火風，結三彭而構釁。陽天既殞，陰景斯羈。心未忘於生前，病源猶在。冤復懷於歿後，業海深。況經絡榮衛之支離，有魂魄精神之蕩失。孰伸援手，第劇寒心。是以元始法王虛皇教主，布慈雲於三洞，流法雨於十華。建仙醫天曹，運神丹而灌注。崇解結神吏，飛聖象以調和。降靈寶三八之曹，役混元二六之將，為奔飛於死炁，俾返復於生神。澤溥九幽，恩沾八極。今之夜奉為齋主某，開度某人。已奉紫宸之命，幸提黑鬱之魂。來詣玄壇，將朝玉陛。切慮亡故某，歷世遺疾，雖形散而神或鬱紆，歷劫遭冤，縱

命沉而性猶束縛。五臟六腑之已壞，百體九竅之莫完。匪藉神功，曷全靈質。綠章露奏，已頒降於玄曹。丹篆風行，盍昭宣於洪澤。茲伸召役，宜副翹傾。庶昭息黥補劓之勳，毋增續長截短之嘆。玄科煥耀，次第頒宣。稽首皈依，召役如法。

### 還形返生天尊

心為形主，心安而形亦安。形乃病都，心病而形亦病。倘心病之未愈，豈形體之能痊。謹召靈寶玄局天醫，尚藥一行官吏，普請真慈，隨我神運。以靈丹神芝雲腴玉醴，為亡故某人，醫治疾傷，斷除心病。急急如靈寶玄壇律令。

### 焚天醫靈官符

### 焚治病功曹符

### 焚亡人何病身亡符

冤由心造，心空而冤亦空。冤逐業生，心有而業亦有。凡業冤之未釋，因心冤之不忘。謹召靈寶玄局解冤釋結靈官一行官吏，溥請真慈，隨我神運，以軟言調伏異骨成親。為亡故某人，齊同慈愛，解脫心冤。急急如靈寶玄壇律



令。

焚解冤釋結三符

心病已除，心冤復釋。慧源瑩徹，高臺凝曉鑑之輝。覺海澄清，碧漢掛秋蟾之影。猶慮神隨炁散，炁逐神馳，形體既墮於陰冥，神炁易全於陽耀。盍召攝其生炁，為整具其形神。庶得神御炁而炁留形，可使心藏神而神保命。混元本始，無欠無餘。謹召十二炁混元化生大將軍一行官吏，隨我神運。為亡故某人，攝召生炁，返復靈根。急急如靈寶玄壇律令。

焚混元十二炁十二符

凝生炁於紫戶，青房已全陽質。降真神於金樓，玉室庶化陰靈。俾羅絡以成人，可飛騰而御景。謹召三部八景二十四神，隨我神運。為亡故某，鎮安百體，榮固三田。急急如靈寶玄壇律令。

焚三部八景符

神炁為生死之根宗，形骸乃神炁之廓。神炁和合，形乃得生。神炁分離，形斯趨死。今復初生之神炁，可還未

死之形骸。九竅光華，百關煥映。步武輕盈而容與，精神洞朗以光明。伏願亡故某，澄清受病之源，疏淪結冤之本。保合生炁，毓養真神。超二極以長存，復三元而不老。既完芝宇，請赴蘭湯。法眾運誠，慈悲引導。

慈悲接引天尊  
引旛詣浴室前

靈寶領教濟度金書卷之二十九

靈寶領教濟度金書卷之三十

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

沐浴儀

先置淨水一器在道前

召魂全形畢

法師詣道前上香

具位臣某，誠惶誠恐，稽首頓首，再拜上言。臣聞北艷黑鬱，迷途揚五濁之泥。東井黃華，定水度三清之岸。既返魂於冥漠，期濯質於紛葩。敢扣虎關，庸伸蟻悃。以今奉為齋主某，開度亡故某人。切慮根塵互染，業垢交周。陰景棲遲，已昧靈源之澄湛。陽光快睹，未還覺海之清明。敬資疏淪之功，庶顯陶鎔之妙。欲望玄尊垂憫，至聖興憐。道炁化八解之池，靈光變五香之室。儀璘映耀，慈雲滄藹以交羅。河漢流

輝，法雨紛飛而遍洒。容臣仗茲神水，挹彼甘泉。候沐浴於靈儀，爲激揚於障累。澡身浴德，俾回本始以虛靈。鍊質蕩形，得證逍遙而快樂。拳拳心禱，翼翼神馳。臣不勝祈恩，伺命之至。

次再拜，捧水當心，以楊枝攪旋，衆誦隱語。

法師存變。獨念瞻仰頌：

巍巍道德尊，功德已圓齊，降身來接引，師寶自相携。慈悲洒法水，以用洗群迷，永度三清岸，長辭五濁泥。

天河灌沐天尊

引水詣浴室前

衆誦變化浴室呪

太玄之水，天一之精，開明三景，梵炁流井。雲泉甘露，金真降靈，變化浴室，天地同清。內外洞朗，香霧芳盈，今日沐浴，道炁光明。

法師以盂中水，分置正魂浴室中，及男女二室，以楊枝洒之，行持如前。

泠泠甘露，羽枝飛洒於紫虛。飄飄素華，梵炁彌綸於空際。九鳳灌玄泉之

彩，五龍吐靈液之精。玉女金童，衛蘭湯而高映。石景水母，蔭芝室以流明。仰荷宸恩，式符至願。伏願浣濯官吏，沐浴仙靈，宣德傾光，叶恭效職。伺提魂而來格，爲蕩質以回靈。天步高躋，地塵永謝。清衆運誠，引魂沐浴。

清水度魂天尊

引旛詣浴室前

陰靈陽耀，攝魂魄以來臨。天清地寧，運聖神而莫測。惟茲功德水，發自智慧源。內可咽漱三田，流華五炁。外可澄清百體，蕩滌千愆。洗愛網趨解脫之門，灌冤輪歸逍遙之徑。神閑意定，性徹心融。何幸靈儀，躬承帝渥。聆寶釋琳琅之韻，聽雲章縹緲之音。伏望正度亡魂，端肅身心，虔誠就浴。其有冤親一衆，宜分男女兩班，俱藉慈悲，各趨左右，疏淪有漏，證悟無爲。清衆運誠，加持功德。

黃華蕩形天尊

焚符，道衆捲簾，引旛

入浴室，再下簾

三途熱惱，鎖鬱勃之迷雲。萬聖慈悲，

洒清涼之甘露。欲超騰於苦海，宜灌沐於華池。沐浴東井呪，今當宣誦。

天河灌東井，石景水母精。圓光拂靈耀，玄輝映高明。元始披長夜，天人逐月生。沐浴蘭池上，龍負長庚瓶。金童散香花，玉女流五星。冠帶濯玉津，鍊度生仙形。體香萬神降，乘景登高明。

黃華蕩形天尊

焚符

寒庭悲恨，悵業垢之牽纏。道岸高華，假靈津而利濟。正翻身於濁浪，方穩步於清都。三元品戒沐浴蕩穢呪，今當宣誦。

天炁澄清，五色高明。日月吐輝，濯質身形。神真內盥，香湯鍊精。光景洞耀，煥映上清。炁不受塵，五府納靈。罪滅三途，禍消九冥。身得開度，升入帝庭。

黃華蕩形天尊

焚符

塵識流吹，緣千生之結習。甘泉灌沐，還一性之精明。欲洞煥於靈光，盍蕩

除於宿累。九真沐浴鍊真呪，今當宣誦。

太一高真，九靈之精，使魂飛仙，上登紫庭。沐浴華池，神目澄清，精通太虛，萬炁自生。

### 黃華蕩形天尊

#### 焚符

祖炁紛葩，假慈風而掃蕩。魂神澄正，憑法水以沾濡。惟盥滌於六塵，庶齊仙於萬炁。淨魂返形呪，今當宣誦。  
天炁朗清，我身已寧，塵穢消除，九孔受靈。使者變易，返魂復形，幽靈超度，皆得飛輕。

### 黃華蕩形天尊

#### 焚符

夜壑開明，藉宸輝之照耀。客塵滓穢，資神力以陶澄。既瑩徹於身心，得超凌於神炁。綠字回言內景呪，今當宣誦。  
天靈地榮，九源肅清，五官六府，神華鮮明。三光鎮固，萬炁充盈，金房度命，綠字更生。

### 黃華蕩形天尊

#### 焚符

回生起死，開黑鬱之幽關。蕩濁還清，資丹華之聖澤。庶溥受於開度，庸疾悟於靈明。丹陽沐浴鍊度呪，今當宣誦。

龍漢蕩蕩，無形無名，眇眇億劫，黃道開清。神燈朗耀，九魂吐精，玉盧澄輝，太霞高明。元始開化，諸天齊臨，三元道養，二象攝生。未度者度，未成者成，已死即化，已枯即榮。蠢動蝸息，一切冥靈，懷胎含孕，咸得受形。亡者命過，魂歸三清，魄受鍊度，南宮變形。今日大吉，皆得光明，五帝鑒映，普告萬靈。天地神祇，及諸河源。五嶽四瀆，及諸名山。洞原洞虛，洞空洞仙，無極大聖，至真尊神。無窮無極，普鑒度生，地根斷絕，玄都記名。衆神普應，一切咸聽。

#### 焚符

達生死岸，玄泉整具於形神。成清淨身，妙相端嚴於容止。載惟英爽，乍脫冥關。陰翳昏蒙，心相六銖之纖麗。幽塵飄拂，神馳七寶之輕盈。雖云湯

沐之澄清，猶望衣冠之蠲潔。映三光而容與，佩服圓明，合二景以端嚴，威儀濟楚。方證長生之徑，疾超不死之鄉。伏望金木仙靈，巾笥官吏，廓施妙化，密運神功。變煙綃霧縠之奇，成玉相金容之妙。仙衣火鍊，寶篆風揚。清衆運誠，贊揚功德。

### 金容玉相天尊

#### 焚符

雲液澄澄，蕩塵蒙於性海。霓裳楚楚，儼服御於仙儀。惟內外之具嚴，表形神之俱淨。無極仙衣呪，今當宣誦。  
九曜扶衰，真炁變衣，四神合衛，五緯交輝。炁分羅綺，綵集宣威，六合扶挾，三炁清微。玉真燦爛，仙女齊飛，圓景素明，元始慈悲。

### 金容玉相天尊

#### 焚符

龍章變化，成五彩之彰施。鳳縷輝華，象諸天之妙麗。既稱情而妙用，可任意以逍遙。金精冠帶呪，謹當宣誦。  
金精冶鍊，散炁玄黃，丹池沐浴，真炁芬芳。二景冠帶，天爲隱藏，左振玉

佩，右帶金璫。洗除諸穢，遊行紫房。

金容玉相天尊

焚符

元炁充盈，滌迷情於定水。生身受度，端法體於天衣。宜綠界以升騰，覲紫闈而遊宴。金池冠帶呪，今當宣誦。

金真降靈，普天氣清，鍊化金池，沐浴身形。三炁煥燿，我道日明，飛仙羽衣，上升玉京。

清陰精陽炁之塵，黃華澡雪。備上衣下裳之妙，綵服陸離。自然神采之輝澄，宣藉天恩之曠蕩。伏願亡故某，萬緣湛寂，一性虛明。悟色身之既空，知本來之無垢。光浮幡影，步逐鈴音，趨丹陛以班朝，企玄壇而肆覲。星河璀璨，風籟虛徐，清衆運誠，慈悲接引。

慈悲接引天尊

引幡詣壇前

伏以企楓禁於龍宸，巍巍大梵。露葵衷於虎拜，翼翼小心。仰惟視聽之高明，俯鑒精虔之激切。恭行欵謁，爰謝提携。亡故某，福藉良因，慶逢正化。魂超陰地，乘功德金色之光。身際陽

天，睹慈悲玉毫之相。宣爲欣幸，難極敷揚。敢趨八陛之嚴，潔己以進。虔扣九關之邃，盛服而朝。伏請靈儀，虔誠信禮。

大有玉清宮景無窮壇下亡靈，謹致恭朝帝宗。和：大聖元始天尊。

七寶紫微宮景無窮壇下亡靈，謹致恭朝教宗。和：大聖靈寶天尊。

太清太極宮景無窮壇下亡靈，謹致恭朝化宗。和：大聖道德天尊。

威顏咫尺，願殫事帝之儀。庸敬再三，幸罄朝天之禮。靈光灌沐，道氣扶搖。得聽法以聞經，可登真而度命。願移步武，前赴凡筵，清衆運誠，慈悲引導。

衆吟瞻仰頌，引幡歸靈座

善哉元始尊，衆生慈父母。傾光紫微宮，曲映九幽戶。峨峨丘寒庭，回照廓冰浦。炎炎烈火獄，霈然洒法雨。圓通大哀智，常善濟衆苦。拔度長夜魂，今當稽首禮。亡故某人，脫九幽冥昧之鄉，登三晨光華之界。返還生炁，心病除而人我兼忘。蕩滌死塵，性海澄而容儀自在。實依帝力，獲保天根。思

地禁之淒涼，不堪回首。際天光之快樂，惟劇歸心。請容與於高帷，俟獻陳於精饌。丹陵鍊質，碧落游神，稽首皈依無極大道。

靈寶領教濟度金書卷之三十一

靈寶領教濟度金書卷之三

十一

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

祝食儀

大聖元始天尊

大聖靈寶天尊

大聖道德天尊

三尊聖號不思議，普為亡靈薦福禧。  
仰扣高明垂昭鑒，願於今日體慈悲。  
重重念善皆無量，浩浩良因自有期。  
惟願亡靈乘道力，永辭苦海步雲梯。

和：不可思議功德。

伏以金飯玉漿，嚙御陟九清之界。交  
梨火棗，餐嘗超五濁之鄉。欲道岸之  
先登，宜法橋之穩駕。亡故某人，駒窗  
倏忽，蟻磨循環。驚逝水之不迴，幸離  
陰暗。悵藏舟之何在，快睹陽明。欣

逢開泰之期，爰捧潔馨之薦。神功變  
化，攝三景之華芒。梵炁氤氳，飛五靈  
之甘露。雲霞錯落，霞饌芬芳。騫香  
流七津，陶神津而三宮潤澤。妙道生  
一炁，迴祖炁而百體敷華。微羽袂以  
加持，啓瓊函而宣演。伏願真機不昧，  
覺體長存。鑒淪祭之弗彝，矜齋誠之  
克享。充悅法食，開闢仙基。清衆運  
誠，贊揚功德。

焚符

奉為亡故某人，靈魂仗茲，往生仙  
界。念玉清慧命啓請呪。

稽首冥慧虛無尊，稽首皈命重玄主。  
裁成天地無德稱，悉為衆生作恃怙。  
慈悲五道轉輪迴，哀救三塗地獄苦。  
皈命金闕天中尊，皈命六道慈悲父。  
皈命玉清無上尊，永離生死長綿綿。  
出有入虛無所待，能令枯朽變成仙。  
千劫萬劫難一遇，為衆廣說業因緣。  
迴骸起死永長存，使其形神無變遷。

金容玉相天尊

靈圖煥景，飛丹詔以風行。元炁開幽，  
扇黑塵而雲散。既荷提携之德，載歌

定慧之章。庸薦靈儀，從容受食。

焚符

奉為亡故某人，靈魂仗茲，往生仙  
界。念破酆都開業道呪。

茫茫酆都中，重重金剛山。靈寶無量  
光，洞照炎池煩。七祖諸幽魂，身隨香  
雲繙。定慧青蓮華，上生神永安。

逍遙快樂天尊

雲囊啓秘，提六洞以超凌。霞醴流精，  
慮百關之鬱結。期潤玉樓之邃，載歌  
金色之章。庸薦靈儀，從容受食。

奉為亡故某人，靈魂仗茲，往生仙  
界。念玉清甘露通真呪。

功德金色光，暉暉開閻幽。華池流真  
香，蓮蓋隨雲浮。千靈沖元和，常居十  
二樓。急宣靈寶旨，自在天堂遊。

法雨流潤天尊

瓊漿鳳饌，實天地之英華。玉笈龍文，  
結陰陽之精粹。欲復英風之舊，載歌  
甘露之章。庸薦靈儀，從容受食。

焚符

奉為亡故某人，靈魂仗茲，往生仙  
界。念玉清甘露法食呪。

回首仰圓羅，合景挹靈芒。拘魂制七魄，思審定中央。行住禮虛無，寢息宴雲房。飢飡黃蘗花，渴飲瓊根漿。神精命大魔，合體鍊真光。復照觀太無，長在空中遊。玄通敏波際，真化靡終期。縹緲無終始，賢者當明知。寂寥玄理教，應運闡宏規。降道不自照，要當先所施。會歸無二處，隨心自合離。

清涼甘露天尊

紫文丹策，昭度命之津梁。玉醴金津，妙登真之徑路。欲暢百骸之樂，載歌六梵之章。膺薦靈儀，從容受食。

焚符

奉為亡故某人，靈魂仗茲，往生仙界。念玉清秘梵開藏腑法食呪。

水火聚散路，神炁往來衢。焰焰焦枯盡，臟胃五方枯。玉液迴清涼，玄漿通潤舒。真香流百脉，逍遙常自如。

焚符

奉為亡故某人，靈魂仗茲，往生仙界。念靈梵清涼法食呪。

瀏瀏崑崙泉，泛泛玉源炁。施運庭苑中，幽香徹天地。玉女灌真香，玄厨擁

祥瑞。服之億萬年，體力悉殊異。

焚符

奉為亡故某人，靈魂仗茲，往生仙界。念玉梵甘露法食呪。

召聚玄元炁，濃噴流乳漿。黃華洞霄珍，潤液多滋涼。桂蒲雜靈根，冉冉通肺腸。百神解歌舞，來遊無何鄉。

焚符

奉為亡故某人，靈魂仗茲，往生仙界。念大梵恩重法食呪。

異實出靈芳，浮玉瑩清光。泛景藹靈炁，廣滿難充量。神清得超度，當遊妙化堂。元周扣玄機，壽永椿劫長。

焚符

奉為亡故某人，靈魂仗茲，往生仙界。念寶梵玉函法食呪。

寶梵演通妙，開關溢九幽。慶化精殊珍，瑞色長浮浮。餐餐法炁盛，深羽翠華樓。洗濯積劫穢，穩步朱宮遊。

焚符

奉為亡故某人，靈魂仗茲，往生仙界。念真梵通玄法食呪。

長關天色光，燁燁映寶器。玄通無上

食，靈寶無上味。高真所樂施，法音靡不至。快樂復飽滿，浮遊三界外。

蘇陀抹味天尊

芝厨鬱勃，煥七寶之靈光。藥簡羅敷，開五明之妙炁。欲固三華之妙，載歌八會之章。庸薦靈儀，從容受食。

焚符

奉為亡故某人，靈魂仗茲，往生仙界。念三光流精鍊化法食呪。

妙道生一炁，炁中分陰陽。凝化日月星，燦然流三光。九華合九道，八色映八方。煥爛洞真體，流精皈大芒。下生淵源宮，上徹無何鄉。縱體復飛跡，欻然都相忘。七寶流精結，混沌雜華房。嚙服九雲散，此樂殊未央。

焚符

奉為亡故某人，靈魂仗茲，往生仙界。念三光澤嬰鍊化呪。

玄絕九氣中，澤嬰觀太无。鬱儀煥暘谷，結璘耀天衢。五星流寶光，斗極迴乾樞。梵炁鬱勃散，咽御方踟躕。超跡天寶階，鍊芝服華敷。炁布萬神備，舉形升太虛。

焚符

奉為亡故某人，靈魂仗茲，往生仙界。念三光法氣鍊化呪。

浩精生法氣，氤氳凝天中。兩曜共澄徹，五緯交相通。三光煥已明，寶炁盈三宮。帝鄉會九老，咽服百骸豐。金華照光景，身與日月同。念道上聖前，萬劫壽無窮。

焚符

奉為亡故某人，靈魂仗茲，往生仙界。念三光玉陽鍊化呪。

玉陽正真炁，妙道三景分。玄和唱靈音，八會敷瓊文。五老宴丹澤，飄飄乘景雲。大聖諸天衆，迴駕飲玉津。三五定生籍，遊戲太上賓。華光朗無際，携手朝玉宸。

焚符

奉為亡故某人，靈魂仗茲，往生仙界。念三光雲華鍊化呪。

引炁鬱羅外，九芒結雲華。七晨高上道，三景耀朱霞。捧香服晨精，功滿解世羅。鍊化塵劫盡，億劫不為多。落籍三界庭，結友太上家。御景拱玄斗，

八極何足賒。

焚符

奉為亡故某人，靈魂仗茲，往生仙界。念三光導仙鍊化呪。

自然至真道，妙極玄中玄。萬天朝玉陛，五老參華軒。三光有靈炁，所度惟聖賢。勤行道仙業，咽嗽吞華根。神形合三象，渺渺歸本根。鳳鳥翔十天，飛舉不顧還。

焚符

奉為亡故某人，靈魂仗茲，往生仙界。念三光寶炁鍊化呪。

迢迢三天上，落落九玄臺。金童採芝集，玉女持華回。天寶挹仙客，俯仰升瑤階。天河灌東井，寶炁營空來。嚙納漱瓊津，兆劫不復衰。矯首三清路，振衣何樂哉。

焚符

奉為亡故某人，靈魂仗茲，往生仙界。念三光定光鍊化呪。

至矣上真道，妙哉靈寶章。吸景導五星，咽嗽存華芒。流精灌百體，皓晶凝雪霜。洞達照內外，塵滓都消亡。體

肌不復老，契此名定光。永宴太明館，斯為不夜鄉。躡跡歸本根，九轉凝真常。

變化無盡天尊

玄都紫闕，開梵唱以歸真。霞饌雲漿，燦華英而嚙景。欲備形神之正，載歌生育之章。庸薦靈儀，從容受食。

焚符

奉為亡故某人，靈魂仗茲，往生仙界。念陰生梵唱生魂育魄呪。

靈芝無根，衆化之原，中凝七魄，上結三魂。二十四真，出入無門，杳冥之內，恍惚之中。隨劫存亡，逐炁而生，外凝混朴，內養七經。五神植華，三台敷榮，紫闕素童，返形皈英。騰雲而升，騁霧浮空，中有玉真，號曰神公。左挾無英，右衛白元，玄獸過後，丹禽攤前。上浮翠蓋，下湧金蓮，香炁凝空，甘露無窮。食之無盡，尋源不終。

弘濟無邊天尊

三華寶曜，凝雲液於玄符。八角垂芒，燦霞光於碧落。欲妙不窮之化，再歌無量之章。庸薦靈儀，從容受食。

焚光明玉字符

亶婁阿耨，無想觀音。須延明首，法攬  
菩曇。稼那阿奕，忽訶流吟。華都曲  
麗，鮮菩育臻。答落大梵，散烟慶雲。  
飛灑玉都，明魔上門。無行上首，回蹠  
流玄。何陀龍羅，四象吁員。

大慈平等天尊

洞章振響，一真澄湛於靈源。妙供森  
羅，萬竅光華於法味。無邊利益，不盡  
莊嚴。伏願亡故某人，飲元和，餐華芒，  
帝鄉遊宴，駕虛無，乘眇莽，仙圃翱翔。  
請宴坐於几筵，俟奉行於鍊度。膺圖  
御籙，佩戒登真，稽首皈依無極大道。  
為上良緣，志心稱念。

廣度沉淪天尊

和：不可思議功德。

靈寶領教濟度金書卷之三十一

靈寶領教濟度金書卷之三

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

安鎮儀

天門外上香，啓白：

具位某，上啓靈寶空洞內音玉字流傳下  
教三師真人。伏以三洞垂光，丹笈著  
齋修之典。五靈列位，玄壇垂安鎮之  
儀。惠浹幽明，式傳今古。某幸因宿  
運，獲紹宗風。領詞告齋，盍昭宣於帝  
澤，升壇闡事，先敷露於真文。惟貽凌  
躡之愆，亶賴照臨之造。願迂霞馭，來  
駐雲幃。法衆運誠，修齋奉請。

舉修齋頌 獻茶

具位某，上啓三師真人。伏聞九光結  
氣，八會垂芒。或沉或浮，顯自然之玉  
字。乍遐乍邇，照大梵之內音。鍊生

魄於朱宮，度死魂於幽夜。今有齋主某  
資薦某人，崇建某齋。敢先事以開陳，  
請依科而敷露。冀垂鑒映，俯察懇祈。  
恭願凝妙天根，鍊質洞陽之館。削愆  
地簡，怡神流火之庭。五方真文，請師  
安鎮。

五方安鎮天尊

入天門 上東方香

東方九炁天君

東方真文請師安鎮

師執真文香上薰

宣真文 宣畢置案上，以金龍

奠之。

亶婁阿耨，無想觀音。須延明首，法攬  
菩曇。稼那阿奕，忽訶流吟。華都曲  
麗，鮮菩育臻。答落大梵，散烟慶雲。  
飛灑玉都，明魔上門。無行上首，回蹠  
流玄。阿陀龍羅，四象吁員。

臣衆等志心皈命，東方九炁天君，東鄉  
神仙諸靈官。今有某人追薦某人，依按  
明真玉匱，女青典令，齎金繒龍璧，上  
奉九炁天君，用伸拔度。臣謹上請九炁  
青天蒼靈生神真人，從以青龍騎吏，承



東方諸天元始自然玉文，告下東方無極世界土府神鄉洞空洞無洞玄洞元九炁總司三界冥靈無極神王，開九幽長夜之府，拔度某人靈魂，沐浴，冠帶，衣食，自然遷上南宮，長在光明，魔無干犯。一切神靈，侍衛安鎮，悉如元始明真舊典女青律令。

### 焚符

東方九炁天文青帝女青符命，奉爲修齋弟子某，安鎮東方九炁天君，拔度某人，出離冥途。東嶽泰山明承符命，恭遵典令，火急奉行。元始敕下，五老監盟，濟度群品，瞬息無停。今日大慶，欣喜蒙恩，諸天懽悅，安鎮東方。

### 南方三炁天君

#### 南方真文請師安鎮

#### 師執真文香上薰

宣真文 宣畢，置案上以金龍奠之。

南閻洞浮，玉眸詵詵。梵形落空，九靈推前。澤洛菩臺，綠羅大千。眇莽九醜，韶謠緣遭。雲上九都，飛生自騫。那郁育馥，摩羅法輪。靈持無鏡，攬姿

運容。馥朗廓奕，神纓自宮。

臣等志心皈命，南方三炁天君，南鄉神仙諸靈官。今有某人追薦某人，依按盟真玉匱女青典令，齎金繒龍璧，上奉三炁天君，用伸拔度。臣謹上請三炁赤天赤靈生神真人，從以赤龍騎吏，承南方諸天元始玉文，告下南方無極世界土府神鄉洞空洞無洞玄洞元三炁總司三界冥靈無極神王。開九幽長夜之府，拔度某人靈魂，沐浴，冠帶，衣食，自然遷上南宮，長在光明，魔無干犯。一切神靈，侍衛安鎮，悉如元始明真舊典女青律令。

### 焚符

南方三炁天文赤帝女青符命，奉爲修齋弟子某人，安鎮南方三炁之天，拔度某人，出離冥途。南嶽衡山，明承符命，恭遵典令，火急奉行。

元始敕下，五老監盟。濟度群品，瞬息無停。今日大慶，欣喜蒙恩。諸天懽悅，安鎮南方。

### 西方七炁天君

#### 西方真文請師安鎮

師執真文香上薰  
宣真文 宣畢置案上，以金龍奠之。

刀利禪猷，婆尼咎通。宛藪滌色，大渺之堂。流羅梵萌，景蔚蕭嶠。易邈無寂，宛首少都。阿縵郁竺，華漠延由。九開自辯，阿那品首。無量扶蓋，浮羅合神。玉誕長桑，栢空度仙。

臣衆等志心皈命，西方七炁天君，西鄉神仙諸靈官。今有某人追薦某人，依按明真玉匱女青典令，齎金繒龍璧，上奉七炁天君，用伸拔度。臣謹上請七炁素天白靈生神真人，從以白龍騎吏，承西方諸天元始自然玉文，告下西方無極世界土府神鄉洞空洞無洞玄洞元七炁總司三界冥靈無極神王。開九幽長夜之府，拔度某人靈魂，沐浴，冠帶，衣食，自然遷上南宮，長在光明，魔無干犯。一切神靈，侍衛安鎮，悉如元始明真舊典女青律令。

### 焚符

西方七炁天文白帝女青符命，奉爲修齋弟子某人，安鎮西方七炁之天，拔度

某人，出離冥途。西嶽華山，明承符命，恭遵典令，火急奉行。元始敕下，五老監盟。濟度群品，瞬息無停。今日大慶，欣喜蒙恩。諸天懽悅，安鎮西方。

北方五炁天君

北方真文請師安鎮

師執真文香上薰

宣真文 宣畢，置案上，以金龍奠之。

獲無自育，九日導乾。坤母東覆，形攝上玄。陀羅育邈，眇炁合雲。飛天大醜，總監上天。沙陀劫量，龍漢瑛鮮。碧落浮黎，空歌保珍。惡奕無品，洞妙自真。元梵恢漠，幽寂度人。

臣衆等志心皈命，北方五炁天君，北鄉神仙諸靈官。今有某人追薦某人，依按明真玉匱女青典令，齋金繒龍璧，上奉五炁天君，用伸拔度。臣謹上請五炁玄天黑靈生神真人，從以黑龍騎吏，承北方諸天元始自然玉文，告下北方無極世界土府神鄉洞空洞無洞玄洞元五炁總司三界冥靈無極神王，開九幽長夜

之府，拔度某人靈魂，沐浴，冠帶，衣食，自然遷上南宮，長在光明，魔無干犯。一切神靈，侍衛安鎮，悉如元始明真舊典女青律令。

焚符

北方五炁天文黑帝女青符命，奉爲修齋弟子某人，安鎮北方五炁之天，拔度某人，出離冥途。北嶽恒山，明承符命，恭遵典令，火急奉行。

元始敕下，五老監盟。濟度群品，瞬息無停。今日大慶，欣喜蒙恩。諸天懽悅，安鎮北方。

中央一炁天君

中央真文請師安鎮

師執真文香上薰

宣真文 宣畢，置案上，以金龍奠之。

黃中理炁，總統玄真，鎮星吐輝，流鍊神宮。臣衆等志心皈命，中央一炁天君，中央神仙諸靈官。今有某人追薦某人，依按明真玉匱女青典令，齋金繒龍璧，上奉一炁天君，用伸拔度。臣謹上請一炁黃天黃靈生神真人，從以黃龍

騎吏，承中央元始自然玉文，告下中元九壘土府無極神鄉四維總靈十二神宮黃元靈紐高真土皇。開九幽長夜之府，拔度某人靈魂，沐浴，冠帶，衣食，自然遷上南宮，長在光明，魔無干犯，一切神靈侍衛安鎮，悉如元始明真舊典女青律令。

焚符

中央一炁天文黃帝女青符命，奉爲修齋弟子某，安鎮中央一炁之天，拔度某人，出離冥途。中嶽嵩山，明承符命，恭遵典令，火急奉行。

元始敕下，五老監盟，濟度群品，瞬息無停。今日大慶，欣喜蒙恩，諸天懽悅，安鎮中央。

又念

無上至真，大聖高尊，布化運炁，三十二天。八會九光，自然成文，安鎮地土，保制劫年。元始符命，普告三元，下敕九地，上關諸天。中告海嶽，名山大川，今日上告，萬神咸聞。弟子某乙，修齋行道，拔度亡魂，三官九府。削滅惡根，永度三途，五苦之根，世世受福。

記名丹篇，神生天堂，鍊化自然，生死開度。億萬長年，九天告命，風火驛傳。

向來安鎮諸天內音，功德周圓。伏願三塗罷對，萬類均歡。九壘幽沉，悉被提携之賜。八冥枯朽，普承生育之恩。稽首皈依無極大道。

### 起鎮儀

東方九炁天君

師上東方香

東方真文請師起鎮

師執真文香上薰

宣真文 宣文畢，焚於本方。

臣謹重誠，上啓東方九炁天君，東鄉神仙諸靈官。以今某人肅建齋壇，拔度亡爽，夙宵行道，禮念玄真，仰荷天恩，俯垂監映，法筵告罷，齋事圓成，恭啓真文，解壇散席。臣謹上請東方九炁青靈宮中青靈童子，明承東方諸天元始自然玉文女青符命，告下東方無極世界九幽長夜之府，拔度某人靈魂，上升南宮，快樂無爲。東嶽泰山，遵依元始明真舊典女青律令，火急奉行。

元始勅下，五老監盟。濟度群品，瞬息無停。今日大慶，欣喜蒙恩。諸天懽悅，起鎮東方。

南方三炁天君 師上南方香

南方真文請師起鎮

師執真文香上薰

宣真文 宣文畢，焚於本方。

臣謹重誠，上啓南方三炁天君，南鄉神仙諸靈官。以今某人肅建齋壇，拔度亡爽，夙宵行道，禮念玄真，仰荷天恩，俯垂監映，法筵告罷，齋事圓成。恭啓真文，解壇散席。臣謹上請南方三炁丹靈宮中丹靈童子，明承南方諸天元始自然玉文女青符命，告下南方無極世界九幽長夜之府，拔度某人靈魂，上升南宮，快樂無爲。南嶽衡山，遵依元始明真舊典女青律令，火急奉行。

元始勅下，五老監盟。濟度群品，瞬息無停。今日大慶，欣喜蒙恩。諸天懽悅，起鎮南方。

西方七炁天君 師上西方香

西方真文請師起鎮

師執真文香上薰

宣真文 宣文畢，焚於本方。

臣謹重誠，上啓西方七炁天君，西鄉神仙諸靈官。以今某人肅建齋壇，拔度亡爽，夙宵行道，禮念玄真，仰荷天恩，俯垂監映，法筵告罷，齋事圓成，恭啓真文，解壇散席。臣謹上請西方七炁皓靈宮中皓靈童子，明承西方諸天元始自然玉文女青符命，告下西方無極世界九幽長夜之府。拔度某人靈魂，上升南宮，快樂無爲。西嶽華山，遵依元始明真舊典女青律令，火急奉行。

元始勅下，五老監盟。濟度群品，瞬息無停。今日大慶，欣喜蒙恩。諸天懽悅，起鎮西方。

北方五炁天君 師上北方香

北方真文請師起鎮

師執真文香上薰

宣真文 宣文畢，焚於本方。

臣謹重誠，上啓北方五炁天君，北鄉神仙諸靈官。以今某人肅建齋壇，拔度亡爽，夙宵行道，禮念玄真，仰荷天恩，俯垂監映，法筵告罷，齋事圓成，恭起真文，解壇散席。臣謹上請北方五炁玄靈

宮中玄靈童子，明承北方諸天元始自然玉文女青符命，告下北方无極世界九幽長夜之府。拔度某人靈魂，上升南宮，快樂無爲。北嶽恒山，遵依元始明真舊典女青律令，火急奉行。

元始勅下，五老監盟。濟度群品，瞬息無停。今日大慶，欣喜蒙恩。諸天懽悅，起鎮北方。

中央一炁天君 師上中央香

中央真文請師起鎮

師執真文香上薰

宣真文 宣文畢，焚於本方。

臣謹重誠，上啓中央一炁天君。中央神仙諸靈官。以今某人肅建齋壇，拔度亡爽，夙宵行道，禮念玄真，仰荷天恩，俯垂監映，法筵告罷，齋事圓成，恭啓真文，解壇散席。臣謹上請中央一炁金靈宮中金靈童子，明承中央諸天元始自然玉文女青符命，告下中央无極世界九幽長夜之府。拔度某人靈魂，上升南宮，快樂無爲。中嶽嵩山，遵依元始明真舊典女青律令，火急奉行。元始勅下，五老監盟。濟度群品，瞬息

無停。今日大慶，欣喜蒙恩。諸天懽悅，起鎮中央。

又念

元始至真，大聖高尊，布化運炁，三十二天。八會九光，自然成文，安鎮地土，保制劫年。元始符命，普告三元，下勅九地，上關諸天。中告海嶽，名山大川，今日上告，萬神咸聞。弟子某乙，修齋行道，拔度亡魂，三官九府。削滅惡根，永度三途，五苦之根，世世受福。記名丹篇，神生天堂，鍊化自然，生死開度。億却長年，九天告命，風火驛傳。

向來宣演諸天内音，功德周圓。伏願衆真監度，九夜開光。空洞生神，極地永依於覆燾。飛玄結炁，溥天均戴於生成。稽首皈依無極大道。

寶華圓滿天尊

出天門送師

某上啓三師真人，伏以建齋行道，恪遵三洞之金書。拔苦濟幽，允賴諸天之玉字。幸壇盟之告備，獲齋福之周圓。重念某叨沐真班，獲承至教。五靈安

鎮，冒行紫素之科。四極敷羅，溥被玄黃之澤。雲輿順動，霞馭莫留，法衆運誠，修齋奉送。

送師

天尊號出壇

靈寶領教濟度金書卷之三十二

靈寶領教濟度金書卷之三

十三

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

破獄儀

靜默堂序立

華夏讚，引至大道前，長跪啓

白：

具位臣某，誠惶誠恐，稽首頓首，再拜上言。臣聞三籙垂文，清微啓度生之典。九幽闡教，赤明昭起死之科。敷曠蕩之宸恩，溥便蕃之帝化。既勤皈命，敢後陳情。伏念臣草芥微生，塵泥賤品，奉天符而領教，肯忘皎日之明。開地禁以升神，盍布慈雲之澤。今有齋主某崇建某齋，開度亡故某。普及幽明，冤親平等。深念羅酆六洞，泉曲九幽，悽悽之鐵壁周迴，慘慘之銅關峻極，千生

拘繫，萬劫昏冥。非憑智慧之靈光，曷使開幽而破暗。非賴威神之策杖，曷令毀鎖以張門。庸露懇祈，密依感應。許承光而下映，更頌杖以前行。容臣準勅召神，依科破獄。庶拯有情之苦趣，均超無極之神鄉。干冒神嚴，不勝戰慄之至。

天尊慧日，煥映重泉，光明幽夜，三景同輪。垂光耀彩，燦朗重昏，玉毫宛轉，金輝回旋。下燭幽關，斷滅魂烟，哀哉泉曲，萬劫沉淪。靈光一照，地獄開明，冰清春浦，暖散寒庭。臣今上請，願賜生成，願假慧光，照破酆城。鐵圍煥映，劍樹摧傾，普度尸魂，永離幽冥。

法師以符燭，就天尊前點分光畢，執之，運誠如儀。

天尊獅座御玄關，圓象華芒照鬱單。白玉流虹騰晝景，紫金映日耀朝暉。光舒九壘幽囚釋，彩煥三途考對閑。願假靈輝開地暗，乘晨鼓舞覲天顏。

和：不可思議功德。

法師以符燭，付侍燈執立于左。

天尊神化，應感無方，慈悲法灑，湛惠

寒鄉。鐵圍石壁，業網羅張，千遮萬鎖，幽閉無光。威神策杖，開廓八方，隨杖所指，獄戶飛揚。刀山劍樹，飄戟鋒傷，冥官稟令，炎烈清涼。臣今上請，願賜扶將，願假威力，照破羅酆。名除罪錄，昇陟天陽。永辭長夜，億劫無疆。

法師就天尊請策杖，執之，運神如儀。

天尊妙慧顯玄功，無量威神冠八雄。旛列三層飛縹緲，杖回九曲耀玲瓏。幽扃指處塵塵散，寒夜消摧業業空。願假杖威開地戶，超凌碧落萬天中。

法師以杖，付侍香執于右。

神輝鬱勃，靈仗威稜，上辭龍尾之墀，下啓虎頭之戶。皈依帝力，負荷天恩。更願嚴攝北酆，關開東極，降吉祥之甘露，敷慈惠之靈光，流潤九泉，開明五道。俾關超生之徑，永乘不死之舟。稽首皈依無極大道。

華夏贊，引符燭策杖前行，導法師至太一前，上香。

志心皈依，奏請東極天中長樂宮內大

慈仁者太一尋聲救苦天尊青玄上帝。具位臣某，恭焚寶香，虔誠上啓九幽慈父，三界導師，救苦天尊，青玄上帝。仰希應感，俯賜證明。臣聞碧落空歌，耀七寶騫林之景，紫虛鬱秀，儼九光蓮座之尊，威神救拔於衆生，慈憫周流於十界。音容快睹，消累劫之沉愆。名號遙聞，洗多生之業垢。巍巍聖化，切切愚情。以今奉爲齋主某崇建某齋，開度亡故某人。普及幽冥，冤親平等，慮沈寥鬼域，幽幽復隔於晨陽。眇莽神庭，寂寂常居於夜暗。銅關萬仞，鐵壁千尋，欲祈罪性之超凌，宣賴天威之震蕩。覲清微而請命，已領神恩。企長樂以皈心，更祈慧力。恭願尋聲赴感，應念垂慈。一一獄中，示紫金之妙相。塵塵刹內，灑空青之羽枝。開慶雲於生門，塞祥烟於死戶。提携萬類，鼓舞群靈，臣不勝激切之至。

華夏贊，引符燭策杖，法師至獄燈前，衆含呪，旋遶點燈。

九幽冥冥，萬劫無光，長夜幽魂，元始未通。華燈續明，下照土皇，開度七

玄，上升南宮。洞照一宅，世爲仙王。

灑淨 焚降真召靈符

具位臣某，謹焚寶香，虔誠奏啓太上無極大道虛無自然元始天尊，妙無上帝虛皇玉晨大道君妙有上帝，萬變混沌玄元老君，至真大帝，太乙救苦天尊，運明保元上帝，十方分身應化救苦天尊，九幽拔罪天尊，廣度沉淪天尊，無上至真諸天上帝，三元三官大帝，靈寶五師真君，天曹諸司真君，五嶽五天聖帝，北陰玄天酆都大帝，東霞扶桑丹林大帝，虛空鑒察城隍社令，三界應感一切威靈。臣聞五炁混芒，祖炁運無形之表。三才剖判，神功開有物之先。稟精粹以爲人，妙陰陽而度命。真源湛湛，去來不離於靈關。正性昭昭，生化豈離於聖域。自六塵之風動，致五賊之雲滋。道貌天形，觸迷途而顛倒。波情海慾，若覺地以漂流。三田散落於金華，四大彫殘於玉樹。沉沉夜壑，鬼神思報對之權。悄悄寒庭，魂魄受推研之苦，陽光不睹，陰暗難堪。是以上帝興憐，師真曲憫。金錄示然燈之

式，玉符昭破獄之文。普駕慈航，濟三途而離苦。密凝法炬，燭九夜之開光。俾悟天常，可超地禁。今有齋主某崇建某齋，開度亡故某人，普及幽冥，冤親平等。深慮十方苦爽，九壘囚徒，鐵堞深圍，慘陰風於萬雉。銅城密障，屯暗霧於千重。非賴仁恩，曷超靈識。伏望俯矜丹悃，曲運洪慈。神光散九地之輝，幽途罷對。靈杖頒三天之令，陰魄凌空。容微臣如律以宣行勅，冥吏承符而敬聽。敷心激切，俟命勤渠。臣不勝望恩之至。

九幽拔罪天尊

焚開陰曹符

上清靈寶玄壇，謹焚香，虔誠供養三官九府百二十曹主者，北都羅酆泉曲之府主者，萬神東方風雷地獄主者，南方火翳地獄主者，西方金剛地獄主者，北方溟泠地獄主者，東北鑊湯地獄主者，東南銅柱地獄主者，西南屠割地獄主者，西北火車地獄主者，中央普掠地獄主者，北陰一十八大地獄主者，二十四大地獄主者，三十六大地獄主者，八十

一大地獄主者，三塗五苦八難幽關地獄主者，五嶽四瀆城隍社令，五道大神，溟泠大神，地道功曹，冥關幽路一切神靈。伏聞乾坤定位，尊卑分天地之形，經緯運行，幽顯示陰陽之象，碧落儼仙聖之宅，黃泉號鬼神之鄉。惟人最靈，以道惟大。自業山之雲湧，致定水之波翻。三惑傷神，莫超凌於溟滓。七情障性，遂沉滯於幽寥。驚心十習之勾連，轉眼六因之結縛。羅酆會府，提憲網以高張，泉曲都曹，考罪緣而按御。九壘定九幽之號，三途彰三惡之名。水火陰陽，雖稟雪霜之威令。生死善惡，亦霽雨露之恩光。是以丹闕垂慈，青宮降祉。鳳篆羅敷而破獄，龍章赫奕以然燈。照耀昏途，俾乘晨而璀璨。提携寒境，庶騰景以逍遙。早悟慧源，疾登道岸。今有齋主某

崇建某齋，開度亡故某，普及幽冥，冤親平等。深慮幽關苦爽，夜域囚徒。皈命宸嚴，已拜祥烟之垂惠。敷心聖造，更祈化日之昭宣。諒體彌綸，聿寬律令，伏願雲天廣覆，水鏡無私。冰浦炎

池，悉化蓮華之界。刀山劍樹，盡成騫木之林。普十極以仙飛，妙八紘而受度。拳拳素禱，切切丹衷。某不勝虔禱之至。

### 九幽拔罪天尊

上清靈寶玄壇炷香，關召王清破獄符吏，青玄破獄靈官，入獄赦罪靈官，破獄主吏，破獄飛吏，破獄驛吏，合龍飛符驛吏，持符神吏，諒遵帝敕，克赴齋壇。願領金符，下摧鐵壘，開關啓路，毀鎖張門。應北都羅酆，河源泉曲，三官九府，無極神鄉，六洞十宮，九幽地獄，久禁近囚，新魂舊爽，疾行疏放，俾獲逍遙，來覲玄壇，升神道境。玉清有勅，拒遏無原，破獄真符，謹當告下。

### 宣玉清破獄符 青玄破獄符

元君破獄符 關發

衆誦《救苦經》一遍

高功運念如儀 宣十天化符

焚毀鎖張門符

九幽拔罪天尊 旋行至東方

九幽之東，震宮幽冥之地，有風雷獄，飛戈飄戟，衝突罪人。今有齋主某。崇

建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化東方救苦玉寶皇上天尊。願運威神，下破震獄。靈光璀璨，頓消迅烈之威。道炁彌羅，咸悟本真

之性。六通具足，萬業消除，企碧落以遊神，登青華而飛步。仗茲功德，回薦亡靈。清衆運誠，皈依讚詠。

仰啓東方主，玉寶皇上尊，願臨風雷獄，拔度九幽魂。和：往生神仙界。

### 宣東方破獄符

東方幽獄號風雷，赫奕威權照九垓。黑業繽紛迷妄識，紅塵繚繞鎖陰霾。鳳凰昭下宸恩溥，犴狴庭空帝澤回。祖炁真光齊接引，華林境界任徘徊。

### 九幽拔罪天尊 旋行至南方

九幽之南，離宮幽陰之地，有火翳獄，吞火食炭，囚禁罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化南方救苦玄真萬福天尊。願運威神，下破離獄，祥烟鬱勃，頓消烈火之炎炎。惠露沾濡，普耀靈

光而奕奕。惡根落滅，債訟消平。升丹壑以陶形，詣朱陵而受化。仗茲功德，回薦亡靈。清衆運誠，皈依讚詠。仰啓南方主，玄真萬福尊，願臨火翳獄，拔度九幽魂。和：往生神仙界。

宣南方破獄符

南方火翳奮炎威，職領天章握化機。神昧陽清宵雨暝，形淪陰濁晚雲迷。清微澤浹頌芝檢，黑鬱恩流覲藥墀。祖炁真光齊接引，梵天境界任仙飛。

九幽拔罪天尊 旋行至西方

九幽之西，兌宮幽夜之地，有金剛獄，金鎖鐵杖，訊考罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化西方救苦太妙至極天尊。願運威神，下破兌獄。德風披拂，冰消痛苦之緣。慧日流明，頓復虛靈之性。千冤解悟，萬罪清夷。企太素以凝神，登崑丘而宴景。仗茲功德，回薦亡靈。清衆運誠，皈依讚詠。仰啓西方主，太妙至極尊，願臨金剛獄，拔度九幽魂。和：往生神仙界。

宣西方破獄符

西方幽獄號金剛，威烈玄曹領兌方。搖曳天魂趨業囿，沉淪地魄墮冥鄉。青華玉敕提圓幅，紫極金符耀混黃。祖炁真光齊接引，福堂境界任翱翔。

九幽拔罪天尊 旋行至北方

九幽之北，坎宮幽艷之地，有溟泠獄，冰戟霜刃，擊刺罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化北方救苦玄上玉晨天尊。願運威神，下破坎獄。慶雲濛藹，頓消凜烈之威。法雨周流，開廓陽和之境。罪根斷滅，尸穢沉淪。辭北府以升真，上南宮而受度。仗茲功德，回薦亡靈，清衆運誠，皈依讚詠。仰啓北方主，玄上玉晨尊，願臨溟泠獄，拔度九幽魂。和：往生神仙界。

宣北方破獄符

北方幽獄號溟泠，萬雉周迴鎮坎城。心逐陰溟虧暖律，神辭陽耀墮寒冰。丹綸曉映金雞喚，玄簡宵隨玉兔升。祖炁真光齊接引，鬱單境界任騰凌。

九幽拔罪天尊 旋行至東北方

九幽東北，艮宮幽都之地，有鑊湯獄，毒波炎火，漬煮罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化東北方度仙上聖天尊。願運威神，下破艮獄。慈光灌沐，均超不死之鄉。梵炁經行，悉化長春之境。八門度命，五道停輪。辭黑壤以升神，紀蒼元而定錄。仗茲功德，回薦亡靈。清衆運誠，皈依讚詠。仰啓東北主，度仙上聖尊，願臨鑊湯獄，拔度九幽魂。和：往生神仙界。

宣東北方破獄符

幽關東北鑊湯牢，帝網恢張重憲曹。步武生來慈雨灑，精神死去業風號。天衢煥紫燭悲惱，地禁回黃赦繹騷。祖炁真光齊接引，妙嚴境界任逍遙。九幽東南，巽宮幽治之地，有銅柱獄，手抱足登，炮炙罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，



皈依清微應化東南方救苦好生度命天尊。願運威神，下破巽獄。晨風鼓舞，悉除熱惱之威。神景清明，永絕攀懸之苦。三途罷對，六度回靈。超北鬱以升神，詣南丹而高步。仗茲功德，回薦亡靈。清衆運誠，皈依讚詠。

#### 宣東南方破獄符

東南銅柱巽維中，權領威神勢望崇。正路爲迷神吏奮，邪塗棘合鬼官雄。翩翩甘露輝丹鳳，浩蕩慈風舞玉龍。祖炁真光齊接引，碧霞境界任西東。

#### 九幽拔罪天尊 旋行至西南方

九幽西南，坤宮幽關之地，有屠割獄，鋒芒利刃，割切罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化西南方救苦太靈虛皇天尊。願運威神，下破坤獄。陽光赫奕，頓消劍戟之威。真性圓明，早悟虛無之妙。善根自復，業障本空。登瑤圃以棲神，詣金華而定籍。仗茲功德，回

薦亡靈。清衆運誠，皈依讚詠。仰啓西南主，太靈虛皇尊，願臨屠割獄，拔度九幽魂。和：往生神仙界。

#### 宣西南方破獄符

西南屠割位陰□，赫奕威權耀海寰。業網千尋辭世牖，冤機萬仞卧冥關。天心化合玄符命，地性恩承紫詔頒。祖炁真光齊接引，耀真境界任盤桓。

#### 九幽拔罪天尊 旋行至西北方

九幽西北，乾宮幽府之地，有火車獄，火輪風刃，燒剖罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化西北方救苦無量太華天尊。願運威神，下破乾獄。天光照耀，頓消苦惱之威。聖澤涵濡，獲睹陽明之勝。生根返復，死炁頓摧，離苦岸以升神，凌蒼穹而穩步。仗茲功德，回薦亡靈。清衆運誠，皈依讚詠。仰啓西北主，無量太華尊，願臨火車獄，拔度九幽魂。和：往生神仙界。

#### 宣西北方破獄符

火書幽府領刑書，權峻乾維煥八區。

止水波翻迷覺海，業山雲擁趣冥都。符飛陽曜天恩溥，救拯陰靈地禁疏。祖炁真光齊接引，延賢境界任歡呼。

#### 九幽拔罪天尊

#### 旋行至燈前面中立

九幽之中，土皇幽獄之地，有普掠獄，刀山劍樹，驅逐罪人。今有齋主某，崇建某齋，開度亡故某人，溥及幽冥，冤親平等。依按靈寶科格，然點九獄神燈，皈依清微應化上方救苦玉虛明皇天尊。願運威神，下照中獄。慈雲覆被，頓消攀踐之威。化雨霖零，獲詣升騰之路。陽輝洞朗，陰夜煥明，辭黃壤以飛神，詣玄壇而受記。仗茲功德，回薦亡靈，清衆運誠，皈依讚詠。仰啓上方主，玉虛明皇尊，願臨普掠獄，拔度九幽魂。和：往生神仙界。

#### 宣中央破獄符

上方普掠總天機，中御羅酆鎮八維。方域冤愆歸掌握，圜扉憲令藉扶持。鸞臺頒詔雷霆迅，駕陛承符雨露垂。祖炁真光齊接引，紫霄境界任歡嬉。

#### 九幽拔罪天尊 旋行至衆獄

九幽之外，北都羅酆之境，有二十四獄，三十六獄，隨方顯化，考繫攸司，難盡名攝，無有窮際，世人造罪，散落其中。今有齋主某。崇建某齋，開度亡故某人，溥及幽冥，冤親平等。恭按靈寶科格，皈依清微應化下方救苦真皇洞神天尊。願運威神，下破衆獄。祥風扇惠，悉除訊鞫之威。祖炁返元，永復清明之性。一真呈露，衆罪消鎔。朝金闕以受書，登玉清而御景。仗茲功德，回薦亡靈。清衆運誠，皈依讚詠。

宣破諸獄符

下方諸獄列神鄉，校錄霜明定否臧。變理陰陽思帝憲，裁成經緯握天章。三天煥耀金圖啓，九地超凌玉簡彰。祖炁真光齊接引，水蓮境界任翱翔。

次法師執水盂，自念化形呪

吾師天中救苦尊，常善化形十方界。以此威神興大慈，濟彼衆生無量苦。九夜重昏幽暗府，普令廓照生光明。牛頭獄卒盡升仙，萬苦沉魂俱解釋。三途五苦諸囚繫，考對停閒上紫清。見聞有識及有情，感此皆成無上道。

次法師自懷中取出天尊破酆都符，同回光符，散燒獄中，衆官遶獄灑水，念玉清破酆都呪三遍。

茫茫酆都中，重重金剛山。靈寶無量光，洞照炎池煩。亡者承光明，朝禮玄元壇。生神超碧漢，童子導靈旛。向來然燈懺獄，功德周圓。伏願天恩下濟，地爽上升。身化金剛，自識通於宿命。目瞻玉相，各悔悟於前愆。永超幽暗之鄉，徑上光明之境。春回陰域，陽復寒庭，冥官共進於仙階，鬼趣咸登於道岸。亡故某乘茲妙果，了悟真機，會萬善以俱融，蕩一塵而不染，形神俱妙，衣食自然，福被群生，恩沾庶類。爲如上良緣，念

超凌仙界天尊。引法師詣元始前，納策杖。法師再拜，上香。

小兆臣某，誠惶誠恐，稽首頓首，再拜上言。臣聞上帝溥好生之德，恩洽三靈。下民昧趨死之機，神沉九壘。已藉提携之造，重殫激切之忱。臣向來奉爲齋主某，依律修齋，然燈破獄，請威神之策

杖，開鬱絕之幽關。獄吏承符，冥曹稟令。茫茫夜壑，苦魂快樂以仙飛。寂寂寒庭，罪爽逍遙而神舉。豈臣愚昧，能致感通，實帝慈悲，獲令化育。佩如天之厚惠，慚無地以酬恩。謝語期期，德心切切，祈有元請到策杖，恭對道前，特伸奏納，仰祈睿鑒，俯賜允俞。干冒天威。臣不勝俯伏戰兢之至，謹再拜稱謝以聞。

贊引歸靜默堂

靈寶領教濟度金書卷之三十三

靈寶領教濟度金書卷之三

十四

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

九幽燈儀

靜默堂序立

贊引至燈壇 步虛

具位臣某，謹焚寶香，遙瞻供養太上無極大道三寶上帝，十極高真，三界靈司無鞅主執，玄壇應感內外威靈，願運慈光，俯垂明證。伏以二儀定位，圓清高耀於光明。四象成形，方濁結凝於幽暗。建陰陽而分晝夜，列儀璘而別晦明。煥爛朝輝，等寥陽之帝所。幽陰夜色，並鬱絕之神鄉。况賦形有迷悟之分，而委判有升沉之異。倘淪昏翳，莫際輝華。是以仙聖曲矜，帝師垂憫，立然燈之寶範，崇破暗之瓊章。上照

諸天，增陽光而煥映。下明列壘，廓陰暗以輝華。俾寒庭無悲惱之聲，而夜壑息酸辛之苦。巍巍神力，赫赫靈功。今有齋主某，資薦某人，崇建某齋。次依按經法，恭然九幽神燈，返陰還陽，續明啓暗。伏願九霄八極，均朗映於神燈，六趣三塗，溥煥流於夜燭。齊資照耀，各遂升仙。稽首皈依，虔誠讚詠。

十方靈寶天尊

伏以九炁凝芒，碧落耀發生之府。三華鬱秀，青林開長樂之宮。聳日觀於岱宗，接雲瀛於滄海，扶桑啓旦，騫木流榮。今有齋主某，崇建某齋，然點九幽神燈。上照東方太青諸天納善福堂，光景煥明，虛空朗耀。中照震宮三綠分野，辟斥幽翳，掃蕩妖邪。下照東方風雷地獄，飛戈停刃，震雷韜威。即使見禁罪魂，乘此光明，頓消幽暗，徑上華林之境，面朝玉寶之尊。清衆運誠，虔誠讚詠。

寶光通照天尊

伏以三炁凝華，朱陵著鍊形之格。九陽散彩，丹天垂度命之符。映玉緯於太微，耀金衡於飛火，衡宗華蓋，波潤炎州。今有齋主某，崇建某齋，然點九幽神燈。上照南方太丹諸天納善福堂，光景煥明，虛空祥光廓映。中照離宮九紫分野，掃除奸惡，消伏凶灾。下照南方火翳地獄，塗炭息燄，猛火沉烟。即使見禁罪魂，乘此光明，頓消陰暗，徑上梵天之境，面朝萬福之尊。清衆運誠，皈依讚詠。

通光溥照天尊

伏以七炁網緼，素皇御浮羅之獄。九明流演，皓靈司福德之墟。揖金虎於天街，策玉龍於崑圃，長庚孕秀，華嶽凌空。今有齋主某，崇建某齋，然點九幽神燈，上照西方太素諸天咸行福堂，光華流明，萬方朗耀。中照兑宮七赤分野，蕩除凶疹，消伏妖邪。下照西方

金剛地獄，金槌息考，鐵杖停威。即使見禁罪魂，乘此光明，頓超幽暗，徑上金光之境，面朝太妙之尊。清衆運誠，皈依讚詠。

明燈映太清，流光朗金門。長庚湛華耀，下燭北艷魂。幽臺騰晝景，仰照希夷尊。赤書開錦笈，端簡九天恩。

流光應現天尊

伏以五炁徘徊，黑帝肅玄冥之令。一元廓落，辰精符北朔之權。調玉燭於璇璣，開紫樞於閭闔，太陰運御，玄武經躔。今有齋主某，崇建某齋，然點九幽神燈。上照北方太玄諸天清淨福堂，流映萬空，朗朗煥耀。中照坎宮一白分野，掃斥妖惡，摧却凶妖。下照北方溟泠地獄，冰戟潛毒，霜刃藏鋒。即使見禁罪魂，乘此光明，頓消幽暗，徑上真靈之境，面朝玉晨之尊。清衆運誠，皈依讚詠。

明燈映太空，流羅吐陰輝。晨華冠北朔，綃虹耀天衣。逍遙八遐觀，遊爽溥仙飛。千齡齊瞬息，萬劫一朝餘。

流光法界天尊

伏以炁肇少陽，空歌振浮黎之土。日賓暘谷，攝提杓龍角之躔。接滄島於方諸，潛鬼營於艷鬱，艮山定鎮，泰象凝華。今有齋主某，崇建某齋，然點九幽神燈。上照東北方始青諸天長樂福堂，華耀煥明，流光普映。中照艮宮八白分野，辟除毒疹，蠲滌灾衰。下照東北方鑊湯地獄，清涼徹景，煮瀆韜威。即使見禁罪魂，乘此光明，頓消幽暗，徑上長樂之境，面朝度仙之尊。清衆運誠，皈依讚詠。

明燈映太虛，天光燭始青。下耀鬱單界，上煥玉隆城。靈章凝惠露，飛奕邁高征。九幽皆解脫，天澤慶回靈。

靈光萬善天尊

伏以炁煥太陽，始丹御碧霞之界。音調朱雀，太微聯流火之庭。納萬壑於歸墟，洗八風而眇莽，域司地戶，機應天關。今有齋主某，崇建某齋，然點九幽神燈。上照東南方始丹諸天用賢福堂，光徹虛空，煥明萬象。中照巽宮四碧分野，却清邪穢，洗蕩奸妖。下照東南方銅柱地獄，焚灼息苦，列燄收威。

即使見禁罪魂，乘此光明，頓消幽暗，徑上碧霞之境，面朝度命之尊。清衆運誠，皈依讚詠。

明燈映太元，金碧耀南丹。伶華流梵響，玉女佩珠環。俯控雲霄馭，明霞不可攀。妙哉騫爽樂，碧霧御天關。

開光濟度天尊

伏以炁肇月庭，東井啓黃華之粹。陰生素域，參旗分白獸之精。澄金顯於蓐收，配商宮於夷則。象符地軸，維啓人門。今有齋主某，崇建某齋，然點九幽神燈。上照西南方始素諸天仁靜福堂，祥光洞灼，煥耀無邊。中照坤宮二白分野，肅清灾毒，掃滅妖氛。下照西方屠割地獄，刀刃息毒，割切藏威。即使見禁罪魂，乘此光明，頓消幽暗，徑上耀真之境，面朝虛皇之尊。清衆運誠，皈依讚詠。

明燈映太虛，始素湛玉霄。圓光煥結璘，天關近回飈。縱觀六合裏，惡根應化消。鬱藹騰飛馭，凌空度法橋。

金光耀綵天尊

伏以炁結天門，清微御九關之峻。光

浮帝所，碧虛流萬梵之周。仰東壁於乾維，俯西崑於宸闕，陽精衍育，陰粹潛凝。今有齋主某，崇建某齋，然點九幽神燈，上照西北方始玄諸天延賢福堂，光華朗耀，流煥虛空。中照乾宮六白分野，肅消灾沴，掃却凶邪，下照西方火車地獄，刃輪停苦，炎毒收威。即使見禁罪魂，乘此光明，頓消幽暗，徑上妙有之境，面朝太華之尊。清衆運誠，皈依讚詠。

明燈映太初，燦燦浴飛虹，仰觀八圓際，雲華迅西東。微魔檢玄律，上天攝北酆。生神鍊遊魂，穩步登朱宮。

### 流光萬變天尊

伏以一炁高流，皎日耀玉京之頂。萬霄羅絡，明霞拱金闕之崇。御無色於鬱羅，覆有垠於澤壘，雍和政柄，撫料玄綱。今有齋主某，崇建某齋，然點九幽神燈。上照中央諸天福堂，光景煥明，流輝無極。中照中官境域神州，殄息灾凶，摧伏奸惡。下照中央溥掠地獄，刀山斷刃，劍樹藏鋒。即使見禁罪魂，乘此光明，頓消幽暗，徑上紫霄之

境，面朝玉虛之尊。清衆運誠，皈依讚詠。

明燈映太玄，披朗無幽鄉。龍旂御通明，鳳葆舞寥陽。金真空中降，神虎徵魔王。左提幽關爽，來觀道德香。

### 開光濟度天尊

#### 次誦明華太晶開光通達神呪

開光華齊六衢通，桐碧霞彩來玄風，太華帝君飛度旨，吾奉寶文破羅酆，傳景散象若衆妙，金馬赤龍素來從，神鄉真官速送受，聖師玉簡書爾功。

### 流光法界天尊

向來關祝，九幽神燈，功德周圓。伏願蓮炬飛華，照諸天而朗徹。蘭膏應彩，輝九壘以流明。普令夜景之昏濛，均睹晨陽之煥耀。自然懽樂，火息燄而冰靜波。永絕酸辛，劍爲騫而刀爲樹。三途罪爽，出離冥途，五道衆魂，超凌善道。仗茲無邊功德，回資亡故某人，身沐神輝，心皈正化。罪華飄落，還本始之光明。惡蒂彫零，悟本源之湛寂。一真呈露，萬妄頓除，即登天上之天，永離地中之地。爲如上緣，請聖作證。

### 念善

#### 諸大地獄燈儀

#### 靜默堂序立

#### 華夏贊至燈壇 步虛

#### 灑淨

具位臣某，謹焚寶香，遙瞻供養太上無極大道三清上聖，十極高真，太乙慈尊，三界衆聖，虛空鑒察應感靈祇，願運慈悲，俯垂明證。伏聞元始開圖，奠玄黃而立極。虛皇御運，羅經緯以流形。高清騰三景之輝，混黃布九幽之象。惟人爲貴，稟炁與精。忘覺海之澄清，莫超陽景。溺愛河之流浪，遂墮幽關。羅酆泉曲之沉淪，夜域寒鄉之悽慘。五嶽四瀆，星分考對之曹。三界十方，棋布推研之識。沈寥莫極，茫昧無終，億齡難遇於天光，萬劫常淪於地暗。蓋以業由心造，罪逐身修。回首前生，念慮既藏於陰慝。驚心死後，形魂曷際於陽明。自迷悟之攸分，致升沉之斯判。非由提拔，未遂超凌。惟瓊笈羅懺罪之儀，而金錄著然燈之式。蘭膏隱映，蓮炬輝華。回耀降光，

上接靈芒於碧落。開明破暗，下騰神景於黃泉。周九壘以生春，洞十華而不夜。庶令幽爽，獲睹陽光，可登解脫之鄉，徑上逍遙之路。今有某人，崇建某齋，開度亡故某人，溥及幽冥，冤親平等。謹於齋次然點神燈，允仗天光，普招地魄。恭望帝尊曲憫，師寶垂憐，矜祖炁之分靈，放神輝而洞照，開明獄境，密映燈壇。自一燈至百千萬燈，燈燈不滅。由一獄至恒河沙獄，獄獄俱明。俾陶五色之輝，咸悟一真之性。悔心纔露，惡根自清。乘晨希陽，穩上三清之岸。迴光返照，長辭五濁之泥。普及有情，均承大化。清衆運誠，讚揚功德。

大聖元始天尊

大聖靈寶天尊

大聖道德天尊

衆誦開光呪，旋遶點燈

陰景冥冥，長夜無期。死魂幽閉，神精散飛。華燈照夜，太陽流輝。朽骸開度，攝景返肌。光明遍照，遊爽同皈。

流光法界天尊

第一北都羅酆之獄，在東北癸地，乃天宮下治之府。內外宮洞，周匝圍旋，環拱陰景天宮，有北陰天君主之。東列天一、監天、中天、虛天、皇天、九天、元正、形正、太真九獄，南列流火、火丸、火箭、飛火、燒脚、火家、然身、元平、禁罰九獄，西列鐵車、鐵馬、鐵牛、鐵驢、鐵錐、鐵床、鐵杖、鐵鏘、鐵蒺藜九獄，北列玄沙、北玄、女青、河伯、律令、幽玄、累劫、糞穢、冰池九獄，隨衆生所造之業，較量輕重而分處之。諸大魔王鬼官冥吏，參機佐理，考罪治魂。凡一晝一夜之間，有萬死萬生之苦，終天幽暗，不睹光明。今齋主某，切慮所度亡魂，普及幽冥，冤親平等。生有惡緣，死淪此獄，然燈接引，請命提携。伏望三境至尊，十華聖衆，俯垂惠澤，神化燈光，遍照北都羅酆之中，咸令囚徒，均沐靈輝，解悟宿命，悔過遷善，見性回真，削黑簿之冤愆，紀丹陵之姓字，徑辭冥漠，上證虛無。清衆運誠，恭吟實偈。

羅酆北帝號都司，典領幽冥萬職扶。

威統三天提憲網，仁參三極削刑書。德音已降清微境，聖澤俄沾鬱絕區。仰願燈光無晝藏，提携游爽上玄都。

流光應現天尊

第二九幽之獄，在西南丁地，乃地官列治之府。東曰幽冥青曜惡毒門風雷獄，南曰幽陰赤耀巨羅門火翳獄，西曰幽夜白耀鋒刃門金剛獄，北曰幽酆黑曜寒涼門溟泠獄，東北曰幽都無羅陷塞門鑊湯獄，東南曰幽冶九醜惡毒門銅柱獄，西南曰幽關荼滅馘抑門屠割獄，西北曰幽府溟濛罔網門火車獄，中曰幽獄普掠獄。隨衆生所造之業，較量大小而分處之。陰官冥曹，分僚列掾，研情鞫罪，施罰考魂。業鏡懸則善惡彰而莫逃，業風吹則形魂死而復活。終天幽暗，不睹光明。今齋主某，切慮所度亡魂，普及幽冥，冤親平等，生有惡緣，死淪此獄，然燈接引，請命提携。伏望金闕高尊，玉京上聖，俯施慈造，神化燈光，遍照九幽地獄之中，咸令囚徒陶沐靈輝，解悟宿命，悔過遷善，見性回真，辭鬱絕之幽鄉，登妙嚴之勝

境，根源不昧，衣食自然。清衆運誠，恭吟寶偈。

九幽執法列方隅，受命鄴城贊聖謨。  
赫赫條章歸掌握，悠悠報對藉匡扶。  
三天誕布龍符耀，九地欽承鶴赦敷。  
仰願燈光無盡藏，超凌長夜上玄都。

### 威光應現天尊

第三泉曲府及十二河源之獄，泉曲在東南丙地，乃水官所治之府，統尾閭口，有萬鬼群。十二河源分布九州，乃分野考鬼之庭，如導淮自桐栢，導渭自鳥鼠同穴，凡十二處，皆有陰獄。隨衆生所造之業，斟酌多少而分處之。鬼職神僚，幽曹冥佐，拘魂定罪，鞫因推情，考陽間隱顯之愆，按陰府報對之律，終天幽暗，不睹光明。今齋主切慮所度亡魂，普及幽冥，冤親平等，生有惡緣，死淪此獄，然燈接引，請命提携。伏願無極元尊大羅至聖，俯垂洪澤，神化燈光，遍照泉曲河源地獄之中。咸令囚徒陶沐靈輝，解悟宿命，悔過遷善，見性回真，脫夜域之淒涼，陟霄衢而快樂，神風披拂，道炁薰陶。清衆運

誠，恭吟寶偈。

北都泉曲統河源，分列神庭領化權。  
上奉紫微施厚德，下臨黑壤絕盟言。  
慈雲藹藹天恩浹，湛露灑灑帝敕宣。  
仰願燈光無盡藏，法橋穩駕步芳騫。

### 靈光回照天尊

第四五嶽之獄，東曰泰山府，南曰衡山府，西曰華山府，北曰恒山府，中曰嵩山府。分曹設案，環布職僚，鞫罪治魂，各有陰獄，隨方列屬巖洞山林，考召幽庭，非一處所。惟東嶽位崇五鎮，名表天孫，主領人民，顓司報對，獨有二十四獄環拱岱宗。凡世人造業，大則北都羅酆治之，次則九幽泉曲治之，小則嶽瀆諸司治之。其有纖瑕微類，則當境靈司治之。故五嶽威權，赫奕於地司也。今齋主切慮所度亡魂，普及幽冥，冤親平等，生有惡緣，死淪此獄，然燈接引，請命提携。伏望十極高尊，九霄上聖，府垂寵渥，神化燈光，遍照五嶽陰獄之中。咸令囚徒陶沐靈輝，解悟宿命，悔過遷善，見性回真，脫長夜之沉途，登晨華之道岸，不經輪

轉，自在逍遙。清衆運誠，恭吟寶偈。

權尊五嶽列封疆，輔相乾坤拱帝鄉。  
聖日高明司地禁，威風震動握天章。  
金符飛下三清界，玉簡行周九壘湯。  
仰願燈光無盡藏，幽幽冥路慶春陽。

### 開光丹景天尊

第五四瀆之獄，江瀆廣源府，河瀆靈源府，淮瀆長源府，濟瀆清源府。位齊五嶽，分治罪魂，設屬列曹，各有陰獄，隨處典領湖澤溪潭，考罰神庭，亦非一所。凡世人心生口語，自作教他，大小罪緣，陰陽愆過，各因所造，拘而治之。今齋主切慮所度亡魂，普及幽冥，冤親平等，生有惡緣，死淪此獄，然燈接引，請命提携。伏望浩劫真尊，虛無至聖，俯垂恩貺，遍照四瀆陰獄之中。咸令囚徒陶沐靈輝，解悟宿命，悔過遷善，見性回真，辭地域之拘纏，升天堂而快樂，諸塵不染，萬化俱融。清衆運誠，恭吟寶偈。

威尊四瀆列陰官，參贊推成奉帝關。  
權佐北鄴嚴憲令，職聯東嶽聖恩頒。  
玉符散惠天門啓，青律停刑地戶閑。

仰願燈光無盡藏，提携幽爽睹天顏。

金光秘景天尊

第六里域靈獄，大曰九州社令司，次曰州縣城隍司，小曰里域神司，與廟貌神祇，各有治罪考魂之所，隨方顯化，名號莫殫。世人生無大善，升神福堂。又無大惡，攝魂酆府。一旦命過，報對權衡，皆神司主之。十直三元，二十四炁，天地獄瀆，真聖仙靈，會集福庭，考校善惡，莫不以地祇錄籍為主。故里域神祇，於人最近。今齋主切慮所度亡魂，普及幽冥，冤親平等，生有惡緣，死淪此獄，然燈接引，請命提携。伏望萬天帝尊，十方仙聖，俯垂矜憫，神化燈光，遍照里域靈獄之中。咸令囚徒陶沐靈輝，解悟宿命，悔過遷善，見性回真，蕩業垢以澄清，固生根而游宴，永辭陰地，快睹陽天。清衆運誠，恭吟寶偈。

神州列屬典條章，處處名偈莫紀量。  
善惡幽冥推眇忽，陰陽生死較微茫。  
龍鸞恩溥塵塵刹，犴狴春回寂寂鄉。  
仰願燈光無盡藏，扶持寒夜任翱翔。

寶光素景天尊

法界有盡，燈光無窮。乘三天之晨輝，照九地之幽獄。威神廣大，智慧昭融。一一幽牢，普見朝陽之精燦。沉沉夜壑，頓如晝景之光華。按經所言一十八獄，二十四獄，三十六獄，八十一獄，三塗五苦獄，無間硤石血湖獄，或名同實異，或名異實同，無量無邊，遍盈幽境。願乘燈光之照耀，普令罪爽之遷升，即於光中，了悟自性。俾先造貪謀業者見之，為喜捨光。造嗔怒業者見之，為忍辱光。造愚癡業者見之，為智慧光。造殺害業者見之，為慈悲光。造偷盜業者見之，為平等光。造淫慾業者見之，為清淨光。造口舌業者見之，為自在光。造執著業者見之，為解脫光。造凶狠業者見之，為柔和光。造人我業者見之，為無碍光。心燈發明，天光朗徹。自悟非膏非燭，本來無欠無餘，湛寂圓通，虛靈知覺，如水蓮之不染，等秋月之無塵。一根返源，六用解脫，罪源何有，地獄亦空。空無所空，妙而入妙。以自己獨覺之性，度自

己未覺之靈。逍遙上清，真猶返掌。今齋主奉為所度亡魂。普及幽冥，冤親平等，然燈照獄，釋罪開光。伏願早入慧源，疾登覺地，見聞隨喜，一切幽靈，同證無為，俱成妙果。

逍遙快樂天尊

向來然點諸獄神燈，功德周圓。伏冀燈光照徹，神景昭明。亘三界以流輝，極十華而晃朗。鬼官冥吏睹之者，進職仙階。獄卒胥徒見之者，反生人道。飛潛動植，並遂生成。蠢動蛸翹，盡全化育，普脫輪迴之苦，獲登清淨之鄉。為如上緣，請聖作證。

念善

靈寶領教濟度金書卷之三十四



靈寶領教濟度金書卷之三

十五

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

三塗五苦燈儀

步虛 灑淨

具位臣某，謹焚寶香，供養太上無極大道三清上聖，十極高真，太乙慈尊，三界衆聖，虛空鑒察，應感靈祇。願運慈悲，俯垂明證。伏以乾蓋輕清，煥陽光於碧落。坤輿重濁，凝陰暗於黃冥。清微儼仙聖之居，黑壤號鬼神之宅。冥冥萬劫，驚心死戶之開張。慘慘億齡，極日生門之閉塞。願瞻鬱絕，環列幽牢，職水火之憲章，典陰陽之刑禁。報緣異趣，罪對殊因。三業山高，寧斷三塗之考。五蘊海闊，難停五苦之輪。非帝真曲運於慈悲，則神識曷超於苦

惱。是以瓊章演教，金籙垂科。著然燈破暗之儀，定回耀降光之格，龍章錯落，鳳篆昭回，期上接於神輝，庸下提於幽爽。今有齋主某，崇建某齋，開度亡故某，普及幽冥，冤親平等。乞於齋次，然點三塗五苦神燈，請光開幽，頒符赦罪。伏望元皇矜憫，上帝垂憐，申錫智慧之光，昭著威神之力。惡根落滅，乘晨獲脫於昏衢。累戶毀摧，騰景頓登於覺地。三晨回耀，五道開幽，疾登解脫之鄉，克禮虛皇之聖。拳拳丹悃，切切玄恩。清衆運誠，關行法事。

流光法界天尊

旋行至天塗界

三塗之界，第一名爲上尸色慾門。一切衆生，神皆清涼，心耽淫慾，身謝之後，受天塗驅雷役電之考。今有齋主某，依按科格，然懺神燈，請降落滅上尸道靈官。奉爲亡故某，溥及幽冥，冤親平等，落滅色慾之根，解脫天塗之考。伏願丹闕流恩，黑單膺祉。悟真常道，還固有之虛靈。趣玄元機，契太無之智慧。明霞高步，偃月怡神。清衆運

誠，虔恭讚詠，

流光通道天尊

焚符

天尊惠澤浹群靈，井井金科煥日星。焚炁彌羅周夜壑，靈輝煥爛耀寒庭。業山霧障冤愆釋，定水風收色慾清。今日神燈都照破，上尸落滅任超凌。

轉輪聖王天尊

旋行至地塗界

三塗之界，第二名爲中尸愛慾門。一切衆生，徇情迷物，溺愛輕生，身謝之後。受地塗擔沙負石之考。今有齋主某，依按科格，然懺神燈，請降落滅中尸道靈官。奉爲亡故某，溥及幽冥，冤親平等，落滅愛慾之根，解釋地塗之考。伏願紫極流華，黃泉沛澤。根塵清淨，超有漏之荆林。幻垢消澄，步無爲之騫逕。瓊臺迅軌，瑤圃凝真。清衆運誠，虔恭讚詠，

流光萬變天尊

焚符

天尊聖化號盈盈，散作陽春遍九冥。丹鳳銜來綸綉重，金鷄飛下憲章停。

根塵肅靜冲和現，世網消除愛慾輕。  
今日神燈都照耀，中尸落滅任昇騰。

轉輪聖王天尊  
旋行至水塗界

三塗之界，第三名為下尸貪慾門。一切衆生，貪逐虛浮，耽樂榮利，身謝之後，受水塗漣汲溟波之考。今有齋主某，依按科格，然懺神燈，請降落滅下尸道靈官。奉為亡故某，溥及幽冥，冤親平等，落滅貪慾之根，解釋水塗之考。伏願碧落飛芒，黃垓耀彩。六如悟入，體天道之惡盈。三惑消除，鑒帝心之福善。芝墀侍聖，蓮圃登真。清衆運誠，虔恭讚詠，

金容玉相天尊

焚符

天尊仁惠拯含生，萬道萬光照鐵城。  
金籙開幽春浩蕩，玉符破暗夜晶熒。  
業緣自息生根固，貪慾知非報障停。  
今日神燈都照耀，下尸落滅任驤騰。

轉輪聖王天尊

旋行至苦心門

五苦之輪，第一名為色累苦心門。一

切衆生，馳騁淫心，恣縱情慾，身謝之後，受泰山地獄之苦。今有齋主某，依按科格，然懺神燈，請降飛度色累戶靈官。奉為亡故某，溥及幽冥，冤親平等，落滅飛度色累之門，解釋心神之苦。伏願蒼靈降澤，黑鬱承恩。一性圓靈，步清明之正路。六塵蕩滌，回昏昧之迷途。躡景常陽，升神空洞。清衆運誠，虔恭讚詠，

智光普耀天尊

焚符

天尊說法御虛玄，湛露輝輝下九天。  
嚴日融怡冰浦暖，和風披拂火池寒。  
宸恩煥爛塵慾盡，色累消除罪日閑。  
今日神燈都照破，苦心飛度免沉淪。

轉輪聖王天尊

旋行至苦神門

五苦之輪，第二名為愛累苦神門。一切衆生，飄蕩愛河，流吹慾海，身謝之後，受風刀地獄之苦。今有齋主某，依按科格，然懺神燈，請降飛度愛累戶靈官。奉為亡故某，溥及幽冥，冤親平等，落滅飛度愛累之門，解釋精神之苦。

伏願紫霄孚佑，黃壤流輝。捨妄歸真，茂心花而調朗。變凡成聖，回性藥以圓通。遊宴騫林，逍遙蓮界。清衆運誠，虔誠讚詠，

靈光浩映天尊

焚符

天尊宴御坐騫林，說法希微破積陰。  
霽色開春明鬱境，靈光散景耀艷城。  
世緣妄想三生斷，愛累塵情一羽輕。  
今日神燈都照破，苦神飛度上天津。

轉輪聖王天尊

旋行至苦形門

五苦之輪，第三名為貪累苦形門。一切衆生，貪名徇利，耗氣傷神，身謝之後，受捷山負石之苦。今有齋主某，依按科格，然懺神燈，請降飛度貪累戶靈官。奉為亡故某，溥及幽冥，冤親平等，落滅飛度貪累之門，解釋身形之苦。伏願玄穹霈澤，方壤承華。成清淨身，蕩六塵之陰垢。證虛無道，驅五賊之昏迷。超悟大乘，游翔小有。清衆運誠，虔恭讚詠，

金光七素天尊

焚符

天尊演化御芳園，萬聖朝宗溥聖恩。  
五道光舒仁廣大，九幽春到惠瀾漫。  
塵緣斷絕休回首，貪累捐除付達觀。  
今日神燈都照破，苦形飛度任盤桓。

轉輪聖王天尊

旋行至苦精門

五苦之輪，第四名為華競苦精門。一切衆生，貪競榮華，耗散真炁，身謝之後，受填作江河之苦。今有齋主某，依按科格，然懺神燈，請降飛度華競戶靈官。奉為亡故某，溥及幽冥，冤親平等，落滅飛度華競之門，解釋精神之苦。伏願碧霄降祉，黑絕蒙恩。定慧雙圓，悟心空而寂照。境智俱泯，廓心瑩以高澄。丹界陶神，玄關御炁。清衆運誠，虔恭讚詠，

德光合成天尊

焚符

天尊睿號遍玄虛，處處莊嚴拯世愚。  
赫奕靈輝開暗壘，羅敷慧燭照昏衢。  
榮情無意迷途闕，華競何心覺海舒。  
今日神燈都照破，苦神飛度躡雲都。

轉輪聖王天尊

旋行至苦魂門

五苦之輪，第五名為身累苦魂門。一切衆生，耽迷妾境，勞役神魂，身謝之後，受吞火食炭鑊湯地獄苦。今有齋主某，依按科格，然懺神燈，請降落滅飛人身累戶靈官。奉為亡故某，溥及幽冥，冤親平等，落滅飛度身累之門，解釋魂神之苦。伏願紫清錫佑，黃黝承流。識破客塵，陶精神於大混。斷除業垢，融步武於真空。西閩凌虛，東諸策景。清衆運誠，虔恭讚詠，

靈光四照天尊

焚符

天尊萬道玉毫光，普照羅酆九夜鄉。  
寂寂寒庭回暖景，淒淒幽域耀朝陽。  
塵緣風散消愆業，身累冰清罷憲章。  
今日神燈都照破，苦魂飛度任翱翔。

轉輪聖王天尊旋行歸位

衆誦《生天經》一遍，旋遶

向來然懺三塗五苦神燈功德，伏願九幽罷對，五苦停輪。心地澄曉鑑之輝，破煩惱網。性天湛秋蟾之彩，斷迷惑

根。徑離幽暗之鄉，升入光明之界，上窮有頂，下極無垠，一切有情，均沾無上。為上因緣。志心稱念，

廣度沉淪天尊

和：不可思議功德。

請頒赦赦儀

靜默堂序立

華夏頌至壇前 步虛

法師上香長跪

具位臣某，誠惶誠恐，稽首頓首再拜，上言。臣聞祖炁周流於覆載，造化密移。神功恢廓於陰陽，玄元獨運。鼓群靈而不夜，提萬類以皆春。恩浹幽冥，惠均生死。惟泉曲羅酆之鬼域，號鐵圍鬱絕之神鄉。昏霧沉沉，繫苦魂於億劫。業風慘慘，靡罪性於終天。企獄吏以驚神，對冥曹而委命。有心悔過，無路求生。自非綸綍之誕敷，曷俾網羅之閒釋。今有齋主某伏念亡故某，溥及幽冥，冤親平等。紅塵流浪，寧無縱意於七情。青律森嚴，易致移名於六洞。乞頒勅赦，庸滌惡愆。庶停文墨之紛紜，獲證形神之快樂。疾超陰地，

快睹陽天。重念臣樗櫟散材，蓬茅賤質。鍊胎仙於二景，未明度命之方。熙帝載於三靈，期贊迴骸之化。既承丹悃，盍扣洪鈞。況茲九地之魂，慮結三生之釁。業山峯律，七情高擁於迷雲。慾海汪洋，三惑奔流於濁浪。天常既殞，地業永罹。痛萬苦之備嬰，嗟百身之莫贖。皇皇孰告，切切誰憐。擬存準於龍墀，祈肆頒於鶴赦。欲望帝恩曲運，聖德旁敷，赦下三界十方，三官九府，艷都宮洞，泉曲河源，嶽瀆山川，城隍社令，遵依開度，時刻升遷，即使陽復陰郊，暖回寒谷。不在大不在小之罪，均削落於九幽。無私覆無私載之恩，永逍遙於八極。副微臣造請之願，遂齋主激切之忱。臣無任瞻天，望聖激切，俟命之至。

法師再拜，運神請赦如儀

靈符赦罪天尊

法師引衆官移班向地戶侍職偈

上清靈寶玄壇恭奉道旨，頒行太上生天敕。赦三官九府，百二十曹，地水職司，嶽瀆社令，冥關幽路一切主執，各

宜恭肅，拱聽宣示。

宣赦

次吟飛空步虛頌

宣關焚赦 次吟偈

虛皇聖澤浩無垠，生意周流萬象春。溫詔開幽天廣大，恩綸耀景地暄妍。萬緣逐妄迷靈府，一炁回真徹慧源。今日翱翔辭夜壑，識真離妄躡雲端。

逍遙快樂天尊

法師回壇前，叙謝

小兆臣某謹重誠，上啓太上無極大道元始天尊，太上道君，太上老君，玄中大法師，三天大法師，泰玄樞機三省諸相天君，三天門下聖真仙衆，虛空監察一切真靈。伏以扣天闈而請命，民欲無違。開地戶以升神，帝恩有赫。興言感戴，難罄讚揚。臣向來奉爲齋主某，開度亡故某，普及幽冥，冤親平等，請頒赦，錫福幽都，曲荷慈悲，俯垂賜允。準金科而布告，獄掾丕承，依玉律以宣行，冥曹敬聽。罪爽咸升於道岸，沉魂悉上於法橋，拜命欣欣，敷心切切。更願仁風動盪，化日流明。圓蓋方輿，均

宥涵濡之澤。陰靈陽耀，永消輪轉之憂。臣不勝激切，望恩之至，謹再拜稱謝，以聞

逍遙快樂天尊

引歸靜默堂

靈寶領教濟度金書卷之三十五

靈寶領教濟度金書卷之三

十六

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

醫治全形靈官醮儀

步虛 灑淨

各稱法位

具位姓某謹焚香，上啓靈寶玄壇天醫，治職仙官君吏，混元十二炁化生大將軍，解冤釋結大神，浣濯司命笥司仙官將吏，隨機應感一切真靈。伏以聖澤春融，廣覆三塗之熱惱。神功雨潤，普滋萬類之沉淪。玄曹列靈寶之班，紫禁奉虛皇之令。威靈有赫，變化無方。九返七還，坐致枯骸而再潤。千和萬合，能令異骨以成親。澄清入解之泉，纖麗六銖之服。凡伸皈命，悉藉垂情。今有齋主某，開度亡故某人，曩溷塵緣，

遂淪冥境。二豎乘危而結釁，四大倏離。千冤茹恨以投艱，億齡未釋。況形神之垢穢，與容止之彫零，非賴神通，曷符應感。一封露奏，已承帝救之昭宣。萬騎風馳，想見威靈之廓奕。爰陳菲供，肅表葵衷。法衆運誠，至心奉請。

志心奉請靈寶玉司天醫，尚藥靈官，主辨形候靈官，隨病制藥仙官，修合煅鍊仙官，生形博士，復肥主者，治病功曹，收毒將軍，三五功曹，敷藥靈官，察脉論病靈官，請藥療病靈官，砭石小吏，扁鵲官吏，玉清混元十二炁化生大將軍，靈寶玄局聚魂功曹，聚炁功曹，聚形功曹，返魂功曹，全形功曹，合形功曹，迴骸功曹，起死功曹，靈寶解冤釋結靈官，五經博士，能談善說靈官，如意萬司解釋冤對三大神，靈寶浣濯司靈官，玉清通變屏穢靈官，九鳳破穢君，五方解穢君，天河東井君，浣濯夫人，黃華玉女，靈寶巾笥司靈官，青玄金木仙衣玉女，金木仙帶玉女。伏望上遵帝

敕，下副凡情，風馬雲車，來臨法會。

初獻 散花

伏以太極分精，人物並生於覆載。先天設象，神靈變理於陰陽。仰止班聯，具嚴鹵簿。陸離劍佩，仙真統御於雍雍。赫奕旌旄，僚采羽儀於肅肅。上承帝命，下沛宸恩。明金石草木之方，五行順序。復魂魄氣血之正，百體還陽。悉解悟於冤憎，普齊同於慈愛。湛然定水，依稀浴無垢之真。華矣天衣，彷彿映有形之質。既神靈之運化無極，故臭腐之歸款何窮。混合風雲，允承流於丹闕。敷羅雨露，諒莅事於玄壇。成乾坤未成之功，全造化莫全之妙。靈光如在，寵渥惟新。法衆運誠，恭陳亞獻。

亞獻

伏以上帝好生，種種示回生之典。下民趨死，拳拳祈起死之恩。故建設於仙僚，庸拯提於冥路。惟茲亡爽，痛墮幽途。寇莫大於陰陽，本真已喪。命遽分於生死，朽骸疇完。況黃壤之沉零，致丹元之蕩失。精神莫滌，冤對猶

縈，非憑攝化以回靈，曷俾超凌而度命。伏望恪遵帝旨，誕佐天工，伺召到於魂儀，即廓施於神變。五靈孕秀，二象攝生。續絕補傷，完藏府之榮衛。聚功委炁，備經絡之神靈。軟言調伏而冤會和同，法水沾濡而容儀濟楚。合百神，理五炁，期仙化以成人。超八難，度三途，可凌虛而乘景。皈依聖日，鼓舞威風。法衆運誠，恭陳三獻。

三獻

三獻既周，一忱畢露，伏冀宣符中陞，駐景前帷。梵炁扶搖，儼騫林之在上。靈光洞煥，似蓮座以居中。宏敷功德之光，普施慈悲之造。言功遷賞，不負勳庸。定令合符，允資化育，某不勝虔禱之至。

向來

又

伏以函三御化，敷妙有之神鄉。得一分靈，凝虛無之祖炁。自鑿七關於混沌，遂縈萬竅於洪濛。生也有涯，殞天常而孰援。老之將至，罹地禁以誰扶。匪由上聖之深慈，曷拯下愚之極苦。

以今有某人開度某，慮墮陰翳，莫返陽靈。誠露朱章，已扣紫垣而上徹。恩頒丹詔，諒宣玄局以遙臨。茲伸檄召之恭，爲僊提携之德。伏望雲驂俯駐，月駟來游。鑒絲粟之葵忱，歆刀圭之菲薦。效勤受事，宣德承符，某下情不勝激切之至。

請聖

初獻

伏以帝德彌羅，御三天而化育。真慈恢廓，提九地以生成。開春誕布於慈風，啓旦昭宣於慧日。金符煥耀，明息點補剿之功。玉簡輝煌，懲續短斷長之患。圓方有截，陶冶無遺。今齋主某，妄境謀身，塵樊涉跡。天和風靡，縈病網於生前。人僞雲滋，翻冤輪於死後。莫奏藥喜，惟抱祀憂。況四大之各離，而九京之長往。百神蕩失，誰操拯溺之舟。萬炁飛奔，孰曳救焚之駕。冀微靈貺，爲運神功。慙非及物之儀，辨香真切。願體度人之典，采燭勤渠。某無任虔懇之至。

亞獻

伏以靈寶萬司，羅佩環而赫奕。樞機

二府，列劍履以陸離。開幽乘功德之光，佐理溥玄元之化。惟茲亡爽，久墮幽關。病繇心生，身雖空而病莫釋。冤隨意結，形徒散而冤愈深。幸承愛日於虎關，將脫苦霾於犴室。匪干神造，曷保飛仙。伏望妙濟經綸，解五行之煞炁。軟言調伏，消四負於冤氛。享安樂福而痼病烟收，結歡喜緣而冤仇冰散。黑編削字，青簡貽名，更冀混元仙曹，化生靈職。神通密運，俾經絡藏府之重完。聖變潛彰，庶魂魄精神而再造。證法身之清淨，全妙體之輕盈。飛步虛無，凝真空洞。蒙如丹禱，允荷玄恩，某不勝虔祝之至。

三獻

以今夜炁澄清，宸華照耀。願承流於丹陛，恪莅職於玄壇。伺召靈儀，來參聖幕。心病身病之解脫，風定波澄。人相我相之齊同，雲收月皎。返萬神於死蒂，復五炁於生根。叩首皈依，勤拳伺命。爲如上緣，志心稱念慈悲救苦天尊。和：不可思議功德。

靈寶領教濟度金書卷之三十一

靈寶領教濟度金書卷之三十七

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

宿啓儀

步虛

燒香頌

宣衛靈呪

東方

九炁青天，明星大神，煥照東鄉，洞映九門。轉燭陽光，掃穢除氛，開明童子，號曰玄卿。備衛我軒，上對帝君，收魔束祿，討捕兇群。奉承正道，赤書玉文，九天符命，攝龍驛傳。普天安鎮，我得飛仙。和與道合真。

南方

三炁丹天，煥景流光，熒星轉燭，洞煥太陽。上有赤精，合契虛皇，開明童

子，號曰華芳。總御火兵，備守玉堂，斬邪束祿，剪截魔王。北帝所承，風火衝當，流鈴交煥，翊衛壇場。正炁流行，敢有猖狂，我享上功，坐運魁罡。億劫長存，保天無疆。和與道合真。

西方

七氣素天，太白流精，光耀金門，洞朗太冥。中有素黃，號曰帝靈，保神安鎮，衛我身形。斷絕邪源，王道正明，宮殿整肅，三景齊并。道合自然，飛升紫庭，靈寶符命，普衛萬生。元皇正氣，來合我身，功加一切，天地咸寧。

北方

北方玄天，元始徘徊，辰星轉燭，洞煥太微。黑靈尊神，號曰層威，統冠飛天，仙裾羽衣。備守五門，檢精捕非，敢有干試，豁落斬摧。玉符所告，神真八威，邪門閉塞，正道流輝。三光映照，我身無衰，策空駕浮，舉形仙飛。和與道合真。

中央

黃炁中央，調理乾坤，陶鎔陰陽，總統玄真。鎮星吐輝，流耀九星，開明童

子，號曰天璘。陽炁燄上，朱煥炎精，洞照內外，運我身形。百邪摧落，攝役鬼靈，中山神呪，普天使聞。五靈安鎮，身飛上清。和與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，以今奉爲入意，祈恩玉關，進拜朱章。願得玉清道炁靈寶妙光，下降流入臣等身中，即使紫精鬱勃，玉闕開明，五老輔根，萬帝攝真，體圓珠映，乘景驂宸，金光煥赫，御炁上清。令臣所啓，速達徑御太上無極大道無形無名虛無自然金闕玉陛下。

請稱法位

具位奉行某齋法事小兆臣某，與臨壇官衆等，今故燒香，願以是功德，上爲天子王侯，土地官長，經師籍師度師，及山林巖棲學真道士，同學門人，弟子某，所薦亡靈，七世父母，九親姻族，天下

人民，蜎飛蠹動，跂行喙息，一切衆生。今故燒香，皈身皈神皈命，十方至真自然無極大道。乞丐原赦前生今世，生死宿罪重過，得免離三惡之道，五苦八難九厄之中。臣身得道真，飛行虛空，白日昇天，侍衛道君，逍遙無上金闕七寶自然宮殿，永與道合。所啓玄感，應聲上御至真無極道前。

知磬舉禮十方，從北爲始。衆官每方一拜。

至心皈命，禮北方無極太上靈寶天尊。

次東方，南方，西方，東北，

東南，西南，西北，上方，

下方，並同。

舉禮足，各長跪，皈命虔誠懺悔。

法師長跪，宣坐懺，衆官各長跪。

臣法衆等，至心皈身皈神皈命，十方無極太上靈寶天尊。以今宿啓告齋，焚香懺悔。修齋弟子某人，及臣法衆等。自從曠劫以來，至于今日。或身形所犯，四肢舉措，動違戒律，不依經典，或心業所犯，志念不專，情浮意動，馳騁不息。或口業所犯，善惡返論，綺言飾

非，華辭惑衆。因今懺悔，並乞蕩除，皆願臣等及修齋弟子，身入至仙，會道合真，神合真寂，洞入自然，性命合道，玄會無爲。志心稽首，禮謝無上至真三寶。

### 三禮

志心稽首，禮太上無極大道。

志心稽首，禮三十六部尊經。

志心稽首，禮玄中大法師。

### 重稱法位

具位臣某，與臨壇官衆，謹重誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真，玄都玉京金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳太平下教二十四真人，西城總真王君，太元真人東嶽上卿司命茅君，定錄保命二真人，名山洞府得道神仙，三界官屬一切真靈。臣等杜櫟散材，野蓬陋質，叨承宿慶，獲際真乘。佩八會之金

章，宅心道域。窺九光之玉訣，游跡玄關。師匠提携，天工參贊。每棲神於塵路，莫練景於林幽。寸進悠悠，分陰切切。緬惟補過，貴在立功。三籙威儀，度人炳繁星之訓。九幽科品，拔亡垂湛露之恩。誓敷暢於玄風，庸密裨於化日。凡有投告，盍爲關聞。齋主青詞，謹當宣奏。

### 宣詞

按如詞旨，實可矜憐。臣鍊質澄心，修齋勵志，遵依黃律，羅列玄壇，法天象地以三成，呼陰召陽而九奏。靈風玉籟，旛花倩粲於玄虛。霏霧金箒，寶篆飄翻於碧落。鳳繒效款，龍璧投誠。自今月某日爲始，爲齋主某修建某齋幾晝夜。燒香行道，禮懺轉經，降紫闕之靈光，開黑都之幽暗，皈神十極，請命三元。綸紵誕敷，澤潤九原而不夜。符章流布，涵濡六洞以皆春。沐浴客塵，返還祖炁。謹依科法，宿以啓聞，恩惟太上三尊，十極衆聖，垂慈鑒映，省覽所陳。敕勒靈寶官僚，土地主執，虛空監察，應感靈祇。懽力同心，通天



人之影響。宣威布武，掃內外之氛葩。道炁充周，妖魔滅試。令臣等百關和暢，五體虛融。對咫尺之天顏，運神會道。露方寸之民欲，合景凝真。庶齋福以周圓，迓宸恩而覆蔭。明晨行道，續更啓聞。臣誠惶誠恐，稽首頓首，再拜以聞。

### 十二願

臣等一願乾坤明素，二願氣象清玄，三願聖君萬壽，四願化洽八埏，五願天垂甘露，六願地發祥煙，七願四時應候，八願萬物生全，九願家多孝悌，十願國富才賢，十一願齋功廣被，十二願善瑞日臻。

### 復爐

香官使者，左右龍虎君，侍香諸靈官，當令臣建齋之所，自然生金液丹碧，芝英百靈，衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女，侍衛香烟，傳臣向來所啓之誠，速達徑御太上無極大道無形無名虛無自然金闕玉陛下。

### 出堂頌

靈寶領教濟度金書卷之三十七

靈寶領教濟度金書卷之三十八

洞微高士開光救苦真人甯全真授  
靈寶通玄弘教水南先生林靈真編

### 科儀立成品

開度通用

### 散壇儀

步虛 燒香頌

各禮師存念如法

宣衛靈呪

五星高耀，瑞氣飛浮，元始集神，天地交周。玉符寶節，嘯命微幽，擲火揚威，奸兇無留。萬魔振伏，紛葩却消，摧怪伐惡，道炁同流。神光照夜，陰翳俱收，萬神降格，扇景乘飈。群生咸遂，惠遍神州。和與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意。以今解壇行道，願得玉清道炁靈寶妙光，下降流入臣等身中。即使玄壇清淨，內外成真，天無氛穢，地絕妖塵，琳琅振響，十方肅清，萬魔不干，真誠上徹，令臣所啓，速達徑御太上無極大道至真玉皇上帝御前。

請稱法位

具法位 奉行靈寶某齋法事小兆臣某，與臨壇官衆等。今故燒香，願以是功德，上爲天子王侯，土地官長，三師四友，祭酒學真，弟子某所薦亡靈，九祖母，內外姻族，天下人民，蠕動蜎飛，跂行喙息，無邊無極法界衆宅，皈身皈神，皈命，無上靈寶自然至真大道。特乞原赦前生今世，生死宿罪重過，得免離三惡五道，五苦八難九厄之中。臣等身得道真，飛行虛空，白日升天，侍衛元尊，逍遙無上七寶自然宮殿，永與道合。所啓玄感，應聲上御至真無極道前。

禮方 懺悔

三啓 三禮

重稱法位

具位奉行靈寶某齋法事小兆臣某，與臨壇官衆等，謹同誠上啓 太上無極大道虛無自然元始天尊，太上大道君，高上大道金闕玄元天皇帝，太上老君，昊天玉皇上帝，十方已得道大聖，衆至真諸君丈人，十方自然靈寶天尊，隨機赴感太乙救苦天尊，三十六天帝君，玉虛上帝，玉帝大帝，東華、南極、西靈、北真，玄都玉京金闕七寶玄臺紫微上宮靈寶至真明皇道君，三十六部尊經玄中大法師，三界應感一切真靈。臣等賦質倥侗，受資蹇淺，植因宿劫，稟炁初天。際道運之興行，秉修鳳錄。值玄綱之流演，佩奉龍文。九霄開衆妙之門，八景演長生之旨。漱流枕石，盍遁迹於林泉。走俗抗塵，乃和光於朝市。愆非易積，歲月驚遷，惟補過立功，可覲帝心之簡。在度人宏道，敢希民欲之潛通。凡有皈投，理宜關奏。況奉詞旨，敢不上聞。

宣詞

按如詞言，理宜開濟。臣等澡身奉教，結友登齋。按三錄黃律之威儀，遵九幽玉匱之典式。羅敷寶信，建立玄壇，蘭膏燦爛於千枝，玉華煒燁。筍簾鏗鏘於九奏，金薤琳琅。天花散漫於玄虛，霏霧氤氳於碧落。自今月某日爲始，爲齋主某人崇建某齋幾晝夜。瞻詞達悃，降真召靈，感金闕之流光，荷紫宸之錫羨，所度靈爽，獲脫幽陰。鍊形炁於南陵，超魂神於東極。齋主蒙福，率土均休。以今釐事慶成，湛恩昭遂，人天稱贊，幽顯交歡，旌旄返景於霄衢，劍佩收班於崇陛，金龍騰景，上奏齋功，玉律校勳，下頒賞渥。恩惟至真大聖，無上法王，省錄所陳，曲垂昭映。其有建齋之初，上請三洞兵馬，十極靈官，靈寶官僚，法錄將吏，城隍里社，廟貌神祇，衛護齋功，具嚴勞績。謹依科法，拜表言功，請依格以舉遷，庶敷心而效信。臣待俯仰未備，存念不周，慮千愆萬過之充盈，有五帝四司之舉察，宣藉恩渥，均賜涵容。臣誠惶誠恐，稽

首頓首，再拜以聞。

宣表

十二願

存神復爐

香官使者，左右龍虎君，侍香諸靈官，當令臣設醮解壇之所，自然生金液丹碧，芝英百靈，衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女，倚衛香烟，傳臣向來所啓之誠，速達徑御太上無極大道至真玉皇上帝御前。

靈寶領教濟度金書卷之三十八

靈寶領教濟度金書卷之三

十九

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

陞壇二上誦經儀

早陞壇 高功領衆入地戶登天門

上十方香 上御爐香 步虛

按人各恭敬 三皈依

志心皈依十方道寶，當願衆生起心回向，一切信禮。

志心皈依十方經寶，當願衆生心開悟解，受持讀誦。

志心皈依十方師寶，當願衆生普上法橋，無有障礙。

啓白

具位臣姓某，誠惶誠恐，稽首頓首再拜，謹同誠，上啓太上無極大道三清上聖十極高真，三十二天上帝，五靈五老上

帝，十方靈寶天尊，日宮月府南辰北斗一切真宰，諸天聖衆，南宮度人不死尊神，度世司馬大神，南極長生大君，好生韓君丈人，五帝護魂侍魄養氣通血中主君，十方無極飛天神王長生大聖，無量度人君玄中大法師，三天大法師，天真皇人，太極太虛真人，太極左宮仙公冲應孚佑真君，侍經玉童玉女、神仙靈官，領仙監齋，飛龍騎吏，香宮使者，左右龍虎君，虛空鑒察一切真靈。臣聞植神靈而開三景，祖炁流精，制劫運而敷五篇，真文耀彩。自玉隆之駐景，垂珠黍以浮空。本章洞煥於中乘，隱韻昭宣於上品。巍巍大範，天人承雨露之恩。落落高張，幽顯被日星之惠。萬神朝禮，三界侍軒，爲靈寶之天根，實清微之道本。勤拳皈命，激切攄忱，以今奉爲齋主某人崇建某齋，乞於齋次，轉誦《太上洞玄靈寶無量度人上品妙經》。期仗真乘，超升滯爽。臣等謹率清衆，恭款玄壇，疏瀹塵襟，澡澄漏性，調聲正氣，異口同音，修誦玉經，敷宜妙範。伏願天光朗映，土色緬平。

飛天啓衛於玄都，琳琅嘯詠。典禁開藏於紫笈，空洞謠歌。靈風鼓騫樹之音，霏霧散梅林之影，聲聞五億，韻徹三千。即使亡故某人，覺地昭融，性天澄湛。玉符普告，形魂部衛於寒池。金馬驛呈，神氣超凌於朱火。斷除注訟，垂蔭雲仍。齋主某人，神明護門，鬼妖滅爽，千祥攸萃，萬灾不干，八荒開壽域之基，九夜化春臺之境，普薰含識，均脫化機。稽首皈依，平坐如法。

平坐讚

道場衆等人，各運心平坐，誦經如法。

玄蘊呪

靈篆太虛，浩劫之初。乍遐乍邇，或沉或浮。五方徘徊，一丈之餘。天真皇人，按筆乃書。以演洞章，次書靈符。元始降下，真文誕敷。昭昭其有，冥冥其無。沉痾能自痊，塵勞力可扶。幽明皆有賴，由是升仙都。

請轉寶經

衆誦經 結經

仰惟無極大道三境至尊，十極高真，三界聖衆，願垂鑒映，同賜證明。臣聞赤

文玉曆，二章泄化育之玄。隱韻內音，十遍契生成之妙。凡伸懇切，必沐感通，向來奉爲齋主某人，開度亡故某人。依三元金簡之儀，演一乘琅函之典。振雲和於龍籥，噴煙篆於猊篝，梵炁彌羅，已周五過，靈光洞煥，更罄千忱，希垂聞度之恩，俾遂升騰之望。伏願上帝遙唱，飛天下觀。魂度朱陵，受鍊獲更生之妙。神超北鬱，轉輪膺起死之榮。俟經法以周圓，按科儀而宣懺。更冀幽扃朗耀，夜壑昭明。九圍開清晏之符，萬物遂飛潛之性。均乘化化，各保生生。稽首皈依，虔誠讚詠。

七真讚，前四首旋行

太上玄虛宗，弘道尊其經。俯仰已得仙，歷劫無數齡。巍巍大聖德，寂寂因無生。霄景結空構，乘虛自然征。日月爲炳灼，安如樂未央。

學仙絕華念，念念相因積。去來亂我神，神躁靡不歷。滅念停虛間，蕭蕭入空寂。請經若饑渴，持志如金石。保子飛仙路，五靈度符籍。

濟我六度行，故能解三羅。清齋禮太

素，吐納養雲芽。逍遙金闕內，玉京爲余家。自然生七寶，人人坐蓮華。仰嚼玄都柰，俯酣空洞瓜。靈顏耀朱日，奚計年劫多。法鼓會羣仙，鳴鐘徹大魔。

靈風扇奇華，燦爛開繁襟。天真撫雲璈，衆僊彈靈琴。雅歌三天景，散慧玉華林。七祖升福堂，由此步玄音。前世福未足，斯書邈難尋。信道情不盡，圖飛乃返沈。太上無爲道，弘之在兆心。

學仙頌出堂

午升壇

法事早同

啓白

具位臣某謹同誠，上啓太上無極大道三清上聖，十極高真，虛空鑒察一切真靈。臣聞監真度生，萬帝霈清微之澤。迴尸起死，諸天尊靈寶之文。昭碧玉以呈祥，示黍珠而入妙。禮敬度世，尊妙獨步於玉京。受誦返形，變化飛升於金闕。津梁幽顯，橐籥人天，庸申飭於丹忱，更皈依於洪造。以今奉爲齋

主某人崇建某齋，開度亡故某人。仍於齋次，轉誦《太上洞玄靈寶無量度人上品妙經》。希降天恩，超升地爽，重哀仙侶，再款靈壇。披藥笈以虛徐，翻芝函而容與。金聲玉振，鏗鏘梵唱以凌空。綠篆丹輝，隱映神光而散彩。期契十迴之妙，俾還一性之真。伏願白簡上生，赤書下邁。勅制有送迎之喜，與天齊年。明檢無容隱之憂，斷地逮役。息注訟殃冤之害，絕胞胎結節之根。庭宇無塵，子孫有耀。更汪洋於聖澤，普沾潤於含靈。稽首皈依，平坐如法。

#### 平座讚

道場衆等人，各運心平坐，誦經如法。

#### 玄蘊呪

雲篆太虛，至由是升仙都。

#### 請轉寶經

#### 衆誦經 至結經

仰惟無極大道三境至尊，十極高真，三界聖衆，願昭玄鑒，俯賜證明。臣聞執籙把籍，度五戶以遷神，保命生根，開八門而證品。生死受惠，喜慶難言。

向來奉爲某人，披空洞之靈章，演希微之寶範，澄清一念，凜雪三關。神景昭融，經已周於十過。天華散漫，恩諒錫於九重。龍符降而驛吏星馳，鶴赦頒而冥曹風動。伏願亡故某人，耳聆妙韻，心契玄機。萬業俱捐，秋濯浴金波之影。一真獨露，曉光開玉鑑之輝。魂神徑上於南宮，體魄即超於北府。凌霄倒景，永無輪轉之憂。飛空步虛，克證逍遙之樂。霓裳映質，雲液酣神。絕考注於家庭，垂禎祥於胤嗣。齋主某福德立降，毒害潛穰。身有光明，樂壺中之日月。魔無干犯，消門外之風波。文獻流芳，絃歌衍慶。次冀天風披拂，四民安事育之常。道炁充周，萬類遂生成之性。三途罷對，五道停閑。極高天厚地以陶鎔，免出死入生之輪轉，均超有漏，同證無爲。稽首皈依，聞經讚詠。

#### 智慧頌

智慧起本無，朗朗超十方。結空峙玄霄，諸天挹流芳。其妙難思議，靈寶真密通。有有竟無有，無無無不容。

#### 七真讚後四首，旋行

學道由丹信，奉師如至親。挹景伴清輝，孜孜隨日新。終不度我身，大願有重報。玄德必然信，陰德罪至深。對來若轉輪，學道亦甚苦。晨夜建福田，種田由植樹。積篋而成山，子能耽玄尚。飄爾升清天，修爾無爲道。當爲結大緣，太上至隱書。名爲智慧篇，拔苦由人材。超俗以得真，靈姿世不奇，時若淵中蓮。

人行各有本，皆由宿世功。立德務及時，發願莫不從。善惡俱待對，倚伏理難窮。賢士奉法言，道亦在兼忘。解是大智慧，上爲太極翁。寶蓋連玉佩，命駕御九龍。金華擎洞經，捧香戀仙童。嘯歌徹玄都，鳴玉扣瓊鐘。

竦身凌太清，超景逸雲霄。保扶持法言，遊玄極逍遙。萬劫猶昨夜，千春如晨朝。巍峨蔭雲華，手攀寶林條。香烟自然生，玄階莫扶搖。靈幡應時散，繁想應時消。滅智弘大混，無爲爲清謠。

#### 三聞經

聞經已後，惟願衆生深入法門，皈依信禮。聞經已後，惟願衆生萬罪蕩除，善芽增長。聞經已後，惟願衆生永斷執迷，常皈正道。

學仙頌出壇

壇中行道告符儀

靈符赦罪天尊

長跪啓白

具位小兆臣某，誠惶誠恐，稽首頓首再拜，上言祖師無極大道虛無自然元始天尊妙無上帝玄師，太上虛皇玉晨大道君妙有上帝真師，高上玉清神霄真王，南極長生大帝宗師，東極青玄老君，太乙救苦天尊，運明保元上帝，十華上聖，四極真靈。恭望洪慈，俯垂鑒映。臣聞玉簡昭宣，度沉魂於夜壑。金符煥耀，超苦奕於寒庭。宣由皇極之深仁，普翊清微之大造，盍攄悃悞，恪冀聽觀。以今伏爲某建某齋，開度某人，切慮艷都杳漠，泉曲淒迷，非憑天澤以開幽，曷俾地關而破暗，獲離苦趣，來

證樂鄉。恭按科儀，頒宣某符，用伸拔度。欲望宸輝普照，帝澤昭敷。赦下無極神鄉，三官九署，河源泉曲，六洞十宮，九幽三途，鐵圍無間，溟泠五道，社令冥關，應干考校，囚禁去處，咸令知委，庶得陰曹敬聽，掾吏丕承。即使亡故某，無拘留逼合之憂，拔出地戶，有侍衛送迎之樂，無拘天門。徑詣玄壇，莊嚴受度。臣下情不勝激切，屏營望恩，伺命之至，所有真符，謹當告下。

宣符簡

法師運神遣符，望地戶念

元始符命。至逍遙上清，三遍。

衆念度簡頌

赤明開元圖，和暢通上虛。元始敷靈章，十部飛天書。開度九幽祖，萬遍道自居。玉阜秀瓊林，生死福德廬。自無黃籙簡，苦根焉得除。旋行誦靈章，五靈還相扶。

宣符關

各歸位

靈寶領教濟度金書卷之三十九

靈寶領教濟度金書卷之四十

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

誦諸品經儀

步虛

按人各恭敬

三皈依

志心皈依十方道寶，當願衆生。同前

啓白

具位臣某，謹焚寶香，虔誠奏啓太上無極大道虛無自然元始天尊妙無上帝，虛皇玉晨大道君妙有上帝，萬變混沌玄元老君至真大帝，東極青玄老君，運明保元上帝，太一救苦天尊，九幽拔罪天尊，十方分身應化救苦天尊，上元賜福天官大帝，中元赦罪地官大帝，下元解厄水官大帝，祖師正一沖玄神化靜應顯佑真君，上清王趙二真人，天曹地

府，五嶽四瀆，洞天福地，十方三界，地水職司，一切真靈。臣聞元始開圖，煥一元之祖炁。虛皇撫運，宏三洞之靈光。玉宇彰而碧落垂芒，金書煥而紫虛耀景。度人道備，十迴鼓舞於慈風。生神功成，九轉涵濡於德雨。九真煥北單之神力，十華昭東極之慈光。瓊笈藏玄，琅函演妙。皆鳳躍龍翔之炁，幽顯蒙恩。悉風纏雲絡之書，存亡受福。道既彰於靈寶，教斯煥於玄元。若稽紫宮之藏，期逾四萬。自闢玄都之秘，惠廓三千。修諸陽則御景乘晨，演諸陰則開幽照夜。無文不度，有感斯通。今齋主伏爲某事崇建某齋，乞於齋次，修誦三洞諸品開度真經，期仗神功，下提靈識。臣等疏瀹五體，澄潔一心。仰四極之科禁稜稜，攝齊嘯詠。企三元之威儀棣棣，縮衽謠歌。步虛韻協於雲笙，梵唱聲和於風磬。天華縹緲，鈞樂徘徊，下通鬱絕之鄉，上徹寥陽之境，以茲功德無邊，資度亡故某人。伏願金符煥耀，玉簡徊徨。落滅惡根，俾結節胞胎而披散。斷除報障，

掃身心口意以澄明。北酆削死炁之名，南上注生神之字。永辭有漏，鬼官侍衛於形魂。升入無爲，魔王保迎於性識。詣綠羅而游宴，登紫極以夷猶。上超祖玄，下覃孫子，俱拜恩於碧落，悉受福於清微。稽首皈依無極大道。

#### 宿命讚

#### 啓經

以今奉爲某人，轉誦三洞，開度諸品真經，資度亡故某人。今當恭啓琅函，肆揚瓊梵。伏願玉條逸響，瓊彩流明。清淨行萬二千，聞經悟入。煩惱業百八十，因懺滅除。即俾亡故某，性地冰清，心天玉潔。飛度五戶，悟五蘊以皆空。上開八門，蕩八識而無染。高步黃華之野，凝真碧落之區。親淨一根，均超凌於幽夜。世昌七葉，同鼓舞於朝陽。幽明普洽於釐恩，動植齊沾於德化。稽首皈依，平坐如法。

#### 平坐讚，同前至結經

仰惟無極大道三境至尊，十極高真，三界聖衆，願垂鑒映，同賜證明。臣聞靈寶圍設大法橋，達生死岸。希夷門出羣迷徑，斷去來關。實虛無元聖之慈

悲，與混沌真尊之惠愛。煥乎瓊策，妙矣璇圖，德音遍燭於黃垓，仁澤俯提於黑朔。琅音朗徹，開枯朽以發烟。瑤韻昭融，超形魂而御炁。功加一切，道冠三才，凡切切以皈依，必昭昭而應感。臣向來奉爲某人，開度某人，演誦三洞諸品寶經計若干部，悉以周圓，莫不結志，同誠秉心。一德開函，演義聲聞五億之區。執卷吟玄，響徹三千之城。致萬真而遙唱，感諸天而下觀。典禁衛嚴，飛天密護，幸試魔之辟斥，獲經法之周圓，功德難量，禎祥可冀。伏願亡故某，耳聆妙韻，心悟玄機。一念不生，耀驪珠於滄海。萬緣俱寂，朗兔魄於青冥。達生生化化之機，造有有無無之妙。千冤咸釋，均游無礙之寶林。七祖同歡，共入大乘之慧徑。齋主某五神恬淡，二氣虛靈。十八九不如意之塵，風清已往。百千萬有稱心之慶，雲擁方來。耀詩禮於芝庭，樂琴書於蔗境。公私泰定，中外咸寧。稽首皈依，聞經讚詠。

#### 三聞經

聞經已後，惟願衆生深入法門，皈依信禮。聞經已後，惟願衆生萬罪蕩除，善芽增長。聞經已後，惟願衆生永斷執迷，常皈正道。

向來

禮諸品懺儀

步虛

按人各恭敬

三皈依

具位臣某，謹焚香，上啓太上無極大道虛無自然元始天尊妙無上帝，虛皇玉晨大道君妙有上帝，萬變混沌玄元老君至真大帝，東極青玄老君，運明保元上帝，太乙救苦天尊，九幽拔罪天尊，十方分身應化救苦天尊，上元賜福府一品天官大帝，中元覃宥府二品赦罪地官大帝，下元通濟府三品解厄水官大帝，祖師正一顯佑真君，上清王趙二真人，天曹地府，五嶽四瀆，洞天福地，十方三界，地水職司，一切真靈。恭望齋忱上達，真貺下臨。鹵簿前驅，縹緲

鼓玄虛之仗。旂旌後從，翩翻辭碧落之班。俯降靈壇，曲聆素悃。臣聞女青玉律，昭昭帝憲之嚴。大赤金科，赫赫天章之重。十卷彰靈寶謝罪之品，百拜紀玄元悔過之編。玉上太清，言言省咎，天地水府，句句消愆。九幽發露以無私，十華懺陳而有耀。皆上聖普慈悲之澤，矜下愚履刑憲之悲。生也顛冥，奔趨而習舊。死焉首謝，斯解脫以圖新。大德充周，小心激切。以今齋主某入意，今當疏瀹五體，整肅一心，三沐三薰，鋪陳丹笈，一句一禮，感格玄穹，龍箒浮煒燁之光，鳳鼎煥氤氳之景。伏願亡故某，罪隨懺滅，善逐悔生。無拘留逼合之憂，南宮定籍。有侍衛送迎之喜，北府刊圖。快乘道岸之舟，永策福鄉之駕。蒙如丹禱，允荷玄恩。清衆運誠，依經朝禮。

禮懺 禮畢再啓

具位臣某，謹重誠，上啓三清上聖，太乙救苦天尊，十極真靈，無鞅聖衆。臣聞天人應格之機，如谷答響，凡聖貫通之妙，若影隨形。凡玄虛垂懺謝之文，則

黑單從除愆之令。既諧寬釋，敢謝主維。臣向來奉爲亡故某，宣禮諸品寶懺，莫不檢制六情，淪疏十業。攝身攝心攝口，整束四非，禮道禮經禮師，蠲消萬過。即使亡故某，頓離地禁，嘉沐天光。日燦冰山，徑上青華之界。風清定水，即登朱火之鄉。衍慶雲仍流芳，胤嗣爲如上緣。志心稱念消愆滅罪天尊。和：不可思議功德。

藏棺儀

立幕畢，詣玄師前，上香跪啓

具位臣姓某，謹重誠，上啓太上三天扶教輔元大法天師，正一沖玄神化靜應顯佑真君。恭望道慈俯垂省錄，以今奉爲某人修建某齋，開度亡故某人靈魂。切見本家見停尸柩，未經殯埋，恐塵穢之莫清，曷真靈之能感。盍遵科法，謹爲奏聞。欲望慈悲俯矜，懇切頒宣三景蕩穢符命，差降九鳳破穢靈官，即俾紛翳潛藏，入地萬丈，內外洞徹，密契三華，扇靈景以廓清，迓神光而密邇。臣無任虔切之至，今有表文，謹當宣奏。

宣表



表文敷露，淵聽昭明，願垂有造之恩，申錫無垠之禱。容臣運元會道，招真致靈，先滌穢氛。後迎仙仗，見前清衆，同念琅音。

衆誦淨天地呪，入靈幃，飛灑，以藏棺符鋪棺上棺四角，焚符。

法師存念如儀。存畢，三扣齒，退。

靈寶領教濟度金書卷之四十

靈寶領教濟度金書卷之四

十一

洞微高士開光救苦真人甯全真授  
靈寶通玄弘教水南先生林靈真編

科儀立成品

開度通用

真靈醮儀

步虛 燒香頌

各禮師存念如法

宣衛靈呪

五靈列位，煥鎮五方，始皇護魂，丹老衛形。皓靈侍魄，黑帝攝生，中央黃帝，統御萬真。元皇誥下，幽夜開光，罪消北府，名列南昌。金籙定籍，玉字除殃，朱陵鍊質，飛神太蒼。三官九府，無極神鄉，普受開度，上生天堂。和與道合真。

鳴法鼓二十四通

無上三天玄元始三炁太上老君，當召出臣等身中三五功曹，左官右官使者，

捧香驛龍騎吏，侍香金童，傳言散華玉女，五帝直符，直日香官使者，各一人出。出者嚴裝顯服，冠帶垂纓。關啓此間土地里域，真官正神。臣今入靖升壇，燒香行道，謹奏爲宣意其諸情愫，具載丹忱。以今關盟三界，普告十方，願得太上正真生炁，流匝臣等身中。令臣所啓之忱，速達徑御太上無極大道虛無至尊御前。

請稱法位

具位臣姓某，誠惶誠恐，稽首頓首再拜，謹同誠，上啓太上無極大道虛無自然元始天尊妙無上帝，虛皇玉晨大道靈寶天尊妙有上帝，萬變混沌玄元老君至真大帝，東極青玄老君，運明保元上帝，太乙救苦天尊，九幽拔罪天尊，十方分身應化救苦天尊，三元三官大帝，祖師正一顯佑真君，天曹地府，五嶽四瀆，洞天福地，十方三界，地水職司一切真靈。恭冀洪慈，洞開靈鑑。臣以宿植慶基，生逢玄運，洞輔秘寶。佩奉修持，莫能葆鍊山林。精思高蹈，浮沉埃壑暗老。光陰過有淵，陵功無毫髮，天

恩涵育，未賜誅夷，領教度人，誓殫忱切，勉修功行，庸裨萬方，凡有皈投，敢忘關告。臣昨爲修齋某人崇建某齋，開度亡故某，上登仙界。臣職司濟度，敢怠奏聞。恭惟依按真科，宣揚齋法，建壇行道，懺罪首愆，保度魂儀，超升朱火，冥關開泰，陰境廓清，仰荷恩光，俯從民欲，以今解壇遷賞，頂踵知元，輒罄葛衷，爰修瀹祭。伏願珠旛翠葆，肅肅遐臨，風馬雲車，飄飄莅止，不違應感，恪副翹傾。巨不勝虔切，望恩之至，謹當奏請。

請聖

謹奏請太上無極大道大羅玉京元始天尊，太上道君，太上老君，昊天玉皇上帝，三寶帝君，三寶丈人。伏願應感分輝，流光下降。

謹奏請北極紫微大帝，天皇帝，東極青玄上帝，南極長生大帝，朱陵大帝，九天上帝，三十二天上帝，五老上帝，東華西靈已得道大聖，衆至真諸天丈人。伏願應感分輝，流光下降。

謹奏請太陽太陰、五星四曜、南辰北斗上真道君，二十八宿星君，醮主合家本命元辰真聖，本宿星君，運炁真宰，伏願應感分輝，流光下降。

謹奏請泰玄樞機三省諸相天君，玄中大法師，靈寶經、籍、度三師真君，伏願應感分輝，流光下降。

謹奉請天、地、水三官大帝，北極四聖真君，九天諸司、天曹諸司、上清諸院使真君，飛天神王，五帝大魔，三元真君，上章詞表靈官。伏願應感分輝，流光下降。

謹奉請妙行真人，玄一三真人，沖應真人，太極太虛真人，太極左宮仙翁，沖應真人，太平下教二十四真人，上章二十四真人，九天普度院三十六真人。伏願應感分輝，流光下降。

謹奉請三洞威神，三寶官屬，靈寶領仙監齋，飛龍騎吏，三十二天監齋直使，左右官使者，三五功曹，侍香金童，傳言玉女，五帝直符，直日香官，左右龍虎君，諸天仙吏，伏

願應感分輝，流光下降。

謹奉請五嶽五帝真君聖帝，洞天福地靖廬治化仙官，海上五嶽十洲三島仙官，東華、方諸、西靈、崑臺仙官，伏願應感分輝，流光下降。

謹奉請西城總真上卿，司命定錄右禁三官保命真君，南嶽夫人，東華道君，上清仙侯，本派祖、玄、真師列位真人，經、籍、度師列位真人，伏願應感分輝，流光下降。

謹奉請地府酆都大帝，九壘土皇君，六洞冥官，十宮真君，五道大神，三魔王，諸大地獄曹僚案掾、無極神吏，伏願應感分輝，流光下降。

謹奉請水府搏桑大帝，四海龍王，四瀆源王，九江水帝，十二河源仙官，五湖七澤大神，溟泠大神，水府曹僚、案掾神吏，伏願應感分輝，流光下降。

謹奉請九州社令司，本州本縣城隍司，當□里域司，齋主家土地六神，遠近廟貌祀典神衆，伏願應感分輝，流光下降。

謹奉請三界符使，四直功曹，玄壇翊衛，四靈神君，監齋香官，監齋使者，宣通命令一切神明，惟願應感分輝，流光下降。

初獻

臣謹重誠，上啓三清上帝，十極高真，仰冀洪慈，俯垂采錄。臣以係代學真，聯名領教，憲天弘道，濟物利人，職守所縻，敢云瘝曠。以今齋主憫茲亡爽，倏墮幽寥，生有冤愆，死沉惡趣，炎池冰沼，水火陰陽，匪賴神恩，曷祈超邁。是以虔遵齋律，敷列壇場，信幣勤渠，香火繚繞，投誠紫極，請命玄都，爲亡故某，懺滌宿瑕，徼迎宸祉。俾離夜壑，快睹晨陽，沐浴朝真，聽法受鍊，惡根落滅，罪簿疾除，時刻升遷，制魔保舉，永辭北府，徑上南宮，道岸先登，法橋穩駕。三途五苦，八難幽關，均獲逍遙，斷除苦惱。際天蟠地，均沐仁風，若冤若親，俱陶化育。豈臣愚鈍，獲遂感通，實帝慈悲，普施利益，珠環真切，蘋藻勤渠，不揆瓣香，庸伸報效。伏望高真日鑒，上帝時歆，俯察精虔，恪垂

丙在，儀不及物，情見乎辭，仰冀聖靈，洞加慈亮。臣不勝虔祝之至，謹稽首再拜。

亞獻

臣謹重誠，上啓三清上帝，十極高真，仰冀洪慈，俯垂洞鑒。臣以上質旁，鑒觀有翼，由中濟下，化育無私。今有齋主所度亡靈，欣承聖澤，請言終惠，更藉維持。所冀丹旆飛馳，玄綸鼓動，申飭三府，關聞九幽。亡故某駕景策空，飛翔八極，隨劫輪轉，與天齊年，永離輪迴，常依正道，魔無干犯，衣食自然，蒙如懇祈，允臻嘉祐。更願靈寶官屬，領仙監齋，玄元仙曹，佐時用事，城隍社令，里域監臨，護正齋功，具嚴勞績。今飛朱表，謹即言功，所冀淵慈，進品加秩，庶酬勳效，永翊宗乘。更願齋主某，神觀清夷，風資茂悅，芝蘭秀發，椿榭歡愉，七葉連榮，五枝挺秀，詩書演慶，文獻流芳，門戶興隆，絲羅協泰，家庭真吉，中外和平，荷天之休，永臻康溢。上願三光順軌，五炁宣和，彗孛韜威，風雲藏靜，山靈薦祉，川后靜波，疵

癘不生，由疇豐稔，三邊息警，六合澄清，林絕虎狼，田無螟蚘，歡生擊壤，歌唱康衢，動植飛潛，均隨化化，幽關夜壑，悉沐生生，極地際天，俱陶壽域。臣下情不勝虔祝之至。

終獻

臣謹重誠上啓。臣以今星漢斜飛，籟沉動寂，千枝燼冷，百和方殘，薦獻情周，敷陳禮罄。紅塵紛糾，莫挽霓旌，碧落迢遙，將旋羽葆。臣等承顏奏對，綴武班聯，無量度人，喜宣聖澤。法事粗悉，萬聖旋駟，瞻戀深深，惋恂曷喻。臣不勝依戀激切之至。謹稽首奉送。

迴駟頌

迴駟五雲輿，騰駕九章歌。倏忽沖天遠，醮筵香氣多。玄恩覃宇宙，福祿遍山河。緬想神仙路，逍遙上大羅。

十真君醮儀

步虛 灑淨

燒香頌

各禮師存念如法

玄天徘徊，流景上清。大有啓運，八字高明。飛天澄空，洞陰自生。五炁纏

綿，灌我身形。冠帶北單，受鍊洞靈。腎府北出，內外光精。飛行三界，遊宴紫庭。和與道合真。

鳴法鼓三十六通

上清靈寶玄壇，當召香官使者，四直功曹，今日直符，直壇土地，防禦祇應內外真靈，急上關啓。以今奉爲入意，當願天光鬱勃，地禁開明，泉曲生春，寒庭不夜，令今所啓，速得上聞北陰玄天酆都大帝、地府十殿真君聖前。

請稱法位

具位臣姓某謹同誠，上啓北陰玄天酆都大帝，地府泰素妙廣真君，陰德定休真君，洞明普靜真君，玄德五靈真君，最勝耀靈真君，寶肅昭成真君，神變萬靈真君，無上正度真君，飛魔演慶真君，五化威靈真君，左右文武曹僚，案掾侍從主執，一切威靈。伏聞元始開圖，扇真風於三極。虛皇御運，流慧日於九幽。羅酆司考對之權，泉曲職推研之任。十宮曹局，六洞官僚。惡盈益謙，昭水衡而有準。禍淫福善，凜冰鑑以無私。仰承金闕之科條，上奉玉京之

政令。範圍所被，統隸無遺。以今齋主某，伏爲亡故某人，身墮神鄉，命歸鬼錄，慮主紛於業網，致死繫於形機。水火陰陽，難逃帝憲。予奪輕重，宜賴神休。敢殫一得之葵忱，恭致三卮之菲敬。冀旌德款，普錫恩釐。伏願風馬前驅。擁人間之鹵簿，雲車後從，耀地上之檐帷。來赴靈場，恪歆珍供。某不勝激切，望恩之至，謹當奉請。

請聖

志心奉請北都泉曲府玄天酆都大帝，惟願雲驂俯降，風駟遙臨，來赴醮筵，證明修奉。

志心奉請北都泉曲府第一殿秦廣大王，泰素妙廣真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第二殿初江大王，陰德定休真君，惟願雲驂俯降，風駟遙臨，來赴醮筵，證明修奉。

志心請北都泉曲府第三殿宋帝大王，洞明普靜真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第四殿五官大王

玄德五靈真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第五殿閻羅大王，最勝耀靈真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第六殿變成大王，寶肅昭成真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第七殿太山大王，神變萬靈真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第八殿平等大王，無上證度真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第九殿都市大王，飛魔演慶真君，惟願雲驂俯降，風駟遙臨，來赴醮筵，證明修奉。

志心奉請北都泉曲府第十殿轉輪大王，五化威靈真君，惟願雲驂俯降，風駟遙臨，來赴醮筵，證明修奉。

志心奉請北都泉曲府大帝真君殿下左班曹僚案掾，主執善惡無殃神靈聖衆，惟願雲驂俯降，風駟遙臨，來赴醮

筵，證明修奉。

志心奉請北都泉曲府大帝真君殿下右班曹僚案掾，主執善惡無鞅神靈聖衆，惟願雲驂俯降，風駟遙臨，來赴醮筵，證明修奉。

初獻 引藩居中參禮

具位姓某謹焚香，上啓北陰玄天酆都大帝，地府十宮十殿真君，左右文武曹僚，案掾侍從主執，一切威靈。伏聞上聖慈仁，符春生而布德。下愚冥昧，抵秋殺以昭刑。故雖民情之自貽，實亦帝心之曲憫。興言澤壘，莫慘羅酆。鐵壁千尋，羈窮魂於積夜。銅關萬仞，縻羅魄於重泉。陰風浙浙而茹苦無原，昏霧濛濛而含哀莫訴。天光弗照，地暗常臻。獄吏威嚴，朱墨紛紜於簿錄。冥官獰惡，丹青翻覆於文書。自非主守，寬一分而惟重惟輕。與夫監臨，執三尺而無小無大。曷甦常禁，上沛殊恩，仰惟十地之威權，實贊三天之號令。位尊陰部，聰明智慧足有臨。勢繞冥鄉，性命禍福無不載。準女青之玉律，遵大赤之金科。職尚威嚴，心

存惻憫。凡滅度經由而靡忒，必毫釐考校以無差。今孝子某人，切慮亡故某人，身處紅塵，神縈黑業。六因十習，孰逃奏過之三尸。五苦三途，曷追懲愆之八難。隨所作罪，受此報緣。歷歲歷時，既莫測升沉之所。若祥若七，必遍經按察之司。體道好生，配天惡殺。一帝端拱，頒德詔以風行。十真崇嚴，承赦音而雷動。倘有重過，免掛深文，爲銷毀於刑書，即勾除於罪簿。俾脫犴室，即禮龍墀。玉笋低鋪，列瑶池之仙菓。金樽高設，陳閬苑之奇葩。雲饌重重，霞漿奕奕。步虛響徹，飛白鶴於雲間。梵唱流明，無青鸞於空際。願毋遜卻，曲爲鑒歆。某不勝激切，懇祈之至。

亞獻

具位某謹焚香，上啓北陰玄天酆都大帝，地府十殿真君，左右文武曹僚，案掾侍從主執，一切威靈。伏聞乾坤定位，張翠蓋於九清。離坎司方，辯黃輿於五濁。中極號仙聖之府，北都爲鬼神之家。職帝嚴刑，贊天重憲。山川

嶽瀆，皆歸統部以無遺。里域城隍，悉屬按臨而莫隱。凡人間之善惡，屬地上之權衡。五道循環，端由科簡，四生輪轉，奚外銓量。惟能悔過以懺祈，必沐雪愆而救護。今孝子某人，伏爲亡故某，澄清一念，疏滌五官。禮道禮經禮師，皈依三寶。淨身淨心淨口，消滅千緣。既遠罪之淳，詳諒書功之勤。特伏願解脫陰境，超返陽郊。鸞翠林中，聽法音而嘹唳。黍珠座上，聆雅梵以逍遙。掛六銖之妙衣，餐五明之真味。三十六地，頓無報對之名。八十一天，穩有飛騰之迹。溥侍衛送迎之喜，免拘留逼合之憂。蒙印丹祈，允臻玄貺。次願生門啓旦，死戶乘晨，刀化樹而劍爲騫，冰靜波而火息燄。停風雷之霹靂，絕爐炭之炮燔。煮瀆收威，無鐵杖金鎚之考。車輪息運，免足登手抱之殘。回暖律於溟泠，寬刑威於普掠。冥曹陰掾俱證陽官，鬼職幽僚盡超仙籍。飛爽咸離於黑鬱，遊精盡上於朱陵。蠢動蛭飛均承化化，跂行喙息普樂生生。實依河潤之恩，亶藉海涵之

惠。以今恭依典式，謁謝真靈，引領亡魂，皈依寶殿，叩頭雅拜，稽首勤奉，以謝以祈。有嚴有翼，恪希淵默，俯鑒忱恂，某不勝虔禱之至。

終獻

法師啓白

伏以化機鼓二炁之輪，群靈茂育。業網趣三塗之駕，萬苦淒迷。故羅艷霧鎖於神鄉，而鬱絕烟濛於鬼域。幽幽職憲，慘慘司刑，自非上聖垂惻隱以示慈悲，曷俾下愚脫沉淪而超苦惱。今之夜有孝子某人，資薦亡故某，請命帝庭，微惠神馭。盍遵依於丹範，庸恭肅於玄壇，先請三寶以開光，次詣十真而扣謁。雲鏞激響，列梵唱以流明。月磬虛徐，間瓊音而朗徹。冀垂洞鑒，曲采翹傾，仰乞帝尊，俯賜明證。

太一救苦天尊

焚香仰啓道中王，端拱清微聖化長。

願沛龍恩來鬱絕，受臣精懇降靈光。

大聖元始天尊

焚香仰啓經中王，端拱禹餘聖化長。

願沛龍恩來澤壘，受臣精懇降靈光。

大聖靈寶天尊

焚香仰啓師中王，太赤端嚴聖化長。

願沛龍恩來北朔，受臣精懇降靈光。

大聖道德天尊

三尊聖號，歷劫難逢。既垂勃勃之靈光，爲破沉沉之妄暗。盍請孝眷，奉格亡靈。即遍詣於十宮，庸首陳於萬過，伏惟真造，俯賜格知。

移班詣第一殿，上香

孝子引旛，詣第一殿上香，設拜焚香供養第一殿秦廣大王泰素妙廣真君，恭惟聖造位列陰宮。凡下元生人，運應滅度，身經太陰，期周一七日，則屬真君考校，毫髮無遺。今有孝子某，切念亡故某人，生有惡緣，死罹按問。輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依秦廣大慈王，泰素徽稱冠八方。  
劍履琳琅司地禁，珮環容與斡天章。  
龍符快布慈悲救，犴室咸薰道德香。  
一七亡魂經殿陛，頓消罪累任翱翔。

和：不可思議功德。

宣疏 移班第二殿，上香

孝子引旛同前

焚香供養第二殿初江大王陰德定休真君，恭惟聖造位列陰宮。凡下元生人，運應滅度，身經太陰，期周二七日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府初江王，陰德權尊澤壘揚。  
上稟玄虛司鬼域，下提黃混化真鄉。  
女青憲網分淫善，太素刑機判否臧。  
二七亡靈經殿陛，萬緣澄寂樂無央。  
宣疏 移班第三殿，引旛。同前  
焚香供養第三殿宋帝大王洞明普靜真君，恭惟聖造位列陰宮。凡下元生人，運應滅度，身經太陰，期周三七日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜

憫，靈符昭告，善頌敷陳，無涯罪由，曲賜消滅。

告符

皈依宋帝大慈王，普靜仁恩契昊蒼。日耀天光頌鳳詔，雲開地暗發龍章。陰關不夜宸恩重，冥路長春帝澤昌。三七亡靈經殿陞，從茲快樂妙難量。

宣疏 移班第四殿，引旛。同前

焚香供養第四殿五官大王玄德五靈真君，恭惟聖造位列陰宮。凡下元生人，運應滅度，身經太陰，期周四七日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府五官王，玄德威靈譽望長。湛露零零朝綉紫，慈風拂拂曉綸黃。寒庭駘蕩成真境，夜壑提携化樂鄉。四七亡魂經殿陞，業無一點任徜徉。

宣疏 移班第五殿，引旛。同前

焚香供養第五殿閻羅大王最勝耀靈真

君，恭惟聖造位列陰宮。凡下元生人，運應滅度，身經太陰，期周五七日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府閻羅王，最勝神通握紀綱。號令雷霆摧地魅，權衡星斗射天狼。獅頭光動飛丹詔，龍尾恩流煥紫章。五七亡魂經殿陞，一塵不染慶春陽。

宣疏 移班第六殿，引旛同前

焚香供養第六殿變成大王寶肅昭成真君，恭惟聖造位列陰宮。凡下元生人，運應滅度，身經太陰，期周六七日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府變成王，寶肅巍巍譽望長。

仰奉三天三省令，俯提九地九幽場。紫虛沛澤金雞下，黑鬱承恩玉鳳翔。六七亡魂經殿陞，寶蓮捧足樂洋洋。

宣疏 移班第七殿，引旛。同前

焚香供養第七殿太山大王神變萬靈真君，恭惟聖造位列陰宮。凡下元生人，運應滅度，身經太陰，期周七七，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府太山王，神變威靈德巨量。權領九垓提死籍，勢分八極典生方。峨峨劫仞承參贊，寂寂泥犁藉主張。七七亡魂經殿陞，清夷萬業樂無疆。

宣疏 移班第八殿，引旛。同前

焚香供養第八殿平等大王無上證度真君，恭惟聖造位列陰宮。凡下元生人，運應滅度，身經太陰，期周一百日，則屬真君考校，毫髮無遺。今有孝子某，切念亡故某人，生有惡緣，死罹按問，輒

詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依平等大慈王，無上仁心翊帝綱。六洞生春天廣大，三途不夜地汪洋。民樂妄業隨風釋，帝有真恩耀日光。百日亡魂經殿陛，際高蟠厚慶生方。

宣疏 移班第九殿，引幡。同前

焚香供養第九殿都市大王飛魔演慶真君，恭惟聖造位列陰宮。凡下元生人，運應滅度，身經太陰，期周小祥日，則屬真君考校，毫髮無遺。今有孝子某，切念亡故某人，生有惡緣，死罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依都市大慈王，演慶持平藉棟梁。威凜虎扉刑德判，澤流鳳闕憲恩詳。沉沉圜土春先到，眇眇方垓夜已光。靈議小祥經殿陛，天衢平步掛霓裳。

宣疏 移班第十殿，引幡同前

焚香供養第十殿轉輪聖王五化威靈真君，恭惟聖造位列陰宮。凡下元生人，運應滅度，身經太陰，期周天祥日，則屬真君考校，毫髮無遺。今有孝子某，切念亡故某人，生有惡緣，列罹按問，輒詣行幕，拜首祈恩。恪冀真慈，特垂矜憫，靈符昭告，善頌敷陳，無涯罪由，曲賜消滅。

告符

皈依地府轉輪王，五化威靈雨露灑。天吏權綱憑燮理，地司憲令藉扶將。春回鬱絕光風遠，陽到羅鄴皎日彰。靈識大祥經殿陛，步虛縹緲上金堂。

宣疏

移班與孝子執幡，同詣左班官僚前，設拜如前。

焚香供養真君殿下左班同德佐理，諸司執職，官僚聖衆。恭惟聖造，職贊陰曹。凡下元生人，運應滅度，身經太陰，則屬真君考校，各有程限，毫髮無遺。今有孝子某，伏慮亡故某人，生有惡緣，死罹按問，已詣真君行幕，拜首祈恩。仰惟參贊裁成，宣由神運，謹詣

貴案，總乞赦原，冀體慈悲，為除罪簿。左曹陰掾職刑編，上體天慈贊化權，獄吏雖尊回惠澤，圜扉四關樂無邊。和：不可思議功德。

宣疏 移班詣右班，引幡同前

焚香供養真君殿下右班佐理，諸司執職僚聖衆，恭惟聖造，職贊陰曹。凡下元生人，運應滅度，身經太陰，則屬真君考校，各有程限，毫髮無遺。今有孝子某人，伏慮亡故某，生有惡緣，死罹按問，已詣真君行幕，拜首祈恩。仰惟參贊裁成，宣由神運。謹詣貴案，總乞赦原，冀體慈悲，為除罪簿。

右曹陰掾贊刑書，以德宣威帝澤舒。

百萬牛頭生善念，蒼生積業盡蠲除。

宣疏 移班歸位，孝子引幡居中

十宮真宰，贊祝已陳，列位神靈，懇祈復罄。更為亡靈懺悔三業，清淨六根，了悟昨非，圓成今是。

至心皈命，奉為亡靈，懺悔心業罪。心業無邊罪，浩浩實難量。慳吝恣貪婪，憎嗔多忿怒，愚癡賤名檢，毒害世間人。恭對真君前，一心勤懺



悔。願此心業罪，消除永不生，北朔免沉淪。和：南宮常快樂。

至心皈命，奉爲亡靈，懺悔身業罪。身業無邊罪，浩浩實難量。殺害好狀生，偷盜謀殘賊。邪淫妖穢濫，惱亂世間人。今對真君前，一心勤懺悔。願此身業罪，斷滅永不生，度命離黑單。和：受書登南上。

至心皈命，奉爲亡靈，懺悔口業罪。口業無邊罪，浩浩實難量。惡口罵嗔言，反覆恣兩舌，胡謊語不實，粧飾世間人。今對真君前，一心勤懺悔，願此口業罪，解釋永不生，黑鬱快超凌。和：朱陵膺福慶。

至心皈命，奉爲亡靈，懺悔六根罪，六根無邊罪，浩浩實難量。濃艷逞歌辭，清輕拂絃管，悲樂喧朝夕，是罪屬耳根。花木玩玄黃，綺紈翻黼黻，粧飾鬥新巧，是罪屬目根。金鼎噴沉檀，華枝送蘭麝，娉婷悅脂粉，是罪屬鼻根。艷冶逞妖言，喧飾翻妄語，是非爭變亂，是罪屬舌根。輕狂衣綺羅，浮浪

流市陌，酒色姿迷戀，是罪屬身根。毒害造陰謀，走作隨宴樂，終朝恣驕驚，是罪屬意根。如此六根罪，結習亂形神，今對真君前，一心勤懺悔。願茲六根罪，清淨永不生，解脫出地中。和：逍遙歸天上。

三業俱永釋，六根常斷除。紅日燦冰山，清蟾澄定水。一真方寸徹，萬妄悉虛明，惟願十真君。和：垂情常救拔。更願圓清錫羨，方濁開祥，五苦停輪，三途罷對，地除簡對，水絕盟言，一切含生。和：成無上道。

向來欽禮十宮游幕，懺悔三業六根，功德周圓。伏願迴骸起死，監真度生。慶雲徘徊，舞霓裳而接引。霏烟羅絡，乘月蓋以邀迎。徑上妙嚴，高躋長樂，隨心具足，任性圓通，稽首皈依無極大道。

### 終獻

具位某，謹焚香，上啓北陰玄天酆都大帝，地府十殿真君，左右文武曹僚，案掾侍從主執，一切威靈。以今露冷風

清，河澄月淡。蘭缸燼冷，覺雲馭之將旋。蓮鼎烟沉，諒風旂之欲邁。百司復位，列屬還班。既薦獻之畢陳，復贊揚之已罄。莫留部從，惟劇瞻依。某不勝激切，望恩之至，謹伸奉送。

### 迴輶頌 十願

臣等一願化形十方界，二願同聲救罪人，三願天堂享大福，四願地獄無苦聲，五願火翳成清署，六願劍樹化爲鶯，七願上登朱陵府，八願下入開光門，九願超度三界難，十願徑上元始天。

### 存神復爐

功曹使者，侍衛香官，仙靈土地等神，當令向來設醮之所，自然生祥烟甘露，陽和之炁周流六虛，九壘光明羅酆煥耀，罪性澄寂，游爽升遷。今日直符直事，接待香烟，遍傳向來所啓，速達徑御北陰玄天酆都大帝、地府十殿真君聖前。

### 大學仙出壇 向來

### 起靈三奠儀

### 步虛

伏以生死夜旦之常，孰云恒化。天地

陰陽之變，奚有停機。故東魯興川逝之悲，而南華發舟藏之嘆。駒陰暗老，蝶夢俄醒。惟能了假合四大之緣，斯可觀虛妄六如之法。恭惟某人，詩書世澤，紈綺家聲。富哉插架之籤，芝蘭曉潤。侈以堆床之笏，梧竹春凝。衆誇金屋之藏，遽赴玉樓之召。女人女箴，貞潔婦道微柔。宜室宜家，慶舉案齊眉之樂。鼓琴鼓瑟，宴扶床坐膝之榮。倏興薤露之歌，恍若萍雲之散。孝眷某情鍾哀痛，義重劬勞。建靈寶齋，步武諒超於地暗。悟玄元道，形神直上於天光。得鍊黃華，即登碧落。一家唯諾，求聚首以無由。萬劫循環，顧傾心而莫已。輒致束芻之奠，冀歆采菲之誠。靈其格斯，夜將闌矣，恭陳初獻。

香醪一奠夜何其，星斗芒寒彩陸離。淅淅松風添慘感，泠泠竹露逞傷悲。前朝樂意隨流水，後夜哀情付落暉。今古英雄都變滅，何如猛省悟真機。

伏以宇內寓形，極目兔烏之升降。寰中寄跡，驚心鳧鶴之短長。皆襲烝母以常行，豈超化兒而致爾。勢行月塞，

因威嚴九鼎之尊。勳紀雲臺，天祿享萬鍾之貴。梁園興逸，梓澤歡濃。生也有涯，雖燄燄虎頭之相。死而後已，皆巍巍馬鬣之封。奚辨彭殤，曷分顏跖。亡靈偶入鬼錄，遽返神鄉。倏去倏來，宜識萬形之有弊。不生不滅，須知一性之常存。孝眷某請命紫虛，升神碧漢。宣靈寶旨，可昭迴骸起死之榮。乘功德光，獲遂監真度生之樂。自此超離於地禁，行看游宴於天衢。二景流精，鍊本來之面目。五靈導性，回固有之精神。徑上南宮，永離北府，恭陳亞獻。

香醪再奠漏初長，梵唱依稀送別觴。義重齊眉休眷戀，愛深坐膝莫思量。妄緣易障玄元路，真諦能開道德鄉。珍重莊生南面樂，何須一事掛衷腸。

伏以勞我以生，世路之崎嶇歷盡。息我以死，冥途之寂寞奚堪。自非識破妄緣，曷能悟入真諦。枌榆義重，桑梓情鍾，吹埙吹篴而原鵲急難，鼓瑟鼓琴而鏡鸞和合。雖云情重義重，未免恩生害生。一息不來，六親何處。亡靈

回頭，猛省着意思惟。辭生前眼底之虛花，認身後心中之實果。孝眷某皈依玉笈，建設瑤壇，開正路於朱陵，閑邪門於黑鬱。鍊形鍊神鍊氣，洗滌千愆。禮道禮經禮師，圓明一性。從此永辭於塵世，佇看高詣於仙鄉，自在逍遙，永無輪轉，恭陳三獻。

香醪三奠淚盈盈，勢隔冥陽話不成。門外風軒催鳳駕，庭前雲馭趣歸程。人間歲月飛俄頃，天上春秋邁劫齡。從此殷勤相別後，受書返景宴朱陵。

酒分三奠，情罄一忱，正更深漏斷之時，乃月淡河澄之際。靈儀一心端肅，五體勤拳，僊仙靈引導之勤，赴聖真鍊度之切。逍遙游處，步流日以朝元。歸去來兮，詣明霞而問道。高躋仙路，不墮塵凡，孝眷拜辭，亡靈永訣。

向來頌

靈寶領教濟度金書卷之四十一

靈寶領教濟度金書卷之四

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

開度廣籙齋

九朝行道儀

第一日早朝

各禮師存念如法

宣衛靈呪

金真綠霞，煥映三天。飛雲丹霄，諸天控輶。晨暉啓旦，陰翳俱捐。九微震空，五星迴旋。萬仙感應，自然妙玄。杳冥散體，分形百千。玄珠光耀，瑞降壇乾。生死蒙惠，灌煉金泉。魔王敬奉，合景三田。和與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散華玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神。臣今早朝陞壇行道，朝謁帝真，奉爲入齋意，其諸誠意，具載緘牒。願得太上十方至真道炁靈寶妙光下降，流入臣等身中。即使玄壇清淨，內外成真，天無氛穢，地絕妖塵，琳琅振響，十方肅清，萬魔不干。真誠上徹，令臣所啓，速達徑御太上無極大道至真玉皇上帝御前。

請稱法位

具位奉行無上黃籙大齋法事臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，

名山洞府得道神仙，三界官屬一切真靈。臣聞祖炁凝玄，混沌運六虛之表。靈光胤粹，鴻濛陶五太之先。帝江鑿而經緯彰，天根開而玄黃奠。八威敷落，慶雲蒙藹於玄虛。三洞流明，道日輝華於碧落。鼓權衡之聖瑟，撫橐籥之神機。無形無名，有象有數。臣等蓬茆未剪，梨棗猶昏。道運天開，幸駕班之綴武。玄樞師錫，欣鳳笈以澄神。期高蹈於烟林，迺卑棲於塵棘。乘非履過，曲涵雨露之恩。弘道憲天，夙炳日星之誓。凡有投告，所合關聞，齋意心詞，謹當宣奏。

宣詞

按如詞旨，備切忱恂。臣聞天靈神萬聖之宗，大無撫運。聖真仙億天之祖，妙有開圖。金書流衍於清微，玉字徘徊於紫極。三奇融妙，尊守一之迴風。八緯凝玄，混存三之化日。策靈威而六天敕制，奉神輝而九地朗清。幽顯津梁，古今柱石。今齋主某，仰瞻層漢，俯軫重泉。死炁彌綸，孰秉昏衢之慧燭。生神飛化，期操業海之慈航。提

九夜以飛霄，俾一朝而御景。爰遵黃律，庸啓玄壇。彩暈扶桑，萬象浴金烏之影。光騰騫樹，十華流白鶴之音。紫炁玲瓏，碧霞纏絡。鬱儀日近，聆霄衢清蹕之聲。劫仞雲開，迓輦路翠華之仗。乘虬輪於象外，端獅座於光中。環珮承顏，露寸天而玉立。旌旄耀景，借尺地以球鳴。願垂惠下之恩，昭鑒由中之禱。玉龍嚴駕，飛紫綉於九幽。金馬驛程，湛丹綸於十界。快開張於狂室，即肆覲於龍墀，慶浹人天，福均家國。以今清旦行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神皈命，首體投地，仰依太上三尊。願以是功德皈流社稷尊靈，宗祧先聖。蓮臺高步，芝圃遊神。月珮驂虬，侍玉京而問道。雲旗翳鳳，登金闕以朝元。億年開瑶祚之祥，萬世演銀潢之派。

齊齡。青宮彰仁孝之風，彤掖著徽柔之化。盟尊帶礪，歌麟趾之振振。勢屹金湯，聳虎頭之赫赫。今故燒香，自皈依師尊大聖衆，至真之德，得道之後，保天長存。和：與道合真。

以今清旦行道，請法衆等，運茲二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆，臣等皈身皈神皈命，首體投地，仰依太上三尊。願以是功德，皈流齋主家，九玄七祖，億劫種親，伏願業海澄瀾，靈源流潤。紫霄御炁，膺鳳籙以更生。朱火登神，襲龍符而起死。福舍際太平之運，慶基開文獻之芳。齋主某風鶴九霄，雲鵬萬里。世濟耀堆牀之笏，七葉聯榮。家傳富插架之籤，五華挺秀。協塤篴於宴蓐，鼓琴瑟於采蘋。霽月涵秋，擁蘭階之喜氣。祥烟籠曉，騰梓里之歡聲。今故燒香，自皈依師尊大聖衆，至真之德，得道之後，升入無形。和：與道合真。

香。願此香烟騰空徑上，供養無上至真師寶五靈玄老天尊，紫微北極大帝，后土皇地祇，太赤天宮無邊聖衆。臣等皈身皈神皈命，首體投地，仰依太上三尊。願以是功德，皈流溥天率土，中夏外夷，萬姓千軍，百昌庶品。並願慈風鼓舞，湛露涵濡。靜方野之綠林，烟閑宵燧。鞠園扉之青草，雨足春犁。臣等父母師資，道俗親友。金花潤曉，凝玄液於雲房。玉樹長春，擁紫霞於天谷。既往列丹臺之籍，見存登青闕之編。心地波清，步武均超於道境。性天冰瑩，形神齊證於真階。今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔

三啓

樂法以爲妻，愛經和珠玉。持戒制六情，念道遣所欲。淡泊正氣停，蕭然神靜默。天魔並敬護，世世享大福。

三禮

臣等志心稽首，禮太上無極大道。

臣等志心稽首，禮三十六部尊經。

臣等志心稽首，禮

玄中大法師。

重稱法位

具位臣某，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞道冠玄元，御群靈而啓旦。教尊靈寶，撫九壑以生春。法輪興龍漢之先，玄機振鶴鳴之後。九幽科品，輝輝而玉匱宣光。三籙威儀，朗朗而金真演妙。敷黃素齋修之典，示紫清懺謝之門。惠藹幅員，譯周鬱絕。期返魂於黑壘，盍皈命於玄壇，拜手傾葵，

馳心采菲。今齋主某，仰慮亡過某，劫終劫始，身後身前。三業紛紜，溺愛河而飄浪。六塵顛倒，翻慾海以流吹。受中昧杞柳之資，就下踐荆榛之逕。綱常霧寒，罔思策馬於畏途。禁戒烟迷，弗念牧牛於順境。東岱之金科井井，北艷之玉律昭昭。致二堅以乘危，鼓三彭而構孽。沈寥鬼域，陰陽之業網千尋。冥漠神鄉，水火之冤輪萬仞。寒心莫訴，援手誰伸。匪上叩於九清，曷下提於五濁。爰崇月陞，恭啓雲囊。龍璧輸誠，寶花散綠羅之界。鳳繒納款，瑞烟飛紫禁之方。爲首過於千生，希垂恩於萬死。仰冀玄雷錫軫，蒼昊垂憐。念飛天神人，啓紫陽之瓊蘊。召神霄玉女，開內禁之華堂。頒金籙以泰寒庭，降玉符而開夜府。金雞豎曉，罪無大小以冰清。丹鳳嚙春，過有顯微而雲散。預騰勝寶珠之會，登浮黎碧玉之墟。蒙如螻螳之忱，允拜鴻雁之造。齋主某凝神觀妙，涵濡道德之風。視履酣和，沈浸詩書之味。和氣熙熙於厦屋，祥烟燁燁於春臺，純嘏所

覃，繁釐攸萃。上願天元澄晏，地紀昭寧，風雨和平，儀璘朗耀。三乘流衍，翼洞輔以光明。九醜潛藏，育黔黎而安泰。闢丕基於六合，凝景命於萬年。動植飛潛，遂生生之正性。蛸翹蠢動，陶化化之神機。則上明天尊大慈之化，下副臣等皈命之忱，謹啓以聞。

發願

存神燒香

香官使者，左右龍虎君，侍香諸靈官衆，當令臣向來清旦陞壇，行道之所，自然生金液丹碧，芝英百靈，衆真交會，在此香火爐前。令臣學道得道。求仙得仙，齋主受福，幽顯沾恩。當願十方仙童玉女，接待蘭烟，傳臣向來所奏之誠，速達徑御太上無極大道至真玉皇上帝御前。

出堂頌

靈寶領教濟度金書卷之四十二

靈寶領教濟度金書卷之四

十三

洞微高士開光救苦真人甯全真授  
靈寶通玄弘教水南先生林靈真編

科儀立成品

開度黃籙齋

九朝行道儀

第一日午朝

各禮師存念如法

宣衛靈呪

謠歌空洞，帝君守壇。五帝校錄，受符三官。備衛四門，束魔去奸。流鈴擲火，陰穢焚殘。身佩金書，煉液芝顏。玄虛素合，心動三關。騎獅跨鶴，控龍乘鸞。萬星守舍，千魔不干。道炁長存，萬仙委安。和：與道合真。

鳴法鼓二十四通

發爐

無上三天玄元始三炁太上老君，召出臣等身中三五功曹，左右官使者，左右捧

香金童，傳言散花玉女，五帝直符，直日香官，各三十六人出。出者嚴裝顯服，冠帶垂纓。關啓玄壇天帝神君，當召此間土地里域，真官正神。臣今午朝陞壇行道，朝謁帝真，奉爲入意，其諸情悃，具載緘牘。願得太上十方至真道炁靈寶妙光下降，流入臣等身中。即使玄壇清淨，內外成真，天無氛穢，地絕祆塵，琳琅振響，十方肅清，萬魔不干，真誠上徹，令臣所啓之誠，速達徑御太上無極大道至真玉皇上帝御前。

請稱法位

具位臣某，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真

靈。臣聞赤明開圖，鼓真精而立極。清微導運，敷神景以流形。金書煥而或沉或浮，玉字彰而乍遐乍邇。玄雲高覆，祥開翠蓋之輝。惠露澄滋，瑞映黃輿之彩。碧落垂芒於舞鳳，丹霄流響於翔鸞。是三洞之根宗，爲羣靈之主宰。臣等坎蛙陋質，輟鮒微蹤。佩乾坤豁落之玄，面墻志鬱。契離坎飛登之妙，入室心悠。幸陶師匠之風斤，虛老化工之月籥。兢兢淵涉，覬補過於女青。切切海涵，期積勳於大赤。宮商帝載，黼黻皇靈，具有心詞，謹當宣奏。

宣詞

按如詞言，情深激切。臣聞紫金御浮黎之座，三景停輪。碧玉輝騰勝之區，十華迅駕。煥琅音於珠黍，流瓊笈於芳騫。帝室虛圓，萬神混雌雄之妙。天關保制，八威鎮綱紀之基。周十轉以迴靈，符五行而度命。澤覃生死，靈寶之囿巍巍。義貫人天，道德之淵蕩蕩。今齋主某，顛天激切，叩地凌兢。痛逝魄之顛冥，九京莫返。懼驚魂之震懾，千劫誰扶。期下拯於鬱單，庸上祈於

閭闔。爰嚴蓬宇，恭啓芝壇。圭影正中，耀絳霞於黃道。瑤光在上，凝碧藹於玄虛。靈風陶十極之春，法雨散八埏之潤。紫烟掩畫，琳琅玉振於飛鯨。翠葆翳宵，煒燁金籠於舞鳳。仰龍光之臨御，肅鷺序以趨朝。羽蓋瓊輪，垂蔭煥流精之彩。丹輿綠輦，傾光昭耀景之華。監真度生，臨軒校錄，願俯自民之視聽，庸殫事帝之精誠。明檢鬼營，嚴恃衛送迎之令。敕制泉曲，無拘留逼合之冤。庶高步於陽光，獲超迹於陰暗。乾坤均慶，家國咸熙，以今臨午行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神皈命，首體投地，仰依太上三尊，願以是功德，皈流宗祧先聖，社稷尊靈。伏願汎景瓊林，凝真瑤圃。神超渺渺，衍玉曆於千齡。炁入玄玄，茂璇源於萬葉。

玉帛朝東。登朝野於福庭，納華民於壽域。祥開震索，表命聞之象賢。慶溢坤儀，著徽音之懿德。槐庭位萬鍾之貴，榆關屹九鼎之增。今故燒香，自皈依師尊大聖，衆至真之德，得道之後，保天長存。和：與道合真。以今臨午行道，請法衆等，運茲二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神皈命，首體投地。仰依太上三尊，願以是功德，皈流齋主家，七玄九祖，億劫種親。伏願地域超神，天關馭氣。業障報障煩惱障，風掠秋雲。惡根毒根生死根，日浴曉露。服霓裳而謁帝，參羽葆以朝元。齋主某簫勺七神，權衡三炁，景星煥彩，華芒羅四七之躔。彗耀韜威，瑞藹御五三之位。來千祥於德履，消萬厄於福襟。筦簟冰清，樂壺天之日月。門庭春盎，息塵地之風波。慶浹松蘿，澤覃桑梓。今故燒香，自皈依師尊大聖衆，至真之德，得道之後，升入無形。和：與道合真。

以今臨午行道，請法衆等，運茲三捻上香。願此香烟騰空徑上，供養無上至真師寶，五靈玄老天尊，紫微北極大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流圓穹仙聖，方澤真靈，三界職僚，十華主宰。伏願承符布德，佐運同仁。三光全，寒暑平，天無氛穢。五穀熟，民人育，地絕妖塵。萃和氣於飛潛，襲歡聲於動植。勳藏紫筆，玉京膺九賚之華。功紀丹珉，金闕峻三元之賞。次冀棲真道士，煉景高人。偃月澄輝，悟虎龍而混景。餐霞胤粹，含烏兔以奔晨。綿綿永固於谷神，湛湛常存於夜炁。後天難老，與道合真。今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔 命魔  
步虛

控轡適十方，旋憩玄景阿。仰觀劫刃臺，俯盼紫雲羅。逍遙太上京，相與坐蓮花。積學爲真人，恬然榮衛和。永

享無期壽，萬椿奚足多。

又

大道師玄寂，升仙友無英。公子度靈符，太乙捧洞章。舍利曜金姿，龍駕欵來迎。天尊盼雲輿，飄飄乘虛翔。香花若飛雪，氛靄茂玄梁。頭腦禮金闕，携手遨玉京。

又

騫樹玄景園，煥爛七寶林。天獸三百名，獅子巨萬尋。飛龍躑躅鳴，神鳳應節吟。靈風扇奇花，清香散人衿。自無高仙才，焉能耽此心。

三啓

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞高邈雲層，霈慈恩於雨露。幽寥風澤，總威憲於雷霆。北魁崇玄範之司，西壁記紫英之職，武鸞統制，御鐵券以宣威。神虎駿奔，佩金札而嘯命。上稟玄都之道炁，下敷紫極之真光。提魄陰都，返魂陽境。今齋主某，仰慮亡過某，爰從無始，迨至有終。愛網膠纏，蕩五慾七情於覺地。業機周運，結六因十習於靈天。棄十善而弗修，縱五朋而不淪。卑卑蟻磨，駕黑風遊苦海之津。忽忽駒窗，乘毒霧奔迷

途之徑。背金科之戒行，忘玉檢之威儀。過奏玄曹，凜十宮之考對。愆書黑簿，森六洞之推研。驚心淪幽暗之居，極目絕陽光之照，匪由拯拔，曷遂升遷。齋按三元，露丹誠而肘步。壇崇十極，敷素悃以膝行。爲蠲鼎鉞之刑，俾雪岱溟之譴。獲離圜室，來覲方壇。伏冀上聖流恩，下愚膺澤。降東華之敕詔，頒北祚之威章。峨峨丘寒雨以流滋。天尊垂微妙之光，地祇稟希夷之令。雄提雌攝，遵火令而毀鎖張門。陽返陰還，策靈威而開關啓路。法橋穩駕，道岸高登。疾辭金剛之風輪，徑陟玉虛之梵景。鸞和粹穆，虎拜勤渠，蒙聆萬一之誠，允拜億千之造。齋主某神扶步武，聖翊精神，慶于公駟馬之榮，膺荀氏八龍之盛。融光風於庭宇，耀霽月於簾櫳，百順豐滋，千殃渙散。更願二儀昭泰，四象熙平，星宿輝華，風雲靜謐。三農藏富，野無鴻鴈之憂。四鄙收烽，里有雞豚之樂。耀祥雲於玉宇，凝甘露於金莖。獸舞鳳



儀，開八荒之聖治。鳶飛魚躍，融萬彙之天和。仁浹九幽，福覃五道。則上明天尊大慈之化，下副臣等皈命之誠，謹啓以聞。

### 發願

#### 存神燒香

香官使者，左右龍虎君，侍香諸靈官，當令臣向來臨午陞壇，行道之所，自然生金液丹碧之英，百靈衆真交會，在此香火爐前。令臣學道得道，求仙得仙，齋主受福，幽顯沾恩。當願十方仙童玉女，接待蘭烟，傳臣向來所奏之誠，速達徑御太上無極大道至真玉皇上帝御前。

#### 靈寶領教濟度金書卷之四十三

## 靈寶領教濟度金書卷之四

### 十四

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋

#### 九朝行道儀

##### 第一日晚朝

各禮師存念如法

#### 宣衛靈呪

神光朗耀，瑞炁匝旋。箕斗澄輝，芝字晏然。玉眸金真，寶壇純乾。變夜作晝，回子午前。太華流彩，丹鳳飛圓。息魔滅奸，高步祥烟。天真普集，齊到帝前。和：與道合真。

#### 鳴法鼓二十四通

#### 發爐

無上三天玄元始三炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域，真官正神。臣今落景陞壇行道，朝謁帝真，奉爲入齋意，其諸情悃，具載緘牘。願得太上十方至真道炁靈寶妙光下降，流入臣等身中。即使玄壇清淨，內外成真，天無氛穢，地絕沃塵，琳琅振響，十方肅清，萬魔不干，真誠上徹。令臣所啓之誠，速達徑御太上無極大道至真玉皇上帝御前。

#### 請稱法位

具位臣某，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝東華、南極、西靈、北真、玄都、玉京金闕七寶瓊臺、紫微上官、靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞碧落空歌，九霄御虛無之炁。

紫虛鬱秀，三靈生空洞之神。瞻翠玉於華京，仰玄珠之上景。神光凝妙，符璇象以朗清。聖化超玄，俯瑤空而登引。二章振玉音而救地，三篇傳金敕以開天。澤普南州，恩甦北鬱。大矣靈寶之囿，妙哉功德之林，生死仁周，人天慶浹。臣等井梧質陋，社櫟材庸。枕中紫鳳之章，慶緣身佩。肘後丹鸞之錄，玄運心傳。莫煉景於烟霞，幸依光於日月。紛葩逐逐，勳無絲粟之圓。象網營營，過有丘陵之積。尚依帝造，俾代天工，堅素志以學真。勵丹忱而領教。凡有陳告，敬爲關聞，今有青詞，謹當敷奏。

宣詞

按如詞言，備殫激切。臣聞界尊長樂，羅七寶之騫林。宮儼妙嚴，映九光之蓮座。虹蜺耀赤圓之象，劍戟射青玄之輝。慧力尋聲，煥祥烟於死戶。威神應念，覆慶雲於生門。空青枝灑，十極之清涼。天寶泉蘇，三途之熱惱。九幽共仰，萬類咸宗。今齋主某，心軫苦魂，神馳樂國。仰玉清應化，現東極

之慈容，而空碧流精，沛北鄴之惠澤。爰嚴黃籙，皈命蒼穹。旋杓影於瑤壇，風揚八素。轉霄輝於銀漢，月湛三華。龍光翻太素之衢，獅御來始青之境。千真圍繞，萬聖森羅。擷兔擒烏，搖曳珠篝之影。飛虬舞鳳，葳蕤翠榦之華。肅羽葆以朝元，擁珮環而拱極。葛殫真切，葑采勤渠。太乙真光，降重泉而照耀。大千慈救，提積壘以超騰。庶俾幽爽之冥冥，徑上高虛之渺渺。恩頒無上，惠及有情。以今靜夜陞壇行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙聖衆。臣等皈身皈神皈命，首體投地，仰依太上三尊。願以是功德，皈流宗祧先聖，社稷尊靈。伏願月輅凌空，雲輶宴景。凝神璇圃，襲烝母而佩鸞書。毓粹瓊林，翼化兒而扶龜曆。皇帝笙鏞萬國，冠冕百王。瞻日觀之摩霄，永培壽址。望雲瀛而援漢，丕行福源。梯航鼓舞以歸仁，包軌謳歌而慕義。龍樓問寢，英明符赤水之

珠。鳳掖趨朝，和懿協丹山之璧。耀旗裳於麟閣，崇旄鉞於虎垣，國泰民安，家給人足。今故燒香，自皈依師尊大聖衆，至真之德，得道之後，保天長存。和：與道合真。以今靜夜陞壇行道，請法衆等，運茲二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神皈命，首體投地，仰依太上三尊。願以是功德，皈流齋主某家，九玄七祖，亡故魂儀。伏願業消三際，冤釋千齡。悟罪福之由心，塵籠曉鑑。覺生滅之非性，雲拂秋輪。超黑鬱以澄神，詣青華而受記。齋主某敦頤自樂，視履相歡。債訟冰清，萃祥光於庭宇。注殃雲散，迓和氣於門闌。藹碧梧翠竹之英聲，勵綠栢青松之貞操。東儲定籍，襲鴻福以川增。南極刊圖，錫龜齡而山聳。一家玉潤，百室金穰。今故燒香，自皈依師尊大聖衆，至真之德，得道之後，升入無形。和：與道合真。以今靜夜陞壇行道，請法衆等，運茲三

捻上香。願此香烟騰空徑上，供養無上至真師寶五靈玄老天尊，紫微北極大帝，救苦青玄大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流三途滯爽，五道幽靈，荒野窮魂，寒林苦爽。並願慈風披拂，德雨滋濡。乘清靜光，爍千冤而發慧。超煩惱暗，融萬業以回靈。徑辭風水之輪，快睹雲霄之界，玄元起死，福慶更生。臣等累世師資，積生父母。湛真源之定水，智慧圓明。澄覺海之狂瀾，真常了悟。紫冊定長生之錄，丹臺書不老之編。既往超凌，侍帝闈而入妙。見存快樂，凝天谷以金真。翊贊三乘，光扶九業。今故燒香，自皈依師尊大聖衆，至真之德，得道之後，長享自然。和與道合真。

禮方 懺悔

三啓

太道洞玄虛，有念無不契。鍊質入他境，遂成金剛體。超度三界難，地獄五黃苦。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

請稱法位

具位臣某，與臨壇官衆等，謹重誠，上啓虛無自然元始天尊，無極大道太上道君，太乙老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞陽耀澄高，玉虛覆圓清之氣。陰冥靜厚，金剛旋方濁之形。上羅帝闕以峨峨，下列神鄉而杳杳。九幽鐵壘，鑱千雉之迷

雲。六洞銅關，藹萬層之毒霧。雷轟丹憲，星列玄僚。五道迴環，繇蒼生之妄業。十華迅邁，藉玄極之真慈。頂戴勤渠，擎拳激越。今齋主某，仰慮亡故某，劫塵宿蘊，世垢交周。精氣神混化之玄，罔明尊貴。身心口飄流之妄，每尚驕矜。放雞犬而踐榛叢，馳鴻鵠而奔荆棘。天文易逆，地理難違。陽干人紀之常，陰忤神靈之變。徇己動嬰於鬼律，縱心靜瀆於神章。致九府之書愆，凜四司之校過。寥寥泉曲，睹獄吏以驚心。慘慘羅酆，對鬼官而喪魄。億齡苦惱，怙劫羈囚。匪由開泰之恩，曷脫繫維之咎。幸修黃籙，嚴潔玄壇，敷民欲於再三，仰天威之咫尺。伏冀鸞和臨御，鶴赦羅敷。降道炁百千萬重，中嚴玉相。開幽關十六壘，內映金光。寒池成甘露之池，炎沼變醴泉之沼。刀山刃落，劍樹鋒摧。一一銅城，示慈悲而敕破。重重鐵壘，宣靈寶以開張。俾乘百寶之靈芒，獲睹九華之道境。超凌地域，端虎拜於彤庭。遊宴天衢，拱獅顏於翠闕。心珠照夜，

性王長春。僭殫毫髮之忱，仰冀丘山之惠。齋主某朱顏霞潤，緣鬢烟濃。聖翼門庭，流羣芳於後裔。神扶兆域，精五鍊於先靈。慶隴畝以雲連，融倉箱而日闢。上願三晨輝煥，六炁和平，風雨順調，烟雲靜斂，紫塞有息烽之喜，潢池無弄兵之憂。野耀弓旌，來谷駒於盛世。家多弦誦，育岡鳳於昌時。林藏斤斧之聲，澤絕綱羅之影，仁敷動植，恩被幽明，則上明天尊大慈之化，下副臣等皈命之誠，謹啓以聞。

發願

存神燒香

香官使者，左右龍虎君，侍香諸靈官，當令臣向來靜夜陞壇，行道之所，自然生金液丹碧，芝英百靈，衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌

靈寶領教濟度金書卷之四十四

靈寶領教濟度金書卷之四十五

十五

洞微高士開光救苦真人甯全真授  
靈寶通玄弘教水南先生林靈真編

科儀立成品

開度黃籙齋

九朝行道儀

第二日早朝

各禮師存念如法

宣衛靈呪

五星虛映，煥景神庭。包羅無象，合炁羣靈。潛形杳默，周遊五經。揚威耀日，役使甲丁。却妖除禍，滌穢消氛。萬魔恐怖，龍虎飛奔。紫雲交覆，萬炁齊并。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域，真官正神。臣今清旦升壇行道，朝謁帝真，奉爲入齋意，其諸誠意，具載緘牒。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞金闕嵯峨，耀神光之流日。玉京縹緲，旋梵炁之明霞。瑶林蒨而朱寶離離，琅鸞振

而翠葩奕奕。上極無上，紫精凝浩劫之尊。高拱彌高，碧靄御無形之祖。轡飛龍於游圃，吟神鳳於瓊臺。凝妙澄真，撫丹霄通明之闕。分靈應化，運流珠洞景之宮。五億咸宗，三千共仰。臣等筭班濫綴，芝檢叨膺。紫戶青房，莫悟存思之妙。黃庭丹谷，罔明還返之玄。嘆逐兔之彷徨，驚織烏之迅邁。俯窺雲岫，莫振袂以幽棲。仰藉霞霄，常峨冠而奏對。帝恩春育，天聽秋嚴。凡有皈投，敢忘敷奏，今有詞旨，謹爲上聞。

### 宣詞

按如詞旨，備切忱恂。臣聞三寶開光，靈寶化敷於九地。九霄御炁，神霄道冠於三天。統飛梵以騰輝，並耀靈而煥彩。胎嬰內孕，融三寶之靈烟。魂爽上超，流五華之法雨。巍巍大梵，劫劫長存，期起死以迴骸，盍皈誠而請命。今齋主某，情鍾人極，義重天倫。四大分離，哀藏舟而何在。六如變滅，瞻逝水以不回。孰開長夜之陰霾，俾宴生春之陽景。爰依藥笈，恭啓芝壇。

義馭回霄，浴朱霞於暘谷。龍駟駐景，凝翠靄於蕭臺。天花散而玄鶴翩翩，雲和奏而青鸞鼓舞。霓旌曳玉，開禁路以飛華。羽葆流金，上天階而煥耀。紫烟擁蘭箒之影，碧霞籠楓陛之光。三極朝班，十華肆覲，庸胃再三之瀆，切切鱗嬰。重殫萬一之忱，依依羽袂。肅蕘言於鷺序，迓芝綉於螭坳。願降徽音，提携幽趣。淨六神，清十業，還正性之圓明。離五苦，出三途，生善心之正直。超凌地界，飛步天衢，溥幽顯以蒙恩，洽邦家而均慶。以今清旦陞壇行道，請法衆等，運茲初捻上香。願

此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神，願以首體投地，仰依太上三尊。願以是功德，歸流宗祧先聖，社稷尊靈。伏願麟馭凌霄，鸞駟汎景。蔭子孫於百世，葉葉英君。扶聖祚於千齡，朝朝賢輔。皇帝統天御極，制地膺圖。禹甸開平，恢武功於二極。周疆丕冒，熙文治於九丘。登封耀玉牒之藏，告成侈

玄圭之錫。東宮齊聖，端步武以參機。內掖宣明，肅駕儀而佐政。楓宸穆穆，茅屏誥誥。今故燒香，自皈依師尊大聖衆，至真之德，得道之後，保天長存。和：與道合真。

以今清旦陞壇行道，請法衆等，運茲二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神，願以首體投地，仰依太上三尊。願以是功德，歸流齋主家，九玄七祖，亡故靈儀。伏願月珮朝元，雲裾覲聖。披六銖之織麗，侍宴玄都，餐七寶之華腴，乘鸞紫極。衍蕃釐於天上，流餘慶於人間。齋主某韻協英靈，器侔瑚璉。印纍纍，若若開檀玉之榮津。福被被祿，皁皁快贏金之昌運。蔭椿萱而

捻上香。願此香烟騰空徑上，供養無上至真師寶五靈玄老天尊，紫微北極大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊，願以是功德，歸流普天率土，內夏外夷，萬國六軍，四民百姓。普願祥雲煥彩，湛露流輝。夕柝聲沉，閑鴈睡之白日。春犁影轉，翻犢隴之黃雲。衣冠化披毳之腥，禮樂變雕題之陋。聚廬胥慶，不逢當道之豺狼。擊壤相歡，毋植飛鄰之雞犬。臣等師資同學，父母親緣，捨妄歸真，超凡入聖。既往者碧霄侍宴，入珠黍以傳經。見存者丹谷高澄，混金芽而鍊質。今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔

三啓

三禮

臣等志心稽首，體

太上無極大道。

臣等志心稽首，禮

三十六部尊經。

臣等志心稽首，體  
玄中大法師。

重稱法位

具位臣某，與臨壇官衆等，謹重誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞開明三景，靈根流衍於上玄。迴度五常，天紀扶搖於大梵。煥箕斗歷旋之運，配璧奎飛擊之維。環拱清微，三界上尊於無色。周羅碧漢，十方旁御於有形。仙聖聿都，帝真攸宰，福生靈於黃混，提飛爽於黑單，普度天人，流明幽顯。今齋主某，仰慮亡故某，五賊詛訐，三惑飄流。風蕩心旌，昧有初而顛倒。烟

迷情轍，縱無始以紛紜。靈珠光障於容塵，寶鑑影搖於意葉。八節四始，罔殫潔己之勤。五臘三元，莫罄省身之禱。鑿七竅於倏忽，冠百關於陰陽。河源泉曲之司，驚魂杳杳。岱宗羅酆之獄，震魄幽幽。匪上叩於玉清，曷下提於金粟。爰遵丹笈，恭啓玄壇。龍璧羅敷，奠五靈而贊敬。鳳繒陳設，朝十極以疏愆。伏冀靈景居中，威顏在上。真光遍覆，窮碧落以徹黃泉。梵炁經行，攝陰靈而通陽耀。面禮獅頭之座，身親龍尾之墀，飽聽法音，淪生之性垢。旋餐玄味，淨劫劫之塵根。了悟真元，斷除虛妄。徵連永絕，百年之債訟冰清。慈愛齊同，三際之冤憎風散。明心見性，飛空步虛，蒙寂感之不遺，拜潛昭之有造。齋主某嶽崇壽峙，河潤福源，朗蟾玉於碧天，一襟瀟灑。耀驪珠於滄海，八面玲瓏。融百福於方來，洗千愆於已往。上願乾樞清晏，坤軸昭寧，五炁流祥，四靈薦瑞。赤書流煥，保劫運以徘徊。紫簡輝煌，定基圖而鞏固。林澤不逢於沴蜮，田

疇無撓於霖蝗。蠢動蛸翹，德溥流於和炁。龍仙人鬼，恩均被於祥光。林林有生，熙熙無上，則上明天尊大慈之化，下副臣等皈命之誠，謹啓以聞。

### 發願

一念爲道四大合德，齋主七世父母，免墮憂苦，上升天堂，衣食自然。

二念帝王國主道化興隆，庠序濟濟，皇教恢宏，威儀翼翼，普天所瞻，民稱太平，四夷賓伏，妖惡自滅，聖賢自生。

三念法師功德大建，教化明達，俱獲飛仙。

四念同志學人，早得仙道，更相開度。

五念九親和睦，好尚仁義，貴道賤財，行爲物範。

六念捐己布施，道士及饑寒者，天下人民，各得其所。

七念蠕動跂行，一切衆生，咸蒙成就。

八念赦貫前生今世罪對，立功補過。

九念家門隆盛，宗廟有人，世生賢才。

十念尊受經師，不敢中怠，平等一心廣度，克獲上仙，白日登天，拜見太上，

永成真入，雲車羽駕。和：與道合真。

### 存神燒香

香官使者，左右龍虎君，侍香諸靈官，當令臣向來清旦陞壇，行道之所，自然生金液丹碧，芝英百靈，衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

### 出堂頌

下壇

### 回師

靈寶領教濟度金書卷之四十五

## 靈寶領教濟度金書卷之四

### 十六

洞微高士開光救苦真人甯全真授  
靈寶通玄弘教水南先生林靈真編

### 科儀立成品

開度黃籙齋

### 九朝行道儀

第二日午朝

各禮師存念如法

宣衛靈呪

黃中策炁，斬馘妖宗。遏絕邪源，制斷魔蹤。太上符命，召制神公。萬靈斯格，却禍除凶。王炁三輪，洞運真風。紫戶含瓊，大度無終。左命青腰，右攝芝童。逍遙颺景，總御九空。玄壇應機，乘炁虛沖。萬真普降，濟度無窮。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神。臣今臨午陞壇行道，朝謁帝真，奉爲入齋意，其諸情悃，具載緘牒。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬，一切真靈。臣聞道冠鴻鈞，八會未彰於鳳氣。象涵鰲極，九光

始映於龍章。徘徊而按筆裁金，浮沉而拂筵鏤玉。劫周四萬，帝開肇運之期。字益五千，聖衍通玄之秘。洞輔教分於七部，靈寶義貫於一乘，膏澤天人，梯航今古。臣等志昏知白，心昧鈞玄。紅埃同流，徒悅紛華而逐景。白雲獨笑，莫融沖粹以乘晨。四極科明，三元儀映。進思天覆，尚鼓吹於瓊綱。退省淵臨，冒羽儀於瑤陛。鋪張陽澤，提拯陰靈。凡有皈依，敢忘關告，況奉詞旨，所合上聞。

宣詞

按如詞言，誠深激切。臣聞神文煥瑞，河圖彰經緯之奇。聖畫昭祥，洛書顯生成之妙。總九章於八卦，類十數於五行。經演周迴，國顯始青之境。教傳微妙，座懸空碧之珠。拯盲聾瘖跛以復形，感老少孕胎而反質。符先天之妙化，開大地之玄機，十遍參同，二篇響應。今齋主某歸心道域，請命天闈。軫長夜之窮魂，心燈雲障。痛積陰之苦爽，性鑑塵籠。孰開迴光返照之機，安有破暗命靈之妙。庸翻霞笈，

恭啓星壇。鬱儀流金紫之華，亭亭轉午。浮黎耀空碧之炁，奕奕拱長。驂朱鳳以翼轅，駕玄龍而衛乘。五靈耀景，象水月之交輝。十絕飛霄，慶風雲之混合。至尊端御，列聖朝班，步虛揚玉籟之音，香花散金葩之影。潔蠲芝侶，奏對楓庭。願揚有造之恩波，俯采無垠之德悃。靈光灌沐，俾躋虎豹之關。慧力提携，永侍龍鸞之御。混輿胥慶，幽顯均休。以今臨午陞壇行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神皈命，首體投地，仰依太上三尊。願以是功德，歸流宗祧先聖，社稷尊靈。伏願月庭馭炁，日闕怡神。萬年枝開，甘露之祥潛扶龍種。千秋鏡耀，景星之瑞密衛鸞圖。翼聖運於丹青，侍帝宸於紫禁。皇帝享齡有永，受命無疆。浮天浴日之波，神威雷動。積雪層冰之野，聖武風行。觀風采康衢之謠，望雲競華封之祝。瑞星耀彩，三朝克繼於離明。



碧月凝輝，四德允毗於乾政。百官燮理，萬姓熙平。今故燒香，自皈依師尊大聖衆，至真之德，得道之後，保天長存。和：與道合真。

以今臨午陞壇行道，請法衆等，運茲二捻上香。願此香烟騰空徑上，供養無上正真經寶玉晨靈寶天尊，紫微天皇上帝，禹餘天宮真仙聖衆。臣等皈身皈神皈命，首體投地，仰依太上三尊。願以是功德，歸流齋主家，九玄七祖，億劫種親。伏願天綸紀錄，地憲消愆。死蒂飄零，脫陰郊之暗霧。生根敷暢，躡陽境之明霞。與道合真，保天有慶。齋主某名高千聖，清泱三神。端福履以酣春，慶騰梓澤。粹德容而凝晝，香藹芸窗。命身無刑戰之憂，運限免鬥剋之咎。齊眉舉按，耀居之嘉聲。坐膝扶床，兆承家之休徵。尊卑侃侃，中外融融。今故燒香，自皈依師尊大聖衆，至真之德，得道之後，昇入無形。和：與道合真。

上至真師寶五靈玄老天尊，紫微北極大帝，救苦青玄上帝，后土皇地祇，大赤天宮無邊衆聖。臣等皈身皈神皈命，首體投地，仰依太上三尊。願以是功德，歸流中朝宰輔，外國公卿，嶽牧臣僚，郡邑守宰。伏願作帝股肱，爲民父母。槐庭日永，敦正本以惠八方。棘寺風清，肅化原而綏九有。繡斧攬澄清之轡，鉞旄韜肅殺之鋒。剖竹香凝，藹龔黃之異政。種花春滿，茂卓魯之奇材。上沛君恩，下蘇民瘼。次願山栖谷汲之士，雲耕月釣之徒，游神聖津，抱經綸而龍卧，宅心道域，精服御以龜延。密圓八百之勛，式佐半千之運。今故燒香，自皈依師尊大聖衆，至真之德，得道之後，長享自然。和與道合真。

禮方 懺悔 命魔

步虛

三啓

三禮

臣等志心稽首，禮

太上無極大道。

臣等志心稽首，禮三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄保命二真人，名山洞府得道神仙，三界官屬一切真靈。臣聞函三啓運，昭覆載以流精。得一分靈，稟陰陽而毓粹。玄谷胤虛無之室，丹房凝空洞之珠。應運乘玄，樂椿林而百齡宴集。返真飛化，登藥闕而萬劫怡神。本無去以無來，奚有生而有死。醇風既遠，聖日斯濟。三毒雲滋，縱斧斤於

靈宅。九幽霧障，慘劍戟於寒庭。上軫帝心，下敷民欲。今齋主某，仰慮亡故某，爰從曩劫迨至今，生逞人偽於心源，焚天和於性海。業風助長，惡根抽萬榦之花。欲雨滋生，毒芽茂千枝之葉。葉布條而蔓衍，花結實以枝離，覆蔭邪途，荒蕪正路。北斗定考魂之目，南辰鑄鍊魄之名。慘慘泥犁，幽幽朔鬱，非流恩於紫極，曷削過於玄曹。玉壇羅敷，禮十華而懇願。瓊科宣演，叩三極以虔祈。冀殫一瓣之香，恪賜九光之燭。伏願噓枯吹朽，煦駘蕩之春陽。煥暗灼朦，啓融怡之晝景。拯提陰爽，變化陽靈。玉體瓊芝，為浣除於心病。金泉雲液，密灌濯於形塵。佩服天衣，翔飛雲路。劫氛清靜，得為天上種民。宿垢消除，永侍玄中之至聖。齋主某五官調泰，一氣宣平。院宇無塵，兆歡聲於澗藻。門庭有耀，來盛事於階蘭。溥及耄倪，均陶福壽。上願璇璣朗耀，寒暑和平，風雨順調，烟雲藏斂。黍稌豐茂，地開同穎之祥。草木輝華，天薦連枝之瑞。朝多鳴鳳，野

絕遺蝗。水府仙真，佐運紀丹臺之籍。陰關僚職，宣仁寬黑簿之刑。凡厥有情，同歸至化。則上明天尊大慈之化，下副臣等皈命之誠，謹啓以聞。

發願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦自修，預以同學，普得升虛，與天相保，長存無憂。

二願諸天結炁澄清，高虛廣覆，保真固靈，炁候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民具從，養生安死，惠周十方，禾稼滋植，營運日豐，咸得厚載，萬類皆從。

四願日月二景，高明無有孛蝕，虧盈安清，光照諸天，洞消暗冥，保固劫運，世祚和平，普加潤澤，惠灑衆生。

五願星辰與日齊光，轉燭照耀，朗映十方，各安其位，經緯直行，保鎮家國，無有災傷，四海寧一，普天興昌。

六願四時隨節推遷，景炁和調，無有災患，疫毒消滅，普天安平，五穀豐熟，國富民歡。

七願浮雲結炁聚烟，飛空高澄，蔭覆玄玄，隱則無為，散則彌天，神仙同居，結友衆真，惠流一切，興國愛民，普濟羣生，人同劫年。

八願風雨流灑無窮，普加施泄，受基發揚，萬物滋生，國儲民豐。

九願五嶽各安其方，巍巍包藏，長為仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人護慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。

十二願蝗飛蠹動，已生未生，咸蒙安全，普得生成，皆見元氣，受陽之形，草木果林，經冬不零，一切濟度，靡不鮮榮。和：與道合真。

存神燒香

香官使者，左右龍虎君，侍香諸靈官，當令臣向來臨午陞壇，行道之所，自然生金液丹碧芝英，百靈衆真交會，在此香火爐前。當令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌 下壇

回師

靈寶領教濟度金書卷之四十六

### 靈寶領教濟度金書卷之四

#### 十七

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋

#### 九朝行道儀

#### 第二日晚朝

各禮師存念如法

宣衛靈呪

金真空降，神虎檢營。玉帝披霞，諸天命靈。九晨回駕，萬魔束形。九微迸烟，神威攝精。流金擲火，百惡消并。神輝耀夜，洞煥長庚。聖道蕩蕩，十方肅清。保制劫運，元亨利貞。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神。臣今晚朝陞壇行道，朝謁帝真，奉爲入齋意其諸情愫，具載緘牒。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞元始開圖，敷慈雲於萬劫。靈寶垂化，沛法雨於三途。赤城流四譯之芳，丹谷混十玄之妙。

上無復祖，凝道烝以歷關。中有度人，乘神輝而溥告。嚴攝肅北鄴之令，轉輪沛南上之恩，燁燁同仁，依依博愛，校錄遍提於幽爽，送迎周拔於沉靈，蔭方澤之澄清，承圓丘而宵朗，古今心仰，幽顯神歸。臣等技儕鳩拙，量昧鶯遷。端劍履於芝壇，帝恩春育。佩圖策於藥笈，師訓冬嚴。宜躋林壑以雲眠，乃混樊籠而風靡。拳拳補過，惜既往之分陰。切切收勳，覲方來之寸進。憲天弘道，領教度人。凡有皈投，理宜關告，况奉詞旨，敢不上聞。

宣詞

按如詞言，情深懇切。臣聞一元委烝，心為善惡之宗。萬品流形，性靡陰陽之間。鑠妄雲而輪轉五道，乘昏霧而循環四生。塵翳業山，走林中之峻坂。光涵定水，回川上之狂瀾。自非上聖覺悟於良心，曷俾下愚開發於慧性。倘超實有，即證虛無。今齋主某，俯軫幽魂，旁矜逝魄。惡根落滅，期免諸趣之往來。善芽滋豐，頓悟一乘之終始。天光內映，地紀旁消，爰建立於星壇，

庸敷陳於雲笈。紫垣光動，玉杓飛閣道之花。碧宇香浮，雲漢湛參旗之影。仰鸞和之駐景，企龍御之傾光。朱燄流金，移一天之星斗。碧霞舞翠，浮十極之烟雲。靈風振而鈞韶鳴，天花散而咸英奏。金芝陞列，玉笋班催，重瞻穆穆之慈顏，願降灑灑之惠澤。定其泰宇，瀾彼塵襟，俾一根之返源，無六用之由徑。悟有為法，常清淨以回旋。乘無量光，含虛空而寂照。幽冥受度，天地咸寧。以今清夜，陞壇行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神皈命，首體投地，仰依太上三尊。願以是功德，皈流宗祧先聖，社稷尊靈。伏願月駟駟轅，雲龍翼乘。玄都侍聖，扶周雅之太平。紫府栖真，衍夏謨之允洽。皇帝德扶衆妙，道契三元，日重暈，月重輪，祥開舜曆，書同文，車同軌，澤被堯疆。萬億年丕，敬於天休。九五位常，尊於帝祚。東宮內掖，詵詵開麟角之祥。外

闔中朝，侃侃拱龍顏之瑞。堅金蘭而佐理，守冰蘖以飾躬。今故燒香，自皈依師尊大聖衆，至真之德，得道之後，保天長存。和：與道合真。以今清夜陞壇行道，請法衆等，運茲二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神皈命，首體投地，仰依太上三尊，願以是功德，皈流齋主家，九玄七祖，故往靈儀。伏願聞經見性，聽法明心。服霓裳羽衣，端威儀而謁帝。聆鈞天廣，樂肅容止以朝元。克生種民之中，永侍聖君之側。齋主某玄芝胤秀，丹桂流芳。帝錫春祺，門外息輪雲之變。天開夜烝，身中膺海嶽之休。融暖日於歌蘋，溢和風於宴萼。學詩學禮，藹翻黃戲綵之聲。潤屋潤身，獲紆紫拖朱之盛。今故燒香，自皈依師尊大聖衆，至真之德，得道之後，昇入無形。和：與道合真。以今清夜陞壇行道，請法衆等，運茲三捻上香，願此香烟騰空徑上，供養無上

至真師寶五靈玄老天尊，紫微北極大帝，救苦青玄上帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流三途滯爽，五道幽靈，曠野窮魂，寒林游識。伏願地根斷絕，天性澄舒。罪若朝霜，灌陽輝而泮渙。冤同曉露，沐晨耀以消鎔。黑都停五苦之輪，陰域罷九幽之對。還靈復性，受鍊更生。次冀臣等父母親緣，師資同學，玄門了悟，紫闕逍遙。既往者飛步雲宮，混形神而俱妙。見在者葆真月館，會母子以齊仙。均書藥籍之名，同入香林之內，證虛無道，成清淨身。今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔

三啓

三禮

臣等志心稽首，禮太上無極大道。

臣等志心稽首，禮三十六部尊經。

臣等志心稽首，禮玄中大法師。

重稱法位

具位臣某，與臨壇官衆等，謹同誠，上啓虛無自然元始天尊，元極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞道分太極，北都司禁魄之名。運啓神霄，南昌著煉魂之訣。開丹庭之流火，策玄治之黃華。坤兔凝輝，坎虎升而方諸湛湛。乾烏耀彩，離龍降而陽燧煌煌。混融二五之精，配合一三之粹，磨礪陰翳，變化陽靈，陶生死以仙飛，鑄天人而作聖。今齋主某稟資劫劫，賦命生。妄境周流，尺宅溟濛於惡垢，迷途

展轉，寸田跋躓於客塵。履紛穢而弗思，棲昏霾而罔覺。罪盈禍應，墮積夜之幽寥。報盡冤尋，歷重泉之沉寂。凡死後形淪於陰地，皆生前心背於陽天。匪憑變煉之功，曷復輕盈之舊。聿嚴圭宇，肆啓瑤壇，流梵唱於諸天，降靈輝於十極。伏冀金符召制，玉敕頒飛，降水火之真精，廓陰陽之妙炁。南閭彩映，鬱儀騰九鳳之輝。東井光浮，結璘降五龍之瑞。爲煉除於陰翳，俾澡雪於陽塵。炁返故根，表裏之冰壺月瑩。神還舊質，前後之神觀風清。普攝羣靈，遍提萬類。還元返本，永超劫會之期。出有入無，常享太平之運。心無苦惱，身有光明，蒙菲采之不遺，旌葵忱之無斁。齋主某道風遂整，德日沖怡，聖翊襟懷，七世之訟殃雲散。神扶起處，三生之冤債冰鎔。廓庭院以開春，舒簾櫳而耀晝。上願圓清廣覆，方厚晏安，日月澄輝，慧虹斂彩，息狼烽於四鄙，絕蝗稼於八荒。皮服弁服之徒，占風慕義。火食粒食之衆，就日歸仁。舞干羽以敷文，畫衣冠而示象，

百昌樂育，庶物熙和。則上明天尊大慈之化，下副臣等皈命之誠，謹啓以聞。

發願

- 一願大道流行，普天懷德。
- 二願一切有生，咸皆悟道。
- 三願九夜悲魂，一時解脫。
- 四願孤魂無依，咸得受生。
- 五願天下太平，五穀豐熟。
- 六願臣忠子孝，君仁父慈。
- 七願四海通同，冤親和釋。
- 八願潛胞處卵，咸得生成。
- 九願積疾新痾，旋即痊癒。

存神燒香

香官使者，左右龍虎君，侍香諸靈官，當令臣向來晚朝陞壇行道之所，自然生金液丹碧芝英，百靈衆真交會，在此香火爐前。當令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌 下壇

回師

靈寶領教濟度金書卷之四十七

靈寶領教濟度金書卷之四十八

十八

洞微高士開光救苦真人甯全真授

靈寶通玄弘教水南先生林靈真編

科儀立成品

開度黃籙齋

九朝行道儀

第三日早朝

各禮師存念如法

宣衛靈呪

天書敷羅，下盼太微。元化生成，靈烟九回。八景六周，聖運所持。左賓赤方，右啓帝扉。東華南府，灌煉辟非。回輪日耀，轉盼月輝。今日大慶，萬道同歸。玄壇正炁，保天無衰。普告三界，驛龍風馳。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神。臣今清旦陞壇行道，朝謁帝真，奉爲入齋意，其諸情愆，具載緘牒。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺，紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞祖劫開明，儀璘上輝於三景。生根凝妙，英

元內拱於五神。符雌雄混合之功，昭  
經緯行奔之妙。流金滅爽，廓雲路之  
靈威。渙玉飛魂，昭艷營之聖澤。萬  
地載希夷之祖，諸天拱靈寶之宗，隱韻  
徘徊，慶九和而十合。洞章參錯，彰五  
度以三登。出教有期，度人無量。臣等  
身參鳳籙，名玷龜圖。剪棘靈臺，未遂  
尋壑經丘之志。乘槎霄漢，莫回抗塵  
走俗之心。拜洪造於師壇，寬玄章於  
帝闕。存神飛化，期堅金石之盟。翊  
教羅敷，庸罄丹青之誓。凡有投告，所  
合關聞，今有青詞，謹當宣奏。

### 宣詞

按如詞言，情深激越。臣聞九炁網緝，  
拱清徵於宸極。五靈煥爛，契碧落於  
霄維。上超生魄於朱宮，下度死魂於  
黑府。金璫玉珮，希微宣採萃之奇。  
鳳簡龍文，微妙示衛靈之典。流陽精  
於五臟，敷神景於百關，宴景度生，迴  
骸起死。今齋主某，洗心謁帝，勵志朝  
天。嗟逝魄之汨湮，久淪陰翳。痛元  
神之陷溺，莫復陽靈。凜凜而丹素誰  
矜，切切而紫清莫籲。爰崇星陛，肅啓

雲籤。若木流精，瑞藹耀燭龍之日。  
騫林散彩，祥光敷律鳳之晨，奏金薤以  
琳琅，散玉華而縹緲。黃麾曉仗，拱奕  
奕之神光。紫禁朝班，仰輝輝之祖炁。  
五老啓途於瓊梵，羣仙策駕於瑤空。  
羽蓋流明，宛若香林之會。霓旌順動，  
何殊黎土之朝。降五色之恩綸，提萬  
塵之苦爽。願垂天聽，俯察民情。灌  
沐陽精，爲雪陰精之垢。返還生炁，俾  
消死氣之塵。一時生神，千齡御景，溥  
天人之均慶，合家國以沾恩。以今清  
旦陞壇行道，請法衆等，運茲初捻上  
香。願此香烟騰空徑上，供養無上至  
真道寶大羅元始天尊，金闕玉皇上帝，  
無上清微天宮真仙衆聖。臣等皈身皈  
神皈命，首體投地，仰依太上三尊。願  
以是功德，歸流社稷尊靈，宗祧先聖。  
伏願金枝衍慶，玉葉生輝。鳳葆飛空，  
高步流珠之邃。龍旗翳景，永垂積翠  
之玄。亘萬古以長存，後三光而不老。  
皇帝乾坤孕粹，河洛昭符。乘六龍以  
御天，位尊北極。策八駿而行地，道授  
西崑。垂衣齊東岱之齡，御履並南溟

之福。著柔嘉於彤館，敦孝友於青宮。  
月塞威馳，耀旂常之巨績。雲臺譽藹，  
華竹帛之元勛。今故燒香，自皈依師  
尊大聖衆，至真之德，得道之後，保天  
長存。和：與道合真。  
以今清旦陞壇行道，請法衆等，運茲二  
捻上香。願此香烟騰空徑上，供養无  
上至真經寶玉晨靈寶天尊，紫微天皇  
大帝，禹餘天宮真仙聖衆。臣等皈身皈  
神皈命，首體投地，仰依太上三尊。願  
以是功德，皈流齋主家，九玄七祖，故  
往靈儀。伏願東闕標名，南宮記字。  
辭六六陰壘，頓疏有漏之塵。超九九  
陽都，永御無爲之炁。攀龍鱗於億劫，  
垂燕翼於垓齡。齋主某識燭千齡，胸涵  
萬頃。志超浩渺，朝陽騰若鳳之音。  
學富淵源，月旦藹猶龍之譽。樂瓊枝  
於鴈序，敦玉樹於鯉庭。珠履駢駢，侍  
金谷春風之座。翠裊侃侃，映瓊霄秋  
月之簾。今故燒香，自皈依師尊大聖  
衆，至真之德，得道之後，昇入無形。  
和：與道合真。  
以今清旦陞壇行道，請法衆等，運茲三

捻上香。願此香烟騰空徑上，供養無上至真師寶五靈玄老天尊，紫微北極大帝，救苦青玄大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流普天率土，中夏外夷，九流四民，六軍百姓。伏願河清海晏，天成地平。月淡柳營，閑宵聲於刁斗。風清粉社，動曉景於犁鋤。承家富倉廩之藏，繼世振箕裘之舊。簫韶庶政，敦金章袞綬之材。冠帶百蠻，應紫蓋黃旗之運。臣等師資同學，父母親緣，性悟大乘，名刊小有。見在固三田之雲液，悟天地根。既往超九空之霞輝，出陰陽域。今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔 三啓

三禮

重稱法位

具位臣某，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸

君丈人，三十二天帝君，玉虛上帝，玉帝大帝，東華、南極、四靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞七寶紫微，總天帝而布政。九幽黑鬱，職地憲以持權。水官宰制於東霞，神局裁成於中極。二十七府，昭昭冰鑑之明。百二十曹，秩秩水衡之政。五帝鑒觀而令彰日月，四司燮理而憲肅雷霆。著威儀於簡文，示科條於品格，殃慶類至，淫善響隨，實纖芥之不違，允毫釐之罔失。今齋主某，仰慮亡故某，俗機密織，世網高張。耳混宮商，昧無生之曲調。身淫黼黻，耽有色之空花。貪膏梁而縱舌鋒，悅馨香而參鼻觀。心猿弗繫，跳踉叢棘之林。意馬不羈，躑躅荒榛之徑。自翳情之雲擾，致塵思之烟迷。復隔陽光，倏淪陰暗，業關進步，天惡盈而

禍臻。苦海回頭，道集虛而善應。恭嚴華帑，爰肅楓壇，奠龍璧於五靈，羅鳳繒於十極。投誠萬一，請命再三。伏冀丙軫初忱，申融終惠。赦千齡之宿垢，蠲三際之深瑕。紫戶玉門，霄炁降九重之妙。黃庭金室，靈芽流五灌之華。俾還復於生根，即斷除於死蒂。神神瑩徹，炁炁虛靈。高步瓊霄，覲三華之狴座。快翔玉宇，瞻萬變之龍光。蒙印丹衷，宣依洪造。齋主某，松筠耐歲，桃李開春。家慶綿綿，茂房生之萬葉。砌芳袞袞，衍郟氏之一枝。出入福鄉，周旋道境。上願二炁澄鮮，四時宣洽，風雲調泰，星宿輝華。玉宇流祥，耀乾坤而保運。金圖呈彩，煥塵劫以承符。吉士盈朝，正人寄閩。耕食鑿飲，歌帝力於枌榆，襲葛御裘，樂天和於桑梓。草木有繁鮮之喜，禽魚遂飛躍之生。普及陰靈，均承陽耀。則上明天尊大慈之化，下副臣等皈命之誠，謹啓以聞。

發願

存神燒香



香官使者，左右龍虎君，侍香諸靈官，當令臣向來清旦陞壇行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌 下壇 回師

靈寶領教濟度金書卷之四十八

### 靈寶領教濟度金書卷之四

#### 十九

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋

#### 九朝行道儀

第三日午朝

各禮師存念如法

宣衛靈呪

元始虛皇，集炁居中。三境洞杳，肇生穹窿。七轉九虛，混合回風。變化萬神，天地開通。吉日行道，萬魔敬從。晨輝朗照，默運元功。執節建麾，散花太空。十方普慶，劫運無終。和與道合真。

鳴法鼓二十四通

發爐

無上三天玄元始三炁太上道君，召<sup>①</sup>出臣等身中三五功曹，左右官使者，侍香

金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神。臣今臨午陞壇行道，朝謁帝真，奉爲入齋意，其諸情悃，具載緘牒。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

#### 請稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝太帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞五太開圖，耀三乘之道日。三天啓運，敷五

劫之玄雲。靈光洞煥於虛無，祖炁根源於元始。渺渺大羅之上，合景凝真。塵塵刹土之中，分身應化。俯瓊步而御丹谷，逸瑤音而振黃庭。青極提魂，金景混碧輝之粹。朱陵煉魄，炎光融素景之華。神化雖殊，聖機本一。臣等木雞未就，葛狗已陳。佩風纏烟絡之章，師恩若水。綴星列雲羅之武，聖德如天。慚逐逐於塵中，莫皎皎於霞外。語心蛟負，懼貽青律之威。勵志鵬搏，曲企丹章之惠。度人補過，潔己立功。凡有皈投，所宜宣告，况奉詞旨，敢不上聞。

宣詞

按如詞旨，備極忱恂。臣聞道冠玉清，耀混元之鳳篆。教敷金策，垂洞景之龍章。融神化而嬰姪回靈，參聖機而猷孩兆質。九和十合，凝萬炁以齊仙。七混五成，徹百神而會道。先天起死，大地回生，昭乾坤化育之玄，體離坎裁成之妙，內令英粹，外拱威靈。今齋主某，邇軫遊精，遐矜苦爽。百骸淪夜，已風靡於陰形。萬竅沉宵，久露晞於陽

質。孰沛返生之惠，俾膺起死之恩。爰潔茨簷，聿修芝陛。烏輪煥晝，經天散彩於朱霞。獅座浮空，耀日流精於碧靄。月磬響飛龍之調，風笙聞神鳳之吟。寶蓋中羅，耀玉葩之鬱鬱。朱旛旁拱，燦金蘂之輝輝。來萬里以班朝，會千真而乘景。仰瞻龍御，凝白玉三炁之華。俯綴鴛行，覲紫金億光之座。傾心玄澤，稽首洪恩。願敷錫福之仁，重罄丹誠之禱。真神融混，俾經絡榮衛以復形。靈景化生，庶魂魄精神而返質。枯骸委炁，白骨成人，溥幽顯以蒙休，合天人而受慶。以今臨午陞壇行道，請法衆等，運茲初捻上香。願此香烟騰空徑上，供養無上至真道寶大羅元始天尊，金闕至尊玉皇上帝，無上清微天宮真仙衆聖。臣等皈身皈神皈命，首體投地，仰依太上三尊，願以是功德，皈流社稷尊靈，宗祧先聖。伏願龍旒侍聖，鳳履賓天。開寶運以當千，栖真紫府。蔭璇圖而逾五，宴景玄都。皇帝德邁勛華，功高履發。天極升降之域，文德班香。日輪出入之

區，武功造夏。儲宮著象賢之孝，禁庭昭佑聖之徽。襲虎分茅，拱神畿而布化。垂魚佩竹，臨聖甸以宣仁。秩秩一同，優優三異。今故燒香，自皈依師尊大聖衆，至真之德，得道之後，保天長存。和：與道合真。以今臨午陞壇行道，請法衆等，運茲二捻上香。願此香烟騰空徑上，供養無上正真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神皈命，首體投地，仰依太上三尊。願以是功德，歸流齋主家，七祖九玄，無邊靈識。伏願萬神返本，一炁還元。乘渺莽，駕虛無，迅駟聖軌。簸鴻濛，騎汗漫，高策仙蹤。注南上之生名，落北艷之死錄。齋主某，冰壺瑩潔，玉尺端方。斗轉龍躔，永錫九靈之正炁。星回鳳曆，常依八景之祥光。進吉曜於身宮，退威芒於限位，風陪九萬，行看紫袂之輝輝。春曆八千，坐閱綵衣之袞袞。今故燒香，自皈依師尊大聖衆，至真之德，得道之後，昇入無形。和：與道合真。

以今臨午陞壇行道，請法衆等，運茲三捻上香。願此香烟騰空徑上，供養無上至真師寶五靈玄老天尊，紫微北極大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流羅酆真宰，泉曲靈祇，幽夜曹僚，冥途主執。普願憲天布惠，體道興慈。五苦停輪，刀劍化騫林之秀。三途罷對，冰炎變蓮沼之芳。俾幽壘以開春，庶陰關而啓旦。仁勳日皎，登天上之仙班。愛績風聞，襲人間之貴秩。次願烟林逸士，雲水高人，入希夷門，悟九還於聖谷，登玄妙域，精七返於神爐。永無魔試之干，頓悟真常之道，今故燒香，自皈依師尊大聖衆，至真之德，得道之後，長享自然。和：與道合真。

禮方 懺悔 命魔

步虛 三啓 三禮

重稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道

大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞煥爛八方，結雲霞之妙炁。沉浮五彩，騰霄漢之神光。天開玄瑞以洞清，地發祥雲而鬱秀。鑄金爲簡，承元始冶鍊之輝。鏤玉裁編，感耀華雲翔之篆。神奇空洞，變化飛玄，是諸天之靈音，爲羣生之祕範，無所不度，有感皆通。今齋主某，重念亡故某，從劫至劫，捨生受生。鑿七竅，散天和，綱常日泯。騁六情，滋人欲，禁戒雲迷。循環既類於蛾燈，展轉遂淪於鮒轍。業三召覺，道斯闕於三途。累五招愆，門遂張於五苦。陽天杳隔，陰地沈寥，三思顛倒於生前，寧無悔悟。一念沉淪於死後，孰導超凌。爰修槐杏之壇，庸啓芝蓮之座，

投誠十極，請命三元，祈五嶽之寬恩，扣七籤而徼福。下通泉府，上禮天關，丐垂霽霈之恩，爲道溟濛之譴。伏冀清都浩蕩，轉無上之法輪。玄極扶搖，闕太虛之真路。俯提飛爽，俾復元靈。五竅華敷，洗塵塵之翳累，三田充滿，灌劫劫之惡根。經絡重榮，精神再復。南丹度命，即紀字於真編。東極疏恩，疾移名於仙籍。超凌三界，遊宴十華。登逍遙快樂之天證，清靜無爲之果。結習俱盡，性識兼忘。蒙天聽之昭昭，荷宸恩之赫赫。齋主某，天扶世澤，神翼芳猷。雀角鼠牙，息風波於公室。龍鱗鳳翼，依日月於昌朝。一門無屯否之憂，九族膺泰頤之慶。更願圓清澄耀，方粹寧嘉，日月輝華，山林肅靜，桑麻曉潤，萃和氣於八遐。榆柳春閑，溢歡聲於四塞。地薦白麟之瑞，天開赤鴈之祥。詩書日闢於中華，禮樂風行於外徼。林無奸蜮，野絕妖狐。則上明天尊大慈之化，下副臣等皈命之誠，謹啓以聞。

發願

存神燒香

香官使者，左右龍虎君，侍香諸靈官，當令臣向來臨午陞壇行道之所，自然生金液丹碧芝英，百靈衆真交會，在此香火爐前。當令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌 下壇 回師

靈寶領教濟度金書卷之四十九

① 召：底本作「君」，當爲「召」之誤。

靈寶領教濟度金書卷之五十

洞微高士開光救苦真人甯全真授  
靈寶通玄弘教水南先生林靈真編

科儀立成品

開度黃籙齋

九朝行道儀

第三日晚朝

各禮師存念如法

宣衛靈呪

玄陰七靈，九炁合形。魂精魄爽，二景回輪。飛光赫奕，煥耀長庚。日月吐輝，回合華英。大梵流布，奔飛炎鈴。魔王受事，朝謁帝京。含靈普濟，廣惠幽冥。玉文敷告，萬炁騰升。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域，真官正神。臣今晚朝陞壇行道，朝謁帝真，奉爲入齋意，其諸情悃，具載緘牘。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮、靈寶至明明皇道君，三十六部尊經玄中大法師，上相上宰上保上傳。太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬，一切真靈。臣聞三炁流精，藹清微之妙韻。百神混粹，煥朱火之玄輝。受生上開於八門，度死下飛於五戶。

北艷朔鬱，靈風鼓微妙之津。西禁靈虛，聖日煥希夷之岸。始青出教，大赤垂科。駐騫木之琅輿，萬真扶御。會香林之瑤輦，衆聖傾光。弘敷靈寶之文，是謂真玄之典。臣等道山迷徑，學海望洋，身膺五福之鸞圖，心佩三靈之鳳策。師垣提耳，慚無昂霄聳壑之資。帝闕遊神，莫遂枕石漱流之志。嗟織鳥之梭擲，歎野馬之輪翻。制地立功，幸依光於洪蔭。憲天補過，誓勵景於丹忱。凡有皈依，理宜關告，況奉詞旨，敢不上聞。

### 宣詞

按如詞旨，備切忱恂。臣聞金籙敷羅，闢升天之慧徑。玉文宣告，廓超地之靈衢。龍符煥而百寶流華，鳳戒宣而九真耀彩。靈光遐暢，浮飛爽於幽寥。祖炁周流，導生神於陽混。三洞之瓊篇演妙，九幽之琅範宣玄，與生俱生，未度者度。今齋主某，傾心紫極，稽首青冥。提黑狴以高征，幸承湛露。駕朱龍而上邁，允藉靈飈。匪由浩蕩之恩，曷沛濃瀼之祉。爰依黃律，恭啓玄

壇。雲斂霄輝，流素金於萬宇。星凝夜炁，耀瑤玉於千林。靈烟舞而華蓋張，神燈朗而長庚吐。天花散翠，映羽葆以低回。神籙流珠，擁霓旌而掩藹。三靈交會，億聖森羅，中凝混混之神輝，旁聽琅琅之梵響。鴛班激越，誠恪罄於九朝。鳳詔輪囷，恩願終於八陛。亟超舊爽，快整新儀。名列太玄，敕制魔而保舉。神朝三素，檄靈童而送迎。徑登元始之天，永宴虛皇之境，恩沾幽顯，化洽人天。以今清夜陞壇行道，請

法衆等，運茲初捻上香。願此香烟騰空徑上，供養無上至真道寶大羅元始天尊，金闕至真玉皇上帝，無上清微天宮真仙聖衆。臣等皈身皈神皈命，首體投地，仰依太上三尊。願以是功德，皈流社稷尊靈，宗祧先聖。伏願怡神鳳館，御炁龜臺，聖祚開祥，蔭璇圖而地久。神孫介壽，衍瑤派以天長。皇帝政協虞謨，化敷禹貢，雲炁望蓬萊之頂，壽聳千齡。天潢接崑崙之源，福流千載。覽德輝於鈞築，觀治象於梯航。德冠六宮，服雉拱椒房之懿。孝

彰三極，鳴鷄侍鳳宸之朝。熙赤縣於覆盂，厚蒼生於奠枕。今故燒香，自皈依師尊大聖衆，至真之德，得道之後，保天長存。和：與道合真。

以今清夜陞壇行道，請法衆等運茲，二捻上香。願此香烟騰空徑上，供養無上至真經寶玉晨靈寶天尊，紫微天皇大帝，禹餘天宮真仙聖衆。臣等皈身皈神皈命，首體投地，仰依太上三尊，願以是功德，皈流齋主家，九玄七祖，故往靈儀。伏願冤冤解悟，業業清夷。凝玄妙珠，照心花而一塵不立。懸光明鏡，廓性蘊而萬景俱融。旋行玄紀之中，高步妙綱之表。齋主某三元薦祉，五福扶衰。綠鬢朱顏，耀昌時之簪紱。厖眉皓首，傳奕世之衣冠。華池湛湛於玄泉，天谷輝輝於丹液。東儲紀字，開方丈之靈蹤。南極刊名，躋空同之仙軌。今故燒香，自皈依師尊大聖衆，至真之德，得道之後，昇入無形。和：與道合真。以今清夜陞壇行道，請法衆等，運茲三捻上香。願此香烟騰空徑上，供養無

上至真師寶五靈玄老天尊，紫微北極大帝，救苦青玄大帝，后土皇地祇，大赤天宮無邊聖衆。臣等皈身皈神皈命，首體投地，仰依太上三尊。願以是功德，皈流玄壇內外，侍經護法，衛真滅魔，達信通誠，飛符傳檄，監臨受事，一切靈聰。並願朱格登勳，玄功證品。侍宸金闕，膺紫策以輝華。進秩玉京，紀丹書而煥映。次願臣等同齋羽士，列職壇員，聖澤天涵，神威春育。宥過無大，毋書五帝之金科。罪疑惟輕，免紀四司之玉律。俾道心之開發，庶德性之圓通。今故燒香，自皈依師尊大聖衆，至真之德，得道之後，長享自然和。與道合真。

禮方 懺悔 三啓

三體

重稱法位

具位臣某，與臨壇官衆等，謹同誠，上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、

西靈、北真、玄都、玉京、金闕七寶瓊臺、紫微上宮、靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞獅座端凝，儼黍珠之玉御。虎關峻極，羅騫翠之琅音。紅雲隱藹以飛霄，綠霧密蒙而耀景。金房感妙，中凝丹谷之輝。玉戶飛仙，上躡玄窗之步。天人理契，生死恩周，惟混炁以扶搖，可升神而浩蕩。今齋主某，仰慮亡故某，稟性之後，賦命以前。逐鹿心荒，鎖迷雲於正路。亡羊志蕩，昏慧月於邪途。弗思懸鶉之藏珠，罔念抵鵠之棄玉。陽精陰粹，既搖落於春霜。地魄天魂，即飄忽於朝露。幽幽寒谷，寂寂昏途，匪據丹悖之衷，曷度玄黃之表。綠章露奏，通羽悃於寥陽。朱表風馳，輅龍輦於鬱朔。齋心謝過，叩首祈哀，伏冀玉色流輝，金容御景。拔出地戶，敕鬼官而送迎。無拘天門，召魔王而保舉。十華御輪

而後從，五靈導轅以前驅。御錄膺圖，飛金龍於童子。佩符合券，契玉虎於神王。身遊紫闕之深，面禮玄都之妙，還真光於妙有，混靈景於虛無。炁聚爲神，侍衛三清之座。形散爲炁，翱翔八極之津。保天長存，與道無極，蒙鑒懇祈之切，允昭提獎之真。齋主某福慶雲興。灾殃風散，出扶宗社，敦禮樂於九圍。入御闈門，衍詩書於六族。圓九五箕疇之志願，遂十三義象之經營。更願二極清寧，三辰朗耀，山靈薦祉，川后靜波，四塞風清，有歸馬牧牛之樂。九垓日靜，無號狐舞鱗之憂。草木衣被於周仁，鬼神優游於商德。休徵時若，萬象調玉燭之和。嘉穀天成，三農獲金穰之慶。九幽開朗，五道停閑。則上明天尊大慈之化，下副臣等皈命之誠，謹啓以聞。

發願

存神燒香

香官使者，左右龍虎君，侍香諸靈官，當令臣向來晚朝陞壇行道之所，自然生金液丹碧芝英，百靈衆真交會，在此香

火爐前。當令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

下堂頌 下壇 回師

靈寶領教濟度金書卷之五十

### 靈寶領教濟度金書卷之五

十一

洞微高士開光救苦真人甯全真授

靈寶通玄弘教水南先生林靈真編

#### 科儀立成品

開度黃籙齋

#### 宿啓儀

燒香頌

各禮師存念如法

東方

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束妖，討捕兇羣。奉承正道，赤書玉文。九天符命，攝龍驛傳。普天安鎮，我得飛仙。和：與道合真。

南方

三炁丹天，煥景流光。熒星轉燭，洞照太陽。上有赤精，合契虛皇。開明童子，號曰華芳。總御火兵，備守玉堂。

斬邪束妖，剪截魔王。北帝所承，風火衝當。流鈴交換，翊衛壇場。正炁流行，敢有猖狂。我享上功，坐運魁罡。億劫長存，保天無疆。和：與道合真。

西方

七炁素天，太白流精。光耀金門，洞朗太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普衛萬生。元皇正炁，來合我身。功加一切，天地咸寧。和：與道合真。

北方

北方玄天，元始徘徊。辰星轉燭，洞煥太微。黑靈尊神，號曰層威。統冠飛天，仙裾羽衣。備守五門，檢精捕非。敢有干試，豁落斬摧。玉符所告，神真八威。邪門閉塞，正道流輝。三光映照，我身無衰。策空駕浮，舉形仙飛。和：與道合真。

中央

黃炁中央，調理乾坤。陶鎔陰陽，總統玄真。鎮星吐輝，流耀九星。開明童

子，號曰天璘。陽炁燄上，朱煥炎精。洞照內外，運我身形。百邪摧落，攝役鬼靈。中山神呪，普天使聞。五靈安鎮，身飛上清。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神，急上關。啓臣今奉爲齋意，以今宿啓告齋，願得玉清道炁靈寶妙光下降，流入臣等身中，即使玄壇清淨，內外成真，天無氛穢，地絕妖塵，琳琅振響，十方肅清，萬魔不干，真誠上徹。令臣所啓，速達徑御太上無極大道至真玉皇上帝御前。

請稱法位

具位奉行無上黃籙大齋法事小兆<sub>臣某</sub>，與臨壇官衆等，今故燒香，願以是功德，上爲七世父母。天子王侯，土地官長，經師籍師度師，及山林岩栖學真道

士，同學之人，九親門族，天下人民，蜎飛蠹動，跂行喙息，一切衆生，皈身皈神皈命，無上靈寶自然至真大道。並丐原赦前生今世，生死宿罪重過，得免離三惡之道，五苦八難九厄之中。臣等身得道真，飛行虛空，白日升天，侍衛道君，逍遙無上七寶自然官殿，永與道合所，啓玄感應，聲上御至真無極道前。

禮十方

坐懺

臣法衆等，志心皈身皈神皈命，十方無極太上靈寶天尊，懺悔修齋。弟子及臣法衆等，自從曠劫以來，至于今日，或身業所犯，四肢舉措，動違戒律，不依經典。或心業所犯，志念不專，情浮意動，馳騁不息。或口業所犯，善惡反論，綺語飾非，華詞惑衆。因今懺悔，並乞蕩除。皆願<sub>臣等</sub>及齋主<sub>某</sub>，身入至仙，會道合真，神合真寂，洞入自然，性命合道，玄會無爲。志心稽首，禮謝無上至真三寶。

三啓頌

樂法以爲妻，愛經如珠玉。持戒制六情，念道遺所欲。淡泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位奉行無上黃籙大齋法事小兆<sub>臣某</sub>，與臨壇官衆等，謹同誠，上啓太上無極大道元始天尊，太上道君，太上老君，高上玉皇，無上玄老，十方已得道大聖



衆，至真諸君丈人，三十六部尊經玄中  
大法師，天師君，上相上宰，四司五帝，  
三界官屬，一切真靈。臣等宿鍾慶運，  
欣際昌時。企瓊牒於鸞函，心傳玄妙。  
瞻瑤圖於鳳笈，身佩希夷。莫餐雲藥  
於空山，乃混烟葩於華境。曲承聖賁，  
俯軫愚蒙。俾修方寸之勳，矢心領教。  
庶效鎔銖之報，勵志酬恩。凡有皈投，  
敢忘關告，況奉詞旨，敢不上聞。

宣詞

按如詞旨，備切丹誠。仰惟三洞金書，  
鼓神風於萬宇。九清玉範，沛聖雨於  
八紘。飛玄昭靈寶之宗，空洞御虛無  
之祖。羅敷三籙，洞煥九幽。爰稽靈  
仙之威儀，參考神人之格範。法天象  
地，三成陞設於螭坳。呼陰召陽，九奏  
班催於鴛序。列鳳繒而效款，尊龍璧  
以輸誠。門啓十華，降十天之寶御。  
戶開四梵，來四極之瓊輪。紫烟掩藹  
於蓮簪，碧霧迴旋於蘭鼎，翠旌飛舞，  
珠蓋空浮。自今月某日爲始，就某處崇  
建無上黃籙大齋幾晝夜。爲亡故某，懺  
除宿垢，洗釋新瑕，削籍北單，超形魂

而飛邁。受書南上，煉神炁以徘徊。  
永遊宴於瓊都，克逍遙於藥闕。謹依  
科法，宿啓以聞。恩惟太上三尊，玄虛  
衆聖，垂慈鑒映，俯覽奏陳。敕勒三洞  
仙曹，三寶官屬侍經護法，監齋衛真，  
土地真官，虛空監察。同心協力，掃內  
外之祲氛。會道運神，契天人於影響。  
令臣等三宮泰定，九室虛圓。罄丹悃以  
趨朝，一塵不立，邇清光而奏對，萬境  
俱融。齋功無魔試之凌，霄澤被混輿  
之大。輪囷初敬，激越終忱，誓祈教雨  
之旁敷，宣賴慈雲之廣覆，明晨行道，  
續更啓聞。

發願

一願乾坤明素，二願氣象清玄，三願聖  
君萬壽，四願化洽八埏，五願天垂甘  
露，六願地發祥烟，七願四時應候，八  
願萬物生全，九願家多孝悌，十願國富  
才賢，十一願齋功廣被，十二願善瑞日  
臻。

存神燒香

香官使者，友右龍虎君，侍香諸靈官，  
當令臣建醮之所，自然生金液丹碧芝

英，百靈衆真交會，在此香火爐前。令  
臣學道得道，求仙得仙，齋主受福，幽顯  
沾恩。十方仙童玉女侍衛，香烟傳臣向  
來所啓之誠，速達徑御太上無極大道  
至真玉皇上帝御前。

出堂頌 下壇 回師

靈寶領教濟度金書卷之五十一

### 靈寶領教濟度金書卷之五

#### 十二

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋

#### 頌玉清大赦儀

靜默堂序立

華夏贊，引至壇前

上香長跪啓白

具位臣某，誠惶誠恐，稽首頓首，再拜上言。臣聞道無今古，常提三極以熙熙。物有始終，每墮九幽而寂寂。稽首度生之德，歸心起死之恩。尚冀宸慈，俯垂淵聽。以今奉為某資薦某，切慮客塵互染，業網交周，紛五鑿於支離，縱六因於流曳。性山自伐，罔思靈棗之當培。心田弗耘，惟恣荒茅之自塞。下違地理，上汨亂於天文。陰忤真靈，陽復乖於人紀。致黑簿定千愆之目，而

玄曹列萬罪之名。厭世彷徨，墮形神於積夜。歷時荏苒，沈魂魄於重泉。六洞推研，十宮對案。水火三元之考問，萬劫無原。炎冰九壘之拘維，千齡莫釋。誰伸援手，但劇寒心匪。依紫極之清光，曷破黑黴之濁暗。臣等冒膺

楓渥，榮縮芝符。奉靈光而代天工，誓勤冰蘖。策神威而開地禁，志切金蘭。擬頌金籙之洪恩，庸請玉清之大赦。開明夜壑，提極寒庭，庶回萬死之悲，均遂千生之樂。欲望玄恩廣覆，帝澤旁昭，許微臣存軫以宣行教，冥曹承宣而敬聽。即使亡故某，出離幽暗，睹見光明。不在大不在小之愆，澄澄冰釋。無私覆無私載之德，藹藹雲臻。永辭五濁之庭，徑陟九清之界，溥提六道，旁軫四生。共證性於昏衢，獲升神於覺地。恩沾有截，澤沛無垠。臣不勝瞻天，望聖激切，屏營之至，俯伏天階，恭俟玄恩報應。

高功伏地行持

衆誦

大行梵炁，周迴十方。中有度人，不死

之神。中有南極，長生之君。中有度世，司馬大神。中有好生，韓君丈人。中有南上，司命司錄。延壽益筭，度厄尊神。迴骸起死，無量度人。今日校錄，諸天臨軒。

十方至真飛天神王，長生度世無量大神，並乘飛雲丹輿綠輦，羽蓋瓊輪，驂駕朱鳳，五色玄龍。建九色之節，十絕靈旛，前嘯九鳳齊唱，後吹八鸞同鳴，獅子白鶴，嘯歌邕邕，五老啓途，羣仙翼轅，億乘萬騎，浮空而來，傾光迴駕，監真度生。諸天丞相，南昌上宮，韓司主錄，監生大神，執籙把籍，齊到帝前，隨所應度，嚴校諸天，普告三界，無極神鄉，泉曲之府，北都羅酆，三官九署，十二河源。上解祖考，億劫種親，疾除罪簿，落滅惡根，不得拘留，逼合鬼羣。元始符命，時刻昇遷，北都寒池，部衛形魂，制魔保舉，度品南宮。死魂受煉，仙化成人。生身受度，劫劫長存。隨劫輪轉，與天齋年。永度三途，五苦八難，超凌三界，逍遙上清。

今日欣慶受度，歷關諸天，請滅三惡，

斬絕地根，飛度五戶，名列太玄，魔王  
監舉，無拘天門，敕制地祇，侍衛送迎，  
拔出地戶，五苦八難，七祖升遷，永離  
鬼官，魂度朱陵，受鍊更生。

上天度人，嚴攝北酆。神公受命，普掃  
不祥。八威吐毒，猛馬四張。天丁前  
驅，大帥仗旛。擲火萬里，流鈴八衝。

敢有干試，拒遏上真。金鉞前戮，巨天  
後刑，屠割鬼爽，風火無停。千千截  
首，萬萬剪形，魔無干犯，鬼無祆精。  
三官北酆，明檢鬼營，不得容隱，金馬  
驛程，普告無窮，萬神咸聽。急急如靈  
寶本章律令。

靈符放赦天尊

高功三拜，起引衆官移班，向地  
戶

侍職唱

上清靈寶玄壇，恭奉道旨，頒行玉清大  
赦，三官九府，百二十曹，三界十方，九  
幽九壘，五嶽四瀆，城隍社令，冥關幽  
路，一切真宰，各宜恭肅，拱聽宣布。

宣赦

宣關

吟飛空步虛頌

焚赦

吟偈

真源塵滓墮沈淪，帝澤如天萬象均。  
丹鳳銜來沾惠露，金雞飛下湛慈雲。  
神光鬱勃三途日，祖炁敷羅九壘春。  
從此超凌升妙境，任他塵劫轉機輪。

轉班向壇前

高功長跪叙謝

具位小兆臣某，再拜上啓虛無自然元始  
天尊，無極大道太上道君，太上老君，  
高上玉皇，十方已得道大聖衆，至真諸  
君丈人，三十二天帝君，玉虛上帝，玉  
帝大帝，東華、南極、西靈、北真、玄都、  
玉京、金闕七寶瓊臺、紫微上宮、靈寶  
至真明皇道君，三十六部尊經玄中大  
法師，上相上宰上保上傅，太平下教二  
十四真人，西城總真王君，太乙真人，  
東嶽上卿司命茅君，定錄保命二真人，  
名山洞府得道神仙，三界官屬，一切真  
靈。恭望洪慈，俯垂鑒映。臣一介愚  
庸，千生慶幸，不量微賤，冒瀆崇嚴。  
遂跼伏於龍墀，擬誕敷於鶴赦。天顏

粹穆，喜承俞允之音。地禁廓清，欣遂  
頒行之願。夜壑停輪於五道，寒庭罷  
對於九泉，幽幽空虛，羅酆肅靜。亡故  
某克承提拔，徑獲飛翔。拜上帝開度之  
仁，慰下民翹勤之切。臣下情無任，欣  
忭之至，謹稽首稱謝以聞。

三拜退靜默堂

向來

靈寶領教濟度金書卷之五十二

靈寶領教濟度金書卷之五十三

洞微高士開光救苦真人甯全真授

靈寶通玄弘教水南先生林靈真編

科儀立成品

開度黃錄齋用

六上轉經儀

第一日早朝

燒香頌

各禮師存念如法

七靈隱神，三元混形。變陰化陽，外清內明。洞徹太和，九宮攝英。飛丹鬱秀，煉度八門。脫胎卻死，七魄散分。百神混合，兆爲帝賓。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓此間土地里域正神。臣今奉爲入意其諸

情愀，具載緘牒。以今陞壇誦經行道，願得太上十方正真生炁，流注臣等身中。令臣所啓速達徑御無上至真三十二天帝君御前。

請稱法位

具位臣某，恭焚寶香，虔誠上奏太上無極大道元始天尊，太上道君，太上老君，玉皇大天尊，玄穹高上帝，神霄九宸上帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璇璣、玉衡一切真宰，諸天聖衆，天真大神，上聖高尊，諸天丞相，南昌上宮韓司主錄，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、養炁、通血中主君，五天三界大魔，十方無極飛天神王，長生大聖，無量度人君，玄中大法師，妙行真人，天真皇人，太極太虛真人，太極左宮仙翁沖應真人，玄都、玉京、金闕七寶瓊臺、紫微上官侍經玉郎、玉童、玉女、神仙、靈官，靈寶領仙

監齋，飛龍騎吏，玄壇受事，香官使者，左右龍虎君，虛空下降應感靈司。仗此真香，普同供養，恭望洪慈，俯垂省錄。臣聞黍珠入妙，昭回騰勝之天。碧玉凝玄，洞煥浮黎之土。獅座端臨而靈光御運，虬輪肆會而靈寶開圖。道冠一乘，溥幽明之惠露。教敷十極，宏經緯之慈雲。聽之者如細雨密霧而來，悟之者皆凌空步虛而去，巍巍大梵，赫赫深功。今有齋主某，開度某，溥及幽冥，冤親平等，崇建黃錄大齋。乞於齋次升壇行道，轉誦《太上洞玄靈寶無量度人上品妙經》，期輟洪恩，曲符丹禱。臣等澄清五體，疏瀹一心，端劍履以御芝圖，肅簪紳而開藥笈。琅琅嘯咏，遵三錄之威儀。侃侃宣揚，按七真之條律。以此功德，上獻太上無極大道三寶上帝，高上玉皇，十方已得道大聖衆，至真諸君丈人，三十六部尊經侍經仙公、仙侯、仙卿、仙伯、玉童、玉女，飛天典禁，翊衛真靈，玄中大法師，三寶官屬，無邊聖衆。恭望靈光羅絡，祖炁迴旋。道紀峨峨，玉宇垂芒於五

億。玄網蕩蕩，金書耀景於三千。真風舒萬葉之華，祖日發千燈之焰，回資玄壇，所度一切亡魂，千愆冰釋，萬罪風清。乘功德光，登南宮之真籍。破煩惱暗，削北府之罪書。陰濟祖玄，陽扶孫子，九壘化春臺之境，三途成夏屋之區，家國咸寧，天人胥慶，臣等下情無任激切，懇祈之至，皈依三寶。

### 三皈依

志心皈依，十方道寶，當願衆生，起心回向，一切信禮。

志心皈依，十方經寶，當願衆生，心開悟解，受持讀誦。

志心皈依，十方師寶，當願衆生，普上法橋，無有障礙。

### 宿命讚

宿命有信然，弱喪謂之無。皆欲眼前見，過目即言悠。大賢明道教，慘戚憫頑夫。依依念子苦，勤勤令我憂。今當開啓琅函，敷宣瓊笈，恭願玄霄流

響，紫禁飛華。持爲亡故某，歷關諸天，俾疾躋於帝所。普告三界，爲明檢於鬼營。飛五戶以升神，開八門而度命，無文不度，有感斯通，稽首皈依，無極大道。

### 平坐讚

道場衆等人，各運心平坐，誦經如法。

### 玄蘊呪

### 請轉寶經

### 衆誦經

### 結經

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻太上無極大道三寶上帝，高上玉皇，十方已得道大聖衆，至真諸君丈人，三十六部尊經侍經仙公、仙侯、仙卿、仙伯、玉童、玉女，飛天典禁，翊衛真靈，玄中大法師，三寶官屬，無邊聖衆，並已周圍。伏願妙道宏開，真經流演，三炁啓圓方之旦，九垓開夷夏之春，然慧燭於昏衢，駕法橋於彼岸。

即俾亡故某，到逍遙境，登解脫山。水絕盟言，證無爲之慧徑。地除簡對，超有漏之稠林。惠逮先靈，慶延後嗣，沛蕃釐於三極，錫純嘏於八遐，爲如上緣，念度人無量天尊。

### 三聞經

### 舉願念

### 復爐如故

仙靈仙官，金童玉女，五帝五嶽神仙真人，三炁正神，左右龍虎君，天仙地仙，五靈香官，當令召致十方正炁，自然生金液丹碧芝英，百靈衆真交會，在此香火爐前。令臣等學道得道，求仙得仙，十方仙童玉女侍衛，香烟傳臣向來所啓之誠，速達徑御無上至真三十二天帝君御前。

出堂頌 下壇 回靜默

### 謝師

### 第一日午朝

### 入壇

具位臣某，恭焚寶香，啓奏太上無極大道元始天尊，太上道君，太上老君，玉皇大天尊，玄穹高上帝，神霄九宸上

帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璇璣、玉衡一切真宰，諸天聖衆，天真大神，上聖高尊，諸天丞相，南昌上宮韓司主錄，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、壽炁、通血中主君，五天三界大魔，十方無極飛天神王，長生大聖，無量度人君，玄中大法師，妙行真人，天真皇人，太極太虛真人，太極左宮仙翁冲應真人，玄都、玉京、金闕七寶瓊臺、紫微上宮侍經玉郎、玉童玉女、神仙靈官，靈寶領教監齋，飛龍騎吏，玄壇受事，香官使者，左右龍虎君，虚空下降，應感靈司。仗此真香，普同供養，恭望洪慈，俯垂省錄。臣聞碧落空歌，煥十迴之隱韻。紫虛鬱秀，昭萬合之靈音。數周天地以生成，澤貫陰陽而化育。乘晨御景，神光洞煥於七經。照夜開幽，道炁敷羅於四譯。萬聖擁空霄之座，諸天臨校錄之軒，功德

難量，禎祥可冀。今有齋主某，開度某，普及幽冥，冤親平等，崇建無上黃籙大齋。乞於齋次升壇行道，轉誦《太上洞玄靈寶無量度人上品妙經》，期輅洪恩，曲符丹禱。臣等肅襟登陛，攝衽陞壇，扣玉磬以和鳴，擊金鐘而振響。威儀具舉，雲層縹緲以聲聞，科範宣敷，風澤幽寥而韻徹。以此功德，上獻圓穹玉帝，大羅高尊，九清、十華、五靈、四梵諸天上帝，至真諸君丈人，欲界、色界、無色界、四種民天、三十二天三十二帝，天中之尊，天中之靈，贊化執法，無鞅數衆。恭願神功流布，梵炁彌羅。撫妙有而子羣生，密承道德。御太無而母萬物，光贊玄元。思提綱紀於春生，仁斡權衡於秋殺。回度玄壇，係薦亡魂，惡根落滅，罪葉飄零。黑鬱刊名，悟塵劫有爲之法。朱陵度命，乘靈寶無量之光。注訟不生，灾殃永斷。九祖超凌於陰軌，千冤均證於陽關。眷屬蒙禧，宗祊衍慶，臣無任激切，懇禱之至。

宿命讚如前

今當開啓琅函，敷宣寶蘊，恭願慈恩日鑒，仁聞時歆。特爲亡故某，無拘天門，勅魔王而保舉。拔出地戶，離鬼官而送迎。徑登太素之區，肆覲虛玄之界，溥熙夷夏，同證真常，稽首皈依，無極大道。

平座讚

玄蘊呪

請轉寶經

衆誦經

結經

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻太上無極大道三寶上帝，高上玉皇，十方已得道大聖衆，至真諸君丈人，三十六部尊經侍經仙公仙侯、仙卿仙伯、玉童玉女，飛天典禁，翊衛真靈，玄中大法師，三寶官屬，無邊聖衆，並已周圓。伏願天聽旁敷，帝心簡在，紫綉華頌於閭闔，丹綸輝煥於鬱單，廓八極以皆春，提九遐而不夜。即

俾亡故某，業山摧毀，定水泓涵。面禮金容，駕法橋而直上。神朝玉陛，廓雲路以高躋。幽關無夜哭之聲，寒壑有晨飛之影，飛潛化化，動植生生，爲如上緣，念度人無量天尊。

三聞經 舉願

復爐 出堂頌

下壇 回靜默

謝師

第二日早朝

入壇

具位臣某，恭焚寶香，虔誠上奏太上無極大道元始天尊，太上道君，太上老君，玉皇大天尊，玄穹高上帝，神霄九宸上帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璿璣、玉衡一切真宰，諸天聖衆，天真大神，上聖高尊，諸天丞相，南昌上宮韓司主錄，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、養炁、通血中主

君，五天三界大魔，十方無極飛天神王，長生大聖，無量度人君，玄中大法師，妙行真人，天真皇人，太極太虛真人，太極左宮仙翁冲應真人，玄都、玉京、金闕七寶瓊臺、紫微上宮侍經玉郎、玉童玉女、神仙靈官，靈寶領仙監齋，飛龍騎吏，玄壇受事，香官使者，左右龍虎君，虛空下降，感應靈司，仗此真香，普同供養，恭望洪慈，俯垂省錄。臣伏聞始青御極，風雲彰藏靜之符。空碧開圖，山林昭緬平之應。赤明恢張於道運，清微煥耀於神機。中有度人，振琅音而回靈萬炁。上無復祖，嘯金章而混景百神。契圓靈遙唱之玄，感高聖下觀之妙，教尊三洞，義冠九清。今有齋主某，開度某，溥及幽冥，冤親平等，崇建無上黃籙大齋。乞於齋次升壇行道，轉誦《太上洞玄靈寶無量度人上品妙經》，期輅洪恩，曲符丹禱。臣等齋明潔己，練吉澄心，宣揚瞻劫仞之崇，嘯朗企鬱羅之峻。寶華天雨，遵威儀於三元。鈞樂霄鳴，肅科條於四極。以茲功德，上獻日宮、月府、五星、四

曜、南辰、六闕、北極、七元上真道君，紫微、太微、勾陳、華蓋、天市、大火帝座星君，五斗、三台、二十八宿周天分野列曜乾象，齋主本命元辰，運炁驛馬，旁臨正照一切真宰。恭願靈芒耀彩，真氣流華。垂象昭昭，贊紫虛而布政，秉陽赫赫，提黃混以司衡。無私帝鑒於覆盆，久照民懷於奠枕。回度玄壇，係薦亡靈，削名陰壘，紀字陽關。離黑暗途，步武鳳清於八難。登光明界，精神日瑩於十華。眷序蕃禧，子孫昌盛，見在保期頤之樂，未來膺吉慶之榮，溥度人天，均蒙化育。臣無任激切，懇祈之至，皈依三寶。

三皈依

宿命讚如前

今當肅啓琅函，敷宣瓊蘊。恭願瑤光委照，瓊彩流明。特爲亡故某，黑簿削愆，挽天河而倒洗。丹臺紀錄，開地壘以斜飛。逍遙蒼昊之崇，遊宴綠羅之大，永清冢訟，保斷灾殃，稽首皈依，無極大道。

平座讚

玄蘊呪

請轉寶經

衆誦經

結坐

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻日宮、月府、五星、四曜、南辰、六闕、北極、七元上真道君，紫微、太微、勾陳、華蓋、天市、大火、帝座星君，五斗、三台、二十八宿周天分野列曜乾象，齋主本命元辰，運炁驛馬，旁臨正照一切真宰，並已周圓。伏願諸天紀名，萬真護善。陽昱晝，陰昱夜，體道施仁。北注死，南注生，憲天布惠。赦多生之黑業，蠲宿世之丹冤。即俾亡故某，覺海澄清，靈源湛寂。北都部衛，無逼合於鬼羣。南上超凌，永夷猶於真列。允拜照臨之德，亶叨覆載之恩。爲如上緣，念度人無量天尊。

三聞經 舉願 復爐

出堂頌 下壇 回靜默

謝師

第二日午朝

入壇

具位臣某，恭焚寶香，奏啓太上無極大道元始天尊，太上道君，太上老君，玉皇大天尊，玄穹高上帝，神霄九宸上帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璿璣、玉衡一切真宰，諸天聖衆，天真大神，上聖高尊，諸天丞相，南昌上宮韓司主籙，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、養炁、通血中主君，五天三界大魔，十方無極飛天神王，長生大聖，無量度人君，玄中大法師，妙行真人，天真皇人，太極太虛真人，太極左宮仙翁冲應真人，玄都、玉京、金闕七寶瓊臺、紫微上宮侍經玉郎、玉童玉女、神仙靈官，靈寶領仙監齋，飛龍騎吏，玄壇受事，香官使者，左右龍虎君，虚空下降，應感靈司。仗此真香，普同

供養，恭望洪慈，俯垂省錄。臣聞百魔隱韻，龍文宏空洞之奇。諸天内音，鳳篆煥飛玄之妙。紫金相空浮於碧漢，白玉毫霄映於黃埃。監真度生，檄羣仙而嚴校。迴骸起死，救萬聖以齊臨。道彰五太之鴻濛，教演十華之汗漫。功加天地，惠逮幽明。今有齋主某，開度某，溥及幽冥，冤親平等，崇建無上黃籙大齋。乞於齋次升壇行道，轉誦《太上洞玄靈寶無量度人上品妙經》，朝輅洪恩，曲符丹禱。臣等恭遵科律，肅按威儀。滌慮澄神，肅駕班而玉立。潔身淪志，鏘鳳篋以金聲。歌揚上徹於寥陽，嘯朗下開於鬱絕。以此功德，上獻諸天省府，四輔上宰，保傅公卿，天曹諸司，執法真衆，三元四聖，傳經授法靈寶五師，十方飛天神王，五天三界大魔王，風雨雷霆玄虛受事，佐天行化無量真靈。恭願神威制地，聖澤昭天。翼玄都而橐籥三靈，慈悲爲主。贊清微而範圍十極，道德攸宗。操權賓愛日之春，布政啓慶雲之旦。回度玄壇，所薦亡魂，出離業網，開脫冤關。北朔



刊編，萬累風清於鳳赦。東華定籍，千愆日燦於龍符。真性昭融，安心披散，玄祖遂飛仙之樂，子孫膺奕葉之榮，五道停輪，九幽罷對。臣下情無任激切，懇祈之至。

宿命讚如前

今當肅啓琅函，宏披寶蘊。恭願經聲高映，梵唱旁敷。特爲亡故某，敕制地祇，魂度朱陵之府。超凌天闕，神辭黑鬱之鄉。紀功而毫分無遺，錄善而錙銖不爽，永無輪轉，式契真常，稽首皈依，無極大道。

平座吟

玄蘊呪

請轉寶經

衆誦經

結經

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻諸天省府，四輔上宰，保傅公卿，天曹諸司，執法真衆，三元四聖，

傳經授法靈寶五師，十方飛天神王，五天三界大魔王，風雨雷霆玄虛受事，佐天行化無量真靈，並已周圓。伏願德闢生門，威摧死戶，德如天而昭昭覆冒，善若水而滾滾涵濡，贊上帝之仁恩，敷下民之德政。即俾所度亡魂，因經發慧，與道合真。一念不生，悟形神之俱妙。萬緣都寂，了性識之兼忘。返照虛無，乘遊眇莽，澤幽明而受福，令動植以承恩。爲如上緣，念度人無量天尊。

三聞經 發願 復爐

出堂頌 下壇 回靜默

謝師

第三日早朝

入壇

具位臣某，恭焚寶香，虔誠上奏太上無極大道元始天尊，太上道君，太上老君，玉皇大天尊，玄穹高上帝，神霄九宸上帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璿璣、玉衡一切真宰，諸天聖衆，天真大神，上聖

高尊，諸天丞相，南昌上宮韓司主錄，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、養炁、通血中主君，五天三界大魔王，十方無極飛天神王，長生大聖，無量度人君，玄中大法師，妙行真人，天真皇人，太極太虛真人，太極左宮仙翁冲應真人，玄都、玉京、金闕七寶瓊臺、紫微上官侍經玉郎、玉童、玉女、神仙、靈官、靈寶領仙監齋，飛龍騎吏，玄壇受事，香官使者，左右龍虎君，虛空下降，應感靈司。仗此真香，普同供養，恭望洪慈，俯垂省錄。臣聞經尊靈寶，二章藏妙於紫微。道冠真常，三篇傳宗於碧落。赤城闡十玄之旨，丹淵昭八緯之功。符雌雄而奕奕聚烟，混合祖炁。企儀璘而輝輝停景，還返靈光。中凝則功滿德就之可期，外運則消灾禳害之克冀，修行有翼，應感無爲。今有齋主某，開度某，普及幽冥，冤親平等，崇建無上黃籙大齋。乞於齋次升壇行道，轉誦《太上洞

玄靈寶無量度人上品妙經》，期輅洪恩，曲符丹禱。臣等恪遵齋戒，恭按威儀。異口同音，閱瓊房之妙韻。調聲正氣，誦瑤室之靈音。徹玉虛以輅龍光，開金剛而敷鴻渥。以茲功德，上獻洞天福地，治化靖廬，名山大川，五嶽五鎮，羅艷鬱絕，泉曲河源，九壘九幽，四海四瀆，五湖七澤，主宰仙真，地水二司，曹寮案掾，城隍社令，五道溟泠，冥路幽關，無鞅數衆。共願仁齊元始，功佐虛玄。承天符而職簡書，春回筆下。握帝章而典錄籍，陽布寰中。雖操憲網以凜如，每運德機而蔚若。回度玄壇，係薦亡魂，蠲無名垢，赦有業愆。嘯命寒庭，黑籍斷除於死蒂。提封夜壑，丹編列紀於生根。化火池冰沼以溫涼，變劍樹刀林而清淨。三塗噓暖，五苦生春，普該動植之繁，各遂飛潛之樂。臣無任激切，懇祈之至，皈依三寶。

三皈依

宿命讚如前

今當肅啓琅函，宏披寶蘊。恭願聞經

了悟，體道慈悲。即俾亡故某，出生死輪，獄吏免拘留之苦。超陰陽域，鬼官有侍衛之榮。掃方域以空虛，泝圓霄而浩蕩，神人交泰，品物咸寧。稽首皈依，無極大道。

平座讚

玄蘊呪

請轉寶經

衆誦經

結經

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻洞天福地，治化靖廬，名山大川，五嶽五鎮，羅艷鬱絕，泉曲河源，九壘九幽，四海四瀆，五湖七澤，主宰仙真，地水二司，曹寮案掾，城隍社令，五道溟泠，冥路幽關，無鞅數衆，並已周圍。伏願九壘書勤，八靈奏善，暖律噓陽於寒谷，曦輪騰景於幽都，慰下愚叩地之恩，沛上聖昭天之澤。即俾亡故某，地根斬絕，天果榮盈。疾部衛，疾

超凌，永辭陰夜。勿拒遏，勿容隱，徑睹陽晨。陰官校績以升班，冥掾酬勳而遷賞，常生善念，普斷惡緣。爲如上緣，念度人無量天尊。

三聞經 發願 復爐

出堂頌 下壇 回靜默

謝師

第三日午朝

入壇

具位臣某，恭焚寶香，奏啓太上無極大道元始天尊，太上道君，太上老君，玉皇大天尊，玄穹高上帝，神霄九宸上帝，五靈五老上帝，十方靈寶天尊，三寶丈人，三寶帝君，三十二天帝君，太陽、太陰、五星、五斗、璿璣、玉衡一切真宰，諸天聖衆，天真大神，上聖高尊，諸天丞相，南昌上宮韓司主錄，監生大神，度人不死尊神，度世司馬大神，好生韓君丈人，南上司命、司錄、延壽、益筭、度厄尊神，迴骸起死無量度人五帝，護魂、侍魄、養炁、通血中主君，五天三界大魔，十方無極飛天神王，長生大聖，無量度人君，玄中大法師，妙行

真人，天真皇人，太極太虛真人，太極左宮仙翁冲應真人，玄都、玉京、金闕七寶瓊臺、紫微上官侍經玉郎、玉童、玉女、神仙、靈官，靈寶領仙監齋，飛龍騎吏，玄壇受事，香官使者，左右龍虎君，虛空下降，應感靈司。仗此真香，普同供養，恭望洪慈，俯垂省錄。臣聞赤文鳳檢，赤明開微妙之章。玉曆鸞圖，玉隆煥希夷之品。參謠歌而萬遍道備，勤嘯咏則十轉靈迴。保迎送迎，湛露普濡於隱韻。受度開度，仁風周拂於幽明。靈音振響以琳琅，梵炁彌羅而流演，福德立降，喜慶難言。今有齋主某，開度某，普及幽冥，冤親平等，崇建無上黃籙大齋。乞於齋次升壇行道，轉誦《太上洞玄靈寶無量度人上品妙經》，期輅洪恩，曲符丹禱。臣等威儀身飾，戒律心膺。寶軸空歌，感鳳唱鸞鳴之瑞。琅函朗詠，符龍吟虎嘯之祥。下激響於神鄉，上流明於帝所。以此功德，上獻玄壇侍衛，玉童玉女，功曹使者，直符香官，左右龍虎君，四直功曹，三界符使，虛空鑒察，城隍里社，遠

近廟貌感應靈祇，本靖諸省府院司仙靈官吏，守衛內外無軼數衆。恭願神威翊善，聖德扶玄，遏魔試於六天，丹忱上御。導蕃釐於九地，洪貺旁敷。奏善而丹表星馳，宣德而玄符風邁。回度玄壇，係薦亡魂，承靈寶旨，斷疑惑根。出昏衢，宴霄衢，高張慧燭。入覺海，超苦海，穩駕慈航。絕注訟於家庭，息考殃於眷序。聖雲巾布，道日舒明，廓三極以長春，耀九垓而不夜。臣無任激切，懇祈之至。

宿命讚如前

今當肅啓琅函，宏披寶蘊，恭願經聲洞關，齋悃遐敷。特爲亡故某，灌沐劫塵，悟有有無無之妙。澄清幻翳，離生生化化之機。乘黃籙之齋功，超碧虛之真域，有求咸遂，無願不從，稽首皈依，無極大道。

平座讚

玄蘊呪

請轉寶經

誦經

結經

仰惟三寶慈尊，十華上聖，俯垂洪造，願賜證明。以今奉爲齋主某，崇建無上黃籙大齋，開度亡故某。乞於齋次升壇，轉誦《太上洞玄靈寶無量度人上品妙經》，上獻玄壇侍衛，玉童玉女，功曹使者，直符香官，左右龍虎君，四直功曹，三界符使，虛空鑒察，城隍里社，遠近廟貌感應靈祇，本靖諸省府院司仙靈官吏，守衛內外無軼數衆，並已周圓。伏願護正齋功，翊扶道果，體上帝歛福錫福之惠，副下民趨善樂善之忱，爲告成於圓霄，普流恩於版幅。即俾亡故某，心田照朗，性海圓明。徑上南宮，煉質陶鎔於離坎。永辭北府，升神超邁於乾坤。常無輪轉之憂，克享太平之運，天人蒙惠，幽顯沾恩，爲如上緣，念度人無量天尊。

三聞經 發願 復爐

出堂頌 下壇 回靜默

謝師

靈寶領教濟度金書卷之五十三

# 靈寶領教濟度金書卷之五

## 十四

洞微高士開光救苦真人甯全真授  
靈寶通玄弘教水南先生林靈真編

### 科儀立成品

開度黃籙齋用

### 謝恩醮儀

燒香頌

各禮師存念如法

宣衛靈呪

### 東方

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束妖，討捕兇羣。奉承正道，赤書玉文。九天符命，攝龍驛傳。普天安鎮，我得飛仙。

### 南方

三炁丹天，煥景流光。熒星轉燭，洞照太陽。上有赤精，合契虛皇。開明童

子，號曰華芳。總御火兵，備守玉堂。斬邪束妖，剪截魔王。北帝所承，風火衝當。流鈴交煥，翊衛壇場。正炁流行，敢有猖狂。我享上功，坐運魁罡。億劫長存，保天無疆。

### 西方

七炁素天，太白流精。光耀金門，洞朗太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普衛萬生。元皇正炁，來合我身。功加一切，天地咸寧。

### 北方

北方玄天，五炁徘徊。辰星轉燭，洞煥太微。黑靈尊神，號曰層威。統冠飛天，仙裾羽衣。備守五門，檢精捕非。敢有干試，豁落斬摧。玉符所告，神真八威。邪門閉塞，正道流輝。三光映照，我身無衰。策空駕浮，舉形仙飛。

### 中央

黃炁中央，調理乾坤。陶鎔陰陽，總統玄真。鎮星吐輝，流耀九星。開明童子，號曰天璘。陽炁燄上，朱煥炎精。

洞照內外，運我身形。百邪摧落，攝役鬼靈。中山神呪，普天使聞。五靈安鎮，身飛上清。

### 鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意，其諸情悃，具載狀文。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

### 請稱法位

具位奉行某，齋謝恩清醮法事小兆臣某，與臨壇官衆等，謹同誠上啓太上無極大道虛無自然元始天尊妙無上帝，虛皇玉晨大道君靈寶天尊妙有上帝，萬變混沌玄元老君道德天尊至真大帝，玉皇大天尊，玄穹高上帝，紫微中天北極大帝，大微上官天皇大帝，高上神霄玉清真王長生大帝，東極青玄老君太

乙救苦天尊，運明保元上帝，南極真王朱陵大帝，后土皇地祇，十方無極太上靈寶天尊，九微太真東華青童大道君，紫微元靈青金丹皇大道君，無上九天生神上帝，三十二天上帝，五靈五老上帝，上清十一曜上真道君，南辰六闕上真道君，北極九府上真道君，上清二十八宿真君，泰玄樞機三省諸相天君，天地水三元帝君，北極四聖真君，玄中大法師真君，三天大法師真君。靈寶經、籙、度師真君，靈寶監齋大法師真君，十方無極飛天神王，五天三界大魔王，三洞四輔經籙法科高真上聖，三天門下三元真君，直日引進仙官，上章詞表靈官，本靖諸省府院司仙靈官吏，五嶽五帝真君，五天聖帝，北陰酆都玄天大帝，東霞扶桑丹林大帝，洞天福地靖廬治化仙官，本靖祖玄真師列位真人，經籍度師列位真人，城隍社令里域土地，虛空鑒察一切真靈。臣聞一陰一陽，運靈光於鰲極。萬天萬地，拱祖炁於鴻鈞。赤明開溟滓之圖，清微啓混濛之運。雲層洞煥，呈玉字以裁成。風澤

幽寥，敷金書而化育。蕩蕩函三之綱

紀，巍巍得一之樞機，至道難明，元功不宰。臣等幸生樂土，欣遇昌時，藥笈鈎玄，莫扶搖於鵬運。芝輪煥紫，冒領袖於駕行。進堅領教之心，退勵學真之志。今齋主某，陳詞蒼極，殫敬玄穹。

北鬱返魂，已佩天恩而起死。南丹煉炁，復開地禁以迴生。不勝瓊玖之勤，曷寓珠環之切。爰陳羽藻，肅輅飄旂。伏冀三寶飛華，九霄錫慶。龍旗羽蓋，玉光垂蔭於紫虛。鳳葆霓旌，瓊彩流明於碧落。朱鳳肅前驅之仗，玄龍嚴後從之麾。黃道昭回，擁葳蕤於清蹕。紫關洞朗，揚晷藹於丹華。十極傾光，三靈混景，爲暫辭於藥闕，即行幸於芝壇。臣下情不勝瞻天，望聖激切，屏營之至，謹稽首再拜，奉迎聖駕。

請衆聖  
三界衆真，兩班列聖，適伸拜請，諒沐光臨，請各整於仙班，共祇迎於帝御。

降九御  
鸞輿至止，鳳輦來臨，三界衆真，如儀朝禮。朝禮即周，請升醮座。齋官上

香，再拜。初進酒。

### 重稱法位

具位臣某，與臨壇官衆等，謹同誠上啓三清上聖，十極高真，玄穹之帝座星真，洞府之仙僚主執，醮筵內外一切威靈。臣聞騫翠流華，拱紫金之瑞相。黍珠凝妙，開碧玉之祥光。瓊音響而湛露飛霄，金聲振而慈雲擁漢。百神混景，返還昭保命之機。萬炁齊仙，生成契回靈之旨。勅神鄉而度品，檢鬼營而登真。是爲靈寶之宗，首幹玄元之化，範圍罔外，陶冶無遺。今齋主某，邇軫窮魂，遐矜苦爽。塵塵穿石，蘊黑業於三生。劫劫機輪，冒玄章於九死。寂寂幽臺之霧，茫茫冥壑之烟，匪叩圓清，曷提方鬱。爰皈神於黃籙，庸請命於玄壇。金闕雲開，捧綠章而夕奏。瑶京日近，飛朱表以朝馳。擎拳龍尾之班，稽顙獅頭之座。果蒙帝造，曲軫民衷。白簡飛龍，開九幽而照夜。丹綸驛馬，廓五道以乘晨。北魁頒攝魄之威，南極啓煉魂之澤。神朝璿極，炁返玉虛。寸草心殫，曷寓粟絲之敬。

擷芹志切，庸攄綿蕝之儀。奉蘋藻以周旋，露藿葵而懇歛，騰誠殘碧，寓悃毫丹，今有青詞，謹當宣奏。

宣詞

按如詞言，備陳激切。臣等茅茨不剪，冒陳饗帝之儀。黍稷非馨，庸贊事天之禮。願資神變，為煥靈奇。玉宇飛玄壇，巍巍於瑤界。金章洞妙筵，秩秩於瓊林。伶華鼓鈞樂之音，寶梵舞天葩之影。珠彝泛玉，羅霞饌以生香。翠竿流金，凝雲漿而耀景。藹蘭烟於虬鼎，騰蓮炬於鸞篝。瑞藹八遐，祥開六合。伏願臨下有赫，鑒激越之小心。聽卑不違，敷輪囷之大造。綠輦低回而注景，丹輿容與以傾光，垂鑒葛心，俯歆菲薦。臣等不勝激切，祈恩之至，謹稽首再拜，酒陳亞奠。

舉玉音

具位臣某，與臨壇官衆等，謹同誠上啓三清上聖，十極高真，玄穹之帝座星真，洞府之仙僚主執，醮筵內外一切威靈。臣聞四雌五雄，丹谷混凝於聖日。七經八緯，玄關靜默於神風。御二景

以飛奔，佩三皇而召制。黃庭胤寶，轉乾坤子午之機。絳室流華，結坎離水金之象。先天妙化，後劫玄宗。宴坐則葆精炁神，超陰陽而嘯朗。經行則運玄元，始澤幽顯以流明。道貫一乘，教分三洞。紫微祕妙，天開昌運之期。黃混敷玄，聖演繁釐之澤。宗風益振，化雨無私。今齋主某，潔己銜恩，洗心報德。齋功日赫，已超九壘而流輝。醮席星羅，更合十華而混景。敢憚鱗嬰之瀆，重殫羽悃之真。伏願債訟冰清，注殃雲散。天機與善，開壽域以天長。地網消愆，闢福鄉於地大。霽月輝華而步武，光風披拂其精神。霄蓋威芒，罔干五紀躔臨之位。垓與暗炁，毋凌一區環拱之維。耀丹桂於五枝，茂玄芝之九葉。室家胥慶，手茸梓澤之春。庭戶相歡，容與蓬山之曉。聲猷永茂，文獻深深。次冀玄壇所度亡魂，暨五族六親，玉檢升神，金章度命。斷除結習，超有無空色之關。澄悟虛玄，了情想妄真之旨。出煩惱網，斷疑惑根，登覺地以升神，超靈天而見性。

頓造無為之境，即辭有漏之林。臣等紫極承符，清微宣化。覲獅頭之法座，期暢同仁。朝龍尾之神墀，敢云獨善。堅金蘭於性海，守冰蘂於心田，誓全生白之期，恐冒女青之峻。尚祈聖造，曲宥愚蒙。庶免三禡之貽羞，敢覬九遷之徽寵。三辰在上，恩尚畔於岱溟。六甲臨旁，譴莫逃於鼎鉞。陳情切切，拊己兢兢。上願天元高澄，地紀清晏，儀璘煥耀，風雨均調，草木輝華，山川明潤，福聖躬於萬壽，衍神祚於億齡，超皇王帝伯之長，得壽祿名位之大。扶持三洞，丕彰道德之風。撫育四民，均被玄元之化。百昌茂育，五道開明。刁斗春閑，茂桑麻於萬里。耰鋤曉潤，富稔黍於四圍。文洽武熙，家給人足，蒙俯矜於丹禱，實仰藉於洪庥。臣等不勝激切，祈恩之至。謹稽首再拜，酒陳終奠。

舉玉音

重稱法職

具位臣某，與臨壇官衆等，謹同誠上啓太上無極大道虛無自然元始天尊妙無

上帝，虛皇玉晨大道君靈寶天尊妙有上帝，萬變混沌玄元老君道德天尊至真大帝，昊天至尊玉皇上帝，紫微中天北極大帝，太微上宮天皇帝，高上神霄玉清真王長生大帝，東極救苦青玄天尊，運明保元上帝，南極朱陵大帝，后土皇地祇，十方無極太上靈寶天尊，東華青童大道君，青金丹皇大道君，九天生神上帝，三十二天上帝，五靈五老上帝，上清十一曜上真道君，南辰六闕上真道君，北極九府上真道君，二十八宿星君，泰玄樞機三省諸相天君，天地水三元帝君，北極四聖真君，玄中大法師真君，三天大法師真君，靈寶經、籍、度師真君，監齋大法師真君，十方無極飛天神王，五天三界大魔王，三洞四輔經籙法科高真上聖，三天門下三元真君，直日引進仙官，上章詞表靈官，本靖諸省府院司仙靈官吏，五嶽五帝真君，五天聖帝，北陰酆都大帝，水府扶桑大帝，洞天福地靖廬治化仙官，本靖祖玄真師列位真人，經籍度師列位真人，城隍社令里域土地，虛空鑒察一切

真靈。臣聞虎關威峻，莫穩步於階升。龍御恩隆，獲馳神而几奏。幸罄齋修之素悃，再殫薦獻之丹忱。大赤金書，雖陸離於雨露。女青玉律，恐赫奕於雷霆。亶冀海涵，庶逃山負。以今香殘玉篆，燭暗金輝，雲和收縹緲之音，梵響息琳琅之韻。前瞻翠節，將返景於層霄。後矚朱旛，行回光於遙極。天駟逶迤而旁邁，雲龍搖曳以高征。三界旋班，諸天復位。運元會道，融萬炁於泥丸。合景凝真，混百神於玄牝。臣等涵濡靈彩，游咏恩波。睇奕奕之華房，金光澄寂。仰輝輝之妙境，絳彩虛圓。臣等不勝攀戀，望恩之至，謹稽首再拜，奉送。

#### 回輶頌

#### 發願

一願乾坤明素，二願氣象清玄，三願聖君萬壽，四願化洽八埏，五願天垂甘露，六願地發祥烟，七願四時應候，八願萬物生全，九願家多孝悌，十願國富才賢，十一願齋功廣被，十二願善瑞日臻。

#### 存神燒香

香官使者，左右龍虎君，侍香諸靈官，當令臣設醮謝恩之所，自然生金液丹碧芝英，百靈衆真交會，在此香火爐前。然願臣學道得道，求仙得仙，齋主受福，幽顯沾恩，十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

#### 舉焚疏頌

#### 至燎所

#### 回靜默堂

#### 謝師

靈寶領教濟度金書卷之五十四

靈寶領教濟度金書卷之五十五

洞微高士開光救苦真人甯全真授  
靈寶通玄弘教水南先生林靈真編

科儀立成品

開度黃籙齋投三簡

投山簡儀

燒香頌

各禮師存念如法

宣衛靈呪

五星列照，煥明五方。水星卻灾，木德致昌。熒惑消禍，太白辟兵。鎮星四據，家國利亨。刊名玉簡，錄字帝房。乘飈散景，飛騰太空。出入冥无，遊宴十方。五雲覆蓋，招神攝風。役使萬靈，上衛仙翁。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今投龍奠簡，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行黃籙投龍法事臣某，謹奏啓大羅玉清無極無上至真大道太上道君，三十六部尊經玄中大法師，三寶聖衆一切威靈。恭望應感分輝，垂慈下降，謹奉請某州某洞天仙官，得道神仙諸聖衆，飛仙真人，一切威靈，伏望真慈俯垂下降。謹奉請當境主司，虛空鑒察，香官使者，里域真官，翊衛將吏。伏望威聰，同垂下降，香茶淨酒，普伸供獻。

三獻茶酒 散花

臣某謹上啓太上無極大道太上三尊，十方已得道大聖衆，至真諸君丈人，東華、南極、西靈、北真，三十六部尊經玄中大法師，太極真人，玄一三真人，諸天日月星宿崑崙上宮諸神仙，西靈金

母，五嶽真君，靈山正職儲副佐命，五嶽大神，三官北部、六宮幽司、天上地下冥靈飛神，監生、主錄、南上三司至神至靈，一切羣仙。臣胎生濁質，宿際昌時，道運興行，靈寶演化，獲以微賤，佩奉宣揚，領教立功，度人濟物。今奉爲某，修設黃籙大齋，薦拔亡靈，懺罪請福。行道事竟，投簡靈山，金龍驛傳。乞削罪錄，願神願仙，解釋殃考，拔贖苦根，九玄七祖，億劫種親，脫離地獄，獲睹光明，免經苦惱，受化福地，墳墓安穩，注訟不生，舉家安泰，福祿無傾。臣學業日就，行滿功成，三界證度，正法通靈，國土清謐，帝王和寧。謹啓以聞，乞如所陳。臣誠惶誠恐，稽首頓首再拜。

讀山簡文

大明國某州某縣某鄉某里某，奉爲亡故某，修建黃籙大齋，幾晝夜滿，散設醮幾分位，仰答恩光，齋壇解散，投簡靈山。伏願天官賜福，地府除愆，艷山削罪，罪，幽獄停冤，注名朱府，運度自然，見存得道，即往生天，繒璧效信，金龍驛



傳，一如告命。

太歲某年某月某日某洞天告下

玄上開明，元始監真，上帝玉老，赤書丹文。天地本始，總領三元，攝召炁會，催促齊仙。高上符命，普告十天，日月星宿，五嶽靈山。天上地下，溟泠大神，監生主錄，南上三門。關領玉簡，勒名丹編，削落罪書，上補帝臣。臣歸正道，修齋立功，拔贖九祖，一切苦魂。行道事竟，謹依靈山，請投玉簡，乞削罪名。皆蒙解脫，無有冤親，去離三惡，魂升九天。生死開度，萬劫長存，今日上告，萬神咸聞。請以龍簡，關盟真官，乞如所告，金龍驛傳。三聲

投簡頌

太上法微妙，簡籙度人天。元始告符命，時刻獲升仙。傳授救沉溺，皆得自翛然。書名金籙簡，逍遙玉帝前。

投簡

發願

一願乾坤明素，二願氣象清玄，三願聖君萬壽，四願化洽八埏，五願天垂甘

露，六願地發祥烟，七願四時應候，八願萬物生全，九願家多孝悌，十願國富才賢，十一願齋功廣被，十二願善瑞日臻。

存神燒香

香官使者，左右龍虎君，侍香諸靈官，當令臣建齋之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

出堂頌 下壇

回師

投水簡儀

入壇如前

具位臣某，謹奏啓大羅玉清無極無上至真大道太上老君，三十六部尊經玄中大法師，三寶聖衆一切威靈，恭望應感分輝，垂慈下降。謹奉請某州某江水帝，得道神仙，水府威靈諸聖衆。伏望真慈，垂光下降。謹奉請當境主司，虛空鑒察，香官使者，里域真官，翊衛將

吏。伏望威聰，同垂下降，香茶淨酒，普伸奉獻。

三獻茶酒 散花

臣謹上啓太上無極大道太上三尊，十方已得道大聖衆，至真諸君丈人，東華、南極、西靈、北真，三十六部尊經玄中大法師，太極真人，日月五星、北斗七元、五嶽四方、日窟常暘、洞谷洞陰神仙大王，扶桑大帝，三河四海、九江淮濟、三官九署、十二河源九府水帝，溟泠大神，水府仙衆，一切威靈。臣稟質愚蒙，幸依宿慶，遭逢大法，與善因緣，靈寶赤書，輔宣正化，稟弘慈訓，佐國立功。今奉爲某，修建黃籙大齋，薦拔亡靈，懺罪祈福。法事都畢，投簡靈淵，金龍驛傳。乞除死籍，賜以自新，銷愆削咎，解釋苦根，九祖父母，胎元種親，出離暘谷，幽夜寒庭，沐浴煉度，普遂超升，殃注削減，墳塚安榮，長幼受慶，萬願從心。臣參真學道，所向利貞，功圓行滿，玄都紀名，帝王享福，世祚無傾。謹啓以聞，乞如所陳，臣誠惶誠恐，稽首頓首再拜。

讀水簡文

大明國某州某縣某鄉某里某，奉爲亡故某，修建黃籙大齋幾晝夜。滿散設醮幾分位，仰答恩光，齋壇解散，投簡靈泉。伏願水官解厄，告命重泉，五湖四海，十二河源，疾除罪簿，息考停冤，亡靈受度，超化南天，功加一切，注籍金編，繒壁效信，金龍驛傳，一如告命。

太歲某年月日某處告下

元始五老，上帝高尊，十方至真，太華靈仙。赤文告命，無幽不聞，上御九天，請下玉文。日月五星，北斗七元，中告五嶽，四元靈山。下告河海，十二泉源，九府水帝。溟泠大神。今日上告，萬願開陳，修齋行道，普爲存亡。請贖七祖，宿對罪根，謹投玉簡，乞得上聞。紀名水府，過去升天，生死開度，萬神咸聞。請以龍簡，告盟水官，賜如所陳，金龍驛傳。三聲

投簡頌 投簡 發願

復爐並同前

投土簡儀

入壇如前式

具位臣某，謹奏啓大羅玉清元極無上至真大道太上道君，三十六部尊經玄中大法師，三寶聖衆一切威靈。恭望應感分輝，垂慈下降。謹奉請齋主家土府太歲，九壘土皇靈官，一切威靈。伏望真慈垂光下降，謹奉請當境主司，虛空鑒察，香官使者，里域真官，翊衛將吏。伏望威聰同垂下降，香茶淨酒，普伸奉獻。

三獻茶酒 散花

臣某謹上啓太上無極大道太上三尊，十方已得道大聖衆，至真諸君丈人，東華、南極、西靈、北真五老上帝，三十六部尊經玄中大法師，太極真人，酆都大帝君，九府六洞泉曲主司，無極世界高皇九土皇靈季帝高真，中皇九土戊己黃神，土府五帝，三界官屬，一切威靈。臣誕形下土，稟炁凡愚，會遇宿因，真文降世，奉參靈寶，宣化積功，夙宵受持，罔敢廢怠。今奉爲某，修崇黃籙大齋，薦拔亡魂，削罪乞福。懺謝都畢，投簡靈壇，金龍驛傳。乞銷罪名，願度願生，滅除殃考，削落罪根，七世父母，先

亡宗親，徑辭太漠，八難超凌，永離幽苦，玉曆注名，冤愆消釋，家宅清寧，見存清吉，祿慶咸臻。臣學識開悟，智慧洞明，真道圓就，登名紫清，溥天寧晏，國祚隆興，謹啓以聞，乞如所陳。臣誠惶誠恐，稽首頓首再拜。

讀土簡文

大明國某州某縣某鄉某里某，奉爲亡故某，修建黃籙大齋幾晝夜，滿散設醮幾分位，仰答恩光，齋壇解散，投簡靈壇。伏願地官赦罪，罷對羅酆，刀山斷刃，劍樹摧鋒，中央戊己，上奏蒼穹，有情衆類，普度南宮，見存得道，億劫無終，繒壁效信，金龍驛傳，一如告命。

太歲某年月日某處，齋壇告下

天地開張，九炁分靈。三元洞府，十方朗清。五老上帝，開真領生。丹書赤文，元始上精。普告天下，九土皇靈。今日上吉，萬仙定生。修齋行道，普爲存亡。我願我仙，請投玉名。土府太皇，勒除罪刑。奏簡上官，列簿華清。早得飛騰，天地同靈。九祖種親，腐骸更榮。魂升南宮，受化仙庭。今日告

命，萬神咸聽。請以金紐，表明至情。請如所告，金龍驛傳。三聲

投簡頌 投簡 發願  
復爐並同前式

靈寶領教濟度金書卷之五十五

### 靈寶領教濟度金書卷之五

#### 十六

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋用

#### 上十方懺儀

入壇如式

東方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青上宮拔度科品，皈命東方無極太上靈寶天尊，九炁天君，東鄉神仙諸靈官。燒香散花，轉經行道，生死宿過，咸乞赦原。伏冀碧落開光，青元定錄，超神長樂，

御炁始青，流慶家庭，垂芳眷序，三灾日燦，五福雲蒸，普福含靈，均蒙利澤，得道之後，升入無形。和：與道合真。

南方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青陽宮拔度科品，皈命南方無極太上靈寶天尊，三炁天君，南鄉神仙諸靈官。燒香散花，轉經行道，生死宿過，咸乞赦原。伏冀朱火陶形，丹丘煉質，濯神東井，汎景南閭，祥衍雲仍，慶流庭戶，福德雲集，難厄霜晞，普及含靈，均蒙利澤，得道之後，升入無形。和：與道合真。

西方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，

自作教他，心生口語，千愆萬罪，紀錄靈曹，兆劫億齡，沈淪惡對，匪繇懺贖，曷遂解除。今依明真玉匱女青陰宮拔度科品，皈命西方無極太上靈寶天尊，七炁天君，西鄉神仙諸靈官。燒香散花，轉經行道，生死宿過，咸乞赦原。伏冀瓊闕怡神，瑤池高步，飛昇霞館，遊宴月庭，院宇光華，子孫昌盛，休祥川至，厄難風清，普及含靈，均蒙利澤，得道之後，升入無形。和：與道合真。

北方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青太陽宮火官拔度科品，皈命北方無極太上靈寶天尊，五炁天君，北鄉神仙諸靈官。燒香散花，轉經行道，生死宿過，咸乞赦原。伏冀艷域超神，仙源御景，騰光玄老，飛觀紫微，慶衍門閭，福覃眷序，

四魔烟滅，萬聖雲從，普及含靈，均蒙利澤，得道之後，升入無形。和：與道合真。

東北方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，迨至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青右宮禁官拔度科品，皈命東北方無極太上靈寶天尊，梵炁天君，東北鄉神仙諸靈官。燒香散花，轉經行道，生死宿過，咸乞赦原。伏冀蒼靄棲真，碧霞侍聖，煉形丹霍，飛步騫林，孫子蕃昌，門庭清晏，障緣雲散，善果日升，普及含靈，均蒙利益，得道之後，升入無形。和：與道合真。

東南方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒

六情，紛紜三業，日積月累，陽造陰謀，自作教他，心生口語，千愆萬罪，紀錄靈曹，兆劫億齡，沈淪惡對，匪繇懺贖，曷遂解除。今依明真玉匱女青中宮禁官拔度科品，皈命東南方無極太上靈寶天尊，梵炁天君，東南鄉神仙諸靈官。燒香散花，轉經行道，生死宿過，咸乞赦原。伏冀丹闕流恩，洞陽騰景，升神藥館，列品朱軒，慶衍宗枝，福流眷序，千祥霧萃，九厄烟消，普及含靈，均蒙利益，得道之後，升入無形。和：與道合真。

西南方

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷克解除。今依明真玉匱女青下宮右官拔度科品，皈命西南方無極太上靈寶天尊，禁炁天君，西南鄉神仙諸靈官。燒香散花，轉經行道，生死宿過，

咸乞赦原。伏冀瓊圃朝元，金門登妙，遊真紫府，宴景清都，門戶興隆，姻親利樂，灾殃電掃，福祉雲臻，普及含靈，均沾利澤，得道之後，升入無形。和：與道合真。

#### 西北方

臣等今故燒香，志心皈身皈神皈命。謹爲黃籙齋主某，懺悔亡故某，普及幽冥，冤新平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青太陰宮水官拔度科品，皈命西北方無極太上靈寶天尊，梵炁天君，西北鄉神仙諸靈官。燒香散花，轉經行道，生死宿過，咸乞赦原。伏冀天闕超神，鬱鄉凌景，翱翔玄極，遊宴玉京，福潤家庭，恩流眷族，純禧雲萃，障難冰清，普及含靈，均沾惠利，得道之後，升入無形。和：與道合真。

#### 上方

臣等今故燒香，志心皈身皈神皈命。謹

爲黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沈淪惡對，匪繇懺贖，曷遂解除。今依明真玉匱女青上宮都禁官拔官科品，皈命上方無極太上靈寶天尊，三十二天帝君，玉京玄都紫微上宮諸真人神仙玉女，無極世界上鄉神仙諸靈官。燒香散花，轉經行道，生死宿過，咸乞赦原。伏冀紫禁回靈，玄關超迹，飛神闖闔，駕景鬱羅，宅舍光華，子孫愆慶，禎祥雨潤，灾厄雷轟，普及含靈，均沾利澤，得道之後，升入無形。和：與道合真。

#### 下方

臣等今故燒香，志心皈身皈神皈命。謹爲黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今依明真玉匱女青下官四

司禁官拔度科品，皈命下方無極太上靈寶天尊，高皇九土四司五帝，十二仙君，九宮真人，神仙玉女，無極世界下鄉神仙諸靈官。燒香散花，轉經行道，生死宿過，咸乞赦原。伏冀削字北單，移名南上，玄虛宴御，碧落超凌，襲福宅庭，垂祥親族，萬殃風散，千慶星輝，普及含靈，均蒙利澤，得道之後，升入無形。和：與道合真。

#### 下十方懺儀

##### 日宮東北

臣等今故燒香，志心皈身皈神皈命。謹爲黃籙齋主某，懺悔亡故某，普及幽冥，冤親平等，爰從無始，迨至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今故稽顙投誠，擊拳皈命，日宮至真大聖，日君夫人，炎光童子，丹霞玉女，日宮神仙諸靈官。燒香散花，轉經行道，生死宿過，咸乞赦原，伏冀暘谷流光，扶桑乘景，升神炎闕，飛步常陽，親族榮華，家庭利樂，蠲消障

難，延迓休祥，普及含靈，均沾利益，得道之後，升入無形。和：與道合真。

月宮西南

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。今故稽顙投誠，擎拳皈命，月宮至真大聖，月君夫人，圓光童子，散輝玉女，月宮神仙諸靈官。燒香散花，轉經行道，生死宿過，咸乞赦原。伏冀東井飛神，金門策炁，煉魂素闕，宴景廣寒，眷序平安，門庭隆盛，掃清灾厄，和合福齡，普及含靈，均蒙利澤，得道之後，升入無形。和：與道合真。

星宮西北

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，肅至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄

靈曹，兆劫億齡，沉淪惡對，匪繇懺贖，曷遂解除。今故稽顙投誠，擎拳皈命，諸天星宿，璿璣玉衡，周天三百六十五度河漢大神，星中夫人，星宮神仙諸靈官。燒香散花，轉經行道，生死宿過，咸乞赦原。伏冀經緯遊神，璿璣導炁，高登碧漢，飛駕丹霄，眷序和寧，門庭清泰，掃除舊戾，流衍新釐，普及含靈，均蒙利澤，得道之後，升入無形。和：與道合真。

東嶽

臣等今故燒香，志心皈身皈神皈命。謹奉為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，升愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命，東嶽泰山青帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀蒼極登名，青華移籍，升神日觀，策步雲亭，門戶興昌，子孫利益，導迎景貺，辟

斥灾衰，普及含靈，均蒙利澤，得道之後，升入無形。和：與道合真。

南嶽

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺謝，曷遂解除。以今稽顙投誠，擎拳皈命，南嶽衡山赤帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀絳闕超神，朱陽受記，遊真紫蓋，煉質朱陵，姻族繁隆，門庭貞吉，福壽昌熾，厄障潛消，普及含靈，均沾利澤，得道之後，升入無形。和：與道合真。

西嶽

臣等今故燒香，志心皈身皈神皈命。謹奉為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀

錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命西嶽華山白帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀閔苑登真，崑臺紀籍，升神太素，育質金晶，眷屬安寧，戶門興顯，招迎善瑞，削滅衰凶，普及含靈，均蒙利澤，得道之後，升入無形。和：與道合真。

### 北嶽

臣等今故燒香，志心皈身皈神皈命，謹為黃籙齋主某，懺悔亡故某，普及幽冥，冤親平等，爰從無始，逮至有終，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命北嶽恒山黑帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀青錄紀名，黑編削字，逍遙廣漠，遊宴虛無，門戶清閒，子孫蕃衍，却消否難，延致嘉祥，普及含靈，均沾利澤，得道之後，

升入無形。和：與道合真。

### 中嶽

臣等今故燒香，志心皈身皈神皈命。謹奉為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命中嶽嵩山黃帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀紫極升神，碧虛樂性，策名太室，騰景中陵，親族寧安，門庭昌裕，蕃釐密被，衆厄俱消，普及含靈，均沾利澤，得道之後，升入無形。和：與道合真。

### 水府

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，

自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命扶桑大帝，暘谷神王，洞玄洞淵清冷大神，三河四海九江水帝，十二河源江河淮濟水府神仙諸靈官。燒香散花，轉經行道，生死宿過，咸乞赦原。伏冀河漢升真，崑崙駕景，遊神空碧，飈戲太清，罪籍毀焚，宗親悅茂，見存福慶，既往超凌，普及含靈，均蒙利澤，得道之後，升入無形。和：與道合真。

### 經寶

臣等今故燒香，志心皈身皈神皈命。謹為黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命至真無上三十六部尊經，寶符玉章，玉童玉女，侍經神仙諸靈官。燒香散花，轉經行道，生死宿過，咸乞赦原。伏冀瓊笈提神，琅函返景，遊神帝所，飛步

天衢，宗族延休，家庭有慶，導迎善瑞，却斥灾危，普及含靈，均沾利澤，得道之後，升入無形。和：與道合真。

總懺十方儀

臣等今故燒香，志心皈身皈神皈命。謹爲黃籙齋主某，懺悔亡故某，普及幽冥，冤親平等，爰從無始，逮至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命

十方無極太上靈寶天尊，梵炁天君，十鄉神仙諸靈官。燒香散花，轉經行道，生死宿過，咸乞赦原。伏冀十極還真，九幽釋罪，登神妙有，汎景太無，門戶和隆，宗親茂盛，凶灾烟散，善慶日臨，普及含靈，均沾利澤，得道之後，升入無形。和：與道合真。

總三光

臣等今故燒香，志心皈身皈神皈命。謹奉爲黃籙齋主某，懺悔亡故某，普及幽冥，冤親平等，爰從無始，迨至有生，顛倒六情，紛紜三業，日累月積，陽造陰

謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命日月星宮，至真大聖，夫人玉女，宮中神仙諸靈官。燒香散花，轉經行道，生死宿過，咸乞赦原。伏冀雲路飛神，霄衢高步，策名玉簡，列字璇圖，注訟蠲消，姻親利樂，吉祥萃止，灾難澄清，普及含靈，均沾利澤，得道之後，升入無形。和：與道合真。

總五嶽

臣等今故燒香，志心皈身皈神皈命。謹奉爲黃籙齋主某，懺悔亡故某，普及幽冥，冤親平等，爰從無始，迨至有生，顛倒六情，紛紜三業，日累月積，陽造陰謀，自作教他，心生口語，千愆萬罪，紀錄靈曹，兆劫億齡，沉淪惡對，匪繇懺贖，曷遂解除。以今稽顙投誠，擎拳皈命五嶽五帝真君，飛仙真人，名山洞府得道神仙諸靈官。燒香散花，轉經行道，生死宿過，咸乞赦原。伏冀天路升神，地司削咎，棲真香圃，御景瓊臺，眷屬和平，家庭昌吉，千灾釋散，萬善資

扶，普及含靈，均蒙利澤，得道之後，升入無形。和：與道合真。

靈寶領教濟度金書卷之五十六



靈寶領教濟度金書卷之五

十七

洞微高士開光救苦真人甯全真授

靈寶通玄弘教水南先生林靈真編

科儀立成品

黃籙開度用

立諸司幕儀

靜默堂序立

法事如式

具位嗣法弟子某焚香，上啓三洞四輔經籙法科祖玄真師列位真人，經籍度師列位真人。仰冀師慈，俯垂鑒映。切以大德生生，咸仰裁成於紫禁。元功化化，夙歆燮理之玄曹。既飛金簡以宣行，盍煥玉符而召役，以今奉爲入意，屬茲瑤壇肇啓，玉範將宣，期成神聖之功，須賴仙靈之力。欲望俯矜德愜，曲賜慈觀，特爲敷奏。上玄請頒，勅命關告，章奏真聖，煉度靈曹，追攝諸司，靈寶真屬，風雲蒞藹，各仰行於萬程。水

月交羅，宜會歸於一處。效勤受職，協力圖勳，圓濟度之宏功，成修齋之釐事。某下情不勝虔切，俟恩之至。

引至章奏幕

上香

某焚香，供養九靈飛步章奏司仙靈官吏。切以壇符十極，敷帝渥之彌羅。班列九靈，仰神功之妙密。既嚴修奉，盍罄懇祈。以今奉爲入意叩天闈以飛箋，降靈司而效職。芝書煥紫，諒促召於中垣。羽葆飛黃，冀遙臨於前幕。並矜素愆，翊導朱函，法衆運誠，修齋奉請。

請聖

三天門下上章二十四真人，左上仙，右上靈，中上神三大將軍，三天門下上官典者，引進仙官，某治建節監功大將軍，前部效功、後部效斨驛庭令，驛庭丞，四部監功謁者，狼吏虎賁，察姦鈎騎，都官僕射，天驕甲卒，天丁力士，治中主簿，治中校尉，雲中督吏，幹佐小吏，金光童子，典章從官，通章舍人，行章童子，元始小吏，玄都力士，九光玉伯，

高車司馬，通章小吏，承章令史，通章書佐，部章督郵，呈章、通章、校章、定章、刺章、印章、部章、諸從事，太初、太元、太真、太素、太玄、太一、虛無直符直事，上仙、上靈二官直使，正一功曹，左右官使者，陰陽神決吏，科車赤符吏，剛風騎置吏，驛馬上章吏，進章鳳凰騎，上章雲龍騎，言章風發騎，御章神龍騎，奏章飛龍飛虎騎，五方鎮章大將，奏章靈官，二界傳奏功曹，十二月玉清總召金闕上佐發放九天御史大夫，九天通章使者，天樞發放司流金火鈴大將，麒麟麟索二天丁，開天符命使者，五帝六甲功曹，四直玉文功曹，運神會道功曹，靈飛丁甲玉女，靈寶功曹使者，玉童玉女，直符香官，諸天承受玉女，三天上奏靈官，飛章靈官，通章玉女，玉清八威治魔都統，神慧殺鬼都伯史玉清，總領鬼兵三天大元帥，九天尚父大元帥，玉清執麾左領神王，執幢右領大神，玉清鼓按後部力士，執節前引天丁，玉清青龍白虎朱雀玄武大神，

命魔仗旛大帥，玉清擲火萬里大將軍，流鈴八衝大將軍，玉清金鉞前戮大神，巨天後刑大將，玉清屠割使者，風火征伐大將軍，玉清剪截鬼穢大神，明檢鬼營大將，玉清金馬驛呈大神，列言上清錄事，某靖侍衛仙官，主將副將，護道監壇都元帥，諸省府院司所部通進仙官神吏。

三獻

散花

某上啓九靈飛步章奏司仙靈官吏。切以升神謁景，挹祖炁於玄關。會道運元，混靈光於絳室。非繇參贊，曷遂感通。今有某露悃朱章，微恩紫闕。策八威於雲路，金馬驛呈。揚十絕於霄衢，玉鸞促覲。具嚴壇榜，敬爲敷宣。

宣榜

榜文宣示，真聽昭明。願停彩仗以傾光，爲翊玄靈而聯事。玉華耀景，迴骸起黑鬱之幽。金格升班，校績職清微之峻。拳拳有請，切切無違，某不勝虔祝之至。

引至神虎前

某焚香供養北魁玄範神虎，玉司靈寶攝召總局仙靈官吏。切以壇崇中極，款龍馭以對揚。望峻北魁，羅駕班而燮理。既嚴修奉，盍罄懇祈。以今奉爲，某人入意期請降於玄曹，冀曲提於黑鬱。雲飛丹鳳，已承碧落之溫綸。風舞玄龍，諒煥青冥之羽仗。不遺小物，恪沛洪恩，法衆運誠，修齋奉請。

請神

北魁玄範府神虎追魂陽精輝明昭靈大帝，北魁玄範府神虎追魄陰精輝靈威神大帝，雄左大力統制百節三魂玉曹玄伯何大神，雌右武鸞提魂攝魄飛符玉札主吏喬大神，神虎上部、中部、下部追魂使者，神虎倒生玄司七玉女，玉清天道、地道、神道、人道、仙道、鬼道、業道功曹，靈寶如意萬司主行玉札、顯魂提魂三大神，玉清追魂攝魄七將軍，監魂童子，引魂童子，玉清對魂、整魂、尋魂、聚魂功曹將軍，陽耀通關、陰靈攝魄監獄使者，神虎追魂攝魄三元夫人，四直追攝將軍，神虎追魂一十五員使者，神虎追攝諸部神吏，三界追魂使

者，神虎玉司紫微金光郭大將，夜光玉女，八卦大神，大召小召真人，鄔屠將軍，神虎黑衣內院雷火劉將軍，火車嚴使者，黑衣左右追攝楊李二大將，大黑北冥受事官吏，玉都玄臺內省飛空追攝大使，直符雷將軍，內省追攝一呼董使者幽魂韓使者，內臺聚魂天將，普召河沙天將，追魂天將，金闕內臺五部追魂大將，引魂天將，青玄黃籙夜光召魂神司玉女判吏，青玄引魂尋魂追魂司靈官功曹，黃籙院追魂攝魄功曹使者將軍，黃籙院統兵助法闡教通靈通天入地諸大將，北斗下十二時十二月十二日玉札神將，太一玄冥司追魂神將，七真玉女，天蓬攝召司鄧將軍，報應劉使者，追魂召魂攝魄黃李柳三將軍，普現曹葉二大神，正一飛火院袁雷牛白朱五大將，洞神攝召司良宮天丁丘大神，靈寶如意萬司追二十四類幽魂五十七大神，九天溥召院追三十六種傷亡幽魂諸將軍，本靖主將副將，護道監壇諸元帥，當境土地真官，齋主家土地司命六神。

三獻

散花

某上啓北魁玄範神虎玉司靈寶攝召總局仙靈官吏。切以神光照夜，煥青籙於羅艷。元炁開幽，耀紫章於鬱絕。匪由參贊，曷遂感通。今有某將明檢於鬼營，冀升遷於神壘。鉞旄嘯命，疾驅周六合之遙。旌節提封，嚴攝遍九域之大。具嚴壇榜，謹爲宣揚。

宣榜

榜文宣示，真聽昭明，駐右幕以低回，肅前矛而莅止。地輪校績，膺圖倘證於三元。天闕酬功，進秩當符於九格，拳拳有請，切切無違，某不勝虔祝之至。

引至承受幕

某焚香供養靈寶玄壇承受文檄功曹符吏。切以教尊空洞，提地壘以登齋。班列虛靈，合中樞而聯事。既嚴修奉，盍罄懇祈。以今奉爲入意，期效職於玄曹，曾敷誠於紫闕。德音輝煥，已催下邁之鳴鑾。神景龍葱，諒肅前驅之羽仗。來遊塵境，爲達齋忱，法衆運誠，修齋奉請。

請神

諸天承受玉女，諸天上奉靈官，九天上奏靈官，中天承受玉女，玉清發放大將軍，天樞發放司主吏佐吏，九天雲路正一功曹，開天符命使者，十方飛天使者，傳言奏事飛龍騎吏，三界直符使者，四直玉文功曹，地分傳奏神祇。

三獻

散花

某上啓靈寶玄壇，承受文檄，功曹符吏。切以飛龍騰景，通葵悃於寥陽。驛馬排空，敷芝恩於朔鬱。今有某人入意既殫，享帝之恭，益進箋天之敬。流鈴振響，青函疾御於九霄。玉節揚凌，素牘溥馳於三界。開天制地，奔陰衛陽，具嚴壇榜，謹爲宣揚。

宣榜

榜文宣示，真聽昭明，姑駐景於前帷，以承流於中陛。銀臺通進，叩闈登紫殿之嚴。金闕頒宣，遷格準朱宮之峻。拳拳有請，切切無違，某不勝虔祝之至。

引至驛吏幕

某焚香供養玄都驛吏，日直天丁，地道

功曹，九龍使者。切以域尊四大，先道

炁於鸞圖。班列千官，首神威於龍驛。既嚴修奉，盍罄懇祈。以今奉爲某人入意，曾瞻紫闕之崇，請降玄曹之峻。如綸如綍，諒下煥於碧虛。載旌載旄，幸來儀於玄墀。不遺款懇，曲副翹傾，法衆運誠，修齋奉請。

請神

玄都茭龍驛吏，玄都金龍驛吏，地府齋簡童子，火府齋簡童子，地道功曹，九龍符命使者，日直天丁。

三獻

散花

某上啓玄都驛吏，日直天丁，地道功曹，九龍使者。切以金籙上生，登春臺於六洞。玉符告下，依夏屋於九清。匪繇參贊之功，曷遂感通之願。今有某人入意，既齋明之肇興，將宸恩之誕布。欲望九龍駕景，流金電掣於黃垓。萬騎排空，火令風行於黑壘。夜扃肆闕，晨路宏開，壇有榜文，謹當宣讀。

宣榜

榜文宣示，真聽昭明，願款駐於游帷，

庸暫休於飛轡。地祇敕制，倘成度命之玄功。天官舉遷，當證登真之朱格。拳拳有請，切切無違，某不勝虔祝之至。

引至混元幕

某焚香供養混元十二炁化生大將軍，一行官吏。切以道包三洞，流慧日以崇機。班列九清，藹玄靈而贊化。既嚴修奉，盍罄懇祈。以今奉為某人入意，曾箋丹闕之崇，請降玄曹之重。雍雍紫綰，諒昭布於碧虛。濟濟白旄，恪從容於黃混。法衆運誠，修齋奉請。

請神

玉清六元運陽化陰大將軍，玉清七變混景大將軍，玉清八回九合大將軍，玉清九光會靈大將軍，玉清十回陰陽大將軍，玉清十一合度大將軍，玉清十二運化大將軍，玉清十三陽光大將軍，玉清十四運度大將軍，玉清十五成陰變陽大將軍，玉清十六三景混成大將軍，玉清十七陰陽合靈大將軍。

三獻

散花

某上啓混元十二炁化生大將軍，一行官

吏。切以虛無祖炁，施化化於無垠。妙有靈光，贊生生於有截。匪由參贊，曷遂感通。今有某慮陽耀之莫完，致陰氛之尚結。欲望五官六府，備萬炁以生成。九竅三關，羅百神而和合。經絡攝化，形體周圓，壇有榜文，請行宣讀。

宣榜

榜文宣示，真聽昭明，願綠幕之少稽，姑丹惟之暫駐。迴骸起死，策助期翊三靈。監真度生，遷賞不忘於九格。拳拳有請，切切無違，某不勝虔祝之至。

引至解結幕

某焚香供養靈寶玄局解結司仙靈官吏。切以齋嚴玄律，提黃混以敷仁。庭列清班，補紫宸而昭德。既嚴修奉，盍罄懇祈。以今奉為入意，曾請命於帝闈，乞效勤於神職。玉符播告，諒嚴雲騎以排空。瓊節飛浮，應莅星壇而駐景。恢弘偉業，式副真忱，法衆運誠，修齋奉請。

請神

靈寶解冤釋結靈官，五經博士，能談善

說靈官，九天解冤釋結大神，靈寶如意、萬司、解冤、釋結四大神。

三獻

散花

某上啓靈寶玄局解結司仙靈官吏。切以冤輪激運，嗟懷寘石於陽機。業網周張，遂陷淵冰於陰域。匪由解釋，曷遂和平。今有某慮執對之未清，遂攝提而普集。欲望軟言調伏，結千生歡喜之緣。異骨齊同，脫萬劫仇讎之累。形神自在，心識安寧，具有榜文，請行宣讀。

宣榜

榜文既示，真聽昭明，願委轡於前帷，伺承符於中陛。手提丹敕，倘開大黑以宣和。名陟玄班，當按女青而校賞。拳拳有請，切切無違，某不勝虔祝之至。

引至天醫幕

某焚香供養天醫六職尚藥靈官仙吏。切以帝嚴齋律，提艷澤以開光。神御靈曹，翊雲層而贊化。既嚴修奉，盍罄懇祈，以今奉為入意，曾叩帝闈之嚴，請降威曹之重。丹綸飛鳳，諒曉煥於九

霄。綠蓋玄龍，已夕臨於八陞。法衆運誠，修齋奉請。

### 請神

天醫尚藥靈官，主辨形候靈官，隨病製藥靈官，修合煅煉靈官，生形博士，復肌主者，治病功曹，收毒將軍，三五功曹，敷藥靈官，察藥論病靈官，請藥療病靈官，砭石小吏，扁鵲官吏，天醫仙吏，採藥童子。

### 三獻

### 散花

某上啓天醫六職尚藥靈官仙吏。切以病緣四大，凝戾烝於陽靈。證別三因，抱淫氛於陰翳。匪由參贊，曷遂感通。今有某慮心病之纏縈，致神觀之顛鬱。欲望玄芝丹液，運神聖功巧之奇。玉醴金津，敷圓散湯膏之妙。百關冰瑩，萬竅雲敷，壇有榜文，請行宣讀。

### 宣榜

榜文既示，真聽昭明，願投轄以迂留，勿指車而迅邁。仁周九地，尚成迴骸起死之榮。勳校三天，當輅遷格升班之盛。拳拳有請，切切無違，某不勝虔

祝之至。

### 引至監生幕

某焚香供養靈寶玄壇監生司仙靈官吏。切以道包三極，崇玄陛以承宣。班列九清，體紫樞而生化。既嚴修奉，盍罄懇祈。以今奉爲某人入意，希宣降於玄曹，曾預陳於帝闕。雍雍劍珮，諒承玉紵以來儀。濟濟旌旄，願駐朱帷而蒞事。法衆運誠，修齋奉請。

### 請神

九天監生大神，九天衛房聖母，九天定生大神，九天感化大神，九天定胎大神，九天易胎大神，九天助生君，九天順生君，九天速生君，九天全生君，六甲符吏，催生童子，保胎童子，速生童子，南昌分胎功曹，南昌主產功曹，南昌主死功曹，南昌起死功曹。

### 三獻

### 散花

某上啓靈寶玄壇監生司仙靈官吏。切以天精天粹，生前鑿混沌之玄。地魄地魂，死後抱溟濛之翳。匪由參贊，曷遂感通。今有某慮胎產之纏縈，覬神靈

之造就。金符變化，圓回黃坐草之功。瓊簡飛玄，符養素交梨之妙。精神鮮潔，步武輕清，壇有榜文，請行宣讀。

### 宣榜

榜文既示，真聽昭明，願曲駐於雲旌，姑暫留於丹幄。金房度命，尚提黑澤以朝元。玉格遷神，當陟玄班而贊化。拳拳有請，切切無違，某不勝虔祝之至。

### 引至沐浴幕

某焚香供養靈寶澣濯司仙靈官吏。切以齋功日赫，體大德於清都。神職星羅，樹弘功於玄局。既嚴修奉，盍罄懇祈。以今奉爲入意，芝苻煥寵，諒催夙駕之瓊輪。騫蓋飛靈，已響登車之玉珮。法衆運誠，修齋奉請。

### 請神

靈寶澣濯司靈官，玉清通真攝魔屏穢靈官，丹天九鳳破穢靈官，五方五帝解穢靈官，天河東井君，浣濯夫人，九天運穢神君，九天解穢神君，九天收穢神君，九天却穢神君，九天除穢神君，九天斷穢神君，九天滅穢神君，九天洗穢神君，九天蕩穢神君。

三獻

散花

某上啓靈寶澣濯司仙靈官吏。切以五龍東躍，凝覺海以澄清。九鳳南飛，瀾靈源而湛寂。匪繇參贊，曷遂感通。今有某慮陰氛之彌綸，假陽華之疏蕩。欲望靈光鬱勃，符芝室於三華。梵炁彌羅，化蘭池於八解。俾澄死炁，爲妙生神，壇有榜文，請行宣讀。

宣榜

榜文既示，真聽昭明，願頓轡以舒徐，姑駐帷而留宿。玄泉霞映，尚成偉績於黑單。朱表風馳，當陟玄班於紫禁。拳拳有請，切切無違，某不勝虔祝之至。

引至巾笥幕

某焚香供養靈寶巾笥司仙靈官吏。切以齋功按律，開犴室以輝華。神職宣符，佐虎關而赫奕。既嚴修奉，盍罄懇祈。以今奉爲入意，前驅簇仗，諒承丹綍於青冥。後從停驂，且駐綠帷於黃混。法衆運誠，修齋奉請。

請神

靈寶巾笥司靈官，青玄金木仙衣玉女，

金木仙帶玉女。

三獻

散花

某上啓靈寶巾笥司仙靈官吏。切以芒含二景，瞻鳳袂以離離。象映三光，煥霓裳而楚楚。匪由參贊，曷遂感通。今有某慮未潔於簪紳，莫竟瞻於黼辰。欲望金章變化，精神茂八素之冠。玉字靈通，容止儼六銖之服。嚴莊曳地，振肅朝天，壇有榜文，請行宣讀。

宣榜

榜文既示，真聽昭明，願委曲以停帷，式從容而控轡。職提北鬱，玄壇尚聽於宣勞。格峻南丹，朱表當祥於遷賞。拳拳有請，切切無違，某不勝虔祝之至。

引至鍊度幕

某焚香供養靈寶鍊度司仙靈官吏。切以齋崇黃籙，提九壘之陰氛。班列朱陵，贊二儀之陽化。既嚴修奉，盍罄丹衷。以今奉爲入意，既請降於靈曹，曾預陳於帝所。風清閭闔，諒頌玉勅以高奔。雲擁霄衢，疾舞瓊輪而下邁。俯矜凡悃，曲印真祈，法衆運誠，修齋

奉請。

請神

南宮度人不死尊神，南極長生大君，南宮度世司馬大神，好生韓君丈人，靈寶九煉真司官吏，靈寶鍊度仙曹官吏，朱陵火府火鍊大將軍，火鍊靈官，南昌上宮鍊度大將軍，鍊度靈官，南昌度命君，度魂化形君，太冥鍊屍君，十方猷威大神，丹靈大神，皓華大神，玄英大神，鍊度大神，變神大神，復相大神，正精大神，火府大神，返形大神，返魂大神，超生大神，丹天左右侍衛大將軍，水池火沼使者，鍊度司主鍊大將軍，主水主火大將軍，火鈴神將使者童子，火鈴靈童，九光童子，水池神將使者童子，黃華童子，流精玉女，青玄黃籙鍊魂官吏，火鍊童子，玉女，黃華蕩形治鍊玉女，鍊質明眸玉女，光容玉童子，瑩身玉女童子，清神玉女童子，發光玉女童子，水火交光大將軍，水火合形大將軍，水火聚炁大將軍，水火聚神大將軍，九天火府鍊亡真人，火鍊丹界真人，九天水官拔亡真人，水濟無邊真

人，本靖主將副將，護道監壇神吏，九天守雄抱雌八大神將，青玄專度溥度曲度司靈官。

三獻

散花

某上啓靈寶鍊度司仙靈官吏。切以南丹鍊魄，乘炎粹於房離。東井陶魂，拱玄英於昂坎。匪由參贊，曷遂感通。今有某欲望水上火下，映鬱儀結璘之輝。陽後陰先，煥陽燧方諸之彩。具嚴壇榜，請爲宣揚。

宣榜

榜文既示，真聽昭明，願停丹陛以遲留，爲入綠帷而曲駐。玄圖受事，尚成九鍊之功勳。朱表升班，當按五靈之品格。拳拳有請，切切無違。某不勝虔祝之至。

向來頌

靈寶領教濟度金書卷之五十七

靈寶領教濟度金書卷之五

十八

洞微高士開光救苦真人甯全真授  
靈寶通玄弘教水南先生林靈真編

科儀立成品

開度黃籙齋

散壇儀

燒香頌

各禮師存念如法

衛靈呪

東方

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束祿，討捕兇羣。奉承正道，赤書玉文。九天符命，攝龍驛傳。普天安鎮，我得飛仙。

南方

三炁丹天，煥景流光。熒星轉燭，洞照太陽。上有赤精，合契虛皇。開明童

子，號曰華芳。總御火兵，備守玉堂。斬邪束妖，剪截魔王。北帝所承，風火衝當。流鈴交煥，翊衛壇場。正炁流行，敢有猖狂。我享上功，坐運魁罡。億劫長存，保天無疆。

西方

七炁素天，太白流精。光耀金門，洞朗太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普衛萬生。元皇正炁，來合我身。功加一切，天地咸寧。

北方

北方玄天，元始徘徊。辰星轉燭，洞煥大微。黑靈尊神，號曰層威。統冠飛天，仙裾羽衣。備守五門，檢精捕非。敢有干試，豁落斬摧。玉符所告，神真八威。邪門閉塞，正道流輝。三光映照，我身無衰。策空駕浮，舉形仙飛。

中央

黃炁中央，調理乾坤。陶鎔陰陽，總統玄真。鎮星吐輝，流耀九星。開明童子，號曰天璘。陽炁燄上，朱煥炎精。

洞照內外，運我身形。百邪摧落，攝役鬼靈。中山神呪，普天使聞。五靈安鎮。身飛上清。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意，其諸情悃，具載狀文。願得太上十方至真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行無上黃籙大齋法事小兆臣某，與臨壇官衆等，今故燒香。願以是功德，上爲七世父母。天子王侯，土地官長，經師籍師度，及山林岩棲學真道士，同學之人，九親門族，天下人民，蜎飛蠹動，跂行喙息，一切衆生，皈身皈神皈命，無上靈寶自然至真大道。並丐原赦前生今世，生死宿罪重過，得免

離三惡之道，五苦八難九厄之中。臣等身得道真，飛行虛空，白日升天，侍衛道君，逍遙無上七寶自然宮殿，永與道合，所啓玄感，應聲上御至真無極道前。

禮十方 坐懺

臣法衆等，志心皈身皈神皈命，十方無極大道靈寶天尊，懺悔修齋。弟子及臣法衆等，自從曠劫以來，至于今日。或身業所犯，四肢舉措，動違戒律，不依經典。或心業所犯，志念不專，情浮意動，馳騁不息。或口業所犯，善惡反論，綺語飾非，華辭惑衆。因今懺悔，並乞蕩除。皆願臣等及齋主某，身入至仙，會道合真，神合真寂，洞入自然，性命合道，玄會無爲。志心稽首，禮謝無上至真三寶。

三啓

樂法以爲妻，愛經如珠玉。持戒制六情，念道遣所慾。淡泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其

願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮太上無極大道。

臣等志心稽首，禮三十六部尊經。

臣等志心稽首，禮

玄中大法師

重稱法位

具位奉行無上黃籙大齋法事小兆臣某，與臨壇官衆等，謹同誠上啓太上無極大道元始天尊，太上道君，太上老君，高上玉皇，無上玄老，十方已得道大聖衆，至真諸君丈人，三十六部尊經玄中大法師，天師君，上相上宰上保上傅，四司五帝，三界官屬，一切真靈。臣等聿生化日，獲際真風。八會龍翔，行未圓於修奉。九光鳳躍，勳莫契於操持，



徒切切以惜分，尚悠悠而進寸。塵籠混迹，驚心入谷之慚。烟岫馳神，勵志冲霄之喜。誤承帝渥，曲湛師恩，俾領教於靈虛，爰開幽於鬱絕。凡有投告，敢不上聞，具有青詞，謹當敷奏。

### 宣詞

按如詞旨，備切忱恂。仰惟三籙簡文，混有靈而佐命。九幽科品，會三極以皈誠。陽春騰寒谷之輝，膏雨發枯根之潤。仰瞻宸極，提舊爽以飛翔。俯軫幽泉，沛新釐而洞煥。爰肆陳於丹笈，庸鋪設於黃壇。龍壁投誠，鳳繒效款。鏘金鳴玉，珮環羅振鷺之班。舞翠流珠，旌葆降和鸞之御。自今月某日爲始，崇建無上黃籙大齋幾晝夜。爲亡故某，披流宿對，解除前愆。然法炬於迷途，徑超地禁。鼓慧舟於彼岸，穩步天衢。曲荷帝恩，俯從民欲。九朝禮罄，荷辟斥於魔靈。三日功圓，沐開張於聖運。天人同慶，幽顯相歡。死籍解除，詣南宮而煉炁。生名移注，朝北闕以登神。天人蒙開度之仁，動植被生成之澤，歡聲無量，喜氣難言。以今

香冷金爐，聲沉玉籟，齋功遐被，釐事告成。羽蓋飛霄，返清都之仙仗。霓旌翳景，回玄闕之琅輿。凝妙粹於空無，融真精於大混，寂無所寂，玄之又玄。恩惟太上三尊，十方衆聖，垂慈鑒映，省覽奏陳。其有建齋之初，上請三洞兵馬，六部仙真，護道辟非，承符宣德，侍經護法，通真命靈，十極神靈，諸司將吏，虛空鑒察，土地神祇，營衛齋盟，具嚴勞績。願遵玄格，爲遷賞而校勳。庶表丹忱，俾升班而進秩。臣等承顏玉陛，接武瑤班。昧西靈進退之儀，修持弗恪。背東華俯仰之格，存念莫專。慮五帝之書愆，恐四司之糾過。希垂恩露，曲道迅霆，俾永佐於玄功，庶上裨於道化。所有解壇謝罪言功黃素朱表一通，在臣洞案之上，請省表文。

### 宣表 遣表

#### 舉願念

一願乾坤明素，二願氣象清玄，三願聖君萬壽，四願化洽八埏，五願天垂甘露，六願地發祥烟，七願四時應候，八願萬物生全，九願家多孝悌，十願國富

才賢，十一願齋功廣被，十二願善瑞日臻。

### 存神燒香

香官使者，左右龍虎君，侍香諸靈官，當令臣建齋之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女侍衛，香烟傳臣向來所啓之誠，速達徑御太上無極大道至真玉皇上帝御前。

### 出堂頌 下壇

### 回師

靈寶領教濟度金書卷之五十八

### 靈寶領教濟度金書卷之五

#### 十九

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

開度黃籙齋

#### 九鍊返生儀

靜默堂序立

引至鍊度壇

表白開啓

焚解穢符

灑淨

金闕化身天尊

升座祝香

此香也，毓天地之生根，敷元始之妙化。玄合離坎，開慶雲於生門。妙契儀璘，塞祥烟於死戶。彌羅三極，鬱勃九霄，爇向鑪中，供養太上無極大道虛無自然元始上帝，虛皇玉晨大道君妙有上帝，萬變混沌玄元老君至真大帝，太乙救苦天尊，九幽拔罪天尊，轉輪聖

王天尊，法橋大度天尊，火鍊丹界天尊，金闕化身天尊，朱陵度命天尊，逍遙快樂天尊，寶華圓滿天尊，南極真王朱陵大帝，玉清神霄真王長生大帝，九微太真青童玉明大道君，紫微元靈青金丹黃大道君，九天生神上帝五靈五老上帝，大丹炎光鬱儀上真道君，黃華素曜結璘上真道君，南辰六闕上真道君，北極九府上真道君，主算紀名落死上生大魁真君，護魂、侍魄、養炁、通血中主真君，朱陵火府青玄黃籙左右真司，九天溥度院主宰高真，南天不死尊神，南極長生大君，度世司馬大神，好生韓君丈人，迴骸起死無量度人君，三洞四輔經籙法科諸省府院司仙靈聖衆，本靖祖、玄、真師列位真人，經、籍、度師列位真人，洞天福地治化靖廬三府領教仙官主執，城隍社令，三界官屬，一切真靈，仗此寶香，普同供養。臣聞赤明開圖，散八圓之祖炁。清微御運，宏三極之真光。慈雲耀而夜壑乘晨，湛露圓而寒庭啓旦。道包覆載，德被幽冥，凡屬範圍之中，孰出陶鎔之

外。伏念臣慶緣夙稟，昌運欣逢。走虎飛龍，偃月胤虛無之寶。含烏育兔，明霞騰恍惚之珠。妬離坎於黃房，轉乾坤於絳室。心期高蹈，迹尚卑棲，誓領教以度人，庶立功而補過。以今奉為某人，提魂北鬱，幸繇白簡之輝煌。鍊質南陵，宣藉黃華之精粹。庶消陰累，均復陽靈，敢和合於二儀，為奉行於九鍊。欲望帝師矜憫，仙聖鑒觀。綠輦丹輿，駐玄虛而絡繹。瓊輪羽蓋，御碧落以迴旋。察丹悃以勤渠，命玄曹之赫奕。特為亡故某人，破蕩酆獄，落滅惡根，焚罪籍而冤債不生，削刑書而愆尤無累。法橋建立，梵界開通。寶井玉精，為蕩除於穢濁。神庭金碧，俾鎔冶於氛葩。攝九炁以生神，煥五靈而復質。天衣映體，地禁升真，佩符券以超凌，受籙圖而容與。永無輪轉，徑登碧玉之墟。克遂逍遙，常預黍珠之會。副齋主懇祈之切，廣元尊開度之仁，臣無任瞻天，望聖祈恩，俟命之至。

平座讚

宣引魂誥

引旛詣壇前

謹召守雄抱雌大將，引領亡故某人，來詣壇前，伺候鍊度。

衆讚玄凝回真導魂章

玉清萬法大羅尊，千重寶範億玄言。  
碧霞絳雲引衆道，玉闕金閣敷真文。  
偃定高真遊至空，八極飛神度無邊。  
鬱鬱昭昭萬炁中，吐聲如嬰炁成紋。  
振動梵天是空道，靜明法曜擁慈雲。  
超簡昏衢北羅艷，列上金簡還靈明。  
炎炎火池成清涼，解刃挫鋒悉摧紛。  
豁散業境空法身，保召罪性來吾壇。  
天尊聖濟本無際，萬天萬地成真元。  
莫有不從不化度，超凌三界佐虛玄。  
隨心所召隨心歸，仙信梵音如甘泉。  
一聞百骸解熱惱，朱陵開度成至玄。  
超凡大道入慈悲，不濯巨細惟翩佺。  
華夏泠泠引汝魂，逍遙獨步紫虛天。  
某謹按靈寶玄科，遵依嗣師祕旨，奉行鍊度，敷闡至文，奉請無軼數衆之天尊，咸升法座。降下百千萬重之道氣，普遍靈壇。神化浮霞，明星寶宮去地七仞。凝九色慶雲以爲關鍵，忍辱寶

光以爲却敵，大靈真炁以爲寮孔，智慧寶光以爲城塹，玄元洞清以爲泉池，四信寶光以爲階道，六慧寶光以爲寶樹，戒珠寶光以爲花實，天化寶光以爲薦地，虛無自然之光以爲金殿瓊樓，太虛靈真寶光以爲朱臺玉闕，太真寶光以爲八鸞，虛皇寶光以爲九鳳，無量寶光以爲獅子，玉宸寶光以爲仙鶴，玄靈寶光以爲鐘磬，玄風寶光以爲仙樂，法蓋寶光以爲神燈，香雲寶光以爲華蓋，朱雀寶光以爲幢節，青龍寶光以爲命魔

之旛，萬炁寶光以爲驛吏之符，空洞寶光以爲蓮花之輿，高虛寶光以爲法橋，玄源寶光以爲東井華池，太陽寶光以爲朱陵火府，九符寶光以爲天厨，甘露寶光以爲良井，法輪寶光以爲空道化，空洞寶光以爲演靈文，神符寶光以爲攝死魔，陰生寶光以爲超枯骨。浮黎玉清元始至尊，自渺渺大羅之上，分布寶光，洞煥太空，開明三景，上極無上，下極無下，悉皆朗耀，玉女金童，靈官仙宰，億乘萬騎，浮空而來。接引亡故某人，乘此寶光，來臨道場，朝禮天真，祇受鍊度，

永離幽暗，克遂逍遙，稽首皈依，無極大道。

第一鍊

謹召守雄抱雌大將，引領亡故某人，詣太乙救苦天尊座前。

信禮無上大羅天太乙救苦天尊

玉清攝三素，流霞煥圓靈。龍旂飛華帶，九鳳振丹鈴。神風鼓騫樹，離羅映羽青。俯矜長夜爽，晨輝廓艷城。宿對散太漠，六天翼魔精。眇眇策華蓋，飛登紫微庭。

臣謹上啓太乙救苦天尊。切以東華長樂，陽光煥赫於玄虛。北都寒池，陰暗溟濛於黑壘。惟籍威神之力，庶開超度之方。重念亡故某人，業結宿生，識迷濁境，六賊剪鑿，歷重重金剛之山。五鬼分營，墮茫茫艷都之域，神光不照，真元自戕。伏望溥運慈悲，特施惠澤，降南上之炎火，焚北壤之冥關，破蕩重陰，削除穢累，斬故根，離昔憂，滅宿障，斷客塵，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 發關

宣符奏

本壇遵奉道旨，關白太乙救苦仙吏，救苦真人，救苦童子，青玄黃籙官吏仙靈，勅制地祇靈官，斷地逮役靈官，請啓真慈，隨我神運，特爲亡故某人，破蕩酆獄，掃釋幽陰。

太乙救苦天尊

宣牒

宣玉清破獄誥

玉清寶光，照耀重冥。神輝所燭，九曲鐵城。符章洞煥，赫奕連陰。刀化玉樹，劍變騫林。炎火生蓮，冰消雪崩。三途五苦，八難超凌。魔王陰官，稽首送迎。玉清元命，一如奉行。

宣青玄破獄誥

東府上官，金霞萬重。日赫千光，雲炁鬱叢。中有玄黃，號曰上公。授以真文，宰治幽酆。統攝速召，疾見急通。破身中獄，領魂發沖。使皆生尸，鍊度南宮，玄元之命，不得隱容。

宣六天策文誥

元始符命，制魔奉行。保舉亡魂，度品

南宮。酆都落燼，三官解刑。赦縛閉業，受化更生。隨品受鍊，上登福庭。

宣勅制地祇誥

宣第一寶誥 關發

亡故某人，穢累既消，罪根悉散。三關通暢，凝正炁以周流。百體和平，融神光而洞徹。迴視曩時之陰暗，何傷今日之精熒。一真昭融，萬緣披散，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚詠洞章。

吟功德金色光讚

功德金色光，輝輝開閻幽。華池流真香，蓮蓋隨雲浮。千靈沖元和，常居十二樓。急宣靈寶旨，自在天堂遊。

徑離惡趣天尊

第二鍊

謹召守雄抱雌大將，引領亡故某人，詣九幽拔罪天尊座前。

信禮無上大羅天九幽拔罪天尊

碧落輝九華，流精回蒼林。神光藹赤圖，萬變凝雲岑。靈烟揚鳳葆，翠蓋擁神禽。策景始青畿，下觀六合浮。提

携寒夜爽，丘壑散重陰。振衣朝太上，五苦蕩昏襟。

臣謹上啓九幽拔罪天尊。切以明徹三天，超度契朱陵之格。昏沉九地，冤愆書黑鬱之名。全仗提携，庶期濟度。重念亡故某人，根塵結習，業識縈紆。陽罪陰愆，尚紛紜於考吏。新冤舊對，猶紀錄於冥曹。萬劫未原，一身莫度。欲望洪慈曲運，惠澤宏施，運真火以赫奕陰鄉，召神吏以焚化文簿，千愆冰釋，萬罪春和，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 關發

宣符奏

本壇恭奉道旨，關白九幽拔罪仙吏，疾除罪簿靈官，落滅惡根靈官，靈寶取索罪籍追攝葉大將，請啓真慈，隨我神運，特爲亡故某人，燒焚罪籍，解釋冤愆。

九幽拔罪天尊

宣牒

宣焚罪籍符

大明靈神，化度鬱精。明霞藏輝，灌鍊身形。玄駕六合，七神調平。結節解散，胎根肅清。罪籍焚燼，靈光洞明。

宣解冤結三誥

靈光普被，異骨成親。赤書玉字，煥落三晨。解冤釋結，分別孽緣。執對消化，出離寒庭。罪根消除，大道光明。

宣普告三界

宣元始符命 關發

宣第二寶誥

亡故某人，罪籍既焚，宿冤已釋。逍遙無礙，與萬物而周流。放曠自娛，蕩一塵而不染。塵世之邪門既塞，太虛之正路斯通，五炁敷羅，百神靈徹，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚詠洞章。

吟人天多障難讚

人天多障累，大道實矜憐。救度垂科教，咸令懺罪緣。愆辜遍地府，孽結已聞天。發露祈真祐，冥心感聖賢。虔恭禮三寶，願得早生天。焚詞歸上界，奏名玉帝前。

罪消黑簿天尊

第三鍊

謹召守雄抱雌大將，引領亡故某人，詣轉輪聖王天尊座前。

信禮無上大羅天轉輪聖王天尊

紫精回妙炁，耀羅藹靈輝。雲璈激天籟，金門映三微。鬱勃羽蓋煥，十絕舞泠漪。流鈴徵萬魔，金真衛瓊輜。丹華燭三界，俯策鬱絕都。惡根一披散。逍遙觀太無。

臣謹上啓轉輪聖王天尊。切以天尊浩蕩，實千生萬劫之依憑。地魄顛冥，有十習六因之纏縛。欲祈超脫，全賴陶鎔。重念亡故某人，流浪塵緣，輪迴世網，三業六根之惡，久繫行藏，三途五苦之門，莫能飛度。伏冀玄恩洞煥，洪澤周流，舒慧光以照破業根，放威神而屏除尸累，惡塵自散，罪障隨清，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 關發

宣符奏

本壇恭奉道旨，關白轉輪聖王仙吏，斬絕地根靈官，名列太玄靈官，請啓真慈，隨我神運，特爲亡故某人，斬絕業根，斷除尸累。

轉輪聖王天尊

宣牒

宣三業誥

元始神化，太玄肇靈。陰陽布運，受品生形。有身有累，業垢自縈。鍊胎返初，結節黃青。玉符所布，混炁交并。

宣六根誥

元始混羅，鬱景凝真。布化分質，罪根附身。永沈北都，尸穢沈零。太上慈悲，曲放光明。回嬰結秀，與道合并。

宣三途誥

大洞玉門，三十九登。彭仇交賊，惡根月增。元始符命，急斬絕生。三途罷對，上登宸京。神升紫闕，魂離寒庭。

宣五苦誥

玉符解罪，神脫冥波。蕩除業障，斬割惡根。幽司罷對，寒庭停刑。幽離北府，神得受生。快樂無爲，逍遙太清。

宣歷關諸天誥 關發

宣第三寶誥

亡故某人，三業既淨，六根已清，永度三途，超凌五累。性天昭徹，悟多生積覺之非。心地融和，識大道指歸之路。便可脫離生死，從茲還返真元，入衆妙門，登解脫境，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚詠洞章。

吟超度三界難頌

超度三界難，地獄五苦解。悉歸太上經，靜念稽首禮。

頓超有漏天尊

第四鍊

謹召守雄抱雌大將，引領亡故某人，詣法橋大度天尊座前。

信禮無上大羅天法橋大度天尊

綠霞藹空碧，紅映煥紫烟。八遐舞迴風，神魔徵太玄。流光翼吉光，啓途遊芳騫。冀轅開五戶，回靈殘胞根。白簡定仙錄，飛步天河津。返魂策空境，黃華齊萬仙。

臣謹上啓法橋大度天尊。切以釋冤消咎，已還祖炁之靈光。度命登真，須仗

飛梁之穩步。悉依洪造，爰露丹忱。重念亡故某人，命挺宿基，生逢道化。多生纏縛，雖超地禁以回靈。此日騰凌，曷造天關而御景。伏冀廓施妙力，宏運靈通，爲建升天之法橋，庸闢凌空之徑路，伺膺鍊度，即獲超升，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表

關發

宣符奏

本壇恭奉道旨，關白法橋大度仙吏，名度南宮靈官，度品南宮靈官，請啓真慈，隨我神運，特爲亡故某人，變化法橋，度神上昇。

法橋大度天尊

宣牒

宣建橋誥

天尊智慧，大道玄功。九光陽炁，變化曲虹。長虹千丈，金玉萬重。下入開光，上登朱宮。法橋開濟，溥度無窮。肅嚴形儀，平步登空。凝神守一，享福無終。

宣第四寶誥

亡故某人，萬緣蕩寂，諸惡消除。穩上法橋，鍊形神於流火。超登道岸，陞步武於虛無。駕景高躋，無有障礙。此皆元始慈悲之大造，實由天尊開度之深恩。所宜辭首肅恭，凝神叩謝，更憑法衆，讚詠洞章。

吟故設大法橋讚

道以齋爲先，勤行登金闕。故設大法橋，普度諸人物。宿世恩德報，道心超然發。身飛昇玄都，七祖咸解脫。

時刻昇遷天尊

第五鍊

謹召守雄抱雌大將，引領亡故某人，詣火鍊丹界天尊座前。

信禮無上大羅天火鍊丹界天尊

洞景煥鬱羅，瓊條振翠騫。紫雲結華蓋，朱日映流烟。八威嘯神虎，玄龍翼飛天。披朗無極鄉，遊爽騰雲仙。炎光濯流火，形神煉自然。超幽覲元始，遊宴萬春年。

臣謹上啓火鍊丹界天尊。伏以流火南昌，丹天著鍊形之格。黃華東井，靈池

垂濯質之儀。欲藉陶鎔，敢祈拯濟。重念亡故某人，根塵結習，宿垢縈纏。浴德澡身，賴陰精之蕩滌。陶魂鑄魄，藉陽粹之胚暉。庶沐慈光，克離幽暗。伏望虎龍吟嘯，舒二炁之精華。離坎降升，運兩儀之英妙。鍊除積穢，克證仙鄉，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 關發

宣符奏

宣召鍊度官將

本壇恭奉道旨，關白火鍊丹界仙吏，度上南宮靈官，受鍊更生靈官，朱陵火府火鍊大將軍，火鍊靈官，南昌上官鍊度大將軍，鍊度靈官，南宮度命君，度魂化形君，太冥鍊屍君，十方猷威大神，丹靈大神，皓華大神，玄英大神，鍊度大神，變神大神，復相大神，正精大神，火府大神，返形大神，返魂大神，超生大神，鍊度司主鍊大將軍，主水大將軍，主火大將軍，火池神將，使者童子，火鈴靈童，九光童子，水沼神將，使者

童子，黃華玉女，石景水母，流精玉女，青玄黃籙鍊魂官吏，火鍊童子，火鍊玉女，黃華蕩形玉女，黃華冶鍊玉女，黃華鍊質玉女，黃華明眸玉女，光容玉女，光容童子，瑩身玉女，瑩身童子，清神玉女，清神童子，發光玉女，發光童子，水火交光大將軍，水火合形大將軍，水火聚炁大將軍，水火聚神大將軍，金木鍊形玉女，金木合炁玉女，九天普度院火府度亡真人，水宮拔亡真人，火鍊丹界真人，水濟無邊真人，水火交鍊真人，鍊度合屬官吏。請啓真慈，隨我神運，變化水火二池，特爲亡故某人，鍊除宿垢，洗蕩業塵。

火鍊丹界天尊

衆誦華蓋玄藹真凝炁章

幽微藥宮爲仙宅，道貫樞靈圓景白。飛根散葉翳翠條，妙炁三華貫幽徹。鬱靈杳淑真人墟，雲景眸奔通烜赫。泥丸三五合靈芝，結珠固精神炁活。飛烟妙靄却殘兇，鍊獲飛仙去否厄。太玄太和在右府，紫清真人道爲主。中虛恬淡自怡然，返老還胎導玄圃。

知雄守雌資天機，回反乾坤鎮中土。飛玄神炁合青玄，含藥吐芳明子午。鍊養靈根不復枯，萬靈朝會群陰睹。琅音玉霜灌死骸，徘徊沈默須周普。擒龍捉虎坐鸞臺，隱韻流音邀妙府。黃華朱醴耀陽精，萬道炁爲群仙度。

宣主水大將軍符

陰精運化，神津灌玄，黃華東井，攝靈聚仙。玉清誥命，萬神昭宣。鸞輪下降，流灑雲泉。遊爽受鍊，返魂更生。

宣建水池符

金醴玉津，森羅淨霑。玉龍灌溉，水池映真。滌垢豁塵，萬炁齊新。大道宣化，壬癸流形。陰光浩湛，飛鍊魂形。

宣月魄符

黃精啓輝，元音內章。映觀太玄，開洞萬方。散蔚寒飈，七晨玄朗。圓明遊耀，浮華九空。五帝夫人，躡雲挹風。流霞八素，返形易容。注炁東井，天河灌芒。幽靈受化，神景敷張。

宣降真水符

太玄含化，八景齊並。五老祕諱，太陰通明。璇璣運轉，招真致靈。陰光降

炁，變鍊鬼魂。天漿下注，流燭利貞。

宣真水合同符

石景水母，圓光耀華。金門降醴，天人揚歌。長庚吐輝，玉龍負河。流英降炁，玉律同符。鍊度生仙，乘景太元，靈池無鏡，陰精飛羅。

黃華蕩形天尊

衆誦妙英飛爽集玄炁章

道貫青玄集素瑞，靈寶飛真瓊妙炁。生魂育魄近金容，五臟生華凝景翠。三田飛鬱映華峰，寶曜玄黃端拱會。提携日月運璇璣，九炁發春揚拆地。含和吐藥耀金蓮，驪龍吐珠呈彩翅。鸞鳴鳳翔對上賓，虎嘯虛巖華曲麗。洞觀三界百關明，六緯七經齊天地。飛靈煥景擲炎靈，東井天河灌幽涓。九龍奔躍騫寶園，圓景燦煒總翹轡。飛霞採集咀玉根，元景胎仙生萬彙。千灾却消摧兇殘，幽室光明何所繫。紫華混合青玄宮，電掣雷奔絳霞闕。雲臺碧落黍米珠，導達光玄煥二炁。注念左府悟玄璣，反覆陰陽成上位。

宣主火大將軍符

閻浮玉誥，洞妙自然。炎熾丹天，晃朗朱陵。玉清誥命，萬神敬聽。降司離化，配合日星。幽微鍊化，飛騰玉京。

宣建火池符

南方陽靈，凡精大神。降炁變易，流火神庭。炎輝瑩徹，赫曦精熒。亡魂鍊質，迴骸返嬰。金光照耀，上宴玉清。

宣日魂符

赤鑪丹景，圓華九明。太輝啓晨，煥耀朱精。五帝肇霞，洞映萬生。金烏楊彩，散光九靈。扶桑駕燧，絳雲敷平。紫霞鬱映，珠貫飛星。流注真炁，丕朗南陵。爽幽灌景，碧落高澄。

宣降真火符

丹精南映，九鳳乘陽。丙丁委炁，乾坤施張。鬱儀降化，左楫同梁。樞機周密，擲火飛揚。冶鍊離貞，更生福鄉。

宣真火合同符

朱明上景，熒星騰輝。太陽洞耀，離光赫熿。中有赤帝，凝靈太微。神真散炁，妙契天機。返生起死，玉眸仙飛。朱陵度命，萬炁敷施。

玉眸鍊質天尊

宣引魂入鍊誥

謹召守雄抱雌大將，引領亡故某人，隨我神運入此水池，變鍊形魂，滌除陰穢。

引旛至水池

宣水鍊符

北方黑帝，騰光紫微。壬癸正炁，玄武凝輝。鍊形滄垢，肅肅神儀。惡根化消，結節清夷。混合升度，逍遙陽扉。

宣月華府

黃炁陰華，玄精固仙。輝光洞照，散耀八圓。石景玉女，降靈鍊魂。九孔澄湛，萬竅節宣。洗濯宿垢，飛躡天根。

宣月簡符

玉胎鍊仙，結璘飛英。圓光散輝，變鍊幽靈。九幽齊化，流芳耀形。內外瑩徹，飛觀紫庭。尸累清蕩，天靈節榮。

宣真水鍊形符

陰精凝化，東井靈源。天河灌沐，清水度魂。飛英圓華，陶沐囂塵。宮室鮮潔，臟腑還靈。胞胎結節，離合自然。金童玉女，流香濯津。蘭池鍊浴，身登玉宸。遊觀太空，億劫無傾。



宣黃華蕩形符

東井黃華，石景玉清。飛玄水母，金醴玉津。滔滔源源，不竭池亭。九龍吐灌，三光流精。仙人吐潤，鍊度幽靈。內外明徹，表裏洞清。百關九竅，元炁滋榮。經絡臟腑，萬神自然。胞胎結節，隨水開肩。死炁斷絕，惡根沉零。我今鍊化，死骸生魂。返形易貌，玉體金容。變化鍊度，飛升紫庭。

宣太玄陰生符

先天自然，凝華會靈。陰零陽消，奔飛萬神。壬癸祖炁，生魂育嬰。神合炁合，鍊景還形。躡雲嘯朗，結璘齊并。遊行玉女，天地無傾。

宣水鍊變仙符

長生大君，鍊形還真。白元取魄，無英拘魂。太乙總御，司命保生。桃康合延。變化九陰。制鍊元精，玉醴金英。七世尸穢，嚴潔芳馨。甲乙丙丁，壬癸庚辛。戊己冲和，造化發榮。乾旋坤運，八表圓晨。

清水度魂天尊

謹召守雄抱雌大將，引領亡故某人，隨

我神運，入此火池，變鍊形魂，反復陽靈。

引藩至火池

宣火鍊符

南方炎帝，凝精太微。丙丁正炁，朱雀騰輝。丹鳳流響，朱烟散輝。融英降炁，冶鍊陰儀。流汨之池，丹靈耀離。

宣日精符

炎精凝玄，絳光流鮮。九龍策駕，擲火揚前。朱明散輝，陶冶胚暉。陶靈鍊翳，胎根潛燭。身飛玉都，永周劫年。

宣日簡符

鬱儀朗照，六合洞明。攝幽開光，流華飛英。紫赤鸞象，丹霞鍊形。九葉冤障，陶鎔無生。陽神聚景，受書朱陵。

宣真火鍊形符

炎神散精，八冥流光。圓靈正炁，符合天陽。注英丹池，鍊冶玄黃。幽爽飛化，百骸乘芳。玄祖易質，太虛飛翔。六府返炁，三宮運芒。群陰振伏，尸根滅張。熒星轉燭，出入福鄉。

宣玉眸鍊質符

流火鍊質，玉嬰返形。九陽施化，五神

合靈。南離正炁，上貫朱陵。左命飛火，右嘯炎精。南閻洞浮，太微神庭。飛英聚炁，攝陰返生。真火陶鍊，形神肅清。罪翳消滅，冤債和平。經絡臟腑，元陽敷榮。魂魄關節，一時回靈。改除故貌，萬竅光明。永離冥鄉，乘化霄征。壽均天地，億劫無傾。

宣太玄陽生符

太陰鍊形，太陽回靈。幽尸沉翳，受陽之精。元炁重敷，攝歸萬神。百骸復故，五臟錄真。榮衛鮮暢，魂魄還明。周旋生門，高奔帝庭。

宣火鍊變仙符

務猷運化，鍊質成神。皮膚毛髮，肝神舍明。耳目鼻口，心神守靈。筋骨牙齒，肺神虛成。孔竅精液，腎神育嬰。內外榮衛，脾神魂停。十干羅絡，陰極陽生。洞陽火鍊，玉胞金精。得為真人，躡景神庭。

丹火度魂天尊

謹召守雄抱雌大將，引領亡故某人，隨我神運水火交鍊，仙化成人，生魂育魄。

引旛立二池中間

宣水火交鍊誥

坎升離降，虎走龍奔。天一地二，子午胎仙。南樞北機，烏兔遶旛。黃華逆飛，炎光下傳。周迴九六，普鍊無邊。太極真炁，運合乾坤。九轉神化，飛升自然。

宣金液鍊形符

金液鍊形，與道合真。開明三景，是爲天根。無幽無極，無始無終。元皇九醜，靈魔絳宮。紫雲飛天，身乘六龍。水上火下，流入三宮。神歸陽明，大道自通。

宣迴屍起死符

靈芝無根，衆化之原。中凝七魄，上結三魂。二十四真，出入無門。杳冥之內，恍惚之中。隨劫存亡，逐炁而生。外凝混朴，內養七經。五神植華，三台敷榮。紫闕素童，返形皈英。騰雲而升，騁霧浮空。中有玉真，號曰神公。左挾無英，右衛白元。玄獸遏後，丹禽導前。上浮翠蓋，下擁金蓮。香炁凝空，甘露無窮。食之無盡，尋源不終。

宣百神混合符

千和萬合，自然成真。真中有神，長生大君。無英公子，白元尊神。太一司命，桃康合延。執符把籙，保命生根。上遊上清，出入華房。八冥之內，細微之中。下鎮人身，泥丸絳宮。中理五炁，混合百神。十轉迴靈，萬炁齊仙。仙道貴生，無量度人。上開八門，飛天法輪。罪福禁戒，宿命因緣。普受開度，死魂生身。身得受生，上聞諸天。諸天之上，各有生門。

宣第五寶誥 換紅旛

亡故某人，濯神東渭，鍊質南陵。水火合真，五臟之神華瑩徹。陰陽交媾，三田之正氣豐盈。身生寶月之光，體合飛玄之景。飛行自在，仙化成人，逍遙無爲，超凡入聖，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚詠洞章。  
吟蕭然神靜默讚  
樂法以爲妻，愛經和珠玉。持戒制六情，念道遺所欲。淡泊正氣停，蕭然神靜默。天魔並敬護，世世享大福。

水火鍊形天尊

第六鍊

謹召守雄抱雌大將，引領亡故某人，詣金闕化身天尊座前。  
寶林聳劫刃，九龍嘯玄雲。華精耀朱日，綠羅迅丹輪。靈童披虎袂，玉女携霞裙。扣瓊揚八素，命靈起生門。神光煥九幽，結滯一時蠲。餐華映羽衣，稽首虛皇前。

臣謹上啓金闕化身天尊。切以鍊形濯質，已資二景之陶鎔。降炁成身，允協百神之化育。庶憑慈造，俯遂私祈。重念亡故某人，幸出陰關，獲升陽境。胞胎結節，或本始之有離。精炁命神，慮真元之猶失。伏冀廣施神運，妙斡化樞，召大洞內外之官君，役神霄雌雄之將吏，爲鎮生於百體，庸和合於千真，一如度人無量之章，密契靈寶嗣師之旨。衆真監度，受煉更生，玄壇表文，謹當宣奏。

宣表 關發

宣符奏

本壇恭奉道旨，關白金闕化身仙吏，仙

化成人靈官，大洞生身內神，請啓真慈，隨我神運，持爲亡故某人，化生百體，羅絡成人。

#### 金闕化身天尊

#### 宣牒

#### 宣化腦符誥

百骸所聚，上尊泥丸。金樓玉室，九宮相聯。神化灌潤，華蓋凝鮮。真人鍊炁，疾成腦根。

#### 宣化目符誥

左右二精，上照洞房。遠近咸睹，六合高窗。下通腎根，光耀無疆。鍊炁成目，元神允藏。

#### 宣化舌符誥

玉池保命，中通丹元。朱雀重樓，復道源源。太和內景，生根化仙。真人鍊炁，疾成舌根。

#### 宣化心符誥

絳宮明堂，神室自居。朱府赤帝，百體受書。充盈關節，統御玉都。真人鍊炁，心成帝廬。

#### 宣化肝符誥

蘭臺公子，理化少陽。旁接膽津，志固

神康。太虛攝聚，回度天常。疾成肝腑，炁鍊真光。

#### 宣化脾符誥

脾掩太倉，厥字黃庭。光照官府，偃月相迎。水上火下，二炁交凝。真人鍊炁，中州疾成。

#### 宣化肺符誥

兌金化景，白虎垂精。上覆玉室，表裏肅清。重樓相串，紫格朱經。真神鍊炁，成肺周盈。

#### 宣化腎符誥

命門左例，右貫膀胱。二十四關，兩腎俠旁。呼吸元和，含停真陽。元神鍊炁，疾成腎堂。

#### 宣化陰符誥

帝君命靈，挺生伯強。卷舒元炁，應化太陽。一身之主，千齡無疆。急速成陰，真人混黃。

#### 宣化胞符誥

先天運明，體包中黃。回青轉赤，含靈混芒。流注經絡，百體攸藏。鍊炁成胞，內外發光。

#### 宣化胎符誥

元父玄母，飛陽化陰。聲具神備，十月周臨。生炁永固，百關澄清。鍊炁成胎，回轉天經。

#### 宣化結符誥

三十九戶，經絡固營。生門死戶，披散和平。宿根長新，天地無傾。真神鍊炁，內景結成。

#### 宣化節符誥

金關玉鑰，榮俞密通。筋骸所接，榮衛流攻。九竅六腑，生意榮豐。真人實鍊，成節重重。

#### 宣化血符誥

陰精固津，陽華流丹。灌注百體，流通自然。宗主絳室，蔭葆天根。真人鍊炁，成血澄淵。

#### 宣化精符誥

五宮六府，九骸百關。元炁流灌，內外和安。丹田護密，萬痾不干。真神成精，疾速反還。

#### 宣化炁符誥

元炁盈周，紫戶生仙。光景鬱勃，昭運先天。萬竅遍布，節結相宣。真人成炁，疾鍊綿綿。

宣化神誥

三田八景，主御所宗。太乙司命，執法居中。百神聽令，靡敢不從。急速成神，鍊炁豐隆。

宣化命結

元炁元神，和合成形。帝君品命，招真致靈。生根永固，快樂回嬰。命神鍊化，金質千齡。

宣第六寶誥

亡故某人，祖炁流行，靈功恢廓。黃房紫戶，既和合以成人。玉室金樓，自克周而盈體。合飛玄之內景，鎮空洞之生形。一炁所充，萬神具足，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚詠洞章。

吟身飛升仙都讚

道以齋爲先，勤行登金闕。故設大法橋，普度諸人物。宿世恩德報，道心超然發。身飛升仙都，七祖咸解脫。

回靈養素天尊

第七鍊

謹召守雄抱雌大將引領亡故某人詣朱

陵度命天尊座前

信禮無上大羅天朱陵度命天尊

飛蓋舞靈烟，控轡汎明風。左回羽玄臺，右迅萬嶺峰。雲營策飛鳳，徘徊翼飛龍。哀哉鬱單爽，萬炁分幽宮。延昌混萬神，羅絡儀璘宗。宴景綠羅上，億劫保無終。

臣謹上啓朱陵度命天尊。切以百神周備，藉鍊化於虛無。九炁纏綿，賴生成於霄極。式依帝力，庶慰民情。重念亡故某人，魂鍊陰陽，神生宮室。胞胎臟腑，恐真炁之未充。魂魄景神，慮靈光之莫備。伏望仁慈普濟，惠澤周流，啓九霄生神之帝真，降九天自然之正炁，爲纏繞其內外，俾經絡以生神，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 關發

宣符奏

本壇恭奉道旨，關白朱陵度命仙吏，名列太玄靈官，身得受生靈官，請啓真慈，隨我神運，特爲亡故某人，降炁生

神，具足形體。

朱陵度命天尊

宣牒

宣鬱單無量天誥

混合空洞炁，飛爽浮幽寥。延康無期劫，渺渺離本條。苦魂沉九夜，乘晨希陽翹。大有通玄戶，鬱單降晨霄。黃雲凝靈府，陰陽炁象交。胞元結長命，惡根應化消。桃康合精延，二帝秀玉飄。灌溉胞命門，精鍊神不凋。九天命靈章，生神神自超。元君遏死戶，司馬誦洞謠。一唱萬真和，九徧諸天朝。稽首恭劫年，慶此榮舊苗。

宣第七寶誥

亡故某人，神與炁凝，炁與神會，百關備體，五臟回元。萬合千和，契自然成真之妙。七成五混，昭回靈齊仙之玄。反胎更生，超神躡景，此皆元始慈悲之大造，實由天尊開度之深仁，所宜稽首肅恭，凝神叩謝，更憑法衆，讚詠洞章。

吟高真無染着讚

絳節徘徊引，天花散漫飛。高真無染着，片片不沾衣。

九天生神天尊

第八鍊

謹召守雄抱雌大將，引領亡故某人，詣  
逍遙快樂天尊座前。

信禮無上大羅天逍遙快樂天尊

朱瓊映華房，流香扇奇葩。雲旗耀紫  
蓋，天風激騶牙。神哉紫霞布，八景御  
晨華。洞觀六合妙，游魂何紛多。陽  
綱舞周輪，蕭然出洪波。金光耀北單，  
提携相歡歌。

臣謹上啓逍遙快樂天尊。切以化生九  
體，恩光允賴於九天。灌沐五靈，惠澤  
尤資於五老。惟依陶冶，方遂升遷。  
重念亡故某人，萬竅已圓，五臟猶弱。  
賴五方英華之灌溉，靈液朝元。庶五  
神變化之靈通，真津蕩質。伏望廣垂  
巨澤，普放慈光。錫降真精，護神靈而  
無失。周流玉液，澄體質以生光。一  
如度人無量之章，密契靈寶嗣師之旨。  
衆真監度，受鍊更生，玄壇表文，謹當  
宣奏。

宣表 關發

宣符奏

本壇恭奉道旨，關白逍遙快樂仙吏，生  
身受鍊靈官，萬神無越靈官，五方五靈  
玉童玉女，五帝真人，五帝直符，請啓  
真慈，隨我神運，特爲亡故某人，攝降真  
液，灌溉神靈。

逍遙快樂天尊

宣牒

宣青帝遣

東望重拜手，蒼帝玉皇君。靈風鼓橐  
籥，育物布元春。雲龍轡嚴駕，玉衛擁  
瓊輪。枯萌汎沾及，大惠無不均。萬  
仙歌以道，委曲戒天人。心根迷自固，  
拱謁戴洪仁。

宣赤帝遣

大景開玉樞，洞堂啓金除。騫林蔭瑤  
砌，丹鸞蹈瓊珠。寶房名曲麗，明堂神  
所居。飛遊豁雲道，引目盼真都。天  
日永不夕，重烟鎖清廬。太上勅印開，  
帕几羅簡書。裊風樹玄化，殷勤諒有  
餘。

宣黃帝遣

萬天拱中宸，控駕玉化根。翹機貫億  
曆，洞朗闢四門。大有混皇真，糾制星

宿魂。非帝道不運，有方賴之存。威  
忿即霜凜，和煦爲陽春。生成握元紀，  
仰荷戴無垠。

宣白帝遣

六甲抱金關，七政守靈壇。流鈴擲火  
化，威劍巨龍蟠。邈彼素靈真，明憲孰  
敢干。束制祆鬼魔，凜落霄風寒。沴  
炁既已息，萬天俄而安。真儔荷天庇，  
抵賴相歌歡。

宣黑帝遣

無質統有物，淵兮上帝心。不啓不發  
道，蘊妙化機深。恐爾漏未盡，陰想勿  
侵淫。輪轉無涯波，苦道相迷尋。萬  
年嘗謹約，一旦自湮沉。無沖落鬼境，  
殃遣不可任。

五靈升舉天尊

謹召本壇主副大將，時直功曹，上詣南  
天門下，請降巾笥靈官玉女，青玄黃籙  
府仙衣玉女，仙帶玉女，上承元始玉字  
真文，神化六銖妙衣，給付亡故某人，嚴  
新冠帶，超度往生。

宣披衣誥

神童侍衣，玉女散花。登拜瑤壇，錦耀

珍琅。度爾靈魂，急急長存。隨劫輪轉，與天齊年。

宣頂冠誥

雲層碧玄，珠嶽瑤京。冠髻召仙，萬炁攝真。神華發光，上升帝庭。

宣天皇象誥

妙哉至道，五靈真機。上開龍漢，神仙空飛。煥爛三景，身披羽衣。寶雲玉字，遍列天威。精思招真，五府生輝。九光玉輿，登入紫微。

宣第八寶誥 換青旛

亡故某人，萬炁齊仙，百神具體，真精流暢，靈液敷羅，五臟榮華，三田昭朗，神輝充映。寶曜騰真，行上清都，永生淨域，此皆元始慈悲之大造，實由天尊開度之深恩。所宜稽首肅恭，凝神叩謝，更憑法衆，讚咏洞章。

吟五靈度符籍讚

學仙絕華念，念念相因積。去來亂我神，神躁靡不歷。滅念停虛閑，蕭蕭入空寂。請經若饑渴，持志如金石。保子飛仙路，五靈度符籍。

全形升度天尊

第九鍊

謹召守雄抱雌大將，引領亡故某人，詣寶華圓滿天尊座前。

信禮無上大羅天寶華圓滿天尊

明華耀蓉蓋，靈風披翠騫。神龍戲芳沼，鴻鳳宴瓊田。奕奕天寶光，回映萬春年。下觀無極鄉，枯骸倏發烟。鍊神靈萬炁，騰景雲層端。召運促輪會，欣樂傲朱軒。

臣謹上啓寶華圓滿天尊。切以善果羅敷，天雨寶華而鑒映。神功赫奕，帝垂惠澤以提携。終始生成，頂踵感戴。重念亡故某人，皈依至道，請命玄穹，鍊質生神，已藉慈光之浩蕩。登輿駕景，須憑大德之幟幪。伏願密運洪恩，廓施妙化，揮幢鼓節，飛天衛真，後從前驅，流鈴呵護，徑陟朱陵之界，永登長樂之天，一如度人無量之章，密契靈寶嗣師之旨。衆真監度，受鍊更生，玄壇表文，謹當宣奏。

宣表 關發

宣符奏

本壇恭奉道旨，關白寶華圓滿仙吏，道

遙上清靈官，超凌三界靈官，十方飛天神王，至真大神，三界大魔，玄都驛吏，無鞅數衆，請啓真慈，隨我神運，引導亡故某人，受符傳籙，上升玉都。

寶華圓滿天尊

宣牒

宣救苦簡 宣長生簡

宣大九龍誥 宣九龍誥

宣生天籙 宣運明誥

宣超生誥 宣監生誥

宣托生誥 宣移籍誥

宣溥度券 宣仙魂券

宣命魔前驅符

臣謹上啓天地水三官帝君。以今奉爲亡故某人，宣行九鍊，仰荷道力，克獲圓成。今按靈寶度人之道，度魂生天，全藉聖慈，密垂鑒映。臣不勝虔祝之至。

一 嚶天官度爾魂，飛天神王下觀爾身，書其功勤，上奏諸天。

二 嚶地官度爾魂，勅制地祇侍衛送迎，拔出地戶，度品南宮。

三 嚶水官度爾魂，諸天上帝記爾之名，萬神侍衛，右別至人，克得爲聖

君金闕之臣。

### 升神金闕天尊

臣謹上啓靈寶五師真君。以今奉爲亡故某人，宣行九鍊，仰荷道力，克獲圓成。今按靈寶度人之道，傳授寶籙破券分環，全藉聖慈，密垂鑒映，臣不勝度祝之至。

### 宣籙

#### 執券畫一

畫一之後，伏願衆真監度，四輔列位，五老監真，太乙命宸，玉帝唱盟，大道符命，與天齊年。

#### 以券付亡魂 執環分

分環之後，伏願保守盟誓，出有入無，逍遙雲際，升入金門，與道合真，身超三界，永不輪轉。

#### 以環付亡魂 宣升天券

亡故某人，夙植德因，幸逢道化，障累斷絕，冤債和平，升神流火之庭，鍊質黃華之館。九天降炁，五帝分精，魔王保舉以上仙，法橋高張而穩步。魂神澄正，登入妙之黍珠。意氣超凡，證自然之法體。道骨仙風而容與，金璫玉珮

以鏗鏘。要當堅一念以不忘，湛中扃而無撓。凝然元始，長快樂於玉清。恍若靈光，永昭輝於金闕。神通自在，不礙逍遙，功德牒文，謹當宣示。

### 宣功德牒

洞玄妙光，無量度人。元始寶光，燭破塵根。長生回尸，鍊度真形。萬神侍衛，逍遙上清。飛登寶輿，徑詣天門。金光朗徹，朝拜帝君。

### 無量度人天尊

向來牒文，已具披陳，大道昭臨，威靈來格。伏願東井澄神，南宮鍊質。坎離升降，復五行相續之真。乾坤始生，會憶劫長存之道。此乃箇中固有，不須向外別求。時刻升遷，永不輪轉，功德無盡，利及有情，召役仙靈，慈悲引導。

### 升入金門天尊

### 宣第九寶誥

### 吟金光散紫微讚

嵯峨玄都山，十方宗皇一。岿岿天寶臺，光明焰流日。焯焯玉林華，蓊璨耀珠寶。常念餐元精，鍊液固形質。金

光散紫微，窈窕大乘逸。

臣聞二儀育質，九炁游形，千真皆會於三田，九炁森羅於六府，百關和暢，九竅開通，魂靜魄安，神清炁爽。亡故某人，憑茲鍊度，飛升金闕，遊宴玉京，得爲貴人，實蒙玄貺。臣等草茅賤質，螻蟻微生，輒膺命以求真，仗洪慈而濟物。虔伸懇悃，普被恩光，既釐事以慶成，豈塵凡之久駐。伏望雲車風馬，却返於層霄。珠藥玉華，飄零於碧落。臣等仰謝天恩，下情無任，激切之至。

### 迴輶頌 送聖

謹召九天普度院守雄抱雌大將，青玄黃籙專度司太玄靈官，玉女功曹主簿，本壇主副大將，疾速赴壇，承領公文，隨我神運，部衛亡魂，上朝天闕。

### 宣護送牒

### 宣天門關

鍊度事畢，亡靈超升，乘元始紫金之光，御百寶飛仙之輦，大魔鼓節，神王扶輪，靈童握五色之蓮，驛吏持黃籙之簡，千乘萬騎，九鳳八鸞，導從前驅，逍遙雲路，永辭大地，徑詣南宮，面朝金

闕之尊，克遂玉京之樂，慶流宗衍，福及姻親，法衆運誠，謹當奉送。

飛空步虛頌

靈寶領教濟度金書卷之五十九

靈寶領教濟度金書卷之六十

洞微高士開光救苦真人甯全真授

靈寶通玄弘教水南先生林靈真編

科儀立成品

淨供合用

玄都大獻玉山淨供儀

靜默堂序立

華夏引至大道前

上香長跪

具位臣某，誠惶誠恐，稽首頓首，再拜上言。臣聞三寶開圖，散元精於萬有。九霄御運，宏妙粹於羣靈。受中而覺海虛圓，語上而真源澄湛。初無盈縮，奚有升沉，自業風鼓既倒之瀾，與毒霧籠再馳之駕。禍淫福善，昭經緯以無私。惡盈益謙，煥陰陽而不忒。四生輪轉，六道循環，匪由提拯之恩，曷免沉淪之苦。今有齋主某人，依依博物，切切同仁。念形逐業遷，性本中涵於祖炁。命隨塵報，神非外爍於靈光。倘凝定

水以清明，期泮冰山而開悟。敬涓吉旦，恭啓清場，修奉玉山淨供，上奉三寶，中供千真，下賚神靈，旁資品類。俾離惡趣，永依上聖之慈光。庶發善根，照破下愚之塵暗。頓造無爲之妙，永超空色之機。金馬朝馳，已負丹章而露奏。玉龍夕迅，諒頒玉簡以風行。承德虛玄，宣恩鬱絕。今則蘭場已備，藥範將宣，不勝懇切之情，僭瀝便蕃之悃。欲望元尊錫慶，大道流光，嘯命仙曹，各昭宣於民欲。勅制靈局，均寅亮於天工。容臣會道運元，存神合景，羣靈受度，如細雨密霧而來。庶類回光，皆飛空步虛而去，遂齋主皈依之悃，副微臣開度之忱，臣下情無任，懇祈之至謹言。

十方靈寶天尊

引至斛前 灑淨

普獻頌

普獻無邊聖，香烟散十方。願乘七寶臺，垂光五濁世。運度人天衆，咸令上法橋。同會證無爲，勤修不退轉。

宣降真召靈符



祝香

具位臣某，謹焚寶香，供養太上無極大道虛無自然元始天尊妙無上帝，虛皇玉晨大道君妙有上帝，萬變混沌玄元老君至真大帝，東極青元老君，太乙救苦天尊，運明保元上帝，玉清神霄真王長生大帝，南極真王朱陵大帝，九微太真青童玉明大道君，紫微元靈青金丹皇大道君，九霄自然生神帝君，靈寶三十二天帝君，五老四梵十極十華諸天上帝，太陽鬱儀帝君，太陰結璘元君，五方五德上真道君，北極九府玉晨君，南辰六闕上道君，周天經緯列宿星君，三元三官大帝君，玄中大法師，靜老天君，三天大法師，六合高明大帝，靈寶經籍度、三陽開泰樞機三省諸相天君，九天諸司真君，天曹諸司真君，上清黃籙院使真君，南昌上宮朱陵火府主宰高真，青玄黃籙左右府主宰真君，九天普度院主宰真君，南天度人不死尊神，南極長生大君，好生韓君丈人，度世司馬大神，迴骸起死監生大神，靈寶玄局施用仙曹，三界所向仙曹聖衆，三洞四

輔經籙法教上聖高真，祖師玄一玉輿真人，寶輿真人，綠輿真人，太極左宮仙公沖應葛真人，玄壇受事諸省府院司仙靈官吏，五嶽五帝真君，五天聖帝，洞天福地名山大川靖廬治化仙官主宰，本靖祖玄真師列位真人，經籍度師列位真人，北陰玄天酆都大帝，水府扶桑大帝，地府十殿真君，九壘六洞諸司冥官，四海四瀆三江九河溟泠大神，五道大神，北冥執職曹僚掾吏，九州社令司主者，十方道都大主者，城隍里域遠近廟貌無缺神衆，齋主家土地司命六神，虛空應感鑒察威靈太歲尊神，四直功曹，三界符使，願運慈悲，俯旌懇款。臣聞函三御炁，敷龍漢之慈雲。得一分靈，散鶴鳴之法雨。玉宇徘徊於碧落，金書羅絡於黃垓。丹谷流精，陽耀生神之妙。玄關御景，陰飛死炁之華。陶冶八圓，範圍九邈。伏念臣鴛班綴武，鳳檢頤真。坤兔乾烏，胤偃月虛無之寶。坎龍離虎，結明霞恍惚之珠。凝九室以神交，步三田而炁混。心期霄映，迹尚塵游，誓弘領教之宗，庸勵

度人之澤，庶裨洪造，密證玄功。今有齋主某人，恭啓瑤壇，恪遵瓊笈，希金闕洪恩之被，開玉山大獻之筵。仰格聖賢，希均提於化化。俯微品彙，冀咸證於生生。屬茲蘭篆氤氳，蓮輝晦藹，萬象湛璇霄之影，九華沈玉籟之音。寶梵開玄，金章演妙。羣靈霓望，欣道岸之將登。庶類雲從，徯法橋之穩駕。欲望聖神廣運，智慧帝周，流梵炁以迴旋，舒真光而徧覆。祥烟耀景，神奇融霞饌之珍。甘露流華，聖化映雲厨之妙。彌綸六合，鬱勃十方，開陰壘以提魂，闢陽隅而召魄。池明八解，爲沐浴於形儀。服映三光，俾莊嚴於容止。靈芽灌而百關炁續，玄芝餌而五臟神寧，豁七世之昏蒙，解三生之冤對。南丹陽燧，鬱儀舞鳳以陶情。東井方諸，結璘飛龍而瀹性。竟超凌於地域，快容與於天衢，無任罄芹，恪祈采菲，臣不勝瞻聖，望恩激越，俟命之至，清衆運誠，關行法事。

十方靈寶天尊

衆誦大行梵炁章三遍

大行梵炁，周迴十方。中有度人，不死之神。中有南極，長生之君。中有度世，司馬大神。中有好生，韓君丈人。中有南上，司下司錄。延壽益算，度厄尊神。迴骸起死，無量度人。今日校錄，諸天臨軒。

宣大行梵炁符

大聖元始天尊 向乾方

至心奏啓玉清聖境元始天尊妙無上帝，願賜慈悲之澤，昭垂應感之恩，普放神光，降流真炁，灌注玉山大獻清淨法食之中，攝化無窮，神變莫測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天尊帝，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈清微天寶君無上尊。

宣清微天符

元始洞空無，三炁精上門。紫翮煥太空，四明植靈根。妙化發東瓊，三便啓西崑。皓映九玄清，五華帶錦雲。離羅煥神燈，七星耀北元。飄飄上清畿，

翼翼帝一尊。落落高上章，羽童何紛紛。流香本無色，洞入萬仙羣。左迴三流劫，右轉九天關。雲華纓玉靈，八風舞空輪。四時無停機，青白早明分。九九改劫運，三三度一春。天地有終會，否激歸在翻。洞明正一法，嚴終六天文。太平返空無，奉翊後聖君。

大聖靈寶天尊 向良方

至心奏啓上清真境靈寶天尊妙有上帝，願賜慈悲之澤，昭垂應感之恩，普放神光，降流真炁，灌注玉山大獻清淨法食之中，攝化無窮，神變莫測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天尊帝，中熏三界真靈，下供神祇，旁資品類。俾令六道幽靈受食等衆，形神俱妙，定慧雙圓。大聖大慈禹餘靈寶君無上尊。

宣禹餘天符

靈風起西門，錦雲生東瓊。二炁煥玉洲，流香乘煙輕。五華披風散，倏欵朗九清。騫林耀朱日，黃華逐月生。中有採芝童，衣羽帶飛青。颯景萬嶺峰，

逍遙宴綠輶。總御九空輪，運開無稽程。左命三天文，右攝六天兵。檢炁返空洞，天度應運傾。劫運自有會，誰測敗與成。洪波淪雲網，六合無遺形。白尸飄長流，孤魂因復零。悲此去來際，方覺正法明。至學加精修，東華結瓊名。欣有白簡人，相與樂太平。

大聖道德天尊 向離方

至心奏啓太清仙境道德天尊至真大帝，願賜慈悲之澤，昭垂應感之恩，普放神光，降流真炁，灌注玉山大獻清淨法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天帝尊，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈大赤神寶君無上尊。

宣大赤天符

洞關運天罡，三炁轉三微。紫戶吐瓊簡，玉閣照靈珠。重樓耀精彩，金門納神輝。八會交真風，晃朗重門開。天際九清外，落落高神回。三色返空無，

四候應王圻。河侯已鼓筆，五行潛相推。六度無終劫，運極乘炁歸。萬魔羅天布，羣雄競吐威。兆人負災衝，積尸令人悲。妙哉正法文，履劫明不衰。至時相奉迎，契在九天扉。與爾期太平，放身無翼飛。

大聖東華天尊 向東方

至心奏啓東方自然八天上帝，願賜慈悲之澤，昭垂應之恩，普放神光，降流真炁，灌注玉山大獻清淨法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天尊帝，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈青靈九炁君無上尊。

宣東方八天符

東華吐靈鳳，西宮和瑤音。二炁結空洞，太虛生中心。靈書披七條，寶文翠碧林。鳳歌逐天響，六時應節吟。上有度命童，煥夜朗長陰。萬劫保形明，渺渺莫能尋。長鍊不死年，與運同浮

沉。日月照靈魂，璇璣回東南。九星落形影，寶華生五心。自有不凋神，與我契丹金。赤書檢籍炁，玉訣妙自陳。朱宮有錄籍，魔神莫能侵。

大聖南極天尊 向南方

至心奏啓南方自然八天上帝，願賜慈悲之澤，昭垂應感之恩，普放神光，降流真炁，灌注玉山大獻清淨法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天尊帝，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈丹靈三炁君無上尊。

宣南方八天符

絳雲翠羽虛，靈風拂太微。遼遼六炁降，渺渺吐靈暉。乘我日中影，振轡順天迴。朱童披靈夜，洞陽鍊落暉。玉章度促年，靈歌五神開。長限無絕景，一念入九圍。億劫超幽期，華命不凋衰。飛天披重關，南宮朗凶機。朱陵定絳籍，神備便形飛。七祖上生天，福

德高巍巍。轉輪空洞魂，出我九玄扉。夜景披朝陽，飄飄乘運歸。

大聖西靈天尊 向西方

至心奏啓西方自然八天上帝，願賜慈悲之澤，昭垂應感之恩，普放神光，降流真炁，灌注玉山大獻清淨法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧瑞煙，應念充周，隨感飽滿。上奉諸天尊帝，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈皓靈七炁君無上尊。

宣西方八天符

琨臺生琅音，王炁遐九冥。寶章洞太虛，攝真入無形。錦雲翠朱日，圓華逐月生。混合自然炁，迢迢九遐清。六慧純梵行，五神有高靈。絳宅耀朱景，萬劫不凋零。長存好生君，太一合黃寧。保命度符籍，鍊魂金華庭。引歸不死炁，飄飄乘運生。七玄入南宮，枯骸更鮮榮。長樂登雲浮，高飛戲綵駟。逍遙大羅外，三界莫能輕。

大聖北真天尊 向北方

至心奏啓北方自然八天上帝，願賜慈悲之澤，昭垂應感之恩。普放神光，降流真炁，灌注玉山。大獻清淨法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，彩霧瑞煙，應念充周，隨感飽滿。上奉諸天尊帝，中熏三界真靈，下供神祇，回資品類。俾令六道幽靈受食等衆，形神俱妙，定慧雙圓。大聖大慈元靈五炁君無上尊。

宣北方八天符

飛步入北清，把真招上元。乘景望玄臺，四華生錦雲。中有採生童，羽衣何紛紛。長歌九命籍，金錄赤書文。十絕遶華庭，飄飄度命幡。綠蓋乘風迴，丹霄拱瓊軒。爲我造上皇，拔錄九夜門。度命朱陵闕，長保億劫春。留神營絳府，赤子明玄關。形受不死炁，自然生寶魂。七神度南宮，世生福慶門。

梵炁彌羅天尊

三景靈芒，既敷華而耀彩。諸天妙炁，復飛煥以流輝。鬱藹瑤壇，翫冥寶供，

謹請玉山大變神王，六龍普變靈官，溟滓大梵靈官。密運神通，廣施變化。蘭場洞朗，十方影映於帝珠。芝饌森羅，萬水光涵於璧月。大無外而小無內，此不往而彼不來。渺渺大羅，高列馨香之法味。塵塵刹土，遍陳清淨之芳筵。寂照含虛，潛昭應現，萬靈森布，一念交融，空洞內音，虔誠宣誦。

當職持水領法衆旋遶斛筵

焚光明玉字無量數

衆念五十遍

宣婁阿耨，無愁觀音。須延明首，法攬菩曇。稼那阿奔，忽訶流吟。華都曲麗，鮮菩月臻。答落大梵，散煙慶雲。飛灑玉都，明魔上門。無行上首，回蹠流玄。阿陀龍羅，四象吁員。南閻洞浮，玉眸洗洗。梵形落空，九靈推前。澤洛菩臺，綠羅大千。渺莽九醜，韶謠緣遶。雲上九都，飛生自騫。那育郁馥，魔羅法輪。靈持無鏡，攬姿運容。馥朗廓奕，神纓目宮。刀利禪猷，婆尼咎通。宛數滌色，太渺之堂。流羅梵萌，景蔚蕭嶠。易邈無寂，宛首少都。

阿濫郁竺，華莫延由。九開自辯，阿那品首。無量扶蓋，浮羅合神。玉誕長桑，栢空度仙。獲無自育，九日導乾。坤母東覆，形攝上玄。施羅育邈，渺炁合雲。飛天大醜，總監上天。施羅劫量，龍漢瑛鮮。碧落浮黎，空歌保珍。惡奕無品，洞妙自真。元梵恢漠，幽寂度人。

變化無盡天尊

變食

蘇陀抹味天尊

高功行丹陽太極施食祕法

衆官就坐

弘濟無邊天尊

道炁敷羅，靈光昭徹，豎窮三際，芳筵象六甲之厨。橫亘八紘，妙饌浹九光之景。仰蒙帝力，俯運神功。俟聖真應願以來臨，流恩回施。庶品類隨心而具足，載德高躋。宣冀仁慈，恪垂明鑒。

十方靈寶天尊贊引向門外序立

上香

伏以三界惟心，造升沈之關鍵。昭然六根，由意生迷悟之機緘。蔚若自黑

業循環於蟻磨，致紅塵顛沛於蛾燈，興言惡道之堪悲，莫越幽途之極苦。銅關檢繫，悲風振而億劫酸辛。鐵壘羈維，昏煙暗而垓齡熱惱。一晝一夜，萬死萬生，茫茫冥路之沈寥，寂寂陰津之悽慘。是以神霄內禁，符頒破獄之春。妙嚴東華，職建出冥之旦。期提苦趣，均證樂鄉。今有齋主某人，修崇玄都大獻玉山淨供，普奉千真，回資六道，切慮地獄種類，寒庭永閉，夜壑牢關。憑太一之真光，張門毀鎖。破大千之垢暗，啓道開扇。惟琅音揚東極之尊，而瓊檢開北艷之閭。威神救苦，慧力垂慈，宜敷蟻悃，以勤渠恪。冀龍恩而鑒映，尋聲有感，應念無邊，法衆運誠，至心奏請。

### 請太乙

仰惟九幽教主，十極導師，開甘露門，御太無而回祖炁。映祥煙戶，提妙有以煥神光。爲天人福慧之師，作幽顯慈悲之父。願旌激切，曲副忱恂，爲駐蹕於紫虛，恪開關於黑鬱。今有齋主某人，修奉玄都大獻，恩希金闕，供闕玉

山。微萬聖以傾光，施羣靈而破暗。雲迷陰壑，游精縻澤壘之嚴。月慘冥途，飛爽阻關津之滯。莫普歆於蘭饌，難旅覲於芝壇。欲望放百寶光明，煥龍章而破獄。勅九司官吏，宣鳳篆以開幽。庶得泉曲春生，羅艷陽粲，鬼官敬聽，無拘留逼合之憂。驛吏恭承，有侍衛送迎之喜。懇祈切切，應感昭昭，法衆運誠，讚揚功德。

### 太乙救苦天尊

翠華迅景，綵仗乘空。應化分身，廓九幽而照夜。飛靈合景，精一念以開春。謹召青玄破獄一行符吏，疾赴玄壇，乘慈尊祖炁真光，隨我神運，直下羅艷，破蕩地獄，提攝苦魂。

### 宣破獄符

茫茫艷都中，重重金剛山。靈寶無量光，洞照炎池煩。亡者身光明，朝禮玄元壇。升神超碧漢，童子導靈旛。

### 太乙救苦天尊

玉毫耀彩，金景騰輝。七混五成，提冥鄉而御景。六通四關，廓幽路以開程。謹請五方五靈主方隅神，疾赴玄壇，乘

慈尊祖炁真光，隨我神運，普告關津，開闢道路，接引幽魂。

### 宣開闢符

玉清靈寶光，洞照三途中。微微開業道，來往交相通。東華元命至，倏忽無留蹤。生神超大羅，遊宴三元宮。

### 太乙救苦天尊

五方啓重圍之扉，形魂部衛。六甲開冥關之徑，體魄徼迎。皆獅座攝以威光，故犴室乘茲梵炁。經華緯粲，明檢於嶽瀆羅泉。陽耀陰靈，嚴攝於水陸郵驛。既四門之無阻，宜萬類之俱臨。得役仙曹，庸提滯識。俾神朝於北闕，而魂鍊於南宮。惟冀慶雲開生，慈風起死，俯駐碧落之景，宏施黃壤之恩。臣下情無任，激切懇祈之至。

### 十方靈寶天尊

### 衆官就坐

伏以陰陽化化之機，風行三極。天地生生之德，雲蔭八遐。流祖炁於清曹，敷神功於玄局。玉符飛煥，開九壘之春陽。金景旋浮，廓三途之晝景。飛龍迅而雄守雌抱，神虎運而陽攝陰提。

肇宏紫極之恩，丕闡黑鬱之苦。巍巍大範，奕奕洪恩。今有齋主某人，開玉山之法筵，宣瓊臺之祕範。上奉千真萬聖，回資六道四生。顧惟陟降殊途，顯幽異路，耀陽光而度命，已藉三華，赴陰澤以提魂，亶資列將。茲也宸輝璀璨，梵唱琳琅，九幽彰毀鎖之威，十方奮開關之武。盍徼萬類，均會一乘，宜伸召役之儀，庸契精誠之切。太極丹篆，次第宣行。

八門開度天尊

謹召玄虛掌六道功曹，疾赴玄壇，恭領符命，隨我神運，催召天仙道，神明道，人倫道，地獄道，餓鬼道，畜生道，一切之衆，速攝速至，風火無停，伺候天恩，普受開度。

宣召六道符六道

無炁幽微，玄梵恢張。混茫空徹，赤文丹章。朗昭洞妙，萬化滋彰。帝心慈慧，恩流無疆。宸輝敷耀，靈爽飛揚。玉符所召，六道來翔。

八門開度天尊

謹召玄虛掌四生使者，疾赴玄壇，恭領

符命，隨我神運，催召胎生、卵生、濕生、化生一切之衆，速攝速至，風火無停，伺候天恩，普受開度。

宣召四生符四道

玄恩赫赫，太極流營。稟令妙粹，彌綸生成。洞觀炁化，宇宙充盈。雨露涵育，齊企善征。天光流煥，萬象精明。玉符所召，四生飛英。

八門開度天尊

謹召十方道都大主者，疾赴玄壇，恭承符命，隨我神運，催召東西南北四維上下滯爽孤魂一切之衆，速攝速至，風火無停，伺候天恩，普受開度。

宣召十方道孤魂符

慈惠溥浹，祖炁流輝。元始施化，竊漠玄機。十華三際，洞妙張施。沉淪迷途，玄鑒均齊。澤滂覆載，幽爽均提。玉符所召，徬徨來儀。

八門開度天尊

謹召九州社令司主者，疾赴玄壇，恭領符命，隨我神運，催召冀兗青徐揚豫荆梁雍分野滯爽孤魂一切等衆，速攝速至，風火無停，伺候天恩，普受開度。

宣九州孤魂符

慈恩凝妙，幽贊神功。九野遊爽，昭晰天光。陽開陰關，經緯回藏。瓊章大有，飛煥八方。生死返復，乘晨希陽。玉符所召，罔敢不從。

八門開度天尊

謹召掌城隍里域鄉界主者，疾赴玄壇，恭領符命，隨我神運，催召城隍里域鄉界滯爽孤魂一切之衆，速攝速至，風火無停，伺候天恩，普受開度。

宣召城隍里域鄉界孤魂符

陽光煥奕，陰景翳蒙。微茫效畿，荒寂幽叢。游精遍浩，億萬無終。真機鼓摧，乘炁委崇。固靈育粹，太極流通。玉符所召，陶沐玄風。

八門開度天尊

謹召掌出林叢洞主者，疾赴玄壇，恭領符命，隨我神運，催召山林巖洞滯爽孤魂一切之衆，速攝速至，風火無停，伺候天恩，普受開度。

宣召山林叢洞孤魂符

混淪空洞，溟滓彌羅。幽魂寂歷，玄澤光敷。山林巖洞，慘戚悲歌。元皇妙

化，惠闢崇阿。游魂故炁，紛葩浩多。玉符所召，回返天和。

#### 八門開度天尊

謹召掌溪澗泉源主者，疾赴玄壇，恭領符命，隨我神運，催召溪澗源滯爽孤魂一切之衆，速攝速至，風火無停，伺候天恩，普受開度。

#### 宣召溪澗泉源孤魂符

陰寥泉曲，悽惻寒池。冥海幽寂，浩劫無期。伏尸沈滯，夜景哀悲。元始曲映，宸恩密移。和陽明奕，洞煥仙飛。玉符所召，佩服天衣。

#### 八門開度天尊

謹召北魁玄範府倒生玄司七真玉女，疾赴玄壇，恭領符命，隨我神運，催召十方三界盡玄虛際七類傷亡一切之衆，速攝速至，風火無停，伺候天恩，普受開度。

#### 宣七玉女符七道

太一混元，玄司倒生。精列品類，流煥七星。真光蔭彩，幽景洞明。龍駟鳳御，雲旂虎旌。嘯呼林谷，提攝郊坰。玉符所召，遊爽來呈。

#### 八門天度天尊

謹召靈寶如意萬司五十七大神，疾赴玄壇，恭領符命，隨我神運，催召十方三界盡玄虛際二十四類傷亡一切之衆，速攝速至，風火無停，伺候天恩，普受開度。

#### 宣召二十四類傷亡符二十四道

赫奕如意，玄曹靈通。大神威儀，照耀天工。旁周溟嶠，窮極羅鄩。羣爽沈寂，濟惠咸宗。靈光充盈，開朗昏蒙。玉符所召，十極鄩隆。

#### 八門開度天尊

謹召九天普度院三十六真人，三十六將軍，疾赴玄壇，恭領符命，隨我神運，催召十方三界盡玄虛際三十六類傷亡一切之衆，速攝速至，風火無停，伺候天恩，普受開度。

#### 宣召三十六種傷亡符三十六道

左雄右雌，魄陰魂陽。太一真光，流惠無疆。混洞彌羅，宇宙洋洋。遊精苦爽，震蕩天帝。玄澤飛灑，灌沐朝陽。玉符所告，普赴靈場。

#### 八門開度天尊

列將宣威，疾羅敷於雨露。群靈僖德，願慶會於風雲。更冀本靖靈寶追攝總局、諸省府院司執職受事官吏主將某，副將某，護道某，監壇某，同心協力，宣化承流，入地升天，分形散景，詔告城隍里社，催督水陸關津，引領幽靈，均霑勝利。

#### 宣普召牒

我稟金符策役，玄曹普赴壇前。遍詣九幽十道，依準青律抽魂。上極太虛碧落，下洞寒壘風輪。嘯命山林泉曲，追呼寂隴荒關。靡間有主無主，流浪滯魄窮魂。水火刀兵疫癘，饑饉勞瘵親冤。搜尋普攝普召，急疾來現根源。寅領天恩回施，宏開甘露法門。聚形返復祖炁，水火變鍊自然。速往速攝速赴，不許拒遏稽延。敢有叛違壇律，三元黜降仙班。如違上清詔令，幽陰永墮無原。靈寶玄壇告命，雲程風火驛傳。

#### 八門開度天尊

靈寶領教濟度金書卷之六十

# 靈寶領教濟度金書卷之六

十一

洞微高士開光救苦真人甯全真授  
靈寶通玄弘教水南先生林靈真編

## 科儀立成品

淨供合用

### 玄都大獻玉山淨供儀

門外設香案

清衆序班召魂

伏以天性虛靈，奚有去來之迹。地塵翳幻，爰彰終始之形。迷雲惟滓於三明，慧日斯離於四大。業輪葉葉，堪嗟已死之元神。冤網鱗鱗，孰軫未生之祖炁。泛驚濤之飄蕩，走峻坂以馳犇。快樂福堂，報盡尚趨於惡趣。悲酸罪壘，期超猶履於畏途。鬼畜酬嗔，神人暫喜。回眸萬劫，昧兔角之真空。轉盼千生，慘羊腸之妄垢。誰爲援溺，庶俾凌虛。惟三天敷定慧之光，則九地步真常之景。今有齋主某人，筵開大

獻，壇輅洪慈，仰致敬於聖賢，俯宣仁於品彙。排空御炁，已飛役將之金符。倒景騰霄，諒煥召靈之玉勅。悉風行於六道，已雷動於四生。上窮碧落下黃泉，遍提萬類。右秉白旄左黃鉞，嚴制群魔。關津無阻遏之虞，里社稟送迎之令。茲也靈光鬱勃，梵炁彌羅，珠星隱隱於疏林，銀漢輝輝於遠岫。天門肆闢，九霄垂浩蕩之恩。地戶遐開，諸趣切提携乃望。甘露降而醍醐味隽，靈風扇而道德香浮。宜申命於神威，俾疾徼於靈識。帝恩無外，壇律有嚴，法衆運誠，依科攝召。

灑淨

誦甘露呪

泠泠甘露滋，法味難思議。騫香流七真，冥冥何生疑。受此法食者，生天登紫微。

持旛出門外向鬼門立

伏以將天炁而制天魂，體該妙有。開鬼關而來鬼爽，聲契虛無。靈旛颺颺於空中，寶鐸琳琅於雲際。或遠或近，如聞警效之音。若有若無，恍曳步趨

之影。精神所致，形魄潛孚，庸歌普召之玄章，密動回靈之丹旆。

衆歌

太陰冥冥黑波重，中有羅酆六天宮。萬鬼成羣痛哭泣，悲惱毒烈太惡崇。無上洞音徹九夜，飄飄吹下慈悲風。吹向冤魂召億魂，聞者奔赴寶壇中。急急如東華夜光召魂律令攝。

伏以精魄強而游魂爲變，本有英明。形貌皺而見性不移，初無生滅。循環雖分於六道，精微實貫於一元。寶範遙宣，若認陽聲而應感。靈旛高裊，似瞻華表以歸來。返炁聚神，歸真復命，載歌祕語，遍召陰儀。

衆念

北酆萬鬼羣，六道苦沈淪。江海山嶽中，幽魂長冥昏。太乙玄元壇，王音降至尊。普召悉來赴，咸悟如生存。急急如上清靈寶召魂律令攝。伏以凝空洞而有別體，神炁飛浮。赴期歸而返故根，靈光照耀。奚分於善道惡道，靡間於旁生正生。上下四方，既追尋而迅速。前後三際，諒奔赴以



徬徨。永超地禁之幽，克履天常之煥，三歌玉範，庸格遊魂。

衆念

一炁生萬物，萬物歸一炁。吾復統一炁，再使萬物生。故知一炁中，不復失吾意。攝召汝真靈，諦聽慈悲旨。

伏以一炁盈虛，孰測鬼神之情狀。五行聚散，奚虧性識之精明。靈光璀璨於瑶空，道炁玲瓏於瓊宇。銅烏轉午，玉兔凝霄。陽靈陰靈，檄神真而下赴。故鬼新鬼，偕爽魄以均臨。各生慶幸之心，普暢歡欣之願，宜依壇律，恭召真儀，臨清靜之法筵，受慈悲之開度。

至心召請一切天仙道等衆，及其眷屬。惟願仰承三寶力，今夜今時齊附靈幡，來赴玄壇。和：受慈開度功德。

至心召請一切神明道。同前

至心召請一切人倫道。

至心召請一切地獄道。

至心召請一切餓鬼道。

至心召請一切畜生道。結並同前

六道冥靈，既來遊於陽境。四生猥劣，

幸脫迹於陰郊。極目而夜月茫茫，凝眸而晚風淅淅。山林藪澤，萬神錄送於游精。郊野丘墟，列將搜尋於苦爽。墮邪途者三十六類，失正命者二十四門。筵啓玉山，宜幽沈之普召。恩頒金闕，盍冥漠之均提。願振肅於精神，姑停留於步武，伺微諸趣，普侍羣靈，同朝楓陛以參真，共詣蘭場而受饗。真光遍覆，寶範遙揚，敬唱祕章，庸伸感格。

陰陽爲炭兮，天地爲爐。陶魂鑄魄兮，南機北樞。四大分離兮，奔飛萬炁。冥冥漠漠兮，歸根虛無。太上慈悲兮，返攝遊炁。太一混合兮，百神來居。迴骸起死兮，五行造化。歸真歸元兮，復汝本初。感此徬徨兮，無遲無逆。賜汝靈書兮，飛凌玄都。急急如神虎夫人召魂律令攝。

伏以天地陰陽之變，轉輪真機。死生夜旦之常，循環妄業。秩秩羣靈之渺莽，幽幽萬姓之沈寥。水逝不回，均棲身於寒谷。舟藏何在，皆寄迹於冥鄉。人間之日月已非，世上之春秋永隔。

顛冥萬劫，罔思利涉於慈航。沈滯千齡，弗念陸沈於覺海。幸蘭場之照夜，欣藥簡之頒春。將翺將翔，宜躡神光而莅止。相呼相喚，願乘聖彩以來臨。其有御籙膺圖，繼圓蓋而制六合。履符乘運，裂方輿而朝九州。椒房昭彤管之輝，茅社耀紫泥之寵。萬鍾祿貴，端劍履於槐庭。九鼎威尊，奮鉞旄於柳塞。文擒鳳而古今第一，武揚鷹而宇宙無雙。其生也稟霄漢光嶽之精，其死也佐經緯玄黃之運。願迂飄馭，俯御塵樊。爲接引於羣迷，以昭宣於萬化。其有雲肩霞岫，探道德而葆玄元。月嶂煙巒，樂菩提而味禪蛻。或厭膏粱以精進，或棄鉛華以勤修。或藜錫經行心希五施，或蒲團宴坐志勵十齋。或守戒定慧以俱圓，或混精炁神而入妙。或永劫探玄珠於象罔，或中道淬白玉於紛葩，皆脫陰塵，咸翔陽景。願提携於後覺，俾紹續於前修。特降芳筵，庸歆菲供。其有操觚弄翰，秀擢儒林，繫綬緝章，榮聯仕版。或效顰東陵而學圃，或襲迹南陽以躬耕，或隴畝雲

聯、操犁鋤而櫛風沐雨，或舟車日闢、歷江湖而挾霧披霜，或習岐黃神聖工巧之傳，或精袁李靈奇變通之授，或風斤月斧業超匠石，或雲笙煙笛技冠鈞韶。六藝箕裘，百工陶冶，心惟期於溫飽，志豈羨於輕肥。雖無善業以升天，亦乏惡緣而墜地。普乘芝檢，來赴蘭場。其有變朱墨以舞文，虎扉威凜。艷綺羅而鬻巧，鳳閣香融。業屠劊而悠殺心，典庖厨而戕生命。飛鷹走犬，操網張羅。雖生前之口腹貪饕，諒死後之形神淪墮。既縈幽暗，膺苦惱於千齡。幸沐靈光，際歡欣於一旦。來聞經而聽法，爲解咎以除冤。以至九野之中，八紘之內，際天所覆，極地所載，遐陬僻壤，萬姓四民，士農工商，衣冠俗類，文武醫卜，男女耄倪，孤滯億名，沈淪千姓。或有主無主，或凶終善終，或炎火燒焚，或江河沒溺，或虎狼食啖，或蛇虺傷殘，或霜雪凍凌，或雷霆震擊，或凶荒殞命，或牢獄喪身，或盜賊殺傷，或刀兵殘害，或木石壓損，或道路傾摧，或王法死亡，或訟庭怨

恨，或鬼神執滯，或軍陳誅夷，或自縊自殘，或投河投塹，或中蠱服毒，或飲烝含冤，或呪咀勾連，或仇讎執對，或財命纏繞，或盟誓牽縈，或神識顛邪，或肢體零落，或瘟疫瘡痢，或癆瘵癰疽，或傳癩傳尸，或中風中氣，或拳攣癱疾，或瘡痂盲聾，或髻鬣喪生，或胎產殞命，或生遭陷害，或死受釘埋，或惻獨孤鰥，或奴婢厮役，或尸柩焚毀，或墳墓夷陵，或舊塚頽塋，久虧祭祀，或他鄉客路，近缺烝嘗，或曠野潛形，什什伍伍，或寒林寄影，兩兩三三，或雨暗風悲，怨聲來往，或天陰月淡，幽影縱橫，無極無窮，無邊無量，羈魂旅魄，飛爽遊精。乃至山巔水涯，魑魅魍魎，林幽麓際，妖怪冥靈，鱗介羽毛，胎卵濕化，蛸翹蠢動，喙息歧行，若有情，若無情，若非有情，若有想，若無想，若非有想，若有色，若無色，若非有色，寓形宇內，一切衆生。均聆寶鐸、慈悲之音，各認華旛光明之景，疾辭黑壘，來覲玄壇，領金闕之洪恩，歆玉山之淨供。法衆運誠，至心召請。

至心召請九州十道，徼外寰中，原野丘墟，冥陽水陸，山林城郭，村落泉源，滯魄孤魂，幽靈惡趣，二十四門苦爽，三十六道傷亡。惟願仰承三寶力，今夜今時，齊附靈旛，來赴玄壇。和：受茲開度功德。

陽華散彩，陰景騰輝。萬類靈儀，既雲臻而霧集。諸司將吏，宜風動以霆奔。恪殫部衛之勞，疾罄監臨之績。調伏貴賤，毋凌暴於孤寒。和合冤親，俾齊同於慈愛。游泳玄元之聖澤，涵濡靈寶之真光。無傲無華，肅容旅進，有嚴有翼，潔己翔趨。先爲復質以全形，庶獲登真而度命。謹召守雄抱雌二大將，各按所部，部衛六道四生，諸類幽魂等衆，隨我神運，齊到帝前，整具形神，朝真受鍊，法衆運誠，慈悲接引。

慈悲接引天尊

引旛詣法師座前

宣呪

幽魂及苦爽，死魄與陰靈。遊蕩幽冥域，喪失天地根。我以元始烝，反復汝胎嬰。聚魂鍊尸魄，鍊陽去九陰。元

始召魂章，斡運南北辰。陶鎔坎離間，顛倒結胚暉。勿滯愛河浪，流蕩生死門。隨我元始炁，繼絕苦迷津。悟理玄元道，離合自成真。出入無爲地，常居天地春。逃形九天關，不墮於苦輪。來赴玄壇鍊，隨章心自明。

我聞天形道貌，輝輝而混合百神。海欲波情，翳翳而奔飛萬炁。惟昧有無於真妄，斯分聚散於死生。興言本始之初，俱混希夷之妙。金花鬱勃，凝陽粹以毓天根。玉樹扶疏，落陰精而超地蒂。三彭振伏，二豎驚馳，自冤魔剖破於藩籬，致塵寇震凌於官府。風火寒暑燥濕之變，莫際九還。夢幻泡影露電之如，遂臻五解。回首三途之展轉，驚心六趣之漂流。深可悲矜，孰爲援拯。今有齋主某人，修奉玉山淨供，仰承天渥，俯罄民衷。靈光開宇宙之春，玉符誕布。恩詔啓幽冥之旦，金簡周敷。微萬類以均臨，檄羣靈而齊到。頓還舊觀，快沐新釐。然念報對多岐，品類不等，自善道來者，宜停容止。自惡道至者，盍整形神。或死後肢體之

未完，或生前疾病之未治，或懷冤對，或抱震驚，或易失於正途，或已淪於異類，非假攝化，曷復真元。我以膺錄御圖，憲天體道。竭誓微忱而度死，式昭大德之好生。會道運神，恪遵玉訣，承流宣化，式藉玄曹，俟反景以回靈，當觀光而序進。參朝宸幄，嚙味芳筵，稽首皈依，召役如法。

#### 回靈養素天尊

謹召靈寶玄局火鈴大神，玄靈大神，羯磨大神，疾赴玄壇。向來召集幽魂，有久縈地獄，枷鎖未去，繫索未除，衣冠不備之衆，願乘符命，隨我神運，速爲拯擠，俾苦具解脫，衣服周圍。

#### 宣去枷鎖、斷繫索、借衣符三道

幽幽冥冥，罪根流營。長夜腥霧，萬劫沈零。玄元施化，金馬驛程。枷鎖消散，形魂肅清。衣冠周備，生根命靈。飛升太漠，身有光明。天尊慈化，五炁交并。

#### 回靈養素天尊

謹召靈寶玄局開咽潤喉靈官，疾赴玄壇。向來召集幽魂，有久墮陰鄉，夙抱

饑虛，咽喉枯槁之衆，願乘符命，隨我神運，速爲拯濟，俾重樓流潤，飲食宣通。

#### 宣開咽喉符

浩浩冥冥，太上靈泉。潤枯育物，流注自然。神津生液，澄清太玄。生魂育魄，靈瓜綿綿。清靈保命，猛火施烟。華池浩渺，莫測其源。育嬰耀化，三炁飛天。

#### 回靈養素天尊

謹召靈寶玄局全形復質靈官，青帝護魂君，白帝侍魄君，赤帝養炁君，黑帝通血君，黃帝中主君，疾赴玄壇。向來召集幽魂，有生膺惡報，肢體不完，死非正命，形骸零落，冥關考掠，身軀壞散之衆，願承符命，隨我神運，速爲拯濟，俾骨肉完全，經絡聯續。

#### 宣十續符十道

#### 宣五帝全形符五道

玄靈妙光，廓落三元。內灌臟腑，外養身田。斷者爲續，欠者爲全。盲者得視，聾者得聞。病者得甦，弱者得痊。生生咸遂，大化無邊。乾元密運，四象

吁員。

回靈養素天尊

謹召靈寶玄局脫形離苦靈官，九天普度院真人將軍，疾赴玄壇。向來召集幽魂，有身墮異類，形受旁生之衆，願乘符命，隨我神運，速爲拯濟，俾脫離苦報，還復人身。

宣脫形離苦符

宣改形易貌符

元始慈勅，普度無窮。智慧法水，流潤神通。畜生異類，惡業所崇。一灑神變，苦趣形空。羽毛鱗介，飛質潛蹤。均還人身，冠帶潔豐。聞經聽法，上朝仙宗。

回靈養素天尊

謹召靈寶玄局主胎大神，變胞大神，助生神君，順生神君，分胎功曹，主產功曹，六甲符吏，催生童子，疾赴玄壇。向來召集幽魂，有懷胎殞命，未產喪生之衆，願乘符命，隨我神運，速爲拯濟，俾子母分離，炁體康復。

宣監生符

宣下胎符

返英育靈，正胞鍊精。孽緣執對，惡業交并。女爽胞胎，未離身形。今日鍊化，母子速分。玉嬰金光，腥穢沈零。已生未生，皆得生成。五臟調泰，關節和平。

回靈養素天尊

謹召靈寶玄局天醫，六職尚藥靈官，治病功曹，疾赴玄壇。向來召集幽魂，有疾病亡身，凶惡喪命，生前痛毒，死後沈淪之衆，願乘符命，隨我神運，速爲拯濟，俾形神完整，榮衛調和。

宣天醫符

宣醫治二十四類幽魂符二十四道

五文開廓，普植神靈。聾病開聰，盲者目明。瘖者能言，跛痾起行。久病痼疾，一時復形。老壯少強，髮黑齒生。四百四病，永保安寧。玉帝至真，雲芝灌精。

回靈養素天尊

謹召靈寶玄局遠離怖畏靈官，疾赴玄壇。向來召集幽魂，有雷電震擊，覆舟墜馬，戰鬥殺戮，精靈執讎，魂魄飛揚，形神怖畏之衆，願乘符命，隨我神運，

速爲拯濟，俾精神強盛，志炁安和。

宣離怖畏符

天帝命靈，太一觀形。六虛九素，生根孕英。飛雲流珠，洞耀杳冥。精爽遊散，攝炁回嬰。神力潛化，周遊玄經。慈悲廣覆，大道開明。死骸回童，乘運齊征。

回靈養素天尊

謹召靈寶玄局解冤釋結靈官，如意萬司解釋冤對大神，疾赴玄壇。向來召集幽魂，有呪咀執對，冤憎報復之衆，願乘符命，隨我神運，速爲拯濟，俾怨恨開釋，慈愛齊同。

宣解冤結符

宣淨明解冤十符十道

陰景長夜，幽幽冥冥。億劫無光，黑風飄零。元始開化，諸天齊明。玉符所至，萬神敬聽。冤結解釋，執對和平。業垢消蕩，斬絕地根。身乘玉虛，上度福庭。

回靈養素天尊

謹召靈寶玄局能談善說靈官，疾赴玄壇。向來召集幽魂，有自失正途，樂從

邪道，故生迷戀，罔知解脫之衆，願乘符命，隨我神運，速爲拯濟，俾捨邪歸正，離妄求真。

#### 宣捨邪符二道

洞玄施化，渺渺大羅。周遊六合，祖炁敷華。赤書玉字，弘濟愛河。九幽昏煙，滃濛天和。開通慧智，神功浩多。太上有勅，正道常華。速離返觀，永歸仙家。

#### 回靈養素天尊

萬病蠲除，風掠秋雲於碧漢。千冤解悟，日浴曉露於清霄。沉體魄之周圓，復神魂之澄正。上承帝力，下藉神功。第惟久隔陽光，夙淪陰昧。瓊樓丹室，多凝死炁之塵。紫戶玉門，難復生神之景。盍遵藥簡，爲煥芝符。飛元聚神，復神神於本蒂。命靈攝炁，反炁炁於故根。運太極之樞機，贊先天之橐籥。凌騰耀景，羅絡成人。

#### 回靈養素天尊

謹爲幽魂，攝降玉清混元生腎生炁，生精少陰之炁，生心生神生榮生志少陰之炁，生肝生魂生筋生骨厥陰之炁，生

肺生魄生衛生毛髮太陰之炁，生脾生肌肉生意四肢太陰之炁，生膀胱生水胞太陽之炁，生小腸生水道太陽之炁，生膽生汗少陽之炁，生大腸生谷道陽明之炁，生胃生水源陽明之炁，生三焦生三宮少陽之炁，生心胞絡生百脉厥陰之炁，灌注身中，周流遠布。俾形體整具，經絡完成。

#### 宣混元十二化生符十二道

陽明景精，陰貫陽形。內結外續，一炁神凝。五回七轉，流運黃庭。九九華敷，經絡纏身。二景九陽，混合百神，流攝九宮，八卦分形。元始混化，整具形神。

#### 回靈養素天尊

炁以全形，炁聚而形亦聚。神以御炁，神留而炁亦留。一合三成，三凝一化。歸根復命，幸五炁之流華。保真固靈，宜萬神之耀景。再行招攝，庶返生源。

#### 回靈養素天尊

謹爲幽魂，攝降玉清大洞腦神泥丸赤文混洞噓噓君，左目神通光玄冥君，右目神晨嬰陰精君，舌神騰陽正生君，心

神玄珠玄玄君，肝神青帝孟光君，脾神紫庭延澤君，肺神皓洞黍成君，腎神太淵飛都君，陰神續命伯強君，胞神元常秋夫君，胎神含生宣和君，結神九華遐彥君，節神杳浩空猷君，血神中幽良弼君，精神元除祝祝君，炁神元英毳毳君，神神天生靈父君，命神正中幽田君，安鎮身中，周帀羅布。俾宮室全復，神炁固凝。

#### 宣大洞十八生身符十八道

玉符鎮勅，大洞自明。白雲流布，靈神降身。五方混合，玄上之精。充布五臟，六管鮮明。內灌外溢，表裏俱清。滅穢招真，身飛太靈。生根永固，周旋天經。

#### 回靈養素天尊

若冤若病，心爲機關。曰炁曰神，心爲郭廓，心空則二妄何有，心靈則一真可全。幸承天寶之慈輝，獲脫地塵之暗垢。陰陽攝聚，雖復質以同流。性命圓明，宜回光而返照。庶得真元獨露，妄有潛消，神炁相保於身中，冤病永離於形表。願精疏淪，毋再沈淪。更振

肅於襟期，即舒徐於步武。均澄芝宇，恭赴蘭湯，守雄抱雌二大將，各按所部衛，諸類幽魂，隨我神運，前詣浴室，伺候沐浴。

清水度魂天尊

引旛至浴室前立

伏以光騰三景，煥銀漢之靈芒。慶藹五華，挹瑤崑之神景。龍負瓶而蘭池湛湛，鳳灑枝而蓮沼輝輝。定水風涵，灌沐一真而玉皎。道山霞潤，潔清萬妄以金澄。大哉變化之玄，至矣靈通之妙。今有齋主某人，修設玄都大獻玉山淨供，檄召萬類，還返一源。切慮歷劫寒都，多生冥境。客塵滓性，尚纏繞於生前。業垢縈心，益溟濛於死後。昏霧鎖重泉之杳，迷煙籠積夜之幽。幸藉陽光，獲超陰暗，匪降黃華而浴質，曷朝丹禁以升神。仰惟道炁充周，宸輝羅絡。願分靈於神水，更申飭於真曹。布蘭湯清淨之花，霏煙滃藹。飛芝液慈悲之水，寶梵騰凌。疾澄衆垢以逍遙，為洗羣迷而容與。見前清衆，同為讚揚。

巍巍道德尊，功行已圓齊。降身來接引，師寶自相携。慈悲灑法水，以用洗羣迷。永度三清岸，長辭五濁泥。

宣變浴室符

儀璘耀彩，經緯騰輝，金童灑七寶之華，玉女灌五香之瑞。宜恢神化，為滌真源。謹召靈寶玄局澣濯司靈官，天河東井君，浣濯夫人，部領幽魂，分男女兩班，入左右浴室，隨我神運，自在沐浴。

天河灌沐天尊

宣沐浴蕩穢符即蕩形符

扶桑合明，七元流精。光布三景，天河四傾。清神去垢，輪轉五行。日有赤童，中藏陽精。光芒潤耀，混合交并。東井黃華，玉醴金津。澡鍊魂魄，日月高奔。

宣沐浴清塵鍊真符即孤魂沐浴符

日精月華，甘露金泉。經緯羅絡，四象光圓。今日沐浴，清塵滌源。元始符命，洗蕩宿愆。左輝東井，右挹丹淵。流灌飛灑，泠泠自然。乘晨鍊化，上朝瓊軒。

宣沐浴澄神去穢符即返生符

天炁澄清，五色高明。玄黃施化，沐浴玄精。三晨朗煥，五緯交迎。胞胎結節，洗滌氛營。光鮮萬炁，靈漿自生。玉樓金室，祖炁流行。惡對落滅，寶梵雲征。

天河灌沐天尊

灌金泉玉醴以澄神，既端容止。被霓裳羽衣而映質，宜儼威儀。耀五銖而隨意粧嚴，佩三光而稱性周遍。謹召靈寶玄局巾笥司靈官，攝化司靈官，青玄仙衣玉女，仙帶玉女，部領幽魂，變化衣裳，嚴新冠帶，隨我神運，自在佩服。

金容出世天尊

宣變衣符

九曜扶衰，真炁變衣。四時合衛，五緯交輝。炁分羅綺，綵集宣威。六合扶挾，三炁玄微。至真煥爛，仙女齊飛。雲章冠帶，嚴潔天機。圓華素明，元始慈悲。

宣化衣符

金晶冶鍊，炁散玄黃。沐浴丹池，真炁

芬芳。二景冠帶，天爲隱藏。左振玉佩，右策金璫。浣除諸穢，遊行紫房。雲霞鮮耀，飛玄羽章。九駟洞煥，流金振芒。

宣普化衣冠符即天皇象符

梵炁彌羅，三光洞符。玄黃煥彩，沐浴雲波。今日冠帶，神景交和。六銖輕清，八芒流華。身不受塵，混合天樞。旋步雲綱，豁落玄圖。靈寶玉文，道炁相扶。

金容出世天尊

靈泉瑩質，寶飭華躬，沐浴而宿垢潔清，冠帶而新衣濟楚。飄飄舉動，乘靈光而搖曳徐行。湛湛步趨，躡神輝而踟躕讓畔。男左女右，少後長前，盍端肅於一忱，即肆覲於三寶。守雄抱雌二大將，各按所部，部衛幽魂，齊到帝前，至心朝禮。

十方靈寶天尊

引旛詣大道前

伏以蒼蒼正色，仰金闕於碧霄。渺渺大羅，聳玉京於紫漢。孰凌虛而倒景，能飛步以朝元。惟瑤壇法象於龍墀。

而寶座空浮於獅御。借盈尺地，可殫事上之恭。露方寸天，宜潔由中之敬。見前衆類，久淪陰暗，幸履陽光。被服陸離，睹容儀之端潔。冤愆飄忽，願神炁之周迴。澄死去之業形，還生來之本相。喜從民欲，實荷天恩。潔己造朝，爰仰瞻於象。魏齋心肆，覲期俯罄於蟻。衷少酬化化之恩，庸謝生生之德。雲鏞朗徹，月磬舒徐，法衆讚揚，幽靈朝禮。

引旛朝禮 至心朝禮

無上至真道寶大聖元始天尊。至心朝禮，無上至真經寶大聖靈寶天尊。至心朝禮，無上至真師寶大聖道德天尊。望天關而稽首，虎拜勤拳。扣帝闕以傾心，鳧趨肅穆。既覲祥雲之座，可趨甘露之筵。惟玉山供儀，先獻陳於真聖。俟瑤京玄澤，方回施於幽靈，宜辭芝陛以回形，姑詣茭城而隱迹。候聆呼召，即歆雲霞之珍羞。毋自蹻踰，有越雷霆之憲令。守雄抱雌二大將，各按所部部衛，幽魂往詣茭郭，伺候受食。

十方靈寶天尊

引旛詣茭郭

衆於斛前立班

伏以宮結紫煙，三寶御虛無之座。臺流朱日，萬真策空洞之輪。上混景於風雲，下依光於日月。扣瓊萬舞，龍厨羅六甲之珍。佩玉聯班，螭陛映三辰之粹。敢耀人間煙火，食冒儕天上雲。霞羞翹格，洪釐曲歆。丹悃念蘋蘩可薦，依稀嚮帝之恭。顧黍稷非馨，髣髴事天之敬。尚祈粹穆，特賜感通。今有齋主某人，修奉玄都大獻玉山淨供。肅按瑤圖，弘開瓊席。上奉三寶，中普供於聖賢。下賚羣神，希回施於品類。仗慈光而變化，徹梵炁以靈通。金玉層層，耀霏煙於几席。珠珍錯錯，凝寶霧於尊彝。伶華奏鈞璈之音，符寶擁龍華之仗。奇花錯落，異果駢蕃，瓊瑤映香飯之光，琅玕騰寶漿之炁。伏望玉毫遠照，金景來臨，灑法雨以飛空，耀慈雲而擁布。千真圍繞，翼轅嚴九鳳之吟。萬聖周迴，啓駕肅八鸞之唱。皆依次第，恪副邀迎。俯歆芹采之忱，

庸鑿葵傾之愫。芝壇備物，蘭鼎騰芳。法衆運誠，至心奏請。

至心奏啓，無上大羅三境至尊三寶上帝，昊天玉皇上帝，願運慈悲，流光法會。

皈依無上大羅境，三寶希夷福慧尊。

道炁鴻濛羅五億，靈光鬱勃覆三千。

琅函瑤笈開玄運，玉局琳房暢妙言。

願降慈悲歆菲薦，回資幽夜惠無邊。

和：不可思議功德。

至心奏啓，

東極青宮大慈大悲太乙救苦天尊，無上九天上帝，三十二天上帝，五靈五老，十極十華應化分身無窮無盡天尊上帝，太虛、太極、太霄、空洞、雲衢、霄嶠、天胎靈神，玄斗華神，八靈三素、承天象極、開德宣符上宰，鼎司兩臺公輔，左省右武內班外聯，五帝四司，三官四聖，天曹列職，星曜真靈，南丹洞陽，東華神府，流傳至教，三洞尊神，東西南北、四維上下、過去見在未來、正法慈悲救苦、左右侍真，經錄法部無鞅聖衆，主執禍福採訪巡遊，靈局真司一

切聖賢，願運慈悲，普臨法會。

皈依上界天中貴，萬帝森羅梵炁居。

紫極巍巍提化籥，玄班奕奕贊神樞。

聖真仙業分三境，日月星光照八區。

願降慈悲歆菲薦，回資幽夜潤饑虛。

和：不可思議功德。

至心奏啓，

雷霆主執風雨職僚，善惡權衡，玄虛真宰，五嶽聖帝，洞天福地靖廬治化得道真仙，本靖靈官將吏，齋壇防禦，傳言奏事，承宣典吏，受事功曹，效職真靈，十方主者，九州社令，里域五道、司命神靈，盡玄虛界一切聖賢，願運慈悲，普臨法會。

皈依中界玄虛際，風雨雷霆體好生。

上翊玉宸慈棹鼓，下提金粟慧燈明。

權司萬化分淫善，威耀三靈定德刑。

願降慈悲歆菲薦，回資幽夜溥惟馨。

和：不可思議功德。

至心奏啓，

北陰玄天酆都大帝，水府四帝，泉曲神君，江河淮濟四海八溟川澤潭洞主執神祇，九壘九幽拔錄掾吏，地水二府官

僚主宰，願運慈悲，普臨法會。

皈依下界幽寥際，風澤承天浩莫窺。

聖憲霜明司鬱絕，神章日赫典歸墟。

八圓橐籥秋潭似，九軌權衡曉鑿如。

願降慈悲歆菲薦，回資幽液澤之餘。

和：不可思議功德。

空浮雲蓋，聖真臨三秀之筵。霄映風

驂，神靈御五明之席。分一炁於妙道，

流七津於騫香。瓊饌瑤漿，象天厨之

鬱勃。琅華琪果，來仙境以玲瓏。依

依庸敬之旌，切切克誠之享。光風耀

彩，願千真宴景於雲霄。甘露流華，俾

萬類承光於澤壘。洪恩浩蕩，丹澤熒

煌。流智慧之真光，下提愚昧。回慈

悲之法食，俯施幽冥。庶承天渥之餘，

均脫地輪之累。空歌振響，梵唱騰和，

激揚箎鳳之鳴，晻藹龍箏之粲。望停

鹵簿，爲駐虛無，即監真而度生，庶迴

骸而起死。仰惟大道，曲賜鑒知。

十方靈寶天尊

衆官就坐

伏以降靈光開昏暗，帝渥雲慈。回法食濟饑虛，宸恩雨施。仰威顏之咫尺，



敷德愜之再三。宜提品彙以開春，庶饗珍羞而不夜。守雄抱雌二大將，各按所部部衛，幽魂來詣法筵，伺候受食。

### 弘濟無邊天尊

#### 引旛詣斛前

我聞象帝之先，凝真精而獨運。開天之後，鼓元氣以同流。分有物有則之靈，稟無形無名之粹。迴黃抱紫，胤火棗於玄關。出青入玄，毓交梨於丹谷。渴飲黃華之雲液，饑餐玄藥之烟芽。沖漢留丹，希夷養素。高步陰陽之表，性命雙融。超靈經緯之中，形神俱妙。奚驚心於六趣，曷喪魄於三途。自倏忽鑿七靈之扃，致英元離五神之御。華池風動，資九穀以頤形。玄谷煙生，假百昌而胤質。況生根淪於夜壑，而死蒂昏於寒庭。慘慘千齡，幽幽萬劫，雖形歸臭腐，若無假於飼。飴奈心本神奇，莫遽忌於舖餼。是以虛皇教主元始法王，駕八景之琅輿，擁五華之寶御。靈風九奏，飛龍遊戲於玉林。慶雲四纏，神鳳激揚於金籟。紫霞羅絡，

碧霧流明，因仙真啓請之勤，敷靈寶廣大之旨。謂流吹惡道，悲莫悲於饑縈。而羅敷善緣，歡莫歡於食施。有玄都大獻之訣，實清微普度之恩。異果奇花，寶漿香飯，立山盤於空界，象雲厨於天中。供三寶，奉千真，圓虛廣獻徧群神，徼十極方澤均沾。以茲法味之希夷，回施幽途之沈滯。庶令飽滿，可免饑虛。巍巍玄範之星羅，赫赫丹恩之日皎。今有齋主某人，憫矜幽類，廣闢法筵，遵聖訣以敷揚，徼靈旂而鑒映。金章振響，羽枝灑而梵炁徑行。玉字飛浮，雲和奏而宸輝發越。帝尊克饗，仙聖來歆，神風陶經緯之和，愛日啓圓方之瑞。宜呼地類，普拜天恩，俾歆供聖之餘，羞克遂回靈之至，願見前幽爽，盡入芡筵，隨我靈音，從容受食。

### 清涼甘露天尊

#### 引旛遶斛三匝，當前插

當職執水盂楊枝，灑斛，法衆旋行

#### 宣甘露通真符

功德金色光，輝輝開闔幽。華池流真香，蓮蓋隨雲浮。千靈沖元和，常居十二樓。急宣靈寶旨，自在天堂遊。

### 宣甘露法食符

泠泠甘露滋，法味難思議。騫香流七真，冥冥何生凝。享此法食者，生天登紫微。

### 宣普濟法食符

自然天厨食，吾今與加持。一粒遍十方，河沙共沈迷。饑渴永消滅，食之赴瑶池。今將獻亡靈，功德不思議。

### 弘濟無邊天尊

#### 宣祕梵開臟腑法食符

水火聚散路，神炁往來衢。焰焰焦枯盡，臟胃五方枯。玉液回清涼，玄漿通潤舒。真香流百脉，逍遙常自如。

### 宣靈梵清涼法食符

瀏瀏崑崙泉，泛泛玉源炁。施運庭苑中，幽香徹天地。玉女灌真香，玄厨擁祥瑞。服之億萬年，體力悉殊異。

### 宣玉梵甘露法食符

召聚玄元炁，濃噴流乳漿。黃華洞霄珍，潤液多滋涼。桂蒲雜靈根，冉冉通

肺腸。百神解歌舞，來遊無何鄉。

宣大梵恩重法食符

異寶出靈芳，浮玉瑩清光。泛景藹靈炁，廣滿難充量。神清得超度，當遊妙化堂。元周扣玄機，壽永椿劫長。

宣寶梵玉函法食符

寶梵演通妙，開關溢九幽。慶化精殊珍，瑞色長浮浮。飡飡法炁盛，深羽翠華樓。洗濯積劫穢，穩步朱宮遊。

宣真梵通玄法食符

長關天色光，燁燁映寶器。玄通無上食，靈寶無上味。高真所樂施，法音靡不至。快樂復飽滿，浮遊三界外。

大慈平等天尊

宣三光流精鍊化法食符

妙道生一炁，炁中分陰陽。凝化日月星，燦然流三光。九華合九道，八色映八方。煥爛洞真體，流精皈大芒。下生淵源宮，上徹無何鄉。縱體復飛跡，欵然都相忘。七寶流精結，混沌雜華房。曠服九雲散，此樂殊未央。

宣三光澤嬰鍊化法食符

玄絕九炁中，澤嬰觀太無。鬱儀煥暘

谷，結璘耀天衢。五星流寶光，斗極回乾樞。梵炁鬱勃散，咽御方踟躕。超跡天寶階，鍊芝服華敷。炁布萬神衛，舉形升太虛。

宣三光法炁鍊化法食符

浩精生法炁，氤氳凝天中。兩曜共澄徹，五緯交相通。三光煥已明，寶炁盈三宮。帝鄉會九老，咽服百骸豐。金華照光景，身與日月同。念道上聖前，萬劫壽無窮。

宣三光玉陽鍊化法食符

玉陽正真炁，妙道三景分。玄和唱靈音，八會敷瓊文。五老宴丹澤，飄飄乘景雲。大聖諸天衆，回駕飲玉津。三五定生籍，遊戲太上賓。華光朗無際，携手朝玉晨。

宣三光雲華鍊化法食符

引炁鬱羅外，九芒結雲華。七晨高上道，三景耀朱霞。捧香服晨精，功滿解世羅。鍊化塵劫盡，億劫不爲多。落籍三界庭，結友太上家。御景拱玄斗，八極何足賒。

宣三光導仙鍊化法食符

自然至真道，妙極玄中玄。萬天朝玉陛，五老參華軒。三光有靈炁，所度惟聖賢。勤行道仙業，咽漱吞華根。神形合三象，渺渺歸故根。鳳鳥翔十天，飛舉不顧還。

宣三光寶炁鍊化法食符

迢迢三天上，落落九玄臺。金童採芝集，玉女持花回。天寶揖仙客，俯仰升瑤階。天河灌東井，寶炁縈空來。嚙納漱瓊津，兆劫不復衰。矯首三清路，振衣何樂哉。

宣三光定光鍊化法食符

至矣上真道，妙哉靈寶章。吸景導五星，咽漱存華芒。流精灌百體，皓晶凝雪霜。洞達照內外，塵滓都消亡。體肌不復老，契此名定光。永宴大明館，斯爲不夜鄉。躡跡歸本根，九轉疑真常。

廣度無礙天尊

梵赤明真文

宣婁阿蒼，無想觀音。普施慧雨，總攬菩曇。稼那阿奕，忽訶流吟。華都曲麗，鮮菩育臻。答落太梵，散煙慶雲。

飛灑玉都，明魔上門。無行上首，回蹠流玄。阿陀龍羅，四象吁員。南閻洞浮，玉眸誥誥。梵形落空，九靈推前。澤洛菩臺，綠羅大千。眇莽九醜，韶謠緣遭。雲上九都，飛生自騫。那育郁馥，摩羅法輪。靈持無鏡，攬姿運容。馥朗廓奕，神纓自宮。刀利禪猷，婆尼咎通。宛藪滌色，太渺之堂。流羅梵萌，景蔚蕭嶠。易邈無寂，宛首少都。阿繼郁竺，華漠延由。九開自辨，阿那品首。無量扶蓋，浮羅合神。玉誕長桑，栢空度仙。獲無自育。九日導乾。坤母東覆，形攝上玄。陀羅育邈，眇炁合雲。飛天大醜，總監上天。沙陀劫量，龍漢瑛鮮。碧落浮黎，空歌保珍。惡奕無品，洞妙自真。元梵恢漠，幽寂度人。

酥醮抹味天尊

衆官就坐

香雲鬱鬱，湛夜炁以澄清。燭景輝輝，象晨陽而精燦。三寶傾光於碧落，群真御景於玄虛。甘露涵濡，檄三途而共饗。慈雲覆蔭，召萬類以同歆。瞻

華京翠玉之尊，覲東極紫金之相。百關充悅，萬竅豐腴，諒生慶幸之心，獲睹太平之運。然食乃外假，性本中空，仗煙火之粧嚴，慰幽靈之想慕。毋因外假，再貪凡食之塵。當悟中空，疾證法身之妙。惟虛所有，勿實所無。乃究竟之工夫，爲超凌之徑路。願言心聽，莫墮耳聞。載惟冥境輪迴，體性夙淪於業垢。幽途展轉，形神久鬱於迷塵。匪由變鍊之功，曷遂升遷之樂。玉杓中轉，瑤漢斜飛，瞻六陰之將消，慶一陽之初復。陶鎔陰染，禮亦宜之。成就陽靈，時則可矣。冀安和於神炁，俟召役於真靈。恭按科儀，宣行鍊度，傳符受戒，保舉登直，守雄抱雌，二大將，各按所部部衛，幽魂再詣茭城，伺候受鍊。

十方靈寶天尊

引旛入茭城

靈寶領教濟度金書卷之六十一

靈寶領教濟度金書卷之六十二

洞微高士開光救苦真人甯全真授  
靈寶通玄弘教水南先生林靈真編

科儀立成品

淨供合用

玄都大獻玉山淨供儀

法事如式

法師長跪上香

具位小兆臣某，謹重誠上啓三清上聖，十極高真，應化度人，無鞅真衆。仰冀隆慈，俯垂昭鑒。臣聞玄元始炁，煥七部之真風。天靈神光，敷三乘之德雨。慧力下提於黑壤，慈恩旁浹於黃垓。乾炁神形，運神機而化育。陽經陰緯，鼓聖瑟以裁成。今古咸資，人天共仰。今有齋主某人，微高玄之聖澤，建大獻之法筵。丹悃遙騰，仰荷聖真而日鑒。玄釐回施，俯徼品類以雲從。三途解熱惱之悲，六趣脫酸辛之苦。瓊漿玉

饌，既承若水之恩。琅液金膏，尤徯如天之賜。蓋以業輪旋運，冤網周羅，陰霾久滓於性天，昏翳暫迷於心地。欲復乾坤之本始，萬炁齊仙。宜資離坎之英華，百神受鍊。爰敷萬一，敢竭再三。重念臣昌運天開，慶基師闢。雲藏風靜，凝絳室之金華。日飛月奔，胤黃房之玉蕊。策甲丁而消陰試，運子午以駕陽靈。紹經緯之樞機，敢云獨蓋。鼓玄黃之聖海，誓贊同仁。茲普鍊於幽靈，冀疾徼於曹局。欲望真光遍覆，道炁彌綸。勅東井之仙曹，效勤莅職。命南宮之神吏，勉績承流。定浮沉於木金，辨清濁於水火。九還道備，精神凝玉瑩之玄。十轉功成，步虛證珠圓之妙。勃勃俱入，眇眇齊升，副齋主之丹忱，沛元尊之素澤。臣不勝懇切，虔祈之至，恭伺天恩，潛垂報應。

十方靈寶天尊

宣召鍊度官將符

上清靈寶玄壇，恭奉道旨。謹召朱陵火府火鍊大將軍，火鍊靈官，南昌上官鍊度大將軍，鍊度靈官，南昌度命君，

度魂化形君，太冥鍊屍君，十方猷威大神，丹靈大神，皓華大神，玄英大神，鍊度大神，變神大神，復相大神，正精大神，火府大神，返形大神，返魂大神，超生大神，鍊度司主鍊大將軍，主水大將軍，主火大將軍，火池神將使者童子，火鈴靈童，九光童子，水沼神將使者童子，黃華玉女，石景水母，流精玉女，青玄黃籙鍊魂官將，火鍊童子，火鍊玉女，黃華蕩形玉女，黃華冶鍊玉女，黃華鍊質玉女，黃華明眸玉女，光容玉女，光容童子，瑩身玉女，瑩身童子，清神玉女，清神童子，發光玉女，發光童子，水火交光大將軍，水火合形大將軍，水火聚炁大將軍，水火聚神大將軍，金木鍊形玉女，金木合炁玉女，九天普度院火府度亡真人，水宮拔亡真人，火鍊丹界真人，水濟無邊真人，水火交鍊真人，鍊度合屬官吏，疾速來臨，聽候策召。切以炁混一元，高運紫虛之域。功該萬有，昭羅朱火之曹。扶帝化翊天機，恢神威提地紀。旌旄赫奕，布聖日於春生。劍佩葳蕤，敷靈

風於秋殺。權衡有賴，陶冶無遺。今有齋主某人，誠罄小心，筵開大獻，承聖真回施之澤，恢品類溥度之功。六趣三途，快歆霞饌。九幽五苦，恣享雲羞。更期變鍊於陰陽，庶俾飛騰於經緯。芝頌方域，永停黑鬱之冤輪。草鞠園扉，方契清微之仁籥。茲也三華鬱秀，四氣朗清，蓮座浮空，仰千真而監度。蘭場顯設，徼萬類以回靈。願沛雨露之恩，式闡日星之令。指揮西坎，建寶井以輝輝。嘯命東離，立神庭而燦燦。黃華降結璘之粹，炎光流鬱儀之精。九鳳徘徊，還陽靈於萬劫。五龍奮迅，澄陰翳於千齡。永辭金剛之塵，均賴玉隆之會。皈心切切，伺命拳拳，玉清洞章，謹當宣告。

火鍊丹界天尊

宣混洞赤文章

元始開運，太玄肇靈。虛極無象，一炁流形。化生二景，五緯凝精。混合自然，坦除結嬰。總真布焰，煥赫九清。炎持廓奕，七絕齊并。祈師盧浩，丹天耀精。朱光鍊度，赤藹散明。三華鬱

秀，耀映帝宸。

黃華蕩形天尊

天生水而歸一，圖位子而配坤。先建水池，昭合造化。謹請靈寶玄局主水仙靈官吏，隨我神運，變化水池，普為幽魂，沐塵蕩質。

黃華蕩形天尊

宣主水大將軍符

陰精運化，神津灌玄。黃華東井，攝靈聚仙。玉清告命，萬神昭宣。飄輪下降，流灑雲泉。遊爽受鍊，返魂更生。

黃華蕩形天尊

宣建水池符

金醴玄津，森羅淨霑。玉龍灌溉，水池映真。滌垢豁塵，萬炁齊新。大道宣化，壬癸流形。陰光浩湛，飛鍊魂形。

黃華蕩形天尊

宣月魄符

黃精啓輝，元音內章。映觀太玄，開洞萬方。散蔚寒颯，七晨玄朗。圓明遊耀，浮華九空。五帝夫人，躡雲挹風。流霞八素，返形易容。注炁東井，天河灌芒。幽靈受化，神景敷張。

黃華蕩形天尊。

宣降真水符

太玄含化，八景齊并。五老祕諱，太陰通明。璇璣運轉，招真致靈。陰光降炁，變鍊鬼魂。天漿下注，流濯利貞。

黃華蕩形天尊

宣真水合同符

石景水母，圓光曜華。金門降體，天人揚歌。長庚吐輝，五龍負河。流英降炁，玉津同符。鍊度生仙，乘景太無。靈池無鏡，陰精飛羅。

黃華蕩形天尊

地生火而居二，圖位午而配乾。次建火池，昭合造化。謹請靈寶玄局主火仙靈官吏，隨我神運，變化火池，普為幽魂，鍊神陶炁。

宣主火大將軍符

閻浮玉洗，洞妙自真。炎熾丹天，晃朗朱陵。玉清告命，萬神敬聽。降司離化，配合日星。幽微鍊化，飛騰玉京。

玉眸鍊質天尊

宣建火池符

南方陽靈，丹精大神。降炁變易，流火

神庭。炎輝瑩徹，赫曦精熒。亡魂鍊質，迴骸返嬰。金光照耀，上宴玉清。

玉眸鍊質天尊

宣日魂符

赤爐丹景，圓華九明。太輝啓晨，煥耀朱精。五帝肇霞，洞映萬生。金烏楊彩，散光九靈。扶桑駕燧，絳雲敷平。紫霞鬱映，珠貫飛星。流注真炁，丕朗南陵。爽幽灌景，碧落高澄。

玉眸鍊質天尊

宣降真火符

丹精南映，九鳳乘陽。丙丁委炁，乾坤施張。鬱儀降化，左揖同梁。樞機周密，擲火飛揚。冶鍊離貞，更生神鄉。

玉眸鍊質天尊

宣真火合同符

朱明上景，熒星騰輝。太陽洞耀，離光赫熿。中有赤帝，凝靈太微。神真散炁，妙契天機。返生起死，玉眸仙飛。朱陵度命，萬炁敷施。

玉眸鍊質天尊

炎輝左煥，素精右騰。象日月之離羅，靈光照耀。宛風雲之滃藹，梵炁飛旋。

神真上下以宣勞，仙聖往來而效績。執籙把籍，鼓節揮幢，宜檄召於群靈，俾證臨於普鍊。守雄抱雌二大將，各按所部，部衛幽魂，旅進壇前，伺候受鍊。

水火鍊形天尊

引旛詣座前

宣引魂入鍊符

衆誦青玄凝真導魂章

玉京萬法大羅尊，千重寶梵億玄言。碧霞絳雲列衆道，玉闕金閣敷真文。偃定高真遊至空，八極飛神度無邊。鬱鬱昭昭萬炁中，吐聲如嬰炁成紋。振動梵天是空道，靜明法耀擁慈雲。超關昏衢北羅艷，列上金簡還靈明。炎炎火池成清涼，解刃挫鋒悉摧紛。豁散業境空法力，保召罪性來吾壇。天尊聖濟本無際，萬天萬地承真元。莫有不從不化度，超凌三界佐虛玄。隨心所召願心歸，仙信梵音如甘泉。一聞百骨解熱惱，朱陵開度成至玄。超凡大道入慈悲，不濯巨細惟翩佺。華夏泠泠引汝魂，逍遙獨步紫虛天。

水火鍊形天尊

接天潢於瑤圃，炁貫方諸。招熾阿於金門，光凝華蓋。可澄翳垢，俾返虛靈。謹請靈寶玄局水鍊仙靈官吏，隨我神運，引領幽魂，入赴水池，依科受鍊。

宣水鍊符

引旛插水池中

北方黑帝，騰光紫微。壬癸正炁，玄武凝輝。鍊形淪垢，肅肅神儀。惡根化消，結節清夷。混合升度，逍遙陽扉。

黃華蕩形天尊

宣月華符

黃炁陰華，玄精固仙。輝光洞照，散耀八圓。石景玉女，降靈鍊魂。九空澄湛，萬竅節宣。洗濯宿垢，飛躡天根。

黃華蕩形天尊

宣月簡符

玉胎鍊仙，結璘飛英。圓光散輝，變鍊幽靈。九陰齊化，流芳耀形。內外瑩徹，飛觀紫庭。尸累清蕩，天靈節榮。

黃華蕩形天尊

宣真水鍊形符

陰精凝化，東井靈源。天河灌沐，清水度魂。飛英玄華，陶沐囂塵。宮室鮮潔，臟腑還靈。胞胎結節，離合自然。金童玉女，流香濯津。蘭池鍊浴，身登玉宸。遊觀太空，億劫無傾。

黃華蕩形天尊

宣黃華蕩形符

東井黃華，石景玉精。飛玄水母，金醴玉津。滔滔源源，不竭池亭。九龍吐灌，三光垂精。仙人吐潤，鍊度幽靈。內外朗徹，表裏洞清。百關九竅，元炁滋榮。經絡臟腑，萬神自生。胞胎結節，隨水開局。死炁斷絕，惡根沉零。我今鍊化，死骸生魂。返故易貌，玉體金容。變化鍊度，飛升紫庭。

黃華蕩形天尊

宣太玄陰生符

先天自然，凝華會靈。陰零陽消，奔飛萬神。壬癸祖炁，生魂育嬰。神合炁合，鍊景還形。躡雲嘯朗，結璘齊并。遊行玉光，天地無傾。

黃華蕩形天尊

宣水鍊變仙符

黃華蕩形天尊

宣水鍊變仙符

長生大君，鍊形還真，白元聚魄，無英拘魂。太一總御，司命保生。桃康合延，變化九陰。制鍊元精，玉體金嬰。七世尸穢，嚴潔芳馨。甲乙丙丁，壬癸庚辛。戊己冲和，造化發榮。乾施坤運，八素圓晨。

### 黃華蕩形天尊

右丁左丙，運胎水以霽靈。地緯天經，返真源而湛寂。陰氛永蕩，陽華更生，宜灌溉於五芽，可光明於萬體。謹爲攝降東方青芽朝華之炁，南方朱丹凌霞之炁，西方白石王醴之炁，北方玄滋瓊飴之炁，中央琳華醴泉之炁，流布五臟，輝潤三田，俾靈關洞清，華池澄湛。

### 宣五芽符

九炁青精，肝魂衛生。三炁丹華，心神輝明。七炁素液，肺魂調寧。五炁玄津，腎精攝英。一炁黃胎，脾意流榮。帝一尊君，握靈萬神。五內鮮泰，回真固嬰。得成胎仙，逍遙上清。

### 五靈升舉天尊

水鍊周圓，玄恩昭曠。謹請主水仙靈官吏，部領幽魂，普出水池，伺候火鍊。

### 水火鍊形天尊 引旛出水池外

瞻絳華於炎闕，炁藹丹陵。揖義御於青畿，光騰陽燧。可陶業累，俾證清虛。謹請靈寶玄局火鍊仙靈官吏，隨我神運，引領幽魂，入赴火池，依科受鍊。

### 宣火鍊符

引旛插火池中  
南方炎帝，凝精太微。丙丁正炁，朱雀騰輝。丹鳳流響，朱煙散飛。融英降炁，治鍊陰儀。流汨之沼，丹陵耀離。

### 玉眸鍊質天尊

### 宣日精符

炎精凝圓，絳光流鮮。九龍策駕，擲火揚前。朱明散輝，陶鑄胚暉。陰靈鍊翳，胎根潛蠲。身飛玉都，永周劫年。

### 玉眸鍊質天尊

### 宣日簡符

鬱儀朗照，六合洞明。攝幽開光，流華飛英。紫赤颯象，丹霞鍊形。九葉冤障，鎔化無生。陽神聚景，受書朱陵。

### 玉眸鍊質天尊

### 宣真火鍊形符

炎神散精，八冥流光。圓靈正炁，符合天陽。注英丹池，鍊冶玄黃。幽爽飛化，百骸乘芳。玄祖易質，太虛飛翔。六府返炁，三宮運芒。群陰震伏，尸根滅張。熒星轉燭，出入福鄉。

### 玉眸鍊質天尊

### 宣玉眸鍊質符

流火鍊質，玉嬰返形。九陰施化，五神合靈。南離正炁，上貫朱陵。左命飛火，右嘯炎精。南閻洞浮，太微神庭。飛英聚炁，攝陰返生。真火陶鍊，形神肅清。罪翳消滅，冤債和平。經絡臟腑，元陽敷榮。魂魄關節，一時回靈。改除故貌，萬竅光明。永離冥鄉，乘化霄征。壽均天地，億劫無傾。

### 玉眸鍊質天尊

### 宣太玄陽生符

太陰鍊形，太陽回靈。幽尸沉翳，受陽之精。元炁重敷，攝歸萬神。百骸復故，五臟錄真。榮衛鮮暢，魂魄還明。周旋生門，高奔帝晨。

### 玉眸鍊質天尊

宣火鍊變仙符

務猷運化，鍊質成神。皮膚毛髮，肝神合明。耳目鼻口，心神守靈。筋骨牙齒，肺神虛成。孔竅精液，腎神育嬰。內外榮衛，脾神魂停。十干羅絡，陰極陽生。洞陽火鍊，玉胞金晶。得為真人，躡景神庭。

玉眸鍊質天尊

右壬左癸，運胎火以輝華。陽耀陰靈，陶生根而洞明朗。頓消地累，式遂天游，更灌注於九陽，庶澄凝於億劫。謹為攝降一陽混溟瑋理之炁，二陽泛華紫微之炁，三陽天婁鳳車之炁，四陽中女辟邪之炁，五陽太皇微延之炁，六陽化真白灑之炁，七陽絳實子光之炁，八陽天真命仙之炁，九陽太皇寂照之炁，流布百脉，充盈萬關，俾妄陰永消，真陽益固。

宣九陽符

太極金書，九陽玉文。混茫祖炁，輝煥天根。圓靈高清，扶搖玄煙。迴風下映，五色飛鮮。灌瑩內外，洞入自然。經絡堅實，臟腑生全。大帝有勅，反陰

還乾。群靈受度，宴景芝田。

九陽生化天尊

火鍊周圍，洪慈浩蕩，謹請主火仙靈官吏，部領幽魂，普出火池，伺候交鍊。

水火變形天尊

引旛出火池外

實離虛坎，昭水火媾粹之精。降乾升坤，闡陰陽鍊胎之妙。為混凝而備質，可妙合以成人。謹請靈寶玄局水火鍊度仙靈官吏，隨我神運，引領幽魂，水火交鍊。

水火變形天尊

引旛插水火池之間，宣水火交鍊符

鍊符

坎升離降，虎走龍奔。天一地二，子午胎仙。南樞北機，烏兔遶旛。黃華逆飛，炎光下傳。周迴九六，普鍊無邊。太極真炁，運合乾坤。九轉神化，飛升自然。

水火變形天尊

宣金液鍊形符

金液鍊形，與道合真。開明三景，是為天根。無幽無極，無始無終。元皇九

醜，靈魔絳宮。紫雲飛天，身乘六龍。水上火下，流入三宮。神歸陽明，大道自通。

回形轉化天尊

宣回尸起死符

靈芝無根，衆化之原。中凝七魄，上結三魂。二十四真，出入無門。杳冥之內，恍惚之中。隨劫存亡，逐炁而生。外凝混朴，內養七經。五神植華，三台敷榮。紫闕素童，返形歸英。騰雲而升，騁霧浮空。中有玉真，號曰神公。左挾無英，右衛白元。玄獸過後，丹禽導前。上浮翠華，下擁金蓮。香炁凝空，甘露無窮。食之無盡，尋源不終。

回形轉化天尊

宣百神混合符

千和萬合，自然成真。真中有神，長生大君。無英公子，白元尊神。太乙司命，桃康合延。執籙把籍，保命生根。上遊上清，出入華房。八冥之內，細微之中。下鎮人身，泥丸絳宮。中理五炁，混合百神。十轉迴靈，萬炁齊仙。仙道貴生，無量度人。上開八門，飛天



法輪。罪福禁戒，宿命因緣。普受開度，死魂生身。身得受生，上聞諸天。諸天之上，各有生門。

### 全形復性天尊

#### 換紅旛

二景飛華，已淪幽陰之死炁。九霄胤粹，方還本始以生神。宜端傾日之恭，期拜發煙之惠，各嚴容止，當爲啓聞。謹請靈寶玄局主鍊仙靈官吏，引領幽魂，隨我神運，詣九天壇，伺候玄恩，一時生神。

### 九天生神天尊

#### 引旛詣九天壇

臣謹重誠，上啓九天生神上帝，恭望洪慈，曲旌丹悃。伏聞鴻濛無象，三元潛育物之功。溟滓生精，九炁煥結形之妙。若稽寶笈，肆演瓊科。流水之精，鍊而爲胞。灼火之明，鍊而爲胎。乘木之真，鍊而爲魂。柔金之形，鍊而爲魄。合土之英，鍊而爲臟。致坎之靈，鍊而爲腑。昭離之精，鍊而爲竅。激震之聲，鍊而爲景。和兑之榮，鍊而爲神。凡斯玄微，亶繇橐籥。今有齋主某

人，修奉玉山淨供，回施萬類，普濟三途，饗乾坤之瓊羞，膺坎離之玉鍊，饑渴允濟，形魂潔清。然念久隔陽靈，致五行之蕩失。猶紫陰累，恍萬炁之飛奔。死骸雖還，生神莫備。匪賴蒼赤青綠黃白紫碧黑之神輝纏絡，曷俾胞胎魂魄臟腑竅景神之靈彩周圓。願沛天恩，俯提地爽。黃房斷死，密符敬唱以回靈。紫戶生仙，昭邁劫年而御景。皈心真切，拜手勤渠，恭俟慈悲，洞垂鑒映。

### 九天生神天尊

謹上請鬱單無量天帝真胞命元元一黃演之炁，九重下降，爲受鍊幽靈纏其胞，使胞元宣通，上徹於天以生成。

#### 宣開陽生神寶符

混合空洞炁，飛爽浮幽寥。延康無期劫，眇眇離本條。苦魂沈九夜，乘晨希陽翹。太有通玄戶，鬱單降神霄。黃雲凝靈府，陰陽炁象交。胞元結長命，惡根應化消。桃康合精延，二帝秀玉飄。灌溉胞命門，精練神不凋。九天命靈章，生神神自超。元君遏死戶，司

馬誦洞謠。一唱萬真和，九遍諸天朝。稽首恭劫年，度此榮舊苗。謹上請上上禪善無量壽天帝真胎命元洞冥紫戶之炁，九重下降，爲受鍊幽靈纏其胎，使胎結解根，下響於地以固靈。

#### 宣明陽生神寶符

無量結紫戶，炁尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒史伯原，結胎守黃房。斬根斷死戶，熙頤養嬰童。禪善導靈炁，玄哺飛天芳。華景秀玉質，精練自成容。務玄育上生，羅列備明堂。太虛感靈會，命我生神章。一唱動九玄，二誦天地通。混合自相和，九遍成人功。大聖慶元吉，散華禮太空。諸天並觀悅，一切稽首恭。謹上請梵監須延天帝真魂命元長靈明仙之炁，九重下降，爲受鍊幽靈纏其魂，使魂門通神以達精。

宣始陽生神寶符

須延總三雲，玄元始炁分。落落大梵

布，華京翠玉尊。明梵飛玄景，開度長夜魂。遊爽赴期歸，炁炁返故根。太帝號陽堂，字曰八靈君。九聞回綠道，胎炁生上元。陵梵度命籍，太一輔精延。泥丸敷帝席，三部八景分。魂生攝遊炁，九轉自成仙。琅琅九天音，玉章生萬神。三徧列正位，炁參八辰門。玄關遏死戶，靈鎮津液源。應會感靈數，明道潛回輪。慶此嬰兒蛻，稽首讚洞文。

謹上請寂然兜術天帝真魄命元碭尸冥演由之炁，九重下降，爲受鍊幽靈纏其魄，使魄戶閉關，天王降仙以安寧。

宣太陽生神寶符

寂然無色宗，兜術抗大羅。靈化四景分，萬條翠朱霞。遊魄不顧返，一逝動群魔。神公攝遊炁，飄飄練素華。榮秀椿劫期，乘運應靈圖。空洞生神章，瓊音逸九霞。一唱萬真會，騫爽合成家。九轉景靈備，鬱鬱曜玉葩。兜術開大有，一慶享祚多。上聖迴帝駕，嬰兒歛以歌。不勝良辰會，一切稽首和。謹上請波羅尼密不驕樂天帝真臟腑命

元五仙中靈之炁，九重下爲受鍊幽靈纏其五臟，使五臟納津，五帝朝真以存神。

宣上陽生神寶符

翻翻五帝駕，飄飄玄上門。遊步黃華野，迴靈驕樂端。採集飛空景，舊爽多不存。太微迴黃旗，無英命靈旛。攝召長夜府，開度受生魂。公子輔黃寧，總錄具形神。玉章洞幽靈，五轉天地分。炁鍊元臟腑，紫戶自生仙。數周衆真會，啓陽應感繁。玉女灌五香，聖母慶萬年。三界並歡悅，稽首禮天尊。謹上請洞元化應聲天帝真靈府命元高真沖融之炁，九重下降，爲受鍊幽靈纏其六府，使六府調泰，胃筦生津以納和。

宣元陽生神寶符

應聲無色界，霄映冠十方。迴化輪無影，冥期趣道場。靈駕不待轡，朗然生神章。空洞諒無崖，玄爽亦爲疆。鍊胎返本初，長乘飛玄梁。斬畜喪天真，散思候履常。斬伐胞樹滯，心遊超上京。願會既玄玄，悟我理兼忘。介福

九天端，交禮地辰良。混化歸元一，高結元始王。稽首儔靈運，長謝囂塵張。謹上請靈化梵輔天帝真元府命元高仙洞笈之炁，九重下降，爲受鍊幽靈纏其九竅，使九竅開聰，星辰朗朗以開通。

宣正陽生神寶符

玄會統無崖，混炁歸梵輔。務猷運靈化，潛推無寒暑。乘數構貞條，振袂拂輕羽。瓊戶有妙韻，汎登高神所。圓輪無停映，真仙森列序。上上霄衢邈，洞元深萬巨。秀葉翳翠霞，停蔭清泠渚。遨翫怡五神，繁想嘯明侶。五難緣理去，沖心自怡處。爽魂隨本根，疊疊空中位。七誦重關開，豁滯非神武。運通由中發，高唱稽首舉。謹上請高虛清明天帝真華府命元真靈化凝之炁，九重下降，爲受鍊幽魂纏其八景，使三部八景整具形神，幽夜光明以防身。

宣通陽生神寶符

清明重霄上，合期慶雲際。玉章散沖心，孤景要靈會。煥落景霞布，神衿靡不邁。玉條流逸響，從容虛妙話。靈

音振空洞，九玄離幽裔。感爽無凝滯，去留如解帶。明識生神章，高遊無終敗。玄景曜雲衢，跡超神方外。應感無方圓，聊以運四大。研心稽首誦，衆聖共稱快。

謹上請無想無結無愛天帝真嶽府命元自然玄照之炁，九重下降，爲受鍊幽靈纏其身，使三關五臟，六腑九宮，金樓玉室，十二重門，紫戶玉閣，三萬六千官府，三千六百機關，根原本始，一時生神，使萬神具備，毛髮生身，諸天下臨以得生。

#### 宣萌陽生神寶符

無結固無情，玄玄虛中澄。輪化無方序，數來亦叵乘。誰云無色平，峨峨多丘陵。冥心縱一往，高期清神徵。良遇非年歲，劫數安可稱。浮爽緣故條，返胎自有恒。靈感洞太虛，飛步霄上冰。津趣鼓萬流，潛凝真神登。無愛固無憂，高觀稽首昇。

#### 九天稱慶天尊

九炁具足，萬景光輝，提陰關既死之形，還陽景始生之性。法身微妙，道體

希夷，行正步於虛無，永超神於寥廓，亶由陶冶，莫罄載銜，宜遡圓清，端誠禮謝。

#### 九天稱慶天尊

九鍊功成，萬緣塵散。形神疏瀹，已照備於儀容。氣象粧嚴，更蕃飾於冠帶。謹召靈寶玄局巾笥司靈官，攝化司靈官，疾速赴壇，隨我神運，再爲幽靈整潔衣冠，欣慶受度。

#### 宣天皇象符

太上初炁混陰陽，水火既濟方玄黃。鍊質玉容合仙品，飄飄飛步遊仙鄉。滓穢消除神明清，霞衣錦佩光琳琅。靈寶通玄無上聖，開度功德不可量。一聲玄梵徹三界，綿綿道德生仙鄉。

#### 逍遙快樂天尊

見前衆靈，乘清微三華之耀，沐妙嚴百寶之輝，解脫幽關，來臨陽境。蓮燈晃朗，發性海之真光。芝饌森羅，慰心田之妄想。水火鍊而百關月皎，衣冠備而五體春融。濟濟在庭，雍雍就列。膺今時之快樂，諒已歡顏。思昔日之幽寥，不堪回首。便當直截返照，猛省

內觀，心中之枝葉都捐，性裏之根荄獨露，一得永得，逍遙無何有之鄉，豈不快哉。更伺戒演九真，錄頌三洞，仗真靈而證度，役將吏衛真，高步綠羅，超棲碧落。珠環誠罄，酬天尊開度之恩。琚玖枕殫，副齋主懇祈之願。守雄抱雌二大將，各按所部部衛，幽魂來詣壇前，聽宣妙戒。

#### 億劫應化天尊

#### 引旛詣法師座前

#### 智慧頌

智慧生戒根，真道戒爲主。三寶由是興，高仙所崇受。汎此不死舟，倏忽濟大有。當此說戒時，諸天來稽首。智慧起本無，朗朗超十方。結空峙玄霄，諸天挹流芳。其妙難思議，靈感真密通。有有竟無有，無無無不容。智慧常觀身，學道之所先。眇眇任意肆，自然錄我神。天尊常擁護，魔王爲保言。晃晃金剛體，超超太上仙。道生一而分三，曰大曰人曰地。人合三而成一，惟精惟炁惟神。炁稟陽而符天精，形秉陰而契地粹。神以御炁，

神存而炁亦存。炁以留形，炁散則形亦散。其生也炁與形會，神入而爲主宰。其死也形逐炁亡，神出而退虛空。有善業則神升九天，有惡業則神降九地。雖炁有陰陽之間，形有升沈之殊，而神往來其間，苦樂互膺，未始頃刻停閑也。神之爲神，沖虛妙粹，炳煥靈明。未有五太之先，此神已具。縱歷億劫之後，此神不亡。特受中降，靈爲物所誘。因物造業，爲形所累，致有善惡之判。譬猶曉鏡凝塵，秋雲蔽月，其中光明瑩徹，未嘗因之加損也。見前衆靈受報，萬類反觀，本始俱稟沖和，孕形炁而爲人，配天地而並立，元神宴御，與道合真。奈何形墮物遷，神逐業化，輪轉六道，循環四生，不覺不思，愈趨愈遠，流蕩汨沒，業實縈之。茲也供設玉山，恩頒金闕，善道乘光而至，惡道破暗而來，聽法聞經，饗食受鍊。雖形散爲炁，炁聚爲形，而所以駕是形御是炁者，匪神孰能爾哉。是則暫焉昏昧，爲異趣周流，而本來昭昭，未嘗不在也。盍亦乘本來之昭明，覺暫時之

昏昧。自天道來者，當思快樂福報，會有盡時，終受沈溺，散入諸趣，不可貪歡悅而溷我神也。自神道來者，當思福善禍淫，寧無僭濫，報盡淪墜，易墮畏途，不可恃權柄而汨我神也。自人道來者，當思世諦虛偽，業機攸啓，生滅既速，途苦易趨，不可慕紛華而滓我神也。自地獄道來者，當思夙縈愆累，致膺苦惱，幸離幽暗，宜脫輪迴，不可圖逸樂而蔽我神也。自餓鬼道來者，當思惡業久纏，今受饑渴，幸諧飽滿，宜脫輪迴，不可因飲食而累我神也。自畜生道來者，當思冤對執縈，致墮異類，幸離惡趣，宜脫輪迴，不可羨人天而迷我神也。蓋修善修惡，均謂之業。生地生天，均謂之報。善多惡少，則準量而報餘善。惡多善少，則權衡而報餘惡。業盡報盡，然後復爲人耳。人爲善惡之關，從茲展轉，百千萬劫，無有已時。而我固有之神，爲業所牽，奔善馳惡，曾無寧息，豈不大可憐哉。孰若澄心獨悟，見性惟思。生善道者，毋以善道爲可恃，須知惡道之終在。生

惡道者，毋以惡道爲可慕，須知惡道之常隨。絕去二邊，自明一見，不思善，不思惡，靜極光通達，寂照含虛空。惟覺我之元神，本來清靜，若定水之無波，本來光明，若秋空之無翳，靈明瑩徹，朗覺妙圓。然後以茲清靜光明之神，悟彼真常空寂之性。近觀諸塵，塵塵何有。諸塵無有，業報自空。業報既空，六道亦無。六道既無，輪迴自息。輪迴既息，一真獨存。無去無來，不生不滅，蕩蕩乎與太虛同體矣。回思向者，天堂快樂，地獄辛酸，人境寵榮，旁生悲苦。如夢之覺，如醉之醒，曾何足以滓吾天倪哉。見前衆靈，若能從茲解悟，便可升入道境，洞徹自然，天地有終，此神無弊，劫運有壞，此神長存。倘有無之見未明，真妄之機莫悟。惟思執着，終墮輪迴，帝澤難逢，宸恩不再，良可哀哉。昔我元始上帝，憫衆生之愚昧，說九戒之圓通，正己正心，檢身檢性，善根已熟者以戒護衛，愈增光明。惡根未消者以戒禁防，自然滅斷。實昏衢之慧燭，乃苦海之

慈航。生前修持，不經地獄。身後佩奉，徑上天堂。今當恭按科儀，普為演說。先皈依於三寶名號，次宣示於九真戒條，萬聖證明，十真鑒察，各宜端肅，諦聽無譁。

### 道經師寶天尊

按人各恭信

宣告幽靈，第一皈依無上道寶。

### 道寶讚

稽首皈依道，大羅元始尊。杳冥開祖劫，混沌立天根。願垂清靜法，開度此幽靈。和：往生神仙界。

宣告幽靈，第二皈依無上經寶。

### 經寶贊

稽首皈依經，真文煥八方。鍊金成鳳篆，揉玉寫龍章。願垂清靜教，開度此幽靈。和：往生神仙界。

宣告幽靈，第三皈依無上師寶。

### 師寶讚

稽首皈依師，慈悲轉法輪。先天傳大教，歷劫指迷津。願垂清靜法，開度此幽靈。和：往生神仙界。

三寶既已皈依，九戒今當傳授。

### 大慈說戒天尊

### 北帝頌

善哉元始尊，衆生慈父母。傾光紫微宮，曲映九幽戶。峨峨丘寒庭，回照廓冰浦。炎炎烈火獄，沛然灑法雨。圓通大哀智，常善濟衆苦。拔度長夜魂，今得稽首禮。

宣告幽靈，第一戒者敬讓，孝養父母，是名初真戒。

宣告幽靈，第二戒者克勤，忠於君主，是名念真戒。

宣告幽靈，第三戒者不殺，慈救衆生，是名持真戒。

宣告幽靈，第四戒者不淫，正身處物，是名守真戒。

宣告幽靈，第五戒者不盜，推義損己，是名保真戒。

宣告幽靈，第六戒者不嗔，凶怒凌人，是名修真戒。

宣告幽靈，第七戒者不詐，諂賊害善，是名成真戒。

宣告幽靈，第八戒者不驕，傲忽至真，是名得真戒。

宣告幽靈，第九戒者不二，奉戒專一，是名登真戒。

### 奉戒頌

道爲無心宗，一切作福田。立功無定準，本願各由人。虛己應衆生，注心莫不均。大聖崇正教，亦由雨降天。高陵靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

三寶瓊號，曠劫難聞，九真金條，歷生罕遇，對聖真而傳授，伏仙聖以護持。各宜瀰性書紳，澄心弦佩。如拱尺璧，靡造次之或謾。如護寸珠，匪斯須之敢叛。戒光映體，戒體回光，五帝威神，六宮掾吏，察命童子，護戒威神，密侍衛其形神，潛翊扶其容止，永辭有漏，升入無爲，勿生懈怠之心，自速輪迴之苦。以今雲笙韻徹，風磬聲沉，螭頭回芝蓋之班，鵲尾散蘭篝之篆。生神事畢，溥蒼蓋以染恩。結炁功圓，挾黃輿而均慶。神公趣凌霄之駕，靈童催汎景之輪。各宜莊肅五神，澄清一

志。佩符受券，得為天上之種民。御錄膺圖，永證玄中之極品。仰希大道，俯賜證明。

宣救苦簡 長生簡

宣生天籙 九龍符

宣大九龍符 超生符

宣妙戒牒 功德牒

宣朱陵符 普度券

宣運明誥 托生符

參鳳戒以逍遙，精神瑩朗。佩龍符而容輿，步武輕盈。伏願一性圓明，千緣蕩寂。寶光煥映，復五行相續之真。祖炁輝華，會萬劫長存之道。此乃箇中固有，不須向外別求，徑乘不死之舟，高宴無生之界。功德錯落，幽顯沾資。伺召役於真靈，關盟護送。方部衛於神炁，如律超凌。更冀從容，庶詣圓滿。

寶華圓滿天尊

臣謹重誠，上啓三清上聖，十極高真，應化度人，無鞅數衆。臣聞丹元凝妙，握萬化之神樞。皇極流玄，恢五華之聖籙。寂感密符於谷應，潛昭默契於桴

鳴，匪降匪升，無內無外。臣等依光紫禁，煥景黑單，荷鴻造之提携，副蟻忱之激切。恩流有截，澤被無垠。瞻獅座於玄峰，慶雲飛灑。返猊輪於紫谷，慧日虛圓。臣下情不勝瞻戀，屏營之至，謹稽首奉送。

迴輶頌

迴輶五雲輿，騰駕九章歌。倏忽沖天遠，醮壇香炁多。玄恩覃宇宙，福德遍山河。緬想神仙路，逍遙上大羅。謹召九天普度院守雄抱雌二大將，青玄黃籙溥度司太玄靈官玉女、功曹主簿，本靖主將某，副將某，護道某，監壇某，關同靈寶赫奕仙曹諸將，疾速赴壇，承領公文。隨我神運，部衛諸類幽魂，平步登天。

宣防送牒

宣命魔前驅符

見前衆靈，膺開度之殊恩，登玄虛之妙境。天花散漫，擁雲路以前迎。神璈鏗鏘，開霄衢而後從。寶蓮導升天之履，靈芝華藹景之冠。以神御神，神徑登於寥廓。以炁合炁，炁永證於虛無。

再拜玄壇，相將好去。

當職執幡，請五方童子，引靈出門前

法師下座

衆諷三界魔王章

宣給散牒 焚燎向來

寶華圓滿天尊

歸靜默堂

靈寶領教濟度金書卷之六十二

靈寶領教濟度金書卷之六

十三

洞微高士開光救苦真人甯全真授  
靈寶通玄弘教水南先生林靈真編

科儀立成品

淨供合用

大獻自然朝儀

步虛 入戶

燒香頌 各禮師存念如法

宣衛靈咒

五靈列位，煥鎮五方，始皇護魂，丹老衛形。皓靈侍魄，黑帝攝生，中央黃帝，統禦萬真。元皇誥下，幽夜開光，罪消北府，名列南昌。金錄定籍，玉宇除殃，朱陵鍊質，飛神太蒼。三官九府，無極神鄉，普受開度，上生天堂。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金

童，傳言玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域，真官正神，急上關啓臣今奉爲入意。以今陞壇行道，願得玉清道氣靈寶妙光下降，流入臣等身中。即使玄壇清淨，內外成真，天無氛穢，地絕祆塵，琳琅振響，十方肅清，萬魔不干，真誠上徹。令臣所啓之誠，速達徑御太上無極大道至真玉皇上帝御前。

請稱法位

具位臣某，今故燒香，願以是功德，奉爲十方三界，六道四生，萬類窮魂，三途滯爽，飛潛動植，一切衆生，皈身皈神，皈命，十方無上至真靈寶自然大道。乞原赦前生今世，生死宿罪重過，得免離三惡之道，五苦八難九厄之中。臣等身得道真，飛行虛空，白日升天，侍衛道君，逍遙無上七寶自然宮殿，永與道合，所啓玄感，應聲上御至真無極道前。

禮方

志心皈命，禮北方無極太上靈寶天尊。

志心皈命，禮東方無極太上靈寶天尊。

志心皈命，禮南方無極太上靈寶天尊。

志心皈命，禮西方無極太上靈寶天尊。

志心皈命，禮東北方無極太上靈寶天尊。

尊。

志心皈命，禮東南方無極太上靈寶天尊。

尊。

志心皈命，禮西南方無極太上靈寶天尊。

尊。

志心皈命，禮西北方無極太上靈寶天尊。

尊。

志心皈命，禮上方無極太上靈寶天尊。

志心皈命，禮下方無極太上靈寶天尊。

法師長跪宣坐懺

臣法衆等，志心皈身皈神皈命，十方無極大道太上靈寶天尊。懺悔普天率土，中國外夷，六趣冥靈，三途滯爽，胎卵濕化，鱗甲羽毛，蜎息跂行，蝟翹蠢動，無邊無極，一切衆生，及臣法衆等。自從無始以來，至于今日，或犯三業大罪，積若丘山，十惡深愆，盈猶巨海，並乞蕩除。皆願宿債疏澄，舊冤披散，咸得解脫，永離輪迴，升入無爲，克辭有

漏。臣等身入至仙，會道合真，神合真寂，洞入自然，性命合道，玄會無為，志心稽首，禮謝無上至真三寶。

三啓頌

樂法以為妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首體。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某與臨壇官衆等，謹同誠上啓太上無極大道元始天尊，太上道君，太上老君，無上玄老，十方已得道大聖衆，至真諸君丈人，三十六部尊經玄中大法師，天師君，上相上宰，四司五帝，三界官屬一切真靈。臣聞元始垂科，提群靈於苦海。虛皇出教，躋萬品於迷途。九清涵德雨之華，三洞布祥煙之蔭。金籙白簡，乘晨而幽壑光明。玉匱丹章，扣夜而寒庭廓朗。上極無上，高拱彌高，生生密贊於乾坤，化化潛資於經緯。帝張慧日，開光龍漢之初。師衍宗風，濟度鶴鳴之後。人天咸仰，今古攸遵。臣等職忝玄階，身依洪化。丹青證誓，期宣德以承符。金石微盟，庶憲天而宏道。況奉詞旨，敢不上聞齋意。齋主某夙陶靈澤，幸際昌辰，睹玄運之流行，喜赤書之煥爛。筵開大獻，微千真回施之恩。誠罄小心，冀萬類普沾之惠。超祖宗之億劫，和冤累於千生，集福家庭，流祥眷序。星壇顯設，微三極之靈光。霞笈敷揚，召十華之梵炁。九鳳來翔而門開甘露，六龍普變而厨

啓飛雲。東華摧黑鬱之幽，南上啓朱陵之耀，普提有識，共證無為。尚慮六道四生，三途五苦。業機自織，終天輪轉以無停。罪網高張，極地循環而莫已。非賴提携之賜，曷彰解脫之期。欲望皇極，垂慈蒼穹。錫宥降丹綸而赦過，落滅惡根。煥紫綉以除愆，疏澄善性。削塵非於黑簿，蕩妄垢於玄曹。身近天階，有侍衛送迎之喜。神離幽禁，無拘留逼合之憂。享六合之瓊羞，沐三晨之靈景。逍遙碧落，常臻福慶之期。遊宴清虛，永際太平之運。神形俱妙，衣食自然，遂齋主懇切之誠，副大道慈悲之願，所有真符，謹當告下。

告符

飛空步虛頌

開發

十二願

一願乾坤明素，二願氣象清玄，三願聖人萬壽，四願化洽八埏，五願天垂甘露，六願地發祥煙，七願四時應候，八願萬物生全，



九願家多孝悌，十願國富才賢，

十一願齋功廣被，十二願善瑞日臻。

### 存神復爐

香官使者，左右龍虎君，侍香諸靈官。當令臣建齋之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，蘭煙傳臣向來所啓之誠，速達徑御太上無極大道至真玉皇上帝御前。

### 迴輶頌

靈寶領教濟度金書卷之六十三

## 靈寶領教濟度金書卷之六

### 十四

洞微高士開光救苦真人甯全真授  
靈寶通玄弘教水南先生林靈真編

### 科儀立成品

淨供合用

### 大獻告札儀

靜默堂序立

華夏頌引至壇前

步虛 長跪上香

具位臣某，誠惶誠恐，稽首頓首，再拜上言。臣聞九清布化，群靈咸遂於生成。三洞流光，萬象均依於化育。況顛冥於業網，尤矜軫於淵衷，敢扣紫霄，爰據丹悃。今有齋主某，乞就某處，修設玉山淨供。遵依大獻靈文，普賚幽沉，均超輪轉。臣職惟領都教，理合陳情。切慮九趣三途，四生萬類，悽悽慘慘，化機鼓動於泉關。縮縮寥寥，報障循環於冥路。非賴帝恩之曲映，曷令鬼

爽之高躋。頃奏朱章，擬特頒於玉札。

諒飛丹詔，爲布告於玄曹。茲召役之有期，冀感通之無外，欲望慈雲覆蔭，慧日流明。許微臣如律以宣行，勅有司關盟而遵奉。下開地禁，上接天光，猶細雨密霧而來，普受開度。皆飛空步虛而去，不得拘留。宇宙春臺，乾坤壽域。臣下情不勝伺命之至。

八門開度天尊

引札至神虎幕

灑淨 普獻頌

普獻無邊聖，香烟散十方。願乘七寶臺，垂光五濁世。運度人天衆，咸令上法橋。同會證無爲，勤修不退轉。

伏以上帝垂慈，布仁風於八極。下愚苦惱，希法雨於九霄。故清微宏七部之金書，而赤明演三乘之玉範。廣提冥漠，丕拯沉淪。班列真曹，北魁著雌雄之職。恩周冥部，東華建左右之曹。有萬司如意之大神，有九天普度之官將。追魂攝魄，寒庭被照育之仁。聚精會神，幽夜沐生成之惠。將伸召役，盍罄懇祈。以今奉爲某人，修設玉山淨

供，普賚幽沉。十方三界，市區域以星羅。六道四生，列寰瀛而棋布。欲宣威於玉札，期散惠於金章。匪仗威靈，曷符應感。輒奉蘋蘩之禮，少摠葵藿之恭。伏願天駟載馳，雲旌順動，恬副再三之禱，不違方寸之私，清衆運誠，至心奉請。

至心奉請北魁玄範府神虎內真倒生玄司七玉女，追魂魄官吏，陰陽玉札二十四大將軍，靈寶如意萬司主行玉札三大神，追攝諸類傷亡五十三大神，九天普度院追攝諸類傷亡三十六真人，三十六將軍，守雄抱雌二大將，二玉女，四大神，玉清七道功曹，玄虛掌六道四生使者，掌九州社令功曹，掌十方道功曹，掌山林功曹，掌城隍功曹，靈寶玄壇諸司追攝官吏，本靖主將，合屬官吏。惟願風馬雲車，來屆香筵。和：受茲香花供養。

初獻

伏以晨陽赫赫，帝頒鳳詔以風行。幽夜寥寥，神領龍章而雷震。溥萬聖無

私之惠，敷九原有造之仁。仰企威靈，夙歛聖武。佐先天而立極，功典樞機，贊太極以開圖，籌參帷幄。陸離劍佩，掩藹旌旄。玉轡凌雲，頃刻遍虛無之境。金戈耀日，須臾周汗漫之鄉。職司追攝之崇，位列班聯之右，權衡攸在，變化難量。今有齋主某人。憫念重泉，矜憐滯爽，遵玄都大獻之旨。設玉山淨供之筵，上降天恩，下提地魄。普追呼於六道，咸嘯命於四生。五苦三途，九趣萬類，均離陰關而莅止，俱朝陽景以超凌。請命帝庭，已拜允俞之命。敷心神御，盍殫懇切之忱。諒宣德以承符，必效勤而受事。儀不及物，情見乎辭，不揆瓣香，恪祈采矚。

亞獻

伏以重泉碧落，孰非道炁之提封。紫簡丹章，悉藉神威之管領。茲遵依於青律，庸追攝於幽關，竄冀靈通，廓施神變。上召玄虛之主執，接引群迷。下提黑壤之魂儀，超離衆苦。或淪於刀兵疫癘，或殞於水火饑荒。爰分文武僧俗之殊，勿問士農工商之別，有主

無主，凶終善終。或曠野之游魂，或寒林之寄影，或悲愁於地獄，或凍餓於冥郊，或胎卵濕化之流形，或鱗介羽毛之異性，並乘丹絳，攝赴玄壇。俾解脫於業緣，各逍遙於道岸。剋時定今，毋違大道之章。起死更生，端藉同仁之惠。拳拳素悃，切切洪恩。

三獻 宣札

宣七玉女符 如意萬司符

九天普度符 諸使者符

宣牒

天章誕布，壇律具嚴。請密運於神功，爲速宣於帝澤。凌雲掣電，擲火流鈴，明檢鬼營，勅寒池而部衛。駿奔靈馭，開地戶以追呼。毋負盟言，自干玄憲，敢有遏截，束送羅酆。一如靈寶玄壇律令。

向來

大獻靈官醮儀

步虛 灑淨

入戶 各禮師存念如法

宣衛靈呪

元始虛皇，集炁居中，三境洞香，肇生

穹窿。七轉九虛，混合迴風，變化萬神，天地開通。吉日行道，萬魔敬從，晨暉朗照，默運元功。執節建麾，散花太空，十方普慶，劫運元終。和：與道合真。

### 鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今陞壇行道，願得玉清道炁靈寶妙光下降，流入臣等身中。即使玄壇清淨，內外成真，天無氛穢，地絕沃塵，琳琅振響，十方肅清，萬魔不干，真誠上徹。今臣所啓之誠，速達徑御太上無極大道至真玉皇上帝御前。

### 請稱法位

具位姓某，上啓靈寶玄局玉山大變神王，六龍普變靈官，溟滓大梵靈官，破獄司、追攝司、天醫司、監生司、五帝全形司、解結司、浣濯司、巾笥司、鍊度

司、攝化司、變鍊司、填捏司、給散司合屬仙靈，臨壇受事，一切威靈。伏聞元始開圖，三洞啓金書之祕。虛皇演化，九清昭玉範之玄。開夜壑以光明，昭寒庭而化育。玄曹變理，共揚慧日之輝。丹簡羅敷，誕布慈雲之澤。故列僚采，俾握機衡，化雲厨而妙絕芳鮮，破幽關而追提攝取。九轉顯成人之效，五靈昭復質之功，蕩萬古之冤輪，洗千生之業網。天經地緯，迎水火於南昌。陰坎陽離，鍊形神於東井。凡茲造化，具有司存。或列職於紫府玄都，或建官於青玄黃籙。上奉三天之令，下敷九地之仁，儻際齋修，盍伸皈向。今齋主某人，憐憫業類，胥溺幽冥，期垂曠蕩之恩，庸拯沉淪之苦。故陳滌祭，爰奉靈旂。伏望葑菲不遺，承天符而來下。葵藿可鑒，從民欲以照臨。清衆運誠，志心奉請。

志心奉請靈寶玄局玉山大變神王，六龍普變靈官，溟滓大梵靈官，青玄破獄入獄出幽冥司官吏，北魁玄範府倒生玄司七玉女，靈寶如意

萬司諸大神，九天普度院三十六真人，三十六將軍，玉清七道功曹，天醫六職尚藥靈官，九天監生大神，主產功曹，五方五帝君吏，靈寶追魂聚炁功曹，全形功曹，混元十二炁化生大將軍，靈寶解冤釋結靈官，能談善說靈官，聚魂復魄靈官，脫形離苦靈官，玉清攝魂屏穢靈官，九鳳破穢靈官，五方解穢官吏，天河東井君，浣濯夫人，靈寶巾笥司仙吏，青玄黃籙金木仙衣玉女，曲度司、普度司仙真靈官，南昌上宮朱陵火府鍊度仙吏，主水主火大將軍，火池水沼使者，火鈴靈童，黃華玉女，擲火萬里大將軍，十二河源大將，青玄黃籙鍊度官吏，玄都茭龍金龍驛吏，靈寶攝化司、變鍊司、填捏司、給散司仙靈官吏，臨壇受事，一切威靈。上遵帝勅，下副凡情，風馬雲車，來臨法會。

### 初獻

伏以傾光迴駕，紫清洞煥於天恩。監

真度生，丹赤皈依於聖力。仰惟神武，夙著威靈。修行於五劫之先，三靈推戴。典樞機於九霄之上，十極宣揚。御節鉞以透迤，森佩環而容與。霓章雲綬，羽儀端拱於玄班。月駟風輪，鹵簿周流於碧落。承恩綸而下邁，提苦爽以上征，仁化羅敷，德威煥耀。今有齋主某人，憫慈地類，蕩彼天常，遵藥笈之真科，建玉山之淨供。尚慮九趣萬類，六道四生。陰陽寇於生前，精神未復。水火考於死後，形骸猶羈。況冤業之互縈，與塵根之久積。魂歸惡趣，魄墮畏途。非憑陶冶之神功，曷使返還於祖炁。囊封露奏，已承楓禁之允俞。駟騎風馳，諒遍槐庭而播告。願不違於悃悞，庸恪副於忱恂。

亞獻

伏以東極慈尊，體清微而應化。北酆鬼帝，拱紫極以承流。玄曹恢廓於威風，黑壤皈流於聖日。壇儀告備，將開大獻之筵。惠澤敷施，願鑒小心之切。當局行事，列職宣符，六龍妙化於芳筵，九鳳肅清於塵宇。張門毀鎖，振雌

雄提攝之威。保真固靈，蠲滌衛疾傷之患。千冤開悟，萬業消鎔，蕩陰垢之芬葩，復陽靈之精粹。華池澄湛，天魔騰玉兔之輝。炎冶陸離，地魄射金烏之影。洗千生之死炁，妙八景以生神，穩上法橋，徑登道岸。庶藉神威之普被，共霑靈貺之旁敷。至於異類沉淪，久循環於業趣，亦賴同仁拯援，俾還復於人身。青律森嚴，洪恩赫奕，恪期應感，不負勳庸。

終獻

三獻既周，一忱畢露。願檐帷之暫駐，勒英蕩以遲留，伺臨召役之期，重賜提携之德，銀潢散彩，玉籟收聲。黃道雲開，溥十極慈悲之澤。紫垣日近，舒群靈功德之光。帝有恩言，神其善應，某不勝激切，屏營伺命之至。

復爐

向來

靈寶領教濟度金書卷之六十四

靈寶領教濟度金書卷之六十五

洞微高士開光救苦真人甯全真授靈寶通玄弘教水南先生林靈真編

科儀立成品

淨供合用

大獻早朝行道儀

入戶

各禮師存念如法

宣衛靈呪

青陽虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意。以今早朝行道，願得玉清道炁靈寶妙光下降，流入臣等身中。即使玄壇清淨，內外成真，天無氛穢，地絕沃塵，琳琅振響，十方肅清，萬魔不干，真誠上徹。今臣所啓之誠，速達徑御太上無極大道至真玉皇上帝御前。

### 請稱法位

具位臣某，與臨壇官衆等，謹同誠上啓太上無極大道虛無自然元始天尊，太上虛皇玉晨大道君，金闕玄元太上老君，昊天玉皇上帝，十方已得大聖衆，至真諸君丈人，十方自然靈寶天尊，隨機赴感太乙救苦天尊，三十六天帝君，玉虛上帝，玉帝太帝，東華、南極、西靈、北真、玄都、玉京、金闕七寶玄臺紫微上官靈寶至真明皇道君，三十六部尊經玄中大法師，三界應感一切真靈。臣聞先天天地，虛無混一炁之宗。分陰分陽，妙有散萬形之運。慧日昭宣於黃混，迷雲滄藹於黑單。慘慄寒庭，職

刑機於考對。淒涼夜壑，司憲網以繫維。自非上聖垂極拔之功，曷使下愚藉扶持之力。臣夙叨玄蔭，獲際真乘。野馬紛紛，拊己易凋於梨棗。織烏袞袞，驚心將薄於桑榆。猶飛元而聚靈，尚憲天而領教。凡有投告，敢不關聞。

### 宣詞

按如詞言，備切忱恂。齋主某心切同仁，志存博愛。念茫茫禹迹，多沉滯之窮魂。蕩蕩堯疆，幾顛連之苦爽。或有主無主，或凶終命終，或炎火燒焚，或江河投溺，或虎狼吞啖，或邪虺傷殘，或霜雪凍凌，或雷霆震擊，或饑荒殞命，或牢獄喪身，或盜賊殺傷，或刀兵殘害，或木石壓損，或道路傾摧，或王法死亡，或訟庭怨恨，或鬼神執滯，或軍陣誅夷，或自縊自殘，或投河投壘，或中蠱服毒，或飲食含冤，或呪詛勾連，或冤讎執對，或財命纏繞，或神識顛邪，或胎產殞命，或肢體零落，或生遭疾病，或死受釘埋。展轉冥途，託身無所依棲，幽域寄跡何方。不禁風悲月淡之啾啾，無奈雨暗天陰之戚戚。

實堪憐憫，孰爲哀矜。與齋主所度某等，期普召於玄壇，庸盡消於黑鬱，龍恩浩蕩，鶴馭羅敷。開定水八解之池，澄清陰翳。享玉山三晨之饌，潤益陽靈。降二炁之真精，陶十生之妄垢。惡根落滅，均辭北陰鬱絕之鄉。善藥周圓，徑上東極妙嚴之境。千愆湛寂，一性清明。若木流精，乘晨光於萬宇。扶桑彙彩，耀曉色於千林。金籥騰百和之芳，玉炬粲千枝之麗。駕班露禱，願摠民欲於再三。虬御雲開，期輅天休於萬一。合幽冥而均慶，溥遐邇以交歡。以今清旦行道，請法衆等，運茲初捻上香，歸身歸神歸命大道。臣等首體投地，仰依太上三尊。願以是功德，上祝社稷尊靈，宗祧先聖。伏願雲輶泛景，月御飛霄，瓊圃怡神，詣玉京而侍聖。琳房御炁，覲金闕以參真。流福皇圖，凝祥聖祚。今故燒香，自歸依師尊大聖衆，至真之德，得道之後，昇入無形。和：與道合真。以今清旦行道，請法衆等，運茲二捻上香，歸身歸神歸命大道。臣等首體投

地，仰依太上三尊。願以是功德，歸流濟主家億曾萬祖，歷劫種親。伏願東華宴景，南上登名，陪鳳駕以逍遙，疾除罪錄。侍鸞輿於容與，永處福鄉。襲慶五枝，流華七葉。今故燒香，自歸依師尊大聖衆，至真之德，得道之後，昇入無形。和：與道合真。

以今清旦行道，請法衆等，運茲三捻上香，歸身歸神歸命大道。臣等首體投地，仰依太上三尊。願以是功德，歸流九州八極，中國外夷，滯魄孤魂，沉靈幽爽。伏願酆城削憲，陵府書勤，玉簡徘徊，錄形神而起死。金符錯落，超性識以更生。均脫冥郊，齊登樂界。今故燒香，自歸依師尊大聖衆，至真之德，得道之後，昇入無形。和：與道合真。

禮方 懺方

三啓

樂法以爲妻，愛經如珠玉。持戒制六情，念道遣所欲。淡泊正炁停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首體。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣姓某等，謹重誠上啓太上無極大道元始天尊，太上大道君，太上老君，高上玉皇，十方自然靈寶天尊，隨機赴感太乙救苦天尊，三十六部尊經玄中大法師，天師君，上相上宰四司五帝，三界內外應感尊靈。臣聞玄元布大慈大悲之化，拯援幽沉。碧落啓普度普救之司，提携爽識。皆聖真念重泉之

無告，與仙靈期積夜之有生。陰景淒涼，扇仁風而駘蕩。寒威凜冽，流愛日以薰陶。事煥條章，義彰科律。今齋主某，誠殫享帝，意恪祈天。願提陰地之靈，盡陟陽天之界。猶慮爰從往劫，迨至今生。十習六因，或沉迷其正性。七情八識，易蒙滓其元神。善無一德之可書，惡有千愆之堪錄。生生飄蕩，無涯之冤債纏縈。世世流吹，莫極之仇讎結習。魂歸岱嶺，魄墮酆城，未能度命於朱陵，何由升神於黃混。以今轉經懺罪，行道首愆。願開釋於憎嗔，俾齊同於慈愛。蘭湯滌垢，俱臨普集之壇。芝饌充饑，均赴廣陳之席。玉眸鍊質，黃華蕩形，承紫綉以乘晨，湛丹綸而離夜，未度者度，未升者升，化寂寥幽暗之鄉，爲清靜光明之境。齋主某心期圓滿，志願安和，門戶興隆，挺一枝之嘉瑞。庭闈閑暇，超九葉之芳祥。笏積牀盈，籤香架溢。蒙鑑忱恂之切，允符懇悃之私。上願天地清寧，風雲藏靜，三光煥耀，四氣朗清。川后靜波，水不逢於竭澤。山靈薦祉，陸無

值於焚林。萬類生生，百昌化化，茂園  
靡之青草，獄訟無興。靜方域之綠林，  
奸兇不作。三途罷對，五道停輪，上明  
大道之好生，下副微臣之懇切，謹啓以  
聞。

### 發十念

一念爲道四大，合德齋主，七世父母，  
免墮憂苦，上升天堂，衣食自然。

二念帝王國主，道化興隆，庠序濟濟，  
皇教恢弘，威儀翼翼，普天所瞻，民  
稱太平，四夷賓伏，妖惡自滅，聖賢  
自生。

三念法師功德大建，教化明達，俱獲飛  
仙。

四念同志學人，早得仙道，更相開度。

五念九親和睦，好尚仁義，貴道賤財，  
行爲物範。

六念損己布施，道士及饑寒者，天下人  
民，各得其所。

七念蠕動跂行，一切衆生，咸蒙成就。

八念赦貫前生今世罪對，立功補過。

九念家門隆盛，宗廟有人，世生賢才。

十念尊受經師，不敢中怠，平等一心廣

度，剋獲上仙，白日登天，拜見太上，  
永成真入，雲車羽駕。和：與道合真。

### 復爐

香官使者，左右龍虎君，侍香諸靈官，  
當令臣朝元之所，自然生金液丹碧芝  
英，百靈衆真交會，在此香火爐前。令  
臣學道得道，求仙得仙，齋主受福，幽顯  
沾恩。十方仙童玉女侍衛，蘭烟傳臣向  
來所啓之誠，速達徑御  
太上無極大道至真玉皇上帝御前。

### 出戶

靈寶領教濟度金書卷之六十五

靈寶領教濟度金書卷之六

### 十六

洞微高士開光救苦真人甯全真授  
靈寶通玄弘教水南先生林靈真編

### 科儀立成品

淨供合用

### 大獻午朝行道儀

步虛 燒香頌

各禮師存念如法

宣衛靈呪

丹靈朱火，炎霞激風。赤輪剛運，天光  
八衝。迸威包羅，交變萬方。流金豁  
落，群魔滅蹤。辟奸破妖，明耀元功。  
金符召制，躡雲策龍。謠歌慶會，散花  
太空。神化冥運，四極安隆。伏御帝  
前，罔有不恭。

鳴法鼓二十四通

無上三天玄元始三炁太上道君，召出臣  
身中三五功曹，左右官使者，侍香金  
童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意，以今午朝行道，願得玉清道炁靈寶妙光下降，流入臣等身中。即使玄壇清淨，內外成真，天無氛穢，地絕沃塵，琳琅振響，十方肅清，萬魔不干，真誠上徹。令臣所啓之誠，速達徑御太上無極大道至真玉皇上帝御前。

請稱法位

具位臣姓某，與臨壇官衆等，謹同誠上啓太上無極大道虛無自然元始天尊，太上虛皇玉晨大道君，金闕玄元太上老君，昊天玉皇上帝，十方已得道大聖衆，至真諸君丈人，十方自然靈寶天尊，隨機赴感太乙救苦天尊，三十六天帝君，玉虛上帝，玉帝太帝，東華、南極、西靈、北真、玄都、玉京、金闕七寶玄臺紫微上宮靈寶至真明皇道君，三十六部尊經玄中大法師，三界應感一切真靈。臣聞大道混茫，高運紫清之表。至真寥廓，潛凝玄碧之中。提覆載以生成，合陰陽而化育。九華八極，

流惠露於黃圖。六洞十宮，職迅霆於黑鬱。匪藉虎關之浩蕩，曷令犴室以超凌。臣等昌運欣逢，玄樞快睹。山林獨樂，未能藏六以頤真。朝市同流，徒藉存三而逐妄。誓罄操修之力，庸殫濟度之功。凡有皈投，敢忘關告，齋主忱詞，謹當宣奏。

宣詞

按如詞言，可量激切，齋主某勤拳皈命，稽顙馳神。極地濱天，悲苦之幽魂無盡。際上蟠下，淒迷之沉爽奚窮。往古來今，陽注陰受。或宰制六合，或更霸九州，或寵冠椒房，或榮分茅社，或槐庭祿貴，或榆塞威明，或文藝無雙，或武陣第一，或雲林宴坐，或月錫經行，或喜探玄元，或樂味禪悅，或守戒定慧，或鍊精炁神，或秀擢儒林，或榮聯仕版，或東陵學圃，或南陽躬耕，或商販江湖，或鋤耕田野，或術精袁李，或藝冠岐黃，或技絕鈞韶，或業超匠石，或工紹陶冶，或學襲箕裘，或朱墨舞文，或綺羅鬻巧，或心營屠儉，或志典庖厨，或射獵掩群，或羅網併陣。善

緣山積，死覬超凌，惡業海深，沒終淪墮。凡今時之孤滯，皆昔日之芳華，有滅有生，無貴無賤。與齋主所度某等，均臨平等光明之席，來趨廣大清淨之筵。朝禮慈容，圓成慧性，法水洗群迷之陋，辭五濁泥。香羞充萬劫之饑，度三清岸。陶丹陵之英粹，開黑鬱之精華。玉簡昭宣，俾遂千生之快樂。金符告命，爲除九死之冤愆。永脫苦輪，即登樂界。瑤光在上，降龍御以依華。圭影正中，輅烏輪而散彩。法雨振山河之潤，香風陶宇宙之和。鳳葆翻飛，燦三晨於玉境。鸞旂搖曳，鳴九奏於瑤階。洽大地以均歡，極周天而並慶。以今臨午行道，請法衆等，運茲初捻上香，歸身歸神歸命大道。臣等首體投地，仰依太上三尊，願以是功德，上祝社稷尊靈，宗祧先聖。伏願遊神廣漠，御氣虛無。受策紫微，駕飛龍而問道。登真碧漢，驂翔鳳以升仙。基業千齡，本枝百世。今故燒香，自歸依師尊大聖衆，至真之德，得道之後，昇入無形。和：與道合真。



以今臨午行道，請法衆等，運茲二捻上香，歸身歸神歸命大道。臣等首體投地，仰依太上三尊。願以是功德，歸流齋主家億曾萬祖，歷劫積親。伏願升神藥闕，度命蓮臺。萬罪清夷，詣鬱羅而遊宴。千冤解悟，瞻劫仞以逍遙。永證大乘，克登小有。今故燒香，自歸依師尊大聖衆，至真之德，得道之後，昇入無形。和：與道合真。

以今臨午行道，請法衆等，運茲三捻上香，歸身歸神歸命大道。臣等首體投地，仰依太上三尊，願以是功德，歸流普天率土，外狄中華，諸類幽靈，九垓滯爽。並願沉酣聖日，鼓舞神風。一性圓明，悟生生之苦惱。千情寂滅，蕩劫劫之淒涼。正路宏開，邪門閉塞。今故燒香，自歸依師尊大聖衆，至真之德，得道之後，昇入無形。和：與道合真。

禮方 懺方 命魔

三啓

樂法以爲妻，愛經如珠玉。持戒制六情，念道遣所欲。淡泊正炁停，蕭然神

靜默。天魔並敬護，世世享大福。

又

鬱鬱家國盛，濟濟經道典。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣姓某等，謹重誠上啓太上無極大道元始天尊，太上大道君，太上老君，高上玉皇，十方自然靈寶天尊，隨機赴感太乙救苦天尊，三十六部尊經玄中大法師，天師君，上相上宰四司五帝，三界內外應感真靈。臣聞空洞生神，萬

物踐形於覆載。飛玄結炁，百昌御景於陰陽。由一迷一悟之分，有萬死萬生之異。上无復祖，既列天職以裁成。中有度人，斯建仙曹而校錄。幽明並仰，今古咸遵。今齋主某，明發九思，夙宵三嘆，願廣提於幽暗，期頓返於陽光。猶慮前生他世，彼世此生。營營蟻磨，鼓慾海之千尋。忽忽駒窗，棹愛河之萬仞。莫障狂瀾之浩蕩，孰留逝水之汪洋。積冤債以難明，縱罪尤而罔悟。羊腸蝸角，逐實利以矜驕。蟲臂鼠肝，徇虛名而煥耀。輕慢四大，穢賤三光，惟知傲忽於生前，誰念伶仃於死後。以今轉經首過，行道除愆，願削憲於丘陵，爲解冤於毫髮。三光映服，練飄飄之素華。七珍流香，灑泠泠之甘露。陽燧蕩積陰之垢，方諸澄極沍之塵。同入無爲，侍黍珠而遊宴。永辭有漏，翔鸞翠以徘徊。迴脫沉淪，普升寥廓。齋主某襟期天祐，步武神扶。與道合真，衍天休於九軌。爲善最樂，彰帝渥於八遐。公私之狼曠輻光，中外之鶉星沉彩。凡有懇願，亶藉甄陶。

上願覆載昭寧，圖書顯應，日星煥耀，草木蕃鮮。麥秀雙歧，凝煙雲於碧落。禾生同穎，融霄月於玄虛。野無鴻鴈之流離，庭有鳳凰之鳴和，九幽朗宴，五苦停閑。則上明天尊大慈之化，下副臣等皈向之誠，謹啓以聞。

十二願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦自修，預以同學，普得昇虛，與天相保，長存無憂。

二願諸天結炁澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民具從，養生安死，惠周十方，禾稼滋植，營運日豐，咸得覆載，萬類皆從。

四願日月一景高明，無有孛蝕，虧盈安清，光照諸天，洞消暗冥，保固劫運，世祚和平，普加潤澤，惠灑衆生。

五願星辰與日齊光，轉獨照耀，朗映十方，各安其位，經緯直行，保鎮家國，無有災傷，四海寧一，普天與昌。

六願四時隨節推遷，景氣和調，無有災患，疫毒消滅，普天安平，五穀豐熟，國富民歡。

七願浮雲結炁聚煙，飛空高澄，蔭覆玄玄，隱則無爲，散則彌天，神仙同居，結友衆真，惠流一切，興國愛民，普濟群生，人同劫年。

八願風雨流灑無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，舍容恢廓，無細不植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。

十二願螽飛蠹動，已生未生，咸蒙安全，普得生成，皆見元氣，受陽之形，草木果林，經冬不零，一切濟度，靡不鮮榮。和：與道合真。

復爐

香官使者，左右龍虎君，侍香諸靈官，當令臣朝元之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香煙傳臣向來所啓之誠，速達徑御太上無極大道至真玉皇上帝御前。

出戶

靈寶領教濟度金書卷六十六

靈寶領教濟度金書卷之六

十七

洞微高士開光救苦真人甯全真授  
靈寶通玄弘教水南先生林靈真編

科儀立成品

淨供合用

大獻晚朝行道儀

步虛 入戶

各禮師存念如法

宣衛靈呪

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪伐惡，道炁周流。神光照夜，陰翳俱收。萬神降格，扇景乘飆。群生成遂，惠遍神州。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神急，上關啓臣今奉爲入意以今晚朝行道，願得三清道炁靈寶妙光下降，流入臣等身中。即使玄壇清淨，內外成真，天無氛穢，地絕妖塵，琳琅振響，十方肅清，萬魔不干，真誠上徹。今臣所啓之誠，速達徑御太上無極大道至真玉皇上帝御前。

請稱法位

具位臣姓某，與臨壇官衆等，謹同誠上啓太上無極大道虛無自然元始天尊，太上虛皇玉晨大道君，金闕玄元太上老君，昊天玉皇上帝，十方已得道大聖衆，至真諸君丈人，十方自然靈寶天尊，隨機赴感太乙救苦天尊，三十六天帝君，玉虛上帝，玉帝太帝，東華、南極、西靈、北真、玄都、玉京、金闕七寶玄臺紫微上宮靈寶至真明皇道君，三十六部尊經玄中大法師，三界應感，一切真靈。臣聞道包天地，凝萬化以陸離。人稟陰陽，並三才而煥赫。明列樞衡於民欲，幽司機變於神靈。教雨

敷羅，六合均承於橐籥。神風鼓動，八紘普仰於裁成。孰非元始之綱維，曷藉虛皇之宰制，稟生受命，起死迴骸。臣等綴武瑤壇，承顏琅座。膺肘後蒼虬之錄，帝德天涵。佩心前紫鳳之章，天恩日皎。期運元而會道，每宏教以度人。凡有皈投，敢忌關告，況奉詞旨。所合上聞。

宣詞

按如詞旨，備極衷情。今齋主某，以仁存心，由愛立性。睹六道之升沉無已，與四生之淪墜堪矜。或御錄膺圖，典司天政。或驂鸞跨鳳，游戲仙關。或禍善福淫，秉權嶽瀆。或僭刑濫賞，佐理山川。或貴賤殊資，錯居遐邇。或富貧異趣，到處顯明。或神墮泥犁，推研水火。或形居園土，考對陰陽。或海腹針喉，莫逢鋪啜。或吞火食炭，難際珍羞。或帶角披毛，受生悲苦。或含齒傳翼，稟命恓惶。或蠢動蜎飛，或跛行蠓息，或胎卵濕化，或鬼怪精靈，或久闕蒸嘗，或乍虧祭祀，或新塋頽毀，或舊塚陵夷，或寄影傳聲，或倚木

附草，或林幽獨坐，或麓際處行。凡茲六趣之往來，總是一神之展轉。享福緣則生善道，膺業報則墮惡鄉。與齋主所度某等，願因普集之壇，均赴無遮之會。金書煒燁，玉簡昭回，爲消千劫之冤塵，得遂一朝之勝樂。靈源澄湛，蕩陰垢以熙熙。香饌敷陳，飲陽華而藹藹。離英鍊質，坎粹豐容，永辭厚地之淒涼，竟上高天之眇莽。珠星駕夜，垂玉露之零灑。璧月凝霄，湛金波之泛映。檀韻氤氳於鳳鼎，蘭膏璀璨於龍彝。旅覲天顏，晉朝宸御，願金雞之肆揭，慶丹鳳之飛揚。十地歡聲，九天喜氣。以今落景行道，請法衆等，運茲初捻上香，歸身歸神歸命大道。臣等首體投地，仰依太上三尊。願以是功德，上祝社稷尊靈，宗祧先聖。伏願棲神闔苑，宴景崑臺，服霓裳羽衣，乘六龍而遊戲。奏鈞天廣樂，跨八駿以翱翔。王業天長，皇圖地久。今故燒香，自歸依師尊大聖衆，至真之德，得道之後，昇入無形。和：與道合真。

香，歸身歸神歸命大道。臣等首體投地，仰依太上三尊。願以是功德，歸流齋主家億曾萬祖，歷劫種親。伏願升神北鬱，度品南丹。惡根毒根生死根，永離步武。業障報障煩惱障，勿滯形神。垂裕曾玄，流光眷序。今故燒香，自歸依師尊大聖衆，至真之德，得道之後，昇入無形。和：與道合真。

以今落景行道，請法衆等，運茲三捻上香，歸身歸神歸命大道。臣等首體投地，仰依太上三尊。願以是功德，歸流範圍之內，幅圓之中，不盡幽靈，無邊爽識。並願慈風丕冒，化日融怡。乾清坤倪，永絕聲於夜哭。陰效陰甸，勿弔影於昏悲。恪證東華，永辭北朔。今故燒香，自歸依師尊大聖衆，至真之德，得道之後，昇入無形。和：與道合真。

禮方 懺方

三啓

樂法以爲妻，愛經如珠玉。持戒制六情，念道遣所欲。淡泊正炁停，蕭然神靜默。天魔並敬護，世世享大福。

又  
鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又  
大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首體。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣姓某等，謹同誠上啓太上無極大道无始天尊，太上大道君，太上老君，高上玉皇，十方自然靈寶天尊，隨機赴感太乙救苦天尊，三十六部尊經玄中大法師，天師君，上相上宰，四司五帝，三界內外應感真靈。臣聞化敷劫仞，散甘雨於九圍。教衍鬱羅，布應雲於八

極。萬範開張而流演，五常回度以彌羅。碧落空歌，夜壑被晨陽之照。紫虛鬱秀，寒庭吹暖律之和。欲施提拯之功，宜藉慈悲之力。今齋主某，齋心一辦，潔己三趨，期携苦惱之魂，盡度清虛之界。猶慮爰從無始，迨至有終，昧性玉而背靈天，顛冥三毒。棄心珠而戕覺地，造作七情。不思利己以妨人，惟欲徇名而棄實。是非海闊，混狂聖而弗知。人我山高，溷智慧而罔悟。殺盜淫迷其踐履，貪嗔癡恣其躬行。二豎潛攻，倏歸長夜。三彭構釁，即返重泉。嗟八識以何之，恍百神而奚寓。往來六道，流浪四生，未能度品於陰單，何以登真於陰混。以今轉經行道，首過祈恩。願敷汪濊之恩，爲削溟濛之累。形骸清淨，儼服御以雲行。飲饌芬芳，備殺羞而雨潤。灌鍊華池之

港，陶鎔流火之炎。飛煥玄恩，期脫生根之游宴。超離黑苦，永除死蒂以逍遙。蒙聽敷陳，允臻函育。齋主某福襟恍美，德履冲和，步武日昇，來門庭之喜氣。精神天賦，毓院宇之祥光。陰

績昭昭，陽功濟濟，上願五靈胤粹，二景流華。三光全而寒暑平，物無疵癘。五穀熟而人民育，家有禎祥。山川鬼神之攸寧，鳥獸魚鱉之咸若，天無氛穢，地絕沃塵，則上明天尊大慈之化，下副臣等皈嚮之誠，謹啓以聞。

#### 十願

- 一願大道流行，普天懷德。
- 二願一切有生，咸皆悟道。
- 三願九夜悲魂，一時解脫。
- 四願孤魂無依，咸得受生。
- 五願天下太平，五穀豐熟。
- 六願臣忠子孝，君仁父慈。
- 七願四海會同，冤親和釋。
- 八願潜胞處卵，咸得生成。
- 九願積疾新痼，旋即痊愈。
- 十願孤露衆生，豐衣足食。

#### 復爐

香官使者，左右龍虎君，侍杳諸靈官，當令臣朝元之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女侍衛，香煙傳臣向

來所啓之誠，速達徑御太上無極大道至真玉皇上帝御前。

出戶

靈寶領教濟度金書卷之六十七

①晚：底本作「挽」。當爲「晚」之誤。

靈寶領教濟度金書卷之六

十八

洞微高士開光救苦真人甯全真授  
靈寶通玄弘教水南先生林靈真編

科儀立成品

淨供合用

大獻謝恩醮儀

燒香頌

各禮師存念如法

宣衛靈呪

東方

九炁青天，明星大神。 煥照東鄉，洞映九門。 轉燭陽光，掃穢除氛。 開明童子，號曰玄卿。 備衛我軒，上對帝君。 收魔束祿，討捕兇羣。 奉承正道，赤書玉文。 九天符命，攝龍驛傳。 普天安鎮，我得飛仙。

南方

三炁丹天，煥景流光。 熒星轉燭，洞照太陽。 上有赤精，合契虛皇。 開明童

子，號曰華芳。 總御火兵，備守玉堂。 斬邪束祿，剪截魔王。 北帝所承，風火衝當。 流鈴交煥，翊衛壇場。 正炁流行，敢有猖狂。 我享上功，坐運魁罡。 億劫長存，保天無疆。

西方

七炁素天，太白流精。 光耀金門，洞朗太冥。 中有素星，號曰帝靈。 保神安鎮，衛我身形。 斷絕邪源，王道正明。 宮殿整肅，三景齊并。 道合自然，飛昇紫庭。 靈寶符命，普衛萬生。 元星正炁，來合我身。 功加一切，天地咸寧。

北方

北方玄天，五炁徘徊。 辰星轉燭，洞煥太微。 黑靈尊神，號曰層威。 統冠飛天，仙裾羽衣。 備守五門，檢精捕非。 敢有干試，豁落斬摧。 玉符所告，神真八威。 邪門閉塞，正道流輝。 三光映照，我身無衰。 策空駕浮，舉形仙飛。

中央

黃炁中央，調理乾坤。 陶鎔陰陽，總統玄真。 鎮星吐輝，流耀九星。 開明童子，號曰天璘。 陽炁燄上，朱煥炎精。

洞照內外，運我身形。 百邪摧落，攝役鬼靈。 中山神呪，普天使聞。 五靈安鎮，身飛上清。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各三十二人出。 出者嚴裝。 關啓玄壇天帝神君，當召此間土地里域真官正神，急上關啓臣今奉爲入意，其諸情悃，具載緘封。 願得太上至真道炁靈寶妙光下降，流入臣等身中。 令臣所啓之誠，速達徑御太上無極大道至真玉皇上帝御前。

請稱法位

具位奉行某齋謝恩清醮法事，小兆臣某，與臨壇官衆等，謹同誠上啓太上無極大道虛無自然元始天尊妙無上帝，虛皇玉晨大道君靈寶天尊妙有上帝，萬變混沌玄元老君道德天尊至真大帝，玉皇天尊玄穹高上帝，紫微中天北極大帝，太微上宮天皇帝，高上神霄玉清真王長生大帝，東極青玄老君，太

乙救苦天尊運明保元上帝，南極真王朱陵大帝，后土皇地祇，十方無極太上靈寶天尊，九微太真東華青童大道君，紫微元靈青金丹皇大道君，無上九天生神上帝，三十二天上帝，五靈五老上帝，上清十一曜上真道君，南辰六闕上真道君，北極九府上真道君，上清二十八宿真君，泰玄樞機三省諸相天君，天地水三元帝君，北極四聖真君，玄中大法師真君，三天大法師真君，靈寶經籍度師真君，靈寶監齋大法師真君，十方無極飛天神王，五天三界大魔王，三洞四輔經籙法科高真上聖，三天門下三元真君，直日引進仙官，上章詞表靈官，本靖諸省府院司仙靈官吏，五嶽五帝真君，五天聖帝，北陰玄天酆都大帝，東霞扶桑丹林大帝，洞天福地靖廬治化仙官，本靖祖玄真師列位真人，經籍度師列位真人，城隍社令里域土地，虛空鑒察一切真靈。臣聞一炁洪濛，包圓清而統經緯。萬形塊圪，羅方濁而御陰陽。道大無垠，德周有截。善生善死，靜觀五億之裁成。潛地潛天，動

聽三千之化育。皆統承於元始，悉橐籥於虛皇，上極太無，洞輔冠玄元之奧。下張妙有，樞機周空洞之英。至矣神功，大哉聖化。臣等參真學道，鍊景求仙。樗櫟散材，迹尚遊於黃混。楓梧弱質，心期契於青冥。莫融九室以存思，誓運三田而領教。今齋主某，潔涓蓬宇，疏淪茅衷，期開度於幽沈，庸圓成於勳行。果蒙帝力，式慰民情。輒修蘋藻之恭，爰罄菲葑之敬。伏願紫關洞朗，黃道昭回。綠輦丹輦，擁朱幢而來下。瓊輪羽蓋，羅翠節以前臨。十華之月駟參陪，八極之雲龍混合，不遺德悃，恪赴道場。臣不勝顛俟之至，謹稽首再拜，奉迎聖駕。

請聖

重稱法位

具位奉行某齋謝恩清醮法事，小兆臣某，與臨壇官衆等，謹重誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，度人三十二天上帝，三十六部

尊經玄中大法師，三界應感，一切威靈。臣聞道幹鴻濛，統百昌而燮理。象涵鰲極，周庶類以森羅。混茫凝妙於華京，亭毒融英於丹谷。無聲無臭，廓然得一之功。有數有滋，至矣函三之力。威靈莫測，變化難量。今齋主某，凝二五之真精，融一三之至粹。性天冰潔，每懷惻隱之靈源。心地星輝，常抱哀矜之淵府。念四生之飄蕩，與六道之流吹，五苦顛連，三途汨沒。生無福業，放雞犬而不求。歿有罪緣，縱鶴猿而罔牧。冤憎結習，仇敵纏縈，背綱常而三惑不除，賤名檢而四知何畏。三彭構釁，一豎乘危，愆畢紀於簡書，過悉羅於簿錄。致使神歸厚夜，魂墮重泉。捨生受生，善惡之殊途輪轉。歷劫趨劫，慘舒之異路循環。匪由提援之勤，曷遂超凌之願。爰依丹陛，恭建玄壇，頒玉札以嘯命羣靈，承金符而惠徼萬類。果蒙應念，普賜追呼，筵開大獻於玉山，恩罄小心於金闕。灌精華於東井，流演雲泉。解饑渴於北單，潔清霞饌。配乾坤而合妙，降離坎以

凝真。業垢潔清，受化丹陵之府。塵氛陶冶，返生朱火之宮。悉由紫極以汪涵，亶藉清微之覆育。上德不德，敢云瓊玖之殫。知恩報恩，當效珠環之謝。敬陳滄祭，庸格飈旂，騰尺蠶以攄丹，露寸忱而寫素，詞文敷告，恪冀鑒觀。

宣詞

詞旨備敷，聖心簡在。茅茨不剪，僭差綿蕪之儀。黍稷非馨，恪寓粟絲之敬。伏願蓋高無外，聽卑不遺，享奠獻之心，錫維持之大造，珠彝泛玉，翠笋流金。瓊璫三成，徹雲鏞而激響。瑤壇九奏，拊月磬以和鳴。霓旌騰百和之芳，羽葆鼓千枝之麗，伶僂振逸，符寶衛嚴，俯歆萬一之誠，曲軫再三之禱。

亞獻

具位臣姓某等，謹同誠上啓三清上聖，十極高真，圓穹之帝后仙靈，方域之曹僚主宰，三界應感一切威靈。臣聞萬帝臨軒，濡八遙之湛露。千真拱座，流三極之卿雲。況寒庭煥赫於陽光，而夜壑開明於陰暗。天無私覆，既施惠以

彌羅。帝有恩言，諒報功而赫奕。先願齋主九玄七祖，億劫種親，削落罪根，解除惡簿。超凌鬼趣，辭金粟之淒涼。遊宴仙都，升玉虛之寥廓。澤覃姻族，福被雲仍。次願齋主某動靜和寧，起居康泰。雲瀛接漢，彰浩浩之福基。日觀摩霄，錫亭亭之壽祉。院宇之光風自到，門庭之霽月常新。芝秀蘭芳，樂清時之文獻。椿榮萱茂，昭盛世之儀刑。衣冠恪紹於箕裘，詩書聿符於絃誦。次願玄壇所度亡爽，前愆雲散，宿債煙消。乘晨永希於陽翹，咸躋道境。離夜齊超於陰翳，永脫神鄉。絕塚訟之勾連，斷考殃之滯累。臣等久依玄蔭，獲睹彤庭，潔已敷陳，慮金科之糾過。齋心奏對，或玉律之書愆。朝夕冰兢，夙宵山負，願頌鶴赦，曲垂有造之仁。庶戴龍恩，永拜無私之惠。上願二儀澄晏，四象宣平。澤隱龜龍，出圖書而薦瑞。彩飛鸞鳳，同文軌以呈祥。荒陲息飲馬之聲，隴畝絕遺蝗之影，野除蕭艾，朝富芝蘭。九土春融，措五刑而生生不息。萬方風靜，歌

九功而化化無垠。遂跛行喙息之情，樂蠢動含靈之性，三途罷對，五苦停輪。臣不勝虔祝之至。

終獻

重稱法位

具位臣姓某，謹重誠上啓太上無極大道虛無自然元始天尊妙無上帝，虛皇玉晨大道君靈寶天尊妙有上帝，萬變混沌玄元老君道德天尊至真大帝，玉皇大天尊玄穹高上帝，紫微中天北極大帝，太微上宮天皇大帝，高上神霄玉清真王長生大帝，東極青玄老君，太乙救苦天尊，運明保元上帝，南極真王朱陵大帝，后土皇地祇，十方無極太上靈寶天尊，九微太真東華青童大道君，紫微元靈青金丹皇大道君，無上九天生神上帝，三十二天上帝，五靈五老上帝，上清十一曜上真道君，南辰六闕上真道君，北極九府上真道君，上清二十八宿真君，泰玄樞機三省諸相天君，天地水三元帝君，北極四聖真君，玄中大法師真君，三天大法師真君，靈寶經籍度師真君，靈寶監齋大法師真君，十方無



極飛天神王，五天三界大魔王，三洞四輔經籙法科高真上聖，三天門下三元真君，直日引進仙官，上下詞表靈官，本靖諸省府院司仙靈官吏，五嶽五帝真君，五天聖帝，北陰玄天酆都大帝，東霞扶桑丹林大帝，洞天神地靖廬治化仙官，本靖祖玄真師列位真人，經籍度師列位真人，城隍社令里域正神，虛空鑒察，一切真靈。臣聞至敬無文，丕顯告成之愀。大禮必簡，僭伸昭事之儀。獻情既罄於三周，奠饗幸殫於一念。以今河澄月淡，夜漏將中，斗轉參橫，宵躔已半，金鼎煙沉於蘭篆，銀缸光暗於芝膏。鳳旆後先，將返霄衢之仗。鸞旂上下，行旋輦路之班。萬騎雲奔，千轅風動。臣等翹傾徒極，攀戀無階。入妙凝真，萬氣齊仙於玄牝。運元會道，百神混合於泥丸。臣下情無任不勝激切，攀戀之至，再拜奉送。

### 存神復爐

香官使者，左右龍虎君，侍香諸靈官，當令臣設醮之所，自然生金液丹碧芝英，百靈衆真交會，在此香火爐前。令

臣學道得道，求仙得仙。齋主受福，幽顯沾恩。十方仙童玉女侍衛，香煙傳臣向來所啓之誠，速達徑御太上無極大道至真玉皇上帝御前。

### 迴輶頌

### 焚燎

靈寶領教濟度金書卷之六十八

## 靈寶領教濟度金書卷之六

### 十九

洞微高士開光救苦真人甯全真授  
靈寶通玄弘教水南先生林靈真編

### 科儀立成品

淨供合用

### 玉清溟滓大梵甘露淨供儀

### 靜默堂序立

### 贊引至斛前

### 灑淨 祝香

具位臣姓某，謹焚寶香，虔誠供養太上無極大道虛無自然元始天尊洞真天寶上帝，虛皇玉晨大道君洞玄靈寶上帝，萬變混元老君洞神神寶上帝，玉清應化青玄老君，運明保元上帝，南極真王朱陵大帝，玉清神霄長生大帝，東華上相青童太明道君，西靈金真太妙丹皇道君，九天上帝，三十二天上帝，二景五星北斗南辰列宿真宰，三元三官大帝，泰玄樞機三省諸相真君，玄中大法

師，三天大法師，靈寶玄一三真人，太極沖應真人，十方無極飛天神王，長生大聖無量度人君，諸天丞相，南昌上官度人，不死尊神，南極長生大君，南上司命司錄，延壽益算度厄尊神，迴骸起死監生太神，好生韓君丈人，靈寶仙曹玄局真宰，玉清溟滓大梵靈官，五嶽四瀆地水職司，召山大川無鞅聖衆，本靖諸省府院司官吏，三界符使，四直功曹，五道大神，九州社令，城隍里域，主執威靈。仗此寶香，普同供養，仰冀真慈，俯垂省錄。臣聞虛皇啓運，昭回三洞之仁風。靈寶垂光，浩蕩八紘之化雨。提死魂於北壤，鍊生魄於南宮。巍巍妙道以難明，赫赫神功而莫測，金符煥耀，三極長春。玉籙鋪張，九幽不夜。大矣皈依之主，妙哉生育之師。凡伸造請之勤，必沐陶鎔之澤。伏念臣叨恩領教，契玄學真。九室珠聯，絳綵映雌雄之妙。三宮璧合，金光耀龍虎之精。離動靜以息化機，契生成而回祖炁。敢守空山，以冒清微之玉律。合度無間，以奉玄元之金科。式昭覆

載之無私，庸體乾坤之有造。以今齋主某，望紫宸而稽首，瞻碧落以傾心，依依慧日之流輝，恩周萬宇。切切慈雲之廣蔭，澤遍三途。願矜祈扣之忱，俯賜鑒觀之造。傾光寥廓，五色之玄座空浮。駐景虛玄，十極之丹輿混合。恍若始青之會，昭然寶黍之垂。梵炁彌羅，靈光鬱勃，甘露化三天之雲饌，周遍十方。神輝開九地之陽春，超離五苦。珍羞顯設，妙饌宏陳，如細雨密霧而來，咸令飽滿。皆飛空步虛而去，悉獲逍遙。頓趨衆妙之門，盡稟無爲之化，幽途快樂，苦海光明。遂微臣聞度之誠，副萬類皈依之望。臣不勝祈恩，伺命之至，恭望天慈，密垂報應。

度人無量天尊 三聲

衆誦大行梵炁

大行梵炁，周迴十方。中有度人，不死之神。中有南極，長生之君。中有度世，司馬大神。中有好生，韓君丈人。中有南上，司命司錄。延壽益算，度厄尊神。迴骸起死，無量度人。今日校錄，諸天臨軒。

焚梵炁符

大聖元始天尊

向乾方

至心奏請玉清聖境元始天尊妙無上帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈清微天寶君無上尊。

焚清微天符

元始洞空無，三炁精上門。紫翻煥太空，四明植靈根。妙化發東瓊，三便啓西崑。皓映九玄清，五華帶錦雲。離羅煥神燈，七星耀北元。飄飄上清畿，翼翼帝一尊。落落高上章，羽章何紛紛。流香本無色，洞入萬仙羣。左迴三流劫，右轉九天關。金華纓玉童，八風舞空輪。四時無停機，青白早明分。九九改劫運，三三度一春。天地有終會，否激歸在翻。洞明正一法，嚴校六天文。太平返空無，奉翊後聖君。

大聖靈寶天尊 向良方

至心奏請上清真境靈寶天尊妙有上帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈禹餘靈寶君無上尊。

焚禹餘天符

靈風起西門，錦雲生東瓊。三炁煥玉洲，流香乘烟輕。五華披風散，倏忽朗九清。騫林耀朱日，黃華逐月生。中有採芝童，衣羽帶飛青。颺景萬嶺峰，逍遙宴綠輶。總御九空輪，運開無稽程。左命三天文，右攝六天兵。檢炁返空洞，天度應運傾。劫運自有會，誰測敗與成。洪波淪雲網，六合無遺形。白尸飄長流，孤魂因復靈。悲此去來際，方覺正法明。至學加精修，東華結瓊名。欣有白簡人，相與樂太平。

大聖道德天尊 向離方

至心奏請太清仙境道德天尊至真大帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈太赤神寶君無上尊。

焚太赤天符

洞關運天綱，五炁轉三微。紫戶吐瓊簡，玉閣照靈珠。重樓耀精彩，金門納神輝。八會交真風，晃朗重明開。天際九清外，落落高神回。三色返空無，四候應王畿。河侯已鼓筆，五行潛相推。六度無終劫，運炁乘炁歸。萬魔羅天布，群雄兢吐輝。兆人負災充，積尸令人悲。妙哉正法文，履劫明不衰。至時相奉迎，契在九天扉。與爾期太平，放身無翼飛。至心奏請東方自然八天上帝，願賜慈

悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飯滿。俾令六道幽靈受食等衆，形神俱妙，定慧雙圓，大聖大慈青靈九炁君無上尊。

焚東方八天符

森廓連華闕，神尊帝一真。靈虛交日月，玄覺照冥津。玉關回運數，梵炁啓都明。麾旛揚洞唱，天君乘化輪。金華領仙籙，鬱帶龍山宮。寶秀煥真境，宴戲高上墉。霏煙散妙靄，陶精養我形。飛天觀劫會，讚詠元始文。太極建青籥，晨輝布發生。爽耀應穹觀，熙怡存玉嬰。皇育旋景輿，升度七祖魂。彌梵飛流綱，周維天地根。祥霞翳霄仞，紫館真人君。軒奕青玄府，滅試摧凶奸。道應混高元，神結泥丸精。靈丘三素雲，羅耀交琳峰。七九齊至用，三五合同功。併協沖和德，變鍊超仙

踪。

至心奏請南方自然八天上帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，神雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈丹靈三炁君無上尊。

焚南方八天符

和陽煥明奕，炎輝玉鍊顏。靈梵隱玄關，空朗照神功。九華破幽錄，四極延生津。黃房神景居，綿綿保長存。窈窕騰月妃，萬界超劫輪。混洞翳玉書，龍漢明耀精。神文攝六天，察制祿魔群。邪試莫干我，列名標上清。超度五苦難，逍遙玄仞峰。飛神開大運，明觀九雲重。南上鍊我魂，旋蓋遊騫林。汎靄纏虛綱，十轉迴天關。大魔咸來賓，八景朝紫微。龍淵注東井，黃華養成真。大羅無色光，寂度無窮人。朱

陵協王炁，大和合福堂。玄臺映鬱蕭，誦洞遵西靈。神功布元範，反嬰齊自然。

至心奏請西方自然八天上帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈皓靈七炁君無上尊。

焚西方八天符

洞陽映霄闕，受度好生君。靈童火鍊功，福館涉生津。太漠明道彰，真人翔景雲。高淸布元化，蕩穢除祿氛。接我琅碧章，升入微妙門。揚輝浩極家，洞耀九玄精。造化回幽關，杳渺固靈根。景星連鬱秀，檢校超仙魂。蕭仞白元子，同携列帝賓。始皇天中王，寂寂虛無庭。玉晨張大範，流慶滌我塵。穹樓演洞唱，收魔束鬼形。三元分祖

化，九度悉宣陳。阿丘馳素駢，那耶契所緣。彌羅大聖神，更生升福庭。逸化乘雲歸，削死永合歡。瓊府巍峨境，森扶靄華騫。雲芽挹三暉，享此億遐年。

至心奏請北方自然八天上帝，願賜慈悲之澤，廣垂感應之恩，普放神光，降流真炁，灌注玉清溟滓大梵甘露淨供之中，攝化無窮，神變莫測，瓊漿寶飯，異果奇花，非色非香，非空非假，祥雲寶霧，甘露霏烟，應念充周，隨感飽滿。俾令六道幽靈受食等衆，形神俱妙，定慧雙圓，大聖大慈玄靈五炁君無上尊。

焚北方八天符

開化無上神，霄度凝玄炁。陽華真一精，太和育妙惠。九靈鎮西崑，機化停樞會。鳳車升羽輪，越此大劫津。雲阿擁圓浩，育生天神君。受符羽林宮，藹秀虛霞襟。空霄飛玄章，接舉身超騰。天統攝八難，開濟九幽魂。蘭宮連紫微，按格升朱陵。南宮有妙童，琅

耀鍊我形。蒼霞浮綠輦，佯慶供高尊。  
靈風飄泛響，可保無窮齡。九仙頌運  
錄，釋散宿業根。流綱抗靈梵，廓達皈  
無名。大混百骸死，徊烟合紫雲。慶  
重七葉孫，禍塞三途源。解滯離塵網。  
齊轡逍遙賓。倏忽登龍臺，稽首玉帝  
前。

梵炁彌羅天尊

侍職捧水盂，圍繞灑斛筵

衆誦靈書三十二遍

焚玉字真文

自然甘露天尊

焚三炁符

功德金色光，暉暉開閻幽。華池流真  
香，蓮蓋隨雲浮。千靈沖元和，常居十  
二樓。急宣靈寶旨，自在天堂遊三遍

清涼甘露天尊

焚甘露符

泠泠甘露滋，法味難思議。騫香流七  
真，冥冥何生疑。受此法食者，生天登  
紫微。三遍

變化無盡天尊

焚變食符

鄴都夜壑，忽以光輝。照燭幽魂，來飴  
香糜。靈符火鍊，百骸自飛。得見法  
會，仙岐知歸。三遍

萬劫難遇，功德可崇。開闢幽趣，全假  
真風。梯航彼岸，濟惠無窮。念念生  
因，駕景飛空。三遍

三清金闕，上元天一。化生靈泉，甘露  
金液。七真珍果，妙絕芳馨。玄通上  
食，廣滿無量。上靈火鈴變，神仙火鈴  
變。二十一遍

酥醪抹味天尊

道衆就坐

高功依經旨

行太極心法

靈寶建齋，度沈魂於不夜。元尊闡化，  
施法食於無方。仰荷慈悲，曲垂應感。  
霏煙羅絡，宛如六甲之行厨。道炁彌  
綸，鬱若諸天之妙饌。宜敷惠澤，均賚  
幽冥。爰念六洞羅酆，九幽泉曲，鐵圍  
萬仞，銅網千重，求生路以無由，企陽  
光而永隔，視諸孤滯，猶可哀矜。欲望  
廣運慈仁，特爲勅破，俾令苦趣，均入  
法筵，彰大德之好生，昭同仁之一視，  
玉符宣告，冥曹敬承。

焚破地獄符

茫茫鄴都中，重重金剛山。靈寶無量  
光，洞照炎池煩。七祖諸幽魂，身隨香  
雲緝。定慧青蓮花，上生神永安。

時刻昇遷天尊

上清靈寶玄壇炷香，關啓某靖追攝總局  
諸府院司真靈官吏，攝召所係五嶽四  
瀆地水職司九州社令十道主者，善導  
官吏，本州本懸城隍主者，當境土地里  
域真官，掌管六道四生，提攝三途九  
壘，隨我神運，來詣法筵，毋或稽違，有  
妨開度，一如靈寶度人律令。

八門開度天尊

焚召六道符

準上帝勅，掌六道功曹，仰承符命，攝  
召三界十方，盡玄虛際一切六道之衆，  
來臨法會，施鍊往生。

八門開度天尊

焚召四生符

準上帝勅，掌四生使者，仰承符命，攝  
召三界十方，盡玄虛際一切四生之衆，  
來臨法會，施鍊往生。

八門開度天尊

焚召九州孤魂符

準上帝勅，掌九州社令功曹，仰承符命，攝召九州界分一切孤魂，有主無主傷亡之衆，來臨法會，施鍊往生。

八門開度天尊

焚召山林巖洞孤魂符

準上帝勅，掌山森巖洞使者，仰承符命，攝召山林巖洞一切孤魂，有主無主傷亡之衆，來臨法會，施鍊往生。

八門開度天尊

焚召溪港澗源孤魂符

準上帝勅，掌溪港澗源使者，仰承符命，攝召溪港澗源一切孤魂，有主無主傷亡之衆，來臨法會，施鍊往生。

八門開度天尊

焚召城隍鄉界里域一切孤魂符

準上帝勅，城隍鄉界里域使者，仰承符命，攝召城隍鄉界里域一切孤魂，有主無主傷亡之衆，來臨法會，施鍊往生。

八門開度天尊

焚召二十四類傷亡符

準上帝勅，靈寶如意萬司諸大神，仰承符命，攝召十方九野二十四類傷亡之衆，來臨法會，施鍊往生。

八門開度天尊

焚召三十六種傷亡符

準上帝勅，九天溥度院三十六將軍，八大神將，仰承符命，攝召十方九野三十六種傷亡之衆，來臨法會，施鍊往生。

八門開度天尊

焚召七類死魂符

準上帝勅，北魁玄範府七司倒生玉女，仰承符命，攝召十方九野七類死魂之衆，來臨法會，施鍊往生。

八門開度天尊

我稟上帝符勅，召汝速至壇前。追攝四生鬼識，六道無主幽魂。九州社令荒閑，不問溪澗泉源。水火刀兵橫逆，雷伐產死天傷。自死風癆氣疾，一切幽滯窮魂。準令輒來序立，伺候九地臨軒。水火陶形鍊質，速去速往速來。不許稽違阻逆，敢有違上帝令，盡降所受仙職，汝形永墮幽陰。靈寶玄壇紀律，如告命施行。

八門開度天尊

宣催召牒開闢

當職道士持幡門外，召魂如儀

慈悲接引天尊

持幡詣法座前

幽魂及苦爽，死魄與陰靈，遊蕩幽冥域，喪失天地根。我以元始炁，反復汝胎嬰，聚魂鍊尸魄，鍊陽去九陰。元始召魂章，幹運南北辰，陶鎔坎離間，顛倒結胚暉。勿滯愛河浪，流浪生死門，隨我元始炁，斷絕苦迷津。悟理玄元道，離合自成真，出入無爲地，常居天地春。逃形九天關，不墮於苦輪，來赴玄壇鍊，隨章心自明。

我聞混茫剖判，精粹運行，天地人雖分三極之殊，精氣神實貫一元之妙。惟人爲貴，受中以生，出青入玄，二氣周流於性命。迴黃抱紫，三宮混合於希夷。渴咽雲泉，饑餐霞藥，其生也逍遙於壽域，其化也快樂於玄根，何有輪迴，奚憂沉滯。自樊籠之日汨，致英華之風漓。五賊紛紜，步步罪緣之積。六情浩蕩，心心冤業之修。地戶洞開，天年易盡，過輕則暫淪塵境，愆深則永墮異途。故有六趣之飄流，與夫三途

之沒溺。雖回心而自悔，奈無路以求生。深可哀矜，孰爲拯援。幸玄雲之陛設，際甘露之門開。玉勅遐頒，泉曲化陽明之境。金符告下，羣靈離幽暗之鄉。俱會道場，普膺功德。然念久淪冥漠，易失正真。或死後形體之未完，或生前疾病之未治，或懷冤對，或抱震驚，或未復於人身，或尚沉於異類，非繇救拔，難以超升。我以夙稟真元，心存濟度，不忍一物之失所，有孤上帝之好生。依玉訣以運神，仗玄曹而贊化。其有久縈地獄，枷鎖未除，繫索未解，身形弗全，衣服不備，咽喉枯槁之衆，請火鈴大神，玄靈大神，羯磨大神理之。其有兵戈戰鬥，軍陳傷亡，五體百骸不完之衆，請青帝護魂君，白帝侍魄君，赤帝養炁君，黑帝通血君，黃帝中主君理之。其有疾病喪身，痛毒難任，盲聾瘖癩，癱疾拳曲，癆疰癰疽，未經痊愈之衆，請上清天醫院一行官吏理之。其有胎產殞命，子母未分，形神痛苦，腥穢莫近之衆，請九天監生司浣濯司一行官吏理之。其有雷電震

驚，覆舟墜馬，魂魄飛揚，精神怖畏之衆，請聚魂復魄靈官理之。其有畜生業道，四生異類，人身既失，受苦未盡之衆，請九天溥度院官吏脫形離苦靈官理之。其有冤仇互對，展轉報復，無有窮已之衆，請解冤釋結靈官理之。其有自失正途，樂從邪道，故生迷戀，罔知解脫之衆，請能談善說靈官理之。俾自地獄來者，苦具脫除，形神完復，受畜生相者，改易形貌，還復人身。兵陳死亡者，肢體成全。疾病夭喪者，痛苦痊愈。胎損而子母未分者，速獲分娩。妊傷而腥穢莫近者，即得清淨。魂魄震驚者，永離怖畏。冤仇執對者，各遂解釋。迷正道而從邪黨者，皆改易心志，皈向法門。庶俾見前衆靈，一時復形，無有中傷。體太上化育之仁，翊大造生成之德。靈寶符命，謹用頒宣。

#### 焚全形一宗符命

東方紅杏育蒼英，南方襪膈養炎精。  
西方摩真司瑞澤，北方墨黑度玄津。  
中央靈寶玄元始，五炁旋虛妙入神。

癱攣跛痾蒙神曲，耳目無聰返慧明。  
自害自刑俱復體，墮胎傷折得回魂。  
中毒夭亡皆強體，雷嗔暗惑得全靈。  
青帝護魂肝木旺，赤帝養炁心火亨。  
白帝侍魄生成肺，黑帝通血腎玄清。  
黃帝中主脾土安，梵炁彌羅自合真。  
起死迴骸鍊離坎，白骨成人萬炁明。  
濟度垂死無生滅，九和十合結胎嬰。  
五老運靈監受度，逍遙變化宴上清。

#### 全形復性天尊

幻形易滅，心病難除。地水火風，假合而生身，易歸散壞。饑渴寒暑，纏縈之妄想，難證逍遙。今補劑而息黥，復生魂而育魄，圓成相貌，整頓容儀。猶恐幽陰久淪，神炁未備。謹爲攝降玉清混元腎水少陰之炁，心火少陽之炁，肝木厥陰之炁，肺金太陰之炁，膀胱太陽之炁，小腸太陽之炁，膽腑少陽之炁，大腸陽明之炁，胃腑陽明之炁，三焦少陽之炁，胞絡厥陰之炁，普爲衆靈羅絡藏府，扶植神靈，仙化成人，享食受鍊。

#### 焚十二經絡符

陽明景精，陰貫陽形。內結外續，炁循

神凝。五迴七轉，流運黃庭。九九華敷，經絡纏身。三景九陽，混合百神。流攝九宮，八卦分形。元始混化，敷具形神。

回靈養素天尊

形神俱妙，故道烝以長存。內外兼融，庶惡根而永滅。合蕩黃華之水，更聽綠字之章，永保清虛，克諧飛化，魂儀如在，共赴蘭湯，法衆運誠，慈悲引導。

清水度魂天尊

引旛入浴室行沐浴儀

金容出世天尊

引旛詣道前行朝禮儀

寶幢接引天尊

引旛詣斛前插花瓶中

妄業自招，久沈淪於異趣。宸恩廣被，幸莅止於玄壇。將享珍羞，咸超苦惱。允屬宿緣之慶會，宜知齋主之勤拳。本司昨據入意，剋卜今霄，敷陳淨供，依三尊之妙化，極六道之沉迷，降甘露而布慈雲，頓令飽滿。上南宮而超北府，永獲逍遙。以茲及物之仁，少補奉先之孝。覬回善果，開度亡靈。知恩報

恩，盍降欣欣之多福。上德不德，永依蕩蕩之天光。善來善來，普歆淨供，洞章讚詠，靈液沾濡，法衆慈悲，旋行引導。

清涼甘露天尊

引旛遶斛三帀倚斛前

自此後道衆執水盂旋遶沾灑

功德金色光，暉暉開閭幽。華池流真香，蓮蓋隨雲浮。千靈沖元和，常居十二樓。急宣靈寶旨，自在天堂遊。三遍

焚通真符

悲夫長夜苦，熱惱三途中。猛火出咽喉，常生饑渴念。一灑甘露漿，除熱得清涼。神魂生大羅，潤及於一切。三遍

焚開咽喉符

泠泠甘露滋，法味難思議。騫香流七真，冥冥何生疑。受此法食者，生天登紫微。三遍

焚甘露受食符

自然天厨食，吾今與加持。一粒遍十方，河沙共沉迷。饑渴永消滅，食之赴瑶池。今將獻亡靈，功德不思議。三遍

焚離苦升天符

清涼甘露天尊

水火聚散路，神炁往來衢。焰焰焦槁盡，臟胃五方枯。玉液回津源，玄漿通潤舒。真香流百脉，逍遙常自如。

焚玉清秘梵開臟腑法食符

瀏瀏崑崙泉，泛泛玉源烝。施運庭苑中，幽香徹天地。玉女灌真香，仙厨捧祥瑞。食之億萬年，體力悉殊異。

焚玉清靈梵清涼法食符

召集玄元氣，濃噴流乳香。黃華洞霄珍，潤液多滋涼。桂蒲雜靈根，冉冉通肺腸。百神普歌舞，來遊無何鄉。

焚玉清玉梵甘露法食符

異實出靈芳，浮玉瑩清光。泛奇藹靈氣，廣滿克難量。神清得超度，當游妙化堂。元周扣玄機，永享春劫長。

焚玉清大梵恩重法食符

寶梵演通妙，開關溢九幽。慶化精珍珍，瑞色常浮浮。餗餗法炁盈，深羽翠霞樓。浣濁積劫穢，穩步朱宮遊。

焚玉清寶梵玉函法食符

長關天色光，熠熠映寶器。玄通無上食，靈寶無上味。高真所溥施，法音靡



不至。快樂復飽滿，浮遊三界外。

焚玉清真梵通玄法食符

清涼甘露天尊

妙道生一炁，炁中分陰陽。凝化日月星，燦然流三光。九華合九道，八色映八方。煥爛洞真體，流精皈大芒。下生淵泉宮，上徹無何鄉。縱體復飛跡，欵然都相忘。七寶流精結，混沌雜華房。嚙服九霞散，此樂殊未央。

焚三光流精鍊化法食符

玄絕九炁中，澤嬰觀太無。鬱儀煥暘谷，結璘耀天衢。五星流寶光，斗極迴乾樞。飛炁鬱勃散，咽御方踟蹰。超跡天寶階，鍊芝服華敷。炁布萬神備，舉體升太虛。

焚三光澤嬰鍊化法食符

浩精生法炁，氤氳凝天中。兩曜共澄徹，五緯交相通。三光煥已明，寶炁盈三宮。帝鄉會九老，咽服百骸豐。金華照光景，身與日月同。念道上聖前，萬劫壽無窮。

焚三光法炁鍊化法食符

玉陽正真炁，妙道三景分。玄和唱靈

音，八會敷瓊文。五老宴丹臺，飄飄乘景雲。大聖諸天衆，回駕飲玉津。三五定生籍，遊戲太上賓。華光朗無際，携手朝玉晨。

焚三光玉陽鍊化法食符

回首仰圓羅，合景挹靈芒。拘魂制七魄，思審定中央。行住禮虛無，寢息宴雲房。饑餐黃蘗花，渴飲瓊根漿。神精命大魔，合體鍊真光。復照觀太無，長在空中遊。玄通泯波際，真化靡終期。縹緲無終始，賢者當明知。寂寥玄理教，應運闡宏規。降道不自照，要當先所施。會歸無二處，隨心自合離。

焚三光靈芒鍊化法食符

引炁鬱羅外，九芒結雲華。七晨高上道，三景耀朱霞。捧香服晨精，功滿解世羅。鍊化塵劫盡，億劫不爲多。落籍三界庭，結友太上家。御景拱玄斗，八極何足賒。

焚三光雲華鍊化法食符

自然至真道，妙極玄中玄。萬天朝玉陛，五老參華軒。三光有靈炁，所度惟聖賢。勤行道仙業，咽漱吞華根。神

形合三象，渺渺歸本根。鳳鳥翔十天，飛舉不顧還。

焚三光導仙鍊化法食符

迢迢三天上，落落九玄臺。金童採芝集，玉女持花回。天賓挹仙客，俯仰升瑶階。天河灌東井，寶炁營空來。嚙納漱瓊津，兆劫不復衰。矯首三清路，振衣何樂哉。

焚三光寶炁鍊化法食符

至矣上真道，妙哉靈寶章。吸景導五星，咽漱存華芒。流精灌百體，皓晶凝雪霜。洞達照內外，塵滓都消亡。體肌不復老，契此名定光。永宴大明館，斯爲不夜鄉。躡跡歸本根，九轉凝真常。

焚三光定光鍊化法食符

酥醪抹味天尊

誦中篇三遍

焚玉光真文光明雲篆

大慈平等天尊

洞章朗徹，妙饌羅敷，解三途熱惱之悲，極五體充悅之樂，萬緣澄寂，九竅光華，悟道無爲，登真有路。然慮久淪

幽夜，乍脫陰關，業垢交周，塵根結習，陽神猶散，性識未明，非繇離坎之陶鎔，難越乾坤之劫會。玉清勅下，玄曹敬承，宜隱芟城，恭伺鍊度。

廣度無礙天尊

引旛入芟郭

後入甘露淨供壇前鋪水炎池儀

靈寶領教濟度金書卷之六十九

### 靈寶領教濟度金書卷之七十

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

淨供合用

#### 甘露淨供壇前鋪水火池儀

步虛

臣某謹重誠上啓三清上帝，十極高真，應化度人無軼真宰，仰冀隆慈，載垂鑒映。臣聞陽魂陰魄，妙萬化以裁成。坎虎離龍，運二儀而橐籥。南上列朱陵之府，西靈尊內禁之曹。流火神庭，黃華東井，幹五行之精粹，陶庶類之形神。凡有皈依，必蒙感應。以今入意，曲荷慈風之高映，密凝甘露以下臨，妙絕芳鮮，幸皆飽滿，提携拯援，終藉生成。深念六道窮魂，四生滯爽，盡屬陰曹種子，豈明造化良因。九炁無歸，萬神俱解，莫遂超升之路，有孤生化之恩。庸按憲章，普行鍊度，金膏洞照，

消鎔億劫之塵根。玉彩呈祥，灌沐多生之業垢。庶萬形之澄湛，還一性之靈明，時刻昇遷，飛行自在。伏望金書度命，玉符告盟，降水火之真精，布儀璘之正化，返純陽而消陰否，本始生成。變塵質而回靈根，胎嬰入妙。皈依激切，恭伺玄恩。

無量度人天尊

焚召鍊度官將符

上清靈寶玄壇炷香，關啓朱陵火府南昌上宮鍊度仙曹，執職官吏，主水大將軍，水沼神將，水沼使者，水沼童子，黃華玉女，石景水母，十二河源大將，主火大將軍，火池神將，火池使者，火池童子，火鈴靈童，擲火萬里大將，九天溥度青玄左右真司鍊度真人，仙靈玉童玉女。願遵玉敕，莅止玄壇。和合陰陽，符黃華蕩形之妙。匹配水火，明玉眸鍊質之玄。雲篆宣行，金科召役，各恭乃職，共暢真機，一如靈寶無量度人律令。

水火鍊度天尊

咨爾真靈，隨我神運，變化水池，蕩滌

亡靈，鍊形濯質。

侍職捧水盂，洒水池

衆誦靈書

焚建水池符

太陰含化，八景齊臨。五老秘諱，太陰通明。璇璣運轉，招真致靈。陰光降炁，變鍊鬼魂。天漿下注，流燭利貞。

焚降真水符

陰炁鍊化，景物誦誦。壬癸濯質，同魄鍊形。大道宣化，天地合并。水變上元，魂度南陵。

焚真水合同符

魄皈壬癸，魂拘九壘。元始真符，煉魂真水。東井黃華，夫人降醴。太玄真竅，返復精髓。激濁揚清，入生出死。咨爾真靈，隨我神運，變化火池，陶冶亡魂，鍊神返炁。

侍職捧水盂洒火池

衆誦靈書

焚建火池符

南方之君，火府之神。降炁變易，流火神庭。亡魂鍊質，逍遙上清。金光煥落，玉眸易形。

焚降真火符

同炁濯魂，金精通明。四象咸蓋，丙丁鍊神。日魂普照，廣度亡靈。升神宣化，陽炁升騰。金液上鍊，仙化成人。

焚真火合同符

閻浮玉誦，洞妙自真。火熾丹天，晃朗朱陵。冶鍊離貞，配合日星。玄幽那漠，萬梵敷陳。

玉眸鍊質天尊

咨爾真靈，隨我神運，部衛幽靈，來詣壇前，依科鍊度。

焚引魂入鍊符

玉京萬法大羅尊，千重寶範億玄言。碧霞絳雲列衆道，玉闕金閣敷真文。偃定高真遊至空，八極飛神度無邊。鬱鬱昭昭萬炁中，吐聲如嬰炁成紋。振動梵天是空道，靜明法耀擁慈雲。超關昏衢北羅艷，列上金簡還靈明。炎炎火池成清涼，解刃挫鋒悉摧紛。豁散業境空法力，保召罪性來吾壇。天尊聖齊本無際，萬天萬地承真元。莫有不從不化度，超凌三界佐虛玄。隨心所召願心歸，仙信梵言如甘泉。

一聞百骨解熱惱，朱陵開度成至玄。

超凡大道入慈悲，不濯巨細惟翩佺。

華夏泠泠引汝魂，逍遙獨步紫虛天。

水火鍊形天尊

咨爾真靈，部衛幽爽，隨我神運，赴水池受鍊。

引旛詣水池

焚水鍊符

北方之君，黑帝之精。辰星使者，壬癸將軍。玄武陰神，肅肅清音。五行造化，萬物發生。天帝有敕，使者須聽。攝召亡魂，濯鍊真形。

焚黃華蕩形符

東井黃華，石景玉精。飛玄水母，金體玉津。滔滔源源，不竭池亭。九龍吐灌，三光垂精。仙人吐潤，鍊度幽靈。內外朗徹，表裏洞清。百關九竅，元炁滋榮。五臟六腑，萬神自生。胞胎結節，隨水開扃。死炁斷絕，惡根沉零。我今鍊化，死骸生魂。反故易貌，玉體金容。變化鍊度，飛升紫庭。

焚月簡符

黃炁陰華，陰精固仙。沐浴九魂，冠帶

紫晨。明暉啓告，玉胎鍊仙。華光交接，流光陶津。九陽齊化，玄霞散烟。元景回靈，曲映我身。飛升上宮，洞觀瓊軒。

焚玉精水鍊符

金醴玄津，森羅淨靈。玉龍灌溉，百關清靈。滌垢豁塵，萬氣齊仙。育鍊華池，真元自澄。

焚水鍊變仙符

黃炁流精，三台凝光。玄輝返正，冠帶八芒。鍊度東井，受明飛光。金華散靈，五君流芳。夫人降醴，遍洒十方。洪芒下注，六府溢光。金精九仙，易景返容。

清水度魂天尊

咨爾真靈，部衛幽爽，隨我神運，赴火池受鍊。

侍職引旛，詣火池

焚火鍊符

南方之君，赤帝之精。熒惑使者，丙丁將軍。朱雀炎神，赫赫陽精。五行造化，萬物發生。天帝有敕，使者須聽。攝召亡魂，鍊度真形。

焚玉眸鍊質符

刀利禪猷，婆尼靈童。流火鍊質，玉眸真容。升入福堂，洞陽之宮。司命受鍊，相火成罡。梁為天宰，同感炎光。樞機輔弼，星列玄章。育徹大明，赤章凌芒。鍊化神魂，表裏俱昌。

焚日簡符

赤爐丹景，圓華九明。太輝啓晨，煥耀朱精。五帝肇霞，洞映萬生。觀落上真，空無條平。運炁鍊采，流蕩五形。使者神化，六府敷寧。壽均天地，三辰相傾。

焚飛仙火鍊符

流火鍊質，玉嬰返形。九陽易質，五神合靈。左合飛火，炎精迸輪。洞照天地，內鍊形魂。

焚火鍊變仙符

朱明上景，日月合明。中有赤帝，南極真人。名曰洞浮，玉眸詵詵。洞陽火鍊，陰極陽生。甲乙丙丁，戊己庚辛。壬癸受鍊，魂榮胎生。三嬰迴骸，起死返生。朱陵度命，受鍊更生。

朱陵度命天尊

咨爾真靈，部衛幽爽。隨我神運，水火交鍊。迴尸起死，結炁成形。

侍職引旛，詣水火池之間

焚水火交鍊符

坎升離降，虎走龍奔。天一地二，子午胎仙。南樞北機，烏兔遶幡。黃華逆飛，炎光下傳。周迴九六，普鍊無邊。太極真炁，運合乾坤。九轉神化，飛升自然。

焚金液鍊形符

金液鍊形，與道合真。開明三景，是為天根。無幽無極，無始無終。元皇九醜，靈魔絳宮。紫雲飛天，身乘六龍。水上火下，流入三宮。神歸陽明，大道自通。

焚回尸起死符

靈芝無根，衆化之原。中凝七魄，上結三魂。二十四真，出入無門。杳冥之內，恍惚之中。隨劫存亡，逐炁而生。外凝混朴，內養七真。五神植華，三台敷榮。紫闕素童，返形皈英。騰雲而升，駕霧浮空。中有玉真，號曰神公。左挾無英，右衛白元。玄獸遏後，丹禽

導前。上浮翠蓋，下擁金蓮。香炁凝空，甘露無窮。食之無盡，尋源不終。

### 焚元君鍊身符

炁化成人，尸變八玄。三化九鍊，升入九天。九天之劫，更度魂神。受化更生，得爲真人。

### 水火成真天尊

玄壇肇建，朱府流光。走虎飛龍，結五行之秀炁。含烏育兔，媾二景之英華。幸陶九地之魂靈，均悟一乘之正性。恩周無極，仁浹有生，載爲萬物之神，允屬九陽之妙化。敬依寶典，恭請宸輝。溟滓凝精，降蒼碧黃白綠紫絳玄丹之鬱勃，恍惚有象，庶胞胎魂魄藏府竅景神以圓成。稽首皈依，稱揚妙範。

### 九天生神天尊

謹上請鬱單無量天帝真胞命元元一黃□之炁九重，爲所度幽靈纏其胞，使胞元宣通，上澈於天以生成。

### 焚本天真炁符

混合空洞炁，飛爽浮幽寥。延康無期劫，眇眇離本條。苦魂沉九夜，乘晨希

陽翹。大有通玄戶，鬱單降晨霄。黃雲凝靈府，陰陽炁象交。胞元結長命，惡根應化消。桃康合精延，二帝秀玉飄。灌溉胞命門，精鍊神不凋。九天命靈章，生神神自超。元君遏死路，司馬誦洞謠。一唱萬真和，九遍諸天朝。稽首恭劫年，慶此榮舊苗。謹上請上上禪善無量壽天帝真胎命元洞冥紫戶之炁九重，爲所度幽靈纏其胎，使胎根解結，下響於地以固靈。

### 焚本天真炁符

無量結紫戶，炁尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒伯史原，結胎守黃房。斬根斷死戶，熙頤養嬰童。禪善導靈炁，玄哺飛天芳。華景秀玉質，精練自成容。務玄育上生，羅列備明堂。太虛感靈會，命我生神章。一唱動九玄，二誦天地通。混合自相和，九遍成人功。大聖慶元吉，散華禮太空。諸天並歡悅，一切稽首恭。謹上請梵監須延天帝真魂命元長靈明仙

之炁九重，爲所度幽靈纏其魂，使魂門通神以達精。

### 焚本天真炁符

須延總三雲，玄元始炁分。落落大梵布，華京翠玉尊。明梵飛玄景，開度長夜魂。遊爽赴期歸，炁炁返故根。太帝號陽堂，字曰八靈君。九關迴綠道，胎炁生上元。陵梵度命籍，太一輔精延。泥丸敷帝席，三部八景分。魂生攝遊炁，九轉自成仙。琅琅九天音，玉章生萬神。三徧列正位，炁參八辰門。玄關遏死戶，靈鎮津液源。應會感靈數，明道潛迴輪。慶此嬰兒蛻，稽首讚洞文。

### 焚本天真炁符

謹上請寂然兜術天帝真魄命元碭尸冥演由之炁九重，爲所薦幽靈纏其魄，使魄戶閉關，天王降仙以安寧。寂然無色宗，兜術抗大羅。靈化四景分，萬條翠朱霞。遊魄不顧反，一逝洞羣魔。神公攝遊炁，飄飄練素華。榮秀椿劫期，乘運應靈圖。空洞生神章，瓊音逸九霞。一唱萬真會，騫爽合成

家。九轉景靈備，鬱鬱曜玉葩。兜術開大有，一慶享祚多。上聖迴帝駕，嬰兒歎以歌。不勝良辰會，一切稽首和。謹上請波羅尼密不驕樂天帝真藏府命元五仙中靈之炁九重，爲所度幽靈纏其五藏，使五藏清涼，五帝朝真以存神。

焚本天真炁符

翻翻五帝駕，飄飄玄上門。遊步黃華野，迴靈驕樂端。採集飛空景，舊爽多不存。太微迴黃旗，無英命靈旛。攝召長夜府，開度受生魂。公子輔黃寧，總錄具形神。玉章洞幽虛，五轉天地分。炁練元藏府，紫戶自生仙。數周衆真會，啓陽應感繁。玉女灌五香，聖母慶萬年。三界並歡樂，稽首禮天尊。謹上請洞玄化應聲天帝真靈府命元高真冲融之炁九重，爲所度幽靈纏其六府，使六府調泰，胃脘生津以納和。

焚本天真炁符

應聲無色界，霄映冠十方。迴化輪無影，冥期趣道場。靈駕不待轡，朗然生神章。空洞諒無崖，玄爽亦爲疆。練

胎返本初，長乘飛玄梁。蘄畜喪天真，散思候履常。斬伐胞樹滯，心遊超上京。願會既玄玄，悟我理兼忘。介福九天端，交禮地辰良。混化歸元一，高結元始王。稽首儔靈運，長謝囂塵張。謹上請靈化梵輔天帝真元府命元高仙洞笈之炁九重，爲所度幽靈纏其七竅，使孔竅開聰，心神朗明以開通。

焚本天真炁符

玄會統無崖，混炁歸梵輔。務猷運靈化，潛推無寒暑。乘數構貞條，振袂拂輕羽。瓊房有妙韻，汎登高神所。圓輪無停映，真仙參列序。上上霄衢邈，洞元深萬巨。秀葉翳翠霞，停蔭清泠渚。遨翫怡五神，繁想嘯明侶。五難緣理去，冲心自怡處。爽魂隨本根，疊疊空中佇。七誦重關開，豁滯非神武。運通由中發，高唱稽首舉。謹上請高虛清明天帝真華府命元真靈化凝之炁九重，爲所度幽靈纏其八景，使三部八景整具形神，幽夜光明以防身。

焚本天真炁符

清明重霄上，合期慶雲際。玉章散冲心，孤景要靈會。煥落景霞布，神衿靡不邁。玉條流逸響，從容虛妙話。靈音振空洞，九玄離幽裔。感爽無凝滯，去留如解帶。明識生神章，高遊無終敗。玄景曜雲衢，跡超神方外。應感無方圓，聊以運四大。研心稽首誦，衆聖共稱快。

謹上請無想無結無愛天帝真嶽府命元自然玄照之炁九重，爲所度幽靈纏其身，使三關五臟，六腑九宮，金樓玉室，十二重門，紫戶玉閣，三萬六千官府，三千六百機關，根源本始，一時生神，使萬神俱備，毛髮生身，諸天下臨以得生。

焚本天真炁符

無結固無情，玄玄虛中澄。輪化無方序，數來亦叵乘。誰云無色平，峨峨多丘陵。冥心縱一往，高期清神徵。良遇非年歲，劫數安可稱。浮爽緣故條，返胎自身恒。靈感洞太空，飛步霄上冰。津趣鼓萬流，潛凝真神登。無愛固無憂，高觀稽首昇。

九天稱慶天尊

太上高真，九靈之精。死魂飛仙，上登紫庭。沐浴華池，身神澄清。精通太虛，萬炁自生。

回靈養素天尊

咨爾真靈，部衛幽爽，來赴壇前，傳籙授戒，時刻昇遷。

太上初炁混陰陽，水火既濟方玄黃。

鍊質玉容合仙品，飄飄飛步遊仙鄉。

滓穢消除神明清，霞衣錦珮光琳琅。

靈寶青玄無上聖，開度功德不可量。

一聲玄梵徹三界，綿綿道德生仙鄉。

侍職引旛，詣法座前

玉章誦徹，妙炁生神，涵三寶之恩光，沐千真之景貺，一塵不立，萬境俱空，行宴御於虛無，永逍遙於寥廓，脫離苦趣，返復真宗。惟太上之慈悲，慮眾生之顛倒，暫明終晦，易墮輪迴，護正衛真，宜修教戒，佩奉盃遵於玉津，宣傳庸按於金科，各肅身心，勤拳跪受。

億劫應化天尊

智慧頌

智慧常觀身，學道之所先。眇眇任意

肆，自然錄我神。天尊常擁護，魔王為

保言。晃晃金剛軀，超超太上仙。

道言：沉淪苦道，不睹陽光，皆因愚愛

貪嗔，邪淫放恣，妄求不息，侵掠無厭，

三業六情，故為誤作，結讎長夜，魂魄

飛揚，無倚無依，轉生沉墮。若能受持

九真妙戒，持心端恪，勤拳遵行，當得

罪削陰關，上名南籍，轉輪福慶，升入

無為。爾等眾靈，夙植良緣，幸逢玄

化，超幽陰之苦海，受甘露之香齋，鍊

魄洞陽，消愆泉曲，滌多生之塵垢，復

九炁之胎嬰，返形更生，回旋太混。倘

不佩受真戒，檢制身心，一有障魔，前

功俱廢，我以運心慈憫，領教度人，今

當道前，依科傳授。先皈依於三寶，次

宣說於戒條，請肅儀容，擊拳稽顙。

道經師寶天尊

人各恭敬

第一皈依無上道寶

道寶讚

第二皈依無上經寶

經寶讚

第三皈依無上師寶

師寶讚

三寶既已皈依，九真今宜傳授。佩持

之後，即有天真上聖，四司六宮，察命

威神，行藏擁護，遷善舉惡，禍福立彰，

鑒爾身心，絲毫不漏。若背違戒約，懈

怠身心，再墮幽陰，難逢善果。切宜靜

心專意，念道思真，稟戒而行，頃刻勿

捨，當得世受福，劫劫長存，身處光明，

不經苦惱，常為真道，永侍仙官，道不

負人，勤行諦受。

大慈說戒天尊

北帝頌

善哉元始尊，眾生慈父母。傾光紫微

宮，曲映九幽戶。峨峨丘寒庭，迴照廓

冰浦。炎炎烈火灼，霈然灑法雨。圓

通大哀智，常善濟眾苦。拔度長夜魂，

今得稽首禮。

第一敬讓，孝養父母，名初真戒。

第二克勤，忠於君主，名念真戒。

第三不殺，慈救眾生，名持真戒。

第四不淫，正身處物，名守真戒。

第五不盜，推義損己，名保真戒。

第六不嗔，凶怒凌人，名修真戒。

第七不詐，諂賊害善，名成真戒。  
第八不驕，傲忽至真，名得真戒。  
第九不二，奉戒專一，名登真戒。

奉戒頌

道爲無心宗，一切作福田。立功無定準，本願各由人。虛己應衆生，注心莫不均。大聖崇正教，亦由雨降天。高陵靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

九戒傳受，三寶證明，智慧昭彰，圓通無礙，開明未悟，警覺真仙，恬翫五神，超升大有，心生妙慧，形入無爲，靈童歌無量之音，神公開長生之戶，六根清淨，萬業消鎔，旋行紫極之宮，洞妙金華之境，精思陽梵，駕景飛玄，永脫諸塵，逍遙自在，玄壇符籙，資導去程，恭肅披宣，各宜跪受。

- 宣救苦符 宣長生符
- 宣生天籙 宣運明誥
- 宣溥度券 宣超生符
- 宣九龍符 宣托生符

宣九戒牒 宣功德牒

宣護送文檄

向來溥施玉清甘露淨供，開度幽爽，功德周圓。伏冀縱步金蓮，朝神玉闕，辭三寶而離席，持九戒以升真，名注丹書，功標紫字，永無輪轉，妙契虛玄，泛乘不死之舟，便達無爲之岸，少需發遣，平步登天。

寶華圓滿天尊

臣聞二儀布化，九炁凝神，千真聚會於三宮，萬象森羅於六府，百關和暢，九竅開通，魂靜魄寧，神清氣爽，所有亡魂，仗慈良因，隨果受度，得爲真人。臣等草茅賤類，螻蟻微軀，輒膺命以求真，伏鴻慈而濟物，虔伸懇悃，普被恩光，乘大道之甄陶，涵萬天之景貺。伏望雲車風馬，却返於層霄。玉蘂珠華，飄零於碧落。臣等仰謝天恩，下情不勝激切，攀戀之至。

送真頌

迴輶五雲輿，騰駕九章歌。倏忽升天遠，醮壇香炁多。玄恩覃宇宙，福祿遍山河。緬想神仙路，逍遙上大羅。

師行超度法，

道衆送旛如儀

焚燎

贊引歸靜默堂小啓謝師

向來頌

靈寶領教濟度金書卷之七十



靈寶領教濟度金書卷之七

十一

洞微高士開光救苦真人甯全真授  
靈寶通玄弘教水南先生林靈真編

科儀立成品

九天生神齋

開啓變壇儀

步虛 啓白

慶雲騰瑞，凝玉彖於虛玄。霏霧呈祥，噴金紋於空碧。龍箒杳藹，猊鼎氤氳，先焚名香，供養三界符使，四直功曹，鑒察靈祇，里域主宰，願迂靈馭，肅鑒凡誠。以今奉爲齋主某人，崇建靈寶生神妙齋，開度亡故某人，上登陽景。當乞奏聞三境，敷告九霄，命魔攝氛，招真御景，俾幽冥感應，內外肅清，齋福周圓，法輪興轉，先亡受度，見在蒙恩，稽首皈依無極大道。

九天生神天尊

具位奉行靈寶九天生神大齋小兆臣某，

謹焚寶香，虔誠上奏祖師虛皇上帝元始天尊，太上玉晨玄皇大道君，太平金闕後聖玄元太上老君，玄穹高上昊天玉皇上帝，真師洞真天寶帝君，洞玄靈寶帝君，洞神神寶帝君，三寶丈人，九天應元雷聲普化天尊，自然生神鬱單無量天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞玄化應聲天帝，靈化梵輔天帝，高虛清明天帝，無想無結無愛天帝，太上高空九天丈人道君，高上玄靈九天真王道君，高上空洞混元九天元父道君，高上虛空自然九天真母，道君，玄和九天聖母元君，九天無量三昧太乙元君，九天元皇帝真元君，九天金籙無量壽生神君，九天魄靈丞相帝君，九天魂精司命帝君，五靈五老上帝，南極長生大帝，玄中大法師，靜老天尊，三天大法師，六合高明大帝，九天玉輔上宰四協侍宸，好生韓君丈人，度人不死尊神，迴骸起死監生大神，十方無極飛天神王，長生大聖，無量度人君，九天諸司真君，天地水三官大帝，九天尚

父佐翊上輔遊奕四聖真君，九天列位真人，九天司命府主執靈官，五百靈官，九天侍僊玉郎，典禁靈妃，玉童玉女，直事符吏，三洞四輔流傳至教經籍度師列位真人，名山洞府靖廬治化得道真仙，東嶽天齊仁聖帝，北陰玄天酆都大帝，東霞扶桑丹林大帝，城隍社令里域廟貌地水官屬，三界真靈，仗此寶香，普同供養。香乃玉華散景，九炁含煙，香雲密羅，徑衝九天。侍香金童，傳言玉女，爲臣通奏，上聞帝前。令臣所啓，咸賜如言。臣聞三洞流光，紫笈著修齋之典。九清布化，丹章垂懺謝之科。微帝渥於圓清，霈天休於方厚。霓輪夙駕，星蹕傾光，非由九陛之崇嚴，曷混萬真而慶會。以今奉爲入意，其諸情悃，已錄奏聞。今當率勵衆官，清虛一念，按威儀而莅事，遵憲令以關盟。慮下土之塵寰，非上方之道境。運神合景，莫格虛無，降真召靈，靡通寥廓。欲望洪慈廣布，玄貺潛孚，流祖炁以輝華，錫靈光而照耀。變凡爲聖，企碧玉之蕭臺。以人格天，現紫金之

黼座。鼓節麾幢而扈翼，執籙把籍以班朝。梵炁周迴，想玄之又玄之微妙。流精洞煥，同上極無上之希夷。遂微臣奏對之忱，副齋主勤拳之請，蒙如丹禱，仰荷天恩，清衆運誠，皈依讚詠。

九天生神天尊

法師行持伏地如儀

道衆誦呪

一炁宗祖元，鴻濛天地先。真精運太虛，五劫開先根。玄炁生天寶，龍漢木劫先。混洞太無炁，玉清胤三天。鬱單凝始青，禪善太青連。東南始丹境，天傾號須延。元炁生靈寶，赤明火劫傳。赤混太無炁，上清胤三天。太丹兜術位，始素驕樂端。應聲無色界，太素映西昆。始炁生神寶，上皇土劫存。冥寂玄通炁，太清胤三天。始玄號梵輔，清明合太玄。無愛延真上，中拱虛皇尊。延康金劫石，二炁分乾坤。經緯流陽精，仙真握化權。水劫開皇初，陰陽奠山川。九壘應九霄，嶽瀆胤鬼神。繁炁化動植，冲和育人民。皆蒙元始炁，凝妙結胚暉。玄都裁政令，九

天贊絲綸。靈寶生神章，虛無契自然。清齋運金書，九六度劫年。學士能升天，鬼靈能登仙。幽魂能開度，枯朽能發煙。嬰孩能言語，死骸能還人。大聖慶元吉，皈命禮精虔。逃形天地間，永超生死輪。太空流梵炁，稽首讚洞文。

九天生神天尊

法師三拜起

臣今仰仗恩光，神化壇墀，紫煙羅絡，蒼靄輪囷，隱然汎景之龍墀，中有浮空之獅座。金容玉相，凝翠華浩劫之尊。綠輦丹輿，來碧落空歌之衆。三靈拱極，萬聖朝元，希誕布於德音，更關宣於真職。三洞官屬，九天仙靈，城隍里社之神祇，經籙符法之兵馬，各效勤而受事，爲宣德以承符。明聽誓言，翼齋功於終始。肅遵典令，敷妙化於幽冥。稽首皈依無極大道。

九尊號轉班宣呪

師行持運念如法

九天高靈，受命玉清。仙真森列，佐翊皇經。司命設府，部領公卿。五百靈

官，雲路天兵。直符直事，流金火鈴。滅魔檢氛，乾清坤寧。上扶運度，下提幽扃。嚴攝北酆，拯護死生。大帝敕書，制命關盟。萬神受事，來集彤庭。急急如九天上帝律令。

九天生神天尊

金光呪

天地玄宗，萬炁本根。廣修萬劫，證吾神通。三界內外，爲吾獨尊。體有金光，覆映吾身。視之不見，聽之不聞。包羅天地，養育群生。受持萬遍，身有光明。三界侍衛，五帝司迎。萬神朝禮，役使雷霆。鬼祿喪膽，精怪亡形。內有霹靂，雷神隱名。洞慧交徹，五氣騰騰。金光速現，覆護壇庭。

宣總召萬靈符

龍章露布，既仰行於萬程。鳳馭星馳，諒會歸於一處。願停鹵簿，各肅威儀。恭對道前，聽宣戒誓。

宣誓將榜

九天令甲，書勳守衛於齋盟。諸部神丁，受任備殫於職守。想會道運元之妙，敢監真度生之功。朱表有彝，丹章

無隱，敬鋪陳於清酌，庸旌列於微忱。

### 三獻

三獻既周，一忱畢露，所有牒文，合對披宣。

### 宣牒

牒文備悉，神聽周回，伏冀駐景玄壇，承流紫禁。旌旄爍爍，翼祖烝以嚴恭。鉦鉞昭昭，掃氛而肅穆。左右羅列，內外巡遊，俟恪著於威靈，當精酬於效信，稽首皈依無極大道。

### 向來頌

### 頌赦儀

步虛 上香

具位臣姓某，誠惶誠恐，稽首頓首，再拜上言。臣聞造化密移，鼓衆形而罔測。玄黃廣運，陶萬類以無私。永爲九壘之深沉，莫痛三途之流浪。陽光弗睹，陰暗常羈，自非大霈於天恩，曷使頓開於地禁。哀矜真切，敷奏勤渠，以今奉爲齋主某，崇建

靈寶九天生神妙齋，開度亡故某。猶慮劫垢紛紜，客塵滓滯，銅關鐵壘，或體魄之拘囚。火翳冰池，或形魂之維繫。

有機悔過，無路求生，冥心獄吏之尊，委命陰關之邃，億齡展轉，萬劫彷徨。

乞依三洞無極隱書，請頒玉皇寶號曲赦，期超罪性，返生福鄉。重念臣學道望洋，探玄入谷，獅頭獨對，幸慶會於風雲。龍尾承流，盍昭宣於雨露。况茲亡爽，尤軫宸衷。三業六纏，易顛冥其正性。五慾八識，多陷溺其良心。致四大之各離，遂九幽之倏墮，悽悽夜壑，杳杳寒庭，靖惟祖烝之分靈，忍使生根之永絕，匪蒙陶冶，實累生成。擬存注於靈壇，即頒宣於曲赦，欲望丙觀衷悃，申錫恩言。敕下五帝四司，三官九府，十宮六洞，五苦九幽，嶽瀆山川，城隍社令，遵依典格，承受奉行。庶得冥路風清，圜扉日赫。地除簡對，無拘留逼合之憂。水絕盟言，有侍衛送迎之喜。拳拳伺命，切切祈恩。臣下情無任瞻天望，聖激切，屏營之至，謹伏案左，恭俟天恩，潛垂報應。

三拜伏地，運念如儀

誦宣誥九遍 填赦

移班向地戶 講席贊云

上清靈寶玄壇，恭準道旨，頒行玉皇寶號曲赦，三官九府，百二十曹，三界十方，九幽九壘，五嶽四瀆，城隍社令，冥關幽路，一切主者，各宜恭肅，拱聽宣布。

宣赦 宣簡

飛空步虛頌

德音鼓動下玄都，三極皈依贊寶符。湛露泠泠游爽樂，慈雲鬢鬢罪魂蘇。羅酆不閉陽春到，泉曲常開晝景敷。從此亡靈登福舍，翱翔萬劫任歡呼。

九天生神天尊

具位小兆臣某，重誠上啓三境至尊，九天上帝，無邊法界，有位真靈，冀運慈悲，僉垂鑒映。臣向來奉爲齋官某，請頒玉皇寶誥曲赦，仰蒙霄軫，俯遂微衷。驛吏風馳，勒地祇而稟命。冥曹雷動，承天政以迴骸。亡故某乘此提携，獲除考責，拜如天之福，北鬱銷名。悟若水之機，南宮受化。若爲銘鏤，莫罄戴銜。更願一烝無私，八圓有慶，飛潛動植，均鼓舞於天光。人鬼龍仙，普夷猶於帝化。臣下情不勝，感荷之至，謹稽

首再拜，稱謝以聞。

向來頌

靈寶領教濟度金書卷之七十一

靈寶領教濟度金書卷之七

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

生神開度齋用

豎九天旛儀

步虛 洒淨 祝香

具位臣姓某，謹焚寶香，遙瞻供養太上無極大道虛無自然元始天尊，虛皇玉晨大道君，萬變混沌玄元老君，玉皇大天尊，玄穹高上帝，生神自然鬱單無量天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞元化應聲天帝，靈化梵輔天帝，高虛清明天帝，無想無結無愛天帝，九天仙聖，三界威靈，恭望淵慈，俯垂省錄。伏以分陰分陽，三極運無形之化。善生善死，九陽流有象之輝。慈雲掩藹於方輿，法雨羅敷於圓幅，示

虛無之玉相，開大有之金書。明整生神，幽提死魄。金靈彰號，鼓利楫於迷津。迴黃煥名，建法橋於苦海。瓊科赫赫，瑤範昭昭，爲今古之導師，作人天之慈父。今有亡故某，緣緣身受，境境心馳，鑿混純於生根，一朝淪沒。簸鴻濛於死炁，九夜淒涼。念天高地廣，八萬四千，而日往月來，三百六十。驚心苦惱，息影超凌，非由帝闕之傾光，曷使鬼關之御景。受遵真格，庸建靈旛。綵練低垂，舞鳳徘徊於翠宇。朱竿高掛，翔龍夭矯於青霄。萬象均瞻，群生快睹，裊裊升天之徑，飄飄出地之階，接引遊精，逍遙梵炁，奉九成之籟簾，飛百和之芝檀，法衆運誠，讚揚功德。

九天生神天尊

豎旛

伏以五億天中，拱九霄之道炁。三千域內，悲九壘之幽氛。故清微示提拯之方，而玄都藹裁成之化。茲也仰瞻碧落，俯軫黃泉，建百尺之靈旛，象千年之華表。影搖玉籟，玲瓏晝舞於煙

綃。光動金波，縹緲霄飛於霧縠。見之者六塵雲散，挹之者萬罪風清。乘利樂之神功，藉便蕃之帝力。徑辭黑鬱，直上朱陵，各運慈悲，旋行讚詠。

九天生神天尊

旋行，詣東北方

志心皈依，奏啓無上大羅天鬱單無量天帝。

臣謹上啓大霄天中帝真胞命元元一黃演之炁，分輝應感，下映靈旛，隨風飛揚，直向東北方鑊湯地獄，爲諸罪人，灌沐業塵，洞明覺性，返還祖炁，密認旛光，徑承開陽之符，即上始青之境。

混合空洞炁，飛爽浮幽寥。延康無期劫，眇眇離本條。苦魂沈九夜，乘晨希陽翹。大有通玄戶，鬱單降晨霄。黃雲凝靈府，陰陽炁象交。胞元結長命，惡根應化消。桃康合精延，二帝秀玉飄。灌溉胞命門，精練神不凋。九天命靈章，生神神自超。元君遏死路，司馬誦洞謠。一唱萬真和，九遍諸天朝。稽首恭劫年，慶此榮舊苗。

鬱單奕奕耀靈輝，光映靈旛指良維。

冤息鑊湯生意溥，遊精快樂獲仙飛。和：不可思議功德。

九天生神上帝

旋行至東方

志心皈依，奏啓無上大羅天上上禪善無量壽天帝。

臣謹上請青霄天中帝真胎命元洞冥紫戶之炁，分輝應感，下映靈旛，隨風飛揚，直向東方劍樹地獄，爲諸罪人，灌沐業塵，洞明覺性，返還祖炁，密認旛光，徑乘明陽之符，即上太青之境。

無量結紫戶，炁尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒史伯原，結胎守黃房。斬根斷死戶，熙頤養嬰童。禪善導靈炁，玄哺飛天芳。華景秀玉質，精練自成容。務玄育上生，羅列備明堂。太虛感靈會，命我生神章。一唱動九玄，二誦天地通。混合自相和，九遍成人功。大聖慶元吉，散華禮太空。諸天並歡悅，一切稽首恭。

華旛鼓舞燦層空，上接神光禪善通。

回指震宮摧劍樹，幽關不夜暢皇風。和：不可思議功德。

九天生神天尊

旋行至東南方

志心皈依，奏啓無上大羅天梵監須延天帝。

臣謹上請碧霄天中帝真魂命元長靈明仙之炁，分輝應感，下映靈旛，隨風飛揚，直向東南方銅柱地獄，爲諸罪人，灌沐業塵，洞明覺性，返還祖炁，密認旛光，徑乘始陽之符，即上始丹之境。

須延總三雲，玄元始炁分。落落大梵布，華京翠玉尊。明梵飛玄景，開度長夜魂。遊爽赴期歸，炁炁返故根。太帝號陽堂，字曰八靈君。九闕迴綠道，胎炁生上元。陵梵度命籍，太一輔精延。泥丸敷帝席，三部八景分。魂生攝遊炁，九轉自成仙。琅琅九天音，玉章生萬神。三徧列正位，炁參八辰門。玄關遏死戶，靈鎮津液源。應會感靈數，明道潛迴輪。慶此嬰兒蛻，稽首讚洞文。

靈旛萬道下須延，隱映旛光舞翠煙。

飛指東南開巽戶，威消銅柱睹陽天。  
和：不可思議功德。

九天生神天尊  
旋行至南方

志心皈依，奏啓無上大羅天寂然兜術  
天帝。

臣謹上請丹霄天中帝真魄命元碭尸冥  
演由之炁，分輝應感，下映靈幡，隨風  
飛揚，直向南方火坑地獄，爲諸罪人，  
灌沐業塵，洞明覺性，返還祖炁，密認  
幡光，徑乘太陽之符，即上太丹之境。

寂然無色宗，兜術抗大羅。靈化四景  
分，萬條翠朱霞。遊魄不顧反，一逝洞  
群魔。神公攝遊炁，飄飄練素華。榮  
秀椿劫期，乘運應靈圖。空洞生神章，  
瓊音逸九霞。一唱萬真會，騫爽合成  
家。九轉景靈備，鬱鬱曜玉葩。兜術  
開大有，一慶享祚多。上聖迴帝駕，嬰  
兒歎以歌。不勝良辰會，一切稽首和。

薰風穆穆舞靈幡，兜術華幡耀彩竿。  
南指火坑停苦惱，虛空風景任盤桓。  
和：不可思議功德。

九天生神天尊

志心皈依，奏啓無上大羅天波羅尼密  
不驕樂天帝。

臣謹上請景霄天中帝真藏府命元五仙  
中靈之炁，分輝應感，下映靈幡，隨風  
飛揚，直向西南方屠割地獄，爲諸罪  
人，灌沐業塵，洞明覺性，返還祖炁，密  
認幡光，徑乘上陽之符，即上始素之  
境。

翻翻五帝駕，飄飄玄上門。遊步黃華  
野，迴靈驕樂端。採集飛空景，舊爽多  
不存。太微迴黃旗，無英命靈幡。攝  
召長夜府，開度受生魂。公子輔黃寧，  
總錄具形神。玉章洞幽靈，五轉天地  
分。炁練元藏府，紫戶自生仙。數周  
衆真會，啓陽應感繁。玉女灌五香，聖  
母慶萬年。三界並歡樂，稽首禮天尊。

光舒驕樂煥流精，密映華幡指月城。  
回破圜扉屠割息，熙熙靈爽上雲程。  
和：不可思議功德。

九天生神天尊

志心皈依，奏啓無上大羅天洞玄化應  
聲天帝。

臣謹上請玉霄天中帝真靈府命元高真

冲融之炁，分輝應感，下映靈幡，隨風  
飛揚，直向西方金槌地獄，爲諸罪人，  
灌沐業塵，洞明覺性，返還祖炁，密認  
幡光，徑乘元陽之符，即上太素之境。

應聲無色界，霄映冠十方。迴化輪無  
影，冥期趣道場。靈駕不待轡，朗然生  
神章。空洞諒無崖，玄爽亦爲疆。練  
胎返本初，長乘飛玄梁。斬畜喪天真，  
散思候履常。斬伐胞樹滯，心遊超上  
京。願會既玄玄，悟我理兼忘。介福  
九天端，交禮地辰良。混化歸元一，高  
結元始王。稽首儔靈運，長謝囂塵張。  
應聲梵景罩幡容，直指庚辛舞曉風。  
搖落金槌寬考掠，逍遙接武紫金峰。  
和：不可思議功德。

九天生神天尊

志心皈依，奏啓無上大羅天靈化梵輔  
天帝。

臣謹上請琅霄天中帝真元府命無高仙  
洞笈之炁，分輝應感，下映靈幡，隨風  
飛揚，直向西北方鐵丸地獄，爲諸罪  
人，灌沐業塵，洞明覺性，返還祖炁，密  
認幡光，徑乘正陽之符，即上始元之

境。

玄會統無涯，混炁歸梵輔。務猷運靈化，潛推無寒暑。乘數構貞條，振袂拂輕羽。瓊房有妙韻，汎登高神所。圓輪無停映，真仙參列序。上上霄衢邈，洞元深萬巨。秀葉翳翠霞，停蔭清泠渚。遨翫怡五神，繁想嘯明侶。五難緣理去，冲心自怡處。爽魂隨本根，靈空申中佇。七誦重關開，豁滯非神武。運通由中發，高唱稽首舉。

靈幡風動指乾方，梵輔天中降彩芒。舊爽新冤俱解脫，鐵丸幽境化仙鄉。

和：不可思議功德。

### 九天生神天尊

志心皈依，奏啓無上大羅天高虛清明天帝。

臣謹上請紫霄天中帝真華府命元真靈化凝之炁，分輝應感，下映靈幡，隨風飛揚，直向北方寒冰地獄，爲諸罪人，灌沐業塵，洞明覺性，返還祖炁，密認幡光，徑乘通陽之符，即上太玄之境。清明重霄上，合期慶雲際。玉章散冲心，孤景要靈會。煥落景靈布，神衿靡

不邁。玉條流逸響，從容虛妙話。靈音振空洞，九玄離幽裔。感爽無凝滯，去留如解帶。明識生神章，高遊無終敗。玄景曜雲衢，跡超神方外。應感無方圓，聊以運四大。研心稽首誦，衆聖共稱快。

清明妙炁出晴虛，光照華幡指子維。暖透寒冰消凜冽，幽魂縹緲步雲衢。

和：不可思議功德。

### 九天生神天尊

志心皈依，奏啓無上大羅天無想無結無愛天帝。

臣謹上請神霄天中帝真嶽府命元自然玄照之炁，分輝應感，下映靈幡，隨風飛揚，直向上方風雷地獄，下方糞穢地獄，爲諸罪人，灌沐業塵，洞明覺性，返還祖炁，密認幡光，徑乘萌陽之符，即上延真之境。

無結固無情，玄玄虛中澄。輪化無方序，數來亦叵乘。誰云無色平，峨峨多丘陵。冥心縱一往，高期清神徵。良遇非年歲，劫數安可稱。浮爽緣故條，返胎自有恒。靈感洞太虛，飛步霄上

冰。津趣鼓萬流，潛凝真神登。無愛固無憂，高觀稽首昇。

幡迎無愛九霄光，飛指玄虛上下方。威息風雷除糞穢，超凌罪性上天堂。

和：不可思議功德。

### 九天生神天尊

伏以風動幡動，一元昭濟下之心。恩生害生，萬彙昧受中之性。凡失身於夜暗，皆翹首於神光，惟茲華幡，實堪旌表。晚風低拂，盤旋而彩映虹蜺。曉日輕籠，綽約而影搖河漢。上接峨峨之有頂，下通漠漠之無垠。六道四生，均脫虎頭之禁。三途五苦，悉離牛首之班。接武騫林，升神芝圃，靈幡赦罪神呪，謹用宣揚。

天尊開度，三界十方，四生六道，咸到道場。生神遷魄，萬劫不忘，幡之爲體，隨風飛揚。風之所被，各從其方，泉曲之府，寒夜之鄉。地獄餓鬼，旁及無鞅，皆得解脫，上升天堂。

### 九天生神天尊

向來豎幡功德，並已周圓。伏願神景虛華，靈光洞煥，北帝燼黑書之字，南

宮登丹簡之名。亡故某人，心地熙熙，性天了了，悟千重之妄業，皈三寶之真乘，永契無爲，頓超有漏。陽經陰緯，函三共樂於春臺。天玄地黃，得一普躋於壽域。旁資動植，咸被鈞陶，爲如上緣，志心稱念靈幡赦罪天尊。和：不可思議功德。

發放召魂符命儀

步虛 上香

具位臣某，誠惶誠恐，稽首頓首，再拜上言。臣聞一炁運生死之機，炁分造化。三極判升沉之象，心超經綸。欲提黑鬱之幽靈，恪藉紫宸之典令，殫忱獨對，側耳同仁。今奉爲齋主某，崇建靈寶生神妙齋，開度亡故某。切慮覺地煙迷，靈源塵障。舟藏何在，驚萬炁之飛奔。水逝不回，嘆雙輪之迅邁。悽悽夜壑，慄慄寒庭，期形魂來覲於星壇，頒將吏宣行於雲篆。朱章露奏，既敷民欲以勤渠。玄敕風馳，諒肅天威而鼓動。茲申明於召役，願丙鑒於懇祈。伏冀三寶流光，九霄錫命，降開幽之慈旨，敕溥度之真曹。各慎攸司，布毀鎖

張門之政。齊恭乃事，奮開關啓路之威。體大道之好生，佐微臣之度死，臣下情不勝僉恩，俟命之至。

三拜起 詣神虎堂

普獻頌

普獻無邊聖，香煙散十方。願乘七寶臺，垂光五濁世。運度人天衆，咸令上法橋。同會證無爲，勤修不退轉。

上清靈寶玄壇炷香，關啓九天普度院追攝仙靈官吏，本靖主副大將，護道監壇仙靈官吏，城隍里域監壇翊衛，虛空鑒察一切威靈。切以金書導運，八圓覆護於慈雲。玉宇浮空，十極煥明於惠日。設守雄抱雌之職，列提魂攝魄之曹。上贊天工，下提幽爽。龍符耀惠，摧鐵壁以成人。虎節宣威，拯銅關而離夜。凡伸開度，悉賴維持。以今齋主某，矜彼亡儀，墮茲幽壘。帝庭請命，欣承膏澤於恩綸。鬼域升神，賴暢皇靈於真馭。諒遵丹詔，普莅玄壇，慈伸薦獻之恭，恪罄忱恂之禱。願旌激切，俯賜從容，法衆運誠，志心召請。志心召請九天溥度院三十六真人，三

十六將軍，守雄抱雌二大將，追魂攝魄二大將，神虎敵虎二將軍，夜光倒玄二玉女，本壇仙靈將吏，某靖主將副將，護道監壇，里域真官，土地正神，齋主住居司命六神，惟願雲車風馬，來屆香筵。和：受茲香花供養。

初獻 散花

伏以登真度命，天門垂破獄之仁。起死迴骸，地戶映照天之惠。孰敷洪澤，厥有玄曹。鐵騎聯雲，肅肅神功而虎視。金戈耀日，巍巍聖力以龍驤。嘯命乾坤，駿奔山嶽。今齋主某，深慮亡故某，兆億惡障，浩劫塵根，人我山極目。千尋靈光，自滓是非壘。驚心萬劫，業垢誰磨，散三炁於虛無，歸百骸於寥廓。三光憲令，紛水火之劍衡。六洞條章，凜陰陽之權量。幽臺毒霧，冥境悲風，非憑攝召之威，曷副超凌之望。伏願手提天敕，風行黑壤之區。足躡地輪，雷動黃泉之境。根尋飛爽，部衛遊精，俾解脫於陰郊，獲遨遊於陽界。某不勝懇祈之至，謹伸亞獻。

亞獻



伏以真實法有爲法，悟之者善惡攸

司。功德光無量光，得之者形神俱妙。荷寵渥便蕃於皇極，願威靈赫奕於玄虛。猶慮六洞十宮，三官九府，聳鐵圍於鬱絕，訊鞫霜明。堅石硤於羅鄩，推研日赫。嶽瀆山川之囚禁，城隍里域之繫維，故爽新魂，前冤後債，內而九玄七祖，外而六道四生，悉冀追呼，普行提命。升天入地，遵火令以飛奔。出陰入陽，乘金符而騰躍。檢鬼營不得容隱，遍神鄉孰敢拘留。俾見性而迴靈，脫幽關以離苦。頒符真切，伺命殷懃，某不勝虔祝之至，謹伸終獻。

三獻

三獻既周，一忱畢露，所有符檄，盍爲關宣。

宣九天追魂符命

宣牒

天符告布，壇檄周宣，諒聖鑒之無譁，肅玄威之有耀。玉龍霄躍，金馬驛呈，俾遊爽赴期而歸，獲乘晨步虛而去，神無曠職，帝有恩言，一如靈寶玄壇律

令。

向來

靈寶領教濟度金書卷之七十二

靈寶領教濟度金書卷之七

十三

洞微高士開光救苦真人甯全真授  
靈寶通玄弘教水南先生林靈真編

科儀立成品

坐神齋用

靈官醮儀

步虛

宣衛靈呪

五靈列位，煥鎮五方，始皇護魂，丹老衛形。皓靈侍魄，黑帝攝生，中央黃帝，統御萬真。元始誥下，幽夜開光，罪消北府，名列南宮。金錄定籍，玉宇除殃，朱陵鍊質，飛神太蒼。三官九府，無極神鄉，普受開度，上生天堂。和：與道合真。

請稱法位

具位臣某謹焚香，上啓九天司命府上奏靈官，飛章靈官，主生靈官，主死靈官，掌九天靈官，掌度人不死府靈官，掌迴

骸起死府靈官，掌三元二十七府靈官，掌三元百二十曹靈官，掌酆都十三宮洞靈官，掌酆都十八大地獄靈官，掌酆都二十四大地獄靈官，掌酆都大鐵圍山無間地獄靈官，掌東方劍樹地獄靈官，掌南方火坑地獄靈官，掌西方金槌地獄靈官，掌北方寒冰地獄靈官，掌東北方鑊湯地獄靈官，掌東南方鋼柱地獄靈官，掌西南方屠割地獄靈官，掌西方鐵丸地獄靈官，掌上方風雷地獄靈官，掌下方糞穢地獄靈官，掌酆都山寒池考獄靈官，掌考死萬死靈官，掌治罪天憲考鬼靈官，掌主生罪考掠靈官，掌主死罪考掠靈官，掌五嶽地獄靈官，掌九府業道靈官，掌寒夜考鬼靈官，掌泉曲府考鬼靈官，掌地府司罪六曹靈官，掌生簿司罪靈官，掌察命都知司罪靈官，掌閻羅都案司罪靈官，掌左司簿司罪靈官，掌拘命攝魄靈官，掌九州分野司靈官，掌十二國分野校錄靈官，掌六十甲子生人靈官，九天仙真無鞅聖衆，玄壇應感一切真靈。伏聞三寶垂光，啓瓊章於三洞。九清錫慶，飛玉篆

於九陽。生神設濟度之曹，司命建樞機之府，上凝天政，下濟地祇，宣化承流，定玄班於五百。憲天弘道，敷洪澤於三千。橐籥昭然，權衡煥若。今齋主某，開度亡過某，崇建靈寶九天生神妙齋，請命帝庭，微惠真馭，覬提携於飛爽，俾解脫於幽關，輒殫北面之恭，庸效西鄰之敬。伏願乘風馭景，翩翩齊下於玄虛。驂月騰雲，絡繹均臨於碧落。不違玉敕，恪副瑤壇，某不勝虔切之至，謹當奉請。

請聖 初獻

重稱法位

具位某等重誠，上啓九天司命府列職所主靈官真衆，醮筵應感一切威靈。伏以道冠十方，皆清微之祖炁。齋分三籙，開黑鬱之幽氛。闕有靈曹，密匡聖運。陸離劍佩，雍雍而鷺序雲聯。赫奕旌旄，肅肅而鵷行星列。典錄籍則性命禍福靡不載，贊鈞衡則聰明智慧足有臨，職陰職陽，主生主死。今齋主某，憫念亡故某，九京長往，萬炁無歸，紛業垢於靈源，愆書六洞。漲客塵於

覺海，過紀三元。幽幽縻泉曲之魂，戚戚繫酆城之識，終天痛惱，彌劫沉淪。依青律以登齋，演玄科而行道。囊封朝奏，雖期帝渥之羅敷。羽檄宵馳，猶賴真靈之鼓動。願垂玄貺，恪副丹衷。遵青律赦宥之恩，削黑簡隱顯之錄。敕牢檻主宰，即毀鎖以張門。宣里社神祇，爲開關而啓路。函乘芝檢，肆覲楓壇，俾快睹於陽晨，獲頓超於陰夜。儀不及物，姑殫萬一之忱。情見乎辭，願鑒再三之禱。某不勝虔切之至，謹伸亞獻。

亞獻

具位某上啓九天司命府列職所主靈官真衆，醮筵應感一切威靈。伏聞下愚動之死地，北府標名。上聖提以生天，南宮定籍。莫匪九霄之橐籥，稟由一炁之陶鎔。聖武布昭，既握裁成之柄。威靈廣運，合施化育之權。齋主某矜憫亡靈，皈依宸極。迴骸起死，願離三十六壘之深沉。監真度生，俾免百千萬齡之汨沒。伏冀體天丕冒，道法自然，降梵炁於玄虛，拯遊精於黃壤，苦海鼓

慈悲之棹，昏衢張智慧之燈。刀化樹而劍爲騫，園扉春滿。水靜波而火息燄，幽域陽回。溥物物以更生，極塵塵而度命。申言有翼，丙鑒無私。重念亡故某，駑步堪憐，駒陰自老，金闈通籍，荷洪造以天開。玉策書勳，誓丹忱而日皎。承符紫禁，竊蔭玄曹，更希涵育之恩，俾追顛躋之咎。陰靈陽耀，均披拂於仁風。乾清坤夷，悉舒遲於化日。某不勝虔祝之至，謹當終獻。

三獻 宣疏

具位某謹重誠，上啓九天司命府列職所主靈官真衆，醮筵應感一切威靈。伏聞天關浩蕩，仰觀而雲景洞明。地戶幽寥，俯察而業塵流萃。既藉真靈之下映，可期爽識之高躋。浩矣葵忱，邈哉芹獻，敢叛岱冥之德，甘膺鼎鉞之威。以今龍簾聲沉，鳳篝煙冷，紅塵雜遝，難稽八景之輿。綵仗葳蕤，亟返九華之駕。僭言有請，流惠無疆。某等與醮官不勝望恩之至，稽首再拜奉送。

迴輶頌

迴輶五雲輿，騰駕九章歌。倏忽升天

遠，醮壇香氣多。玄恩覃宇宙，福祿遍山河。緬想神仙路，逍遙上大羅。

向來

分燈儀

步虛

詣三寶前

具位臣某，誠惶誠恐，稽首再拜，奏啓玉清聖境元始天尊清微天寶君，上清真境靈寶天尊禹餘靈寶君，太清仙境道德天尊大赤神寶君，九天自然生神上帝。恭望睿慈，俯垂省錄。切以九霄寥廓，凝陽彩以高澄。九壘深沉，結陰氛而冥昧。况六趣之客塵自滓，與三塗之業垢堪悲。展轉昏衢，沉淪夜壑，非賴神輝之照燭，曷開幽境之淒涼。是以仙聖垂憐，真靈俯盼，啓降光之玉格，敷破暗之金科。上徹真空，翊三景之燦爛。下通風澤，消六洞之蒙迷。妙道難量，神功不幸。以今齋主某，崇建九天生神妙齋，開度亡故某。羅敷丹悃，鋪投玄壇，度死烝於乘晨，超幽魂於積夜。願徹霄極，密放靈光。梵炁彌羅，藹三色之混沌。華芒鬱勃，流九景之希夷。容臣仰接陽精，俯除陰翳，

鸞葩鳳萼，列萬點之光明。象炬龍膏，布千枝而晃朗。十華不夜，八極皆春，用乘景景之明，俾脫幽幽之障。恭對道前，加持燈果。

大聖三寶天尊

魂精魄精，與天同生。左迴金璫，右旋火鈴。月華月輝，日霞日英。虹映之山，素景流澄。晃燈朗映，結炁絕青。華光洞煥，普天鬱明。三元飛耀，育胎還嬰。離羅吐輝，奕奕長庚。身生玉光，迅轡上清。九真宴御，玉輝清明。九陽散景，萬象華榮。生門致神，死戶迴靈。天尊毫相，二炁齊并。流光照徹，混合八宴。開明夜府，上造紫庭。伏以一二三而生萬物，變化奚窮。地道而法自然，神奇莫測。企虛無之祖炁，散晃耀之神光。乾蓋坤輿，等心燈之曲映。陰輪陽軌，均慧燭之流明。神光靜默以迎祥，碧月澄清而薦景。周迴八陛，至尊端拱於光中。開泰九幽，遊爽超凌於象外。九霞騰彩，萬宇澄輝，仰惟大道之生成，式副小心之懇切。見前清衆，請爲分輝。

法師以手中燭，點三寶前燈，衆官分點內外燈，悉令周遍。

流光法界天尊

明燈頌

太上散十方，華燈通精誠。諸天悉皆照，諸地皆朗明。我身亦光徹，五臟生華榮。炎景朝太虛，遐想通玉京。

向來燃燈功德，奉爲齋主某，開明破暗，起死迴生，資薦靈儀，仙飛福境。伏願亡故某，萬緣解悟，八識虛融，罪葉飄零，逐蘭膏而漸竭。道芽堅固，隨芝燄以長新。達生生化化之機，造有有無無之妙。寒庭春到，幽谷陽回，普資動植之含靈，均悟陰陽之正性，稽首皈依無極大道，志心稱念燈光溥照天尊。和：不可思議功德。

向來

靈寶領教濟度金書卷之七十三

### 靈寶領教濟度金書卷之七

#### 十四

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

生神開度齋用

#### 催召儀

步虛 洒淨

上清靈寶玄壇炷香，關啓九天溥度院守雄抱雌追魂攝魄一行官吏，主副二將，護道監壇將帥騎吏，在時用事內外真靈。伏以三寶金書，煥朔單之慧燭。九霄玉笈，駕澤壘之慈航。聿崇溥度之仙曹，統制宰幽之主吏。威權風動，號令雷轟，毀鎖張門，既羅敷於鶴赦。剋時定令，宜遵奉於龍符。頃爲齋主某，開度亡故某。請命彤宸，疏恩紫檢，檄威靈而宣化，提爽識以登真，諒鑒丹忱，恪昭玄應。茲也觚稜月淡，斜漢雲澄，天風傳寶鐸之音，鬼關四闢。夜炷

舞神旛之影，幽域均沾。宜召攝以無違，俾徬徨而來赴。載殫芹獻，申罄葛誠，法衆運誠，至心奏請。

至心奉請九天溥度院三十六真人，將軍仙靈官吏。

至心奉請九天溥度院守雄抱雌、攝魄追魂仙靈官吏。

至心奉請九天溥度院神虎敵虎、夜光倒玄仙靈官吏。

至心奉請本靖主副二元帥、護道監壇將吏兵馬。

至心奉請城隍社令、里域神祇、虛空鑒察無鞅神衆。

向來奉請，已沐來臨，執事恭陳三獻。

#### 三獻

伏以取死壤離本真，哀哉飛爽。以精神致魂魄，妙矣玄機。雖激切於愚衷，藉扶持於聖造。排空御炁，遍黃泉碧落以宣符。掣電奔雷，極鐵壘銅關而稟令。無遠弗屆，有碍皆通。頃爲齋主某，開度某，皈命玄班，召神黑鬱，播陽光之璀璨，開陰暗之溟濛。須體德音，副茲悲悃。今則蘭湯告備，芝饌森

羅，三天垂雨露之恩，九地切雲霓之望。追攝提聚，弘天政以承流。侍衛送迎，敕地祇而受事。猶慮心繁萬業，識造千愆。或置對於東岱七十四司，或結證於北酆三十六獄，或墮山川之鬼穴，或縻社令之神司。悉仗搜尋，廣爲援拯。督關津而部衛，不得拘留。戒道路以扶將，毋容拒遏。俾離冥路，即返故居。朝蓮座而聽法聞經，步騫林而凝真證妙。昭昭帝渥，赫赫神威，玄壇檄文，謹當宣示。

#### 宣催召牒

牒文敷露，神聽昭明。願聖武之布昭，誕威靈之廣運。指揮嶽瀆，呼嘯山林，風火無停，勿稽違於頃刻。雷霆有赫，期響應於斯須。上天度人，具嚴青律，敢有容隱，束送雷霆，一如靈寶九天生神律令。

#### 向來

#### 請神水召魂沐浴儀

步虛 上香長跪

具位臣姓某，誠惶誠恐，稽首頓首，再拜上言。臣聞惠周生死，三天主宰於神

機。恩被幽明，九地涵濡於化籥。重企提携之造，滄陳激切之忱。今有齋主某開度某，罔散虛無，神歸寥廓。扣天關而開地禁，行離業山。近陽景以淪陰氛，允資定水。欲望宸慈宏覆，睿澤旁敷，分八解之靈泉，灌茲芝室。化五靈之妙炁，注彼蘭湯。容臣合景運神，飛元會道，俟召魂而來格，俾濯質以歸期。功德水無量無邊，根塵淨洗。智慧光無窮無極，宿垢開明。長辭五濁之泥，永度三清之岸，仰祈玄造，俯鑒丹衷，臣下情無任，俟命之至。

#### 捧水孟念

天河灌東井，石景水母精。圓光拂靈耀，玄輝映高明。元始披長夜，天人逐月生。沐浴蘭池上，龍負長庚瓶。金童散香花，玉女流五星。冠帶濯玉津，鍊度生仙形。體香萬神降，乘景登高明。

#### 天河灌沐天尊

引導詣浴室前，以水分入浴室

中

九霄梵炁，流精鬱勃以輝輝。三景靈

芒，耀彩玲瓏而璨璨。芳雲飛煥，甘露凝祥，宛同東井之華池，可灌北都之暗識。伏望九鳳破穢使者，玄壇浣濯靈官，各體慈悲，密垂蔭映。俟沐浴於靈爽，爲澡雪於暗塵。發越神光，湛靈源而無漏。返還祖炁，疏覺海以高澄。稽首皈依無極大道。

#### 洒道詣鬼門上立，召魂

泠泠甘露滋，法味難思議。騫香流七真，冥冥何生疑。受此法食者，生天登紫微。

#### 童子執旛

伏以茲風駕道岸之舟，陽光高映。昏霧鼓迷津之棹，陰翳低濛。嘆夜壑之寥寥，驚寒庭之寂寂。金符飛煥，御三界以召神。鐵壘開張，廓九幽而度命。是夜奉爲齋主某，開度亡故某。載歌玄梵，庸攝真儀。毀鎖張門，已稟追提之命。開關啓路，諒殫侍衛之勤。靈旛蕩漾於金波，寶鐸丁當於玉籟，浙瀝疏林之影，依稀遠岫之聲，感此彷徨，乘晨輝而奔赴。從茲解脫，汎仙景以高飛。恭依玄科，用吟寶偈。

玉京降旨下瑤臺，童子傳言地獄開。  
業海愛河皆息浪，鑊湯爐炭化寒灰。  
真符告下羅酆去，陰府迎將淨魄來。  
觀聽法音消罪戾，永辭苦海出輪迴。  
和：不可思議功德。

伏以役雌雄之吏，微微開幽。歌陰陽  
之章，昭昭破暗。夜炁淒清而風悲雲  
淡，靈光隱約而斗轉參橫。非有非無，  
若幽寥而莫測。惟影惟響，宜溟漠之  
潛通。攝召秘章，謹當宣誦。  
太微迴黃旗，無英命靈旛，攝召長夜  
府，開度受生魂。和：不可思議功德。

歌陽斗章

陰陽推運兮，劫數更遷。生死周流兮，  
孰愚孰賢。輪轉無窮兮，上元造化。  
未出三界兮，拘於神變。魁魎東斗兮，  
魍魎西轉。魍向南辰兮，魍魎北面。  
陰靈陰靈兮，茫茫沒沒。陽魂陽魂兮，  
碌碌幽幽。天地明兮萬鬼潛，天地動  
兮萬鬼爽。天地靈兮萬鬼長，陰陽運  
兮神鬼享。太一召汝何遲遲，先至後  
至律有常，感此彷徨附我旛，賜汝靈書  
歸上清。急急如太一玄冥夫人律令

攝。

初召

志心召請九天溥度院三十六真人，三  
十六將軍。惟願以慈悲心，引領亡魂，  
今夜今時，復舊還形。  
志心奉請亡故某人，惟願仰承道寶力，  
今夜今時，來附華旛。和：受茲開度功  
德。

歌陰斗章

五行所造兮，復歸於五行。四大假合  
兮，還歸於太空。或陰或陽兮，任天地  
之根宗。天地明兮萬鬼潛，天地動兮  
萬鬼爽。天地靈兮萬鬼長，陰陽運兮  
鬼神享。天一北祚召汝魂，太一紫元  
攝汝靈，冥海冥波冥昧神，不問八極鬼  
與精，感此彷徨附我旛，賜汝靈書歸上  
清。急急如太一玄冥夫人律令攝。

再召

志心召請九天溥度院守雄抱雌二大  
將，追魂攝魄二將軍，惟願以方便心，  
引領亡魂，今夜今時，復舊還形。  
志心奉請亡故某人，惟願仰承經寶力，  
今夜今時，來附華旛。和：受茲開度功

德。

歌斗章

胎光爽靈幽精，三魂皈空皈真。天地  
正真炁，再使汝成形。此是五行造化  
精，無藏無避無逃形。一呼速至現真  
形，感此彷徨附我旛，賜汝靈書歸上  
清。急急如太一玄冥夫人律命攝。

三召

志心召請九天溥度院神虎敵虎二大  
將，夜光倒玄二玉女，惟願以利濟心，  
引領亡魂，今夜今時，復舊還形。  
志心奉請亡故某人，惟願仰承師寶力，  
今夜今時，來附靈旛。和：受茲開度功  
德。  
切以徹洞章而三歎，魂可歸來。提華  
旛於九招，靈真莅止。仰若雲層之虛  
煥，幸離風澤之悽迷。猶慮五族六親，  
縈死生之愛網。三世四負，羈今古之  
冤輪。追逐莫休，超凌有礙，期普提於  
幽路，俾均入於法門，重演靈章，庸伸  
邀召。

太陰冥冥黑波重，中有羅酆六天宮。  
萬鬼成群痛哀泣，悲惱毒烈大惡崇。

無上洞音徹九地，飄飄吹下慈悲風。  
吹向冤苦召億魂，隨音奔赴寶壇中。

志心召請亡故某，身前身後，劫始劫終，  
宗祖姻親，仇讎冤對，一切男女等衆，  
惟願仰承三寶力。亡故某乘三華之照  
耀，出九壘之溟濛。夜月茫茫，休歎人  
門無路。朝陽燦燦，從今帝所有階。  
宜認靈幡，來歸寶地，爰念陰氛之未  
脫，盍憑神水以蕩除。新舊冤仇，親疏  
眷屬，宜朋分於左右，悉旅進於壇場，  
先詣蘭湯澡身沐德，次趨楓陛聽法聞  
經，法衆運誠，慈悲接引。

### 慈悲接引天尊

#### 引幡到浴室前

伏以陽精陰粹，本清淨以無塵。地魄  
天魂，倏沉淪而有染。非伏黃華之蕩  
滌，曷令素質以輕清。灌五香而寶芝  
自生，玄雲蒨藹。流七珍而芳騫有耀，  
霏霧困輪。飄飄飛銀漢之英，湛湛動  
結璘之影，金童洒景，玉女致靈，伏願  
靈儀，從容沐浴。

#### 以幡入浴室中

### 焚符

天炁澄清，五色高明。日月吐輝，濯鍊  
身形。神津內盥，香湯鍊精。光景洞  
耀，煥映上清。炁不受塵，五府納靈。  
罪滅三塗，禍消九冥。身得開度，升入  
帝庭。

### 法雨流潤天尊

切惟亡故衆魂，中宮外府，百骸灌鍊於  
雲泉。上衣下裳，五體裝嚴於霞袂。  
惟幽關之久鬱，豈華飾之獨存。幸藉  
天恩，復超地暗。盍更新於服御，庶捨  
舊之儀容。八景含華，織麗並空中之  
環珮。六銖應妙，輕盈儼天上之神仙。  
稱性自然，隨心具足，伏請靈儀，從容  
更衣。

### 焚化衣符

金精冶鍊，散炁玄黃。丹池沐浴，真炁  
紛芳。二景冠帶，天爲隱藏。左振玉  
珮，右策金璫。洗除諸穢，遊行紫房。

### 金容出世天尊

#### 移幡出浴室前

亡故某，濯靈源而精神澄湛，披羽服而  
容止端嚴，本來之面目回靈，既往之頭  
顱改觀。千齡霓望，一旦天開。星河

四垂，玉兔轉霄中之象。輝芒萬道，銅  
鳥催簾外之班。宜載附於華幡，庸肆  
朝於黼衮。皈身伏地，稽首瞻天，法衆  
運誠，慈悲接引。

### 慈悲接引天尊

#### 引幡至大道前

伏以仰豹關之清峻，奕奕靈光。瞻獅  
座之崇嚴，巍巍祖炁。環列九霄而拱  
極，遙承三寶以朝宗，均拊翠華，齊登  
珠黍。既荷陶鎔之德，盍伸款謁之恭。  
亡故某夙值良因，幸依正化，離寒庭之  
冥昧，宿垢風清。還性海之虛靈，生根  
月瑩。行鍊形於朱霍，即穩步於玄虛。  
允戴龍光，敢忘虎拜，殫勤拳而皈命，  
極頂踵以投誠，齋主上香，引魂朝禮。

### 三禮

亡故某身沐洋洋之帝澤，不亦樂乎，不  
亦悅乎。心瞻穆穆之天顏，予其潔也，  
予其進也。實千齡之慶幸，欣一旦之  
遭逢。結草志堅，已參禮於壇陛。傾  
葵情罄，宜宴息於几筵。法衆運誠，慈  
悲接引。

### 慈悲接引天尊

伏以薤露淒涼，九死魂迷於陰地。祥煙醴鬱，千生烝返於陽天。惟紫宸垂提援之仁，陰鬱拯送迎之力。亡故某真機不昧，亡識俱空，離幽夜而沐性蘭湯，隨陽光而朝神蓮座，嘉拜帝真之貺，允資霄極之恩。請駐容儀，伺陳奠獻，領齋功而度命，佩玄籙以登真。稽首皈依無極大道，志心稱念廣度沉淪天尊。和：不可思議功德。

靈寶領教濟度金書卷之七十四

靈寶領教濟度金書卷之七十五

十五

洞微高士開光救苦真人甯全真授  
靈寶通玄弘教水南先生林靈真編

科儀立成品

生神齋用

宿啓儀

入戶

法師密咒祝

玉華散景，九氣凝煙，香雲密羅，徑衝九天。侍香金童，傳言玉女，傳臣所奏，上聞帝前。令臣所啓，咸賜如言。今日告齋，諸天臨軒，三界五帝，列言上清。執籙把籍，齊到帝前，迴骸起死，無量度人。

各禮師存念如法

宣衛靈咒

東方

九炁青天，明星大神。煥照東鄉，洞映九門。轉燭陽光，掃穢除氛。開明童子，號曰玄鄉。備衛我軒，上對帝君。

收魔束祿，討捕兇群。奉承正道，赤書玉文。九天符命，攝龍驛傳。普天安鎮，我得飛仙。和：與道合真。

南方

三炁丹天，煥景流光。熒星轉燭，洞煥太陽。上有赤精，合契虛皇。開明童子，號曰華芳。總御火兵，備守玉堂。斬邪束祿，剪截魔王。北帝所承，風火衝當。流鈴交換，翊衛壇場。正氣流行，敢有猖狂。我享上功，坐運魁罡。億劫長存，保天無疆。和：與道合真。

西方

七炁素天，太白流精。光耀金門，洞朗太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普衛萬生。元皇正炁，來合我身。功加一切，天地咸寧。和：與道合真。

北方

五炁玄天，元始徘徊。辰星轉燭，洞煥太微。黑靈尊神，號曰層威。統冠飛天，仙裾羽衣。備守五門，檢精捕非。



敢有干試，豁落斬摧。玉符所告，神真八威。邪門閉塞，正道流輝。三光映照，我身無衰。策空駕浮，舉形仙飛。如：與道合真。

### 中央

黃炁中央，調理乾坤。陶鎔陰陽，總統玄真。鎮星吐輝，流耀九星。開明童子，號曰天璘。陽炁燄上，朱煥炎精。洞照內外，運我身形。百邪摧落，攝役鬼靈。中山神呪，普天使聞。五靈安鎮，身飛上清。和：與道合真。

### 鳴法鼓二十四通

無上三天玄元始三炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意，以今宿啓告齋，願得靈寶自然生神妙炁下降，流入臣等身中，令臣所啓之誠，速達徑御虛無大道九天元皇玉帝御前。

### 請稱法位

具位奉行靈寶生神妙齋法事小兆臣某，

與臨壇官衆等，今故燒香，願以是功德，上爲天子王侯，土地官長，三師四友，祭酒學真，弟子某所薦亡靈，九祖母，內外姻族，天下人民，蠕動蜎飛，跂行喙息，無邊無極法界衆生，皈身皈神皈命，無上靈寶自然至真大道。特乞原赦前生今世，生死宿罪重過，得免離三惡五道，十苦八難九厄之中。臣等身得道真，飛行虛空，白日升天，待衛元尊，逍遙無上七寶自然宮殿，永與道合，所啓玄感，應聲上御至真無極道前。

### 禮方

志心皈命東北方鬱單無量天尊。  
志心皈命東方上上禪善無量壽天尊。  
志心皈命東南方梵監須延天尊。  
志心皈命南方寂然兜術天尊。  
志心皈命西南方波羅尼密不驕樂天尊。  
志心皈命西方洞玄化應聲天尊。  
志心皈命西北方靈化梵輔天尊。  
志心皈命北方高虛清明天尊。  
志心皈命中央無想無結無愛天尊。

### 禮足各長跪皈命，虔誠懺悔

臣法衆等，志心皈神皈命，虛無大道九天生神上帝天尊。以今宿啓告齋，梵香懺悔。臣聞九霄降炁，金書開生死之祥。三洞垂文，玉範著齋修之典。將肅恭於奏對，先疏淪於根塵。勉罄精誠，恪祈通感。猶慮臣等業機未破，塵網猶迷，井井威儀，或冒三元之律。昭昭禁戒。易違四極之科。尚冀修持，曲垂覆護。精炁神之混化，觀妙凝真。身口意之澄清，運神合景。臣等志心稽首，禮拜無上至真三寶。

### 三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

### 三禮

臣等志心稽首，禮

太上無極大道。

志心稽首，禮

三十六部尊經

志心稽首，禮

玄中大法師。

重稱法位

具位奉行靈寶生神妙齋法事小兆臣某，與臨壇官衆等，謹同誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣等慶緣浩劫，運際昌時，瓊綱昭八會之章，師傅玄妙。瑶簡煥九光之策，天錫希夷。分宜高蹈於山林，迹尚卑棲於朝市。駒窗忽忽，蟻磨悠悠，慨素志之未圓，思玄功之尚鬱。承流宣化，期參贊於天工。弘道濟時，庶潛孚於帝貺。益堅終誓，敢叛初盟，爰有詞文，謹當宣

奏。

宣詞

按如詞言，情深激越，齋主某仰依帝力，俯軫天輪。歲月載馳，痛音容之永遠。升沉靡測，增骨肉之深悲。惟生神賴三寶之光，而死魄藉九陽之炁。爰依經訓，恭按齋盟。祈霄極之晨輝，蕩幽關之陰垢。臣等鋪張懇款，澡雪精神，呼陰召陽，振金聲而九奏。法天象地，崇玉陛以三成。蘭煙騰縹緲之芳，蓮炬散熒煌之影。自今月某日爲始，崇建靈寶生神妙齋幾晝夜。轉經行道，燒香散花。奉爲亡故某，消化惡根，斷除宿對，鍊胎返本，超凌黑鬱之都結。炁成形遊，宴綠羅之界。謹依科法，宿啓以聞恩。惟三寶慈尊，九天上帝，俯垂慈造，曲鑒翹誠。敕勒三洞仙官，三寶真屬，侍經護法，監齋衛真，土地職僚，虛空鑒察。同心協力，掃內外之妖氛。傳信達誠，契人天之影響。衛護壇席，成就齋功。令臣等萬炁冲虛，百關調暢，發天光於泰宇，密契虛無。混神景於玄虛，允符竅妙。開九清之慧日，布

五道之慈雲，化洽幽明，覃恩動植，明晨行道，續啓以聞。臣誠惶誠恐，稽首頓首，再拜以聞。

告符

十二願

臣等一願乾坤明素。二願氣象清玄。三願聖君萬壽。四願化洽八埏。五願天垂甘露。六願地發祥煙。七願四時應候。八願萬物生全。九願家多孝悌。十願國富才賢。十一願齋功廣被。十二願善瑞日臻。

存神復爐

香官使者，左右龍虎君，侍香諸靈官，當令臣宿啓建齋之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女侍衛，香煙傳臣向來所啓之誠，速達徑御虛無大道九天元皇玉帝御前。

出堂頌

道以齋爲先，勤行登金闕。故設大法橋，普度諸人物。宿世恩德報，道心超

然發。身飛升仙都，七祖咸解脫。

回靜默堂

謝師

靈寶領教濟度金書卷之七十五

### 靈寶領教濟度金書卷之七

#### 十六

洞微高士開光救苦真人甯全真授

靈寶通玄弘教水南先生林靈真編

#### 科儀立成品

生神齋用

#### 早朝行道儀

燒香頌

各禮師存念如法

宣衛靈呪

青陰虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上虛無道君，召出臣等身中三五功曹，左右官使者，侍香金童，傳言散花玉女，五帝直符，

直日香官，各三十二人出。出者嚴裝，闕啓玄壇天帝神君，當召此間土地里域真官正神，急上關啓臣今奉爲入齋意。以今清旦陞壇，燒香行道，願得靈寶自然生神妙炁下降，流入臣等身中。令臣所啓，速達徑御虛無大道九天元皇玉帝御前。

#### 請稱法位

具位奉行靈寶生神妙齋法事小兆臣某，與臨壇官衆等，謹同誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞祖炁開光，三寶挺生而立極。元精昭化，九霄妙胤以開天。玄臺刊鍊品之奇，紫笈啓生神之妙。玉音逸響，制五劫以飛仙。金篆昭回，開八門而度品。仁風鼓舞，化日舒明。凡居混輿之中，孰出陶鎔之外。臣等受中茅塞，語上樗疏，

佩紫微龍鳳之章，膺碧落雲霞之策。凝真結友，空懷山澤之襟期。混俗和光，莫遂林泉之步武。緬惟素志，宜勵丹誠，證勳行以格天，贊生成而育物。凡有投告，盍爲闢聞，齋主青詞，謹當宣奏。

宣詞

按如詞言，丹忱激越。臣聞三籙威儀，修齋秉日星之訓。九清科範，幽明垂雨露之恩。仰瞻陽極之玄輝，密睇層霄之梵景。根元本始，返炁炁於故根。結節胞胎，解形形於宿滯。洪慈有赫，玄造無遺。凡皈命以勤渠，悉升神而快樂。今齋主某，痛念亡故某，三彭結鬻，一豎乘危，歸元炁於虛無，散陽神於寥廓。艷河漠漠，不勝九死之淒涼。泉曲茫茫，尤慮千生之輪轉。匪由帝化，曷復天常。金薤琳琅，扣飛鯨於籟簾。玉華煒燁，揚舞鳳於銀缸，玄壇催振鷺之班，紫禁徼和鸞之御。天威咫尺，願開度命之仁。民欲再三，嘉拜更生之惠。以今清旦行道，請法衆等。運茲初捻上香，願此香煙騰空徑上，供

養無上至真道寶。臣等皈身皈神皈命，首體投地，仰依太上三尊。願以是功德，奉祝社稷尊靈，宗祧先聖。伏願棲神玉闕，蛻影琳房。驂八駟於雲衢，垂祥寶祚。駕六龍於星路，流慶璇圖。提封邁禹迹之遙，出世越周基之永。今故燒香，自皈依道尊大聖衆，至真之德，得道之後，保天長存。和：與道合真。

以今清旦行道，請法衆等，運茲二捻上香，願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流齋主家所薦亡靈，普及幽冥，冤親平等。伏願超神冥漠，駕景虛玄。登流火以鍊真，客塵冰瑩。宴明霞而入妙，業垢風清。宗枝流玄澤之芳，奕葉蔭嘉猷之潤。今故燒香，自皈依經尊大聖衆，至真之德，得道之後，身入無形。和：與道合真。

以今清旦行道，請法衆等，運茲三捻上香，願此香煙騰空徑上，供養無上至真師寶。臣等皈身皈神皈命，首體投地仰

依太上三尊。願以是功德，普資三途五苦，六洞九幽，苦爽囚徒，窮魂逝魄。伏願千愆解脫，萬罪清夷。超丹霍以澄神，恩波鼓動。詣青華而受記，惠澤敷羅。圓扉融不夜之光，方域扇長春之景。今故燒香，自皈依師尊大聖衆，至真之德，得道之後，永處福庭。和：與道合真。

禮方 方懺

三啓頌

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

重稱法位

具位奉行靈寶生神妙齋法事小兆臣某，與臨壇官衆等，謹重誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞八靈奏善，鸞輪騰景於紫虛。九壘書勤，羽駕飛霄於碧落。金文演妙，玉字浮光，陽凝生炁以濯形，陰灌死靈而返本，惟神公之不幸，昭聖化以無方。臣等身佩真乘，名聯玄籍。溥昭天漏泉之澤，願賜恩光。宣迴骸起死之仁，庶敦職守。載念亡故某，爰從元始，迨至有生，人我紛紜，是非顛倒。漲愛河之濁浪，人僞旁馳。翻業海之狂瀾，天倪內滓。綱常易失，禁戒多違。具血炁，全神靈，罔保固一元之精粹。離本真，取死壞，倏沉淪九夜之形神。三元司水火之衡，六洞職升沉之鑑。皇皇孰告，切切誰依。非上扣於層霄，曷下開於列壤。

爰依青律，肅建玄壇，流梵響於諸天，散香花於四界，冥心請命，稽首投誠，伏冀曲軫哀衷，俯矜凡愆。降龍符而布昭天貺，頒鶴赦以敕制地祇。超彼羈魂，離茲惡趣。神輝灌沐，蕩陰垢以清虛。霄景陶澄，還陽靈而整具。面朝玉闕，躬侍金容，宴六甲之雲厨，披五銖之羽袂。不經輪轉，永契真玄，息注訟於家庭，垂禎祥於宗裔。齋主某鼎新革故，否去泰來。秋月揚輝，步武絕一塵之染。朝陽散彩，興居膺萬神之臻。普桑梓以皆春，蔭絲蘿而不夜。由中懇請，臨下昭彰，上願地紀清平，天圖朗晏。五兵偃戢，混文軌以朝宗。百穀豐盈，列忠良而拱極。物無疵癘，家有詩書，慶雲開五道之華，甘露霑三途之潤，生生咸遂，化化無窮。則上明天尊大慈之造，下副臣等皈命之誠，謹啓以聞。

#### 發念

一念爲道四大，合德齋主，七世父母，免墮憂苦，上升天堂，衣食自然。  
二念帝王國主，道化興隆，庠序濟濟，

皇教恢恢，威儀翼翼，普天所瞻，民稱太平，四夷賓伏，祿惡自滅，聖賢自生。

三念法師功德大建，教化明達，俱獲飛仙。

四念同志學人，早得仙道，更相開度。

五念九親和睦，好尚仁義，貴道賤財，行爲物範。

六念損己布施，道士及飢寒者，天下人民，各得其所。

七念蠕動跂行，一切衆生，咸蒙成就。

八念赦貰前生，今世罪對，立功補過。

九念家門隆盛，宗廟有人，世生賢才。

十念尊受經師，不敢中怠，平等一心廣度，克獲上仙，白日登天，拜見太上，永成真人，雲車羽駕。和：與道合真。

存神復爐

#### 存神復爐

香官使者，左右龍虎君，侍香諸靈官，當令臣朝元之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女侍衛，蘭煙傳臣向來所啓，速達徑御虛無大道九天元皇

玉帝御前。

出戶

靈寶領教濟度金書卷之七十六

靈寶領教濟度金書卷之七

十七

洞微高士開光救苦真人甯全真授

靈寶通玄弘教水南先生林靈真編

科儀立成品

生神齋用

午朝行道儀

各禮師存念如法

宣衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲策龍。謠歌慶會，散花太空。神化冥運，四極安隆。伏御帝前，罔有不恭。和：與道合真。

鳴法鼓二十四通

發爐

無上玄元太上虛無道君，召出臣等身中三五功曹，左右官使者，侍香金童，傳言散花玉女，五帝真符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意，以今臨午陞壇行道，願得靈寶自然生神妙炁下降，流入臣等身中，令臣所啓，速達徑御虛无大道九天元皇玉帝御前。

請稱法位

具位奉行靈寶生神妙齋法事小兆臣某，與臨壇官衆等，謹同誠上啓虛无自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞玄黃奠位，凝萬物於九霄。雲錦開囊，敷神章於四輔。玉佩昭晨燈之妙，金璫朗紅映之玄，三炁流精，萬神宴樂，上葆胎仙之粹，下迴遊爽之靈。乘晨希陽，超黑風而遏死戶。飛玄凝化，駕碧空而復生根。是爲無極之神鄉，亶淪有形之宿累。臣等太陽耀質，中土稟生，佩

八會之芝圖，按九光之藥簡。紛葩涉迹，昏梨棗於刀圭。泉石馳神，慨桑榆於方寸。乘非履過，懽滓天常，弘道憲天，盍宣帝澤，既奉詞旨，敢不上聞。

### 宣詞

按如詞言，衷忱激切。臣聞陽光煥赫，萬天拱仙聖之都。陰景冥迷，六洞號鬼神之府。惟人稟命，視物最靈。自客塵雲擾於形神，莫超陽界。致業垢煙迷於精粹，遂墮陰鄉。非依三炁之返魂，曷免千齡之輪轉。今齋主某痛念亡故某，命元蕩失，靈蒂飛奔，四大支離，散天魂於眇莽。百關消化，沉地魄於幽寥。冥冥夜壑以誰憐，戚戚寒庭而孰訴。三途極目，五道驚心。故瑤壇崇饗帝之儀，而玉範備籲天之敬。紫煙上下，佩環振響於玄虛。翠葆後先，黼袞低回於碧落。寶花四雨，鈞籟九成。覬善應之孔昭，期真忱之默契，恩周幽顯，澤洽人天。以今臨午行道，請法衆等，運茲初捻上香，願此香煙騰空徑上，供養無上至真道寶。臣等皈身皈神皈命，首體投地，仰依太上三尊。

願以是功德，上祝社稷尊靈，宗祧先聖，棲真玄極，證品清虛。凝旒侍金闕之尊，垂休寶祚。御蹕朝玉京之聖，衍慶金枝。邁景運於劫千，並太和於三五。今故燒香，自皈依道尊大聖衆，至真之德，得道之後，保天長存。和：與道合真。

以今臨午行道，請法衆等，運茲二捻上香，願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流齋主所薦亡靈，普及幽冥，冤親平等。伏願性天徹朗，覺地澄虛。業山摧萬仞之峰，晨陽照映。定水止千尋之浪，祖炁回還。升步武於霄衢，蔭聲猷於世澤。今故燒香，自皈依經尊大聖衆，至真之德，得道之後，升入無形。和：與道合真。

以今臨午行道，請法衆等，運茲三捻上香，願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流九州萬國，五道三途，舊爽新囚，孤魂滯

魄。並願慈雲流潤，法雨含滋，幽關開塊北之春，疾除罪簿。寒谷啓融怡之旦，落滅惡根。升碧落以證真，汎綠羅而躡景。今故燒香，自皈依師尊大聖衆，至真之德，得道之後，永處福庭。和：與道合真。

禮方 懺方 命魔

步虛 三啓 三禮

重稱法位

具位奉行靈寶生神妙齋法事小兆臣某，與臨壇官衆等，謹同誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞三寶開圖，演金書而裁萬有。九清布化，敷玉篆以拯群靈。惟蒼赤青綠黃白紫碧黑之結形，實胞胎魂魄藏府竅景神之備體。從無入有，唱恭奉以監生。返陰還陽，浮幽寥而度死。至哉化育，大矣

生成。臣等道運欣逢，玄樞快睹，奉天符而濟物，宣帝化以逢春。重念亡故某，覺積生生，愆繁劫劫，從心猿而喪本，輕慢三元。奔意馬以焚和，傷殘五炁。下違地理，上逆天文，中干人紀之常，旁忤神靈之正。蠅營狗苟，逐名利以爭馳。兔走烏飛，凋形神而罔覺。

一朝淪溺，九夜淒涼。莫登南上之生名，惟結北都之死籍。浮沉異趣，往返業輪。非帝真密灌於陽精，則性識曷超於陰滓。庸嚴蓬宇，恭飭芝壇，象葵藿以由中，潔蘋蘩而事上。伏冀恪從民欲，俯賜天休，窮朔單鬱絕之區，靈光蒞藹。極洞淵剛澤之境，道炁羅敷。超溟漠之苦魂，登虛無之樂界。五行返復，二景周流。聚精會神，和合而胚胎有始。還淳返朴，逍遙而塵劫無終。陰消考訟之虞，陽衍雲仍之祉。齋主某千愆冰釋，萬福川增，慶雲凝庭戶之華，春回福地。霽月映簾籠之景，日永壺天。茂詩禮以自將，蔭屋身而俱潤。天倫有序，人事無憂。上願三境輝華，二儀呈泰，龍圖衍瑞，鳳曆延祥。雲蔭

八遐，絕烽煙於榆柳。風清九軌，挹甘露於桑麻。山棲谷汲而咸味道腴，川泳雲飛而普全生意，九幽昭晏，萬類權和。則上明天尊大慈之化，下副臣等皈嚮之誠，謹啓以聞。

發願

一願大道澹泊虛無，安閑空寂，澄清自居，廣開法門，教導頑夫，皆蒙惠澤，精苦自修，預以同學，普得昇虛，與天相保，長存無憂。

二願諸天結炁澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民具從，養生安死，惠周十方，禾稼滋植，營運日豐，咸得覆載，萬類皆從。

四願日月二景高明，無有孛蝕，虧盈安清，光照諸天，洞消暗冥，保固劫運，世祚和平，普加潤澤，惠灑衆生。

五願星辰與日齊光，轉燭照耀，朗映十方，各安其位，經緯直行，保鎮家國，

無有災傷，四海寧一，普天與昌。六願四時隨節推遷，景氣和調，無有災患，疫毒消滅，普天安平，五谷豐熟，國富民歡。

七願浮雲結氣聚煙，飛空高澄，蔭覆玄玄，隱則無爲，散則彌天，神仙同居，結友衆真，惠流一切，興國愛民，普濟群生，人同劫年。

八願風雨流灑無窮，普加施泄，受其發揚，萬物滋生，國儲民豐。九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫石。

十一願帝王國土日昌，四鎮安睦，兵革不揚，天人歌唱，吉應來翔，敷教濟濟，威化揚揚。兆庶稱慶，長樂未央。

十二願蜺飛蠹動，已生未生，咸蒙安全，普得生成，皆見元氣，受陽之形，草木菓林，經冬不零，一切濟度，靡不



鮮榮。和：與道合真。

### 復爐

香官使者，左右龍虎君，侍香諸靈官，當令臣午朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩。十方仙童玉女，侍衛香烟，傳臣向來所啓，速達徑御虛無大道九天元皇玉帝御前。

### 出戶

靈寶領教濟度金書卷之七十七

## 靈寶領教濟度金書卷之七

### 十八

洞微高士開光救苦真人甯全真授靈寶通玄弘教水南先生林靈真編

### 科儀立成品

生神齋用

### 晚朝行道儀

各禮師存念如法

宣衛靈咒

五星高耀，瑞氣飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪伐惡，道炁周流。神光照夜，陰翳俱收。萬神降格，扇景乘飈。群生咸遂，惠遍神州。和：與道合真。

鳴法鼓二十四通

發爐

無上三天玄元始三炁太上虛無道君，召出臣等身中三五功曹，左右官使者，侍香金童，傳言玉女，五帝直符，直日

香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意，以今落景行道，願得靈寶自然生神妙炁下降，流入臣等身中，令臣所啓，速達徑御虛無大道九天元皇玉帝御前。

### 請稱法位

具位奉行靈寶生神妙齋法事小兆臣某，與臨壇官衆，謹同誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞道分三洞，生清微禹餘大赤之天。炁布九霄，歷赤明龍漢上皇之劫。仰妙無之玉相，開大有之金書。撫料兆民，雍和萬化。琅音轉而生神凝妙，混合百神。玉章響而死炁飛玄，返還五炁。下越幽遐之列壘，上超溟漠之層霄，悉賴裁成，宣由宰御。臣玄門宿挺，聖域叨遊，

膺八景之鸞書，佩九清之鳳檢。白雲怡悅，未符鍊景之心。紅瑤紛華，莫挽和光之迹。皇皇鯤化，劫劫駒馳。惟春育海涵，許知非於已往。而淵臨冰履，誓補過於方來。勉積微勳，庸酬大造，况奉詞旨，敢不上聞。

宣詞

按如詞言，備殫誠切。臣聞三官九府，憲章昭冰鑑之明。五苦三途，報對揭水衡之正。况化機之輪轉，與密網之周遭。羈陰地而性識淒迷，孰伸援手。返陽天而形神快樂，亶切傾心。今齋主某痛念亡故某，九炁內凋，六淫外擾。神聖工巧，莫堅命樹以長春。地水火風，遂散生根於厚夜。神飄飄而曷寄，魂杳杳以何之。非上沐於晨輝，曷下提於鬼趣。瑤壇日近，象紫禁之崇嚴。黃道雲開，想翠華之容與。寶花四雨，鈞樂九成。龍煙裊百和之芳，鳳炬燦千枝之秀。對揚有翼，既激越於丹衷。鑒映無私，願敷羅於玄貺。以今落景行道，請法衆等，運茲初捻上香，願此香煙騰空徑上，供養無上至真道寶。臣

等皈身皈神皈命，首體投地，仰依太上三尊。願以是功德，上祝社稷尊靈，宗祧先聖。伏願龍駟汎景，鸞輅飛霄，泝騫圃以遊神，流祥帝業。蔭蓮臺而高步，垂慶皇圖。延玉曆於億年，茂金芝於萬世。今故燒香，自皈依道尊大聖衆，至真之德，得道之後，保天長存。

和：與道合真。

以今落景行道，請法衆等，運茲二捻上香，願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，皈流齋主所薦亡靈，普及幽冥，冤親平等。伏願瓊林毓粹，瑤沼凝神，登碧玉以聞經，訪紫金而問道，性天朗徹，覺海澄清，滌浩浩之塵根，延巍巍之家慶。今故燒香，自皈依經尊大聖衆，至真之德，得道之後，升入無形。和：與道合真。

關夜域，若爽囚徒，曠野荒郊，孤魂滯魄。伏願一真獨靜，萬業俱空。企青府以升神，瑞光肆覲。入朱宮而度命，妙炁回靈。開寒谷之春陽，照昏衢之晝景。今故燒香，自皈依師尊大聖衆，至真之德，得道之後，升入福鄉。和：與道合真。

禮方 懺方 三啓

三禮

重稱法位

具位奉行靈寶生神妙齋法事小兆臣某，與臨壇官衆等，謹重誠上啓虛無自然無極大道元始天尊，玉晨道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣聞生炁結形，三寶布慈雲之澤。鍊神返本，九陽騰慧日之輝。金文玉字以開光，紫笈錦囊而闡妙，百神混合，萬品生成，爲天地之根宗，實幽冥之柱石。臣等承流道

紀，宣化玄綱，願徹濟下之仁，庸冒蓋高之聽。重念亡故某，循環宿劫，展轉多生，六鑿風馳，莫清明於夜炁。七情雲擾，每濛翳於靈光。動違十善之修，靜昧四知之戒。天形道貌，既虧精粹以離真。鬼責人非，倏瘁形神而喪本。三元憲令，六洞條章，紛惡業以熒煌，履畏途而流曳，驚心業網，側耳恩綸。洪惟大德之好生，深軫下愚之就死。爰遵寶範，肅建瑤壇，瓣香殫虎拜之恭，多福企鸞和之御。伏冀晨輝曲映，靈盼迂回。降九炁之鴻濛，灌除陰垢。凝三色之混沌，還返陽精。削罪目於黑篇，注生名於丹簡。五龍橐籥，澄神東井之華池。九鳳徘徊，鍊質南宮之炎冶。逍遙碧落，遊宴玄虛，長爲金闕之臣，永侍玉京之聖。齋主某爲善最樂，與道合真，冰清門外之風波，一塵不染。雲淨壺中之日月，萬境俱融。芝蘭襲文獻之華，椿桂享期頤之樂，倉箱天富，隴畝雲聯，來萬福於家庭，納千祥於筦簞。人所欲者，天必從之。上願圓蓋高澄，方輿靜晏。卿雲耀彩，

龜圖開億萬之基。瑞露凝甘，鴻祚啓半千之運。萬姓謳歌於化日，三農鼓舞於仁風。人鬼龍仙，各圖性性。飛潛動植，均遂生生。開幽域以乘晨，躋春臺而宴景。則上明天尊大慈之造，下副臣等皈命之誠，謹啓以聞。

### 發願

#### 存神復爐

香官使者，左右龍虎君，侍香諸靈官，當令臣晚朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女侍衛，蘭煙傳臣向來所啓，還達徑御虛無大道九天元皇玉帝御前。

#### 出戶

靈寶領教濟度金書卷之七十八

## 靈寶領教濟度金書卷之七十九

洞微高士開光救苦真人甯全真授  
靈寶通玄弘教水南先生林靈真編

### 科儀立成品

生神開度齋用

#### 九天懺儀

臣衆等志心皈命，東北方鬱單無量天帝，已得道大聖衆，至真諸君丈人，梵炁天君，東北鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命。東北方鬱單無量天帝，梵炁天君，東北鄉神仙諸靈

官。伏願蒼炁流光，玄臺肆赦。惡根消化，遏死戶以乘晨。飛爽浮幽，沈命門而返景。太霄高步，上境升神，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，東方上上禪善無量壽天帝，已得道大聖衆，至真諸君丈人，梵炁天君，東鄉神仙諸靈官，長跪虔誠懺謝。

臣等今故燒香，皈身皈神皈命，奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守，故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命東方上上禪善無量壽天帝，梵炁天君，東鄉神仙諸靈官。伏願赤炁流光，瓊臺肆赦。超神幽夜，斷死戶以結胎。導炁陽靈，斬故根而離愛。青霄汎景，碧落凝真，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，東南方梵監須延天帝，已得道大聖衆，至真諸君丈人，梵炁天君，東南鄉神仙諸靈官，長跪虔誠懺謝。

臣等今故燒香，皈身皈神皈命，奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫，因今修齋行道，燒香散花，皈命東南方梵監須延天帝，梵炁天君，東南鄉神仙諸靈官。伏願青炁流光，靈都肆赦，玄關遏死，開長夜以期歸。通炁攝生，反故根而度命。碧霄穩步，丹霍澄神，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，南方寂然兜術天帝，已得道大聖衆，至真諸君丈人，梵炁天君，南鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋

主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命南方寂然兜術天帝，梵炁天君，南鄉神仙諸靈官。伏願綠炁流光，瓊臺肆赦。生門開朗，合騫爽以飛仙。魄戶閉關，攝遊精而宴樂。丹霄御炁，朱火陶形。永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，西南方波羅尼密不驕樂天帝，已得道大聖衆，至真諸君丈人，梵炁天君，西南鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋主某懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥

曹，不睹光明，無由解脫。因今修齋行道，燒香散花，皈命西南方波羅尼密不驕樂天帝，梵炁天君，西南鄉神仙諸靈官。伏願黃炁流光，玉臺肆赦，炁鍊紫戶，召長夜以受生。神靈黃房，洞幽虛而起死。景霄飛步，清漢流玄，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，西方洞玄化應聲天帝，已得道大聖衆，至真諸君丈人，梵炁天君，西鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命西方洞玄化應聲天帝，梵炁天君，西鄉神仙諸靈官。伏願白炁流光，瓊林肆赦。斬胞伐滯，超玄爽於上京。鍊胎返初，回天真於妙

域，玉霄遊宴，瑤圃翱翔，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，西北方靈化梵輔天帝，已得道大聖衆，至真諸君丈人，梵炁天君，西北鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命西北方靈化梵輔天帝，梵炁天君，西北鄉神仙諸靈官。伏願紫炁流光，瓊臺肆赦，爽魂返本，超八難以凌空。梵炁回靈，生萬神而備體。琅霄駕步，琳闕參真，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，北方高虛清明天帝，已得道大聖衆，至真諸君丈人，

梵炁天君，北鄉神仙諸靈官，長跪虔誠懺謝。

臣等今故燒香，皈身皈神皈命，北方高虛清明天帝，梵炁天君，北鄉神仙諸靈官。伏願碧炁流光，玉臺肆赦，跡超玄景，運四大以高奔。心振靈音，合九玄而飛度。紫霄快樂，玄圃從容，永契虛無，不經輪轉，垂芳胤祚，衍慶家庭，得道之後，升入無形。和：與道合真。

臣衆等志心皈命，上方無想無結無愛天帝，已得道大聖衆，至真諸君丈人，梵炁天君，上鄉神仙諸靈官，長跪虔誠懺謝。

臣等今故燒香，皈身皈神皈命。奉爲齋主某，懺悔亡故某人。浩劫以來，死生相續，七情顛倒，三業紛紜，人僞滋流，天和蕩失，輕慢四大，穢賤五靈，禁戒多違，綱常不守。故爲誤犯口語，心生陽造陰謀，日積月累，名書黑簿，魂錄冥曹，不睹光明，無由解脫。因今修齋行道，燒香散花，皈命上方無想無結無愛天帝，梵炁天君，上鄉神仙諸靈官。伏願黑炁流光，玉京肆赦。浮爽緣故，

參上景以返胎。真神潛登，洞太虛而流步。神霄宴御，瓊闕逍遙，永契虛無，不經輪轉，垂芳胤祚，衍慶家庭，得道之後，升入無形。和：與道合真。

靈寶領教濟度金書卷之七十九

靈寶領教濟度金書卷之八十

洞微高士開光救苦真人甯全真授  
靈寶通玄弘教水南先生林靈真編

科儀立成品

生神齋用

煉度醮儀

步虛 洒淨

衛靈呪

五靈列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南宮。金籙定籍，玉宇除殃。朱陵鍊質，飛神太蒼。三官九府，無極神鄉。普受開度，上生天堂。和：與道合真。

具位臣某，謹同誠上啓無上自然三寶虛皇大道元始天尊，玉晨元皇大道君，後聖玄元老君，九天帝主，昊天玉皇上帝，九天採訪應元保運普化天帝，九天自然生神上帝，九天帝真元君，九天丈

人真王元父道君，九天真母聖后元君，九天金籙無量生神君，朱陵火府南昌上宮主宰高真，九天司命府主宰高真，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神，迴骸起死無量度人君，主水靈官，主火靈官，陽晶玉胎鍊神符吏，石景水母鍊真符吏，九天普度院水宮拔亡真人，火府度亡真人，鍊度應感合會真靈。伏聞三寶開圖，散虛無之祖炁。九霄啓運，宏妙有之神功。密提洪澤以敷榮，昭建玄壇而佐理。南丹布化，生神開死戶之幽。北鬱承恩，死魄廓生門之旦。聖力巍巍於湛露，神功赫赫於發煙，望重人天，惠流今古。凡皈心而請命，必委質以投誠。今齋主某，伏爲亡故某崇建某齋。開地禁以提魂，宣藉九陽之微妙。煥天光而鍊魄，更資二景之希夷。靖惟宣德以承符，允屬協恭而受事，敢潔蠲於蘋薦，庸預控於葵衷。伏願月駟逶迤，御玄虛而下邁。雲驂搖曳，泛碧落以來遊。駐景前帷，依光中陛，布陰陽

之正化，融經緯之真機。某不勝傾僣之至，謹稽首再拜，祇迎聖駕。

請聖 初獻

具位奉行某齋，鍊度法事某，謹同誠上啓無上自然三寶虛皇大道元始天尊，玉晨元皇大道君，後聖玄元老君，九天帝主，昊天玉皇上帝，九天採訪應元保運普化天帝，九天自然生神上帝，九天帝真元君，九天丈人真王元父道君，九天真母聖后元君，九天金籙無量生神君，朱陵火府南昌上宮主宰高真，九天司命府主宰高真，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神。迴骸起死無量度人君，主水靈官，主火靈官，陽晶玉胎鍊神符吏，石景水母，九天普度院水火度亡真人，鍊度醮筵內外一切真靈。伏聞帝德好生，龍簡侈度生之惠。民情惡死，鴛班敷起死之恩。下橐籥於群工，上恢張於萬範。欽惟神武，夙稟威儀。劍佩陸離，典朱陵而熙帝載。旌旄赫奕，佐朱火以暢皇靈。開九地之春陽，霈八紘之晝景。

黃華聖治，裁成蕩滌之功。流火神庭，變理陶鎔之績。元功制地，玄澤昭天。今齋主某，深念亡故某人，流浪冥都，顛連幽路。胞胎結節，驚梵炁以流奔，臟腑形神，倏百骸而解散。夙世之塵根結習，積生之業垢周羅，非鍊淪於陰霾，曷返還於陽耀。朱函露奏，冀差陰降之金綸。丹旆風馳，已拜關宣之玉敕。茲伸召役，僭布懇祈。伏望嘯命真曹，敕制仙吏，九鳳扇南閭之炁，五龍鼓東井之津。陽燧炎熇，蠲萬劫無名之垢。方諸澄潤，滌千生有漏之塵。即俾亡故某人，精魄清夷，形魂澄正，鍊神成炁，返生炁於故根。鍊形成神，復精神於本始。永離地中之地，遙登天上之天。蒙采丹誠，允昭玄貺。某不勝懇祈之至，謹伸亞獻。

亞獻

真位臣某等，謹重誠上啓三清上帝，十極高真，醮筵內外應感真靈。伏聞道尊太乙，流教雨於清微。化衍大千，扇真風於黃混。凡稟陰陽而兆質，必資水火以成形。走虎飛龍，運真精於子

午。含烏育兔，融妙粹於坎離。九還彰地二之輝，七返散天一之景。鬱儀洞煥，廓乾陽金紫以流華。結璘泓渟，舒坤陰素黃而耀彩。混合浮沉之妙，交羅升降之玄。梵炁籠葱，靈光鬱勃，珠幢玉節，藹雲佩以周旋。翠葆金旌，雜霞綃而容與。凡期變化，悉賴圓成。庶使已故某，氣質磨礱，鋼百鍊而愈勁。形魂浣濯，金屢淘而益明。還本來泰定之天，復固有虛靈之性。神神玉潔，疾超跡於圓方。炁炁珠圓，快回靈於經緯。霓裳縹緲，霄路翱翔。紫雲扶八景之輪，橫飛寥廓。碧霞映九光之座，直上虛空。永無輪轉之虞，常享太平之運。蒙如丹禱，允荷洪恩。某不勝虔禱之至，恭陳終獻。

三獻

以今銀河影轉，玉漏聲遲，珠星璀璨於璇虛，碧月玲瓏於黃道。今夕何夕，開生神九轉之壇。此時得時，飛降真五華之駕。願停風輦，爲駐霄衢，降神吏以戒嚴，策仙靈而鍊度，提携死炁，返復生根，九鍊功圓，別當奉送。

散壇儀

燒香頌

各禮師存念如法

宣衛靈咒

玄陰七靈，九炁合形。魂精魄爽，二景回輪。飛光赫奕，煥耀長春。日月吐輝，回合華英。大梵流布，奔飛炎鈴。魔王受事，朝謁帝京。含靈普濟，廣惠幽冥。玉文敷告，萬炁騰升。和：與道合真。

鳴法鼓二十四通

無上三天玄元太上老君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。開啓玄壇天帝神君，當召此間土地里域真官正神，急上關啓臣今奉爲入意，以今解壇燒香，願得靈寶自然生神妙炁下降，流入臣等身中，令臣所啓，速達徑御虛無大道九天元皇玉帝御前。

請稱法位

具位奉行靈寶生神妙齋法事小兆臣某，與臨壇官衆等，今故燒香，願以是功

德，上爲天子王侯，土地官長，三師四友，祭酒學真，弟子某所薦亡靈，九祖父母，內外姻族，天下人民，蠕動蜎飛，跂行蠃息，無邊無極，法界衆生，皈身皈神，皈命，無上靈寶自然至真大道。特乞原赦前生今世，生死宿罪重過，得免離三惡五道，十苦八難九厄之中。臣等身得道真，飛行虛空，白日升天，侍衛元尊，逍遙無上七寶自然宮殿，永與道合，所啓玄感，應聲上御至真無極道前。

禮方

志心皈命東北方鬱單無量天尊。  
志心皈命東方上上禪善無量壽天尊。  
志心皈命東南方梵監須延天尊。  
志心皈命南方寂然兜術天尊。  
志心皈命西南方波羅尼密不驕樂天尊。  
志心皈命西方洞玄化應聲天尊。  
志心皈命西北方靈化梵輔天尊。  
志心皈命上方無想無結無愛天尊。

禮足，各長跪，皈命懺悔。

臣法衆等，志心皈身皈神皈命，虛無大道九天生神上帝天尊。以今言功解壇，焚香懺悔。臣聞三天播澤，靈光舒化育之仁。九地承恩，祖炁運提魂之德。荷宸恩之鑒映，幸齋法之周圓。庸罄丹忱，仰干洪造。重念臣等精神混俗，容止生塵，玉律昭回，凜三元之校錄。金科錯落，嚴四極之條章。寬冀寬容，恪垂涵育，陶靈光於九軌，誓暢玄宗。流法雨於三途，愿隆聖造，臣等志心稽首，禮謝無上至真三寶。

三啓頌

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。



三禮

臣等志心稽首，禮

太上無極大道

臣等志心稽首，禮

三十六部尊經

臣等志心稽首，禮

玄中大法師。

重稱法位

具位奉行靈寶生神妙齋法事小兆臣某，與臨壇官衆等，謹重誠上啓虛無自然無極大道元始天尊，玉晨元皇道君，萬變混沌玄元老君，高上玉皇昊天上帝，三寶丈人，三寶帝君，九天應元雷聲普化天尊，無上九天生神上帝，元父真母元皇帝君，三十六部尊經玄中大法師，玉輔上宰，四協侍宸，飛天神王，九天真衆，三界應感一切真靈。臣等野馬微生，醯鷄陋質，荷九天之錫慶，祭三同之開光，身縮金符，名聯玉籍。煙霞躡景，盍抗志於清虛。日月垂流，乃棲身於埃壒。百非未滌，萬業猶羈，緬惟受道之丹忱，常勵濟時之素誓。庶裨化育，不負生成，既奉詞文，敢忘關奏。

宣詞

按如詞旨，備殫激切。臣等洗心淨念，滌慮凝神，按三籙之威儀，敷九霄之盟信。雲璈縹緲，風籟琳琅，燦鳳萼於千枝，裊龍葩於百味，馳神丹禁，請命紫虛。自今月某日爲始，爲奉齋法弟子某人，崇建靈寶生神妙齋幾晝夜，謄詞達悃，降真召靈。揚九炁之華旛，燃九卮之法炬，解消結滯，落滅冤愆，拯度容儀，超升陽境。葵忱露奏，荷三境以流輝。芝檢鳳馳，開九幽而御炁，銘心罔極，刻骨奚殫。以今釐事慶成，齋功告備，天人同慶，賓主交歡。羽葆翩翩，將返瓊輿之仗。虎旌晝藹，行收禁路之班。盍依律以奉功，爲關盟而遷賞。恩惟玄穹至聖，皇極元尊，俯覽懇祈，曲垂采鑑。其有建齋之日，上請三洞官屬，九天真靈，監齋衛真，侍經護道，虛空鑒察，土地神祇，營衛齋功，具嚴勞績，即玄壇而拜表，希洪造以酬恩。臣等存念不周，俯仰未備，有五帝四司之考錄，慮千愆萬過之充周，等冀隆慈，普蒙矜宥。臣誠惶誠恐，稽首頓首，

再拜以聞。

宣表

十願

- 一願大道流行，普天懷德。
- 二願一切有生，咸皆悟道。
- 三願九夜悲魂，一時解脫。
- 四願孤魂無依，咸得受生。
- 五願天下太平，五穀豐熟。
- 六願臣忠子孝，君仁父慈。
- 七願四海會同，冤親和釋。
- 八願潛胞處卵，咸得生成。
- 九願積疾新痼，旋即痊愈。
- 十願孤露衆生，豐衣足食。

存神復爐

香官使者，左右龍虎君，侍香諸靈官，當令臣散壇之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御虛無大道九天元皇玉帝御前。

出堂頌

回幕

謝師

靈寶領教濟度金書卷之八十

靈寶領教濟度金書卷之八

十一

洞微高士開光救苦真人甯全真授  
靈寶通玄弘教水南先生林靈真編

科儀立成品

生神開度齋用

鍊度儀

步虛 洒淨

設鍊度壇 贊引升座

祝香

此香雲凝三素，炁藹七靈，丹谷流精，離坎混金華之粹。玄臺孕秀，雌雄符玉藥之祥。恭爇寶香，供養無上自然三寶虛皇大道元始天尊，玉晨元皇大道君，後聖玄元老君，九天帝主，昊天玉皇上帝，九天採訪應元保運普化天尊，九天自然生神上帝，九天帝真元君，九天丈人真王元父道君，九天真母聖后元君，九天金籙無量壽生神君，九天丞相魄靈帝君，九天司命魂靈帝君，

九天諸司真君列位真人，九天好生韓君丈人，度人不死尊神，迴骸起死監生大神，玄中大法師，三天大聖師，三洞侍經典法仙靈聖衆，玄虛應感一切真靈。願運慈悲，俯垂省錄。臣聞三寶開圖，敷希夷之鳳策。九霄御運，宏微妙之龍章。仁風鼓舞於幅圓，惠露涵濡於寰宇。朱陵南上，明水火之玄機。丹火中樞，宣陰陽之正化。提夜壑而朝陽煥爛，拯寒庭而春淑熙怡。自帝真開玉匱之奇，故師寶啓金囊之秘。燈燈續燄，葉葉傳芳，妙哉化育以難量，大矣生神而莫測。臣等心涵淵粹，迹襲紛葩，玄元始之心傳，面墻自嘆。天靈神之口授，入室未諧。莫融經緯於三田，未混儀璘於六合。冒領芝壇之渥，濫聯楓陛之班。宣德開幽，期棹慈航於苦海。承符破暗，誓明慧燭於昏衢。下慰群靈，上裨三極。今齋主某，伏爲亡故某，瘁生根而杳杳，飄命蒂以茫茫。黑鬱返魂，已賴虛無之帝力。青冥御炁，更資妙有之神功。恭卜今宵，奉行鍊度，降陰靈於坎室，交羅東

井之華。結陽耀於離方，融會南閭之彩。含烏育兔。走虎飛龍，澄清萬劫之根塵，疏瀹千生之業垢。庶使心天不滓，性地無埃。升地戶而鬼官送迎，佩符受戒。入天門而魔王保舉，御籙膺圖。十華扶汎景之輪，五靈登導真之軌。身朝玄極，面禮紫霄，不經輪轉之期，常享太平之運，流祥後裔，衍慶前聞。伏願大道好生，洪慈度死。丹輿綠輦，五色鬱勃於玄虛。羽蓋瓊輪，四象吁員於碧落。飛丹綸而風動，敕玄局以雲奔，駐景傾光，登真度命。恕微臣再三之瀆，副齋主萬一之忱。臣下情無任，不勝虔切之至。

### 九天生神天尊

上清靈寶玄壇炷香，關啓九天司命府主水靈官，主火靈官，陽精玉胎鍊仙符吏，石景水母，鍊真符吏，九天鍊度真宰，南昌上宮朱陵火府水火鍊度合會真靈。願遵玉敕，克赴玄壇，應感分輝，宣通役使。切以三天布化，鍊逝魄於朱陵。九地承恩，度死魂於黑朔。故列玄曹而輔極，庸羅丹掾以敷仁。

濟物心圓，度人功大，我以夙緣慶幸，昌運遭逢。丹谷凝神，運乾坤而坐忘入妙。玄關御炁，符子午而密鍊融真。既膺濟度之權，盍贊生成之德。以今奉爲齋主某，崇建某齋，開度亡故某。克卜今宵，奉行鍊度，願此爽識，夙抱真元。陰垢溟濛，既分離於四大。陽華流蕩，遂顛躓於千生。非由委炁以生神，曷俾全形而復質。伏冀廓施妙化，密運神功。流火之精，鍊而爲胞。灼火之明，鍊而爲胎。乘木之精，鍊而爲魄。柔金之形，鍊而爲魂。合土之英，鍊而爲藏。致坎之精，鍊而爲府。昭離之精，鍊而爲竅。激震之聲，鍊而爲景。和兌之榮，鍊而爲神。二象攝生，九炁合德，徘徊經絡，羅遶身形。庶得本始生神，根元凝妙，百關和暢，消陰否以復陽明。萬竅光華，飛天芳而澄地垢。集玉眸而橐籥，降黃華以裁成。即俾亡故某，結炁全形，還元復質，千和萬合，得隨刻以昇遷。七混五成，可計日而受度。永離惡趣，即證樂鄉，咨爾威靈，隨我感應，太極丹篆，次第宣行。

### 九天生神天尊

#### 平坐讚

道場衆等人，各運心平坐如法。大行梵炁，周迴十方。中有度人，不死之神。中有南極，長生之君。中有度世，司馬大神。中有好生，韓君丈人。中有南上，司命司錄。延壽益筭，度厄尊神。迴骸起死，無量度人。今日校錄，諸天臨軒。

謹請九天主水靈官，隨我神運，變化水池，蕩形濯質。

#### 焚石景水母真符

#### 侍職洒水池

玄玄無上真，寶籍契天仙。神機妙澄湛，東井自淵仙。返胎生太虛，鸞鶴齊翩翩。至哉萬化祖，生根保自然。

### 九天生神天尊

謹請九天主火靈官，隨我神運，變化水池，鍊神成真。

#### 焚陽精玉胎鍊仙符

#### 侍職洒火池

朱明鍊金池，陽景煥天中。元始披寶笈，真文朗太空。鬱鬱丹霞敷，諸天紀

玄功。死魂離幽夜，妙用流初終。

伏以育炁金池，有換骨度生之妙。陶形玉沼，施迴骸起死之功。惟茲二景之英華，可滌萬生之垢翳。超凡入聖，百神瑩徹於玄宮。返胎更生，五炁充盈於丹室。坎離交媾，子午循環，三田辭惡濁之塵，萬竅備輕清之質。飛行自在，嘯朗虛空，疇非水火之玄功，能結陰陽之正化。謹請鍊度真靈，部衛正度亡過某，即赴玄壇，依科受鍊。

九天生神天尊

引旛詣鍊度所

九天有命，普告萬靈。地水社令，列職真靈。部衛亡魂，鍊質還精。玉符所告，風火無停。萬召萬至，受鍊更生。疾證妙果，上升玉京。咨爾真靈，部衛亡過某，隨我神運，赴水池受鍊。

移旛詣水池

焚水鍊第一符

結璘孕粹，東井澄瀾。飛流降炁，鬱勃迴環。亡魂一鍊，萬滓莫干。九天有命，舉形天關。

九天生神天尊

焚水鍊第二符

天乙孕化，華池耀明。扶桑合景，七炁齊并。亡魂二鍊，神炁充盈。天河灌沐，上升紫庭。

九天生神天尊

焚水鍊第三符

陰精布化，石景飛鮮。黃華蕩形，玉質輕圓。亡魂三鍊，形儀自然。還真離妄，飛行帝軒。

九天生神天尊

焚水鍊第四符

坎陰水帝，坎玄含虛。流華降英，混炁東諸。亡魂四鍊，萬冤消除。玉田雲滿，遊行天衢。

九天生神天尊

焚水鍊第五符

玄英御炁，瑤漢垂精。暘谷布化，萬神豐盈。亡魂五鍊，太乙返生。洞觀逍遙，億劫無傾。

九天生神天尊

焚水鍊第六符

石景水母，靈耀玄光。寶津下注，潤澤無疆。亡魂六鍊，乘晨希陽。罪根解

化，飛行神鄉。

九天生神天尊

焚水鍊第七符

長庚結秀，水神孕真。三河四海，寶梵網緼。亡魂七鍊，陰翳俱蠲。九霄八極，高步賓天。

九天生神天尊

焚水鍊第八符

天河東注，炁灌崑崙。結炁寶池，離合自然。亡魂八鍊，玉貌凝仙。水帝有敕，昇入九天。

九天生神天尊

焚水鍊第九符

太陰真水，五行玄機。北陰大淵，涵停泓池。亡魂九鍊，佩服天儀。更生受化，神觀彤墀。

九天生神天尊

咨爾真靈，部衛亡故某，隨我神運，赴火池受鍊。

池受鍊。

九天生神天尊

移旛詣火池

焚火鍊第一符

太陽流景，南閭洞浮。炎光下灌。丹

天度幽。亡魂一鍊，梵炁逍遙。洞朗  
太空，高登紫霄。

九天生神天尊

焚火鍊第二符

金輝列耀，炎熾凌空。太陽布化，流鈴  
激風。亡魂二鍊，返形易容。行之帝  
鄉，浩劫無終。

九天生神天尊

焚火鍊第三符

鬱儀布景，赤紫凝霞。委炁流汨，混合  
三華。亡魂三鍊，蕩滌芬葩。罪根咸  
原，升餌雲芽。

九天生神天尊

焚火鍊第四符

南丹朱火，受化更生。中有炎池，陶冶  
爽靈。亡魂四鍊，血氣滋榮。雲衢遊  
宴，御景無形。

九天生神天尊

焚火鍊第五符

南離垢質，紫金凝烟。赤爐丹景，炎花  
飛天。亡魂五鍊，消釋陰愆。返胎還  
元，翱翔雲駢。

九天生神天尊

焚火鍊第六符

金霄流火，注射光鮮。赤明和陽，洞照  
無邊。亡魂六鍊，本始根源。俱脫胞  
節，登真自然。

九天生神天尊

焚火鍊第七符

金晶啓運，左攝炎輝。玉眸誦誦，陽燧  
發舒。亡魂七鍊，宴景太虛。上朝仙  
宗，後天無衰。

九天生神天尊

焚火鍊第八符

朱陵丹華，大帝司鈞。分光降炁，枯朽  
發生。亡魂八鍊，故爽咸新。汎景鬱  
羅，飛觀紫宸。

九天生神天尊

焚火鍊第九符

洞陽擲火，披丹衣朱。炎精射注，絳霞  
呈舒。亡魂九鍊，身服瓊琚。真元湛  
寂，周流帝廬。

九天生神天尊

焚九天全形符

侍職引旛至九炁壇中

臣聞恍惚無象，光明凝空洞之中。溟滓

有生，精化孕飛玄之表。散太微而接

景，分華蓋以流英。九天結形，媾陰陽

之本始。三元成德，合混沌於根源。

期胞胎魂魄藏府竅景神之經絡周圓，

藉混沌浩旻景遊融炎演之輝光鬱勃。

金樓玉室，萬神俱備以得生。紫戶黃

房，五炁充盈而耀景。竄繇造化，恪證

希夷。載念所度亡故某，四大各離，六

如已化。茫茫官府，飄命帶以沉淪。

寂寂機關，散生根而陷溺。雖役陰陽

而鍊質，更資離坎以還形。非憑九炁

之功，曷返五行之妙。欲望三寶九天

上帝至尊，飛玄景於三田，錫真光於萬

竅。敬諾敬順，備還太極之精明。唱

奉唱恭，密契先天之形象。降九霄之

正炁，纏萬體之靈源，一時生神，諸天

品命。全大道回生之力，昭帝真起死

之功，稽首皈依無極大道。

焚九天真炁符

第一鍊

志心皈依奏啓無上大羅天無鞅玄臺中  
鬱單無量天尊。

焚鍊胞符

混合空洞炁，飛爽浮幽寥。延康無期劫，眇眇離本條。苦魂沉九夜，桑晨希陽翹。大有通玄戶，鬱單降晨霄。黃雲凝靈府，陰陽炁象交。胞元結長命，惡根應化消。桃康合精延，二帝秀玉飄。灌溉胞命門，精練神不凋。九天命靈章，生神神自超。元君遏死路，司馬誦洞謠。一唱萬真和，九遍諸天朝。稽首恭劫年，慶此榮舊苗。

九天生神天尊

第二鍊

志心皈依，奏請無上大羅天無鞅玄臺中上上禪善無量壽天尊。

焚鍊胎符

無量結紫戶，炁尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒伯史元，結胎守黃房。斬根斷死戶，熙頤養嬰童。禪善導靈炁，玄哺飛天芳。華景秀玉質，精練自成容。務玄育上生，羅列備明堂。太虛感靈會，命我生神章。一唱動九玄，二誦天地通。混合自相

和，九遍成人功。大聖慶元吉，散花禮太空。諸天並歡悅，一切稽首恭。

九天生神天尊

第三鍊

志心皈依，奏請無上大羅天無鞅玄臺中梵監須延天尊。

焚鍊魂符

須延總三靈，玄元始炁分。落落大梵布，華京翠玉尊。明梵飛玄景，開度長夜魂。遊爽赴期歸，炁炁返故根。太帝號陽堂，字曰八靈君。九關綠迴道，胎炁生上元。陵梵度命籍，太一輔精延。泥丸敷帝席，三部八景分。魂生攝遊炁，九轉自成仙。琅琅九天音，玉章生萬神。三徧列正位，炁參八辰門。玄關遏死戶，靈鎮津液源。應會感靈數，明道潛迴輪，慶此嬰兒蛻，稽首讚洞文。

九天生神天尊

第四鍊

志心皈依，奏請無上大羅天無鞅玄臺中寂然兜術天尊。

焚鍊魄符

寂然無色宗，兜術抗大羅。靈化四景分，萬條翠朱霞。遊魄不顧返，一逝洞群魔。神公攝遊炁，飄飄練素華。榮秀椿劫期，乘運應靈圖。空洞生神章，瓊音逸九霞。一唱萬真會，騫爽合成家。九轉景靈備，鬱鬱曜玉葩。兜術開大有，一慶享祚多。上聖迴帝駕，嬰兒歎以歌。不勝良晨會，一切稽首和。

九天生神天尊

第五鍊

志心皈依，奏請無上大羅天無鞅玄臺中波羅尼密不驕樂天尊。

焚鍊藏符

翻翻五帝駕，飄飄玄上門。遊步黃華野，迴靈驕樂端。採集飛空景，舊爽多不存。太微迴黃旗，無英命靈旛。攝召長夜府，開度受生魂。公子輔黃寧，總錄具形神。玉章洞幽虛，五轉天地分。炁練元藏府，紫戶自生仙。數周衆真會，啓陽應感繁。玉女灌五香，聖母慶萬年。三界並歡樂，稽首禮天尊。

九天生神天尊

第六鍊

志心皈依，奏請無上大羅天無鞅玄臺  
中洞元化應聲天尊。

### 焚鍊府符

應聲無色界，霄映冠十方。迴化輪無  
影，冥期趣道場。靈駕不待轡，朗然生  
神章。空洞諒無崖，玄爽亦爲疆。練  
胎返本初，長乘飛玄梁。蘄畜喪天真，  
散思候履常。斬伐胞樹滯，心遊超上  
京。願會既玄玄，悟我理兼忘。介福  
九天端，交禮地辰良。混化歸元一，高  
結元始王。稽首儔靈運，長謝囂塵張。

### 九天生神天尊

### 第七鍊

志心皈依，奏請無上大羅天無鞅玄臺  
中靈化梵輔天尊。

### 焚鍊竅符

玄會統無崖，混炁歸梵輔。務猷運靈  
化，潛推無寒暑。乘數構貞條，振袂拂  
輕羽。瓊房有妙韻，汎登高神所。圓  
輪無停映，真仙參列序。上上霄衢邈，  
洞元深萬巨。秀葉翳翠霞，停蔭清泠  
渚。邀翫怡五神，繁想嘯明侶。五難  
緣理去，冲心自怡處。爽魂隨本根，齋

齋空中佇。七誦重關開，豁滯非神武。  
運通由中發，高唱稽首舉。

### 九天生神天尊

### 第八鍊

志心皈依，奏請無上大羅天無鞅玄臺  
中高虛清明天尊。

### 焚鍊景符

清明重霄上，合期慶雲際。玉章散冲  
心，孤景要靈會。煥落景霞布，神衿靡  
不邁。玉條流逸響，從容虛妙話。靈  
音振空洞，九玄離幽裔。感爽無凝滯，  
去留如解帶。明識生神章，高遊無終  
敗。玄景曜雲衢，跡超神方外。應感  
無方圓，聊以運四大。研心稽首誦，衆  
聖共稱快。

### 九天生神天尊

### 第九鍊

志心皈依，奏請無上大羅天無鞅玄臺  
中無想無結無愛天尊。

### 焚鍊神符

無結固無情，玄玄虛中澄。輪化無方  
序，數來亦叵乘。誰云無色平，峨峨多  
丘陵。冥心縱一往，高期清神徵。良

遇非年歲，劫數安可稱。浮爽緣故條，  
返胎自有恒。靈感洞太虛，飛步霄上  
冰，津趣鼓萬流，潛凝真神登。無愛固  
無憂，高觀稽首昇。

### 九天生神天尊

具位臣某，仰謝三寶至尊，九天上帝。臣  
幸承昌運，叨際真風。密謝恩慈，法乾  
坤而化育。廣施濟度，運經緯以裁成。  
重念亡故某，降炁天關，流形人境。賤  
形神，涉塵垢，已喪失於玄宗。取死  
壞，離本根，遂顛迷於妄趣。是以體玄  
元之至化，運靈寶之真機。坎實離虛，  
升水降火，剝陰柔而陶魂魄，圓滿真  
身。復陽健返胞胎，光明本相。出輪  
迴於五戶，脫流轉於三途，受鍊更生，  
迴骸起死，實帝三天之蔭，溥淵九地之  
恩。更願證果周圓，傳符授戒，超凡入  
聖，與道合真，法衆運誠，贊揚功德。

### 九天稱慶天尊

### 侍職引籙，詣法座前

咨爾真靈，部衛亡故某，來詣座前，傳符  
授戒，返胎更生。  
扶桑啓靈運，鬱鬱吐青芽。妙用流金

母，和合自然葩。神炁凝九宮，靈物耀絳霞。自然生人道，冥寂契仙家。

九天稱慶天尊

見前亡靈結炁生神，還真復質，聞經聽法，通微悟玄，既承大道之洪恩，當稟上真之慈訓，澄思注念，諦聽奉行。蓋以九天之炁生其神，三光之炁育其質，黃白相致，混沌合形，六甲周流，五行交感，法天象地，含陰吐陽，萬象森羅，千真備列，既尊且貴，天地同仁。是以首為崑崙，髮為星辰，眉為華蓋，眼為日月，鼻為天柱，耳為天聰，口為天門，面為天鑑，五嶽四瀆，八海九江，一元二儀，三光四象，五行六律，七元八景，九宮十方，莫不備焉。皆天道應妙，至神之滋生也。所以德虛正念，陶洗端思，聚炁養神，招神合形，心無苦惱，身有光明，自然升入無形，逍遙永劫。或狂躁役志，混濁存心，傷氣疲神，奔神散炁，關擾動，萬竅失迷。即使魂魄沉淪，三途流，動靜善惡，隨念升沉，不可忽也。今當遵依法，宣示戒條，導滌昏蒙，開通智慧，可辭塵網，永證

法輪，法衆運誠，稱揚妙範。

智慧頌

智慧起本初，朗朗超十方。結空峙玄霄，諸天挹流芳。其妙難思議，虛感真實通。有有竟不有，無無無不無。

又

智慧常觀身，學道之所先。緲緲任玄肆，自然錄我神。天尊常擁護，魔王為保言。晃晃金剛體，超超太上前。

又

智慧生戒根，真道戒為主。三寶由是興，高仙所崇授。泛此不死舟，倏忽濟大有。當此說戒時，諸天皆稽首。

道本虛中，戒惟正己，持純一而端恪，屏浮穢以精專。清靜根塵，却除魔惱，脫俗趨幻，離妄明真，濟度迷津，戒為良筏，提携苦海，戒作慈航。自鍊魄於洞陽，即返生於太漠。胎英入妙，神炁回靈，孰非戒之，神奇功用也。蓋自元始法王慈悲，教主希夷養素，空碧鍊真，矜萬類之沉淪，示九天之科戒。倘能勤心持受，潔志操修，生則貴炁養神，保身固命。死則聚神返炁，登真復

靈。內外清虛，始終快逸，永與道合，保天無疆，豈不樂哉。今當恭依經旨，宣演妙戒，先皈三寶，次授戒條，法衆運誠，人各恭信。

億劫化應天尊

第一皈依，混洞太無元高上玉皇之炁，無上自然天寶。

第二皈依，赤混太無元無上玉虛之炁，無上自然靈寶。

第三皈依，冥寂玄通元無上玉虛之炁，無上自然神寶。

三寶既已皈依，大戒今當諦受。

北帝頌

善哉元始尊，衆生慈父母。須光紫微宮，曲映九幽戶。峨峨丘寒庭，迴照廓冰浦。炎炎烈火燄，霈然灑法雨。圓通大哀智，常善濟衆苦。拔度長夜魂，今得稽首禮。

第一戒者，忠孝國君，師資父母。

第二戒者，仁慈百品衆生，昆蟲草木。

第三戒者，敬奉天地日月星辰。

第四戒者，欽奉三洞上經，一言一偈。

第五戒者，尊仰一切仙聖神靈。



第六戒者，慎損三寶物色。

第七戒者，和顏悅心，忍辱修行。

第八戒者，端貞謹潔，清心淨體。

第九戒者，勿生嫉妬，陰謀詐妄，天人含生。

第十戒者，不得啗食辛臙，腥臊葷穢。

第十一戒者，不得大醉，浮狂叫喚。

第十二戒者，不得評論一切，是非高下。

如上十二戒，乃九天帝尊金口宣演，佩奉者升入九天，輕慢者墮入九地。今對亡靈，依科傳授，切宜審聽，終始勿忘。次有十二大願，乃成真之梯階，志心宣傳，尤宜諦聽。

第一願者，願三寶流演，化及一切，普使知聞。

第二願者，願供養片善，師資不闕，常遇提携。

第三願者，願修齋奉戒圓成，無諸魔試。

第四願者，願竭力竭財，建立道堂，救恤貧乏。

第五願者，願賑接山林學真，使功不

替。

第六願者，願拂拭三光五行，常得明朗。

第七願者，願普開九幽，魂神皆得超生。

第八願者，願潛胎處卵濕化，普遂生成。

第九願者，願萬品枯朽，皆得再榮。

第十願者，願救度劫災時厄，永保平安。

第十一願者，願制召萬靈，升降鬼神。

第十二願者，願依訣修行，功成行備，骨肉同仁。

如上十二大願，乃九天帝真玉音流誦，普使天上人間，陽神陰鬼，平等一心，堅固受持，願心不退，諸天稱慶，千生萬劫，常植經教，不墮輪迴，清衆運誠，稱揚奉戒。

#### 奉戒頌

道爲無心宗，一切作福田。立功無定主，本願各由人。虛己應衆生，注心莫不均。大聖崇至教，亦由雨降天。高陵靡不周，常卑故成淵。海爲百川王，

是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

十二戒既已受持，十二願復堅佩奉。秉心專恪，勵志精修，自得智慧妙圓，清淨無漏，諸塵永脫，升入真仙。然大戒科條，皆包世諦。何也？衆生深入塵緣，流蕩忘返，形雖變滅，心病未除。故上聖高真，以生前所當戒者鑿其病，使去病根，在心政宜疏濬。生生世世，念想不忘，出入起居，常依正道。戒既受矣，願亦如之。萬業消鎔，六根清靜，精思陽梵，駕景飛玄，旋行紫極之宮，洞妙金華之境。今者敷揚戒願，已按冲科，更就齋壇，給牒爲據，所給符籙，並用告宣。

#### 宣戒牒

#### 宣金書寶篆

向來給授符牒，已獲周圍。伏請悟道登真，超凡入聖，逍遙自在，徑上南宮，返胎更生，轉神證妙，少須發遣，保舉登天。

#### 寶華圓滿天尊

臣聞二儀布化，九炁凝神，千真聚會於

三宮，萬象森羅於六府，百關和暢，九竅開通，魂靜魄寧，神清炁爽。所鍊亡魂，仗茲良因，隨果受度，得為真人。臣等草茅賤類，螻蟻微軀，輒膺命以求真，仗鴻慈而濟物。虔伸懇悃，普被恩光，乘大道之甄陶，涵萬天之景貺。伏望雲車風馬，却返於層霄。玉蕊珠華，飄零於碧落。臣等仰謝天恩，下情不勝激切，攀戀之至。

回輶頌

回輶五雲輿，騰駕九章歌。倏忽升天遠，醮壇香氣多。玄恩覃宇宙，福祿遍山河。緬想神仙路，逍遙上大羅。謹召九天普度院守雄抱雌二大將，本靖主將副將，護道監壇諸大元帥，疾速部衛亡故某人，上詣朱陵火府，上帝有敕，風火無停，玄壇功德，具有牒文，謹當宣示。

宣功德牒

宣天門券

宣命魔前驅符

亡故某騰光南上，離暗北艷，禮道禮經禮師，一真日皎。鍊形鍊神鍊炁，萬妄風清。茲登寥廓之鄉，徑達虛無之境。

寶戒真願，銘鏤不忘，玉券金符，佩奉無忽。敕真靈而護送，命將吏以衛扶。飛步雲衢，永無輪轉，好去好去，毋怠毋荒。

送靈如儀

靈寶領教濟度金書卷之八十一

靈寶領教濟度金書卷之八

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

生神齋用

升壇誦經儀

步虛 洒淨

三皈依

按人各恭敬

志心皈依，十方道寶，當願亡靈，起心

回向，一切信禮。

志心皈依，十方經寶，當願亡靈，心開

悟解，受持轉誦。

志心皈依，十方師寶，當願亡靈，普上

法橋，無有障礙。

啓白

具位臣某謹焚香，奏啓太上無極大道虛無自然元始天尊，太上玉晨虛皇大道君，金闕後聖玄元太上老君，三寶丈

人，三寶帝君，三洞尊神，鬱單無量天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞元化應聲天帝，靈化梵輔天帝，高虛清明天帝，無想無結無愛天帝，五靈五老上帝，三元三官大帝，三十六部尊經玄中大法師，靜老天尊，三天大法師，高明大帝，九天好生韓君丈人，度人不死尊神，南極長生大帝，迴骸起死尊神，太一元君，太一真人，飛天大聖，無極神王，四協侍宸，玉輔上宰，九天司馬，侍仙玉郎，太極典禁，靈妃侍聖，玉童玉女，三洞四輔經錄符法上聖高真，翊衛仙靈，九天諸司真君，九天列職靈官，玄壇功曹使者，玉童玉女，直符直事，直日香官，虛空監察，仙真主宰，諸省府院司官君將吏，地水嶽瀆城隍社令，三界應感一切真靈，仗此寶香，並同供養。

臣聞三寶金書，凝飛玄之妙炁。九霄玉笈，祕空洞之靈音。內名混合於百神，生根裁成於萬品。導運御世，唱恭奉而九炁結形。乘晨希陽，洞玄靈而七

元返景。洪惟元始，凝妙虛無。憫履九之告終，矜函三之應會。神景啓奧，隱韻通玄，上開天地之光，下料死生之化，希夷至極，微妙難超，仰功德之巍巍，罄忱恂之切切。今有齋主某，崇建靈寶生神妙齋開度某人。乞於齋次轉誦《太上靈寶自然九天生神玉章經》，期格神輝，惠超幽爽。臣等謹哀淨侶，虔款靈壇，澡淪諸塵，澄清一念，調聲正炁，異口同音，恭按玄科，宣揚寶讚。伏願慈光耀景，玄極流輝。出禁書於玉臺，容其嘯詠。開寶章於金格，許以謠歌。琅琅而逸響九遐，鬱鬱而朗聞三界。即使亡故某人，耳聆妙韻，身沐靈光，宣胞元而解胎根，鍊魂門而閉魄戶。藏府清潤，通九竅以開聰。部景光明，生萬神而備體。性超死戶，炁返故根，乘大有之瓊輪，登妙無之寶界。齋主某人，精神靈煥，步武光華，家庭永蕩於陰氛，眷序常凝於陽境，飛潛動植，均戴洪恩，人鬼龍仙，普陶玄蔭。臣下情不勝激切之至，謹言。

讚詠如儀

宿命讚 啓經

雲篆太虛，浩劫之初。乍遐乍邇，或沉或浮。五方徘徊，一丈之餘。天真皇人，按筆乃書。以演洞章，次書靈符。元始下降，真文誕敷。昭昭其有，冥冥其無。沉痾能自痊，塵勞溺可扶。幽明將有賴，由是升仙都。

以今齋主某，乞轉誦《太上洞玄靈寶自然九天生神玉章經》，攝氣聚神，還真返性。伏冀劫塵消寂，正性昭融。召九炁以期歸，出離幽裔。會萬真而霄映，總錄形神。上朝金闕之寶幃，永侍玉皇之香案。陰消注訟，陽衍來仍，稽首皈依，無極大道。

平坐讚

道場衆等，執簡當心，平坐如法。

玄蘊呪

寂寂至無宗，虛峙劫仞阿。豁落洞玄文，誰測此幽遐。一入大乘路，孰計年劫多。不生亦不滅，欲生因蓮花。超凌三界徒，慈心解世羅。真人無上德，世世爲仙家。

請轉寶經 誦經 結經

九天生神天尊

仰惟三寶至尊，九天上帝，俯回洪造，同賜證明。臣聞玉章妙生神之典，梵炁周流。金書迴死魄之靈，霄衢密映。重殫赤素，仰叩紫清。臣向來奉為齋主某，開度亡故某。恭率羽流，肅揚秘範，依俯仰之格，遵誦詠之儀，執戒登齋，夷心默念，轉誦《太上洞玄靈寶自然九天生神玉章經》，計人各九遍。仰蒙覆蔭，幸已周圓。伏願靈韻琳琅，天音嘹唳，開迷途於九壘，鬱勃天光。登道岸於九霄，超凌地暗。北府落黑編之字，南宮移丹簡之名，萬炁朝元，五神返本。高步雲霞之境，碧落逍遙。永沾雨露之恩，綠羅遊宴。七玄證品，三族凝真，乾清坤夷，鼓仁風於壽域。陰靈陽耀，舒化日於春臺。稽首皈依，聞經讚詠。

三聞經

聞經已後，唯願亡靈，深入法門，歸依信受。  
聞經已後，唯願亡靈，萬罪並消，善芽增長。

聞經已後，唯願亡靈，永斷執迷，常歸正道。

智慧頌

智慧起本初，朗朗超十方。結空峙玄霄，諸天挹流芳。其妙難思議，虛感真實通。有有竟不有，無無無不無。

又

智慧常觀身，學道之所先。緲緲任玄肆，自然錄我神。天尊常擁護，魔王為保言。晃晃金剛體，超超太上前。

又

智慧生戒根，真道戒為主。三寶由是興，高仙所崇授。泛此不死舟，倏歛濟大有。當此說戒時，諸天皆稽首。

靈寶領教濟度金書卷之八十二

靈寶領教濟度金書卷之八

十三

洞微高士開光救苦真人甯全真授靈寶通玄弘教水南先生林靈真編

科儀立成品

生神齋用

謝恩醮儀

法事如式

各禮師存念如法

宣衛靈呪

五星列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金籙定籍，玉宇除殃。朱陵鍊質，飛神太蒼。三官九府，無極神鄉。普受開度，上生天堂。和。與道合真。

鳴法鼓二十四通

發爐

無上三天玄元太上老君，召出臣等身中

三五功曹，左右官使者，侍香玉童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意。以今陞壇設醮，願得靈寶自然生神妙炁下降，流入臣等身中，令臣所啓，速達徑御虛無大道九天元皇玉帝御前。

請稱法位

具位奉行謝恩清醮法事小兆臣某，與臨壇官衆等，謹同誠上啓太上無極大道虛無自然妙無上帝元始天尊，玉晨玄皇大道君，金闕後聖玄元老君，高上昊天玉皇上帝，三寶帝君，三寶丈人，九天採訪使應元普化天尊，鬱單無量生神天帝，上上禪善無量壽天帝，梵監須延天帝，寂然兜術天帝，波羅尼密不驕樂天帝，洞元化應聲天帝，靈化梵輔天帝，高虛清明天帝，無想無結無愛天帝，九天丈人真王元父道君，九天真母聖后元君，九天元皇帝真元君，九天丞相魄靈帝君，九天司命魂靈帝君，九天玉輔上宰，四協侍宸，列位真人，九天

尚父佐翊上輔遊奕大元帥，九天諸司真君，好生韓君丈人，度人不死尊神，迴骸起死尊神，九天列曹靈官，司命府五百靈官，玄中大法師，三天大法師，天地水三官大帝，靈寶經籍度三師真君，飛天神王，長生大聖，東嶽天齊仁聖帝，地府酆都大帝，水府扶桑大帝，城隍社令虛空鑒察，三界官屬一切真靈。臣聞真精混沌，太無密運於一元。

祖炁周流，妙有恢張於萬範。上列九陽而御極，下敷列壘以承天。日月星辰，凝陽精而垂象。山川草木，結陰濁以成形。仙真變化於雲層，神鬼淒迷於風澤。人稟冲和之粹，性爲品物之靈，參贊兩儀，權輿四象，函三並立，悉由紫極之綱維。得一分靈，盡奉玄都之政令。包羅形氣，囊括幽冥。凡切切於甄陶，必昭昭於影響。今齋主某，俯矜黑鬱，仰叩紫宸，伏望雲衢簇仗，星路鳴鞘，八景瓊輪，翼六龍而下邁。九華羽蓋，參朱鳳以前驅。萬帝臨軒，三靈夙駕。臣與醮官等，無任懇祈之至，謹稽首再拜奏請。

請聖

三界衆真，醮筵列聖，適伸拜請，諒沐光臨，請整肅於仙班，共祇迎於帝馭。

降九位

鸞輿至止，鶴駕臨軒，與醮衆真，如儀朝禮。朝禮既畢，清陞醮席，醮官上香，設拜初進酒。

初獻

重稱法位

具位臣某，謹重誠上啓三寶至尊，九天上帝，圓穹之聖真主宰，方域之靈仙神祇，內外醮筵，無鞅聖衆。臣聞三寶開圖，清微示金書之秘。五靈啓運，赤明敷玉字之光。凝妙化於無形，散神靈之有象。億天棋布，五劫輪周，大千橐籥於陰陽，吹萬權衡於生死。悉稟九霄之令，主宰昭然。密承中極之機，綱維煥若。微妙則騰儀璘之景，恢張則回英元之根。凡囿寰中，孰逃範外。今醮官某，幸逢道運，獲際真風，極扣地之丹衷，切籲天之素悃。重念亡故某人，塵塵雲擾，識識烟迷，五蘊山高，縱意馬心猿而馳騖。三元宮滓，任性龍

情虎以飛奔。愛河分定水之波，慾海鼓靈源之浪，暗幾微於藏六，虧純粹於存三。宿垢萬千，劫定悟水蓮之不染，惡根十八，界坐看火棗之終凋。悲莫保於天倪，痛倏臨於地禁。五行蕩失，孰歌返魂之章。九炁飄揚，誰啓生神之典。黑都鬼律，丹闕天條，東岱七十四司，雷霆有赫。北幽三十六壘，霜雪無私。非皈命於宸輝，曷升神於夜景。庸遵玉格，肅建瑤壇，列劍佩於千官，藹旌旄於九陛。蘭煙縹緲，上接陽光。蓮炬熒煌，下通幽暗。敷露再三之民欲，對揚咫尺之天顏。請芝檢於龍墀，霈楓恩於狴室。肅沐返生之惠，特頒起死之仁。葑菲不違，愧眇動天之功德，蘋蘩可薦，盍殫饗帝之小心。爰有青詞，謹當宣奏。

宣詞

詞文已露，淵鑒旁周。視聽自民，荷齋功之曲就。禍福由己，覬玄貺之潛孚。慶雲濛藹於虛無，湛露沾濡於寥廓。金雞飛舞，丹鳳徘徊，過有重輕，亶藉絲綸之汪濊。罪無大小，悉祈錄籍之

涵濡。十極同仁，千真錫類，仰玄黃而稽首，炳丹赤以敷心。臣與醮官等，不勝虔祝之至。

亞獻

具位奉行謝恩清醮法事小兆臣某等，謹同誠上啓三寶至尊，九天上帝，圓穹之聖真主宰，方域之靈仙神祇，內外醮筵無鞅聖衆。臣聞三洞開光，煥威儀於寶笈。九清御世，垂科範於瓊章。昭昭而慧日融怡，藹藹而慈雲覆蔭。幽關不夜，昧谷生春。仰帝闕臨下之恩，光沾廣野。罄民域由中之懇，心遡層雲。願矜九死之堪憐，俯賜三生之可喜。醮官某凝思幽壤。痛軫亡靈，誓殫激切之忱，庸罄皈依之悃。潔蓬居而事帝，寶壇三成。傾葵志以朝天，琅音九奏。舒鳳繒而效款，列龍璧以投誠。燒香散花，轉徑行道，繳龍光而下邁，祈精侵之上通。死魂飛浮步武，永離於北鬱。生根迴復精神，獲證於南丹。恩踰溟渤之深，德等泰嵩之重。有嚴有赫，以謝以祈。伏冀申錫天光，昭回帝鑒。敕三官九府，削身口意之業編。

宣五帝四司，落去來今之罪簡。涉無爲之道岸，超有漏之昏衢。麟馭雲驂，儼威儀而遊宴。鳳綃霧縠，端容止以逍遙。常居渺渺之鄉，永處蒼蒼之界。醮官某千祥天賦，五神神資，文獻芳猷，襲芝蘭而秀發。詩書世澤，配松竹以堅貞。簪紱連榮，簾櫳多暇，九玄七祖，升神永侍於蕭臺。三族六親，御景咸躋於壽域。臣等依光疏宸，綴武班墀，莫參入室之玄，徒抱面墻之恨。宣化幾成於畫虎，承流式冒於嬰鱗。玄律星羅，丹章日皎，亶藉十全之蔭，庶捐三梲之差。道族宗親，擁蕃釐而密被。古今師友，悟微妙以高躋，玄澤所覃，洪恩無斲。更願乾坤清晏，宇宙昭平。四炁朗清，慧孛不干於經緯。百昌茂育，飛潛自樂於高深。昭河洛之休符，彰車書之嘉運，八極謳歌於化日，九陰鼓舞於玄風，凡屬生生，均陶化化。臣與醮官等，不勝虔禱之至。

終獻

重稱法位

具位奉行謝恩清醮法事小兆臣某，與臨

壇官衆等，謹重誠上啓三寶至尊，九天上帝，圓穹之聖真主宰，方域之靈仙神祇，內外醮筵無缺聖衆。臣聞上帝好生，萬劫後更生之惠。下民惡死，九重垂度死之仁。勤拳奉上之恭，真切應天之實。德風磅礴，法雨濛茸，寒庭浩蕩以陽回，夜壑昭明而陰散，銘心語淺，刻骨情深。燈暗千枝，落銀潢於碧漢。香殘百和，沉玉籟於玄虛。願惟雜遝之紅塵，莫挽逶迤之彩仗。屬車八十一乘，隱隱雲衢。道炁百千萬重，輝輝霄景。諸天復位，衆聖迴駢，攀法從以無由，企靈光而如在。臣與醮官某，不勝攀戀之至，謹當奉送。

### 復爐

香官使者，左右龍虎君，侍香諸靈官，當令臣設醮之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香烟，傳臣向來所啓之誠，速達徑御虛無大道九天元皇玉帝御前。

### 回駟頌

回駟五雲輿，騰駕九章歌。倏忽升天遠，醮壇香氣多。玄恩覃宇宙，祿福遍山河。緬想神仙路，逍遙上大羅。

### 焚燎

靈寶領教濟度金書卷之八十三

## 靈寶領教濟度金書卷之八

### 十四

洞微高士開光救苦真人甯全真授  
靈寶通玄弘教水南先生林靈真編

### 科儀 立成品

青玄黃籙救苦齋用

### 青玄豎旛儀

步虛 洒淨

上香

具位臣某謹焚寶香，虔誠供養太上無極大道東極青玄老君，太乙救苦天尊，運明保元上帝，十方分身應化救苦天尊，大慈大悲救苦真人，大慈大悲大惠真人，十方十華真人，九司聖衆，三界應感一切真靈。伏以天綱地紀，鼓聖瑟以裁成。陰緯陽經，運神機而化育。圓蓋耀三華之彩，方輿澄六合之氛。日精曰炁曰神，既幡然開幽而下邁。惟玄惟元惟始，斯煥乎乘神而上征。遠離芬葩，徑躋寥廓。自業風而鼓動，

致昏霧以沈迷。鑿開七竅以蕩天和，狂瀾自倒。逞縱六淫而滋人僞，汎駕誰羈。茫茫陰暗之鄉，望望陽明之界。是以青玄教主，黃籙法王，體清微之慈悲，開黑單之惠澤。三塗五苦，經惟演於香林。六洞十宮，教遂彰於華座。號尊救苦，旛列遷神，俾離九幽之昏蒙，疾證一朝之快樂。今有齋主某，崇建青玄黃籙妙齋，開度某。恭依寶笈，肅建華旛。百尺朱竿，象飛龍之夭矯。千尋丹穀，等舞鳳之翩翻。上參碧落而光接妙嚴，下耀黃垓而影搖澤壘。晚風煙拂，曉日雲籠。即俾亡過某，感此彷徨，睹法橋而直上。從茲解悟，認華表以歸來。徑詣青華，獲超朱火。雲鏞振響，月磬朗揚，靈光混合於十華。梵炁彌敷於九軌。宜旌寶範，共快靈遊，清衆運心，至誠奉請。

太乙救苦天尊

志心奉請東方玉寶皇上天尊。惟願真光，下映混合，華旛隨風飛揚，直向東方風雷地獄。令諸罪人，自識宿命，悔過知新，乘此旛光，徑登長樂，大慈大

悲尋聲救苦來無上尊。

靈旛搖曳淡無光，回指風雷耀震方。幽夜春生游爽樂，超凌惠淨耀東方。

和：不可思議功德。

志心奉請南方玄真萬福天尊，惟願真光，下映混合，華旛隨風飛揚，直向南方火翳地獄。令諸罪人，自識宿命，悔過知新，乘此旛光，徑登長樂，大慈大悲尋聲救苦來無上尊。

靈光鬱勃映華旛，遙指南郊火翳寬。

倏忽乘晨端化境，萬塵風散永歡顏。

和：不可思議功德。

志心奉請西方太妙至極天尊，惟願真光，下映混合，華旛隨風飛揚，直向西方金剛地獄。令諸罪人，自識宿命，悔過知新，乘此旛光，徑登長樂，大慈大悲尋聲救苦來無上尊。

靈旛高掛太虛中，遙接晨輝炁鬱葱。

風指金剛開鐵壘，遊精接武睹金容。

和：不可思議功德。

志心奉請北方玄上玉晨天尊，惟願真光，下映混合，華旛隨風飛揚，直向北方溟泠地獄。令諸罪人，自識宿命，悔

過自新，乘此旛光，徑登長樂，大慈大悲尋聲救苦來無上尊。

玉晨妙炁貫旛雲，鼓舞天風遍八垠。下指溟泠提苦爽，真靈飛步映華津。

和：不可思議功德。

志心奉請東北方度仙上聖天尊，惟願真光，下映混合，華旛隨風飛揚，直向東北方鑊湯地獄。令諸罪人，自識宿命，悔過知新，乘此旛光，徑登長樂，大慈大悲尋聲救苦來無上尊。

天光旛影共徘徊，飛舞晴空日萬回。

鬼戶鑊湯都指破，快登長樂戲春臺。

和：不可思議功德。

志心奉請東南方好生度命天尊，惟願真光，下映混合，華旛隨風飛揚，直向東南方銅柱地獄。令諸罪人，自識宿命，悔過知新，乘此旛光，徑登長樂，大慈大悲尋聲救苦來無上尊。

好生真惠降慈輝，密映華旛指巽維。

威息寒庭銅柱折，碧霞妙域甚歡嬉。

和：不可思議功德。

志心奉請西南方太靈虛皇天尊，惟願真光，下映混合，華旛隨風飛揚，直向



西南方屠割地獄。令諸罪人，自識宿命，悔過知新，乘此幡光，徑登長樂，大慈大悲尋聲救苦來無上尊。

靈幡縹緲向坤維，影湛天光萬象輝。下照幽囚屠割息，登真御景侍宸畿。

和：不可思議功德。

志心奉請西北方無量太華天尊，惟願真光，下映混合，華幡隨風飛揚，直向西北方火車地獄。令諸罪人，自識宿命，悔過自新，乘此幡光，徑登長樂，大慈大悲尋聲救苦來無上尊。

光搖幡影舞雲霄，六合迴旋拂晚飈。澤潤火車甘露溢，神超妙道永逍遙。

和：不可思議功德。

志心奉請上方玉虛明皇天尊，惟願真光，下映混合，華幡隨風飛揚，直向上方普掠地獄。令諸罪人，自識宿命，悔過知新，乘此幡光，徑登長樂，大慈大悲尋聲救苦來無上尊。

幡緣風勢任低昂，上接明皇百寶光。苦爽提携寬普掠，紫霄妙域恣翱翔。

和：不可思議功德。

志心奉請下方真皇洞神天尊，惟願真

光，下映混合，華幡隨風飛揚，直向下方泥犁地獄。令諸罪人，自識宿命，悔過知新，乘此幡光，徑登長樂，大慈大悲尋聲救苦來無上尊。

華幡曲映接靈輝，下照黃庭鬱絕區。寂寂泥犁都解脫，水蓮聖境樂天畿。

和：不可思議功德。

幡隨風舞，若河漢之迴還。風逐幡飛，猶虹蜺之晻映。八荒普遍，萬目咸瞻。以天尊微妙之光，凌虛接引。開地禁冥濛之暗，乘景超騰。亘三際而故爽仙飛，溥十華而遊精御炁。均辭北朔，升觀東諸，靈幡開度，神呪宣揚。

天尊開度，三界十方。四生六道，咸到道場。生神遷魄，萬劫不忘。幡之爲體，隨風飛揚。風之所被，各從其方。泉曲之府，寒夜之鄉。地獄餓鬼，旁及無鞅。皆得解脫，上升天堂。

向來豎幡，功德悉已周圓。伏願真功廓落，惠日昭融。出重陰夜壑之區，班朝獅御。離泉曲寒庭之域，肆覲龍宸。天寶泉灌沐於形神，空青枝沾濡而步武。俾亡故某，永離苦趣，疾蹈樂邦，與

道合真，永不經於輪轉。隨劫受化，常克睹於光明。普龍仙人鬼以均歡，極動植飛潛而並樂。道思遐被，法界均沾。爲如上緣，志心稱念三清無上天尊，十方靈寶天尊，九幽拔罪天尊，太乙救苦天尊，不可思議功德。

向來

告符追攝儀

靜默堂序立

華夏至道前

上香長跪

具位臣某，誠惶誠恐，稽首頓首，再拜上言。臣聞青玄妙境，幹經緯之神機。黃籙靈曹，握死生之橐籥。法雨膏濡於三際，慈風鼓動於九幽。凡罄懇祈，必蒙感應。以今奉爲某，修建某齋。切慮亡故某，身縈業垢，心溷客塵，三豎揚威，痛形神之倏散。三彭肆志，驚魂魄以何之。六道支離，四生展轉，匪沛陽輝於東極，曷超陰爽於北單。臣等身代天工，心裨帝化，騰真丹谷，融離坎以神交。頤景玄風，朗乾坤而聖照。願降追魂之寶籙，遍頒攝魄之金符。煥

耀羅艷，開明泉曲。囊封露奏，已煥紫於玄曹。駟騎星馳，諒飛丹於黑鬱。茲伸召役，盍罄懇祈。欲望丙鑿初忱，申錫於惠。敕夜光召魂之吏，疾赴芝壇。命嚴攝追魂之曹，恪承藥簡。容臣運神會道，飛英召真，灌二景於玄窗，策七靈於幽域。即俾亡故某，超華幽暗，飛步靈光，潔己朝元，餐聽法音而快樂。乘晨御炁，遨翔道域以逍遙。遂微臣開度之忱，副齋主皈依之懇。臣無任激切，懇祈之至，謹再拜稽首以聞。

贊引至告符所

洒淨

上香

伏以蒼林御化，九垓鼓動於慈恩。青極垂文，三際裁成於睿澤。左右建黃籙之職，陰陽分玄局之曹。上統朱陵，下提黑鬱。極夜壑羈沈之爽，開寒庭流曳之魂。體道興仁，憲天博愛。凡昭昭而應感，必切切以皈依。今齋主某，提拯真魂，返還祖炁，煥金籙飛龍之令，已籲天關。頌玉章驛馬之文，期開

地戶。茲伸召役，諒赴懇祈。欲望月駟翩翩，承真光而來格。風輿泛泛，乘梵炁以俄臨。普集蘭場，恪歆菲薦，清衆運誠，虔恭奉請。

志心奉請青玄黃籙東華上命夜光召魂神司玉女判吏，走雲飛天紀地吏，引魂司太乙真光引魂玉女使者，童子符吏，捧香符吏，赤光三炁寶真化魂將軍、童子玉女神吏，尋魂司六道尋魂使者，追魂司追魂急速使者、靈官將吏功曹，懾魂飛雲使者靈官，將軍功曹，九天普度院三十六真人，三十六將軍，守雄抱雌八大神將，三界追魂使者，本靖主將副將，護道監壇，諸省府院司追魂將吏，州縣城隍司主者，當境土地，里域真官，司命六神。惟願雲車仙仗，俯降來臨，今日今時，召魂顯現。

初獻

伏以天地御陰陽，昭聖功之妙密。精神致魂魄，承靈景之輝華。雖繇定慧之圓，宣藉靈威之大，欽惟英武，實佐慈仁。劍佩陸離，控玉龍而動搖山嶽。旌麾赫奕，奔金馬而震蕩乾坤。翠蓋

風行，黃輿電掣，手提神敕，檢三界以咸尊。身負威章，檄萬神而拱聽。勳書朱府，職領玄曹，今齋主某，崇建寶齋，開度某。深慮世垢交周，客塵互染，幽關流蕩，冥心六道之循環。沉壘羈維，縱意四生之輪轉。魂茫茫而孰訴，魄杳杳而誰憐。匪籍提携，曷期超邁。願遵火令，乘天尊百寶之光。庸炳金鋒，廓地禁九幽之暗。疾開關而啓路，即毀鎖以張門。永離鬼官，有侍衛送迎之喜。各恭帝憲，無拘留逼合之憂。庶朝帝闕以翱翔，免墮神鄉之寥沈。潔蠲禴祭，鋪設芳筵。莫備物於豆籩，諒鑒忱於葵藿。某不勝激切之至。

亞獻

伏以開生塞死，迎道力於金華。返陰還陽，藉神功於碧落。既九司之真曹建設，宜八紘之洪澤宣揚。切慮上件亡魂，厭世以來，捨身之後，或在人天二路，或沉地水兩途，或三塗五苦之拘維，或六洞十宮之考對，或東嶽七十四司冤機未釋，或北酆八十一獄罪網高張，或善道惡道之周旋，或正生旁生之

展轉，或山林之奇迹，或里社之留形。悉憑明檢之威，庸罄疾提之力。六甲開道，五靈司隅，依女青抽魂之條，克時定令。遵太素命靈之律，復舊還形。返故魂於華旛，朝元神於玉陛。倘有遏截，當束送於雷霆。恪冀奮揚，庶昭宣於雨露。莫殫懇禱，庸冀鑒歆。

終獻

宣籙

宣符 宣牒

帝命有嚴，神聽毋忽。排空御炁，亟入地以升天。奔雲追風，即挾山而超海。普攝承流之曹局，根尋應度之魂靈。寶鐸纔聞，靈旛疾現，毋違壇律，自速天常，信誓諄諄，恪希應感，某不勝傾倒之至。

送聖

焚燎 向來

靈寶領教濟度金書卷之八十四

①儀：底本作「教」，據卷首目錄當爲「儀」。

## 靈寶領教濟度金書卷之八

### 十五

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

青玄黃籙救苦齋用

#### 分燈儀

靜默堂序立

贊引至道前

法師啓白

具位臣某，誠隍誠恐，稽首頓首再拜，奏啓東極青玄老君，太乙救苦天尊，運明保元上帝，仰冀睿慈，俯垂省覽。臣聞陽光煥奕，凝生炁於東華。陰景溟濛，結陰氛於黃壤。況六趣之迷雲昏昧，與三塗之密霧沉霾，匪賴天恩，曷開地禁。是以青玄救苦，黃籙垂慈，建上命夜光之司，昭明列壘。頒察命開光之吏，照灼重泉。俾承太乙之真輝，俯爍大千之妄垢。神功克著，妙用難量。

今有齋主某，敷列瑤壇，肅然寶炬。上明綠界，增經緯之熒煌。中映黃畿，添邇遐之璀璨。下通鬱絕，旁洞羅艷。俾寒庭無考對之聲，乘晨有賴。庶幽壑絕繫維之苦，離夜無拘。悉依百寶之光，永證三華之耀。巍巍功德，赫赫威權，清衆運誠，加持燈果。

太乙救苦天尊

晃耀晨輝，飛空八衣。清微之炁，玄瑩祥儀。華英翳鬱，洞章正旋。安鎮玉房，生發善津。四轉冥官，丹迎軸飛。苦道有復，一靈所歸。青華帝君，與臣俱隨。光明徹映，萬劫生輝。和：不可思議功德。

道生一以分三，開明三景。炁含三而爲九，照映九幽。蘭膏煥爛於金篝，蓮液瞳朦於寶鼎。翔烏擷兔，象日月之飛芒。躍虎舞龍，恍虹蜺之映彩。十華朗照，八極流明。見之者萬罪風清，證福鄉而晃朗。千冤冰釋，登道岸以優游。俾昏衢成不夜之天，而苦趣幻長春之景。臣等仰依惠力，密輅威光，願開法界之沈淪，悉煥生方之快樂，見

前清衆，請爲分輝。

流光法界天尊

道衆分點內外燈，周遍

向來請光分燈，功德周圓。伏願燈燈高映，景景通明，窮三際以光明，亘十方而朗徹。四生六道，均鼓舞於陽精。七趣三塗，悉逍遙於天粹。疾登覺地，均證惠源，爲如上緣，志心稱念光明常照天尊。和：不可思議功德。

向來頌

催召儀

步虛

洒淨

伏以乾炁坤形，生死總關於黑府。陽魂陰魄，升沈亶藉於青宮。皈心獅座之仁恩，稽首龍符之惠力。鷹揚三極，既速興聖武之巖巖。虎視九幽，宜嘉藉神威之赫赫。庶提地爽，即步天衢。以今奉爲某修建某齋，開度某。寶籙飛馳召役，以頌於仙佐。金章檢制追尋，諒速於冥途。茲也銀漢光浮，璇杓影轉，聲沈玉漏，廓夜炁之淒涼。彩耀金缸，膺霄輝之澄湛。蘭場顯設，芝饌森

羅，期檄召於靈儀，庸來臨於壇座。再伸懇悃，願副精誠，法衆運誠，志心召請。

志心奉請青玄黃籙召魂、引魂、追魂、尋魂靈官將吏，惟願雲車風馬，俯降來臨，今日今時，召魂顯現。

志心奉請，九天普度六六真人，六六將軍，雌雄八將，惟願。

志心奉請，本靖主將副將，監壇護道將軍，仙靈官將，惟願。

志心奉請，城隍社令，里域真官，司命六神，住居土地，惟願。並同前

三獻

散花

伏以真實法有爲法，下愚迷趨死之機。太乙光百寶光，上聖侈度生之澤。建玄曹之變理，承青符以昭宣。一炁飛靈，死炁九還於生炁。萬神拱命，陰神七返於陽神。極旋經幹緯之功，彰守雌抱雄之力。以今齋主某，望霓志切，需露心哀，開比鬱以提魂，飲承帝敕。赴東華而度命，允賴神威。諒廣運於靈通，爲布昭於威武。檢鬼營不得容

隱，敕神鄉無輒拘留。茲召集之屆期，盍追提之莅止。靈旛招颺，速靈識以期歸。寶鐸琳琅，迓遊精而影現。故伸布告，願賜懇祈。流金開道於水陸關津，擲火啓途於城隍社令。生方死府，下遙極於風輪。陽路陰途，上遐窮於雲蓋。速攝速至，疾現疾彰。既窮六道以搜羅，與廓五方而開闢。三魂七魄，追尋無散漫之虞。萬炁五形，拔領有生全之喜。即赴蘭場之會，密歆芝饌之珍。亶炁迴靈，蕩陰氛而顯應。全形入夢，接陽眷以通真。恪彰感應之私，不負皈依之切。玄壇文檄，謹用宣揚。

宣檄

壇檄具嚴，齋忱孔備。幽冥溪度，不勝激切之勤。將吏宣威，宜憫皈依之懇。疾追提於陰爽，庸顯現於陽靈。天律具嚴，罔敢拒遏，亟彰應感，不負勳勞，某不勝翹傾之至。

焚燎 向來

靈寶領教濟度金書卷之八十五

靈寶領教濟度金書卷之八

十六

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄齋用

引魂朝禮沐浴儀

贊引至道前

高功長跪

具位臣某，誠惶誠恐，稽首頓首，再拜上言。臣聞成清淨身，泥長辭於五濁。具圓明性，岸永度於三清。惟揚定水以潔蠲，可蕩業山而摧破。願陶聖澤，式慰愚衷。今有齋主某人，修建某齋，開度亡故某人。真光覆蔭，幸超黑壘之幽。妄垢交周，莫覲玄壇之邃。非假三華之蕩滌，曷陶八解以風澄。幸建蘭場，先陳菲悃。欲望玄恩密運，洪澤潛孚，二炁流芒，普彌綸而映彩。三晨散景，俱鬱勃以流精。旁飛九鳳之華，

上泱五龍之妙。庶得天光交換，地翳消澄。浴德澡身，盡滌無名之幻翳。揚清激濁，頓超有漏之昏塵。永宴霄衢。高登雲路，臣下情不勝激切之至。

天河灌沐天尊

引亡詣浴室前

竊以影湛瑤池，灌五香於玉女。光浮銀漢，凝三素於金童。天河澄東井之源，石景挹黃華之秀。惟茲蘭室，宜淪芝湯。伏願天河東井君，澣濯夫人，解穢童子，飛元運靈，招真攝景。五雲洒潤，融梵炁以回旋。七霧凝瀾，耀靈光而混合。化慈悲之法水，為清淨之玄漿。澄潔天儀，消除地翳，仰憑清衆，同為讚揚。

天河灌沐天尊

竊以蘭池澄湛，降九色之神輝。芝泉潔芳，流五香之妙炁。真靈環拱，仙聖遙臨，俟召檄於魂儀，即裝嚴於沐浴。仰惟大道，俯賜鑒知。

贊引至門前

當職執幡召魂

天尊降旨下瑤臺，童子傳言地獄開。

業海愛河皆息浪，鑊湯爐炭變寒灰。真符告下羅酆去，陰府迎將淨魄來。觀聽法音消罪戾，永離苦海出輪迴。

竊以青玄妙炁，窮三際以彌羅。太乙真光，普十華而洞照。甘露霑濡於碧落，慈雲流演於玄虛。慧力無邊，既煥毀鎖張門之令。威神有赫，諒嚴開關啓路之儀。宜邀請於真魂，來參朝於聖陛。今之夜伏為某人，崇建某齋，開度某人。請命天庭，召神地禁。龍章飛煥，疾敕制於冥曹。犴獄開明，已送迎於幽爽。茲也銅烏聲斷，玉兔光寒，珠星隱隱於疏林，瑤漢輝輝於遠岫。舞靈幡而搖曳，振金鐸以舒徐。幽域遐開，神儀密應，願復本來之正性，毋迷死去之邪源。急速現形，勿沈勿滯，攝召梵唱，謹為宣揚。

太陰冥冥黑波重，中有羅酆六天宮。萬鬼成群痛哀泣，悲惱毒烈大惡崇。無上洞音徹九夜，飄飄吹下慈悲風。吹向冤苦兆億魂，聞者奔赴寶壇中。

志心召請，亡故某人靈魂。惟願仰承  
三寶力，今夜今時，來附靈旛。和：受  
茲開度功德。

符命通溟漠，靈旛揚晚風。遷神超北  
府，飛鳥上南宮。

志心再請，亡故某人靈魂，惟願仰承  
三寶力，今夜今時，來附靈旛。和：受  
茲開度功德。

明梵飛玄景，開度長夜魂。遊爽赴期  
歸，炁炁返故根。

歌六天萬鬼之章，遊精莅止。吟一炁  
五行之韻，故爽歸來。陰風淅淅以遙  
吹，淡月茫茫而斜照。若微若顯，非有  
非無，可隨步於華旛，庸祥趨於寶座。  
然念有生展轉，無始循環。外而三生  
四負之冤仇，內而九族七玄之爽識，倘  
非歧寔，曷克超凌。盍和會於微臨，庶  
齊同於慈愛。共餐法味，均詣芳筵，再  
歌秘章，普行攝召。

三官北酆兮，明檢鬼營。不得容隱兮，  
金馬驛程。普告無窮兮，萬神咸聽。  
三界五帝兮，列言上清。急急如本章  
律令。

志心召請，亡故某人。身前身後，劫  
始劫終，宗祖姻親，仇讎執對，一切  
男女等衆，惟願仰承三寶力，今夜今  
時，來附華旛。和：受茲開度功德。

乘天尊微妙之光，離地禁溟濛之暗。  
新債故冤，均獲逍遙。近祖遠親，俱超  
自在。第陽靈之久隔，諒陰垢之交縈。  
非假沐浴以陶形，曷俾澄清而復質。  
守雄抱雌二大將，部衛亡故某，普及冤  
親，一切普承芝渥，各赴蘭場，清衆運  
誠，慈悲接引。

#### 寶旛接引天尊

#### 引亡詣浴室前

竊以長庚孕粹，光浮二炁之華。水母  
流精，彩映五明之秀。惟瑩玄澤而乘  
景，可拂靈曜以灌津。疏淪塵氛，潔陶  
陰翳。亡故某人，返魂北鬱，載魄東華，  
緬惟地暗之久縈，精神昏垢。匪賴天  
光之密灌，步武澄清。終難旅覲於螭  
坳，曷克親承於獅座。伏請沐浴仙吏，  
澣濯靈曹，招真致靈，承流宣化。風清  
妄垢，凝素曜之玄雲。日麗業塵，灌黃  
華之綠露。可還舊觀，庸淪神儀，請駐

蘭湯，安心沐浴。

#### 焚清塵符

陰景長夜，黑風飄零。業氛飛藹，翳濁  
神形。天光下注，黃華流明。東井沐  
浴，蘭池潔馨。五龍吐水，石景真精。  
體香炁妙，迴骸浴嬰。

澄淪容儀，昭佩潔清之惠。嚴新服御，  
更資華飾之功。服六銖而映三光，灌  
八芒而含二景。雲綃露縠，顯上界之  
神仙。霓裳羽衣，煥清都之冠帶。伏  
請巾笥真吏，金木靈曹，體道宣慈，運  
神合景。衣冠濟楚，飛陰景之昏塵。  
被服陸離，挹陽華之寶御。盍除舊飾，  
即麗新容，端肅神儀，潔新冠帶。

#### 焚化衣符

業塵客垢，積陰溟濛。混淪夜壑，衣冠  
弗充。今日沐浴，冠帶華躬。玉字飛  
化，綃縠圓通。陽華服御，濟楚形容。  
八芒含景，神觀端豐。

亡故某人，澄質浴池，華躬麗服，消萬塵  
而疏淪，端五體以虛明。向思冥路之  
淒涼，不堪回首。辛履陽關之快樂，第  
劇怡神。皆青華曲運於威靈，故黑鬱

昭承於慧力。龍章提攝，鳳詔超凌，宜堅真切之忱，恪致皈依之謝。三肅丹悃，再拜蒼墀。守雄抱雌二大將，部衛亡故某，前赴玄壇，志心朝禮。

寶幢接引天尊

引亡詣壇前

竊以九關虎豹，崇雋燦於蒼林。八陛龍鸞，拱離羅於玄座。仰叩巍巍之大梵，恪殫翼翼之小心。亡故某人，毓質陽華，澄神陰翳。開陰超暗，欣承鬱勃之靈光。戴德知元，敢昧羅敷之聖澤。宜東望而拜首，疾北面以傾心。月磬舒徐，雲鏞激響。肅躬望帝，首據三寶之恭。潔己趨朝，爰罄九華之敬。威儀告備，容止端嚴，法衆運誠，讚揚朝禮。

志心朝禮，

虛無自然元始天尊。

志心朝禮，

虛皇玉晨靈寶天尊。

志心朝禮，

至真混元道德天尊。

志心朝禮，

運明保元青玄天尊。

亡故某人，解脫幽關，遊翔陽域。心塵湛瑩，本來之面目圓成。身垢裝嚴，因有之精神具足。策天步而上朝金闕，辭地禁而中款瑤壇。萬劫遭逢，千生慶會。惟雲漿瓊液，流七真於騫香。而霞饌琅厨，抱五精之芝秀。可遂充腸之樂，庸資適口之華，饑渴不生，超凌可覲。守雄抱雌二大將，部衛亡魂，前詣几筵，從容受食。

靈寶領教濟度金書卷之八十六

## 靈寶領教濟度金書卷之八

### 十七

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

青玄齋用

#### 青玄破獄儀

贊引至道前

高功上香長跪

具位臣某，誠惶誠恐，稽首頓首，再拜上言。臣聞黃籙設官，敷玄雲於八極。青玄開府，流慧日於九幽。靈官煥而積夜流輝，神威耀而重泉御景。範圍所被，陶冶無遺。臣等玄籍登名，彤墀綴武。雲囊霞笈，大明帝渥之春融。鳳篆龍章，夙佩師恩之日煥。盍承符而宣德，期博愛以同仁。今有齋主某，崇建某齋，開度亡過某人，冤親平等，切慮十宮冥漠，六洞幽寥。鐵壘周遭，鎖昏昏之毒霧。銅關帀峻，騰赫赫之炎煙。

豈無悔過以求生，孰爲雪愆而超死。齋崇蒼極，已嚴登真度命之科。壇闡玄綱，盍煥毀鎖張門之令。匪敷忱於帝闕，曷嘯命於冥曹。拜手宸嚴，傾心淵穆，欲望矜憐苦爽，曲軫沈魂。命二府之仙曹，敕九司之符吏，頒九華靈杖，乘玉景以扣沈寥。昭五色神輝，映金剛而破幽翳。容臣隨符召役，如律宣行，敕破幽關，蕩開陰域。十華騰景，凝祖炁於虛無。百寶流明，駕威神於妙有。即使三途啓旦，六道乘晨，刀山劍樹而悉化騫林，炎沼冰池而盡爲蓮圃。普上帝慈悲之澤，慰下民激切之誠。臣不勝激切，俟命之至，所有表文，謹當宣奏。

宣表

表文載露，淵聽無私。今當請杖飛空，分光散彩。威靈恢廓，願參移景之玄。惠澤周流，庶溥開幽之妙。祈恩激切，俟命勤渠。更冀翠蹕空浮，蒼精下駐。密彰感應，俾宣破獄之儀。默佐行持，願溥提魂之化。某不勝激切之至。

太乙救苦天尊

引至獄前

洒淨 然燈

恭聞長樂宮中，有百億瑞光之座。妙嚴國內，開大千甘露之門。耀七寶於騫林，映九華於蓮御。芒飛劍戟，煥青玄之神輝。象映虹蜺，示紫金之妙相。威神廣大，慧力宏陳，寔爲三界之醫王，端作九幽之教主。仰願獅輿俯御，鸞駕旁參。九曲開幽，降炁中之祖炁。十華破暗，混身外之法身。普運慈悲，爲提苦爽。再炷寶香，供養青玄應化東方玉寶皇天尊，南方玄真萬福天尊，西方太妙至極天尊，北方玄上玉宸天尊，東北方度仙上聖天尊，東南方好生度命天尊，西南方太靈虛皇天尊，西北方無量太華天尊，上方玉虛明皇天尊，下方真皇洞神天尊，十方大慈大悲救苦真人，大惠真人，侍從神王，金剛力士，青玄官屬，一切真靈。伏望飛龍應感，駕駟來臨。隨杖指呼，極重關而開闢。持符嘯命，令鬼域以摧傾。均承光明，普提幽暗。重炷寶香，供養東方風雷地獄主者，南方火翳地獄主者，

西方金剛地獄主者，北方溟泠地獄主者，東南方銅柱地獄主者，西南方屠割地獄主者，西北方火車地獄主者，東方鑊湯地獄主者，中央普掠地獄主者，曹僚案掾，城隍社令，溟泠五道，一切冥司。伏冀憲天布德，體道興慈。部衛形魂，班都門而聽命。送迎爽魄，升法橋以登神。同駕陽龍，普提陰昧。伏以圓虛設象，方峙凝形。覆載分高厚之殊，陰陽別晦明之異。惟人爲貴，爲物最靈。證步武於善機，升陽明界。淪精神於惡趣，沉陰暗鄉。自愛刀伐鴻濛之根，與慾斧鑿混沌之竅。棄善弗履，謀生既背於陽天，惟惡是彰，趨死斯淪於陰地。鐵圍萬雉，銅網千尋，五苦三途，由五累三毒而化；六因十習，本六情十業而生。慘水火之推研，凜金木之考對。萬劫報盡，履惡道以驅馳。億載苦終，墮旁生而展轉。六洞環於都會，九州列於方隅。煨其妄緣，陶其真性，迴光悔悟，欣解脫之有期。抱暗癡迷，冀超凌之無日。是以香林演妙，騫木談玄。依依東極之慈



尊，戚戚北艷之苦爽。真常道玄，元道破獄，科明靈寶，光功德光，開幽惠浹，大矣慈悲之化，妙哉定慧之機。今齋主某人，奉爲亡故某，崇建某齋。乞於齋次，然燈破獄，廣度幽冥，冤親平等。照破獄壘，象陰景之泥犁。旛映燈壇，表陽華之飛混。今爲運神會道，招真命靈，召役仙曹，飛金符而日煥。敕制冥吏，宣玉訣以風行。普提縲繼之幽關，廣寬考掠於冥路。永脫昏暗，俾乘慧日以高躋。出離迷途，即躡法燈而上邁。宸光普被，獄暗宏開，徑登六度之舟，頓達五明之岸，某無任懇切之至。

#### 太乙救苦天尊

上清靈寶玄壇焚香，關召青玄黃籙主破獄入獄出冥司仙靈官吏，破獄真吏，破獄主吏，破獄飛吏，破獄驛吏，入獄赦罪靈官，飛龍騎吏，持符神吏。各請分形化景，來赴玄壇。持青玄破獄真符，乘太乙真光道炁，遍詣九幽諸大地獄，應久禁近囚無鞅數衆，已發覺未發覺，已結證未結證，已受報未受報一切罪魂，並與疾除罪簿，落滅惡根，不得

拘留，逼合鬼群，部衛形魂，度品南宮，一如黃籙破獄律令，風火無停。破獄真符，謹當告下。

#### 宣青玄破獄符 元君破獄符

#### 太乙救苦天尊 旋行至東方

九幽之東地號幽治，有青曜惡毒之門，獄曰風雷，司飛戈飄戟之憲。今有齋主某，然點九獄神燈，頒宣青玄真符，依科破獄，開度東方一切罪魂，冤親平等。伏願東方救苦玉寶皇上天尊，不捨慈悲，俯運威神，爲開震獄。千冤冰釋，等罪性於虛空。萬惡風清，生善心於法界。高步華林之境，遊神惠靜之庭。仗此善功，回度亡故某，上登碧落。仰憑清衆，同爲讚揚。

仰啓東方主，玉寶皇上尊，願臨風雷

獄，拔度九幽魂。和：往生神仙界。

#### 焚破東方獄符

寶芝獅御耀蒼垠，仁澤天隆萬物春。咸息風雷開震域，遊魂瞻望大慈尊。

#### 太乙救苦天尊 旋至南方

九幽之南地號幽陰，有赤曜巨羅之門，獄曰火翳，司烈炭炎煙之憲。今有齋

主某，然點九獄神燈，頒宣青玄真符，依科破獄，開度南方一切罪魂，冤親平等。伏願南方救苦玄真萬福天尊，不捨慈悲，俯運威神，爲開離獄。天光煥映，了真妄以交融。地暗開除，悟色空而寂照。高步梵天之境，遊神端化之庭。仗此善功，回度亡故某，上登碧落，仰憑清衆，同爲讚揚。

仰啓南方主，玄真萬神尊，願降火翳獄，拔度九幽魂。和：往生神仙界。

#### 焚破南方獄符

九華寶御下南丹，甘露涵濡火翳寒。赫奕神光來接引，超凌端化億齡歡。

#### 太乙救苦天尊 旋至西方

九幽之西地號幽夜，有日曜鋒刃之門，獄曰金剛，司金槌鐵仗之憲。今有齋主某，然點九獄神燈，頒宣青玄真符，依科破獄，開度西方一切罪魂，冤親平等。伏願西方救苦太妙至極天尊，不捨慈悲，俯運威神，爲開兌獄。風清陰翳，廓心鑑以舒明。月朗陽靈，耀意珠而映彩。高步金光之境，遊神利益之庭。仗此善功，回度亡故某，上登碧落。

仰憑清衆，同爲讚揚。

仰啓西方主，太妙至極尊，願臨金剛獄，拔度九幽魂。和：往生神仙界。

焚破西方獄符

真光鬱勃擁琅輿，恩浹寒庭駐紫虛。搖落金剛摧鐵雉，疾提苦爽上天衢。

太乙救苦天尊 旋至北方

九幽之北地號幽艷，有黑曜寒涼之門，獄曰溟泠，司積雹層冰之憲。今有齋主某，然點九獄神燈，頒宣青玄真符，依科破獄，開度北方一切罪魂，冤親平等。伏願北方救苦玄上玉宸天尊，不捨慈悲，俯運威神，爲開坎獄。塵塵雲散，悟妄業之本無。性性蟾明，覺真空之獨朗。高步真靈之境，遊神救度之庭。仗此善功，回度亡故某，上登碧落。仰憑清衆，同爲讚揚。

焚破北方獄符

騫林清蹕俯雲層，太乙真光破鐵城。倏忽溟泠回暖律，真靈福境任超凌。

太乙救苦天尊 旋至東北方

九幽東北地號幽都，有元羅陷塞之門，獄曰鑊湯，司沸湯滾浪之憲。今有齋主某，然點九獄神燈，頒宣青玄真符，依科破獄，開度東北方一切罪魂，冤親平等。伏願東北方救苦度仙上聖天尊，不捨慈悲，俯運威神，爲開艮獄。光涵定水，澄五濁之紛葩。日麗冰山，爍千愆之翳累。遊神東極，高步南丹。仗此善功，回度亡故某，上登碧落。仰憑清衆，同爲讚揚。

焚破東北方獄符

東浮羽葆紫金容，洞煥靈光湛碧空。威破鑊湯起死戶，高登長樂證玄功。

太乙救苦天尊 旋至東南方

九幽東南地號幽沼，有九醜毒業之門，獄曰銅柱，司手焦足爛之憲。今有齋主某，然點九獄神燈，頒宣青玄真符，依科破獄，開度東南方一切罪魂，冤親平等。伏願東南方救苦好生度命天尊，不捨慈悲，俯運威神，爲開巽獄。迷雲啓曙，湛一性以如如。慧日增華，廓五

明而朗朗。遊神極樂，高步清虛。仗此善功，回度亡故某，上登碧落。仰憑清衆，同爲讚揚。

仰啓東南主，好生度命尊，願臨銅柱獄，拔度九幽魂。和：往生神仙界。

焚破東南方獄符

芙蓉曲蓋舞重霄，天寶甘泉遍八遙。無極苦魂超上境，威摧銅柱闢幽寥。

太乙救苦天尊 旋至西南方

九幽西南地號幽關，有荼滅馘仰之門，獄曰屠割，司銅刃鐵戈之憲。今有齋主某，然點九獄神燈，頒宣青玄真符，依科破獄，開度西南方一切罪魂，冤親平等。伏願西南方救苦太靈虛皇天尊，不捨慈悲，俯運威神，爲開坤獄。滅煩惱暗，昭覺地以無塵。乘智慧光，返靈源而獨照。遊神玄域，高步仙階。仗此善功，回度亡故某，上登碧落。仰憑清衆，同爲讚揚。

焚西南方獄符

仰啓西南主，太靈虛皇尊，願臨屠割獄，拔度九幽魂。和：往生神仙界。祥煙高映赤圓光，一德空青聖澤滂。

下極坤維屠割息，耀真天上任翱翔。

### 太乙救苦天尊 旋至西北方

九幽西北地號幽府，有溟濛殫羅之門，獄曰火車，司火輪火輻之憲。今有齋主某，然點九獄神燈，頒宣青玄真符，依科破獄，開度西北方一切罪魂，冤親平等。伏願西北方救苦無量太華天尊，不捨慈悲，俯運威神，爲開乾獄。寂無所寂，破妄想於心雲。空即是空，悟真機於性月。遊神仙境，高步玄虛。仗此善功，回度亡故某，上登碧落。仰憑清衆，同爲讚揚。

仰啓西北主，無量太華尊，願臨火車獄，拔度九幽魂。和：往生神仙界。

### 焚破西北方獄符

玄虛鬱秀藹瓊轅，應化飛龍妙道天。威破火車甦罪性，惡根落滅罪無邊。

### 太乙救苦天尊 旋至中央

九幽之中地號幽獄，乃朔單鬱絕之境，獄曰普掠，司霜刃雪鋒之憲。今有齋主某，然點九獄神燈，頒宣青玄真符，依科破獄，開度中央一切罪魂，冤親平等。伏願中央尋聲救苦慈尊，不捨慈

悲，俯運威神，爲開幽獄。諸塵漏盡，耀赤水之玄珠。衆業垢空，浴丹山之白玉。高步水蓮之境，遊神淨土之鄉。仗此善功，回度亡故某，上登碧落。仰憑清衆，同爲讚揚。

仰啓中央主，尋聲救苦尊，願臨普掠獄，拔度九幽魂。和：往生神仙界。

### 焚破中央獄符

玉虛蓮座下搖輝，赫奕神光耀九圍。慧力開幽寬普掠，坐觀青草鞠圓扉。

### 太乙救苦天尊

向來破獄功德，並已周圓。伏願生門啓旦，流慶雲以徘徊。死戶含春，噴祥煙而蒙藹。炎沼變和風之沼，寒池成甘露之池。刀戟鋒摧，化琳琅之騫樹。劍戈刃落，聳煒燁之蓮花。法雨潤而鑊湯清涼，慈風扇而火輪溫潤。花臺花蓋，縹緲來迎，寶節寶幢，逶迤下接。冥佐陰掾，普躋龍尾之班。獄卒鬼官，盡脫牛頭之相。蕩泉曲爲浮黎之境，融泥犁於空歌之場。地緯天經，均逍遙於帝澤。陰潛陽耀，普依被於宸光。翠華迴東極之輶，丹陛邁南曹之馭。

諸天稱慶，列壘歡呼，法衆運誠，虔恭奉送。

### 迴輶頌

高功詣太乙前，納杖。

臣謹重誠，上啓東極青玄老君，太乙救苦天尊，十方大慈大悲救苦天尊，救苦真人，大惠真人，青玄官屬，一切真靈。竊以奉天符而開地禁，欣際昌辰。承陽光而廓陰關，幸敷聖澤。宣藉提携之造，敢忘皈謝之私。臣奉爲齋主某人，開度九幽，功德周圓，恩重乾坤。感深溟岱所有，元請破獄策仗。謹依玉訣，奏納御前，仰冀道慈，俯垂俞允。伏願圓扉啓耀，方澤流華，三途息流曳之悲，六趣免輪迴之苦。飛潛動植，均鼓舞於福庭。蠢動蛸翹，悉翱翔於壽域。凡厥陰爽，均證陽靈。爲如上因緣，志心稱念太乙救苦天尊。和：不可思議功德。

靈寶領教濟度金書卷之八十七

# 靈寶領教濟度金書卷之八十八

洞微高士開光救苦真人甯全真授  
靈寶通玄弘教水南先生林靈真編

## 科儀立成品

青玄齋用

### 上朱表儀

#### 燒香頌

各禮師存念如法

太玄啓真，萬靈勒羅。晨司逃澤，四童鳴牙。金仙秉鉞，天旅克戈。火厲揚風，水甲道波。沖落九天，洗滌玄河。虓獸毒蛇，鷹禽擊摩。山精伏滅，九象交和。馘斬千妖，齊戮艷華。金威鎮落，六天凋殂。三元告命，萬靈是呼。四明聞召，請錄帝圖。

#### 鳴法鼓二十四通

無上三天玄元始三炁太上虛無道君，召出臣等身中三五功曹，左右官使者，侍香金童，傳言玉女，五帝直符，直日

香官，各三十一人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意，其諸情愆，詳載狀文。以今陞壇，拜進丹悃，願得太上十方正真道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

#### 請稱法位

具位臣某，謹重誠上啓東極青玄老君，太乙救苦天尊，運明保元上帝，十方分身應化救苦天尊，大慈大悲救苦真人，大惠真人，十華境界裝嚴無極之國應號真人，東華溥救真人，九天普度院三十六真人，東華注生宮真人，玄中大法師，二天大法師，青玄黃籙九司真衆，三界應感一切真靈。臣聞七寶騫林，長樂耀青華之界。九光蓮座，妙嚴開蒼藹之區。慈雲凝妙於東諸，法雨飛玄於北朔。靈光洞朗，分一炁而上接清微。聖化昭宣，統萬神而中連紫極。十方遍滿，三際皈依。臣以宿蘊福基，幸生昌運。野馬風葩之混混，肯遂卑

棲。翔龍雲葉之玄玄，誓勤身佩。得一未符於經緯，存三徒仰於雌雄。宴坐參真，敢守空山而自足。經行翊教，惟瞻逝水以同流。庸提九地之幽，適沛三天之澤。今有某人崇建青玄妙齋，開度亡故某人。進拜救苦拔罪朱表，期微聖澤，俯軫愚魂。仰青林之彌羅，中凝瓊闕。拱赤天之鬱勃，上企瑤墀。鳳鸞戲八陛之深，虎豹嚴九關之衛。匪由神運，莫遂靈通。豁落九靈，耀金光於絳室。混合二炁，騰玉彩於玄宮。飛龍清碧漢之塵，驛馬策黃中之試。容臣螭坳綴武，獅宸承顏。枝灑空青，甘露遍濡於幽戶。室凝虛白，迴風密運於生門。遂微臣造請之勤，副齋主皈依之切。臣下情不勝激切之至。

#### 重鳴法鼓二十四通

#### 簡閱吏兵行事

謹出臣身中玉門紫戶三十九闕上真靈官，三部八景二十四真，五體真官，丹元真人，上清虛無自然左右領仙玉郎，飛仙玉虛侍郎，各二十四人出。五帝五色元皇，太真飛龍功曹，上元功曹，

飛行功曹，各二十四人出。玉虛飛仙使者，太仙使者，神仙使者，各二十四人出。玉虛金童玉女，飛行金童、玉女，八節直言、直事，各二十四人出。所治建節監功大將軍，前部效功，後部效殺，驛庭令，驛庭丞，四部監功謁者，上仙上靈二官直使，正一功曹，左右官使者，陰陽神決吏，科車赤符吏，剛風騎置吏，驛馬上章吏，飛龍騎吏，各二人出。出者嚴裝顯服，冠帶垂纓，整其威儀。領仙玉郎冠飛玄玉冠，衣九色龍文虎衣，執命魔靈幡，立左。玉虛侍郎冠元晨玉冠，衣五色飛仙羽衣，執九色靈幡，立右。飛龍功曹冠九德通天之冠，衣九色鳳衣，腰帶虎書，執召神之符，在上。飛仙功曹冠九德通天之冠，衣五色羽衣，腰帶金鈴，執攝煞之律，在下。飛仙使者冠飛天玉冠，衣五色斑文之衣，手執金符建節，在前。神仙使者冠朱陽玉冠，衣九光飛仙之衣，手執玉版持幢，在後。玄黃太真功曹使者冠帶羽，服金真鳳章豁落七元，執玉案，對立臣前。正一功曹弁朱陽之

幘，冠通天之冠，衣皂緣單衣，腰帶虎符，齎持玉版建節，持幢，立臣前後。狼吏虎賁，察奸勾騎，都官僕射，天騶甲卒，天丁力士，治正執政吏，收神食神吏，收鬼食鬼吏，收炁食炁吏，收毒食毒吏，收邪食邪吏，收精食精吏，本靖侍靖仙官，金童玉女，仙靈官吏，一時嚴裝，羅列鹵簿，屯駐圍繞。受臣詞語，分別關啓玄壇土地，四面真官，三五功曹，左右官使者，侍香金童，傳言玉女，五帝直符，直日香官，左右龍虎君，侍衛靈官，四直玉文功曹，傳言奏事飛龍驛吏，在時用事應感靈官。爲臣同誠上啓東極青玄老君，太乙救苦天尊，運明保元上帝。臣一介愚蒙，千生欣幸，希夷師授，玄妙天開，贊化育以澤群靈，體生成而周三極，凡有投告，敢不關聞。今有某人，伏爲亡故某人，進拜通天拔亡朱表，謹遵祕法，依科操進，伏願功曹使者，受事仙靈，洞鑒翹勤，對臣料理，務契玄格，上詣金門，龍刀瑤環，金魚玉鴈，舒鎮洞案，請省表文。

宣表 封表

遣表

謹遣臣身中三十九真，三部八景，五體真官，小吏書佐，功曹使者，神吏衆官，顯服嚴裝，整其威儀，爲臣護持，表文一通，操詣三天，分別進對。若有謬誤，尋文註改，勿令上官典者，有所譴却。速達徑御東極青玄老君太乙救苦天尊、運明保元上帝玉陛下。慎勿稽停。當令所請者下，所濟者度。若有下官故炁，於道路雲霧中斷截臣表文，使不得上達者，錄付天一北獄，依玄都鬼律治罪，以明天憲。臣伏在案左，須待玄恩報應。

焚詞頌

操伏

重稱法位

具位臣某，謹重誠上啓東極青玄老君，太乙救苦天尊，運明保元上帝，十方分身應化救苦天尊，大慈大悲救苦真人，大惠真人，十華境界裝嚴無極之國應號真人，東華溥救真人，九天普度院三十六真人，東華注生宮真人，玄中大法師，三天大法師，青玄黃籙九司真衆，

三界應感一切真靈。臣聞絜集幽微，下教開光於皇極。道垓空洞，上乘飛步於丹元。極十華粹穆之尊，肅萬真環拱之御。威神應念，仰劍戟之流芒。慧力尋聲，瞻虹蜺之映象。期露方寸天而几奏，盍借盈尺地以階升。臣以班列玄圖，名登碧簡。霄衢寥廓，若從目遡以凌兢。藥闕森嚴，獲遂意行而妙密。曲蒙善應，普賜慈觀。玉音琅琅，敷鳳綉而煥耀。瓊顏濯濯，俯龍御以旁周。九幽無夜哭之聲，三極有陽翹之樂。詢蕘感極，結草誠殫。更願三極昭明，百昌茂育，皇風遠暢，帝化遐敷。舒白玉毫相於玄峰，無所不度。覲紫金瑞光於丹谷，有感皆通。

納官

臣上表事竟，向來所出身中玉門紫戶仙真靈官，並從衆妙門而入，在左還左，在右還右，九真備守，五老保關，重扉幽密，玉室彌綸，功曹檢押，毋令差互，後召復到，一如故事。

舉願

一願乾坤明素。二願氣象清玄。三願

聖君萬壽。四願化洽八埏。五願天垂甘露。六願地發祥煙。七願四時應節。八願萬物生全。九願家多孝悌。十願國富才賢。十一願齋功廣被。十二願善瑞日臻。

復爐

香官使者，左右龍虎君，侍香諸靈官，當令臣上表之所，自然生金液丹碧芝英，百靈衆真交會，在此洞案爐前。令臣體耀金輝，斬伐胞根，七玄拔擢，百關備仙，解除死籍，宴坐泥丸，東華紀字，策景虛玄，十方仙童玉女，接待香煙，傳臣向來所啓之誠，速達徑御。太上無極大道昊天至尊玉皇上帝、東極青玄老君御前。

出堂頌

回靜默堂

靈寶領教濟度金書卷之八十八

靈寶領教濟度金書卷之八十九

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄齋用

宿啓儀

燒香頌

各禮師存念如法

衛靈呪

東方

九炁青天，明星大神。煥照東鄉，洞映九門。轉燭陽光，掃穢除氛。開光童子，號曰玄卿。備衛我軒，上對帝君。收魔束祿，討捕兇羣。奉承正道，赤書玉文。九天符命，攝龍驛傳。普天安鎮，我得飛仙。和：與道合真。

南方

三炁丹天，煥景流光。熒星轉燭，洞照太陽。上有赤精，合契虛皇。開明童

子，號曰華芳。總御火兵，備守玉堂。斬邪束祿，剪截魔王。北帝所承，風火衝當。流鈴交煥，翊衛壇場。正炁流行，敢有猖狂。我享上功，坐運魁罡。億劫長存，保天無疆。和：與道合真。

#### 西方

七炁素天，太白流精。光耀金門，洞朗太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛升紫庭。靈寶符命，普衛萬生。元皇正炁，來合我身。功加一切，天地咸寧。和：與道合真。

#### 北方

五炁玄天，元始徘徊。辰星轉燭，洞煥太微。黑靈尊神，號曰層威。統冠飛天，仙裾羽衣。備守五門，檢精捕非。敢有干試，豁落斬摧。玉符所告，神鎮八威。邪門閉塞，正道流輝。三光映照，我身無衰。策空駕浮，舉形仙飛。和：與道合真。

#### 中央

黃炁中央，調理乾坤。陶鎔陰陽，總統

玄真。鎮星吐輝，流耀九星。開明童子，號曰天璘。陽炁燄上，朱煥炎精。洞照內外，運我身形。百邪摧落，攝役鬼靈。中山神呪，普天使聞。五靈安鎮，身飛上清。和：與道合真。

#### 鳴法鼓二十四通

無上三天玄元始三炁太上虛無道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今宿啓告齋，願得東極青玄妙炁、百寶光明下降，流入臣等身中。即使玄壇清淨，內外成真，天无氛穢，地絕祿塵，琳琅振響，十方肅清，萬魔不干，真誠上徹。令臣所啓。速達徑御東極青玄老君、太乙救苦天尊、運明保元上帝御前。

#### 請稱法位

具位奉行青玄黃籙妙齋法事臣某，與臨壇官衆等。今故燒香，願以是功德，上爲七世父母，下及臣身，天子王侯，土

地官長，臣等三師四友，系代學真，谷隱巖棲，門徒祭酒，九親姻族，天下人民，蠕動蜎飛，跂行喘息，無邊無極，法界衆生，皈身皈神皈命，十方救苦無上慈尊。乞原赦前生今世，生死宿罪重過，得免離三途五道，十苦八難九厄之中。臣身得道真，飛行虛空，白日昇天，侍衛慈尊，逍遙無上東極長樂之宮，永與道合。所啓玄感應聲，上御至真無極大道御前。

人各恭敬

禮方

志心皈命，禮

東方救苦玉寶皇上天尊。

志心皈命，禮

南方救苦玄真萬福天尊。

志心皈命，禮

西方救苦太妙至極天尊。

志心皈命，禮

北方救苦玄上玉晨天尊。

志心皈命，禮

東北方救苦度仙上聖天尊。

志心皈命，禮

東南方救苦好生度命天尊。

志心皈命，禮

西南方救苦太靈虛皇天尊。

志心皈命，禮

西北方救苦無量太華天尊。

志心皈命，禮

上方救苦玉虛明皇天尊。

志心皈命，禮

下方救苦真皇洞神天尊。

禮足，各長跪，虔誠懺悔。

臣法衆等，志心皈身皈神皈命，十方救苦無上慈尊。以今宿啓告齋，焚香禮懺。臣聞青玄妙炁，貫經緯以彌羅。黃籙靈文，並儀璘而煥耀。將近螭坳之邃，宏敷鸞笈之玄。微福東華，覃恩北朔。猶慮臣等志輪象罔，識染芬葩。精炁神混合之真，業山未破。身心口流吹之妄，定水俄波。徒窺太赤之金章，或冒女青之玉律。希回聖鑒，曲宥愚衷。瞻瑞相於青林，龍符宣德。化真身於黑鬱，鳳詔同仁。臣等至心稽首，禮謝無上至真三寶。

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法

解真人，十華真人，普救真人，玄中大法師，三天大法師，三界應感一切真人。臣等社櫟散材，并梧弱質。親承道紀，慨入室之悠悠。快睹玄樞，斯面墻而鬱鬱。莫撫煙霞於駒谷，徒玩日月於鷄窗。教出始青，惟抱宣符之切。科尊太素，懼貽布憲之嚴。倘非誓地以立功，曷克承天而補過。凡有投告，合爲關聞，今有青詞，謹當宣奏。

宣詞

按如詞旨，備極忱恂。臣等淬勵丹衷，磨礪素悃，遵紫陽玉匱之秘，依蒼極金籙之玄，門列十華，壇周四界。法天象地，三乘羅駕鸞之班。呼陰召陽，九奏降龍鸞之御。藹霏煙於蘭鼎，騰彩霧於芝籥。旌葆翩翩，旛花搖曳，目今月某日爲始，爲齋主某，建立青玄救苦妙齋。爲亡故某，滌除冤對，洗拔愆尤。掃蕩幽寥，絕苦聲於地獄。超凌眇莽，享大福於天堂。永依翠菡之光，常預朱鸞之會。普提萬類，均挹三華，融慧日於九圍，扇光風於八表。謹依玄法，宿啓以聞。恩惟三寶道師，九幽教主，



垂慈鑒映，省覽所陳。敕勒三洞仙靈，三寶官屬，青玄僚佐，黃籙班聯，監齋侍經，衛壇護道，社令土地，應感靈祇，協力同心，掃妖氛於內外。通誠達信，契影響於天人。令臣等百體清明，三關調泰，凝真端息，融妙炁於丹廬。會道運神，挹靈光於玄座。羅敷洪澤，提拯黑都，庶齋福以周圓，俾法輪而興轉。明晨行道，績更啓聞。

十願

復爐

出堂頌

靈寶領教濟度金書卷之八十九

### 靈寶領教濟度金書卷之九十

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

青玄齋用

#### 散壇儀

燒香頌

各禮師存念如法

衛靈咒

五靈列位，煥鎮五方。始星護魂，丹老衛形。皓靈侍魄，黑帝攝生。中央黃帝，統御萬真。元皇告下，幽夜開光。罪消北府，名列南昌。金籙定籍，玉宇除殃。朱陵煉質，飛神太蒼。三官九府，無極神鄉。普受開度，上生天堂。和：與道合真。

鳴法鼓二十四通

無上三天玄元始三炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今散壇燒香，願得東極青玄妙炁、百寶光明下降，流入臣等身中。令臣所啓之誠，速達徑御東極青玄老君，太乙救苦天尊，運明保元上帝御前。

請稱法位

具位奉行青玄黃籙妙齋法事臣某，與臨壇官衆等，今故燒香，願以是功德，上爲七世父母，下及臣身，天子王侯，土地官長，臣等三師四友，系代學真，谷隱巖棲，門徒祭酒，九親姻族，天下人民，蠕動蜎飛，跂行喘息，無邊無極，法界衆生，皈身皈神皈命，十方救苦無上慈尊。乞原赦前生今世，生死宿罪重過，得免離三途五道，十苦八難九厄之中。臣等身得道真，飛行虛空，白日昇天，侍衛慈尊，逍遙無上東極長樂之宮，永與道合，所啓玄感應聲，上御至真無極大道御前。

人各恭敬

禮方同前

禮足長跪虔誠懺悔

臣法衆等，皈身皈神皈命，十方救苦無上慈尊。以今散壇言功，焚香禮懺。臣聞希夷凝妙，騰玉耀於三靈。混沌生神，振金聲於十極。肅啓瑤函之秘，惠微琅極之慈。幸罄朝儀，載殫野悃。猶慮臣等受中資淺，語上材疏。混景金葩，霜燦四司之白簡。依光玉笋，星羅三籙之玄章。或枝垢之未澄，或根塵之猶染。希宣鳳渥，曲宥龍章。凝殊黍於玄丹，誓宏真業。迎翠騫於碧落，永侍神猷。臣等志心稽首，禮謝無上至真三寶。

三啓 三禮

重稱法位

具位臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大法師，三天大法師，三界應感一切真

靈。臣等葛狗已陳，木鷄未粹。七經八緯，未明丹谷之神嬰。九室三宮，猶昧玄關之天老。尚棲懷於塵棘，莫遁影於煙林。師匠風斤，幾勤提耳，化工月籥，徒切丹心。期宏濟下之恩，式補由中之過。凡有投告，敢不關聞，齋主青詞，謹當宣奏。

宣詞

按如詞旨，備殫激切。臣等肅將劍履，恭集簪紳，敷月陞於蓬房，象雲衢於芝圃。階陞稽顙，開十華懺謝之門。几奏擎拳，降三極宥覃之澤。今月某日爲始，爲某人崇建青玄救苦妙齋幾晝夜，開度亡故某人。解脫罪苦，去離冤仇。超步武於陰都，煉真高上。證儀容於陽界，登品東華。曲荷帝恩，俯從民欲。齋功告備，無魔試之騰驤。釐事慶成，有玄恩之密被。天人欽幸，賓主交歡。雲斂蒼林，覺鳴鞘之漸杳。風清碧漢，諒警蹕之將迴。六龍騰躍於雲衢，萬騎戒嚴於輦路，真靈復位，仙聖還班。其有建醮之初，仰賴上清三洞班僚，三寶官屬，青玄將佐，黃籙司

存，護道衛真，城隍土地，內外翊衛，具有勳勞，合拜表以言功，爲超班而遷賞。臣等承顏玉陛，綴武瑤班。奏對匪彝，慮觸四司之白簡。承宣越憲，恐貽五帝之玄章。亶覲慈容，恪垂覆蔭，庶藉三天之庇，永疏九地之恩。言功表文，循儀陳控，仰希省覽，俯賜允俞。臣誠惶誠恐，稽首頓首再拜，謹啓以聞。

宣表 遣表

操伏 納官

十願

一願大道流行，普天懷德。二願一切有生，咸皆悟道。三願九夜悲魂，一時解脫。四願孤魂無依，咸得受生。五願天下太平，五穀豐熟。六願臣忠子孝，君仁父慈。七願四海會同，冤親和釋。八願潛胞處卵，咸得生成。九願積疾新痾，旋即痊愈。十願孤露衆生，豐衣足食。

復爐

香官使者，左右龍虎君，侍香諸靈官，當令臣散壇之所，自然生金液丹碧芝英，百靈衆真交會，在此香火爐前。令

臣學道得道，求仙得仙，齋主受福，幽顯霑恩，十方仙童玉女，侍衛香煙，臣向來所啓之誠，速達徑御東極青玄老君，太乙救苦天尊，運明保元上帝御前。

出堂頌

靈寶領教濟度金書卷之九十

靈寶領教濟度金書卷之九

十一

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄齋用

早朝儀

燒香頌

各禮師存念如法

衛靈咒

青陽虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，王道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上道君，太上老君，召出臣等身中三五功曹，左右官使者，侍香金童，傳言散花玉女，五帝

直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今早朝，陞壇行道，願得東極青玄妙炁百寶光明下降，流入臣等身中。令臣所啓之誠，速達徑御東極青玄老君，太乙救苦天尊，運明保元上帝御前。

請稱法位

具位奉行青玄黃籙妙齋法事小兆臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大法師，三天大法師，三界應感一切真人。臣聞赤明開圖，敷八圓於祖炁。青玄御運，宏十極之真光。威神凝妙於紫金，慧力敷華於翠玉。香林駐景，琅音尊應念之慈。騫樹騰輝，瓊號表尋聲之惠。二府雲聯而宣德，九司星列以推仁。赫赫靈

功，巍巍聖化。臣等福由宿慶，運際昌期。佩妙戒於身前，希夷師錫。繫鸞圖於肘後，微妙天開。莫高蹈於鵬搏，乃卑棲於駒逐。學真補過，退堅勵己之誠。宏道立功，進勉度人之力。丹有投告，敢不上聞，齋意青詞，謹當敷奏。

宣詞

按如詞言，備殫激切。臣聞九華鬱秀，彰玉宇於玄虛。三洞澄輝，敷金書於黃混。分天章而抉雲漢，開地禁以御風煙。惟清微應化之身，無刹不現。而赤圓流光之景，有象皆輝。爲萬類之津梁，實九幽之柱石。今齋主某，情鍾天屬，義重人倫。念奄忽一朝，神炁分離於地大。而淒涼九夜，音容迴隔於天長。羅艷嚴水火之曹，泉曲凜陰陽之局。毛髮爲豎，肝膽俱摧。孰操智慧之舟，俾登道岸。庶藉慈悲之燭，獲出昏衢。虔潔己以輸誠，爲齋心而瀝悃。投誠東極，願開甘露之門。流惠北單，均化祥煙之戶。俯提幽暗，仰接陽光。風旗露葆以葳蕤，齊臨獅座。

月磬雲笙而縹緲，旁拱龍庭。瞻咫尺之威顏，露萬千之德悃。恩霑幽顯，澤被人天。

以今清旦，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太乙救苦天尊。願以是功德，上祝社稷尊靈，宗祧先聖。伏願凝神空碧，高步始青，擁環佩以朝元，慶延聖祚。被藻旒而問道，祥衍神旂。皇帝鳳曆承休，龍符襲慶。桑麻雨足，敦禮樂於周疆。榆柳春閑，闢詩書於燕塞。今故燒香，自皈依師尊大聖衆，至真之德，得道之後，昇入無形。和：與道合真。

以今清旦，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太乙救苦天尊。願以是功德，皈流齋主某九玄七祖，億劫種親。伏願朱陵度命，黑鬱升神。毒根惡根生死根，風澄定水。業障報障煩惱障，日燦冰山。亡故某迅策鸞驂，肆朝龍

御，千冤解悟，登名小有之庭。萬罪蕩除，超步大乘之徑。今故燒香，自皈依師尊大聖衆，至真之德，得道之後，時刻昇遷。和：與道合真。

以今清旦，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太乙救苦天尊。願以是功德，皈流齋主某。伏願德風披拂，道日舒明，萃和氣於門闌，天花煥映。襲歡聲於階砌，地累清夷。臣等五族六親，三師四友，見在保金花之粹，玄谷凝神。已往混玉藥之英，瑤臺御炁。今故燒香，自皈依師尊大聖衆，至真之德，得道之後，長享自然。和：與道合真。

禮方

宣懺

步虛

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。鬱鬱家國盛，濟濟經道興。天人同其願，縹緲入大乘。因心立福田，靡靡法

輪昇。七祖生天堂，我身白日騰。  
大道洞玄虛，有念無不契。煉質入仙  
真，遂成金剛體。超度三界難，地獄五  
苦解。悉歸太上經，靜念稽首禮。

### 三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

### 重稱法位

具位臣某，與臨壇官衆等，謹同誠上啓  
青玄祖炁虛無自然元始天尊，無極大  
道太上道君，太上老君，東極青玄老  
君，運明保元上帝，太乙救苦天尊，十  
方分身應化救苦天尊，大慈大悲救苦  
真人，大慈大悲大惠真人，香林會中法  
解真人，十華真人，普救真人，玄中大  
法師，三天大法師，三界應感一切真  
靈。臣聞道尊太乙，端神化於十方。教  
衍大千，流玄恩於鬱絕。凝虛無之玉  
相，承元始之金光。百寶流明，開晨輝

於夜壑。九微回耀，啓朝景於寒庭。  
庶提艷澤之幽寥，均步雲霄之渺莽。  
今齋主某，仰慮亡故某，業基億劫，冤對  
萬生。昧性玉於塵囂，百關雲擾。混  
心珠於昏垢，七竅煙迷。委瓦礫以汨  
靈臺，縱斧斤而伐覺地。牛奔罔牧，名  
已掛於玄曹。馬逸弗羈，字倏鑄於黑  
簡。九幽考對，六洞推研。鐵壘千尋，  
孰導求生之路。銅門萬雉，誰開救死  
之門。自非流霈於靈光，曷俾超凌於  
幽壤。爰遵藥笈，肅建芝壇。罪滅十  
華，盡肘步膝行之敬。恩依三寶，罄心  
剝膽瀝之恭。大德昭回，洪恩浩蕩，敕  
破獄出冥之仙吏，宣開光察命之靈曹。  
雷動十宮，提形魂而部衛。風行九壘，  
攝爽魄以送迎。永辭金剛之幽輪，飛  
覲玉虛之道境。聞經聽法，朝獅座以  
依光。度命登真，步龍墀而御景。盡  
洗冤愆之累，頓清考注之塵，澤被家  
庭，慶延嗣胤。殫蟻忱於萬一，徼鴻福  
於億千。蒙鑒丹衷，永昭玄貺。上願  
乾樞澄湛，坤軸清凝，日月輝華，山林  
靜謐。三烽息警，貔貅樂意堯疆。五

穀告成，鴻鴈棲身於舜畝。夜壑遂仙  
飛之樂，寒庭無考對之憂。動植飛潛，  
俱承惠澤。龍仙人鬼，悉被慈雲。則  
上明天尊大慈之化，下副齋主皈命之  
誠，謹啓以聞。

### 十念

一念爲道，四大合德，齋主七世父母，  
免墮憂苦，上昇天堂，衣食自然。  
二念帝王國主，道化興隆，庠序濟濟，  
皇教恢宏，威儀翼翼，普天所瞻，民  
稱太平，四夷賓伏，妖惡自滅，聖賢  
自生。  
三念法師功德大建，教化明達，俱獲飛  
仙。  
四念同志學人，早得仙道，更相開度。  
五念九親和睦，好尚仁義，貴道賤財，  
行爲物範。  
六念損己布施，道士及飢寒者，天下人  
民，各得其所。  
七念蠕動跂行，一切衆生，咸蒙成就。  
八念赦貫前生今世罪對，立功補過。  
九念家門隆盛，宗廟有人，世生賢才。  
十念尊受師經，不敢中怠，平等一心廣

度，克獲上仙，白日登天，拜見太上，永成真入，雲車羽駕。和：與道合真。

存神燒香

香官使者，左右龍虎君，侍香諸靈官，當令臣早朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯霑恩，十方仙童玉女，侍衛香煙，傳臣向來所啓之誠，速達徑御東極青玄老君、太乙救苦天尊、運明保元上帝御前。

出堂頌

回師

靈寶領教濟度金書卷之九十一

靈寶領教濟度金書卷之九

十二

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄齋用

午朝儀

燒香頌

各禮師存念如法

衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，羣魔滅蹤。辟奸破袄，明耀元功。金符召制，躡雲策龍。謠歌慶會，散花太空。神化明運，四極安隆。伏御帝前，罔有不恭。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣奉爲齋意。以今午朝，陞壇行道，願得東極青玄妙炁百寶光明下降，流入臣等身中。令臣所啓之誠，速達徑御東極青玄老君，太乙救苦天尊，運明保元上帝御前。

請稱法位

具位奉行青玄黃籙妙齋法事臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大法師，三天大法師，三界應感一切真靈。臣聞萬真環拱，凝聖日於妙嚴。三極皈依，扇仁風於長樂。慧光映虹霓之象，威芒射劍戟之容。名耀垂慈，開地禁而招地魄。號尊救苦，將天炁以制天魂。一切之罪厄冰消，十方之威神風動。巍巍玄運，赫赫巖瞻。臣等身佩瑤圖，心繫瓊

檢。煙霞獨嘯，含凝二炁以鶯遷。日月同流，乃混萬塵而蚊負。切切惜分之志，依依進寸之心。踏過履非，幸道丹青之威令。承符宣德，誓彰金石之真忱。凡有皈投，理宜關告，況奉詞旨，敢不上聞。

### 宣詞

按如詞旨，備切精誠。臣聞形別圓方，宅陰陽於高厚。炁分清濁，定顯晦於升沈。圓清爲仙聖之都，方濁乃鬼神之府。北巖鬱絕，中聳羅鄴。昏霧濛濛，鎖羈魂於積夜。迷雲藹藹，禁幽爽於重泉。巨萬劫以以酸辛，歷千年而苦惱。今齋主某，痛思陰識，莫返陽靈。三十六壘之沈寥，孰伸援手。八十一天之渺莽，曷克超神。況二景之梭飛，慮三途之輪轉。匪由帝力，曷拯民衷。爰皈命於東儲，冀流恩於北鬱。瑤臺雲斂，羅黃籙之真階。琅闕天開，拱青玄之寶御。禁路簇龍華之仗，霄衢傳鳳蹕之音。碧霧彌羅，奏鈞天於芝陛。翠霞縹緲，飛寶篆於蘭篝。駕行穆穆以朝班，蟻佃勤勤而奏對。願敷陽綍，

爲闢陰塵。俾萬類以霑恩，使十華而均慶。以今臨午，陞壇行道，請法衆等，運茲初捻上香。願此香煙騰空徑上，供養无上至真道寶。臣等皈身皈神皈命，首體投地，仰依太乙救苦天尊。願以是功德，上資社稷尊靈，宗祧先聖。伏願玉京侍聖，瑤闕凝神。炁入玄玄，蔭麟符而延周曆。神超渺渺，茂龍種以衍堯宗。

皇帝冠帶百蠻，車書萬國，卿雲耀彩，翔文德於黃垓。瑞露凝甘，耀武功於紫塞。今故燒香，自皈依師尊大聖衆，至真之德，得道之後，昇入無形。和：與道合真。

以今臨午，陞壇行道，請法衆等，運茲二捻上香。願此香煙騰空徑上，供養无上至真經寶。臣等皈身皈神皈命，首體投地，仰依太乙救苦天尊。願以是功德，皈流齋主某九玄七祖，億劫種親。伏願風環汎景，月佩飛霄。斷疑惑根，悟靈源之本寂。出煩惱網，湛覺海之真空。亡故某業垢清夷，客塵疏瀹，青華定籙，永遊宴於福鄉。朱陵登真，常

逍遙於道境。今故燒香，自皈依師尊大聖衆，至真之德，得道之後，時刻昇遷。和：與道合真。

以今臨午，陞壇行道，請法衆等，運茲三捻上香。

願此香煙騰空徑上，供養无上至真師寶。臣等皈身皈神皈命，首體投地，仰依太乙救苦天尊，願以是功德，皈流齋主某。伏願九華錫慶，五福流祥。芝秀蘭芳，融光風於夏屋。松茂栢悅，流麗日於春臺。臣等七祖九玄，三師四友，已往者騰昇紫闕，陪琅葆以朝元。見在者凝妙黃房，固瓊顏而宴樂。今故燒香，自皈依師尊大聖衆，至真之德，得道之後，長享自然。和：與道合真。

禮方 宣懺

命魔 步虛

三啓 三禮

重稱法位

具位臣某，與臨壇官衆等，同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分

身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大法師，三天大法師，三界應感一切真仙。臣聞碧落流精，洞煥綠羅之界。青霄御炁，輝煌蒼藹之墟。示法身而數若沙塵，衍聖言而明符日月。冰靜波，火息焰，仰青極之靈光。刀化樹，劍爲騫，破黑單之幽暗。凡伸皈命，必沐留神。今齋主某，仰慮亡故某。塵擁三宮，業迷六府。遑遑鹿逐，似狂瀾操一葉之舟。袞袞駒馳，猶峻坂走千輪之軌。綱常不守，禁戒多違。身心口之人僞雲滋，罔知三省。精炁神之天和日散，莫識九思。百骸變滅於彭仇，四大分離於晉豎。形魂流浪，茫茫夜壑之幽。體魄顛冥，慘慘寒庭之苦。鬼官跋扈，獄吏羈維。匪由上聖之流恩，金符度命。曷俾下愚之受福，玉簡升神。爰開八陛之玄，式象九關之峻。羅敷鳳篆，洗心首過於玄曹。宣演龍章，潔己祈恩於紫禁。伏願生門洞闢，死戶摧殘。敕監生察命之曹，疾除罪簿。宣移籍

錄功之吏，精紀善編。書名朱火之庭，定字丹玄之闕。三生四負，齊同慈愛以優游。十習六因，灌沐仁恩而削落。客塵瑩潔，祖炁澄清。高步華林，徑上大皇黃曾之妙境。遊神騫樹，獲辭朔單鬱絕之幽都。永無執對之憂，常遇太平之運。蒙如丹禱，允佩玄恩，上願三景高明，五靈協順，風雲藏斂，草木輝華。魚躍鳶飛，遂生生於禹迹。鳳儀獸舞，陶化化於虞庭。三農遊夏屋以歡娛，四鄙登春臺而樂意。刀山劍樹，永斷攀緣。炎沼冰池，俱停苦惱。則上明天尊大慈之化，下副齋主皈命之誠，謹啓以聞。

十二願

一願大道澹泊虛無，安閑空寂，澄清自居，廣開法門，教導頑夫，皆蒙惠澤，精苦自脩，預以同學，普得升虛，與天相保，長存無憂。  
二願諸天結炁澄清，高虛廣覆，保真固靈，炁候調節，四運和平，國安民豐，普天閑寧。廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民具從，養生安死，惠周十方，禾稼滋植，營運日豐，咸得厚載，萬類皆從。

四願日月二景高明，無有孛蝕，虧盈安清，光照諸天，洞消暗冥，保固劫運，世祚和平，普加潤澤，惠灑衆生。

五願星辰與日齊光，轉燭照耀，郎映十方，各安其位，經緯直行，保鎮家國，無有災傷，四海寧一，普天興昌。

六願四時隨節推遷，景炁和調，無有災患，疫毒消滅，普天安平，五穀豐熟，國富民歡。

七願浮雲結炁聚煙，飛空高澄，蔭覆玄玄，隱則無爲，散則彌天，神仙同居，結友衆真，惠流一切，興國愛民，普濟羣生，人同劫年。

八願風雨流灑無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不



植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。十二願蜎飛蠢動，已生未生，咸蒙安全，普得生成，皆見元氣，受陽之形，草木果林，經冬不零，一切濟度，靡不鮮榮。和：與道合真。

### 存神燒香

香官使者，左右龍虎君，侍香諸靈官，當令臣午朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯霑恩，十方仙童玉女，侍衛香煙，傳臣向來所啓之誠，速達徑御東極青玄老君、太乙救苦天尊、運明保元上帝御前。

### 出堂頌

### 回靜默堂

靈寶領教濟度金書卷之九十二

## 靈寶領教濟度金書卷之九

### 十三

洞微高士開光救苦真人甯全真授  
靈寶通玄弘教水南先生林靈真編

### 科儀立成品

青玄齋用

### 晚朝儀

### 燒香頌

各禮師存念如法

### 衛靈呪

五星高照，瑞炁飛浮。元始集神，天地交周。玉符寶節，嘯命微幽。擲火揚威，奸兇無留。萬魔振伏，紛葩却消。摧怪伐惡，道炁周流。神光照夜，陰翳俱收。萬神降格，扇景乘飈。羣生咸遂，惠遍神州。和：與道合真。

### 鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今晚朝，陞壇行道，願得東極青玄妙炁百寶光明下降，流入臣等身中。令臣所啓之誠，速達徑御東極青玄老君、太乙救苦天尊、運明保元上帝御前。

### 請稱法位

具位奉行青玄黃籙妙齋法事小兆臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大法師，三天大法師，三界應感一切真靈。臣聞七寶騫林，靈風振蒼精之韻。九光蓮座，祥煙流碧藹之輝。拱聖化之巍巍，超仙源之渺渺。十方界尊，玄元始慧日融怡。三寶君列，天靈神紫雲覆映。儼東華九陽之闕，垂北鬱六陰之關。爲道德師，作慈悲父。臣等承顏獅宸，綴武螭

坳。補袞獻天，演紫清之祕範。煥綸制地，宏丹素之孤衷。自慚樗櫟之材，莫悟棗梨之妙。恩濃雨露，荷曲采於堯言。憲列雷霆，惟終陶於芝渥。凡有投告，敢不上聞。

宣詞

按如詞旨，備切忱恂。臣聞三途五苦之經，清微演妙。六洞十宮之域，黑壘凝幽。靈聲赴感而法炬飛浮，應念垂慈而靈音鼓動。生成飛化，提泉曲於陽天。死炁超凌，闢寒庭於陰地。無文不度，有礙皆通。今齋主某，骨肉情鍾，肺肝悲極。織烏飛迅，撫逝水以興懷。野馬淒迷，顧藏舟而慨歎。寥寥亡爽，寂寂幽魂。苦海滔天，中流之楫孰付。昏衢亘地，迷途之燭誰操。循環喪魄於四生，輪轉驚心於六道，匪由師造，曷訴愚衷。仰惟東極之神光，可破北酆之鬼趣。壇周四壘，降羽葆於青冥。樂奏九成，舞雲旌於碧漢。鳳炬燦流金之影，鴛班催戛玉之聲。露方寸天，殫芻蕘而莫極。借盈尺地，期葑菲之不遺。願敷汪濊之恩，爲拯沈淪之苦。

以今落景，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太乙救苦天尊。願以是功德，上資社稷尊靈，宗祧先聖。棲真大素，凝妙空青。福寶運於億齡，神龜薦瑞。衍璇源於萬派，天馬呈祥。

皇帝壽衍衡嵩，福齊溟渤。康衢之謠盈耳，玉帛充庭。華封之祝傾心，梯航覲闕。今故燒香，自皈依師尊大聖衆，至真之德，得道之後，保天長存。和：與道合真。

以今落景，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太乙救苦天尊。願以是功德，皈流齋主某九玄七祖，億劫種親。伏願心悟真常，性超清靜。一塵不染，猶曉鑑之凝輝。萬業俱融，若秋蟾而耀彩。亡故某罪華飄落，善果敷榮。黃華蕩形，詣紫輝而駕景。玉眸煉質，泝朱火以陶真。今故燒香，自皈依師尊大聖衆，至真之德，得道之後，昇入無

形。和：與道合真。

以今落景，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太乙救苦天尊。願以是功德，皈流齋主某。伏願堆牀笏耀，插架籤香。日暖簾櫳，瑞氣協方來之慶。風清庭宇，祥光潛已往之災。臣等五族六親，三師四友，普承湛露，均擁祥煙。見在者視履耆頤，固玉顏於不夜。既往者超神寥廓，駕金景以長春。今故燒香，自皈依師尊大聖衆，至真之德，得道之後，長享自然。和：與道合真。

禮方 宣懺

三啓 三禮

重稱法位

具位臣某，與臨壇官衆等，謹同誠上啓青玄祖炁虛無自然元始天尊，無極大道太上道君，太上老君，東極青玄老君，運明保元上帝，太乙救苦天尊，十方分身應化救苦天尊，大慈大悲救苦真人，大慈大悲大惠真人，香林會中法解真人，十華真人，普救真人，玄中大

法師，三天大法師，三界應感一切真靈。臣聞功德濟度，天尊現救苦之身。勝境裝嚴，真人表同仁之號。祖炁徘徊於五太，靈光燦爛於十華。微微開幽，仰九龍之金籙。昭昭破暗，煥丹鳳之瓊章。啓玄運於虛皇，發真機於法解，天人稱慶，今古承恩。今齋主某，仰慮亡故某。業蘊今生，愆鍾曩劫。耳悅宮商之韻，紋綺榮身。目貪黼黻之華，肥甘適口。襲馨香於鼻觀，騁名利於身田。違地理以逆天文，忤神靈而干人紀。十直四始，罔知懺謝之門。八節三元，久昧首祈之路。神鄉迅履，鬼域羈魂。掌惡掌罰以無私，司非司危而莫悔。籲天孰軫，扣地誰矜。自非九幽教主之提携，曷俾六道沈魂之超邁。齋崇黃籙，爰遵藥笈之科。恩輅青玄，式衛芝輪之澤。伏願至仁無外，盛德有容，敕陶魂鍊魂之曹，關專度曲度之吏。飛玉津於東井，澄淪心塵。揚金彩於南丹，陶鎔性垢。移割鬼籍，增注仙名。俾度品於青林，永登神於紫極。普地厚天，高而不夜。極陽生

陰，死以皆春。允昭化育之恩，敢負生成之造。上願二儀昭朗，四象輝華，水伯清波，山靈薦祉。朝多鳴鳳，寰區蒙玉燭之調。野絕遺蝗，畎畝被金穰之瑞。紫塞空而控弦警息，黃圖靜而擊柝聲沈。五道停閉，簡書落滅。三途罷對，錄籍飛銷。則上明天尊大慈之化，下副齋主皈命之誠，謹啓以聞。

#### 十願

一願大道流行，普天懷德。二願一切有生，咸皆悟道。三願九夜悲魂，一時解脫。四願孤魂無依，咸得受生。五願天下太平，五穀豐熟。六願臣忠子孝，君仁父慈。七願四海會同，冤親和釋。八願潛胞處卵，咸得生成。九願積疾新痾，旋即痊愈。十願孤露衆生，豐衣足食。

#### 復爐

香官使者，左右龍虎君，侍香諸靈官，當令臣落景行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯霑恩，十方仙童玉女，侍衛香煙，傳臣

向來所啓之誠，速達徑御東極青玄老君、太乙救苦天尊、運明保元上帝御前。

#### 出堂頌

#### 回靜默堂

靈寶領教濟度金書卷之九十三

# 靈寶領教濟度金書卷之九

## 十四

洞微高士開光救苦真人甯全真授  
靈寶通玄弘教水南先生林靈真編

### 科儀立成品

青玄黃籙齋用

#### 懺方儀

入壇如式

東方

臣等今故燒香，皈身皈神皈命，東方玉寶皇天尊，安寶華林青靈始老青帝，九炁天君，華林境界惠淨莊嚴無極之國應號天尊，靜境真人，日宮太陽帝君，木德歲星，青龍、東斗、東嶽泰山、名山洞府，靖廬福地，東方神仙、諸靈官。懺悔亡故某人，普及幽冥，冤親平等。爰從無始，迨至有生。三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過

陰愆，千條萬件，無邊無量，罪結九幽冥，無由解脫。今依青玄黃籙拔度威儀，燒香然燈，修齋行道，仰謝東方救苦玉寶皇天尊。伏願大道矜憐，高真憫佑，告下東方無極世界諸大地獄之中，拔度魂儀，赦除考對，凝神蒼極，濯質青華，聚炁返形，徑登長樂，得道之後，昇入無形。和：與道合真。

南方

臣等今故燒香，皈身皈神皈命，南方玄真萬福天尊，梵寶昌陽丹靈真老赤帝，三炁天君，梵天境界瑞化莊嚴無極之國應號天尊，真老真人，南斗六司真君，火德熒惑，朱雀，南斗，南嶽衡山，名山洞府，靖廬福地，南方神仙、諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽冥，火翳之獄，魂繫火官衡山之曹，長夜冥

冥，無由解脫。今依青玄黃籙拔度威儀。燒香然燈，修齋行道，仰謝南方救苦玄真萬福天尊。伏願大道矜憐，高真憫佑，告下南方無極世界諸大地獄之中，拔度魂儀。赦除考對，棲真丹火，煉質朱陵，聚炁返形，徑登長樂，得道之後，昇入無形。和：與道合真。

西方

臣等今故燒香，皈身皈神皈命，西方太妙至極天尊，七寶金門皓靈黃老白帝，七炁天君，金光境界利益莊嚴無極之國應號天尊，法寶真人，月府太陰皇君，金德太白，白虎，西斗，西嶽華山，名山洞府，靖廬福地，西方神仙、諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽冥，金剛之獄，魂繫金官華山之曹，長夜冥儀，燒香然燈，修齋行道，仰謝西方救

苦太妙至極天尊。伏願大道矜憐，高真憫佑，告下西方無極世界諸大地獄之中，拔度魂儀，赦除考對，凝真瑤圃，御炁金門，聚炁返形，徑登長樂，得道之後，昇入無形。和：與道合真。

#### 北方

臣等今故燒香，皈身皈神皈命，北方玄上玉晨天尊，洞陰朔單鬱絕五靈玄老黑帝，五炁天君，真靈境界救度莊嚴無極之國應號天尊，救苦真人，北斗九皇星君，水德辰星，玄武，北斗，北嶽恒山，名山洞府，靖廬福地，北方神仙、諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽冥泠之獄，魂繫水官恒山之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝北方救苦玄上玉晨天尊，伏願大道矜憐，高真憫佑，告下北方無極世界諸大地獄

之中，拔度魂儀，赦除考對，昇神碧落，飛步玄關，聚炁返形，徑登長樂，得道之後，昇入無形。和：與道合真。

#### 東北方

臣等今故燒香，皈身皈神皈命，東北方度仙上聖天尊，梵炁始青天君，長樂境界周帀莊嚴無極之國應號天尊，妙音真人，角、亢、氏、房、心、尾、箕七宿星君，北都四帝，上元曹局，羅酆北署，名山洞府，靖廬福地，東北方神仙、諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽鑊湯之獄，魂繫上元天官之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝東北方救苦度仙上聖天尊。伏願大道矜憐，高真憫佑，告下東北方無極世界諸大地獄之中，拔度魂儀，赦除考校，游神青域，高步玄都，聚炁返形，徑登長樂，

得道之後，昇入無形。和：與道合真。

#### 東南方

臣等今故燒香，皈身皈神皈命，東南方好生度命天尊，梵炁始丹天君，碧霞境界妙寂莊嚴無極之國應號天尊，普定真人，井、鬼、柳、星、張、翼、軫七宿星君，雷霆大帝，水府四帝，下元曹局，泉曲九壘，四海九江，名山洞府，靖廬福地，東南方神仙、諸靈官。懺悔亡故某人，普及幽冥，冤親平等。爰後無始，迨至有終，三業紛紜，七情流浪，目眈黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽銅柱之獄，魂繫下元水官之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝東南方救苦好生度命天尊。伏願大道矜憐，高真憫佑，告下東南方無極世界諸大地獄之中，拔度魂儀，赦除考對，棲神丹闕，凝妙華房，聚炁返形，徑登長樂，得道之後，昇入無形。和：與道合真。

西南方

臣等今故燒香，皈身皈神皈命，西南方太靈虛皇天尊，梵炁始素天君，耀真境界救苦莊嚴無極之國應號天尊，瓊光真人，奎、婁、胃、昴、畢、觜、參七宿星君，中元曹局，諸司禁官，名山洞府，靖廬福地，西南方神仙，諸靈官。懺悔亡故某人，普及幽冥，冤親平等。爰從無始，迨至有終，三業紛紜。七情流浪，日耽黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽屠割之獄，魂繫中元考官之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝西南方救苦太靈虛皇天尊。伏願大道矜憐，高真憫佑，告下西南方無極世界諸大地獄之中，拔度魂儀，赦除考對，命靈星闕，飛晏月庭，聚炁返形，徑登長樂，得道之後，昇入無形。和：與道合真。

西北方

臣等今故燒香，皈身皈神皈命，西北方

無量大華天尊，梵炁始玄天君，妙道境界仙真莊嚴無極之國應號天尊，濟苦真人，斗、牛、女、虛、危、室、壁七宿星君，名山洞府，靖廬福地，西北方神仙，諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，日耽黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽火車之獄，魂繫諸司考謫之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝西北方救苦無量大華天尊。伏願大道矜憐，高真憫佑，告下西北方無極世界諸大地獄之中，拔度魂儀，赦除考對，超神玄漠，御景崑池，聚炁返形，徑登長樂，得道之後，昇入無形。和：與道合真。

上方

臣等今故燒香，皈身皈神皈命，上方玉虛明皇天尊，梵炁天君，玄都玉京紫微金闕七寶瓊臺三清之界紫霄莊嚴無極

之國應號天尊，自然真人，土德鎮星，勾陳，中斗，三百六十五度河漢星君，四司五帝，上鄉神仙，諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，日耽黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽無間之獄，魂繫諸司禁官之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝上方救苦玉虛明皇天尊。伏願大道矜憐，高真憫佑，告下上方無極世界諸大地獄之中，拔度魂儀，赦除考對，超真紫極，汎景清都，聚炁返形，徑登長樂，得道之後，昇入無形。和：與道合真。

下方

臣等今故燒香，皈身皈神皈命下方真皇洞神天尊，九壘土皇君，水蓮境界淨土莊嚴無極之國應號天尊，妙行真人，高皇九土，四司五帝，十二仙君，九宮真人，中獄嵩山，名山洞府，靖廬福地，下

方神仙，諸靈官。懺悔亡故某人，普及幽冥，冤親平等。爰從無始，迨至有終，三業紛紜，七情流浪，日耽黼黻，耳混宮商，口慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽普掠之獄，魂繫土官嵩山之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝下方救苦真皇洞神天尊。伏願大道矜憐，高真憫佑，告下下方無極世界諸大地獄之中，拔度魂儀，赦除考對，地司削過，天路昇神，聚炁返形，徑登長樂，得道之後，昇入無形。和：與道合真。

#### 總十方

臣等今故燒香，皈身皈神皈命，十方救苦無上慈尊，十炁天君，十華真人，日宮月府，五斗五星，三官九署，雷霆大帝，酆都大帝，水府四帝，五嶽四瀆，一切神靈。懺悔亡故某人，普及幽冥，冤親平等。爰從無始，迨至有終，三業紛紜，七情流浪，日耽黼黻，耳混宮商，口

慕肥甘，鼻貪馨馥，意著玩好，身悅綺羅，弗守綱常，不遵禁戒，日積月累，陽過陰愆，千條萬件，無邊無量，罪結九幽諸大地獄，魂繫諸司考謫之曹，長夜冥冥，無由解脫。今依青玄黃籙拔度威儀，燒香然燈，修齋行道，仰謝十方救苦無上慈尊。伏願大道矜憐，高真憫佑，告下十方無極世界諸大地獄之中，拔度魂儀，赦除考對，依光蓮座，超跡騫林，聚炁返形，徑登長樂，得道之後，昇入無形。和：與道合真。

#### 下壇如式

#### 陞壇誦經儀

#### 步虛

#### 按人各恭敬

志心皈依，十方道寶，當願亡靈起心回向，一切信禮。  
志心皈依，十方經寶，當願亡靈心開悟解，受持讀誦。  
志心皈依，十方師寶，當願亡靈普上法橋，無有障礙。

具位臣某，謹焚寶香，遙瞻供養太上無極大道東極青玄老君，太乙救苦天尊，

大慈大悲救苦真人，大慈大悲大惠真人，妙行真人，十華真人，黃籙九司仙官衆真，青玄琅函玉軸真經寶符侍衛，玉童玉女，太乙靈妃，九龍使者，玄中大法師，三天大法師，城隍社令，虛空鑒察，見聞隨喜，一切真靈。仗此寶香，普同供養，恭望洪慈，俯垂省錄。臣聞尋聲救苦，威神遍滿於十方。應念垂慈，惠力周流於三界。萬真拱紫金之相，千靈衛白玉之光。開甘露門，散大無之碧靄。映祥煙戶，舒妙有之蒼精。度三界難而上登朱陵，制九天魂而下提黑朔。如盲見日月，嗟妄業之昏迷。其數若沙塵，喜真身之定慧。惟無名而無我，故不迷而不荒。功德難言，玄元可際。今有齋主某人，崇建某醮，開度某人。乞於齋次，陞壇誦經，期仗一乘，溥消萬累。臣等遵依經教，恪整威儀，證百體以開揚，肅五關而宣演。調聲正氣，流梵炁於琅函。異口同音，間步虛於瑤陛。蓮座耀雲舒之彩，騫林鼓風奏之華，下徹重泉，上通長樂。即使亡故某人，心酣妙韻，耳聽

天音。萬遍而心垢自清，一塵不染。十迴而性瑕克泯，萬境俱閑。享大福於天堂，絕苦聲於地獄。真光接引，妄暗消除，逍遙七寶之臺，遊宴五明之館。三途五苦，刀化樹而劍為騫。六洞十宮，冰靜波而火息焰。九幽罷對，萬累停冤，稽首皈依，無極大道。

平座讚

道場衆等，執簡當心，平坐誦經如法。

舉經 誦經 結經

臣某謹重誠上啓太上無極大道東極青玄老君，太乙救苦天尊，大慈大悲救苦真人，大慈大悲大惠真人，妙行真人，十華真人，黃籙九司仙官衆真，青玄琅函玉軸真經寶符侍衛，玉童玉女，太乙靈妃，九龍使者，玄中大法師，三天大法師，城隍社令，虛空鑒察，見聞隨喜，一切真靈。臣聞赦罪度厄，仰願力之宏深。委炁聚功，耀仁恩之廣大。惟念誦之不息，故拔領以無邊。開紫陽玉匱之書，敷青極瓊章之典。詠罪福句，既登元始之逍遙。宣塗炭經，復入真玄而遊宴。寒庭利善，夜壑昭回。凡

彰迹而非迹之希夷，實契名豈常名之要妙。以今某人崇建某齋，開度某人。乞於齋次，誦《太上洞玄靈寶救苦拔罪妙經》。臣等率勵清流，鋪張丹悃。金鏞朗徹，聲聞五億之區。玉磬舒徐，韻響三千之域。莫不澄清萬慮，整肅一心。執卷吟哦，經已周於十過。開函誦咏，道允契於三靈。迷途昭雨露之垂，苦海被日星之照。觀瞻鼓舞，覽聽歌謠。伏願亡故某人，入功德林，游智慧海。千冤雲散，虛堂懸寶鑑之輝。萬罪風輕，玉宇浴秋蟾之影。詣南丹而受化，覲東極以登真。頓悟無爲，永辭有漏。普及冥冥之性識，均承蕩蕩之恩光。稽首皈依，聞經讚詠。

三聞經

聞經已後，唯願亡靈深入法門，歸依信受。  
聞經已後，唯願亡靈萬罪冰消，善芽增長。  
聞經已後，唯願亡靈永斷執迷，常皈正道。

向來

回靜默堂

靈寶領教濟度金書卷之九十四



靈寶領教濟度金書卷之九

十五

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄黃籙齋用

鍊度醮儀

步虛

呪水行淨

某上啓青玄黃籙鍊魂司朱陵火府火鍊大將軍，火鍊靈官，南昌上宮鍊度大將軍，鍊度靈官，火鍊童子，火鍊玉女黃華冶鍊玉女童子，黃華鍊質玉女童子，黃華蕩形玉女童子，黃華明眸玉女童子，黃華光容玉女童子，黃華瑩身玉女童子，黃華清神玉女童子，黃華發光玉女童子，水火交光大將軍，水火合形大將軍，水火聚炁大將軍，水火聚神大將軍，金木鍊形玉女，金木仙衣玉女，金木仙帶玉女，金木仙車玉女，黃籙監察

司命司左通和太寧玉女，右通和太定玉女，左玄靈太素玉女，右玄靈太素玉女，左右崇正靈官，黃籙領錄功司領魂領功主吏，提舉太平玉女，飛雲正吏飛吏靈官，黃籙持符告命玉女，司證考問玉女，通玄符令玉女，八方隨化玉女，察訪檢會大魔王，掌籍仙官玉女，真人功曹，主簿小吏，黃籙仙魂司仙魂逍遙快樂自然清靜仙人，童子道士靈官，黃籙專度曲度溥度司太玄靈官功曹，玉女主簿，太玄上奏引度靈官玉女，功曹主簿，左右押隊神吏，太玄引領使者，覆勘功曹，九天普度院火府度亡真人，水宮拔亡真人，火鍊丹界真人，水濟無邊真人，水火交鍊真人，守雄抱雌二大將，鍊度司合屬官吏。伏以運啓青玄，御獅頭而凝妙。班崇黃籙，羅龍尾以飛玄。參朱陵棗籥之機，翊清微彌綸之化。憲天弘道，仁風鼓動於東吳。制地承符，法雨涵濡於北鬱。天人共仰，今古攸宗。今齋主某人，崇建某齋，開度某人。扣沐真光，幸超妄暗。實離虛坎，期神庭變鍊之功。出坤入乾，遂

聖力超凌之願。匪仗神光，曷昭靈貺。密扣蘭闈，曾煥金符而請命。諒辭蓮幕，已飛瑤佩以遨遊。輒殫禴祭之儀，小效曝忱之獻。伏願靈光煒燁，梵炁彌羅。鑒翼翼之小心，俯歆菲薦。敷巍巍之大鮑，仰贊楓嚴。法衆運誠，虔伸奉請。

請神

青玄黃籙鍊魂司鍊度靈官將吏，朱陵火府火鍊大將軍，火鍊靈官，南昌上宮鍊度大將軍，鍊度靈官，南昌火鍊童子，火鍊玉女，黃華冶鍊蕩形玉女童子，黃華鍊質明眸玉女童子，黃華光容瑩身玉女童子，黃華清神發光玉女童子，鍊魂水火交光大將軍，鍊魂水火合形大將軍，鍊魂水火聚炁大將軍，鍊魂水火聚神大將軍，金木鍊形合炁玉女，金木仙衣仙車仙帶玉女，黃籙監察司命司左右通和太寧太定玉女，左右玄靈太素太仙玉女，左右崇正靈官，黃籙持符告命飛雲通遊移籍司神王功曹，察訪檢會大魔王，玉清察符保舉告命玉女，玉清察符引證考問玉女，玉清察

符通玄符令玉女，玉清察符八方隨化玉女，掌籍仙官玉女，真人功曹，主簿小吏，掌籍佐書功曹，主簿小吏，黃籙領魂錄功司錄功主吏，提舉太平玉女，飛雲正吏飛吏靈官，黃籙仙魂司逍遙快樂自然清靜靈官，黃籙專度司太玄靈官功曹，玉女主簿，黃籙溥度司太玄靈官功曹，玉女主簿，太玄上奏引度靈官功曹，玉女主簿，左右押隊神吏，太玄引領使者，覆勘功曹，九天溥度院火府度亡真人，火鍊丹界真人，水宮拔亡真人，水濟無邊真人，水火交鍊真人，守雄抱雌八大神將仙吏，本靖主將副將，護道監壇諸大將帥。

初奠茶酒

某上啓青玄黃籙鍊度官吏，合會威靈。伏以帝德好生，闡慈悲於長樂。民情趨死，昏智慧於朔單。白日鑒混沌之玄，斯風靡洪厖之妙。天地爲爐，陰陽爲炭，徒瞻逝水以興悲。乾坤爲輿，日月爲輪，誰念藏舟而□性。故東諸煥龍光之籙，而南丹垂鳳炁之圖。開夜

提魂，乘晨鍊魄。風清五道，永無弔影之悲。日麗九華，斯赴尋聲之樂。今齋主某人，伏爲亡故某人。生生塵路，劫劫冤都。三界推心，同植鎖猿之楫。六根由意，莫操策馬之鞭。罪花既錄於神鄉，死蒂斯淪於鬼域。陽光煥爛，幸離地禁以超凌。陰垢縈羅，盍扣天和而灌鍊。爰冒裁成之局，普干燮理之司。願鑒愚衷，爲敷聖澤。建華池於西坎，崇炎沼於東離。俾承陶冶之玄功，均沐提携之洪貺。照覆盆而燦燦，側耳詢堯。不掩豆以兢兢，傾心采菲，不勝虔祝之至。

亞奠

某上啓青玄黃籙鍊度官吏，合會威靈。伏以道本太乙，凝祖炁於青林。仁妙函三，散神光於黑鬱。二府啓同仁之旦，九司開宣德之春。軫被陽靈，夙罹陰幻。方圓超迹，既霓望以勤渠。水火陶形，宜日宣而煥耀。降鬱儀於玉井，混結璘於金門。參虎流精，沛壬癸之玄液。角龍孕粹，流丙丁之炎輝。黃華灌而情性珠圓，玉質鍊而形神金

瑩。鑒察靡絲毫之漏，紀錄無纖芥之遺。小善必甄，大愆悉宥。移姓名於真籍，登魂魄於仙階。地戶永離，藉專度曲度之宏績。天門直上，賴保度監度之良功。即俾亡故某，夙垢清夷，劫塵瑩徹。登騫林而御景，身蔭慈輝。覲蓮座以依光，神歸慧耀。永宴蒼靈之境，常依青極之鄉。丹禱無遺，洪恩有造。某不勝虔祝之至。

三奠

以今翠藹彌羅，蒼華煥映，獅御傾光於碧落，鳳班駐景於玄虛。起死恩隆，度生仁切。神功妙密，形形既脫於陰塵。靈德希奇，炁炁頓符於陽耀。願副潛昭之禱，悉符應感之機。九鍊功圓，別當奉送。

鍊度儀

步虛

金闕化身天尊

法師升座

超度頌

超度三界難，地獄五苦解。悉歸太上經，靜念稽首禮。

具位臣某，恭焚寶香，遙瞻啓奏青玄祖炁無極道師，清微天中妙無上帝虛無自然元始天尊，禹餘天中妙有上帝虛無玉晨大道君，大赤天中至真大帝萬變混沌玄元老君，東極天中青玄老君，運明保元上帝，太乙救苦天尊，十方分身應化無量救苦天尊，三天化主玄中大法師，靜老天尊，三天大聖都天大法天師，六合高明大帝，大慈大悲救苦真人，大惠真人，香林會中法解真人，十華真人，普救真人，東華注生宮真人，朱陵火府南昌上宮主宰高真，東華領教祖玄真師列位真人，經籍度師列位真人，名山洞府，地水職司，城隍社令，無鞅聖衆。願運慈悲，俯從懇禱。臣聞碧落開光，騰勝御黍珠之座。青玄應化，妙嚴端騫翠之輿。流法雨於黃垓，蔭慈雲於黑壘。經宣五苦，揚蕩蕩之慈名。道貫三華，仰巍巍之慧力。九司星列，二府雲連。開生塞死，而北鬱提魂。返陰還陽，而南丹鍊質。無所不度，有感皆通。凡屬範圍之中，孰出甄陶之外。伏念臣玄基天啓，聖域師

參，日旋月奔，啓子午無形之始。雲藏風靜，符乾坤未畫之先。宜宴坐以凝真，敢經行而翊教。九思補過，三省立功。清微之玉律昭然，合提無間。玄元之金書爛若，宜度有情。裨化化以同仁，輔生生之大德。今齋主某人，崇建青玄妙齋，幾晝夜開度某人。仰希聖造，俯軫愚衷。玉龍之清籙風行，九幽度命。金馬之朱輪雷迅，三極宣符。已攝魂於陰鄉，獲超神於陽境。然念惡根業葉，結習縈迷。寒庭多昏霧之蒙，莫澄覺地。夜壑積陰霾之染，難復靈天。須憑變鍊之功，方契生成之妙。欲望丙觀哀素，申飭真曹。流東井之華泉，方諸委炁。燄南閭之朱火。陽燧流形。爲陶萬劫之根塵，盡淪九京之客垢。精神冰潔，步武風清。鍊形成神，妙如如之法體。鍊神成炁，還奕奕之靈光。永移籍於青華，即受書於紫府。拳拳懇禱，切切皈依。臣下情不勝虔切之至，再拜謹言。

太乙救苦天尊

睿號一遍

焚香關召青玄黃籙左右府仙魂，鍊魂司官吏，領魂錄功司官吏，專度曲度溥度司官吏，九天普度院官吏，守雄抱雌二大將，鍊度合屬官吏。願遵玉敕，克赴玄壇，應感分輝，宣通役使。竊以青玄開度，符經緯以同仁。黃籙設官，統陰陽而宣德。上藉三天之聖澤，下提九地之迷魂。劍佩蟬聯，侍赫奕獅頭之座。旌旄鷲立，環陸離龍尾之班。元勳夙著於三靈，宏業久彰於萬劫。凡伸召役，必沐感通。以今奉爲某人，開度亡故某人。提魂北鬱，已承帝渥之羅敷。鍊魄南宮，更賴神功之妙密。玄壇日近，朱表風馳，諒上乘於德音，爲曲憐於哀悃。欲望慈悲廣運，智慧彰施。建流火庭，錫金膏而鍊質。立黃華沼，注玉醴以澄神。運東西離坎之樞機，發南北乾坤之橐籥。陶鎔翳累，鋼百鍊而愈精。疏淪昏塵，金屢陶而始瑩。察其良性，錄其善功，移名真籍之崇，定字仙班之峻。專度曲度，永超離於神鄉。送迎保迎，實飛翔於帝所。遂齋主皈依之悃，副慈悲開度之

誠。玄敕即頒，神功速應，某不勝虔祝之至。

焚降真召靈符

謹請水池真靈將吏，隨我神運，變現水池，蕩滌亡魂。

焚青玄建水池符

東井真精，天乙生靈。寶光霞映，洞朗八冥。渺渺御運，神輝高明。羅絡鬱燠，黃華降澄。經緯交并，金池方盈。雲眸玉質，飛玄聚英。急急如青玄老君律令。

太乙救苦天尊

謹請火池真靈將吏，隨我神運，變現火池，冶鍊亡魂。

焚青玄建火池符

陽明煥赫，高化炎輝。丹陽寶耀，朱陵羅機。流光炎烈，紫金熾熺。絳霞萬道，瓊宮鬱儀。丙丁行事，萬炁敷施。南昌上宮，炎帝之居。急急如青玄老君律令。

太乙救苦天尊

挹玄液於月庭，素華流潤。降炎光於日闕，朱火輝煌。仙靈之冠佩雍雍，真

聖之節幢濟濟。雖化城於玄陛，實移境於丹宮。所宜策將提魂，運神入鍊。恭依祕旨，次第宣行。謹召守雄抱雌二大將，追魂攝魄一行官將，各按所部，部衛形魂，前來受鍊。

今日大慶，大道吉辰。請天降鑒，萬真齊臨。三界共會，八景合并。地司列職，拔度幽冥。衛部主者，拘魂至庭。引導亡爽，受鍊身形。各整威儀，疾速來臨。齊證妙果，上登朱陵。急急如青玄老君律令

黃華蕩形天尊

清衆移旛，插於水火二池間。

謹召水池真人，玉女童子官吏，隨我神運，引導亡故某，赴水池濯質蕩形，滌除陰穢。

焚普度水官拔亡鍊形符

元始運明，保元天尊。陰陽合真，水火精英。飛靈結炁，水精液君。北方黑帝，水府將軍。司功濟苦，聚魄度魂。水光流形，臭穢爲塵。驅除惡炁，炁灌身形。魂魄全備，超昇朱陵。三十六真人，三十六將軍。玉女擒伏，真人度

魂。紫液炁聚，水灌亡人。六壬六癸，北坎大神。追魂攝魄，八大神君。引亡攝付，北陰水官。水鈴扶桑，汞水調津。手執水枝，光炁鍊形。真人法水，鍊度亡魂。急急如青玄老君律令。

太乙救苦天尊

焚青玄上仙聖光水鍊符

誦青玄右府華蓋玄靄真凝炁章

幽微藥宮爲仙宅，道貫樞靈圓景白。飛根散葉翳翠條，妙炁三華貫幽徹。鬱靈杳淑真人墟，雲景眸奔通烜赫。泥丸三五合靈芝，結珠固精神炁活。飛煙妙靄却殘兇，鍊獲飛仙去否厄。太玄太和左右府，紫清真人道爲主。沖虛恬淡自怡然，返老還胎導玄圃。知雄守雌資天機，迴返乾坤鎮中主。飛玄神炁合青玄，含藥吐芳明子午。鍊養靈根不復枯，萬靈朝會群陰睹。

琅音玉霜灌死骸，徘徊沈默須周普。  
擒龍捉虎坐鸞輪，隱韻流音邀妙府。  
黃華朱醴濯陽精，萬道炁爲群仙舉。

### 火鍊丹界天尊

謹請火池真人，玉女童子官吏，隨我神運，引導亡故某人，赴火池鍊質返陽，仙化成人。

### 焚溥度炎帝度亡鍊形符

元始至真，運明保元。乾坤合道，日月精英。至液炁津，紫霞盈凝。南方炎帝，擲火大神。司命保嬰，聚魂鍊形。帝炁神符，火光度魂。南斗六君，助我符中。三十六真人，三十六將軍。守定魂魄，度上南宮。六丙六丁，炎帝侍形。追魂拘魄，玉女大神。引亡攝付，火府朱陵。朱陵火鈴，主火火文。手執火劍，三昧火光。真人寶鈴，離坎鍊魂。燒諸塵垢，臭穢爲塵。急急如青玄老君律令。

離昧赤帝，火神炎君。擲火玉女，南斗將軍。火劍火炁，降入池中。鍊魂度魄，冶鍊身形。形影周備，清爽生津。接引亡魂，隨誥超昇。朱陵火府，南昌

上宮。急急如青玄老君律令。

### 太乙救苦天尊

### 焚青玄上仙聖光火鍊符

### 誦青玄左府妙英飛爽集玄炁章

道貫青玄集素瑞，靈寶飛真瓊妙炁。生魂育魄返金容，五藏生華凝景翠。三田飛鬱映華峰，寶耀玄黃端拱會。提携日月運璇璣，九炁發春揚折地。含和吐藥耀金蓮，驪龍吐珠呈彩翅。鸞鳴鳳翔對上賓，虎嘯虛巖華曲麗。洞觀三界百關明，六緯七經齊天地。飛靈煥景擲炎靈，東井天河灌幽涓。九龍奔躍騫寶林，圓景燦煒總翹轡。飛霞採集咀玉根，景景胎仙生萬彙。十灾却消摧兇殘，幽室光明何所繫。紫華混合青玄宮，電掣雷奔絳霞闕。雲臺碧落黍米珠，導達光玄煥二炁。注念左府悟玄機，反覆陰陽成上位。

### 朱陵度命天尊

鍊質蕩形，陰累已消於地域。復神返炁，陽靈方證於天衢。假五行混合之功，成二景參同之妙。謹召青玄水火交光合形聚炁聚神大將軍，金木鍊形

合炁玉女，九天尊度院水火鍊形真人，隨我神運，交鍊亡魂，合炁聚神，全形受度。

### 焚太乙注生鍊魂生肝符

東極帝君，日月精英。三台流光，芝英素生。雷電使者，甲乙將軍。韓君丈人，萬物重榮。肝膽受炁，炁血通真。亡靈受鍊，超昇上清。真人濟世，六甲守魂。甲乙爲本，庚辛作形。五行造化，日月光臨。真人布化，九陽灌身。永脫輪迴，注生超昇。蕩除穢臭，黑簿消名。

### 焚太乙注生鍊魂生心符

東極帝君，太乙至真。南方赤炁，朱雀飛騰。炎火光迸，金昇丹元。金光輝照，萬物發生。中凝七魄，上結三魂。心腸紫戶，隨炁而生。外內光照，返魂歸嬰。萬神皈室，中宮黃庭。準依帝命，法水生心。太乙守命，五藏生津。騁落炁聚，中有至真。白元無英，紫葆神公。

### 焚太乙注生鍊魂生脾符

東極老君，日月精英。九天降炁，炁化

成形。五藏六腑，脾胃命門。三焦聚炁，泥丸絳宮。太微洞照，內含乾坤。千關百門，天精液君。五色化散，流布成形。龍虎潛伏，四正神寧。塵凡臭穢，稟質成身。水火既濟，符法鍊形。聚魂集魄，妙道長存。萬孽俱斷，一性真宗。三田周備，四肢生津。

焚太乙注生鍊魂生肺符

東極老君，運明至真。西方白炁，仙化金精。炁海下運，炁血結凝。紫液流滿，玉戶絳宮。肺腸生離，乃及心胸。已枯再榮，已滅復生。九天上仙，返復成嬰。臭穢蕩流，表裏洞清。三光垂明，真人灌形。仙人吐潤，鍊度亡魂。百節骨肉，肝肺心生。金光降炁，內外朗清。變化自然，六腑通靈。

焚太乙注生鍊魂生腎符

東極青玄，太乙老君。北方黑炁，化生命門。丹田兩腎，膀胱下分。太乙守魂，司命守魄。飛靈真炁，炁入心中。死源斷絕，惡根沈零。五英交會，三時停輪。咸散罪名，注生宮庭。陽魂陰魄，二炁來迎。神入玉戶，百關生津。

五行炁造，造鍊真形。大明蕩質，玉眸洗洗。去除塵垢，濟魂奉行。五臟六腑，開化重亨。

焚太乙注生鍊魂全形符

東極帝炁，五方降真。六甲爲肝，六庚肺成。丙丁心主，壬癸腎門。戊己脾胃，三焦命中。精朝玉戶，炁在絳宮。百骸七竅，萬神化生。正炁來罩，日月灌身。四肢具足，迴骸返嬰。靈寶上章，溟泠玉文。三十六神，追度亡魂。九天降炁，太乙虛靈。開化自然，形影合真。太真鍊尸，好生文君。八將玉女，無極度人。真人度魂，驅除穢塵。水火既濟，陰陽運成。五帝助法，萬神咸聞。

焚九天普度亡魂成形符

九天上帝，元始至真。太乙召亡，真人度魂。一炁成十，百千萬人。清水入形，一一還嬰。五臟六腑，四肢皆成。臣憑符呪，玄上玉文。三宮昇降，往來無窮。五苦咸解，萬神保明。飛光昱昱，普告萬靈。助吾大道，太乙內經。符到爲形，注生凡塵。玉文符召，普度

亡人。玉女守戶，真人化身。日月精炁，陰陽乾坤。萬象合道，魂魄成形。萬邪潛伏，百關生津。北陰嶽神，稽首上清。

百神混景，既化鍊以成人。萬炁齊仙，可回靈而入妙。合嚴冠帶，用整威儀。謹召青玄鍊魂金木仙衣玉女，仙帶玉女，仙車玉女，神化攝化，速俾已鍊亡魂，冠帶身形，莊嚴受度。

誦青玄鍊魂章

太上初炁混陰陽，水火既濟方玄黃。鍊質玉容合仙品，飄飄飛步遊仙鄉。滓穢消除神明清，霞衣錦佩光琳琅。靈寶通玄無上聖，開度功德不可量。一聲玄梵徹三界，綿綿道德生仙鄉。服六銖而映三光，幸嚴容止。尊五靈而超二景，將返神形。惟陽景之久離，慮陰關之乍脫。性天幽鬱，罔知解脫之機。心地蒙迷，莫認逍遙之路。倘不受持於經戒，曷能保度於劫輪。仰三途五苦之慈尊，實萬類群靈之慧徑。將依玉笈，肆演金科，當恭肅以披宣，宜勤拳而聽受。

移旛來法座前

智慧頌

智慧起本初，朗朗超十方。結空峙玄霄，諸天挹流芳。其妙難思議，虛感真實通。有有竟不有，無無無不無。

智慧常觀身，學道之所先。渺渺任玄肆，自然錄我神。天尊常擁護，魔王爲保言。晃晃金剛體，超超太上前。

智慧生戒根，真道戒爲主。三寶由是興，高仙所崇授。泛此不死舟，倏歛濟大有。當此說戒時，諸天皆稽首。

億劫化身天尊

我聞元始天尊，昔在香林園內，與無極聖衆演說玄一，了達希微於九色。微妙光明，照十方無極世界上下。洞徹瑠璃，乃見九幽地獄受苦衆生。倏忽之間，萬生萬死，報盡輪迴，化形畜生，或得爲人，身相不具，奴婢下賤，孤露貧寒。億劫不休，實堪慈愍。時有法解真人，上白天尊，言如此罪魂，受苦無已，前生今世，何因何緣。天尊答曰：世末時訛，人民澆僞，爲善者少，爲惡者多，營造罪根，結諸惡業，自作

自受，猶響應聲，終劫說之，亦難句盡。略舉其要，名曰三途五苦八難。此等罪趣，出離最難。非我法門，無由超度。三途者，一曰地獄考對前非，二曰畜生償酬往業，三曰饑鬼苦對最深，渴飲火精，飢食灰炭。五苦者，一曰刀山，二曰劍樹，三曰銅柱，四曰鑊湯，五曰漣汲溟波。八難者，一曰得生人道難，二曰去女爲男難，三曰形骸完全難，四曰得生中土難，五曰值有道君父難，六曰稟性慈善難，七曰值國太平難，八曰與三寶相遇難。如此諸苦，流浪不還，展轉漂沉，與道長隔，耽淫五濁，執滯六情，外觸內浸，殃纏禍染。

一失人路，墮地獄中，長夜冥冥，無由解脫。過此境界，東極天中有尋聲救苦天尊，大慈仁者，發弘誓願，普救衆生，億億劫中，度人無量。但能回向，一念皈依，注想尊容，稱揚名號，尋聲赴感，應念垂慈，一切苦中，無不救護。天尊又曰：若有衆生，三業淨者，不墮三途。五毒淨者，不經五苦。修八行者，超度八難，與道合真。亡故某人，藉

東極之慈光，形魂受鍊。離北都之幽暗，步武登真。可謂萬劫遭逢，夙生慶幸。尚慮貪嗜稟性，顛蒙一有，背道忘真，坐使前功頓廢。我今遵依經旨，宣示戒條。希三寶以證明，仗衆真而監度。願歸道化，證立本心，保護受持，勤拳皈命，先稱三寶，次演戒文，清衆運誠，人各恭信。

按人各恭信

宣告亡靈，皈依無上道寶元始天尊。

道寶讚

稽首皈依道，大羅元始尊。杳冥開祖劫，混沌立天根。願垂清靜法，開度此亡靈。和：往生神仙界。

宣告亡靈，皈依無上經寶靈寶天尊。

經寶讚

稽首皈依經，靈寶洞玄君。鍊金成鳳篆，揉玉寫龍文。願垂清淨法，開度此亡靈。和：往生神仙界。

宣告亡靈，皈依無上師寶道德天尊。

師寶讚

稽首皈依師，神寶洞神君。先天傳大教，浩劫指迷津。願垂清淨法，開度此

亡靈。和：往生神仙界。  
宣告亡靈，皈依青玄救苦太乙天尊。

太乙讚

稽首皈依玄，尋聲救苦尊。九幽蒙惠澤，億劫度沉淪。願施慈惠力，接引此亡靈。和：往生神仙界。

向來所說三寶上帝睿號，東極慈尊微稱，生於自然，隱乎空洞，兩儀藉以覆載，萬物賴以生成。宜堅尊禮之誠，永奉玄元之化。今當敷妙戒，開昏迷。夫戒者，智慧昭彰，圓通無礙。受持之後，即有虛空鑒察，上聖天真，照映行藏，絲毫不漏，宜勤諦受，道不負人。倘或懈怠，身心終勤異向，再淪陰景，善果難逢。伏願專意靜心，肅容端己，誓勤持奉，勿敗真功。必得劫劫長存，世世受福，不經苦惱，身有光明，永侍仙官，常依正道，請端容止，恭聽宣傳。

大慈說戒天尊

北帝頌

善哉元始尊，衆生慈父母。傾光紫微宮，曲映九幽戶。峨峨丘寒庭，回照廓冰浦。炎炎烈火獄，沛然洒法雨。圓

通大哀智，常善濟衆苦。拔度長夜魂，今得稽首禮。

天尊言：欲免三途，當淨三業。淫殺偷盜，是名身業。嗔貪癡愚，是名心業。綺語妄言，兩舌惡罵，是名口業。此十惡根，障蔽善緣，滋生罪惱。若能清淨，永免三途。和：惟願亡靈，持心受聽。

天尊言：欲離五苦，當淨五毒。眼觀五色，耳聽五聲，鼻嗅五香，舌知五味，心生五欲。此五毒根，終劫纏綿，無由解脫。若能清淨，永除五苦。和：惟願亡靈，持心受聽。

天尊言：欲超八難，當修八行，一曰孝行，二曰仁慈，三曰貞廉，四曰忠信，五曰善忍，六曰柔和，七曰奉戒，八曰持齋。冥心大道，平等接物，無有冤親。以此熏修，善功克滿，身超八難，永契真階。和：惟願亡靈，持心聽受。

慈悲證戒天尊

奉戒頌

道爲無心宗，一切作福田。立功無定準，本願各由人。虛己應衆生，注心莫

不均。大聖崇至教，亦猶雨降天。高陵靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

天尊告法解曰：此上法門，修行要義，轉羸入妙，證道登真，三界天尊，十方大聖，皆修此行，超入無爲。伏以慈悲，憫念羣品，應當敷演，宣示未聞。俾苦海愛河，咸知修奉。出煩惱網，斷疑惑根，登解脫山，到逍遙境。身心清靜，深入法門。天音琅琅，幽明仰慕。是以依憑經法，傳受戒文。請萬聖以監臨，微千真而護衛。所宜書紳諦聽，端履靜思，一話一言，戒爲標準。三重四昧，戒爲津梁。便可抖擻世塵，翱翔仙梵，永爲道種，不墮迷途。勿生懈怠之心，自速沉淪之步。以今真光鬱勃，妙炁敷羅。碧磬音清，促徑登於道岸。天球韻合，催高步於法橋。然念割籍紀功，有玄曹之主宰。登真度命，藉列職之護持。合遍款謁，以告虔庶，可超凌而飛化。守雄抱雌二大將，部衛亡



魂，先詣監察司命司，肅恭參謁。

太乙救苦天尊

引旛詣監察司命司

男用守雄，女用抱雌。

某上啓黃籙監察司命司仙靈官吏，竊以玄極流恩，甦沉淪之苦惱。青曹贊化，垂提拯之仁慈。合罄皈依，恪祈應感。以今奉爲亡故某人靈魂，受鍊功圓，發遣昇度。惟願鑒察在世之業，保舉合生之方。夙屬貴司，敢忘皈告。謹部亡魂，叩首祈恩。欲望上體好生，下矜趨死。監舉公正，俾生善道。以乘晨校察詳明，盡落惡根而宴樂。真符昭告，聰聽無違，某不勝虔祝之至。

宣符 宣牒

吟偈

定生察業屬權衡，密佐慈尊妙化明。  
今日亡魂承聖力，萬緣清淨返仙扃。

太乙救苦天尊

引魂詣領魂錄功司

守雄抱雌二大將，部衛亡魂，詣領魂錄功司，肅恭參謁。

某上啓青玄黃籙領魂錄功司仙靈官吏，

竊以仁藹青華，振慈風之浩蕩。職承丹極，輔化雨之涵濡。合罄皈依，恪祈應感。以今奉爲亡故某人，受鍊功圓，發遣昇度。願惟引領登真之逕，紀錄作善之功。夙屬貴司，敢忘敷告，謹部亡爽，叩首祈恩。欲望上體好生，下矜趨死。部衛超邁，俾登福境以夷遊。詮擇奏聞，盡釋業緣而削落。真符昭告，聰聽無違，某不勝虔祝之至。

宣符 宣牒

錄功引度峻玄班，體道興慈煥夜關。  
今日亡魂承聖力，一塵不染近天顏。

太乙救苦天尊

引旛詣通遊移籍司

守雄抱雌二大將，部衛亡魂，詣通遊移籍司，肅恭參謁。

某上啓青玄黃籙持符告命飛雲通遊移籍司仙靈官吏，竊以化瑟恢張，仰青林之大德。玄綱參贊，昭黃籙之真曹。蓋罄皈依，恪祈感應。以今奉爲亡故某人，受鍊功圓，發遣昇度。願惟移割鬼錄之字，登書仙籍之名。夙屬貴司，敢忘敷告，謹部亡爽，叩首祈恩。欲望上

體好生，下矜趨死。疾除黑簿，無留蹤蹟於北都，徑紀丹編，即躍精神於東府。真符昭告，聰聽無違，某不勝虔祝之至。

宣移籍券 宣狀

宣移籍狀 宣關

移名割籍秉天機，太乙玄生帝澤輝。  
今日亡魂承聖力，等閑步武上彤墀。

太乙救苦天尊

引旛詣仙魂司

守雄抱雌二大將，部衛亡魂，詣仙魂司，肅恭參謁。

某上啓青玄黃籙仙魂司仙靈官吏，竊以帝闕慈隆，憫重泉之積苦。靈曹望峻，待蒼極之深仁。合罄皈依，恪祈感應。以今奉爲亡故某人，受鍊功圓，發遣昇度。願惟解脫輪迴之苦，徑登極樂之鄉。夙屬貴司，敢忘敷告，謹部亡爽，叩首祈恩。欲望上體好生，下矜趨死。拔出地戶，俾皈依妙炁以成真。無拘天門，得徑陟仙階而御景。真符昭告，聰聽不違，某不勝虔祝之至。

宣仙魂券，宣牒

發仙魂狀，宣關

登真證品出重泉，珍重慈悲握化權。  
今日亡魂承聖力，飛空徑上碧虛天。

太乙救苦天尊

引旛詣專度曲度普度司

守雄抱雌二大將，部衛亡魂，詣專度曲  
度普度司，肅恭參謁。

某上啓青玄黃籙專度曲度普度司仙靈  
官吏，竊以號尊救苦，仰青極之真光。  
職贊同仁，昭玄班之聖澤。合罄皈依，  
恪祈應感。以今奉爲亡故某人靈魂，受  
鍊功圓，發遣昇度。顧惟專特普度之  
功，委曲舉遷之力。夙屬貴司，敢忘敷  
告，謹部亡爽，叩首祈恩。欲望上體好  
生，下矜趨死。開度五戶，魂超明檢以  
飛遊。上開八門，帝所遨遊而快樂。  
真符昭告，聰聽無違，某不勝虔祝之至。

宣普度券 宣牒

宣給付諸符

昇仙保舉藉真曹，昭奕青玄啓夜牢。  
今日亡魂蒙聖力，精神縹緲玉華高。

太乙救苦天尊

引旛詣部衛司

守雄抱雌二大將，部衛亡故某人，詣部  
衛司，肅恭參謁。

某上啓九天普度院守雄抱雌二大將，本  
壇主副神將，衛護亡靈超度一切官吏。  
竊以拔領提携，仰隆名之救苦。送迎  
侍衛，藉真職之同仁。合罄皈依，恪祈  
感應。以今奉爲亡故某人，受鍊功圓，  
發遣昇度。顧惟翊導昇度之德，戒嚴  
護衛之恩。夙屬貴司，敢忘敷告，謹部  
亡爽，叩首祈恩。欲望上體好生，下矜  
趨死。法橋駕景扶持，徑上於朱陵。  
雲路流金保衛，疾登於碧落。真符昭  
告，聰聽無違，某不勝虔祝之至。

宣功德牒 宣天門牒關

宣護道牒

扶持引送上層空，都是威靈變化中。

今日亡魂蒙聖力，扶輪御景步天風。  
亡故某人，夙植慶根，欣逢昌運，藉慈光  
於東極，脫幽暗於北酆。禮道禮經禮  
師，一真呈露。鍊形鍊神鍊炁，萬葉澄  
清。刊名仙籍之中，證品玄階之上。  
八鸞唱轂，九鳳翼轅。御籙膺圖，幸受  
書於朱府。合符佩券，即證品於青宮。

拜清微莫大之恩，受妙嚴非常之德。  
自此凝真入妙，與二炁以同存。見性  
回靈，亘三光而不老。流芳胤嗣，衍慶  
宗親。更祈委炁以飛浮，少伺運神而  
發遣。所宜恭肅，拱俟昇仙。

寶華圓滿天尊

臣聞空洞非迹，神交而經緯潛孚。恍惚  
無形，炁運而玄元默契。內外混心珠  
之妙，顯微符性玉之真。匪去匪來，奚  
升奚降。臣等奉爲亡故某，仰依玄澤，喜  
遂釐功，諒雜還於塵葩，莫稽留於法  
從。仰瞻碧漢，已傳翠蹕之音。俯罄  
丹棕，曷挽瓊輿之景。臣不勝攀戀之  
至，謹稽首再拜奉送。

回輶頌

亡故某人，承恩青華，返魂黑朔，琅梵導  
登仙之駕，瓊章華汎景之輿。寶節寶  
幢，飛霄衢而接引。花臺花蓋，舞空際  
以邀迎。徑昇天上之天，獲離地中之  
地。遊神長樂，御炁妙嚴，永依蓮座之光，  
常預騫林之會。好去好去，毋忘道恩。

執旛送亡如儀

靈寶領教濟度金書卷之九十五

靈寶領教濟度金書卷之九

十六

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄齋用

普度淨供儀

步虛 洒淨

普獻頌 祝香

此香分七寶騫林之秀，蘊九色蓮花之精。自本自根，非雕非琢，徹靈源而玄珠晃朗，參鼻觀而天關洞明。爇向爐中，遙瞻供養。青玄祖炁無極道師，清微天中妙無上帝虛無自然元始天尊，禹餘天中妙有上帝虛皇玉晨大道君，大赤天中至真大帝萬變混沌玄元老君，東極天中青玄老君，運明保元上帝，太乙救苦天尊，十方分身應化無量救苦天尊，大行梵炁三十二天道君上帝，三天教主玄中大法師，靜老天尊，

三天聖師都天大法師，六合高明大帝，大慈大悲救苦真人，大慈大悲大惠真人，普救真人，東極注生宮真人，九天普度院三十六真人，青玄黃籙左右真司仙曹靈官將吏，朱陵火府南昌上宮主宰高真仙靈官吏，東華領教祖玄真師列位真人，經籍度師列位真人，地水職司，城隍社令，三界應感一切真靈，仗此寶香，普同供養。臣聞元始開圖，總制虛無之炁。青玄御極，裁成化育之功。陶九地以長春，朗三途而不夜。瑞光璀璨，妙炁羅敷。蕩蕩至道之難明，赫赫元功之不幸。臣叨恩領教，契玄學真。日精月華，媾陰陽於天谷。金龍木虎，翻離坎於玄關。回風運雌雄之真，流珠拱英元之御。妙哉大道，體乎自然。倘非積行而累功，曷遂登真而宴景。略意。以今企騫林而遐想，瞻蓮座以皈依。願九玄七祖之飛仙，南宮定籍。溥六道四生之受度，北府停輪。願潔蘭場，肅陳菲獻。伏望洪慈矜愍，玄貺昭明，駕獅座之端嚴，降龍符之煥耀。傾光溟滓，駐景玄虛。

慶雲開於生門，提携幽路。祥煙塞於死戶，拯救寒池。仗法水之慈悲，假威光之赫奕。庶依妙力，弘契神功。化雲厨而饌果芳馨。破艷都而陽和浩蕩。溥攝有情之類，咸歸無礙之筵。金簡頒恩，朱陵度命，四生六道俱趨衆妙之門，十極九垓盡稟無爲之化。祥煙羅絡，慧日昭明。遂齋主懇祈之真，副微臣開度之願，臣下情不勝虔禱之至。

請太乙

焚降真召靈符

東極天中長樂宮赤圓光內紫金容大聖，神通廣度沉淪九幽教主大慈仁者，尋聲赴感應念垂慈億億劫中度人無量。大慈大悲大智大慧太乙救苦天尊。

太乙救苦天尊一百聲

大聖元始天尊向乾方

志心奏請青玄祖炁玉清元始天尊妙無上帝，願賜慈悲之澤，昭垂應感之恩。普放神光，降流真炁，灌注普度淨供法食之中，攝化無窮，神變莫測，瓊漿寶飯，異果奇葩，非色非香，非空非假。祥雲甘露，綵霧霏煙，應念充周，

隨感飽滿。上奉諸天尊帝，中熏三界真靈，下供神祇回資品類。俾令六道幽靈，受食等衆，形神俱妙，定慧雙圓，大聖大慈清微天寶君無上尊。

大聖靈寶天尊向良方

志心奏請青玄祖炁上清靈寶天尊虛皇上帝，願賜慈悲之澤，昭垂應感之恩。普放神光，降流真炁，灌注普度淨供法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧霏煙，應念充周，隨感飽滿。上奉諸天尊帝，中熏三界真靈，下供神祇回資品類。俾令六道幽靈，受食等衆，形神俱妙，定慧雙圓，大聖大慈禹餘靈寶君無上尊。

大聖道德天尊向離方

志心奏請青玄祖炁太清道德天尊混元上德皇帝，願賜慈悲之澤，昭垂應感之恩。普放神光，降流真炁，灌注普度淨供法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧霏煙，應念充周，隨感飽滿。上奉諸天尊帝，中熏三界

真靈，下供神祇回資品類。俾令六道幽靈，受食等衆，形神俱妙，定慧雙圓，大聖大慈大赤神寶君無上尊。

大聖救苦天尊向東方

志心奏請青玄老君救苦天尊，運明保元上帝，十方分身應化無量救苦天尊，願賜慈悲之澤，昭垂應感之恩。普放神光，降流真炁，灌注普度淨供法食之中，攝化無窮，神變罔測，瓊漿寶飯，異果奇葩，非色非香，非空非假，祥雲甘露，綵霧霏煙，應念充周，隨感飽滿。上奉諸天尊帝，中熏三界真靈，下供神祇回資品類。俾令六道幽靈，受食等衆，形神俱妙，定慧雙圓，大聖大慈尋聲救苦來無上尊。

衆誦中篇，旋遶，灑淨

焚玉字真符

焚炁彌羅天尊

焚炁炁符

酆都夜壑，忽以光輝。照燭幽魂，來飴香糜。靈寶鍊符，百骸自飛。得見妙會，仙岐知歸。

清涼甘露天尊

焚甘露符

萬劫難過，功緣可崇。開闢幽趣，全假真風。梯航彼岸，濟惠無窮。念念生因，駕景飛空。

變化無盡天尊

焚變食符

玉清金闕，上元天一。化生靈泉，六龍普變。七珍奇果，妙絕芳鮮。玄通上食，廣滿無量。上仙火鈴變，神仙火鈴變。

酥醪抹味天尊

清微應化，施惠雨於八荒。東極垂慈，扇仁風於九有。仰蒙妙感，變化斛筵。宛如六甲之行厨，靈光煥耀。鬱若三天之雲饌，焚炁彌羅。所當開闢於五途，庸疾邀臨於萬類。俾歆於供，獲脫苦輪。爰念地獄沉淪，天光復隔，視諸孤滯，尤可矜憐。非憑救赦之金符，曷破羅酆之鐵網。恭依祕旨，次第宣行。

太乙救苦天尊

焚香關召青玄黃籙主，破符入獄出冥司。破獄真官，破獄靈官，破獄主吏，破獄飛吏，破獄驛吏，入獄赦罪靈官，

命符飛龍驛吏，持符神吏，遵乘太乙慈尊玉敕，疾赴玄壇，隨我神運，敕破九幽牢獄，拯提三掠囚徒，俾離寒庭，來霑勝果。

### 焚元君達冥符

東府上官，金霞萬重。日赫千光，雲炁蔚叢。中有玄皇，號曰上公。授我真文，宰治幽艷。統攝速召，疾見急通。追神破獄，領魂發沖。使皆生屍，鍊度南宮。元玄之命，不得隱容。

### 太乙救苦天尊

### 焚元君破獄符

### 焚青玄破獄符

### 誦救苦經一遍

### 焚青玄破艷都符

太乙天真，八方至神。五靈九炁，列曜澄明。九帝符命，五玄八專。北帝萬司，南星五正。二十八宿，三天外屏。一步回天，二步却精。魔魅惡毒，使人無成。步即消散，亡魂昇晨。一如告命敕。

### 太乙救苦天尊

### 焚破艷都誥十道

茫茫艷都中，重重金剛山。靈寶無量光，洞照炎池煩。亡過諸靈魂，身隨香雲旛。定慧青蓮花，上生身永安。十二遍。

玉簡羅敷，東極普生成之化。鐵城摧毀，北都停考對之威。香風扇三極之陽春，靈光散九幽之瑞彩。妙哉淨供，濟彼迷途。所宜召役於靈魂，疾俾提携於溟漠。符光洞煥，普三途五苦以來臨。慈敕遐宣，遍六道四生而受施。開關啓路，攝魄追魂，一炷初煙，萬真稟命。

### 八門開度天尊

玄冥寶真，萬神萬靈。輔臣超度，廣利羣生。萬召萬至，萬至萬明。願臣通達，上告皇天。功曹將吏，疾速來臨。急急如青玄老君運明保元上帝敕。

### 八門開度天尊

### 焚青玄帝君開業道符五道

照破幽途，撞開業道。東華元命，時刻無留。急急如青玄老君運明保元上帝敕。

### 八門開度天尊

### 焚青玄追魂九龍符

### 焚青玄追魂錄

### 太乙救苦天尊

準天尊敕，謹召三界十方盡玄虛際掌管六道主者，掌管四生主者，掌管孤魂主者。仰承符命，速爲追攝天道、人道、神道、地獄道、餓鬼道、畜生道一切之衆，胎卵、濕化、四生一切之衆，孤魂一切之衆，普臨法會，領霑功德。

### 焚召六道符六道

### 焚召四生符四道

### 焚召孤魂符十道

我稟金符策役，玄曹普赴壇前。遍詣九幽十道，依準青律抽魂。上極太虛碧落，下洞寒壘風輪。嘯命山林泉曲，追呼寂隴荒關。靡間有主無主，流浪滯魄窮魂。水火刀兵疫癘，飢饉癆瘵親冤。搜尋普攝普召，急疾來現根源。寅領天恩回施，弘開甘露法門。聚形返復祖炁，水火變鍊自然。速往速攝速赴，不許拒遏稽延。敢有叛違壇律，三元點降仙班。

如違上清詔令，幽陰永墮無原。

靈寶玄壇告命，雲程風火驛傳。

謹召青玄大慈六道尋魂使者，從士吏兵，仰承符命，速爲追攝一切天道，一切人道，一切神道，一切地獄道，一切餓鬼道，一切畜生道，各及眷屬，普臨法會，領霑功德。

焚六道尋魂符

太乙救苦天尊

謹召青玄上命夜光召魂神司玉女神吏，仰承符命，速爲追攝一切四生道，各及眷屬，普臨法會，領霑功德。

焚急召追魂符

太乙救苦天尊

謹召青玄太乙真光引魂玉女童君。仰承符命，速爲追攝一切二十四類苦爽，各及眷屬，普臨法會，領霑功德。

焚正炁引魂符

太乙救苦天尊

謹召青玄追魂急速使者，仰承符命，速爲追攝一切三十六類傷亡，及眷屬等，普臨法會，領霑功德。

焚五方追魂符

太乙救苦天尊

謹召青玄追魂攝魄飛雲使者，仰承符命，速爲追攝一切七十二類傷亡，各及眷屬，普臨法會，領霑功德。

焚五方攝魄符

太乙救苦天尊

幽魂及苦爽，死魄與陰靈。遊蕩幽冥域，喪失天地根。我以元始炁，返復汝胎嬰。聚魂鍊尸魄，鍊陽玄九陰。元始召魂章，斡運南北辰。陶鎔坎離間，顛倒結胚暉。勿滯愛河浪，流蕩生死門。隨我元始炁，斷絕苦迷津。悟理玄元道，離合自成真。出入無爲地，常居天地春。逃形九天關，不墮於苦輪。來赴玄壇鍊，隨章心自明。

太乙救苦天尊

持旛往門外行召魂儀

焚赤光三炁寶真符

焚太乙追魂攝現符

焚普度現形符

焚普度催現符

法師在壇，行普度傷亡復舊還形法

焚香供養九天普度院三十六真人，三

十六將軍，守雄抱雌二大將，追魂攝魄神將，神虎敵虎將軍，倒懸玉女，夜光玉女，合屬將吏。向來普召諸類幽魂中，有殘患之傷亡，未能還形而復舊，願施神力，悉俾完全。上尊運明保元上帝之威光，下開慈悲方便廣大之教法，悉趨勝會，永離幽途。謹依科儀，遍宣符命。

太乙救苦天尊

謹召廣度沉淪真人，呼魂喚魄將軍，明承符命，追攝天噴雷電死傷亡，復舊還形，赴旛受度。

焚符

太乙救苦天尊

謹召大慈廣度真人，聚魂集魄將軍，明承符命，追攝剛割分身死傷亡，復舊還形，赴旛受度。

焚符

太乙救苦天尊

謹召大悲救苦真人，驅魂逐魄將軍，明承符命，追攝官吏檢驗死傷亡，復舊還形，赴旛受度。

焚符

太乙救苦天尊

謹召大惠度亡真人，拘魂守魄將軍，明承符命，追攝絞斬犯刑死傷亡，復舊還形，赴齋受度。

焚符

太乙救苦天尊

謹召隨念救苦真人，掌魂管魄將軍，明承符命，追攝軍陣殺戮死傷亡，復舊還形，赴齋受度。

焚符

太乙救苦天尊

謹召八門開度真人，收魂召魄將軍，明承符命，追攝生產墮胎死傷亡，復舊還形，赴齋受度。

焚符

太乙救苦天尊

謹召大慈廣化真人，尋魂攝魄將軍，明承符命，追攝虎豹豺狼傷死傷亡，復舊還形，赴齋受度。

焚符

太乙救苦天尊

謹召慈悲接引真人，衛魂護魄將軍，明

承符命，追攝猛火焚燒死傷亡，復舊還形，赴齋受度。

焚符

太乙救苦天尊

謹召慈悲救難真人，尋魂討魄將軍，明承符命，追攝投河落水死傷亡，復舊還形，赴齋受度。

焚符

太乙救苦天尊

謹召水濟無邊真人，追魂喚魄將軍，明承符命，追攝懸梁自縊死傷亡，復舊還形，赴齋受度。

焚符

太乙救苦天尊

謹召火鍊丹界真人，安魂定魄將軍，明承符命，追攝遭逢毒藥死傷亡，復舊還形，赴齋受度。

焚符

太乙救苦天尊

謹召廣化幽魂真人，隨魂逐魄將軍，明承符命，追攝墜坑落塹死傷亡，復舊還形，赴齋受度。

焚符

太乙救苦天尊

謹召金光洞照真人，監魂引魄將軍，明承符命，追攝樹木壓損死傷亡，復舊還形，赴齋受度。

焚符

太乙救苦天尊

謹召隨願往生真人，引魂掌魄將軍，明承符命，追攝輒石磕碎死傷亡，復舊還形，赴齋受度。

焚符

太乙救苦天尊

謹召法橋廣度真人，召魂攝魄將軍，明承符命，追攝蛇犬蝮蝎傷死傷亡，復舊還形，赴齋受度。

焚符

太乙救苦天尊

謹召大慈救苦真人，守魂候魄將軍，明承符命，追攝牛馬踐踏死傷亡，復舊還形，赴齋受度。

焚符

太乙救苦天尊

謹召九幽拔罪真人，追魂攝魄將軍，明承符命，追攝牢獄囚禁死傷亡，復舊還

形，赴旛受度。

焚符

太乙救苦天尊

謹召消除罪業真人，呼魂取魄將軍，明承符命，追攝賊盜斫傷死傷亡，復舊還形，赴旛受度。

焚符

太乙救苦天尊

謹召消除惡報真人，管魂取魄將軍，明承符命，追攝共人鬪打死傷亡，復舊還形，赴旛受度。

焚符

太乙救苦天尊

謹召隨品注生真人，拘魂追魄將軍，明承符命，追攝咽喉生毒死傷亡，復舊還形，赴旛受度。

焚符

太乙救苦天尊

謹召廣度罪苦真人，取魂管魄將軍，明承符命，追攝癰疽癩毒死傷亡，復舊還形，赴旛受度。

焚符

太乙救苦天尊

謹召管魂注生真人，呼魂召魄將軍，明承符命，追攝瘟疫寒熱死傷亡，復舊還形，赴旛受度。

焚符

太乙救苦天尊

謹召普度幽魂真人，尋魂追魄將軍，明承符命，追攝膿血臭壞死傷亡，復舊還形，赴旛受度。

焚符

太乙救苦天尊

謹召引魂昇天真人，引魂領魄將軍，明承符命，追攝中風卒暴死傷亡，復舊還形，赴旛受度。

焚符

太乙救苦天尊

謹召永離長夜真人，保魂固魄將軍，明承符命，追攝癆瘵嘔血死傷亡，復舊還形，赴旛受度。

焚符

太乙救苦天尊

謹召引亡度橋真人。守魂掌魄將軍，明承符命，追攝五音呪咀死傷亡，復舊還形，赴旛受度。

焚符

太乙救苦天尊

謹召水火鍊形真人，收魂呼魄將軍，明承符命，追攝顛撲餓飢死傷亡，復舊還形，赴旛受度。

焚符

太乙救苦天尊

謹召隨時應化真人，收魂納魄將軍，明承符命，追攝蠱毒所侵死傷亡，復舊還形，赴旛受度。

焚符

太乙救苦天尊

謹召五行炁造真人，追魂攝魄將軍，明承符命，追攝鬼神侵損死傷亡，復舊還形，赴旛受度。

焚符

太乙救苦天尊

謹召隨機造物真人，喚魂招魄將軍，明承符命，追攝道途抱患死傷亡，復舊還形，赴旛受度。

焚符

太乙救苦天尊

謹召大悲赦罪真人，召魂喚魄將軍，明



承符命，追攝四肢浮腫死傷亡，復舊還形，赴旛受度。

焚符

太乙救苦天尊

謹召慈悲普度真人，喚魂叫魄將軍，明承符命，追攝官訟懊氣死傷亡，復舊還形，赴旛受度。

焚符

太乙救苦天尊

謹召大惠定光真人，追魂掌魄將軍，明承符命，追攝肺破腸斷死傷亡，復舊還形，赴旛受度。

焚符

太乙救苦天尊

謹召大慈救亡真人，勾魂追魄將軍，明承符命，追攝烝攻攪刺死傷亡，復舊還形，赴旛受度。

焚符

太乙救苦天尊

謹召火府度亡真人，守魂逐魄將軍，明承符命，追攝橫病侵害死傷亡，復舊還形，赴旛受度。

焚符

太乙救苦天尊

謹召水宮拔亡真人，驅魂逐魄將軍，明承符命，追攝疾患善喪死傷亡，復舊還形，赴旛受度。

焚符

太乙救苦天尊

謹召九天普度真人，十方普度真人，追魂攝魄將軍，明承符命，追攝四百四病死亡魂魄等衆，復舊還形，赴旛受度。

焚符

太乙救苦天尊

謹召守雄大將，神虎將軍，夜光玉女，明承符命，追攝一切男傷魂魄等衆，復舊還形，赴旛受度。

焚符

太乙救苦天尊

謹召抱雌大將，敵虎將軍，倒懸玉女，明承符命，追攝一切女傷魂魄等衆，復舊還形，赴旛受度。

焚符

太乙救苦天尊

運明保元上帝，敕召真人將軍，今准符命，依法召魂。上至九天金闕，下至九

地重陰，三界水府，六道四生，九州社令，五嶽河源，搜尋亡魂，急附吾旛，隨光受度，復舊還形，急疾來現，不得留停。急急如青玄老君律令。

符命頒宣，三界咸遵於帝令。幽冥品類，十方悉赴於玄壇。法衆運誠，慈悲接引。

移旛至壇前

衆諷青玄仙魂章

玉京萬法大羅尊，千重寶範億玄言。  
碧霞絳雲列衆道，玉闕金閣敷真文。  
偃定高真遊至空，八極飛神度無邊。  
鬱鬱昭昭萬烝中，吐聲如嬰烝成文。  
振動梵天是空道，靜明法耀擁慈雲。  
超關昏衢北羅鄴，列上金簡還靈明。  
炎炎火池成清涼，解刃挫鋒悉摧紛。  
豁散業境空法力，保召罪性來吾壇。  
天尊聖濟本無際，萬天萬地承真元。  
莫有不從不化度，超凌三界佐虛玄。  
隨心所召願心歸，仙信梵言如甘泉。  
一聞百骨解熱惱，朱陵開度成至玄。  
超凡大道入慈悲，不濯巨細惟翩躚。  
華夏泠泠引汝魂，逍遙獨步紫虛天。

冥關幽路，億劫不睹於陽光。玉字金章，瞬息可提於陰暗。惟四生之流浪，洎六道之沉淪。幸詣玄壇，將歆法供。爰念畜生一類，業報多岐，胎卵濕化之受形。或殊過去，來今之因緣未脫。洪慈曲憫，丹篆昭垂。俾完復於人形，方逍遙於仙路。冀九天普度之官吏，遵太乙玉帝之慈悲。密運神功，廓施妙化，一如告命，恭恪奉行。

### 焚普度改貌還形符

元始上帝，太乙玉真。五星正炁，入吾法中。真人水洒，畜生相形。變為魂魄，元逝亡靈。黃華玉液，日月精英。元皇炁灌，太乙改形。甲乙為炁，丙丁作形。戊己助炁，炁化作魂。聽師經法，鍊度飛昇。急急如青玄老君運明保元上帝律令。

### 太乙救苦天尊

復質金形，四生已鼓舞於化日。澡身浴德，萬類盍濯濯於蘭湯。道衆運誠，依科沐浴。

### 引亡入浴

靈寶領教濟度金書卷之九十六

## 靈寶領教濟度金書卷之九

### 十七

洞微高士開光救苦真人甯全真授  
靈寶通玄弘教水南先生林靈真編

### 科儀立成品

青玄齋用

### 普度淨供儀

慈悲接引天尊 引亡至浴所

焚黃炁陽精洞明符

焚普度解穢除塵符

焚普度仙衣符

清淨度魂天尊 引亡朝禮

次引旛遶斛筵，插旛當中

天尊言：混茫剖判，真粹運行。天地人雖分三極之殊，精炁神實貫一元之妙。迴黃抱紫，出青入玄，五炁朝而靈液周流，兩半合而雲泉灌溉。本無飢渴，奚有沉淪。自六賊之搶攘，致七情之流浪。離真喪本，心心業罪之修。趨死背生，步步輪迴之苦。是以清微

教主，無極道師，曲闡慈悲，化身救苦，處青華長樂之界，居東極妙嚴之宮，耀百寶之光明，洒一枝之甘露。設立淨供，濟彼飢虛，期脫沉冥，同登快樂。入齋意我以夙抱真元之炁，身膺濟度之章。庸按玄科，普施法食。神光璀璨，攝萬類以同歸。寶呪宣揚，檄千靈而共享。幸離冥漠，來睹陽輝。宜生欣慶之心，共迓逍遙之路。所冀同霑妙味，充滿飢腸。悟從前迷妄之非，覺本來正真之性。守雄抱雌二大將，各按所部，部衛形魂，前來受食。

清涼甘露天尊

移旛至斛前

道衆洒水如常

衆念

功德金色光，輝輝開幽闇。華池流真香，蓮蓋隨雲浮。千靈冲元和，常居十樓。急宣靈寶旨，自在天堂遊。

焚甘露符

清涼甘露天尊

悲夫長夜魂，熱惱三途中。猛火入咽喉，常生飢渴念。一二三洒甘露漿，如熱

得清涼。神魂生大羅，潤及於一切。

### 焚開咽喉符

#### 清涼甘露天尊

泠泠甘露滋，法味難思議。騫香流七真，明明何生疑。享此法食者，生天登紫微。

#### 清涼甘露天尊

#### 衆念中篇，旋洒如常

#### 大慈平等天尊

慈靈廣覆三途，除熱惱之悲。甘露周流萬類，飽醍醐之味。妙哉化育，大矣生成。惟久滯於幽關，幸來臨於陽路。宿根結滯，積業纏縈，非憑鍊質以蕩形，曷俾超凌而駕景。五龍橐籥，黃華飛東井之精。九鳳徘徊，炎光射朱陵之炁。盍依祕旨，宣演金章，召役仙曹，歡欣聽命。

#### 水火鍊形天尊

焚香謹召青玄黃籙左右府，陶魂鍊魄司官吏，監察司命司官吏，領魂錄功司官吏，持符告命飛雲通遊移籍司官吏，專度曲度普度司官吏，朱陵火府火鍊大將軍，火鍊靈官，南昌上宮鍊度大將

軍，鍊度靈官，火鍊童子，火鍊玉女，黃華冶鍊玉女，黃華蕩形玉女，黃華鍊質玉女，黃華鍊度玉女，光容玉女，光容童子，瑩身玉女，瑩身童子，清神玉女，清神童子，發光玉女，發光童子，水火交光大將軍，水火合形大將軍，水火聚炁大將軍，水火聚神大將軍，金木鍊形玉女，金木合炁玉女，金木仙衣玉女，金木仙帶玉女，金木仙車玉女，九天普度院火府度亡真人，水宮拔亡真人，火鍊丹界真人，水濟無邊真人，水火交鍊真人，守雄抱雌二大將，鍊度合屬官吏，直日功曹主事。願遵玉敕，尅赴玄壇，應感分輝，宣通役使。竊以青玄開府，符經緯以同仁。黃籙設官，統陰陽而宣德。上藉三天之聖澤，下提九地之愚魂。劍佩蟬聯，侍赫奕獅頭之座。旌旄鷺立，環陸離龍尾之班。九助夙著於三靈，弘業久彰於萬劫。凡伸召役，必沐感通。以今奉爲齋主某，開度某。提魂北鬱，已承帝渥之敷羅。鍊魄南宮，更賴神功之妙密。玄壇日近，朱表風馳，諒上承於德音，爲曲矜於哀

悃。欲望慈悲廣運，智慧張施。建流火庭，賜金膏而鍊質。立黃華沼，注玉醴以澄神。運東西離坎之樞機，發南北乾坤之橐籥。陶鎔翳累，鋼百鍊而愈清。疏淪昏塵，金屢陶而始瑩。察其良性，錄其善功，移名真籍之崇，定字仙班之峻。專度曲度，永超離於神鄉。送迎保迎，疾飛翔於帝所。遂齋主皈依之悃，副慈尊開度之仁。玄敕既頒，神功速應，某不勝虔祝之至。

#### 焚降真召靈符

#### 衆誦隱語一遍

謹請水池真靈將吏，隨我神運，變現水池，蕩滌亡魂。

#### 焚青玄建水池符

東井真精，天一生靈。寶光霞映，洞朗八冥。渺渺御運，神輝高明。絡羅鬱煥，黃華降澄。經緯交并，金池方盈。雲眸玉質，飛玄聚英。急急如青玄老君運明保元上帝律令敕。

#### 太乙救苦天尊

謹請火池真靈將吏，隨我神運，變現火池，冶鍊亡魂。

焚青玄建火池符

陽光煥赫，高化炎輝。丹陽寶耀，朱陵羅機。流火炎烈，紫金熾熿。絳霞萬道，瓊宮鬱儀。丙丁行事，萬梵敷施。南昌上官，炎帝之居。急急如青玄老君運明保元上帝律令敕。

太乙救苦天尊

挹玄液於月庭，素瀾流潤。降炎光於日闕，朱火輝煌。仙靈之冠佩雍雍，真聖之節幢濟濟。雖化城於玄陛，實移境於丹宮。所宜策將提魂，運神入鍊。恭依祕旨，次第宣行。

謹召守雄抱雌二大將，追魂攝魄一行官吏，各按所部，部衛形魂，前來受鍊。今日大慶，大道吉辰。諸天降鑒，萬真齊臨。三界共會，八景合并。地司列職，拔度幽冥。部衛使者，拘魂壇庭。引導亡爽，受鍊身形。各整威儀，疾速來臨。齊證妙果，上登朱陵。急急如上帝律令敕。

移旛，插於水火兩池之間

黃華蕩形天尊

謹請水池真人，玉女童子官吏，隨我神

運，引導亡故某，入赴水池，濯質蕩形，滌除陰穢。

焚普度水君拔亡鍊形符

元始運明，保元天尊。陰陽合真，水火精英。飛靈炁結，水精液君。北方黑帝，水府將軍。司功濟苦，聚魄度魂。水光流形，臭穢爲塵。驅除惡炁，炁灌身形。魂魄全備，超昇朱陵。三十六真人，三十六將軍。玉女擒伏，真人度魂。紫液炁聚，水灌亡人。六壬六癸，北坎大神。追魂喚魄，八大神君。引亡攝付，北陰水宮。水鈴扶桑，主水調津。手執水枝，光炁鍊形。真人法水，鍊度亡魂。急急如上帝律令敕。

焚青玄上仙聖光水鍊符

太乙救苦天尊

誦青玄左府華蓋玄靄真凝炁章

幽微藥宮爲仙宅，道貫樞靈圓景白。

飛根散葉翳翠條，妙炁三葉貫幽徹。鬱靈杳淑真人墟，雲景眸奔通烜赫。泥丸三五合靈芝，結珠固精神炁活。飛煙妙靄却殘凶，鍊獲飛仙去否厄。太玄太和左右府，紫清真人道爲主。冲虚恬淡自怡然，返老還胎導玄圃。知雄守雌資天機，回反乾坤鎮中土。飛玄神炁合青玄，含藥吐芳明子午。鍊養靈根不復枯，萬靈朝會君陰睹。琅音玉霜灌死骸，徘徊沉默須周普。擒龍捉虎坐鸞臺，隱韻流音邀妙府。黃華朱醴濯陽晶，萬道炁爲衆仙舉。

火鍊丹界天尊

謹請火池真人，玉女童子官吏，隨我神運，引導亡故某，入赴火池，鍊質返陽，仙化成人。

焚普度炎帝度亡鍊形符

元始至真，運明保元。乾坤合道，日月精英。玉液炁津，紫露盈凝。南方炎帝，擲火大神。司命保嬰，聚魂鍊形。帝炁神符，火光度魂。南斗六君，助吾符中。三十六真人，三十六將軍。守定魂魄，度上南宮。六丙六丁，炎帝侍

形。追魂拘魄，玉女大神。引亡攝付，火府朱陵。朱陵火鈴，主火火文。手執火劍，三昧火光。真人寶鈴，離坎鍊魂。燒諸塵垢，臭穢爲塵。急急如上帝律令敕。

離昧赤帝，火神炎君。擲火玉女，南斗將軍。火劍火炁，降入池中。燒魂度魄，燒煉身形。形影周備，清爽生津。接引亡魂，隨誥超昇。朱陵火府，南昌上宮。急急如上帝律令敕。

焚青玄上仙聖光火鍊符

太乙救苦天尊

誦青玄右府妙英飛爽集玄炁章

道貫青玄集素端，靈寶飛真瓊妙炁。生魂育魄返金容，五藏生華凝景翠。三田飛鬱映華峰，寶耀玄皇端拱會。提携日月運璇璣，九炁發春陽拆地。含和吐藥耀金蓮，驪龍吐珠呈采翅。鸞鳴鳳翔對上賓，虎嘯虛巖華曲麗。洞觀三界百關明，六緯七經齊天地。飛輪煥景擲炎靈，東井天河灌幽渭。九龍奔躍騫寶園，圓景燦煒總翹轡。飛霞採集咀玉根，二景胎仙生萬彙。

千灾却消摧凶殘，幽室光明何所繫。紫華混合青玄宮，電掣雷奔絳霞闕。雲臺碧落黍米珠，導達光玄煥二炁。注念左府悟玄機，反復陰陽成上位。

朱陵度命天尊

鍊質蕩形，陰累已消於地域。復神返炁，陽靈方證於天衢。假五行混合之功，成一景參同之妙。謹召青玄水火交光合形聚炁聚神大將軍，金木鍊形合炁玉女，九天普度院水火鍊形真人，隨我神運，交鍊亡魂，合炁聚神，全形受度。

焚太乙注生鍊魂生肝符

東極帝君，日月精英。三台流光，芝英素生。雷電使者，甲乙將軍。韓君丈人，萬物重榮。肝膽受炁，炁血通真。亡靈受鍊，超昇上清。真人濟世，六甲守魂。甲乙爲本，庚辛作形。五行造化，日月光臨。真人布化，九陽灌身。永脫輪迴，注生超昇。蕩除臭穢，黑簿消名。

焚太乙注生鍊魂生心符

東極帝君，太乙至真。南方赤炁，朱雀

飛騰。炎火光迸，金鼎丹紅。金光輝照，萬物發生。中凝七魄，上結三魂。心腸紫戶，隨炁而生。內外光照，返形歸嬰。萬神歸室，中宮黃庭。準依帝命，法水生心。太乙守命，五藏生津。聘落炁聚，中有至真。白元無英，紫葆神公。

焚太乙注生鍊魂生脾符

東極老君，日月精英。九天降炁，炁化成形。五藏六府，脾胃命門。三焦炁聚，泥丸絳宮。太微洞照，內合乾坤。千關百門，天精液君。五色化散，流布成身。龍虎潛伏，四正神寧。塵凡臭穢，稟質成身。水火既濟，符法鍊形。聚魂集魄，妙道長存。萬孽俱斷，一性真宗。三田周備，四肢生津。

焚太乙注生鍊魂生肺符

東極老君，運明至真。西方白炁，仙化金晶。炁海下運，炁血結凝。紫液流滿，玉戶絳宮。肺腸生離，乃及心胸。已枯再榮，已滅復生。九天上化，反復成嬰。臭穢蕩散，表裏洞清。三光垂明，真人灌形。仙人吐潤，鍊度亡魂。

百節骨肉，肝肺心生。金光降炁，內外朗清。變化自然，六府通真。

焚太乙注生鍊魂生腎符

東極青玄，太乙老君。北方黑炁，化生命門。丹田兩腎，膀胱下分。太乙守魄，司命守魂。飛靈真炁，炁入心中。死源斷絕，惡根沉零。五英交會，三時停輪。咸散罪名，注生宮庭。陽魂陰魄，二炁來迎。神入玉戶，百關生津。五行炁造，造鍊真形。大明蕩質，玉眸洗洗。去除塵垢，濟魂奉行。五藏六府，開化重亨。

焚太乙注生鍊度全形符

東極帝君，五方降真。六甲爲肝，六庚肺成。丙丁心主，壬癸腎門。戊己脾胃，三焦命中。精朝玉戶，炁在絳宮。百骸七竅，萬神化生。正炁來罩，日月灌身。四肢具足，回形還嬰。靈寶上章，溟泠玉文。三十六神，追度亡魂。九天降炁，太乙虛靈。開化自然，形影合真。太真鍊尸，好生文君。八將玉女，無極度人。真人度魂，驅除塵穢。浴尸八難，三欲以清。神炁內灌，脫故

鍊新。九地除罪，太乙成形。水火既濟，陰陽運成。五帝助法，萬神咸聞。

焚九天普度亡魂成形符

九天上帝，元始至真。太乙召亡，真人度魂。一炁成十，百千萬人。清水入形，一一還嬰。五藏六府，四肢皆成。臣憑符呪，玄上玉文。三宮昇降，往來無窮。五苦咸解，萬神保明。飛光昱昱，普告萬靈。助吾大道，太乙內經。符到爲形，注生凡塵。玉文符召，普度亡人。玉女守戶，真人化身。日月精炁，陰陽乾坤。萬象合道，魂魄合成。萬邪潛伏，百關生津。北陰獄神，稽首上清。

百神混景，既鍊化已成人。萬炁齊仙，可回靈而入妙。合嚴冠帶，用整威儀。謹召青玄鍊魂金木仙衣玉女，仙帶玉女，仙車玉女，運神攝化，速俾已鍊亡魂，冠帶身形，裝嚴受度。

誦青玄鍊魂玉章

太上初炁混陰陽，水火既濟方玄黃。鍊質玉容合仙品，飄飄飛步遊仙鄉。滓穢消除神明清，霞衣錦佩光琳琅。

靈寶青玄無上聖，開度功德不可量。一聲玄梵徹三界，綿綿道德生仙鄉。

服六銖而映三光，幸嚴容止。導五靈而超二景，將反形神。惟陽境之久離，慮陰關之乍脫。性天幽鬱，罔明解脫之機。心地蒙迷，莫認逍遙之路。倘不受持於經戒，曷能保度於劫輪。仰三途五苦之慈尊，實萬類群靈之慧逕。將依玉笈，肆演金科，當肅恭以披宣，宜勤拳而聽受。

移旛來法座前

智慧頌

智慧起本初，朗朗超十方。結空峙玄霄，諸天挹流芳。其妙難思議，虛感真實通。有有竟不有，無無無不無。

又

智慧常觀身，學道之所先。緲緲任玄肆，自然錄我神。天尊常擁護，魔王爲保言。晃晃金剛體，超超太上前。

又

智慧生戒根，真道戒爲主。三寶由是興，高仙所崇授。泛此不死舟，倏忽濟大有。當此說戒時，諸天皆稽首。

億劫化身天尊

我聞元始天尊，昔在香林園內，與無極聖衆演說玄一，了達希微。放九色微妙光明，照十方無極世界上下，洞徹等若瑠璃。乃見九幽地獄受苦衆生，倏忽之間，萬死萬生，報盡輪轉，化形畜生，或得爲人，身相不具，奴婢下賤，孤露貧寒，億劫不休，實堪慈憫。時有法解真人上白天尊，言如此罪魂，受苦無已，前生今世，何因何緣。天尊答曰：世末時訛，人民澆偽，爲善者少，爲惡者多，營造罪根，結諸惡業，自作自受，猶響應聲，終劫說之，亦難可盡。略舉其要，名曰三途五苦八難。此等罪趣，出離最難，非我法門，無由超度。三途者，一曰地獄考對前非，二曰畜生償酬往業，三曰餓鬼苦對最深，渴飲火精，飢食灰炭。五苦者，一曰刀山，二曰劍樹，三曰銅柱，四曰鑊湯，五曰漣汲溟波。八難者，一曰得生人道難，二曰去女爲男難，三曰形體完全難，四曰得生中土難，五曰值有道君父難，六曰稟性慈仁難，七曰值國土太平難，八曰與三

寶相遇難。如是諸苦流浪不還，展轉漂沈，與道長隔。耽淫五濁，執滯六情，外觸內侵，殃纏神染，一失人路，墮地獄中，長夜冥冥，無由解脫。過此境界，東極天中，有尋聲救苦天尊大慈仁者，發弘誓願，普救衆生，億億劫中，度人無量。但能回向，一念皈依，注想尊容，稱揚名號，尋聲赴感，應念垂慈，一切苦中，無不救護。天尊又曰：若有衆生，三業淨者，不墮三途。五毒淨者，即離五苦，修八行者，超度八難，與道合真。亡故某藉東極之慈光，形魂受鍊。離北都之幽暗，步武登真。可謂萬劫遭逢，夙生慶幸。尚慮宿根貪着，稟性顛蒙，一有背道忘真，坐使前功頓廢。我今遵依經旨，宣示戒條，立三寶以證明，仗衆真而監度。願歸正道，證立本心，保護受持，勤拳皈依。先稱三寶，次演戒文，清衆運誠，人各恭敬。

按人各恭敬

宣告亡靈皈依

無上道寶元始天尊

道寶讚

稽首皈依道，大無元始尊。杳冥開祖劫，混沌立天根。願施方便力，接引此靈魂。和：往生神仙界。

宣告亡靈皈依

無上經寶靈寶天尊

經寶讚

稽首皈依經，靈寶洞玄君。鍊金成鳳篆，揉玉寫龍文。願施方便力，接引此亡魂。和：往生神仙界。

宣告亡靈皈依

無上師寶道德天尊

師寶讚

稽首皈依師，神寶洞神君。先天傳大教，浩劫指迷津。願垂方便力，接引此亡魂。和：往生神仙界。

宣告亡靈皈依

青玄救苦太乙天尊

太乙讚

稽首皈依玄，尋聲救苦尊。九幽蒙德澤，億劫度沉淪。願施慈惠力，接引此靈魂。和：往生神仙界。

向來所說三寶上帝睿號，東極慈尊徽稱，生乎自然，隱於空洞，二儀藉以覆

載，萬物賴以生成。宜堅尊禮之誠，永奉玄元之教。今當敷揚妙戒，開朗昏迷。夫戒者，智慧昭彰，圓通無礙。受持之後，即有虛空鑒察，上聖天真，鑒映行藏，絲毫不漏，宜勤諦受，道不負人。倘猶懈怠身心，始終異向，再淪陰境，善果難逢。伏願專意靜心，肅容端己，誓勤侍奉，勿敗真功。必得劫劫長存，世世受福，不經苦惱，身有光明，永侍仙官，常依正道。請端容止，恭聽宣傳。

大慈說戒天尊

北帝頌

善哉元始尊，衆生慈父母。傾光紫微宮，曲映九幽戶。峨峨丘寒庭，回照朗冰浦。炎炎烈火獄，沛然洒法雨。圓通大哀智，常善濟衆苦。拔度長夜魂，今得稽首禮。

天尊言：欲免三途，當淨三業。淫殺偷盜，是名身業。嗔貪愚癡，是名心業。綺語妄言，兩舌惡罵，是名口業。此十惡根，障蔽善緣，滋生罪惱。若能清淨，永免三途。和：惟願亡靈，持心聽

受。

天尊言：欲離五苦，當淨五毒。眼觀五色，耳聽五聲，鼻貪五香，舌知五味，心生五欲。此五毒根，終劫纏綿，無由解釋。若能清淨，永除五苦。和：惟願亡靈，持心聽受。

天尊言：欲超八難，當修八行。一曰孝行，二曰慈仁，三曰貞廉，四曰忠信，五曰善忍，六曰柔和，七曰奉戒持齋，八曰冥心大道，八曰平等接物，無有冤親。以此熏修，善功充滿，身超八難，永契真階。和：惟願亡靈，持心聽受。

慈悲證戒天尊

奉戒頌

道爲無心宗，一切作福田。立功無定主，本願各由人。虛己應衆生，注心莫不均。大聖崇至教，亦由雨降天。高陵靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。

天尊告法解曰：此上法門，修行要義，轉羸入妙，證道登真，三世天尊，十方

大聖，皆修此行，昇入無爲。汝以慈悲，憫念群品，應當敷演，宣示未聞。俾苦海愛河，咸知修奉，出煩惱網，斷疑惑根，登解脫山，到逍遙境，身心清靜，深入法門。今者依按玄科，敷陳淨供，代天尊而說戒，超衆類以登真。自此業垢澄清，靈源湛寂，翱翔青霄之表，洞妙金華之臺。駕景飛玄，永無輪轉。我今給授戒牒，用作依憑，更運慈悲，遍宣符籙。各宜恭肅，一心諦受。

宣九龍符 大九龍符

運明誥 生天籙

宣普度券 移籍券

宣超生符 托生符

宣功德牒

向來演說戒章，給授符籙，並已周圓。伏願縱步金蓮，朝神玉闕，辭三寶以離席，隨戒力以登真，名注丹書，功標紫字，永無沉墮，俱脫苦輪。汎乘不死之舟，徑登長樂之界，少須舉送，平步登天。

寶華圓滿天尊

啓謝



臣聞空洞非迹，神交經緯潛孚。恍惚無形，罔應玄黃默契。內外混心珠之妙，顯微符性玉之真。匪去匪來，奚升奚降。臣等奉爲某，鍊度某。仰依玄澤，喜遂釐功。諒雜還於塵葩，莫稽留於法從。仰瞻碧漢，已傳翠蹕之音。俯罄丹悰，曷挽瓊輿之影。臣下情不勝攀戀，激切之至，謹稽首再拜奉送。

### 迴輶頌

謹召九天普度院守雄抱雌二大將，青玄黃籙專度曲度普度司神吏靈官，本靖主將副將，護道監壇諸大元帥，疾速部衛，今宵所度衆魂，上詣東極注生宮，隨品受生，一如青玄上生津令。

### 宣護送牒

### 送魂如儀

### 焚仙魂符

靈寶領教濟度金書卷之九十七

## 靈寶領教濟度金書卷之九

### 十八

洞微高士開光救苦真人甯全真授  
靈寶通玄弘教水南先生林靈真編

### 科儀立成品

青玄黃籙用

### 謝恩醮儀

### 燒香頌

各禮師存念如法

### 衛靈呪

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。刊名玉簡，錄字帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。和：與道合真。

### 鳴法鼓二十四通

無上三天玄元始三炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意。以今設醮謝恩，願得東極青玄妙炁百寶光明下降，流入臣等身中。令臣所啓之誠，速達徑御東極青玄老君、太乙救苦天尊、運明保元上帝御前。

### 請稱法位

位奉行青玄黃籙妙齋謝恩清醮法事小臣某，與臨壇官衆等，謹同誠上啓，上無極大道虛無自然元始天尊，太上道君，太上老君，東極青玄老君，太乙救苦天尊，運明保元上帝，十方應化救苦天尊，九天生神上帝，三十二天上帝，五靈五老上帝，上清十一曜星君，三元三官大帝，北極四聖真君，北極九府上真道君，南辰六闕上真道君，二十八宿星君，泰玄樞機三省諸相真君，靈寶五師真君，九天諸司真宰，天曹諸司真君，大慈大悲救苦真人，大慈大悲大惠真人，妙行真人，法解真人，太乙玄生府青玄黃籙院主宰仙官，黃籙九司仙靈，九天普度院仙真靈官，三元三官九府

主宰，五嶽五帝真君，五天聖帝，祖玄真師真人，本派經籍度師真人，北陰玄天酆都大帝，九壘十洞六宮九幽冥路主執神靈，本州本縣城隍里域廟貌聖衆，三界應感一切真靈。臣聞赤明開圖，祖炁敷洪濛之粹。青華御極，神光散混沌之精。握蒼蓋而稟清微，臨黃輿而蘇北鬱。靈風鼓舞，威神遍滿於十方。甘露涵濡，慧力圓通於三界。凝紫金之瑞相，宴碧玉之祥區。二府雲聯，九司星列。尋聲赴感，慈悲演念於香林。應化分身，道德凝玄於騫樹。天人皈命，幽顯傾心，爲苦海之道師，實昏衢之教主。今齋主某，一念疏淪，五體澄虛，俯軫北單，已拜鴻龐之惠。仰瞻東極，爰殫螻蟻之誠。莫結草以抒衷，姑采蘋而致薦。伏願龍旂翠節，翊霄景於玄虛。鳳葆珠幢，擁靈輝於碧落。清蹕肅獅頭之駕，黃麾嚴豹尾之塵。十華之月駟來臨，風雲混景。三極之霞驂迅蒞，水月交融。不忘應感之私，悉副懇祈之切，臣等不勝瞻天望聖，激切之至，謹當奏請。

謝聖

三界衆真，醮筵列聖，適伸拜請，諒沐光臨，請各整於仙班，共祇迎於帝馭。

降九位

鸞輿至止，鶴駕臨軒，與醮衆真，如儀朝禮，朝禮既周，請陞醮席，齋主上香，設拜初進酒。

初獻

步虛

具位臣某，與臨壇官衆等，謹重誠上啓三清上聖，東極慈尊，三界仙真，無鞅聖衆。臣聞雲層萬帝，青林凝生炁之華。風澤億曹，黑壘結死氛之翳。羅

六天之鬼域，列九地之神鄉。職宰陰陽，權司水火。銅柱峻峭，羅業網以高張。鐵壘周遭，儼冤輪而旁運。匪廓慶雲之汗漫，孰開昏霧之溟濛。俾宴玉芝，永超金粟。企神功於浩劫，仰願力於終天。虎拜勤渠，鳳瞻激切。今齋主某，重念亡故某，七情海闊，五蘊山高。循蝸角以酣華，罔思烏織。逐蠅頭而漁獵，妄意駒馳。目成迷空色之關，舌在味是非之徑，天和流浪，人僞

紛縈。黑簡書名，忽乘危以仇豎。青編削字，遂構釁而冤彭。等閑四大之各離，倏忽九京之長往。北酆考對，東岱推研，匪請命於妙嚴，曷升神於霄極。齋崇救苦，遵黃籙之金科。恩露施仁，敷青玄之玉誥。肅芝壇而肆覲，依蓮座以對揚。潔己首愆，精心徼福，果沐度生之惠，特敷超死之功。蒼極流光，超形形於地獄。朱陵受鍊，返炁炁於天堂。德踰嵩華之崇，澤邁滄溟之大，上德不德，固何意於環珠。知恩報恩，當罄情於瑤玖。蘋蘩冒列，葑菲自慚，爰有青詞，謹當宣奏。

旦詞

詞旨具陳，淵衷洞鑒。茅茨不剪，僭陳綿蕝之儀。黍稷非馨，重淪絲毫之獻。九思芒負，三省冰兢。伏願聽卑不遺，流丹恩於雨露。臨下有赫，道玄憲於風霆。混萬聖以時歆，羅千真而日鑒。蒙如蟻禱，亶謝鴻私，臣下情不勝虔禱之至。

亞獻

臣等謹重誠上啓三清上聖，東極慈尊，

三界仙真，無鞅聖衆。臣聞渺渺大羅，凝九華之妙炁。塵塵刹土，現三際之法身。慈雲東闡於玄真，聖日上宗於元始。玉毫遠照，廓華蓋而六合彌綸。金景旋飛，下崑崙而九幽昭朗。枝洒空青之藥，瓶流澄碧之英。妙矣玄機，大哉至化。凡皈依而有請，悉提獎以無遺。今玄壇所度亡故某，夙值塵基，幸逢道運。龍符煥耀，挽天河而洗前非。鳳簡熒煌，開地基而除俗垢。名快登於仙籍，魂疾證於真階。宣藉提

携，敢忘銜戴。壇崇玉帛，既證質於初忱。筵秩瓊林，敢微祈於終惠。伏願五神冰瑩，萬炁波澄，心易悟未畫之前，性初覺無名之始。驪珠獨耀，映滄海以涵虛。蟾玉孤明，掛碧霄而煥景。高步綠霞之境，棲神蒼極之庭。翠菡承顏，侍赤圓於長樂。金芝綴武，凝青靄於方諸。任揚拂石之衣，常振登金之履。齋主某鼎新革故，否去泰來。既往已藉於玉成，注殃雲散。見在更祈於錦覆，考訟風清。春臺融喜氣之多，夏屋萃歡聲之永。五枝挺秀，七葉聯

榮。朱臉酣和，漱瓊漿而霞映。紫髯留潤，餐琅液以雲凝。陰功丕著於鄉評，陽德永膺於家慶。和蒙丹禱，允拜洪恩。上願覆載清寧，儀璘煥耀，山靈薦祉，川后呈祥。熙熙藏富於三農，桑麻雨足。蕩蕩收烽於四鄙，榆柳春閑。無焚林竭澤之憂，遂戾天躍淵之樂。三途五苦，均鼓舞於福鄉。六洞十宮，悉歡呼於壽域。普提陰掾，齊證陽僚，臣下情不勝虔禱之至。

### 終獻

臣聞旋無色，凝無淵，函圓方而朗照。親有德，享有道，廓經緯以周流。俯殫翼翼之小心，仰叩巍巍之大造。光明濟下，冀旌几奏之勤。恍惚質旁，諒恕階升之瀆。以今敷陳禮畢，薦獻情周，蘭煙收鳳鼎之華，蓮炬暗龍缸之燼。前瞻翠節，將汎景於璇霄。後矚珠旛，已迴光於瑤極。月駟逶迤而旁舞，雲龍遙邁以高征。萬聖旋班，千真復位。運元會道，百神混合於泥丸。入妙凝真，萬炁虛圓於玄牝。臣下情無任，謹稽首奉送。

送聖

復爐

寶華圓滿天尊引出

焚燎

設醮禮幕儀

陞壇步虛

臣聞一元肇運，範圍經緯以生成。三洞開圖，橐籥陰陽而化育。故凡隸於名教，孰有外於陶鎔。仰惟大造之涵容，俯鑒小心之激切。以今恭焚道香，德香，無爲清靜香，清靜自然香，妙洞真香，靈寶慧香，超三界香，三景真香，滿瓊樓玉京，遍周天法界，無量寶香，遙瞻供養太上無極大道青玄老君，太乙救苦天尊，運明保元上帝，十方分身應化救苦天尊，十華真人，八極真人，大惠救苦真人，九天普度院三十六員真人，普救真人，普濟真人，青玄黃籙九司真衆，日宮太陽帝君，月府太陰皇君，南辰六闕上真道君，北極九府上真道君，五方五德上真道君，周天二十八宿真君，天地水府三官大帝，泰玄樞機三省上相真君，九天諸司真君，天曹諸

司真君，三天化主玄中大法師真君，三天大聖都天大法天師真君，靈寶經籍度師真君，靈寶監齋大法師真君，北極四聖真君，三洞四輔經錄法科上聖高真，神仙將吏，本靖諸省府院司將吏兵馬，五嶽五帝真君，五天聖帝，洞天福地靖廬治化名山洞府得道真仙，祖玄真師列位真人，北陰酆都大帝，東霞丹林扶桑大帝，城隍社令，里域正神，監察神祇，侍衛宣通，無鞅聖衆，三界官屬一切真靈。仗此真香，普同供養。以今奉為某崇建某齋，仰荷玄恩，圓成齋福，克卜今宵，恭陳三界。清醮一座，幾百分位，延奉真旂，庸酬宸貺。屬茲瓊筵肆啓，瑤範將宣。宜昭格於虛無，庸恢張於妙有。欲望慈光密映，真澤潛孚。翠葆珠幢，縹緲雲飛於輦路。丹旌清蹕，翩翩霞映於霄衢。三介齊臨，萬仙拱侍，共鑒葵傾之切，庸歆芹采之恭。班序齊周，壇場告備，雲鏞逸響，月籟流明，恭對道前，關行法事。

太乙救苦天尊

洒淨 宣檢攝符

太乙救苦天尊

詣掌醮司 啓白 宣呪

太乙救苦天尊

詣降聖司幕上香

某謹上啓三天門下降聖司真君，三界符使，四直功曹，仰冀真慈，俯垂采覽。以今齋主某，披心大梵，稽首上玄。盡齋戒沐浴之誠，致蘋蘩蘊藻之薦，尚祈聖造，曲賜感通。某仰惟縹緲鬱羅，籠葱劫仞，紫雲精璨，碧霧迴旋。慮紛葩五濁之庭，非曲密九清之境。觀延鸞馭，徒冒憲章，欲望聖慈，特為奏請太乙至聖，十方上真，三界諸司，十華靈衆，各嚴鹵簿，俯降道場。容臣降真召靈，合神攝景，普集玄虛之象，均臨廣大之筵，某不勝虔祝之至。

焚三皇內文

雲衢寥廓，萬象澄清。風翻鳳輦，雨集雲蒸。太乙下觀，五帝颺迎。霓旌紛列，雨蓋華星。霞衣凝肩，煙帔羽青。侍從九九，百億神兵。金剛力士，擁翼千層。上通三景，下徹酆城。鹵簿仗衛，嚴護五丁。雲龍翠葆，月駟珠駟。

步虛逸響，符寶宣并。俯仰庶類，仰羨華英。均臨黃道，瑞炁稜稜。流祥降福，大混天成。證明壇界，削落邪精。天恩眷育，地禁爛平。洪禧施萬品，惠澤遍寰瀛。

太乙救苦天尊

華夏行香

燒香頌 陞壇如式

靈寶領教濟度金書卷之九十八

靈寶領教濟度金書卷之九

十九

洞微高士開光救苦真人甯全真授  
靈寶通玄弘教水南先生林靈真編

科儀立成品

青玄救苦齋

醫治全形靈官醮儀

入壇洒淨

燒香頌

具位某上啓九天普度院三十六將軍，一行官吏，伏以青玄御運，弘三洞之真風。黃籙開圖，廓八紘之惠日。提拯死魂於不夜，超凌生魄以長春，必有真曹，共揚聖化。惟九天普度之將吏，實十地救苦之仙靈。同寅叶恭，贊生生於太乙。承符宣德，衍化化於大千。聖威煥耀於無垠，神力携持於有造。幽明咸賴，今古攸遵。今有某開度亡故某，超神北鬱，返景東華。慮生前疾病之支離，致死後形神之散漫。非假醫

治，曷克完全。茲先遇於款延，次專行於召役。少伸葵志，庸表蕝衷。伏願風馬來臨，列旌旂而後從。雲驂莅止，整鞍勒以前驅。俯降道場，共宣德悃。某不勝虔禱之至，謹當奉請。

請神

初獻

散花

某上啓九天普度院三十六將軍，一行官吏，伏以上聖垂慈，分職燮和於經緯。下愚蒙惠，建官調理於陰陽。凡神罔之疾傷，藉仙靈之平復。欽惟將吏，夙號威靈，攝魄提魂，每雷轟於夜壑。蘇榮整衛，常日赫於寒庭。正死去之頭顱，還生來之面目。號尊普度，承青玄百寶之光。壇紀昇玄，仰朱陵三華之耀。提携無極，讚歎難窮。今有齋主某，建設某齋，行召陰儀，來親陽境。切慮夙淪世網，寧無顛頓於沉痾。今墮冥途，所願調平於痼疾。庶俾還形而復舊，方能委炁以回元。可附靈旛，來參聖幕。故皈依於拯濟，斯保衛於安和。還復神奇，頓除臭穢，既荷鑒臨之

切，敢伸懇禱之私。輒薦蘋蘩，若投桃李。願曲歆於奠獻，為直鑒於衷私，某不勝虔祝之至。

亞獻

散花

某上啓九天普度院三十六將軍，一行官吏。伏以病有三因，別內外不內外者三十六類。脉明九候，辯表裏不表裏者二十四條。雖受炁之有殊，而傷形之可愍。或死非正命，或殞墮迷途，或尚抱惡緣，或已化異類，或生前汨沒，莫全百骸五體之真。歿後淒涼，難復三關四肢之舊。匪憑陰貺，曷遂私衷。惟冀廣運神威，廓施妙化。隨證施治，為返復於舊形。對病行醫，即完全於新體。以致如昔殞今殞，均安保而罔血如初。他傷自傷，悉和平而精神若故。急附旛而受度，悉離苦以登真。毋令身病不除，抱千生之心病。形傷莫療，懷萬劫之神傷。超脫客塵，各回本性，天恩遍覆，昭迴骸起死之榮。帝渥旁施，耀監真度生之澤。齊仙萬炁，證妙三元，某不勝虔祝之至。

終獻

散花

某上啓九天普度院三十六將軍，一行官吏。以今籟沉夜寂，月淡河澄，靈風扇道德之香，仙靈共樂。惠露沛玄元之澤，真聖同臨。願廣暢於神通，下拯提於冥識。遍際蟠充，高厚普召，靈儀究經絡整衛榮即全魂爽。庶天和之鬱勃，俾地禁之超離，效職周圓，別當奉送。

向來

小開啓頌赦儀

立真司幕

天師幕

贊引至道前列班

步虛

請水

宣解穢符

洒淨

宣辟禁符

啓白

臣聞太極肇二儀四象之位，凝生炁於東華。香林宣三途五苦之經，度死魂於北府。仁風有耀，化雨無垠。故凡丹悃之羅敷，必沐洪恩之浩蕩。以今恭炷道香，德香，無爲香，自然清靜名香，遍周天法界，遙瞻供養太上無極大道

元始法王洞真天寶，太上玉晨洞玄靈寶，道德高尊洞神神寶，東華青宮青玄老君，運明保元上帝，太乙救苦天尊，東方玉寶皇天尊，南方玄真萬福天尊，西方太妙至極天尊，北方玄上玉宸天尊，東北方度仙上聖天尊，東南方好生度命天尊，西南方太靈虛皇天尊，西方無量太華天尊，上方玉虛明皇天尊，下方真皇洞神天尊，大慈大悲救苦真人，大慈大悲大惠真人，注生真人，普救真人，東華青林太皇萬福道君，金闕上相檢仙司命東華道君，金闕大夫東華領真上清仙侯，東華青宮皇極青玄丹元真衆，玄中大法師，靜老天尊，三天大法師，六合高明大帝，三洞四輔經籙法科祖玄真師，列位真人，本靖諸省府院司仙靈官吏，青玄左右府，黃籙主破符入獄出冥司，黃籙察命大開光司，黃籙東華上命夜光召魂神司，黃籙監察司仙靈官吏，黃籙符誥命飛雲通遊移籍司，黃籙追魂仙魂鍊魂司，黃籙領魂錄功司，黃籙專度曲度普度司仙靈官君，功曹將吏，五嶽四瀆、洞天福

地主宰神仙，三界十方一切真靈。仗此寶香，普同供養。香乃玉華散彩，九炁凝煙。香雲密羅，徑冲九天。侍香金童，傳言玉女，與臣通奏，上聞帝前。令臣所啓，咸賜如言。以今奉爲齋主某，克卜今辰，肅建玄壇，招真命靈，依科闡事。恭願上帝覃恩，慈尊錫慶，鑿輿順動，彩仗低回。道炁百千萬重，簇三華之仙馭。屬車八十一乘，離九炁之青天。行幸靈壇，圓成齋福。諸天校錄，三界侍軒，幽夜開光，寒庭稟命，香花散漫，鐘磬和鳴，班序齊周，壇場羅列，清衆運誠，關行法事。

宣降真召靈符

步虛，旋行至香案前

真靈感應天尊

宣建壇牒

高功長跪，啓曰請赦

具位臣誠惶誠恐，稽首頓首，再拜上言。臣聞天機密運於大元，陰陽莫測。帝渥昭敷於萬有，生死俱霑。切惟艷域之幽深，實司罪魂之考對。冥冥長夜，杳杳泉扃，非憑曲赦之慈悲，曷俾沉愆之

洗蕩。今齋主某，幸因夙運，獲際真乘。功行未修，痛父天之長往。玄元可度，殫心地以披誠。乞準三洞隱書，請頒青玄睿號。寶赦期超逝魄，獲離迷途。伏念臣塵境凡材，下愚濁質，徒抱濟生度死之訣，未明通幽達微之方。抗志出塵，何心應物，既皈依之切切，矜誠懇之依依。恭按師傳，諸頒曲救。伏望青玄救苦太乙慈尊，俯垂恩光，特賜俞允。敕下三官九府，泉曲艷庭，嶽瀆河源，城隍社令，冥關幽路，考校真曹，咸令依準奉行。庶得九地生春，三途不夜，雲開生而煙塞死。慧日流輝，刀玉樹而劍騫林。慈光普被，陶鎔萬類，化育群靈，干冒天威。臣無任之至，再拜謹言。

太乙救苦天尊

出堂頌

靈寶領教濟度金書卷之九十九

### 靈寶領教濟度金書卷之一百

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

青玄救苦齋

#### 單朝儀

燒香頌

各禮師存念如法

衛靈

五靈列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金籙定籍，玉宇除殃。朱陵鍊質，飛神大蒼。三官九府，無極神鄉。普受開度，上生天堂。和：與道合真。

鳴法鼓二十四通

無上三天玄元三炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。其諸情悃，具載狀文。以今陞壇行道，願得東極青玄妙炁、百寶光明下降，流入臣等身中。令臣所啓之誠，速達徑御東極青玄老君，太乙救苦天尊，運明保元上帝御前。

請稱法位

具位臣某，與臨壇官衆等，謹同誠上啓太上無極大道虛無自然元始天尊，太上道君，太上老君，東極青玄老君，太乙救苦天尊，運明保元上帝，十方應化救苦天尊，九天生神上帝，三十二天上帝，五靈五老上帝，上清十一曜星君，三元三官大帝，北極四聖真君，北極九府上真道君，南辰六闕上真道君，二十八宿星君，泰玄樞機三省諸相真君，靈寶五師真君，九天諸司真君，天曹諸司真君，大慈大悲救苦真人，大慈大悲大惠真人，妙行真人，法解真人，太乙玄生府青玄黃籙院主宰仙官，黃籙九司仙靈，九天普度院仙真靈官，三元三官

九府主宰，五嶽五帝真君，五天聖帝，祖玄真師真人，本派經籍度師真人，北陰玄天酆都大帝，九壘十洞六宮九幽冥路主執神靈，本州本縣城隍里域廟貌聖衆，三界應感一切真靈。臣聞蒼極開圖，耀真風於經緯。青華御運，弘聖日於玄黃。上承龍漢之靈光，下煥鴻鈞之梵炁。巍巍惠澤，儼十華而拔領無邊。赫赫威靈，燭九幽而提携有造。迹本非迹，名豈常名，惟彰寂感之機，斯契潜昭之妙。臣等玄元衍慶，青府躋班。樂煙霞而道雷霆，聖恩浩渺，會風雲而依日月，帝澤涵濡。誓殫弘道之忱，庸佐宣仁之化。凡有投告，敢不上聞。

宣詞

按如詞言，備殫激切。齋主某一心皈命，百拜投詞。念夜壑之幽寥，莫開陰翳。痛寒庭之峭極，孰駕陽靈。銅關繚繞於業煙，鐵壘周遭於毒霧。一朝失足，萬劫驚心。悔過求生，雖有自新之路。雪冤度死，孰開捨舊之門。仰長樂二府之雲聯，而妙嚴九司之星列。

龍符煥曉，張慧炬於迷途。鳳綉照天，鼓慈航於苦海。實幽明之柱石，乃今古之津梁。爰潔靈場，肅陳法席，蘭篝縹緲，映七寶之騫林。筍簾玲瓏，耀九光之蓮座。降雲駟於黃道，輅電仗於霄衢。道炁百千萬重，中拱紫金之相。屬車八十一乘，旁參白玉之輝。威芒射而劍戟森森，靈光運而虹霓奕奕。萬真環拱，千聖朝參，爲駐景於虛玄，聽丹忱於哀素。天人蒙慶，家國咸休。以今陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太乙救苦天尊。願以是功德，上祝宗祧先聖，社稷尊靈。伏願麟驂駕景，鳳馭飛霄。登瑤池而覲金仙，遊神問道。汎琅庭而陪玉聖，御炁朝元。開皇圖有道之長，溥聖澤無爲之化。銀潢流潤，歌麟趾之振振。瑤曆輝華，宴虎頭而侃侃。今故燒香，自皈依師尊大聖衆，至真之德，得道之後，保天長存。和：與道合真。

以今陞壇行道，請法衆等，運茲二捻上

香。願此香煙騰空徑上，供養無上至真經寶。臣等皈身皈神皈命，首體投地，仰依太乙救苦天尊。願以是功德，歸流齋主某九玄七祖，億劫種親。伏願業基雲散，冤網天開。服霓裳而宴紫虛，登真步武。飲雲厨而登碧落，御景精神。參入無出有之玄，悟離妄登真之妙。祥開世澤，衍瓜瓞之綿綿。慶顯家聲，蔭松蘿之奕奕。今故燒香，自皈依師尊大聖衆，至真之德，得道之後，昇入無形。和：與道合真。

以今陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太乙救苦天尊。願以是功德，歸流九幽滯爽，五道窮魂。伏願積夜開光，重泉破暗，冰靜波而火息燄，十習俱捐。刀化樹而劍爲騫，六因何有。定水湛心花之耀，業山燦性蘂之明。超離黑單，永不經於苦惱。從容綠漢，常可保於歡欣。今故燒香，自皈依師尊大聖衆，至真之德，得道之後，長享自然。和：與道合真。



禮方 懺方

步虛

修行躡雲綱，乘虛步玄紀。吟咏帝一尊，百關自調理。俯命八海童，仰携高仙子。諸天散香花，蕭然靈風起。宿願定命根，故致標高擬。歡樂太上前，萬劫猶未始。

又

嵯峨玄都山，十方宗皇一。岩岩天寶臺，光明耀流日。焯焯玉林華，蓊璨耀朱實。常念餐元精，鍊液固形質。金光散紫微，窈窕大乘逸。

又

俯仰存太上，華景秀丹田。左顧提鬱儀，右盼携結璘。六度冠梵行，道德隨日新。宿命積福應，聞經若至親。天挺超世才，樂誦希微篇。冲虛太和炁，吐納流霞精。胎息靜百關，寥寥究三便。泥丸洞明景，遂成金華仙。魔王敬受事，故能朝諸天。皆從齋戒起，累功結宿緣。飛行凌大虛，提携高上僊。

三啓

樂法以爲妻，愛經如珠玉。持戒制六

情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹重誠上啓太上無極大道虛無自然元始天尊，太上道君，太上老君，東極青玄老君，太乙救苦天尊，運明保元上帝，十方應化救苦天尊，九天生神上帝，三十二天度

人上帝，五靈五老上帝，上清十一曜星君，三元三官大帝，北極四聖真君，北極九府上真道君，南辰六闕上真道君，二十八宿星君，泰玄樞機三省諸相真君，靈寶五師真君，九天諸司真君，天曹諸司真君，大慈大悲救苦真人，大慈大悲大惠真人，妙行真人，法解真人，太乙玄生府青玄黃籙院主宰仙官，黃籙九司仙靈，九天普度院仙真靈官，三元三官九府主宰，五嶽五帝真君，五天聖帝，祖玄真師真人，本派經籍度師真人，北陰玄天酆都大帝，九壘十洞六宮九幽冥路主執神靈，本州本縣城隍里社廟貌聖衆，三界應感一切真靈。臣聞開生塞死，神功昭東極之真。返陰含陽，聖澤遍北酆之密。天寶泉涵濡於惠露，空青枝飛洒於甘霖。應念分身，若沙塵而罔測。尋聲御炁，猶虛空而莫量。妙哉願力之深弘，至矣神功之廣大。凡屬圍範，悉賴陶鎔。今齋主某，仰慮亡故某。世垢縈心，俗塵滓性。是非關煙迷萬劫，漂浪罔知。人我山霧障千尋，流吹莫覺。恣七情而違地

理，縱三毒以悖天文。凌蔑綱常，惟思鴻鵠將至。廢置禮度，莫知鷄犬之當求。致愆紀於玄曹，而過書於黑簡。三彭結讐，二豎乘危。魂鎖神鄉，歲月回頭而幾閱。魄沈鬼域，音容轉眼以難窺。況六道之循環，與三途之輪轉，匪由提拯，曷遂超昇。爰鋪設於玄壇，庸皈投於洪蔭。伏願鸞和應感，獅御遙臨。察蒼生真切之忱，沛青極洪濛之澤。敕黃籙仙吏，頒龍簡以羅敷。命黑鬱冥曹，遵鳳綸而煥耀。智慧火焚其罪簿，慈悲水滌其塵蹤。夜光開光，破幽關而照燭。專度曲度，提冥路以超昇。移籍東諸，鍊魂南府。乘晨直上，無拘留逼合之憂。離夜橫飛，有侍衛送迎之喜。覲天顏於青闕，承帝澤於丹墀，永爲種民，常依道化。蒙不遺於葑菲，當益罄於菑蕘。齋主某祥光映體，瑞氣盈門，寇無犯於陰陽，百神順令。道聿扶於天地，五炁朝元。普庭戶以無災，合公私而有慶。上願圓方儲粹，河海開祥，萬姓載寧，四夷賓伏，動植被生生之德，咸毓天和。飛潛

陶化化之機，俱逃地禍。物有晨陽之照，鬼無夜哭之悲。冥路幽靈，咸昇神於道域。幽關冥掾，均進職於仙階。則上明天尊大慈之化，下副臣等皈命之誠，謹啓以聞。

發願

一願乾坤明素。二願炁象清玄。三願聖君萬壽。四願化洽八埏。五願天垂甘露。六願地發祥煙。七願四時應候。八願萬物生全。九願家多孝悌。十願國富才賢。十一願齋功廣被。十二願善瑞日增。

存神燒香

香官使者，左右龍虎君，侍香諸靈官，當令臣行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯霑恩，十方仙童玉女，侍衛香煙，傳臣向來所啓之誠，速達徑御東極青玄老君、太乙救苦天尊、運明保元上帝御前。

出堂頌

下壇

回靜默堂

謝師  
向來

靈寶領教濟度金書卷之一百

靈寶領教濟度金書卷之一

百一

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

早朝行道儀

燒香頌

各禮師存念如法

衛靈呪

青陽虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。其諸情悃，具載狀文。以今早朝，陞壇行道，願得玉清道炁靈寶妙光下降，流入臣等身中。令臣所啓之誠，還達徑御太上元極大道至真玉皇上帝御前。

請稱法位

具位奉行九幽玉匱明真大齋事小兆某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞清微御混芒之運，五劫流光。赤明開溟滓之圖，三乘布化。煥

萬天之慧日，扇九地之仁風。鳳篆龍章，錯落十華而耀彩。赤書玉字，昭回八角以垂芒。保制群魔，裁成庶類，生死悉歸於主宰，乾坤孰外於陶鎔。臣等億劫良因，兆齡慶運，膺圖御錄，未明玄妙之傳。綰綬佩符，莫究希夷之趣。盍附煙霞而高蹈，尚縈塵土以卑棲。磨蟻迴旋，隙駒倏忽，含丹青炳誓，已堅濟度之初忱。而金石微盟，敢叛承宣之終志。凡有投告，合爲關聞，具有心詞，謹當敷奏。

宣詞

按如詞言，丹忱激切。臣聞陽光煥赫，清都儼仙聖之居。陰暗淒涼，黑壤號鬼神之宅。織業機於六洞，張罪網於九幽。苦海茫茫，誰駕慈航於彼岸。昏衢寂寂，孰操慧燭於窮途。嗟扣地以何因，雖籲天而莫及。人所憫者，帝亦憐之。今齋主某宿劫以來，稟生之後，業塵流浪，惡障紛紜。愆書五靈之簡編，百身莫贖。過紀三元之簿錄，四大已離。夜壑幽深，冥關寂寞，非由提獎，曷遂超凌。爰皈命於玄穹，僭孚心

於紫禁。紋繒效信，金壁投誠，按威儀以告齋，遵典章而謝過。龍符赫奕，願回從欲之門。鶴馭羅敷，疾指登真之路。善功所被，帝渥無疆。以今清旦，陞壇行道，請法衆等，運茲初捻上香。願此香煙騰空徑上，供養無上至真通寶。臣等皈身皈神皈命，五體投地，仰依太上三尊。願以是功德，上祝宗祧先靈，社稷尊聖。伏願凝真太極，策景上清，八鑾暢金闕之興，九鳳啓琳宮之駕，衍璇源於地久，延寶曆以天長。

皇帝御政紫宸，垂衣丹宸，八冥並福，朝宗接武於堯疆。五嶽齊齡，拱極皈心於禹跡。車書萬里，夷夏一家，儲宮稟經聖之姿，王畿被同仁之化，椒房佐政，四德輝華，槐屋論恩，百工熙洽，共贊太和之運，益恢泰定之風。今故燒香，自皈依師尊大聖衆，至真之德，得道之後，保天長存。和：與道合真。以今清旦，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，五體投地，仰依太上三尊。願以是功德，

歸流齋主家億曾萬祖，歷劫種親。一性虛明，千冤解釋，南陵受鍊，蠲萬劫之根塵。東井澄清，淘多生之業垢。遊神芝圃，高步騫林，永垂蔭於後昆，克流芳於家慶。齋主某天開壽域，地闢福基，萬里春融，閑鎖壺中之日月。一簾風靜，永恬戶外之波瀾。膺朱軒紫蓋之華，享皓首厖眉之樂。詩書世澤，文獻家聲。今故燒香，自皈依師尊大聖衆，至真之德，得道之後，升入無形。和：與道合真。

以今清旦，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，五體投地，仰依太上三尊。願以是功德，歸流臣等師友，先靈道俗往逝。化機自息，神景交融，雲馭凌空，登瓊房而問道。風駟汎景，升瑤圃以棲真。遊宴太虛，逍遙無極，已往翱翔於聖澤，見存覆蔭於天休。淨八萬四千之塵勞，見金華定錄。圓一千二百之戒行，玉籍標名。普及九幽，均沾一視，五道息轉輪之苦，三塗免考對之冤。動植飛潛，

俱沾德雨。蛸翹蜎蠹，悉被慈風。今故燒香，自皈依師尊大聖衆，至真之德，得道之後，長享自然。和：與道合真。

禮方 懺方

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，摩靡法輪昇。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，謹重誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞除罪簿，滅惡根，寶黍恩周於三界。入福門，散宿對，香林仁洽於九幽。肇弘藥笈之金科，丕演玉堂之玄範。日星有赫，塞庭嘯駘蕩之春。雨露無私，幽夜沐涵濡之澤。再念亡故某，六情結繫，五賊構非。毒根烜赫以焚和，天和蕩失。業力飄揚而逞僞，人偽滋萌。心田之定水自波，性海之靈光易混。是非顛倒，人我躋扳。致南昌落丹簡之名，而北鬱紀黑編之字。三彭肆志，

二豎乘危。遂展轉於畏途，倏沉淪於幽域。極目條章之日皎，驚心威令之風行。匪上叩於天關，曷下開於地戶。是以聿嚴蓬宇，恪罄葵衷。遵玉匱以告齋，輅紫霄而錫慶。願矜丹悃，曲軫素衷。玉敕頒恩，身心口之宿緣雲散。金書度命，去來今之業對冰清。債訟消平，注殃和釋。形神俱妙，超朱火以證真。衣食自然，詣丹陵而鍊質。永超溟漠，徑陟虛無。齋主某五福攸寧，百祥萃止，藹祥煙於眷序，溢紫炁於門庭。蘭桂齊芳，椿松益固，齋功所及，慶澤均覃。更願高厚清寧，儀璘煥耀，星宿輝潤，風雨調和，六炁熙平，八表應金穰之瑞。三靈昭晏，四時宣玉燭之和。萬國歸仁，九圍慕義，隴畝遂謳歌之樂，要荒絕烽燧之憂。谷汲山棲，登真悟道，雲耕月釣，見性迴光。下周九地之沉靈，旁及四生之含識，普垂化化，各保生生。則上明天尊大慈之化，下副臣等皈命之誠，謹啓以聞。

發願

一念爲道四大合德，齋主七世父母，免脫憂苦，上升天堂，衣食自然。  
二念帝王國主，道化興隆，庠序濟濟，皇教恢弘，威儀翼翼，普天所瞻，民稱太平，四夷賓伏，祆惡自滅，賢聖日生。  
三念法師功德大建。教化明達，俱獲飛仙。  
四念同志學人，早得仙道，更相開度。  
五念九親和睦，好尚仁義，貴道賤財，行爲物範。  
六念損己布施，道士及飢寒者，天下人民，各得其所。  
七念蠕動跂行，一切衆生，咸蒙成就。  
八念赦貫前生今世罪對，立功補過。  
九念家門隆盛，宗廟有人，世生賢才。  
十念尊受師經，不敢中怠，平等一心，廣度一切，剋獲上仙，白日登天，拜見太上，永成真人，雲車羽駕。和：與道合真。

存神燒香

香官使者，左右龍虎君，侍香諸靈官，當令臣清旦陞壇行道之所，自然生金液丹碧芝英，百靈衆真交會，在此香火爐

前。令臣學道得道，求仙得仙，齋主受福，幽顯沾恩，十方仙童玉女，侍衛香烟，傳臣向來所啓之誠，速達徑御太上無極大道至真玉皇上帝御前。

出堂頌

回靜默

謝師

向來頌

靈寶領教濟度金書卷之一百一

靈寶領教濟度金書卷之一

百二

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

午朝行道儀

燒香頌

各禮師存念如法

衛靈

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破祆，明耀元功。金符召制，躡雲乘龍。謠歌慶會，散花太空。神化冥運，四極安隆。伏御帝前，罔有不恭。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。其諸情悃，具載狀文。以今臨午，陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行九幽玉匱明真大齋事臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝太帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞紫陽開雲錦之藏，金書啓運。碧落示黍珠之妙，玉字呈祥。慈

雲垂蔭於群靈，教雨沾濡於庶品。陰陽動靜，包羅神炁之中。天地方圓，囊括元功之內。道函無極，化洽有生，爲彼岸之津梁，實迷途之徑路。臣等宿生餘慶，億劫良基。佩天靈神鳳牒之篇，資緣師授。秉玄元始龍函之錄，負荷身修。冥抗志於幽林，乃遊心於陸海。功無塵露，過有淵陵。青律森羅，尚涵濡於帝渥。玄恩覆燾，盍參贊於天工。庶積微勛，小裨大教，凡有投告，敢不上聞，具有青詞，謹當敷奏。

宣詞

按如詞言，備殫忱切。臣聞九幽科品，昭因緣罪福之門。三籙威儀，備懺謝齋修之格。皆帝真開光於夜府，俾形神乘景於朝陽。朔單鬱絕之鄉，仁風披拂。潤澤網維之境，惠露昭回。凡皈命以投誠，悉登真而離苦。今齋主某，仰慮亡故某。業山萬仞，慾海千尋。南宮無紀善之編，北都鼓書愆之筆。一真顛倒，百體飄揚。冥冥九署之淒迷，戚戚三途之輪轉。匪由帝力，曷復天根。爰依玉匱之金科，肅建瑤壇之

寶範。香花鬱勃，繒綵敷羅，上祈九色之神輝，下燭八冥之鬼趣。拔出地戶，願度命於朱陵。無拘天門，即升神於碧落。普天同慶，與道合真。

以今臨午，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，五體投地，仰依太上三尊。願以是功德，上祝社稷尊靈，宗祧先聖。栖真皇極，證品虛無。翠葆珠幢，陪萬聖朝元之駕。金枝玉葉，衍千齡御運之期。

皇帝舜日齊明，堯雲廣覆。御飛龍而立極，福比滄溟。執大象以御天，壽躋華嶽。八表拱皇基之固，九圍朝帝祚之長。內掖徽柔，儲宮仁孝，麟趾鎮盤石之勢，虎符堅帶礪之盟。中外協心，邇遐慕化。今故燒香，自皈依師尊大聖衆，至真之德，得道之後，保天長存。

和：與道合真。  
以今臨午，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，五體投地，仰依太上三尊。願以是功德，

歸流齋主家九玄七祖，億劫種親。覺地虛明，慧源澄寂，悟本來之面目，澡濯塵根。還固有之形神，超凌道岸。藥簡注上生之字，芝圖紀落死之名，殃注消愆，雲仍襲慶。齋主某龜臺錫羨，鳳曆增齡。道炁扶搖，電掃千災於動止。靈光赫奕，雲臻萬福於家庭。七葉連榮，五符介祉。今故燒香，自皈依師尊大聖衆，至真之德，得道之後，升入無形。

和：與道合真。  
以今臨午，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，五體投地，仰依太上三尊。願以是功德，歸流臣等師友先亡，道俗往逝，靈元觀妙，沖漠升真。驂鶴駕於瑤京，充悅玄味。翼鸞輿於紫闕，餐聽法音。永證無爲，長辭有漏，見存眷屬，均被甄陶。漱玉液以延年，咽金丹而駐景，萬邪掃蕩，衆妙匡扶。九夜三途，煥陽光而轉燭。四生六道，超陰暗以飛仙。普天鼓舞於恩波，極地謳歌於德政。今故燒香，自皈依師尊大聖衆，至真之德，

得道之後，長享自然。和：與道合真。

禮方 懺方 命魔

步虛

控轡適十方，旋憩玄景阿。仰觀劫仞臺，俯盼紫雲羅。逍遙太上京，相與坐蓮花。積學爲真人，恬然榮衛和。永享無期壽，萬春奚足多。

又

大道師玄寂，昇仙友無英。公子度靈符，太乙捧洞章。金利耀金姿，龍駕倏來迎。天尊盼雲輿，飄飄乘虛翔。香花若飛雪。氛靄茂玄梁。頭腦禮金闕，携手邀玉京。

又

騫樹圓景園，煥爛七寶林。天獸三百名，獅子巨萬尋。飛龍躑躅吟，神鳳應節鳴。靈風扇奇花，清香散人矜。自無高仙才，焉能耽此心。

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪昇。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹同誠上啓。虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保

上傅，太平下教二十四真人，西城總真王君，太乙真人，東嶽上卿司命茅君，定錄、保定二真人，名山洞府得道神仙，三界官屬一切真靈。臣聞清微布化，敷七部以統天。赤明開圖，鎮五篇而育物。萬帝授度生之錄，三元敷起死之恩。永爲九幽玉匱之章，實貫三洞琅函之典。香林園內，昭上智啓請之勤。長夜府中，條下愚善惡之報。鞞鼓有契，影響無遺。再念亡故某，覺地昏迷，性天蒙昧。六塵六入，毒根流注於生前。十習十交，報障沉淪於身後。百二十曹水火之錄，三十六壘考對之司，慘慘寒庭，寥寥幽域，形墮三途之苦惱，神歸五道之輪迴。惟覺驚心，誰伸援手。非賴天恩之下覆，曷令地魄之高躋。是以恭啓玄壇，惠祈洪鑒。企清都而注想，瞻玉禁以馳神。願運洪慈，俯矜丹悃。普告三界，衛魂受鍊以成人。歷關諸天，滅惡斬根而度死。地除簡對，水絕盟言，遊觀七寶之林，肆覲九光之座。冤愆永釋，注訟無連。齋主某六氣風清，萬灾雲散，松



椿茂壺天之旦，芝蘭衍福地之春。九五箕疇，宴樂永符於志願。十三羲象，經營悉副於心期。民欲克從，天休滋至。上願天圖朗晏，地紀安平，經緯昭融，風雲靜默。五兵偃戢，萬邦沐仁壽之風。百穀豐盈，四海極聖明之治。圖書煥瑞，文範同疆。林壑棲真，疾證六通之妙。煙霞味道，早符萬行之圓。冥漠幽沉，飛潛動植，均被甄陶之澤，復超輪轉之機。一切有情，同登道岸。則上明天尊大慈之化，下副齋主皈命之誠，謹啓以聞。

### 發願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦是修，預以同學，普得升虛，與天相保，長存無憂。

二願諸天結炁澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠逮有生，保劫長存，億劫不傾。

三願土地覆載無窮，安平不陷，海淪不崩，保鎮家國，兆民興從，養生安死，

惠同十方，禾稼滋植，營運日豐，咸得厚載，萬類皆從。

四願日月二景高明，無有孛蝕，虧盈安清，光照諸天，洞消暗暝，保固劫運，世祚和平，普加潤惠，澤洒衆生。

五願星辰與日月齊光，轉燭照耀，映朗十方，各安其位，經緯直行，保鎮家國，無有災傷，四海寧一，普天興昌。

六願四時隨節推遷，景炁和調，無有災患，疫毒消滅，普天安平，五穀豐熟，國富民權。

七願浮雲結炁聚煙，飛空高澄，蔭覆玄玄，隱則無爲，散則彌天，神仙同歸，結友衆真，惠流一切，興國愛民，普濟群生，人同劫年。

八願風雨流洒無窮。普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化洋洋，兆庶稱慶，長樂未央。

十二願蜺飛蠢動，已生未生，咸蒙安全，普得生成，皆見元氣，受陽之形，草木果林，經冬不零，一切濟度，靡不鮮榮。和：與道合真。

### 存神燒香

香官使者，左右龍虎君，侍香諸靈官，當令臣午朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御太上無極大道至真玉皇上帝御前。

### 出堂頌

### 回靜默堂

### 謝師

靈寶領教濟度金書卷之一百二

靈寶領教濟度金書卷之一

百三

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

晚朝行道儀

燒香頌

各禮師存念如法

衛靈

五星高照，瑞炁飛浮。元始集神，天地交周。玉符寶節，嘯命微幽。擲火揚威，奸兇無留。萬魔振伏，紛葩卻消。摧怪伐惡，道炁周流。神光照夜，陰翳俱收。萬仙降格，扇景乘飈。群生成遂，惠遍神州。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，臣今奉爲入意。其諸情愆，具載狀文。以今晚朝，陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱職位

具位奉行九幽玉匱明真大齋事小兆臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞無色無淵，祖炁妙凝於混沌。成形成象，真精煥落於洪濛。因

五太以開圖，奠三靈而立極。道尊元始，光明洞輔之中。教演虛皇，化育堪輿之表。無文不度，有感斯通。臣等運際慶期，緣逢福會，膺九清之玉牒，佩三洞之瓊書。結友雲扃，未符高步，承流塵路，徒嘆陸沉。藉師寶之相携，感帝恩之下燭。尚寬玄責，猶服真乘。惟金科昭贊於仁風，度人是切。而玉律扶持於化日，濟物爲先。凡有皈投，敢忘關奏，況奉詞旨，敢不上聞。

宣詞

按如詞言，理宜拯濟。臣聞三界上雲層峨峨，強名道本。九壘下風輪混混，不睹陽光。分六洞以握化機，贊三元而裁政柄。香林諸座，宣九幽報對之瓊章。龍嶠臨軒，揚三錄威儀之寶典。妙哉化育，大矣生成。凡切切以皈投，必昭昭而度命。今齋主某，仰慮亡故某。劫終劫始，宿垢周遭。身後身前，客塵浩蕩。徇四大假合之質，冒三元禁戒之章。口語心生，人非鬼責。未落北酆之罪簿，曷登南上之仙名。竄賴天恩，庶寬地禁。庸潔玄壇而事帝，

恭依黃律以登齋。奉玉幣於十華，散金花於五界。願垂睿覽，申衍蕃釐。敕制地祇，有護衛送迎之喜。超凌福舍，無拘留逼合之憂。廣及際蟠，溥沾利益。以今落景，陞壇行道，請法衆運茲初捻上香。願此香雲騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝社稷尊靈，宗祧先聖。遊神紫極，汎景玄虛。蔭芝蓋以凝真，密扶聖祚。躡蓮臺而縱步，垂佑神孫。皇帝鳳曆開祥，龜圖昭瑞。御八駿而問道，翠葆清塵。乘六龍以御天，珠旒聽政。震索燦珠星之彩，坤儀昭璧月之輝。麟閣書勳，緝熙帝載，虎垣贊化，丕闡皇靈。衍百世於本支，式九圍於泰定。今故燒香，自皈依師尊大聖衆，至真之德，得道之後，保天長存。和：與道合真。

歸流齋主家九玄七祖，億劫種親。受化朱丹，削愆黑鬱。脫水火陰陽之對，榮領天祺，絕胞胎結節之根，永綿家慶。登瑤臺而遊宴，詣瓊圃以逍遙，衣食自然，形神俱妙。齋主某爲善最樂，與道合真。潤屋潤身，衍寶桂莊椿之樂。學詩學禮，茂庭蘭澗藻之華。百順凝增，千灾散釋。今故燒香，自皈依師尊大聖衆，至真之德，得道之後，升入無形。和：與道合真。

以今落景，陞壇行道，請法衆等，運茲三捻上香。願此香雲騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流臣等師友先亡，道俗往逝。慧源昭朗，覺海澄清，浴神流火之庭，雲網旋躡。蔭質明霞之館，天步高躋。見在宗親，俱沾善利。沐靈輝而保命，漱瓊醴以留形。五道三途，承陽輝陰靈而變鍊。八絃九極，膺玉符金液以薰陶。飛潛離化化之機，動植遂生生之性，無邊含識，普入大乘。今故燒香，自皈依師尊大聖衆，至真之德，得道之後，長享自然。和：與道合真。

禮方 懺方  
三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮太上無極大道。

臣等志心稽首，禮三十六部尊經。

臣等志心稽首，禮玄中大法師。

重稱法位

具位奉行九幽玉匱明真大齋事小兆臣

某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞道函萬象，玄雲混洞於清微。教出三乘，慧月流明於靈寶。瓊闕儼飛天之御，華堂嚴曲禁之藏。因啓請以開光，遂傳宗而導運。金科錯落，玉篆昭明，爲生死之津梁，實幽明之柱石。再念亡故某，無始以來，稟形之後，波情海欲，失精粹之生根。道貌天形，遂紛華之障業。目眩黼黻，耳蕩宮商，鼻貪馨馥之香，舌慕珍甘之味，身耽綺麗，性溺繁奢，迷清靜於六塵，陷希夷於千苦。形歸厚土，愆書五帝之曹。神掩重陰，過紀三元之府。非

由解釋，曷脫羈維。是以崇建玄壇，敷陳素悃。瑤鐘璧磬，引梵唱以虛徐。玉佩珠璫，耀仙儀而璀璨。紫宸日近，黃道雲開，願鑒映於齋功，俯開明於幽路。降東華九龍之符命，申錫天光。削北鬱六洞之簡書，超凌地暗。升形神於空界，度魂識於仙鄉。冤訟消除，注殃散滅，垂蔭奕葉，流福雲仍。齋主某厄難波澄，禎祥川至。南庭多暇，樂青春白日之閑。親族增榮，介綠鬢朱顏之喜。祖玄超度，孫子流芳，均保合於泰和，益茂隆於眉壽。上願三光朗晏，六氣和平，四極雍熙，九圍昭著。五山鎮地，配皇祚以齊齡；八海浮天，比聖躬而介福。華夷拱極，文軌朝宗。穀稼豐盈，樂堯天於畎畝。干戈偃戢，熙舜日於寰瀛。文明昌泰定之期，絃歌樂可封之俗。陽輝布德，陰域同仁。冥曹峻陟於仙階，苦爽超登於道境。林林庶品，蠢蠢群靈，均承曠蕩之恩，共福生成之祉。則上明天尊之化，下副齋主皈命之誠，謹啓以聞。

舉願

一願大道流行，普天懷德。  
二願一切有生，咸皆悟道。  
三願九夜幽魂，一時解脫。  
四願孤爽無依，咸得受生。  
五願天下太平，五穀豐熟。  
六願臣忠子孝，君仁父慈。  
七願四海會同，冤親和釋。  
八願潛胞處卵，咸得生成。  
九願積疾新痾，旋即痊愈。  
十願孤露衆生，豐衣足食。

存神燒香

香官使者，左右龍虎君，侍香諸靈官，當令臣晚朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御太上無極大道至真玉皇上帝御前。

出堂頌

下壇

回靜默

靈寶領教濟度金書卷之一百三

靈寶領教濟度金書卷之一

百四

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

十方懺儀

陞壇

步虛

東方

臣等今故燒香，皈身皈神皈命。奉為齋  
主某，仰謝東方無極太上靈寶天尊，已  
得道大聖衆，至真尊神，太上玄元無上  
三天無極大道無上玄元太上老君，太  
上丈人，皇上老君，青童上真天帝君，  
天帝丈人，九老仙都君，九炁丈人，百  
千萬重道炁千二百官君，太清玉陛下  
太極丈人，東華上相，司馬青童君，金  
闕後聖帝君，真陽始青神人，靈寶九仙  
君，青神玉女，主仙四真，東方無極世

界一切真靈。懺悔亡過某，億劫循環，  
宿緣輪轉，前世今世，捨生受生，三業  
六情，十因五欲，蘊結罪咎，積若沙塵，  
纏繞身心，曾無覺悟，日積月累，陽造  
陰謀，賦形以來，紀錄黑籍，厭世之後，  
報對玄曹，恐墮沉淪，莫由解贖。今依  
九幽玉匱明真科品，修齋行道，燒香散  
花，稽桑三元，皈誠十極，生死重過，並  
乞蕩除。伏冀濯質青玄，升神碧落，騫  
林高步，蓮座依光，垂澤見存，流芳奕  
葉，門庭日永，厄難冰清，齋福所覃，普  
天同慶，得道之後，升入無形。和：與道  
合真。

南方

臣等今故燒香，皈身皈神皈命。奉為齋  
主某，仰謝南方無極太上靈寶天尊，已  
得道大聖衆，至真尊神，無極大道南上  
赤炁丹靈老君，太和玉女，長生司馬，  
好生大神，韓君丈人，司命司錄度世  
君，萬福萬度萬生君，南方無極世界一  
切神靈。懺悔亡故某，億劫循環，宿緣  
輪轉，前世今世，捨生受生，三業六情，  
十因五欲，蘊結罪咎，積若沙塵，纏繞

身心，曾無覺悟，日積月累，陽造陰謀，  
賦形以來，紀錄黑籍，厭世之後，報對  
玄曹，恐墮沉淪，莫由解贖。今依九幽  
玉匱明真科品，修齋行道，燒香散花，  
稽顙三元，皈誠十極，生死重過，並乞  
赦除。伏冀御炁碧城，棲神絳闕，丹池  
瑩質，朱景陶輝，密利見存，益綿世澤，  
三災風散，萬善雲臻，齋福所覃，普天  
同慶，得道之後，升入無形。和：與道合  
真。

西方

臣等今故燒香，皈身皈神皈命。奉為齋  
主某，仰謝西方無極太上靈寶天尊，已  
得道大聖衆，至真尊神，無極大道西華  
太妙至真上帝，金堂玉真，龜臺仙母，  
金闕後聖上相帝君，玄古天師，萬聖道  
主，總仙總真，西極真人，神仙玉女，西  
方無極世界一切真靈。懺悔亡故某，億  
劫循環，宿緣輪轉，前世今世，捨生受  
生，三業六情，十因五欲，蘊結罪咎，積  
若沙塵，纏繞身心，曾無覺悟，日積月  
累，陽造陰謀，賦形以來，紀錄黑籍，厭  
世之後，報對玄曹，恐墮沉淪，莫由解

贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀列品瓊都，遊神素域，蓮臺協果，香苑通因，流福見存，垂休宗緒，禎祥霧擁，障累煙沉，齋福所覃，普天同慶，得道之後，升入無形。和：與道合真。

北方

臣等今故燒香，皈身皈神皈命。奉為齋主某，仰謝北方無極太上靈寶天尊，已得道大聖衆，至真尊神，無極大道太上老君，太上丈人，高上玉晨君，北極真人，萬聖道主，太陰真人，妙行真人，太陰司命，典死錄籍君，注算司馬，總司主殺大神，大皇真人，神仙玉女，北方無極世界一切真靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重

過，並乞蕩除。伏冀超質豐城，生神福境，九仙侶迹，七聖通符，澤被現存，祥滋宗胤，灾殃電掃，富壽雲蒸，齋福所覃，普天同慶，得道之後，升入無形。和：與道合真。

東北方

臣等今故燒香，皈身皈神皈命。奉為齋主某，仰謝東北方無極太上靈寶天尊，已得道大聖衆，至真尊神，無極大道飛天神王，消魔制靈監真都統神人，萬度萬生君，皇上玄老君，真文玉女，東北方無極世界一切真靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈依十極，生死重過，並乞蕩除。伏冀聽法始青，登真太素，金河滌相，寶地遊神，流蔭見存，垂光世嗣，家庭日靜，祥祉春融，齋福所覃，普天同慶，得得之後，升入無

形。和：與道合真。

東南方

臣等今故燒香，皈身皈神皈命。奉為齋主某，仰謝東南方無極太上靈寶天尊，已得道大聖衆，至真尊神，無極大道南上老君，丹靈皇老，上元長生真人，度世司命司馬司錄，好生韓君丈人，起死更生真人，鍊質還形大聖神王，萬福真人丈人，太和玉女，東南方無極世界一切神靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀列品青華，濯形丹霍，星宮御景，日觀宣遊，福被見存，澤敷宗祚，萬灾冰釋，百順星羅，齋福所覃，普天同慶，得道之後，升入無形。和：與道合真。

西南方

臣等今故燒香，皈身皈神皈命。奉爲齋主某，仰謝西南方無極太上靈寶天尊，已得道大聖衆，至真尊神，無極大道天皇老人，西南元皇真君，洞靈太陽衆聖，生炁君，長生度世飛天大聖，神仙玉女，西南方無極世界一切神靈。懺悔亡故某，億劫循環，宿緣輪轉，前世今世，捨生受生，三業六情，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀釋過羅酆，澄神閬苑，飛麟駕景，翔鶴騶空，垂貺見存，舒光奕葉，休祥雨集，障厄波澄，齋福所覃，普天同慶，得道之後，升入無形。和：與道合真。

#### 西北方

臣等今故燒香，皈身皈神皈命。奉爲齋主某，仰謝西北方無極太上靈寶天尊，已得道大聖衆，至真尊神，無極大道上帝，真皇老人至真，西北方無極世界一

切神靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀魂度月庭，神超幽域，清都濯質，紫府棲真，介祉見存，延祥宗裔，壽基地大，神祿川增，齋福所覃，普天同慶，得道之後，升入無形。和：與道合真。

#### 上方

臣等今故燒香，皈身皈神皈命。奉爲齋主某，仰謝上方無極太上靈寶天尊，已得道大聖衆，至真尊神，無極大道太上三尊，三十六天帝君，太上無爲大道諸君丈人，最大至尊，無極太上洞明普照最上至尊，玄元大道無鞅數衆，無形無名元始高尊，玉清上清四民諸天，三界八梵混沌虛無自然，太上無垠冥寂玄通大智慧源、正一盟威三洞威神，無上

無爲道中之道元皇玉帝，應感真精，慈父聖母，無量道德真君聖人，道德萬生君，萬炁萬元君，萬福萬壽君，億千衆道，溟滓大神，太清玄元無上玄老三炁君，太清太玄中黃正一君，上一正一元一三尊至真，太元太始太素太初太儀太平太古太泉君諸君丈人，九老仙都君，正曆九炁君，陰陽生炁君，天一太乙君，皇天太上元一神寶、天寶、靈寶君，元神元寶元聖君，天皇老君，南極皇神老君，銅域大聖，中央黃老君，太和太上皇真君，天皇真人，上古三師，天師君，道德父母，日君月后，諸天星宿三光大人，王父王母，五星九星君，上方世界一切神靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀諸天書名，萬真紀

善，遷神金闕，縱步玉京，密佑見存，克昌後裔，千殃霧廓，萬祉日升，齋福所覃，普天同慶，得道之後，升入無形。和：與道合真。

下方

臣等今故燒香，皈身皈神皈命。奉為齋主某，仰謝下方無極太上靈寶天尊，已得道大聖衆，至真尊神，無極大道下方玄黃洞淵靈寶高皇，九土四司五帝，十二仙君，太靈皇母，四司真人，后土九地，元黃九宮真人，四瀆五嶽佐命十仙，儲佐丈人，三十六洞天，七十二福地，三百六十名山，二十四治真人，九江四海，十二溪源，靈洞川澤，下方無極世界一切神靈。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀削落地司，升神天

路，清都汎景，紫府凝真，利樂見存，光華世胄，禎祥月皎，塵濁煙消，齋福所覃，普天同慶，得道之後，升入無形。和：與道合真。

總十方

臣等今故燒香，皈身皈神皈命。奉為齋主某，仰謝十方無極太上靈寶天尊，已得道大聖衆，至真諸君，丈人梵炁天君，十鄉神仙諸靈官。懺悔亡故某，億劫循環，宿緣輪轉，前世今世，捨生受生，三業六情，十因五欲，蘊結罪咎，積若沙塵，纏繞身心，曾無覺悟，日積月累，陽造陰謀，賦形以來，紀錄黑籍，厭世之後，報對玄曹，恐墮沉淪，莫由解贖。今依九幽玉匱明真科品，修齋行道，燒香散花，稽顙三元，皈誠十極，生死重過，並乞蕩除。伏冀解脫幽都，飛翔八極，上告明於五帝，落罪錄於三官。朱陵鍊度命之魂，青華證登真之果。諸天保命，面禮金容。三界超凌，光依玉座。遊宴四明之藥館，逍遙九寶之芝宮。保命長存，登真度品。垂芳流慶，益覆蔭於宗祊。介福延祥，密

匡扶於胤祚。家庭清晏，眷序繁昌。五道三途，均被迴骸之澤。四生萬類，普陶度品之恩。齋福所覃，普天同慶，得道之後，升入無形。和：與道合真。

出堂頌

回靜默堂

靈寶領教濟度金書卷之一百四



靈寶領教濟度金書卷之一  
百五

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

謝恩醮儀

燒香頌

各禮師存念如法

衛靈

五星列位，煥明五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金錄定籍，玉宇除殃。朱陵鍊質，飛神太蒼。三官九府，無極神鄉。普受開度，上生天堂。和：與道合真。

鳴法鼓二十四通

無上三天玄元始三炁太上老君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入意。以今設醮謝恩，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行謝恩清醮法事小兆臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝太帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞大道凝精，萬象稟不言之教。至真御運，群靈依衆妙之門。判無極

以裁成，廓太虚而橐籥。度分五億，孰非梵炁之包羅。域布三千，盡出神功之宰制。開張萬範，周迴十方，融璇璣經緯之輝，結嶽瀆飛潛之勢。至外無外，自然而然，稟生即囿於仁風，歸命安逃於化雨。今醮官某下矜黑鬱，上叩紫宸，獲齋福之團圓，感帝恩之汪濊。爰殫葵藿，聊致蘋蘩，不量小物之勤，僭瀆大均之聽。伏望慶雲濛藹，瑞霧輪囷。綠輦丹輿，縹緲而玄龍驂乘。霓旌羽蓋，翩翩而朱鳳翼轅。碧落啓途，玄虚清道，會十華而簇仗，御上帝以臨軒。臣與醮官，無任懇切之至。

請神

三界衆真，醮筵列聖，適伸拜請，諒沐光臨，請各整於仙班，共祇迎於帝馭。

降九位

鸞輿至止，鶴駕臨軒，與醮衆真，如儀朝禮，朝禮既周，請陞醮席。齋主上香，設拜初進酒。

初獻酒

散花

重稱法位

具位臣某，謹重誠上啓三清上聖，七御玄尊，十極高真，萬天上帝，日月星宿，省府曹局，地水嶽瀆，城隍社令，三界官屬，一切真靈。臣聞萬天萬地，拱清微無極之尊。一陰一陽，顯赤明有福

之象。植神靈而五文開廓，列品彙而三界森羅。職覆職載之既彰，主善主惡之攸判。總御生死，囊括樞機。惟帝真垂蔭於慈雲，故洞輔昭宣於慧日。合百神，理五炁，成冲虚汎景之功。超八難，度三途，得鍊質蕩形之妙。並混輿而化育，廓宇宙以提携。功德難勝，禎祥可冀。今醮主某，丹忱激切，素悃勤拳。念亡故某，祖炁分靈，天和毓粹，自七情之顛倒，至六賊之搶攘。定水波翻，豈但滾愛河之浪。慧源瀾倒，誰爲澄欲海之濤。混心地於客塵，洞性天於業網。罔知藏六，豈識存三。地水火風，散生根於二豎。夢幻泡影，彫命樹於三彭。南宮削紀善之編，北府定書愆之簡。寒庭寥泬，幽域淒涼。憲章之冰鑑無私，科禁之權衡有準。非由拯拔，曷遂超凌。爰建謝於玄壇，

庸皈依於丹禁。燒香行道，禮懺誦經，龍符、播告於三天，鶴赦誕敷於九地。果蒙善應，獲就齋功。敢殫事帝之恭，聿陳清醮。庸寓由衷之敬，少報洪私。具有青詞，謹當宣奏。

宣詞

詞旨具陳，淵衷允鑒，希回聖澤，俯慰凡情。環草徒堅，敢謂罄格天之敬。曝芹有獻，匪云殫嚮帝之儀。姑肅表於微忱，諒曲回於大造。淵臨冰履，僭干咫尺之天威。春育海涵，願副再三之民欲。庶終劫石，永戴玄元。臣與醮官等，不勝望恩之至，謹稽首再拜。

亞獻

散花

具位臣某，謹同誠上啓三清上聖，七御玄尊，十極高真，萬天上帝，日月星宿，省府曹局，地水嶽瀆，城隍社令，三界官屬，一切真靈。臣聞玄元闡三洞之先，淵源道域。靈寶演一乘之妙，綱紀法門。生神帝啓於金書，保運天開於玉宇。華林駐景，三籙垂文，寶黍凝真，二章演奧。惟明真之巨典，迺玉匱

之靈文。長生衛藏，飛天披授。因緣報對，爰彰善惡之機。齋直威儀，聿露懺祈之旨。梯航生死，砥柱幽明。今醮官某，矜彼亡靈，墮茲幽趣，歸依紫極，證質丹誠，澄神傾事帝之恭，潔己按修齋之格。芝壇設象，蓮炬騰輝，裊百和之龍煙，拂千枝之鳳萼。皈心十極，請命三元，翻藥笈之靈編，按雲囊之寶範。返魂北鬱，領迴骸起死之恩。鍊質南丹，拜度命登真之賜。有嚴有翼，以謝以祈。伏願申錫恩綸，昭回休命。三官九署，冰消累劫之簡書。五帝四司，風掃多生之簿籙。永離地中之地，獲登天上之天。克遂逍遙，不經輪轉。雲厨甘露，自然充悅。其精神霓裳羽衣，任適裝嚴。其容止頓除債詛，盡絕冤殃。垂福澤於雲仍，流光華於世葉。醮官某三關通暢，五體充榮，道炁百千萬重，耀門闌之瑞藹。歲功七十二候，溢庭戶之歡聲。丹桂傳芳，靈椿不老。雲聯隴畝，蔭桑梓以同榮。星列倉箱，普絲麻而共樂。壺天有喜，福地無塵。臣等綴龍尾之玄班，覲獅頭

之寶座。俯仰有格，莫稔朝綱。勳行未書，恐貽帝譴。宣賴函容之賜，昭垂曠蕩之仁。上願三極隆平，五靈順暢，星辰朗晏，風雨均調。天出圖書，彰皇祚之大統。地同文軌，昭聖運之丕基。家有詩書，物無疵癘。金革不揚於烽燧，旱蝗無撓於農桑。庶政雍熙，百工緝理。臣等三師四友，陶靈貺以高躋。五族六親，沐玄輝而自適。山棲谷汲，疾悟道真，順泳雲飛，速超苦趣。五道息丹書之對，三途滅黑簡之愆，普潤乾坤，均陶仁壽。臣與醮官等，下情不勝，皈命之至。

終獻

散花

具位臣某，謹重誠上啓三清上聖十極高真，醮筵內外一切真靈。臣聞出地戶以升神，帝恩下照。叩天闈而請命，民情上通。肅將振鷺之班，對越和鸞之御。靈光如在，禴祭非文。慚隆厚之莫酬，賴高明之曲映。以今珠篝燼冷，翠鼎煙沉，紫虛收玉籟之音，碧漢轉銀潢之影。芝輪羽葆，諒返玄都。霓節星旌，

將還玉闕。萬聖戒嚴而促駕，千真御景以迴靈。鶴馭凌空，指煙霞而歸洞府。虬幢俯邁，步雲霧以返滄溟。各復攸司，寂無遺響。臣等瞻馳徒切，攀戀無階。日居月諸，願降簡穰之祉。天高地厚，普熏陶冶之仁。臣與醮官等，無任激切之至，謹稽首再拜奉送。

迴輶頌

復爐

靈寶領教濟度金書卷之一百五

靈寶領教濟度金書卷之一

百六

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

鍊度儀

靜默堂序立

華夏頌引至鍊度壇

設鍊度醮

金闕化身天尊

法師陞座

祝香

具位臣某焚香，奏啓太上無極大道虛無自然元始天尊妙無上帝，虛皇玉晨大道君妙有上帝，萬變混沌玄元老君至真大帝，東極青玄老君，太乙救苦天尊，運明保元上帝，玉清神霄真王長生大帝，南極真王朱陵大帝，九微太真青童玉明大道君，紫微元靈青金丹皇大

道君，九霄自然生神帝君，度人三十二  
天上帝，五老四梵十極十華諸天上帝，  
太陽鬱儀帝君，太陰結璘帝君，五方五  
德上真道君，北極九府玉晨君，南辰六  
闕上道君，周天經緯列宿星君，三元三  
官大帝君，三十六部尊經玄中大法師，  
靜老天君，三天大法師，六合高明大  
帝，靈寶經籍度三師君，泰玄樞機三省  
諸相天君，九天諸司真君，天曹諸司真  
君，上清黃籙院使真君，南昌上宮朱陵  
火府主宰高真，青玄黃籙左右府主宰  
真君，九天普度院主宰真君，南天度人  
不死尊神，南極長生大君，好生韓君丈  
人，度世司馬大神，迴骸起死監生大  
神，靈寶玄局施用仙曹，三界所向仙曹  
聖衆，三洞四輔經籙法教上聖高真祖  
師，玄一玉輿真人，寶輿真人，綠輿真  
人，太極左宮仙公冲應葛真人，玄壇受  
事，諸省府院司仙靈官吏，五嶽五帝真  
君，五天聖帝，洞天福地名山大川靖廬  
治化仙官主宰，本靖祖玄真師列位真  
人，經籍度師列位真人，北陰玄天酆都  
大帝，東霞丹林扶桑大帝，泉曲十殿真

君，九壘六洞諸司冥官，四海四瀆三江  
九河溟泠大神，五道大神，北冥執職曹  
僚掾吏，九州社令司主者，十方道都大  
主者，城隍里域遠近廟貌無鞅神衆，齋  
主家土地司命六神，虛空應感鑒察威  
靈太歲尊神，四直功曹，三界符使。恭  
望洪慈，俯垂洞鑒。臣聞元始開圖，玉  
字煥明於碧落。虛皇撫運，金書保衛  
於紫微。宏八極之仁風，敷十華之法  
雨。北提黑鬱，昭乾坤蕩蕩之恩。南  
御朱陵，藹離坎輝輝之化。範圍所被，  
陶冶無遺。伏念臣迹混卑棲，志期高  
蹈，分靈得一，未明還返於黃房。觀妙  
存三，莫悟生成於紫戶。進抱望洋之  
媿，退懷入谷之慚。歸技易窮，駒陰暗  
老。承天制地，九恩揚澤壘之輝。負  
陰抱陽，三省勵靈虛之業。證玄功而  
藉燦，敷丹渥以玲瓏。濟下孔昭，由中  
夙切。以今奉爲齋主某，崇建某齋，開  
度某。皈依芝座，叩首騫林，飛鳳詔於  
崇朝，降龍符於積夜。煙塞死而超北  
府，已脫危機。雲開生而上南宮，期承  
休運。猶慮億齡業垢，夙劫聲塵，覺海

濛迷，滓心珠於晝霧。靈源混濁，翳性  
玉於霄霾。莫返照以迴光，曷飛空而  
駕景。惟茲鍊化，庶復清虛。重殫切  
切之情，荐瀆高高之聽。欲望傾光紫  
漢，嘯命玄曹。降黃華東井之輝，五龍  
橐籥。施朱火南閭之粹，九鳳徘徊。  
招月魄於陰宮，提日魂於陽燧。盡洗  
無名之垢，頓超有漏之緣。高步始青，  
獲聞經於碧玉。凝真太素，疾受道於  
紫金。副微臣開度之勤，遂齋主皈依之  
願，臣不勝祈恩之至。

度人無量天尊

平坐讚

道場衆等人，各運心平坐如法。

焚召鍊度官將符

上清靈寶玄壇，恭奉道旨，謹召朱陵火  
府火鍊大將軍，火鍊靈官，南昌上宮鍊  
度大將軍，鍊度靈官，南昌度命君，度  
魄化形君，太冥鍊屍君，十方猷威大  
神，丹靈大神，皓華大神，玄英大神，鍊  
度大神，變形大神，復相大神，正精大  
神，火府大神，返形大神，返魂大神，超  
生大神，鍊度司主鍊大將軍，主水大將

軍，主火大將軍，火鈴靈童，九光童子，火池神將，火池使者，火池童子，擲火萬里大將軍，水沼神將，水沼使者，水沼童子，黃華玉女，石景水母，十二河源大將，流精玉女，青玄黃籙鍊度司官吏，火鍊玉女，黃華蕩形玉女，黃華冶鍊玉女，黃華鍊質玉女，黃華明眸玉女，光容玉女，光容童子，瑩身玉女，瑩身童子，清神玉女，清神童子，發光玉女，發光童子，水火鍊度大將軍，水火合形大將軍，水火聚炁大將軍，水火聚神大將軍，金木鍊形玉女，金木合炁玉女，九天普度院火府度亡真人，水官拔亡真人，火鍊丹界真人，水濟無邊真人，水火交鍊真人，鍊度合屬官吏。願遵玉敕，來赴玄壇，應感分輝，宣通召役，切以東華黃籙，建玄局以承符。南上朱陵，設清曹而輔極。上佐虛無之聖澤，下恢妙有之神機，功德巍巍，慈悲浩浩。迴骸起死，體萬帝以裁成，監真度生，侍諸天而校錄。凡杼丹悃，必沐洪仁。本壇恭爲齋主某，伏爲亡故某，夙染塵緣，久淪幽路，陽靈內障，若

雲鎖於秋蟾。陰翳外迷，似塵蒙於曉鑑。生根雖復，死蒂未除。非憑變鍊之功，曷遂超凌之願。朱章露奏，已奔金馬於上征。丹絳風馳，諒翊雲驂而下邁。靈光混合，梵炁彌羅，爰殫螻蟻之忱，冀布鴻龐之澤。叶恭效力，同德宣勞。東啓神庭，降炎光於朱闕。西澄寶井，接素曜於金門。南離流丹火之精，北坎煥玄陰之炁，引接亡故某，陶神消翳，淪炁清塵，炁入玄玄，永離業機之輪轉。神超渺渺，常辭冤網之循環。出地戶以膺符，入天門而合券，不經浩劫，永爲種民。副懇切之皈依，沛玄虛之化育，某不勝虔祝之至。

無量度人天尊

宣混洞赤文章

元始開運，太玄肇靈。虛極無象，一炁流形。化生二景，五緯凝精。混合自然，返胎育嬰。總真布景，煥赫九清。炎持廓奕，七紀齊並。祈師盧浩，丹天耀精。朱光鍊度，赤藹散明。三華鬱秀，輝映帝宸。

黃華蕩形天尊

準上帝敕，謹召靈寶玄局主水仙靈官吏，隨我神運，變化水池，蕩滌亡爽。

黃華蕩形天尊

宣主水大將軍符

陰精運化，神津灌玄。黃華東井，攝靈聚仙。玉清告命，萬神昭宣。飈輪下降，流洒雲泉。遊爽受鍊，返還生根。

黃華蕩形天尊

宣建水池符

金醴玄津，森羅淨泓。玉龍灌溉，水池映真。滌垢豁塵，萬炁齊新。大道宣化，壬癸流形。陰光浩湛，飛鍊形魂。

黃華蕩形天尊

宣月魄符

黃精啓輝，元陰內章。映觀太玄，開洞萬方。散蔚寒飈，七晨玄琅。圓明遊耀，浮華九空。五帝夫人，躡雲挹風。流霞八素，返嬰易容。注炁東井，天河灌芒。幽靈受化，神景敷張。

黃華蕩形天尊

宣降真水符

太玄含化，八景齊臨。五老祕諱，太陰通明。璇璣運轉，招真致靈。陰光降



幽靈。九陰齊化，流芳耀形。內外瑩徹，飛觀紫庭。尸累清蕩，天靈節榮。

黃華蕩形天尊  
宣真水鍊形符

陰精凝化，東井靈源。天河灌沐，清水度魂。飛英玄華，淘沐囂塵。宮室鮮潔，藏府還靈。胞胎結節，離合自然。金童玉女，流香濯津。蘭池鍊浴，身登玉宸。遊觀太空，億劫無傾。

黃華蕩形天尊  
宣黃華蕩形符

東井黃華，石精玉精。飛玄水母，金醴玉津。滔滔源源，不竭池亭。九龍吐灌，三光垂精。仙人吐潤，鍊度幽靈。內外朗徹，表裏洞清。百關九竅，元炁滋榮。經絡藏府，萬神自主。胞胎結節，隨水開肩。死炁斷絕，惡根沉零。我今鍊化，死骸生魂。返故易貌，玉體金容。變化鍊度，飛升紫庭。

黃華蕩形天尊  
宣太玄陰生符

先天自然，凝華會靈。陰零陽消，奔飛萬神。壬癸祖炁，神魂育嬰。神合炁

合，鍊景還形。躡雲嘯朗，結璘齊奔。遊行玉光，天地無傾。

黃華蕩形天尊  
宣水鍊變仙符

長生大君，鍊形還真。白元聚魄，無英拘魂。太一總御，司命保生。桃康合延，變化九陰。制鍊元精，玉體金嬰。七世尸穢，嚴潔芳馨。甲乙丙丁，壬癸庚辛。戊己沖和，造化發榮。乾施坤運，八素圓晨。

黃華蕩形天尊

謹召玉清大洞腦神泥丸赤文昆洞噓噓君，左目神通光玄冥君，右目神晨嬰陰精君，舌神騰陽正生君，心神玄珠玄玄君，肝神青帝孟光君，脾神紫庭延澤君，肺神皓洞黍成君，腎神太淵飛都君，陰神續命伯強君，胞神元常秋夫君，胎神含生宣和君，結神九華遐彥君，節神杳浩空猷君，血神中幽良弼君，精神元徐祝祝君，炁神無英毳毳君，神神天生靈父君，命神正中幽田君。奉爲亡故某，安鎮身中，周帀羅布，俾宮室全復，神炁固凝。

焚大洞十八玉符

玉符鎮敕，大洞自明。白雲流布，靈神降身。五方混合，玄上之精。充布五藏，六管鮮明。內灌外溢，表裏俱清。滅穢招真，身飛太靈。生根永固，周旋天經。

回靈養素天尊

臣謹上啓五靈五老帝君。切以一炁流形，肇洪濛而育粹。五靈孕質，運溟滓以迴元。凡神魂魄意之混成，賴始真元皇玄之攝降。期歸化治，合罄愚衷。以今奉爲亡故某，恭按真科，神化水池。奉行鍊度，切慮惡根宿稟，幽域久淪，五炁奔飛，百骸解散，匪再生於藏府，曷重整於形神。欲望淵聽昭回，宸恩普被。降五芽之妙化，委炁聚形。灌五老之靈華，還元復質。爲成全於法體，即證邁於仙鄉。臣不勝虔祝之至，今有表文，謹當宣奏。

宣表

謹召青帝直符，上詣九炁青天安寶華林青闕青靈始老天君蒼帝宮，請以青平青炁，灌注亡魂，流入泥丸，分布九

炁，煥映九戶，直入肝宮，下注百脉，守護肝神龍淵含明，三魂衛之，使肝炁鬱勃，周流紫微，上瑩日瞳，下溉玄關，彌羅宮府，植華挺秀，受鍊更生。

焚青帝符

東望重拜手，蒼帝玉皇君。靈風鼓棗籥，育物布元春。雲龍轡嚴駕，玉衛擁瓊輪。枯萌汎沾及，大惠無不均。萬仙歌以道。委曲戒天人。心根迷自固，拱跪戴洪仁。

謹召赤帝直符，上詣三炁丹天梵寶昌陽朱闕丹靈真老天君赤帝宮，請以南和絳炁，灌注亡魂，流入泥丸，分布三炁，洞煥三宮，直入丹臺，調和陰陽，守護心王丹元守靈，中女大神主之，使心炁怡懌，經歷六合，上榮舌本，下溉三焦，升降不息，植華挺秀，受鍊更生。

焚赤帝符

太景開玉樞，洞堂啓金除。騫林蔭瑤砌，丹鸞蹈瓊珠。寶房名曲麗，明堂神所居。飛遊豁雲道，引目盼真都。天日永不夕，重煙鎖清廬。太上敕印開，帕几羅簡書。裊風樹玄化，愍勸諒有餘。

謹召黃帝直符，上詣一炁黃天寶劫洞清玉宸金闕元靈元老天君黃帝宮，請以魂明黃炁。灌注亡魂，流入泥丸，分布一炁，洞照黃野，直入太倉，調和榮衛，守護脾神常在魂停，靈元主之，使一炁沖和，長津益命，上營尺宅，下溉金門，植華挺秀受鍊更生。

焚黃帝符

萬天拱中宸，控駕玉化根。翹機貫億曆，洞朗闢四門。大有混皇真，糾制星宿魂。非帝道不運，有方賴之存。威忿即霜秋，和豫爲陽春。生成握元紀，仰荷戴無垠。

謹召白帝直符，上詣七炁素天七寶金門玉闕皓靈黃老天君白帝宮，請以西華白炁，灌注亡魂，流入泥丸，分布七炁，洞煥金宮，調和液氣，守護肺神皓華虛成，七魄主之，使肺炁清涼，上衛神廬，下灌黃庭，植華挺秀，受鍊更生。

焚白帝符

六甲抱金關，七政守靈壇。流鈴擲火化，威劍巨龍蟠。邈彼素靈真，明憲孰敢干。束制祿鬼魔，凜落霄風寒。診炁既已息，萬天俄而安。真儔荷天庇，抵賴相歌歡。

謹召黑帝直符，上詣五炁玄天洞陰朔單鬱絕玄滋黑闕五靈五老天君黑帝宮，請以幽昌黑炁，灌注亡魂，流入泥丸，分布五炁，光耀太微，流芳布澤，守護腎神玄冥育嬰，玉女靈珠主之，使腎炁盈溢，精通日月，上達崑崙，下守玉扃，植華挺秀，受鍊更生。

焚黑帝符

無質統有物，淵兮上帝心。不啓不發道，蘊妙化機深。恐爾漏未盡，陰想勿侵淫。輪轉無涯波，苦道相迷尋。萬年嘗謹約，一旦自煙沉。無沖落鬼境，殃譴不可任。

五帝全形天尊

理五炁，返五神，已承帝力。灌五芽，滋五體，又藉天休。謹爲亡魂，攝降東方青芽朝華之炁，南方朱丹凌霞之炁，西方白石玉醴之炁，北方玄滋瓊飴之炁，中央琳華醴泉之炁，流布五藏，灌沐百關，俾表裏之豐盈，庶形神之澄



正。

五帝全形天尊

焚五芽符

九炁青精，肝魂衛生。三炁丹華，心神輝明。七炁素液，肺魄調寧。五炁玄津，腎精攝英。一炁黃胎，脾意流榮。帝一尊君，握靈萬神。五內鮮泰，回靈固嬰。得成胎仙，逍遙上清。

五靈升舉天尊

謹召玉清化靈合形大將軍，運靈變形大將軍，度靈成形大將軍，為受鍊亡魂，混合神靈，裝嚴形體。

仙化成人天尊

炁化成人，尸變八玄。三化九鍊，升入九天。九天之上，更度魂神。受鍊更生，得為真人。

水鍊功圓，靈儀周備。實聖真提携之賜，拜仙靈燮理之功，喜慶難言，感戴罔極。謹請守雄抱雌大將，引領亡魂，出離水池，伺候火鍊。

水火鍊形天尊

引旛入火池

準上帝敕，謹召靈寶玄局火鍊仙靈官

吏，隨我神運，引領亡魂，赴火池受鍊。

宣火鍊符

南方炎帝，凝精太微。丙丁正炁，朱雀騰輝。丹鳳流響，朱煙散飛。融英降炁，冶鍊陰儀。流汨之沼，丹陵耀離。

玉眸鍊質天尊

宣日精符

炎精凝圓，絳光流鮮。九龍策駕，擲火揚前。朱明散輝，陶鑄胚暉。陰靈鍊翳，胎根潛蠲。身飛玉都，永固劫年。

玉眸鍊質天尊

宣日簡符

鬱儀朗照，六合洞明。攝幽開光，流華飛英。紫赤鸞象，丹霞鍊形。九葉冤障，鎔化無生。陽神聚景，受書朱陵。

玉眸鍊質天尊

宣真火鍊形符

炎神散精，八冥流光。圓靈正炁，符合天陽。注英丹池，鍊冶玄黃。幽爽飛仙，百骸乘芳。玄祖易質，太虛飛翔。六府返炁，三宮運芒。群陰振伏，尸根滅張。熒星轉燭，出入福鄉。

玉眸鍊質天尊

宣玉眸鍊質符

流火鍊質，玉嬰返形。九陽施化，五神合靈。南離正炁，上貫朱陵。左命飛火，右嘯炎精。南閻洞浮，太微神庭。飛英聚炁，攝陰返生。真火陶鍊，形神肅清。罪翳消滅，冤債和平。經絡藏府，元陽敷榮。魂魄關節，一時回靈。改除故貌，萬竅光明。永離冥鄉，乘化霄征。壽均天地，億劫無傾。

玉眸鍊質天尊

宣太玄陽生符

太陰鍊形，太陽回靈。幽尸沉翳，受陽之精。元炁重敷，攝歸萬神。百骸復故，五藏錄真。榮衛鮮暢，魂魄還明。周旋生門，高奔帝宸。

玉眸鍊質天尊

宣火鍊燮仙符

務猷運化，鍊質成神。皮膚毛髮，肝神含明。耳目鼻口，心神守靈。筋骨牙齒，肺神虛成。孔竅精液，腎神育嬰。內外榮衛，脾神魂停。十二羅絡，陰極陽生。洞陽火鍊，玉胞金晶。得為真人，躡景神庭。

玉眸鍊質天尊

謹召上清靈寶二十四真，腦神道都，髮神道衡，皮膚神道運，目神道童，頂神道通，竅神道柱，鼻神道微，舌神道岐，喉神道仙，肺神道平，心神道明，肝神道清，膽神道敷，左腎神道卿，右腎神道主，脾神道騫，胃神道展，大腸神道微，小腸神隱空，臟腑神開明，胸膈神蔽日，兩脅神解形，左陽神滅迹，右陰神騰虛。爲亡故某，安鎮身中，周布羅布，俾三部整具，八景完全。

焚二十四真符

上元虛無，元洞九五。太上阿房，流靈威戶。玉衡攝炁，腦華元曙。統御上部，通神達古。赤明開真，三天洞和。洞納陽光，五藏不枯。三炁所保，朱宮扶疏。納鍊流泉，生元無徂。黃中理炁，元生白尊。胃管幽通，六府俱存。白元無英，桃康得淳。養育朱丹，洞神往還。

回靈養素天尊

臣謹上啓無上九天主神王帝道君。切以三極凝精，契虛靈而孕質。九霄降

炁，妙恍惚以生神。凡胞胎魂魄藏府竅景神之周圓，藉蒼碧黃白紫綠絳玄丹之灌沐。幸逢昌運，敢罄愚衷。以今奉爲亡故某，恭按真科，神化火池，奉行鍊度。切慮業緣夙抱，陰景久沉，九炁分離，百骸枯朽，匪再假於攝聚，曷具備於神靈。欲望聖鑒孔昭，皇慈誕布。降化九陽之妙化，保真固靈。敷九炁之宸輝，全形正性。爲整具於法體，即超邁於神鄉。臣不勝虔祝之至，具有表文，謹當宣奏。

宣表

謹召鬱單無量仙吏，上詣無映玄臺，請降帝真胞命元元一黃演之炁，九重下降，爲受鍊幽靈纏其胞，使胞元宣通，上徹於天以生成。混合空洞炁，飛爽浮幽寥。延康無期劫，眇眇離本條。苦魂沉九夜，乘晨希陽翹。大有通玄戶，鬱單降晨霄。黃霄凝靈府，陰陽氣象交。胞元結長命，惡根應化消。桃康合精延，二帝秀玉飄。灌溉胞命門，精練神不彫。九天命靈章，生神神自超。元君遏死路，司馬誦洞謠。一唱

萬真和，九遍諸天朝。稽首恭劫年，慶此榮舊苗。

焚符

謹召上上禪善無量壽仙吏，上詣九寶瓊臺，請降帝真胞命元洞冥紫戶之炁，九重下降，爲受鍊幽靈纏其胎，使胎結解根，下響於地以固靈。

無量結紫戶，炁尊天中王。開度飛玄爽，凝化輪空洞。故根離昔愛，緣本思舊宗。幽夜淪遐劫，對盡大運通。帝真始明精，號曰字元陽。嬰兒伯史原，結胎守黃房。斬根斷死戶，熙頤養嬰童。禪善導靈炁，玄哺飛天芳。華景秀玉質，精練自成容。務玄育上生，羅列備明堂。太虛感靈會，命我生神章。一唱動九玄，二誦天地通。混合自相和，九遍成人功。大聖慶元吉，散花禮太空。諸天並懽悅，一切稽首恭。

焚符

謹召梵監須延仙吏，上詣玉京靈都宮，請降帝真魂命元長靈明仙之炁，九重下降，爲受鍊幽靈纏其魂，使魂門通神以達精。

須延總三雲，玄元始炁分。落落大梵布，華京翠玉尊。明梵飛玄景，開度長夜魂。遊爽赴期歸，炁炁返故根。太帝號陽堂，字曰八靈君。九關迴綠道，胎炁生上元。陵梵度命籍，太一輔精延。泥丸敷帝席，三部八景分。魂生攝遊炁，九轉自成仙。琅琅九天音，玉章生萬神。三徧列正位，炁參八宸門。玄關遏死戶，靈真津液源。應感會靈數，明道潛迴輪。慶此嬰兒蛻，稽首讚洞文。

焚符

謹召寂然兜術仙吏，上詣朱官瓊臺，請降帝真魄命元陽尸冥演由之炁，九重下降，爲受鍊幽靈纏其魄，使魄戶閉關，天王降仙以安寧。寂然無色宗，兜術抗大羅。靈化四景分，萬條翠朱霞。遊魄不顧反，一逝洞群魔。神公攝遊炁，飄飄練素華。榮秀椿劫期，乘運應靈圖。空洞生神章，瓊音逸九霞。一唱萬真會，騫爽合成家。九轉景靈備，鬱鬱耀玉葩。兜術開大有，一慶享祚多。上聖迴帝駕，嬰

兒歎以歌。不勝良辰會，一切稽首和。

焚符

謹召波羅尼密不驕樂仙吏，上詣九層玉臺，請降帝真藏府命元五仙中靈之炁，九重下降，爲受鍊幽靈纏其五藏，納凝作清涼，五帝朝真以存神。翻翻五帝駕，飄飄玄上門。遊步黃華野，迴靈驕樂端。採集飛空景，舊爽多不存。太微迴黃旗，無英命靈旛。攝召長夜府，開度受生魂。公子輔黃寧，總錄具形神。玉章洞幽虛，五轉天地分。炁練元藏府，紫戶自生仙。數周衆真會，啓陽應感繁。玉女灌五香，聖母慶萬年。三界並懽樂，稽首禮天尊。

焚符

謹召洞玄化應聲仙吏，上詣瓊林上宮，請降帝真靈府命元高真沖融之炁，九重下降，爲受鍊幽靈纏其六府，使六府調泰，胃筦生津以納和。應聲無色界，霄映冠十方。迴化輪無影，冥明趣道場。靈駕不待轡，朗然生神章。空洞量無崖，玄爽亦爲疆。練胎返本初，長乘飛玄梁。蘄畜喪天真，

散思候履常。斬伐胞樹滯，心遊超上京。願會既玄玄，悟我理兼忘。介福九天端，交禮地辰良。混化歸元一，高結元始王。稽首儔靈運，長謝囂塵張。

焚符

謹召靈化梵輔仙吏，上詣南上七映宮，請降帝真元府命元高仙洞笈之炁，九重下降，爲受鍊幽靈纏其九竅，使九竅開聰，星辰朗朗以開通。玄會統無崖，混炁歸梵輔。務猷運靈化，潛推無寒暑。乘數構貞條，振袂拂輕羽。瓊房有妙韻，汎登高神所。圓輪無停映，貞仙森列序。上上霄衢邈，洞元深萬臣。秀葉翳翠霞，停蔭清泠渚。遨翫怡五神，繁想嘯明侶。五難緣理去，沖心自怡處。爽魂隨本根，疊空空中佇。七誦重關開，豁滯非神武。運通由中發，高唱稽首舉。

焚符

謹召高虛清明仙吏，上詣紫瓊玉臺，請降帝真華府命元真靈化凝之炁，九重下降，爲受鍊幽靈纏其八景，使三部八景整具形神，幽夜光明以防身。

清明重霄上，合期慶雲際。玉章散沖心，孤景要靈會。煥落景霞布，神衿靡不邁。玉條流逸響，從容虛妙話。靈音振空洞，九玄離幽裔。感爽無凝滯，去留如解帶。明識生神章，高遊無終敗。玄景曜雲衢，跡超神方外。應感無方圓，聊以運四大。研心稽首誦，衆聖共稱快。

焚符

謹召無想無結無愛仙吏，上詣九華寶臺，請降帝真岳府命元自然玄照之炁，九重下降，爲受鍊幽靈纏其身，使三關五藏，六府九宮，金樓玉室，十二重門，紫戶玉閣，三萬六千宮府，三百六十骨節，根源本始，一時生神，使萬神具備，毛髮生身，諸天下臨以得生。

無結固無情，玄玄虛中澄。輪化無方序，數來亦叵乘。誰云無色平，峨峨多丘陵。冥心縱一往，高期清神徵。良遇非年歲，劫數安可稱。浮爽緣故條，返胎自有恒。靈感洞太虛，飛步霄上冰。津趣鼓萬流，潛凝真神登。無愛固無憂，高觀稽首昇。

焚符

九天稱慶天尊

降九炁以生萬神，已承天澤。播九陽而融百體，尤藉神功。謹爲亡靈，攝降一陽混溟瑋璜之炁，二陽泛華紫微之炁，三陽天婁鳳車之炁，四陽中女辟邪之炁，五陽太陽微延之炁，六陽化真白灑之炁，七陽降實紫光之炁，八陽天真命仙之炁，九陽太皇寂照之炁，流注九戶，纏絡一身，俾內外以敷腴，庶官府而備足。

九陽生化天尊

焚九陽符

太極金書，九天玉文。混茫祖炁，輝映天根。圓靈高清，扶搖玄煙。回風下映，五色飛鮮。灌滌內外，洞入自然。經絡堅實，藏府生全。大帝有敕，返陰還乾。群靈受慶，宴景芝田。

九天稱慶天尊

謹召丹靈全形大將軍，上靈鍊形大將軍，紫靈養形大將軍，爲亡故某，混合神靈，嚴裝形體。

仙化成人天尊

焚全形符

已枯復榮，已滅復生。得生天上，更稟太靈。九天之劫，返胎復嬰。穢累消蕩，白尸返生。火鍊功圓，靈儀氣備。荷帝師甄陶之力，感聖真開度之恩。歸戴難殫，讚揚莫盡。謹召守雄抱雌二大將，部衛亡靈，出離火池，伺候嚴新冠帶，保舉升仙。

朱陵度命天尊

準上帝敕，謹召青玄黃籙金木仙衣玉女，仙帶玉女，仙車玉女，靈寶巾笥司一行官吏，神運攝化，速俾已鍊亡魂，冠帶身形，嚴裝受度。

焚天皇象符

妙哉至道，五靈真機。上開龍漢，神仙空飛。煥爛二景，身披洞衣。寶雲玉宇，遍列天威。精思招真，五府生輝。九光玉輿，登入紫微。

金容出世天尊

霓裳縹緲，霞佩琳琅，映玉體之潔清，儼瓊顏之瀟灑，精神入妙，步武登真。可謂宿劫因緣，今生際遇。第惟久淪幽昧，恐心地之未澄。致滓陽靈，或性

天之尚鬱。已遵依於科律，爲傳度於戒條。庸闢迷途，肆騰覺路。今當佩符受券，參錄膺圖，無拘留逼合之憂，拔出地戶。有侍衛送迎之樂，無拘天門。永爲種民，常居福境。守雄抱雌大將，部衛亡魂，來詣座前，證明保舉。

發敕制地祇

發普告三界

發元始符命

發歷關諸天

保舉既圓，升遷有便。惟靈寶度人之道，有救苦真符，佩之則不經地獄，有長生靈符，佩之則度品南宮。此乃虛無自然元始上帝開度之玉券也。有生天寶錄，佩之則上生天堂。有天門合券，佩之則徑入天門。此乃虛皇玉晨大道君開度之玉券也。有解冤真符，佩之則冤愆解釋。此乃玉皇上帝開度之玉券也。有救苦九龍符命，佩之則上生青宮。有救苦朱陵真符，佩之則上登南宮。有運明玉誥，佩之則隨品受生。有移籍券，佩之則移名仙籍。有普度券，佩之則度上天堂。有仙魂

合同天文，佩之則神登真域。此乃青玄老君太乙救苦天尊開度之玉券也。今當恭對道前，逐一給授，所宜整肅，拱聽敷宣。

宣長生簡 宣救苦簡

宣生天錄 宣天門券

宣解冤符 宣九龍符

宣朱陵符 宣運明誥

宣移籍券 宣普度券

宣仙魂天文

亡故某萬業銷鎔，千愆解釋，靈光呈露，真性昭融。佩金錄白簡之奇，戴玉券青符之妙。超離幽趣，即步武於雲霄。徑陟真階，永依光於日月。上帝遙唱，諸天下觀。靈童迎駕景之輿，陽華洞煥。神王翊飛空之輦，梵炁彌羅。法橋穩步以高躋，道岸先登而御炁。從此棲神碧落，宴景清虛，出離輪迴，與天相保。衍蕃釐於胤嗣，流餘慶於宗親。皆大道慈悲之恩，實衆真維持之德。宜行禮謝，毋怠皈依。齋主某所修功德，照牒具陳，佩負在心，永爲身寶。宜端容止，少駐壇前，俟召真靈，部衛

升度。

宣功德牒

寶華圓滿天尊

臣謹重誠上啓三清上聖，十極高真，應化度人，無鞅聖衆。臣聞一真湛寂，本無形以無名。萬聖森羅，斯有象而有數。溥其用則神變莫測，返其體則微妙難言。既有提携，敢忘歸戴。臣等向來，奉爲某鍊度亡魂。仰荷天恩，功圓事竟。尚慮塵俗，難駐真旂。伏望玉藥華珠，飄零於碧落。雲車風馬，迴返於層霄。臣下情不勝激切，攀戀之至，謹稽首再拜奉送。

迴輶頌

焚召十方神王符

恭奉上帝真符，謹召十方飛天神王，長生大聖，無量度人君。恭望真慈，隨機應感，潛運慈悲，不忘元始付囑之言，一如浮黎法會之日。傾光迴駕，監真度生，俯同本壇主副大將，九天普度院守雄抱雌大將，部衛受度某，飛空步虛，上登天界。

宣護送牒 發天門牒

焚命魔前驅符

誦上天度人章

見前亡靈，藉紫極之陽光，脫幽都之陰暗。登真雲路，汎景霄衢。天花散漫，以前迎，綠輿穩駕。神璫鏗鏘而後從，綵仗飛驂。逍遙徑上於清虛，容與直躋於碧落。神朝三素，炁混九華。性識兼忘，常享太平之運。結習都盡，永無輪轉之期。與道合真，保天有慶，好去好去，毋忘帝恩。

法師下座

召五方童子，送亡靈至橋頭立

謹召朱陵火府引魂登橋大神，監橋超度大神，守橋超度升魂五大神，遵依帝敕，火急引領亡故某，徑度升天法橋，上登碧虛，逍遙自在，一如靈寶天尊無上度人律令。

焚度橋符

吟偈

天尊慈惠降陽光，變化雲梁耀八方。  
上接朱陵登帝所，下開黑鬱洞神鄉。  
紺丹縹緲綃霓映，金紫玲瓏縠霧張。  
今日亡靈飛步去，大羅渺渺覲虛皇。

引旛度橋

誦三界魔王章

送亡

焚燎

靈寶領教濟度金書卷之一百六

靈寶領教濟度金書卷之一

百七

洞微高士開光救苦真人甯全真授  
靈寶通玄弘教水南先生林靈真編

科儀立成品

明真齋

傳戒儀

靜默堂序立

華夏引至戒座前

喝座

珠黍空浮煥始青，祥開玉局耀坤靈。  
我今高躡揚宗軌，接武玄風萬古明。

金闕化身天尊

陞座

超度長吟

超度三界難，地獄五苦解。悉歸太上經，靜念稽首禮。

初捻上香

此香根遍三千，枝敷五億，凝氤氳於瑤鼎，散作祥雲。融縹緲於金籥，飛為甘

露。遙空供養，元始法王洞真天寶。奉祝皇帝陛下，伏願龜圖地大，鳳曆天長。榆柳春閑，四鄙息控絃之影。桑麻雨足，三農騰擊壤之歌。鞠青草於園扉，靜綠林於方野。

### 二捻上香

此香月窟分精，天根胤粹。騰紫煙於碧落，光煥陽靈。垂綠霧於黃垓，祥開陰耀。遙伸供養，太上玉晨洞玄靈寶。奉祝係薦亡靈，伏願千冤解悟，萬罪清夷。北鬱升神，白簡煥慈雲之渥。南陵度命，丹符融慧日之祥。絕豕訟於家庭，息注殃於孫子。

### 三捻上香

此香三極騰芳，五靈委炁，耀玉華於地蘂，翠焰玲瓏。旋金景於天葩，玄芝煒燁。遙伸供養，道德高尊洞神神寶。奉祝齋主某，伏願東華錫慶，南極增齡。七葉連榮，萬里快扶搖之運。五枝挺秀，九臯和風鶴之鳴。敦詩禮於松蘿，耀絃歌於桑梓。

### 請經長吟

請經若飢渴，持志如金石。保子飛仙

路，五靈度符籍。

具位臣某重蕪名香，普伸供養，九霄四極，五梵十華，上聖高真，三洞仙宰，傳經敷教，立法度人，三官五師，天曹主執，省府司院，飛天神王，嶽瀆山川，城隍社令。虛空證鑒，應感靈祇，地水職司，無鞅數衆。並願慈悲有造，應化無方。綠輦丹輿，傾光禁路，瓊輪羽蓋，駐景霄衢，萬聖翼轅，千真扈蹕。特降玉清道炁靈寶妙光，洞煥十方，開明九壘，上極無上，下極無下，接引亡故某，丞辭黑壤，來詣玄壇，聆九戒之玄音，證一乘之妙果。

### 平坐吟

道場衆等人，各運心平坐如法。我聞龍漢未彰，鴻濛未兆，自然祖炁回旋，太虛無色無淵，溟濛混沌，蓋不知經幾萬劫也。及夫元精既判，道體斯漓，清炁高澄，積陽成天，濁氣混凝，積陰成地。陽變陰合，而人物於是生矣。稟冲和而爲人，孕繁炁而爲物。號物爲萬，人處一焉。人受天地之中以生，所以爲萬物最靈也。降衷而有常性，秉

彝而好懿德。勞我以生，則毓粹餐和周流太極。息我以死，則歸根復命返景。太无優游去來，無入而不自得。曷嘗有三途五苦，六洞十宮，種種驚駭怖畏之事哉。奈何人僞日滋，天和風靡，智巧相勝，貪欲自將。遂至逐境迷情，背常越法，身爲罪府，心作冤都，一真披流，萬妄呈露。三毒熾則三途攝之，五賊昌則五苦攝之，六鑿逞則六洞攝之，十惡彰則十宮攝之。展轉報對，循環終天，皆衆生妄業所召，自作自受。非北都泉曲故張憲網，巧設冤機，使生民坐罹痛惱也。況函三並立，得一分靈。天地初無盈虧，人生奚爲變滅。深求其故，豈非天命之性，莫能御炁質之性。感物而動，爲習所遷，愈遠愈趨，流蕩忘返，不知不覺，徑墮迷途，茲豈外物之咎哉。作聖作狂，是誠在我，善反之則天地之性存焉。譬諸波瀾止水，波澄則鬚眉可燭。雲籠秋月，雲散則毫髮可鑒。倘能檢身內省，克己反觀，悟一性之中虛，了萬緣之外假，則方寸湛然，冲虛妙粹，炳煥靈明，

未嘗不活潑潑地，安有纖芥繫累，得以滓吾天倪哉。故經曰：夫人神好清而心擾之，人心好靜而慾牽之。能遣其慾，而心自靜。澄其心，而神自清。神即性也，慾即情也。稟於天曰性，溺於人曰情，而心則爲郭郭以統之。率性則善，循性則惡，特顧吾中肩轉移如何耳。人生天地間，如白駒之過隙，忽然而已。眷屬親緣，強名假合，田園宅舍，暫爾受用。寵榮軒冕，夙號倘來。來不可禦，去不可止。及夫六如變滅，四大分離，身且不存，生非我有。回思向者，滿前外物，何曾有干涉邪。其所以虛靈不昧，昭昭然在天地之間者，惟性而已。是性也人人具足，箇箇圓成，不以智而贏，不以愚而乏，不以生而存，不以死而亡。特患爲業所累，如影隨形，如響應聲，膠固纏縛，不能解脫。則昭昭者昏，皦皦者污，任其浮沉，不知畔岸，而爲異類之趨耳，然皆外爍我也。迷之則生死始，悟之則輪迴息。苟悟矣則愛河風息，慾海波澄，世諦煙收，業塵雲散。回觀固有之性，靜極光

通達，寂照涵空虛，曷嘗因物而無存哉。亡故某藉慈悲之道力，超溟漠之神鄉。面禮金容，親承玉敕，宿業洗蕩，行御虛無。皆是夙植福基，有茲緣會。正宜回頭猛省，疏剔中肩，以自己靈光，照自己實際。內觀其心，心無其心。外觀其形，形無其形。遠觀其物，物無其物。三者既悟，惟見於空。觀空亦空，空無所空。所空既無，無無亦無。無無既無，湛然常寂。寂無所寂，清靜光明。如是境界廓然，太虛同體，三毒何有，五蘊俱空，六因不存，十習悉泯，妄塵既息，輪迴自無。輪迴既無，生滅自己。而吾一性之真，自然與天地同存，亘浩劫不壞矣。若猶未也，猶當奉戒。戒者何，所以防非杜過，檢妄離情也。衆生耽着幻塵，淪浹肌骨，棄真就僞，捨實趨華。如蛾赴燈，如蟻旋磨，置身荆棘叢中，自謂樂意，罔念回頭，業力所牽，終歸淪墜。故千真萬聖，皆以戒而隄防之。俾免墮邪途，常行正路，洗氣質之情，復天地之性也。藥笈琅函，金科玉律，具嚴戒法，條目

星羅。今者壇列虛皇，齋崇靈寶，按科宣演，惟當以九真妙戒爲先。在昔清微法王虛皇教主，因黑靈之請問，發金口之洪音。三際十華，佩服遵奉。今爲亡靈，澄淪一心，肅整百神，恭按威儀，至心傳授。先皈依於三寶，次宣示於九真。所宜振礪精神，攝心靜聽，永爲道種，歷劫不謬，請衆運心，人各恭信。

道經師寶天尊

按人各恭敬

宣告亡靈第一皈依無上至真道寶

道寶讚

稽首皈依道，大羅元始尊。杳冥開祖劫，混沌立天根。願垂清靜法，開度此亡靈。和：往生神仙界。

宣告亡靈第二皈依無上至真經寶

經寶讚

稽首皈依經，真文煥八方。煉金成鳳篆，揉玉寫龍章。願開金口演，解悟此亡靈。和：往生神仙界。

宣告亡靈第三皈依無上至真師寶

師寶讚



稽首皈依師，慈悲轉法輪。先天傳大教，歷劫度迷津。願施方便力，接引此亡靈。和：往生神仙界。

### 大慈說戒天尊

### 北帝頌

善哉元始尊，衆生慈父母。傾光紫微宮，曲映九幽戶。峨峨丘寒庭，迴照廓冰浦。炎炎烈火獄，沛然洒法雨。圓通大哀智，常善濟衆苦。拔度長夜魂，今得稽首禮。

宣告亡靈第一戒者敬讓，孝養父母，是名初真戒。  
宣告亡靈第二戒者克勤，忠於君主，是名念真戒。  
宣告亡靈第三戒者不殺，慈救衆生，是名持真戒。  
宣告亡靈第四戒者不淫，正身處物，是名守真戒。  
宣告亡靈第五戒者不盜，推義損己，是名保真戒。  
宣告亡靈第六戒者不嗔，兇怒凌人，是名修真戒。  
宣告亡靈第七戒者不詐，諂賊害善，是

名成真戒。

宣告亡靈第八戒者不驕，傲忽至真，是名得真戒。

宣告亡靈第九戒者不二，奉我專一，是名登真戒。

### 奉戒頌

道爲無心宗，一切作福田。立功無定主，本願各由人。虛己應衆生，注心莫不均。大聖崇至教，亦由雨降天。高陵靡不周，常卑故成淵。海爲百川王，是能舍龍鱗。萬劫保智用，豈但在厥年。奉戒不暫虧，世世善結緣。精思念大乘，會當體道真。  
九戒宣演，萬聖證明。真苦海之慈航，實昏衢之慧燭，沉痾之良藥，亢旱之甘霖。惟當誓志書紳，飭身弦佩，如護拱璧，如獲明珠。受持若奉君師，精勤若承父母。即有察命童子，護戒威神，五帝考官，六宮掾吏，隨逐鑒映，造次不離，道業日隆，妄塵自散，三官五帝，書其功勤，九府四司，察其精進。自然南宮度命，北府削名，遊行太虛，絲毫無礙矣。慎勿懈怠心志，再墮苦輪，帝澤

難逢，聖恩不再，勉之哉。然九戒科品，皆明世諦因緣。何也，正恐衆生神歸厚夜，莫了生死之關，貪戀世塵，不能解脫。故隨病鍼砭，破其妄想，復其正性耳。若撥轉向上機關，則未盡之先，道本無名。未生之前，性何形似。性且無有，而欲以戒別其真妄，豈非執着邪。儒家謂才說性時，便已不是性，真名言哉。亡靈生前機警，死後虛靈。宜知九戒之當修，毋以九戒而自縛。成性存存，當於無極之真觀之。則扶搖清虛，長爲種民，有不難者矣。以今燭散千枝，香殘百和，月磬息琳琅之韻，雲笙收縹緲之音。仰企鑾輿已回，輦輅諸天，復位十極，傾光靈儀，曲駐凡筵，伺候鍊度，膺圖御籙，保舉昇遷，永棄人間，高躋天上。功德無盡，利益有情，法界如如，俱圓覺智，大衆且道，亡靈聞法，受戒後還作麼生。

回頭猛省悟前非，從此翻身出化機。  
一顆玄珠含萬象，圓明虛寂耀秋輝。

### 出堂頌 法師下座

靈寶領教濟度金書卷之一百七

# 靈寶領教濟度金書卷之一 百八

洞微高士開光救苦真人甯全真授  
靈寶通玄弘教水南先生林靈真編

## 科儀立成品

遷拔道場用

### 宿啓儀

燒香頌

各禮師存念如法

衛靈

東方

九炁青天，明星大尊。煥照東鄉，洞映九門。轉燭陽光，掃穢除氛。開明童子，號曰玄卿。備衛我軒，上對帝君。收魔束祿，討捕凶群。奉承正道，赤書玉文。九天符命，攝龍驛傳。普天安鎮，我得飛仙。

南方

三炁丹天，煥景浮光。熒星轉燭，洞照太陽。上有赤精，合契虛皇。開明靈

童，號曰華芳。總統火兵，備守玉堂。斬邪束祿，剪截魔王。北帝所承，風火莫當。流鈴交煥，翊衛壇場。正道流行，敢有猖狂。我享上功，坐運魁罡。億劫長存，保天無疆。

西方

七炁素天，太白流精。光耀金門，洞照太冥。中有素皇，號曰帝靈。保神安鎮，衛我身形。斷絕邪源，王道正明。宮殿整肅，三景齊并。道合自然，飛昇紫庭。靈寶符命，普惠萬生。元皇正炁，來合我身。功加一切，天地咸寧。

北方

五炁玄天，元始徘徊。辰星煥爛，光耀太微。黑靈尊神，號曰層威。統冠飛天，仙裙羽衣。備衛五門，檢精捕非。敢有干試，豁落斬摧。玉符所告，神鎮八威。邪門閉塞，正道明開。映照我身，三光洞輝。策空駕浮，舉形仙飛。

中央

一炁黃天，調理乾坤。陶鎔陰陽，總統玄真。鎮星吐輝，流煥九天。開明童子，號曰天璘。元炁陽精，焰上朱煙。

洞照天下，及臣等身。百邪摧落，殺鬼萬千。中山神呪，普天使然。五靈安鎮，身飛上仙。和：與道合真。

鳴法鼓二十四通

無上三天玄元始三炁太上道君，太上老君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十六人出。出者嚴裝，關啓玄壇天帝神君，當召此間土地里域真官正神，急上關啓臣今奉爲入齋意。以今宿啓告齋，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行遷拔道場法事小兆臣某，與臨壇官衆等，今故燒香，願以是功德，上爲天子王侯，土地官長，經籍度師，及山林巖棲學真道士，同學之人，九親門族，天下人民，蜎飛蠢動，一切衆生。今故燒香，皈身皈神皈命，無上至真三寶虛無大道。乞丐原赦前生今世，生死罪過，得免離三惡之道，五苦八難九

厄之中。臣等身得道真，飛行虛空，白日升天，侍衛道君，逍遙無上七寶自然宮殿，永與道合。所啓玄感，應聲上御至真無極道前。

禮方 坐懺

臣法衆等，志心皈身皈神皈命，十方無極太上靈寶天尊。懺悔修齋弟子某及臣等，自從曠劫以來，至于今日，或身業所犯，四肢舉措，動違戒律，不依經典。或心業所犯，志意不專，情浮意動，馳騁不息。或口業所犯，善惡反論，綺言飾非，華辭惑衆。因今懺悔，並乞蕩除。皆願臣等及齋主某，身入至仙，會道合真，神合真寂，洞入自然，性命合道，玄會無爲。志心稽首，禮謝無上至真三寶。

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法

輪昇。七祖生天堂，我身白日騰。

又

大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹重誠上啓虛無自然元始天尊，太上道君，太上老君，無上玄老，十方已得道大聖衆，至真諸君丈人，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一

切真靈。臣等緣藉福基，慶諧道運。九清鳳檢，荷玄妙以天開。三洞龍章，啓希夷而帝錫。莫息林巒之影，慙污朝市之塵。十善悠悠，百非袞袞。玄班綴武踐履，盍贊於神功。紫禁承顏獻納，宜熙於聖澤。凡有投告，敢不關聞，齋主心詞，謹當宣奏。

宣詞

按如詞旨，備露忱恂。臣等差穀齋明，夷心淪念。恭依藥笈，式御芝圖。法天象地而瑶陛三成，呼陰召陽而琅音九奏。蘭煙縹緲，卿雲騰百和之香。蓮炬熒煌，霽月燦千枝之麗。自今月某日爲始，轉經行道，燒香散花，請命紫虛，皈神玄極。祈天光而下映，慧日流明。開地暗以高躋，業煙披散。俾亡故某，返還祖炁，陶浴客塵。金簡疏恩，辭淒涼而升神北府。玉書耀景，登快樂而鍊質南丹。廓六洞於春臺，朗三途於壽域。謹依科法，宿啓以聞，恩惟太上三尊，十方衆聖，俯垂鑒映，省覽所陳。敕勒靈寶官僚，土地主執，虛空鑒察，應感真靈。同寅叶恭，掃祆氛於

內外。傳誠達信，襲和氣於幽明。拱翊靈壇，周圓善果。令臣等三關昭暢，五體宣融，澄身心口以通玄，虛無密契。混精炁神而凝景，寥廓潛孚。霈玄澤以周流，覲丹墀而獨對，明晨行道，續更啓聞。

發願

一願乾坤明素。二願炁象清玄。三願聖人萬壽。四願化洽八埏。五願天垂甘露。六願地發祥煙。七願四時應候。八願萬物生全。九願家多孝悌。十願國富才賢。十一願齋功廣被。十二願善瑞日臻。

存神燒香

香官使者，左右龍虎君，侍香諸靈官，當令臣宿啓建齋之所，自然生金液丹碧芝英，百靈衆真交會，在此香火爐前。然願臣學道得道，求仙得仙，齋主受福，幽顯沾恩，十方仙童玉女，接待蘭煙，臣向來所啓之誠，速達徑御太上無極大道至真昊天玉皇上帝御前。

出堂頌

回靜默

謝師

靈寶領教濟度金書卷之一百八

靈寶領教濟度金書卷之一百九

洞微高士開光救苦真人甯全真授靈寶通玄弘教水南先生林靈真編

科儀立成品

遷拔道場用

早朝行道儀

燒香頌

各禮師存念如法

衛靈呪

青陽虛映，耀日回靈。神虎辟邪，飛天流鈴。摧姦滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

發爐

無上三天玄元始三炁大上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今早朝行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

### 請稱法位

具位奉行遷拔道場法事小兆臣某，與臨壇官衆等，謹重誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝太帝，東華、南極、西靈、北真、玄都、玉京、金闕七寶瓊臺、紫微上宮靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞祖炁鴻濛，蘊無色無淵之妙。元精混沌，媾有滋有象之英。玄黃判

而三極流形，經緯張而五靈胤景。裁成生死，煥空洞之金書。保制陰陽，結飛玄之玉字。包羅萬象，囊括群生，妙哉靈寶之宗，大矣玄元之教。臣等瑤壇莅職，玉籍登名，奉元皇之沖科，神交玄妙。遵洞玄之祕典，炁集幽微。凡有皈投，敢忘關奏，況奉詞旨，敢不上聞。

### 宣詞

按如詞言，備殫激切。齋主某俯矜黑鬱，仰籲蒼旻。念九死之莫迴，徒瞻水逝。嗟千生之曷挽，誰念舟藏。人倫深骨肉之悲，天命痛音容之隔。匪歸化治，曷返生根。爰建設於芝壇，爲鋪張於藥笈。玉華璀璨，紫煙流三素之輝。金薤琳琅，碧霧藹九陽之韻。所冀靈光鬱勃，梵炁彌羅，黃道雲開，微衆真而侍座。瓊臺日近，召萬聖以臨軒。拱虛無定慧之尊，示希夷慈悲之相。玄符敕制，奔金馬以開函。白簡升遷，駐玉龍而御景。夜壑廓輝輝之旦，寒庭開蕩蕩之春。普洽人天，均沾家國。以今清旦，陞壇行道，請法衆

等，運茲初捻上香。願此香煙騰空徑上，供養無上至真道寶。臣等皈身皈神，皈命，首體投地，仰依太上三尊。願以是功德，上祝宗祧先聖，社稷尊靈。伏願玄極棲神，清虚御炁，垂祥鳳曆萬年，開玉葉之香。流蔭龜圖億載，表金莖之瑞。皇帝乾坤呈彩，河洛昭符，丹宸凝旒，來梯航於舜日。紫宸簇仗，同文軌於堯雲。彤掖徽華，青宮仁聖。鷺序極武文之彥，麟符敦忠孝之英。今故燒香，自皈依師尊大聖衆，至真之德，得道之後，保天長存。和：與道合真。

以今清旦，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流齋主家九玄七祖，億劫種親。伏願覺海波澄，慧源冰瑩。南宮變化，驂日駟而宴騫林。北府消名，御雲虬而朝蓮座。齋主某六塵披散，五炁宣平。福地春融，固瓊顏而不老。壺天日永，漱玉醴以長新。椿桂高華，芝蘭秀發，

紫炁兆庭中之喜，紅塵絕門外之憂。今故燒香，自皈依師尊大聖衆，至真之德，得道之後，升入無形。和：與道合真。

以今清旦，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流三途滯爽，六道窮魂，動植飛潛，無邊含識。並願慈風披拂，愛日融怡，罪簿疾除，漏千生之業網。惡根落滅，停萬劫之冤輪。快超迹於陰鄉，即升神於陽界。百昌茂育，無焚林竭澤之憂。一炁周流，有戾天躍淵之樂。圓扉晝寂，方域春和。景星夕燦於玉虛，甘露宵輝於璇漢。今故燒香，自皈依師尊大聖衆，至真之德，得道之後，長享自然。和：與道合真。

禮方 懺方

三啓

樂法以爲妻，愛經如珠玉。持戒制六情，念道遣所欲。淡泊正氣停，蕭然神靜默。天魔並敬護，世世享大福。

又  
鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又  
大道洞玄虛，有念無不契。鍊質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等志心稽首，禮太上無極大道。

臣等志心稽首，禮三十六部尊經。

臣等志心稽首，禮玄中大法師。

重稱法位

具位奉行遷拔道場法事小兆臣某，與臨壇官衆等，謹重誠上啓虛無自然元始天尊，無極大道太上道君，太上老君，高上玉皇，十方已得道大聖衆，至直諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上官靈寶至

真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣等傳慶億齡，植因兆劫。玄雲垂蔭，佩囊中紫鳳之章。聖日昭融，膺肘後蒼虬之錄。承恩師匠，贊化天工。蓋高蹈於林泉，乃卑棲於陸海。分陰切切，進寸悠悠。秉心堅補過之盟，勵志罄立功之誓。庶酬化育，庸佐生成。今齋主某，重念亡故某。捨身受身，從劫至劫，咸戴天而履地，皆負陰以抱陽。三業紛紜，踐畏途而滋人僞。六根流浪，逐幻境以焚天和。虛白難全，回黃自滓，動靜多違於禁戒，身心每背於綱常。一豎潛攻，倏天葩之春隕。三彭密試，俄命樹之朝零。霜明東岱之條章，日赫北鄴之憲令。茫茫鬼域，杳杳神鄉，非上霈於天恩，曷下超於地爽。是以嚴修齋直，肅建壇場，羅信幣於華晨，懺愆尤於霄極。希垂睿覽，曲軫精祈。敕五帝四司，削千愆而解悟。

命三官九府，蕩萬罪以清夷。龍符飛煥於十方，鶴赦羅敷於三界，永辭長夜，獲離重陰。聽法聞經，超無形無名之境。登真度命，遊非空非色之鄉。消考訟於先靈，息注殃於後嗣。齋主某精神通暢，步武光華。簪紱連榮，迓公侯之袞袞。門庭多暇，普眷族之熙熙。五福雲滋，四魔煙滅。上願天光朗晏，地紀宣澄。三光全而寒暑平，瑞迎玉燭。五穀熟而民人育，祥協金穰。要荒寢兵革之憂，寰海富桑麻之樂。飛潛動植，均化化以回靈。蠢動蛸翹，各生生而育性。三途昭朗，五道開明，則上明天尊大慈之化，下副齋主皈命之誠，謹啓以聞。

### 發願念

一念爲道四大合德，齋主七世父母，免脫憂苦，上昇天堂，衣食自然。  
二念帝王國主，道化興隆，庠序濟濟，皇教恢弘，威儀翼翼，普天所瞻，民稱太平，四夷賓伏，祆惡自滅，賢聖日生。  
三念法師功德大建，教化明達，俱獲飛

仙。

四念同志學人，早得仙道，更相開度。  
五念九親和睦，好尚仁義，貴道賤財，行爲物範。  
六念損己布施，道士及飢寒者，天下人民，各得其所。

七念蠕動歧行，一切衆生，咸蒙成就。  
八念赦贖前生今世罪對，立功補過。  
九念家門隆盛，宗廟有人，世生賢才。  
十念尊受師經，不敢中怠，平等一心，廣度一切，克獲上仙，白日登天，拜見太上，永成真人，雲車羽駕。和：與道合真。

### 存神燒香

香官使者，左右龍虎君，侍香諸靈官，當令臣早朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛蘭煙，傳臣向來所啓之誠，速達徑御太上無極大道至真玉皇上帝御前。

### 出堂頌

### 回靜默

靈寶領教濟度金書卷之一百九

靈寶領教濟度金書卷之一  
百十

洞微高士開光救苦真人甯全真授  
靈寶通玄弘教水南先生林靈真編

### 科儀立成品

遷拔道場用

### 午朝行道儀

燒香頌

各禮師存念如法

衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破祆，明耀元功。金符召制，躡靈策龍。謠歌慶會，散花太空。神化冥運，四極安隆。伏御帝前，罔有不恭。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝真符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今午朝，陞壇行道，願得玉清道炁靈寶妙光下降，流入臣等身中，令臣所啓之誠，速達徑御太上無極大道至真玉皇上帝御前。

請稱法位

具位奉行遷拔道場法事小兆臣某，與臨壇官衆等，謹同誠上啓。虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞一元凝妙，混茫含無極之真。三炁流華，溟滓旋太空之象。宰

陰陽而開光五劫，肇圓方而贊化三才。出法度人，玄珠混十華之駕。導運御世，丹金流九有之輿。碧霞羅絡於虛玄，翠靄彌綸於寥廓。靈書璀璨，隱韻琳琅，爰彰濟度之科，庸演裁成之澤。臣等承顏縮綬，綴武聯班，乘靈寶之金書，四玄入妙。佩洞玄之玉策，八景含華。凡有皈投，敢忘關告，况奉詞旨，謹爲敷宣。

宣詞

按如詞言，極深激切。齋主某肘行膝步，目注心馳。悵九府之沉淪，孰伸援手。倏一朝之陷溺，惟劇傷心。匪上叩於寥陽，曷下超於鬱絕。恪遵玄範，恭啓洪儀。步虛叶曲素之音，梵唱藹空歌之韻。珠幢鳳蓋，擁玄座於金門。騫萼虬枝，舞華綃於玉陛。歸神金闕，請命玉京。所冀玄鑒，旁昭丹衷。上御矜三途之鬼趣，降五色之神輝。玉敕飛馳，萬劫之塵根疏瀹。金符洞耀，千生之業垢澄清。登壽域於銅關，融春臺於鐵壘。靈光流煥，無拘天門。梵炁流行，拔出地戶。普幽明而受度，

合今古以流輝。以今臨午，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上至尊。願以是功德，上祝九廟尊靈，累朝列聖，伏願麟駟汎景，鳳馭飛霄，扶祚運於億齡，蓮臺高步。茂本枝於百世，騫圍凝神。皇帝覆載齊尊，儀璘並照。仁周禹迹，乘六龍以御天。惠遍堯疆，駕八駿而行地。儲宮禁掖，昭贊皇圖，依師尊大聖衆，至真之德，得道之後，保天長存。和：與道合真。以今臨午，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，奉祝三途罪爽，應度亡靈。伏願一精日皎，萬妄冰清。觀妙始青，生善心而登樂界。凝玄太素，消罪性而脫苦輪。齋主某視履希夷，毓神玄妙，挹天光而介祉，七葉聯芳。酣帝渥以延齡，五符定錄。松蘿有耀，益茂芳猷。蘭桂無



塵，克昭慶澤。今故燒香，自皈依師尊  
大聖衆，至真之德，得道之後，升入無  
形。和：與道合真。

以今臨午，陞壇行道，請法衆等，運茲  
三捻上香。願此香煙騰空徑上，供養  
無上至真師寶。臣等皈依神皈命，首  
體投地，仰依太上三尊。願以是功德，  
回祝臣等師友靈儀，神玄逝識。性天了  
悟，心地虛夷。千二百之戒行周圓，萬  
二千之威儀整肅。過去者受書朱府，  
均躋藥闕之玄班。見在者列籍東華，  
疾證芝圖之妙道。以致山棲谷汲，月  
釣雲耕，融萬善以凝玄，證六通而入  
妙，策名小有，接武大乘。今故燒香，  
自皈依師尊大聖衆，至真之德，得道之  
後，長享自然。和：與道合真。

禮方 懺方 命魔

步虛

控轡適十方，旋憩玄景阿。仰觀劫仞  
臺，俯盼紫雲羅。逍遙太上京，相與坐  
蓮花。積學爲真人，恬然榮衛和。永  
享無期壽，萬春奚足多。

又

大道師玄寂，升仙友無英。公子度靈  
符，太一捧洞章。舍利耀金姿，龍駕倏  
來迎。天尊盼雲輿，飄飄乘虛翔。香  
花若飛雪，紛靄茂玄梁。頭腦禮金闕，  
携手朝玉京。

又

騫樹玄景園，煥爛七寶林。天獸三百  
名，獅子巨萬尋。飛龍躑躅鳴，神鳳應  
節吟。靈風扇奇花，清香散人襟。自  
無高仙才，焉能耽此心。

三啓

樂法以爲妻，愛經如珠玉。持戒制六  
情，念道遣所欲。淡泊正氣停，蕭然神  
靜默。天魔並敬護，世世享大福。

又

鬱鬱家國盛，濟濟經道興。天人同其  
願，縹緲入大乘。因心立福田，靡靡法  
輪昇。七祖生天堂，我身白日騰。

又

大道洞玄虛，有念無不契。鍊質入仙  
真，遂成金剛體。超度三界難，地獄五  
苦解。悉歸太上經，靜念稽首禮。

三禮

臣等志心稽首，禮  
太上無極大道。

臣等志心稽首，禮  
三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹重誠上啓  
虛無自然元始天尊，無極大道太上道  
君，太上老君，高上玉皇，十方已得道  
大聖衆，至真諸君丈人，三十二天帝  
君，玉虛上帝，玉帝大帝，東華、南極、  
西靈、北真、玄都、玉京、金闕七寶瓊臺  
紫微上宮靈寶至真明皇道君，三十六  
部尊經玄中大法師，上相上宰上保上  
傅，太平下教二十四真人，西城總真王  
君，太乙真人，東嶽上卿司命茅君，定  
錄、保命二真人，名山洞府得道神仙，  
三界官屬一切真靈。臣等身際玄樞，慶  
諧道運。含烏育兔，未明還返之天機。  
躍鳳騰龍，徒佩幽微之玄範。尚樊籠  
而賦質，莫林壑以棲神。寡過兢兢，立  
功切切，沛紫虛之化雨，敢背初盟。弘

黑鬱之仁風，益堅終誓。今齋主某，重念亡故某。化機自織，業網誰張。陰風翻定水之波，驚濤萬仞。迷雲鎖業山之壁，惡障千尋。蠅營狗苟而動昧四知，馬躍猿騰而靜達三戒。天常披散，人欲紛飛。靈臺之梨棗冬零，神室之荆榛春茂。三元結懣，形已謝於三田。

二寇乘危，烝永辭於尺宅。驚魂冰浦，震魄炎池。終天而五苦屏營，極地而三途流洩。目非常恩之曲宥，曷令鬼趣之高躋。是以請命清微，馳神紫極。散香花於十界，稽顙投誠。流梵唱於諸天，擎拳皈命。冀回淵聽，敷錫慈觀。頌紫綉以召十方，風清萬罪。煥丹綸而開六洞，雲散千冤。俾辭金剛之苦輪，徑上玉虛之梵境。入生出死，常遊宴於清都。返陰還陽，永逍遙於紫闕。頓徹無爲之妙，迴超有漏之塵。齋主某九厄潜消，十灾無撓，世際耀堆床之笏，文獻流芳。家傳華插架之籤，詩書衍慶。暢門闌之喜色，挹庭戶之歡聲。上願經緯澄寧，璇璣昭晏，煙雲藏斂，草木輝華，榆關絕飲馬之聲，麥隴息遺蝗之警。同文同軌，集鴻鴈於青春。重暈重輪，樂鷄豚於白日。地除簡對，水絕盟言。夜壑寒庭，均開明於地禁。陰曹幽掾，疾飛步於天堂。則上明天尊大慈之化，下副齋主皈命之誠，謹啓以聞。

發願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦是修，預以同學，普得升虛，與天相保，長存無憂。

二願諸天結烝澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠逮有生，保劫長存，億劫不傾。

三願土地覆載無窮，安平不陷，海淪不崩，保鎮家國，兆民興從，養生安死，惠同十方，禾稼滋植，營運日豐，咸得厚載，萬類皆從。

四願日月二景高明，無有孛蝕，虧盈安清，光照諸天，洞消暗冥，保固劫運，世祚和平，普加潤惠，澤洒衆生。

五願星辰與日月齊光，旁轉照耀，映朗

十方，各安其位，經緯直行，保鎮家國，無有灾傷，四海寧一，普天興昌。

六願四時隨節推遷，景烝和調，無有灾傷，疫毒消滅，普天安平，五穀豐熟，國富民權。

七願浮雲結烝聚煙，飛空高澄，蔭覆玄玄，隱則無爲，散則彌天，神仙同歸，結友衆真，惠流一切，興國愛民，普濟群生，人同劫年。

八願風雨流洒無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化洋洋，兆庶稱慶，長樂未央。

十二願蜎飛蠢動，已生未生，咸蒙安全，普得生成，皆見元烝，受陽之形，草木果林，經冬不零，一切濟度，靡不

鮮榮。和：與道合真。

### 存神燒香

香官使者，左右龍虎君，侍香諸靈官，當令臣臨午行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御太上無極大道至真玉皇上帝御前。

### 出堂頌

### 回靜默堂

### 謝師

### 回向

### 靈寶領教濟度金書卷之一百十

## 靈寶領教濟度金書卷之一

### 百十一

洞微高士開光救苦真人甯全真授  
靈寶通玄弘教水南先生林靈真編

### 科儀立成品

遷拔道場用

### 晚朝行道儀

#### 燒香頌

各禮師存念如法

#### 衛靈呪

五星高耀，瑞炁飛浮。元始集神，天地交周。玉符寶節，嘯命微幽。擲火揚威，奸兇無留。萬魔振伏，紛葩却消。摧怪伐惡，道炁周流。神光照夜，陰翳俱收。萬仙降格，扇景乘飈。群生成遂，惠遍神州。和：與道合真。

#### 鳴法鼓二十四通

#### 發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲齋意。以今晚朝，陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

### 請稱法位

具位奉行遷拔道場法事小兆臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太乙真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞太無開廓，鼓聖海以權輿。妙有恢張，鑿帝江而橐籥。旋道紀而上

極無上，陶天根而高拱彌高。敷落五篇，一炁徘徊於玄極。周迴十過，三乘煥耀於清微。示珠聯璧合之奇，燦雲絡風纏之妙。諸天拱極，萬地朝宗，靈寶之囿巍巍，道德之淵蕩蕩。臣等依榮右庀，叨渥前班。稟元始之玉文，昭宣雨露。奉虛皇之寶冊，洞煥星辰。凡有皈投，敢忘關告，况奉詞旨，敢不上聞。

## 宣詞

按如詞言，情深激切。齋主某籲天激越，扣地凌兢。痛震魄之顛冥，泉臺杳杳。憫驚魂之跋扈，幽域淒淒。百年曷遂於乘晨，萬劫長羈於積夜。期登道岸，誰建法橋。庸遵鳳笈之儀，密降鸞輿之重。空歌激響，珠旛飛禁路之華。梵唱流明，翠葆下霄衢之仗。羅虬輪於象外，端獅座於光中。百和繽紛，千枝璀璨。所冀慈雲擁布，法雨周迴。御端門而耀丹綸，寒庭鼓舞。宣蕭臺而飛紫綉，夜壑歡呼。金符消罪性於三生，玉簡洗愆情於累世。飛度五戶，上開八門，超地禁以逍遙，步天

衢而容與。恩流今古，澤被天人。以今落景，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝宗廟先靈，社稷尊聖。凝真玄極，觀妙蒼靈。端翠黻以待玉宸，流祥麟趾。襲珠旒而朝金闕，愆慶龍孫。皇帝勇智日躋，聖神天縱。式龜齡於地闊，嵩岱齊尊。植鴻福於天長，滄溟並大。內掖著微柔之德，儲宮稟仁聖之姿。文紀雲臺，勒鼎彝而贊輔。武行月塞，耀旄鉞以蕃宣。今故燒香，自皈依師尊大聖衆，至真之德，得道之後，保天長存。和：與道合真。

以今落景，陞壇行道。請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流齋主九玄七祖，應度亡靈。伏願風散六塵，雲收五蘊。燭龍照夜，飛天芳而克睹光明。暖律嘘春，開地網而永離苦惱。高步明霞之館，疾趨流火

之庭。齋主某視履五華，觀頤六秀，潤屋潤身而考室，學詩學禮以趨庭。今故燒香，自皈依師尊大聖衆，至真之德，得道之後，升入無形。和：與道合真。

以今落景，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流寒林孤爽，曠野幽靈，冥路窮魂，陰關滯魄。並願惠露涵濡，祥烟籠拂。業障報障，均削落於黑編。惡根愛根，普蕩除於玄籍。世世之愆，尤冰釋，生生之冤，債烟消。返胎更生，出三途淒涼之域。靈光受化，離五苦幽暗之鄉。無哭夜之悲聲，有飛霄之樂意。除寂滅相，資天穩步於雲衢。斷疑惑根，御風高躋於月徑。永無輪轉，悉獲超升。今故燒香，自皈依師尊大聖衆，至真之德，得道之後，長享自然。和：與道合真。

禮方 懺方

三啓 三禮

重稱法位

具位臣某，與臨壇官衆等，謹重誠上啓  
虛無自然元始天尊，無極大道太上道  
君，太上老君，高上玉皇，十方已得道  
大聖衆，至真諸君丈人，三十二天帝  
君，玉虚上帝，玉帝大帝，東華、南極、  
西靈、北真、玄都、玉京、金闕七寶瓊臺  
紫微上宮靈寶至真明皇道君，三十六  
部尊經玄中大法師，上相上宰上保上  
傅，太平下教二十四真人，西城總真王  
君，太乙真人，東嶽上卿司命茅君，定  
錄、保命二真人，名山洞府得道神仙，  
三界官屬一切真靈。臣等賦性倥侗，受  
資蹇淺。天開慶運，膺八景之鸞圖。  
帝錫昌期，佩九光之鳳檢。莫精思於  
雲壑，迺混迹於煙葩。八室心悠，面墻  
志切。憲天利物，誓堅金石之忱。弘  
道濟時，恪秉丹青之信。庶酬洪造，上  
冀玄功。今齋主某，無始循環，有生展  
轉。六因十習，滾欲海以流吹。五賊  
七情，溺愛河而飄蕩。逐利歷羊腸之  
險，奔名趨蟲臂之饒。忠孝有虧，罔檢  
身而三省。綱常易失，曷克己以九思。

營營免逐於荆叢，袞袞駒馳於茅徑。  
神辭四大，不勝業網之繁。炁散六如，  
惟覺冤機之密。十宮玉憲，六洞金科，  
自非忱籲於上穹，曷俾澤流於下界。  
是以皈誠蒼極，請命紫虚。懺謝十方，  
覬靈光而曲映。皈依三寶，祈道炁以  
旁周。馳仁敕於泉曲羅鄂，頌德音於  
朔單鬱絕。赦過宥罪，清霄朗兔魄之  
輝。釋矍停冤，滄海耀驪珠之彩。敕  
南宮而紀字，勒北鬱以刊名。炁御於  
神，宴景青宮之邃。神復於炁，凝玄丹  
闕之崇。永爲種民，長臻道域。齋主某  
七靈愆慶，五紀迎和。譽藹圭璋，垂五  
枝於燕翼。望尊瑚璉，等萬事於鴻毛。  
永膺苒禄之休，常際亨嘉之會。上願  
赤書保運，白簡通幽，天地咸寧，儀璘  
並耀。四塞閑射鵬之藝，三農騰扣犢  
之歌。山川鬼神，普優游於化日。鳥  
獸魚鼈，皆鼓舞於祥風。麥秀兩岐，禾  
榮同穎。四時六氣，無風雨寒暑之灾。  
九壘十華，息水火陰陽之考。則上明  
天尊大慈之化，下副齋主皈命之誠，謹  
啓以聞。

發願

一願大道流行，普天懷德。二願一切  
有生，咸皆悟道。三願九夜幽魂，一時  
解脱。四願孤爽無依，咸得受生。五  
願天下太平，五穀豐熟。六願臣忠子  
孝，君仁父慈。七願四海會同，冤親和  
釋。八願潛胞處卵，咸得生成。九願  
積疾新痾，旋即痊愈。十願孤露衆生，  
豐衣足食。

存神燒香

香官使者，左右龍虎君，侍香諸靈官，  
當令臣晚朝行道之所，自然生金液丹碧  
芝英，百靈衆真交會，在此香火爐前。  
令臣學道得道，求仙得仙，齋主受福，幽  
顯沾恩，十方仙童玉女，侍衛香煙，傳臣  
向來所啓之誠，速達徑御太上無極大  
道至真玉皇上帝御前。

出堂頌

回靜默堂 謝師

靈寶領教濟度金書卷之一百十一

# 靈寶領教濟度金書卷之一 百十二

洞微高士開光救苦真人甯全真授  
靈寶通玄弘教水南先生林靈真編

## 科儀立成品

遷拔道場用

### 單朝儀

燒香頌

各禮師存念如法

衛靈呪

五星列照，煥明五方。水星卻災，木德致昌。熒惑消禍，太白辟兵。鎖星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金

童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉為齋意。以今陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

### 請稱法位

具位奉行遷拔道場法事小兆臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝太帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞元始開圖，祖炁胤飛玄之妙。虛皇撫運，神功敷空洞之奇。建鰲極

以奠玄黃，簸鴻鈞而凝經緯。乍遐乍邇，昭昭而玉宇飛浮。或顯或微，赫赫而金書洞煥。為三靈之柱石，實萬古之津梁。几屬範圍，悉同歸戴。臣等夙承慶運，獲際昌時。拊景煙霞，敢守空山而獨善。依光日月，盍度無間以同仁。庶寅亮於天工，庸裁成於帝化。凡有投告，敢不上聞，齋主青詞，謹當宣奏。

### 宣詞

按如詞言，備殫激切。齋主某天屬情鍾，人倫義重。營營夙夜，徒懷藏壑之舟。茫茫歲時，曷障逝川之水。慨一死而形神迴隔，歷千生而音容莫聞。誰伸援手之仁，惟劇驚心之感。若稽瓊笈，式按瑤圖。龍岬山中，三錄演威儀之祕。香林園內，九幽昭科品之崇。垂芝渥於朔單，煥楓恩於壘澤。請命則陰靈離夜，出地戶以超凌。歸神則陽爽乘晨，入天門而宴樂。巍巍功德，赫赫威光，爰殫一瓣之恭，肅啓十華之聖。紫煙上下，翠鸞參景於靈風。綵霧後先，珠黍浮空於聖日。鳳蹕振雲

衢之韻，龍輿旋輦路之塵。群仙翼轅，萬真駘駕。眇眇劫仞，紫金妙相以端凝。奕奕鬱羅，白玉毫光而遍覆。上徹虛無之境，下通寥泝之鄉。俯聽芻蕘，不遺葑菲。臣等深慚蚊負，僭領鴛班。願垂有造之仁，恪副無私之禱。以今陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三寶。願以是功德，上祝社稷尊靈，宗祧先聖。遊神太漠，御景空無。飛羽蓋以朝元，瓊林問道。擁霓旌而乘景，瑤圃凝玄。開寶運於天長，蔭璇圖於地久。英君世出，哲輔時生。皇帝道邁羲農，功高軒燧。五福並滄瀛之大，億齡齊嵩華之崇。文恬武熙，歌九功而梯航肆覲。內安外輯，舞七德而玉帛來儀。凝甘露於金莖，耀景星於玉宇。今故燒香，自皈依師尊大聖衆，至真之德，得道之後，保天長存。

和：與道合真。

以今陞壇行道，請法衆等，運茲二捻上香。願此香煙騰空徑上，供養無上至

真經寶。臣等皈身皈神皈命，首體投地，仰依太上三尊。願以是功德，歸流齋主家九玄七祖，億劫種親。伏願千冤解悟，萬罪清夷。離鬼官而送迎，玉章起死。救魔王而監舉，金簡迴生。超步武於北單，沐精神於南上，逍遙雲外，遊宴霄中。齋主某慶襲先春，香凝晚節。敦頤自樂，門庭迎革故之祥。視履相歡，眷屬享康寧之祉。灌雲漿而駐景，漱霞醴以怡顏。融和氣於壺天，萃歡聲於福地。今故燒香，自皈依師尊大聖衆，至真之德，得道之後，升入無形。

和：與道合真。

以今陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流三途滯爽，五道窮魂。伏願仁風披拂，道日舒明。噓暖律於寒庭，九幽挾纈。耀陽曦於夜壑，六洞乘晨。地除簡對，以飛霄，水絕盟言而御景。永辭黑鬱，徑上朱陵。臣等師友親姻，妄業冰澄，真機月瑩。紅塵超迹，均證悟於大乘。

青簡登名，咸策功於小有。既往步始青之妙，見存彰抱紫之玄。扶三洞以光明，翼九清而朗徹。今故燒香，自皈依師尊大聖衆，至真之德，得道之後，長享自然。

和：與道合真。

禮方 懺方

三啓 三禮

重稱法位

具位臣某，與臨壇官衆等，謹重誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞道契虛無，高運一元之表。教尊靈寶，密敷三極之中。陶陽綱陰紀以包羅，提地緯天經而囊括。怡怡惠露，垂潤澤於有生。

藹藹慶雲，昭覆蔭於無極。自清微開上乘上妙，至赤明啓下教之期。凡澈切以投誠，必昭宣而度命。今齋主某，仰慮亡故某，劫終劫始，身後身前，蘊三業而飄蕩愛河，縱七情而流吹欲海。目貪黼黻，耳混宮商，肥甘每縱於舌端，馨馥常參於鼻觀，意逐紛華之境，身貪紈綺之塵，罪根惡根生死根，纏縈覺地。業障報障煩惱障，膠擾靈源。三彭啓釁以雲奔，一豎乘危而風動。重泉杳杳，積夜茫茫。自非請命於玄穹，曷俾升神於黑壤。是以疏瀹百慮，澄肅一心。開藥笈以宣揚，建芝壇而鋪設。轉經行道，徵浩蕩之洪恩。燒香散花，輅涵濡之聖澤。期提携於幽爽，庸超邁於陽庭。伏願梵炁彌羅，靈光洞煥，白簡降三天之邃，丹綸開九夜之幽。煥朗銅門，昭明鐵壘。即俾亡

常際於太平。齋主某與道合真，為善最樂。吉祥至止，茂迎天錫之蕃釐。福德昭融，常宴神資之純嘏。紹箕裘而有耀，襲簪紱以連榮。普宴松蘿，均陶桑梓。上願三靈昭泰，五紀和寧，風雨均調，山林靜晏。朝多賢輔，共昌太平之基。野絕游農，同迓時雍之治。考息陰陽於夜壑，愆消水火於寒庭，五道昭甦，三塗開泰。則上明天尊大慈之化，下副齋主皈命之誠，謹啓以聞。

十二願

一願乾坤明素。二願氣象清玄。三願聖君萬壽。四願化洽八埏。五願天垂甘露。六願地發祥煙。七願四時應節。八願萬物生全。九願家多孝悌。十願國富才賢。十一願齋功廣被。十二願善瑞日臻。

存神燒香

香官使者，左右龍虎君，侍香諸靈官，當令臣行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向

來所啓之誠，速達徑御太上無極大道至真玉皇上帝御前。

出堂頌

回靜默堂

謝師

回向

設醮謝恩儀

法事如式

各禮師存念如法

衛靈呪

五星列照，煥明五方。水星卻災，木德致昌。熒惑消禍，大白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。和：與道合真。

鳴法鼓二十四通

發爐

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真

法玄都，劫不經於輪轉。聞經青極，運



官正神，急上關啓。臣今奉爲齋意。以今設醮謝恩，燒香行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位奉行遷拔道場法事小兆臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞炁混太無，高拱清微之表。功恢妙有，昭弘紫極之中。宰二儀而御陰陽，運五靈而調經緯。金書流演，仁風丕扇於黃垓。玉宇飛浮，湛露膏濡於黑鬱。自龍漢而啓運，至鶴鳴而流

芳。齋按三天，結靈寶飛玄之炁。醮敷九地，遵正一空洞之文。有感斯通，無文不度。今醮官某凝神碧落，勵志清虚。飛死炁於陰關，已承初惠。妙生神於陽境，更藉終仁。爰抒葵藿之恭，恪致蘋蘩之敬。伏願丹輿綠輦，驂朱鳳以徘徊。羽蓋瓊輪，翼玄龍而迅邁。八極之真靈混合，十華之仙聖旁昭。俱會道場，普矜德愍。臣不勝望天瞻聖，激切之至，稽首再拜奏請。

請聖

三界衆真，醮筵列聖，適伸拜請，諒沐光臨，請各整於仙班，共祇迎於帝馭。

降九位

鸞輿至止，鶴駕臨軒，與醮衆真，如儀朝禮，朝禮既周，請陞醮席，齋官上香，設拜初進酒。

法事

重稱法位

具位臣某，與臨壇官衆等，謹同誠上啓三清上聖，七御玄尊，天府朝元一切真宰。臣聞黍珠入妙，祥開騰勝之天。碧玉凝玄，瑞應浮黎之土。八緯霞明於

神谷，七經日耀於靈關。中有度人，集群真而校錄。上無復祖，超五大以包羅。龍文開赤明之圖，鳳炁結紫霄之牒。九幽科品，三籙威儀，是靈寶之淵宗，實玄元之閩奧。臣等志惟知白，心昧迴黃。抱裁金鸞簡之文，風雲慶會。綴曳玉駕班之武，雨露霑濡。既鼓舞於仁風，宜汪涵於聖澤。凡有投告，盍爲關聞，爰有青詞，謹當宣奏。

宣詞

按如詞旨，備露忱恂。齋主某仰籲穹穹，俯矜方壘。念情纏骨肉，倏四大之各離。而勢隔音容，痛百身之莫贖。冥冥長夜，杳杳丘寒。生後生前，寧免冤輪之運。劫終劫始，難忘業網之張。黑編紛糾於真曹，青律張皇於獄吏。匪繇帝力，曷免神威。爰皈心九豹之關，庸請命八鸞之御。芝壇日近，移晷藹之霓旌。騫座雲開，輅鬱華之雲蓋。弘抒丹幅，肆邇清光。荷葑菲之不遺，鑒芻蕘之可采。玉龍迅告，提夜壑而無拘天門。金馬驛程，廓寒庭而拔出地戶。亡故某乘晨有慶，離夜無憂。臨

真度生，徑陟虛無之界。迴骸起死，永躋清淨之鄉。萬罪清平，千冤和釋。允拜拯提之造，敢忘皈謝之誠。敬被清筵，僭陳禴祭。伏望昭昭日鑒，赫赫時歆。翠竚流金，擁伶華而激響。珠籀耀玉，昭符寶以流明。扣瓊臨三秀之筵，鳴玉映五明之座。大鈞坱圠，傾心願享於克誠。小物徊徨，勵志恪殫於庸敬。皈依激越，塵冒凌兢。臣不勝瞻天望聖，俟命之至。

亞獻

具位臣某，與臨壇官衆等，謹同誠上啓三清上聖，七御玄尊，四府萬靈一切列聖。臣聞始青出教，昭祖炁於五文。大赤垂科，煥靈光於二禁。慧燭耀人天之境，慈航駕生死之津。諸天臨軒，混虬輪而肆會。衆真侍座，拱獅御以浮空。胎嬰結育於齊仙，魔癘奔飛於嚴攝。萬天萬地，一陰一陽。大哉靈寶之奇，至矣虛玄之妙。今齋主某丹衷罔極，素志堪矜。北鬱返魂，已藉三天之聖澤。南丹度命，更資九地之靈功。庶永宴於青華，式上賓於紫極。伏願

恩綸鼓動，德綍飛流。慈雲汎蔭於初忱，法雨宜覃於終惠。即俾亡故某，性天朗悟，心地昭融。一塵不染於生根，愆尤冰散萬翳。罔干於命帶，冤債風清。金符輝煥其襟懷，玉券昭華其步武。神升碧落，登雲路以高躋。炁合玄虛，憩月庭而迅步。得預黍珠之妙會，常聆騫翠之空歌。注訟停閑，考殃絕滅。福雲仍於蘭畹，蔭姻族於芝林。克爲金闕之臣，永侍玉京之聖。齋主某道心開發，德性充周。臉潤霞明，固金花而不老。體融月瑩，迎玉樹以長新。壺天華金屋之春，福地映玉階之曉。松茂栢悅，南山介壽於期頤，芝秀蘭芳，東海衍祺於純嘏。齊眉穆穆，坐膝誵誵。弘誦相歡，暢承家之文獻。箕裘自樂，溥濟世之聲猷。蒙如丹禱之私，允拜洪釐之被。上願三靈昭瑞，五氣呈祥，風靜雲藏，天光澄寂，川流岳峙，地景凝安，握千秋玉鏡之輝，開萬年金枝之耀。桑麻雨足，歡擊壤以謳歌。禾黍雲速，樂荷鋤而鼓舞。四塞不聞於刁斗，千林普息於樵蘇。恩周

動植之生，澤遂飛潛之性。陰僚幽掾，咸擢陽班，苦爽窮魂，均登道岸。臣不勝虔禱之至。

終獻

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞至敬無文，莫露加籩之實。大禮必簡，深懷掩豆之羞。事天既罄於多儀，享帝宜殫於明德。拳拳炁應，切切神交。以今百和煙微，千枝燼冷。雲飛華蓋，將旋景於蕭臺。月湛參期，亟回光於藥闕。鳴鞘逸響，法從旋班。萬聖傾光，御紫煙而上邁。諸天復位，乘綵霧以高征。臣

等拜手瑤墀，馳神碧落。運元會道，密瞻絳室之嵯峨。度命登真，仰企玄關之縹緲。臣不勝攀戀，激切之至，謹稽首再拜奉送。

回駟頌

復爐

焚燎

向來

靈寶領教濟度金書卷之一百十二

靈寶領教濟度金書卷之一

百十三

洞微高士開光救苦真人甯全真授  
靈寶通玄弘教水南先生林靈真編

科儀立成品

遷拔道場用

十方懺儀

入壇

步虛

東方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，何繇拔贖。因今燒香行道，發露祈恩。伏願東方無極太上靈寶天尊，九炁天君，東鄉神仙諸靈官，廣運慈

悲，特垂原赦。告下東嶽泰山府，木官司禁，東方風雷地獄之中，拔度魂儀，斷除考對。俾亡故某，出離幽夜，得睹光明，萬罪蕩除，冤仇和釋。上天堂納善之界，登華林惠靜之鄉。衣食自然，形神俱妙，得道之後，升入無形。和：與道合真。

南方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願南方無極太上靈寶天尊，三炁天君，南鄉神仙諸靈官，廣運慈悲，特垂原赦。告下南嶽衡山府，火官司禁，南方火翳地獄之中，拔度魂儀，斷除考對。俾亡故某，出離幽夜，得睹光明，萬罪蕩除，冤仇和釋，上宛利契賢之界，登梵天端化之鄉。衣食自然，

形神俱妙，得道之後，升入無形。和：與道合真。

#### 西方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願西方無極太上靈寶天尊，七炁天君，西鄉神仙諸靈官，廣運慈悲，特垂原赦。告下西嶽華山府，金官司禁，西方金剛地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上福堂威行之界，登金光利益之鄉。衣食自然，形神俱妙，得道之後，升入無形。和：與道合真。

#### 北方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，

萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願北方無極太上靈寶天尊，五炁天君，北鄉神仙諸靈官，廣運慈悲，特垂原赦。告下北嶽恒山府，水官司禁，北方溟冷地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上鬱單清淨之界，登真靈救度之鄉。衣食自然，形神俱妙，得道之後，升入無形。和：與道合真。

#### 東北方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗

首陳，曷繇拔贖。因今燒香行道，發露祈恩。伏願東北方無極太上靈寶天尊，梵炁天君，東北鄉神仙諸靈官，廣運慈悲，特垂原赦。告下東北方水官司禁，東北方鑊湯地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上福集長樂之界，登妙嚴周帀之鄉。衣食自然，形神俱妙，得道之後，升入無形。和：與道合真。

#### 東南方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願東南方無極太上靈寶天尊，梵炁天君，東南鄉神仙諸靈官，廣運慈悲，特垂原赦。告下東南方雷霆司禁，東南方銅柱地獄之中，拔度魂

儀，斷除考對。俾亡故某，出離幽暗，得睹光明，萬罪蕩除，冤仇和釋，上福田用賢之界，登妙嚴碧霞之鄉。衣食自然，形神俱妙，得道之後，升入無形。和：與道合真。

西南方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願西南方無極太上靈寶天尊，梵炁天君，西南鄉神仙諸靈官，廣運慈悲，特垂原赦。告下西南方地官司禁，西南方屠割地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上延福仁靜之界，登耀真善瑞之鄉。衣食自然，形神俱妙，得道之後，升入無形。和：與道合真。

西北方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜，耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，曷繇拔贖。因今燒香行道，發露祈恩。伏願西北方無極太上靈寶天尊，梵炁天君，西北鄉神仙諸靈官，廣運慈悲，特垂原赦。告下西北方天官司禁，西北方火車地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上福德延賢之界，登妙道真仙之鄉。衣食自然，形神俱妙，得道之後，升入無形。和：與道合真。

上方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，

四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，何繇拔贖。因今燒香行道，發露祈恩。伏願上方無極太上靈寶天尊，梵炁天君，上鄉神仙諸靈官，廣運慈悲，特垂原赦。告下上方日月星宿司禁，上方普掠地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上玉京紫微之界，登玄都碧霄之鄉。衣食自然，形神俱妙，得道之後，升入無形。和：與道合真。

下方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗首陳，何繇拔贖。因今燒香行道，發露祈恩。伏願下方無極太上靈寶天尊，

梵炁天君，下鄉神仙諸靈官，廣運慈悲，特垂原赦。告下下方土官司禁，下方無間地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上洞極陰靈之界，登水蓮淨土之鄉。衣食自然，形神俱妙，得道之後，升入無形。和：與道合真。

總十方

臣等今故燒香，皈身皈神皈命，懺悔亡故某。劫劫稟資，生生賦質，一真汨沒，萬妄紛紜。耳混宮商，目耽錦繡，舌貪滋味，鼻慕馨香，口惑是非，意別人我，四維不守，三惑未除，元臘威儀，罔知懺悔，節會科律，有味朝修，罪積玄曹，愆書玉簡，一朝滅度，九夜沉淪，非仗懺陳，何繇拔贖。因今燒香行道，發露祈恩。伏願十方無極太上靈寶天尊，梵炁天君，十鄉神仙諸靈官，廣運慈悲，特垂原赦。告下諸方司禁，諸方地獄之中，拔度魂儀，斷除考對。俾亡故某，出離幽暗，得睹光明，萬罪蕩除，冤仇和釋，上十極清淨之界，登十華裝嚴

之鄉。衣食自然，形神俱妙，得道之後，升入無形。和：與道合真。

出堂頌

靈寶領教濟度金書卷之一百十三

靈寶領教濟度金書卷之一百十四

洞微高士開光救苦真人甯全真授  
靈寶通玄弘教水南先生林靈真編

科儀立成品

太極心法祭鍊儀

步虛

洒淨

普獻頌

普獻無邊聖，香煙散十方。願乘七寶臺，垂光五濁世。運度人天衆，咸令上法橋。同會證無爲，勤修不退轉。

具位臣某，謹焚寶香，遙瞻供養太上無極大道三清上聖，十極高真，傳道授經度人濟世無鞅聖衆。臣聞元始開圖，敷三乘之鳳策。虛皇撫運，弘七部之龍章。仁風鼓舞於幅圓，惠露涵濡於寥廓。青玄黃籙，羅九職於東華。丹火朱陵，崇二曹於南上。提夜壑而朝陽燦爛，煦寒庭而春色淑融。自帝尊開

玉匱之芳，故師寶啓金囊之祕。燈燈續燄，葉葉傳宗。妙哉化育以難量，大矣生成而莫極。臣等心遊淵粹，迹襲紛葩。玄元始之真機，面墻自嘆。希夷微之妙旨，入室未諧。莫融經緯於三田，曷混儀璘於六合。冒領芝壇之職，濫聯楓陛之班。宣德開幽，期棹慈航於苦海。承符破暗，誓張慧燭於昏衢。

下尉群靈，上裨三極。今齋主某伏爲某事，爰念重泉苦爽，飄命帶以茫茫。長夜遊精，瘁生根而杳杳。萬劫莫回於陽性，千生未滌於陰塵。罪報循環，冤仇輪轉。庸按祭鍊之玉訣，肆遵濟度之金科。甘露門開，徹十華而薦享。祥煙戶啓，資二景以陶鎔。生天而六耀騰光。出地而九真煥彩。火龍迅駕，鬼官部衛於神鄉。金馬驛程，制魔保舉於真域，開通幽顯，和合冤親，永無淪墮之憂，常享太平之運。伏望洪慈起死，大德好生。羽蓋瓊輪，縹緲齊臨於碧落。丹輿綠輦，翩翩遙下於清虛。敕玄局以雷奔，湛丹綸而風動。圓成釐事，拔領幽魂。遂齋主激切之

忱，副微臣皈依之悃。臣下情不勝祈恩，屏營之至。

誦大行梵炁章三過

大行梵炁，周迴十方。中有度人，不死之神。中有南極，長生之君。中有度世，司馬大神。中有好生，韓君丈人。中有南上，司命司錄。延壽益算，度厄尊神。迴骸起死，無量度人。今日校錄，諸天臨軒。

臣謹同誠上啓清微天中妙無上帝，禹餘天中虛皇上帝，大赤天中至真大帝，無上三十二天上帝，願運慈悲，俯聆懇款。切以金飯玉漿，濟三塗之苦惱。交梨火棗，充九夜之飢虛。惟資神變之功，方證靈通之妙。以今奉爲齋主某，修崇祭鍊，攝召幽靈。願惟塵境之鋪陳，難使冥徒之欲受。欲望真慈廣運，聖貺旁昭。降三寶之神輝，彌羅有截。覆五靈之道炁，鬱勃無垠。珍羞成廣大之筵，餚膳變清涼之味。即使受施等衆，充悅想念，灌潤焦枯。俾容止以輕徐，可精神而泰定。臣不勝虔禱之至。

誦中篇

臣謹重誠上啓南極朱陵大帝，北極洞陽大帝，東華木公，青童道君，西靈金母丹皇道君，太陽炎光帝君，太陰黃華元君，願運慈悲，俯聆懇款。切以走虎飛龍，凝鬱儀結璘而灌鍊。含烏育兔，降方諸陽燧以陶澄。惟資神變之功，方證靈通之妙。以今奉爲某，修崇祭鍊，攝召幽靈。非假水火之真精，曷蕩陰冥之氛翳。欲望天恩曲映，靈澤敷宣。降東井之靈泉，素瀾流洒。飛南閭之神彩，丹燄光鮮。五龍騰玉漢之英，九鳳鼓金門之氣。即使受鍊等衆，玉眸鍊質，黃華蕩形。俾塵垢以潔清，可形神而沖舉。臣不勝虔禱之至。

誦中篇

臣謹重誠上啓虛皇玉晨太上道君，三元丹天六辰道君，願運慈悲，俯聆懇款。切以玉籙度生，勒陰官而敬聽。金書起死，敕冥吏以丕承。惟資符合之功，方契靈通之妙。以今奉爲某，修崇祭鍊，攝召幽靈。非憑寶籙之光輝，曷俾冥關之開泰。欲望洪恩弘被，靈貺昭

回。降紫鳳之芝函，金童夾侍。啓青虬之藥簡，玉女齊臨。神光射九地之幽，梵炁徹三天之邃。即使受度等衆，依憑功德，時刻昇遷。赦萬罪以澄清，脫三途而飛躍。臣不勝虔禱之至。

誦中篇

請太乙

恭聞長樂界內，號尋聲救苦之尊。妙嚴宮中，儼應念垂慈之主。天寶泉普蘇於熱惱，空青枝遍洒於煩冤。拔領十方，運威神而遍滿。周迴三界，錫慧力以提携。琳琅百寶之祥光，煒燁九華之妙炁，號慈悲父，爲天人師。凡居範圍之中，悉囿甄陶之內。以今奉爲某，修崇祭鍊，普度幽冥。期提積夜之魂，均遂乘晨之願。蘭湯告備，芝饌將陳。切念地獄一類，毒霧周縈，業煙檢繫。銅關萬雉，抱長恨而億劫無原。鐵壘千尋，含積冤而長年莫釋。況羅艷之眇奔，號鬱絕之幽寥，負痛終天，銜哀極地。自匪靈光下燭，頓令毀鎖以張門。曷使幽暗上騰，即俾開關而啓路。和合六趣，證妙三元。欲望白

玉毫光，紫金瑞相。輝明夜府，爲摧毀於陰關。照耀泉扃，即開宣於幽域。冥官聽令，獄吏停刑。一一珠中，示慈悲之霽色。重重光內，昭憐憫之慈容。枷鎖脫除，道途通泰。普使三途罪爽，五道窮魂，乘功德光，出煩惱暗。永離地戶，無拘留逼合之憂。行御天門，有侍衛送迎之喜。金城孕質，玉洞凝神。臣不勝虔禱之至，恭俟天恩報應。

宣破酆都開業道呪十二遍

茫茫酆都中，重重金剛山。靈寶無量光，洞照炎池煩。亡過諸幽魂，身隨香雲旛。定慧青蓮花，上生身永安。真光遍覆，亘三際以開明。靈景遙舒，極十華而晃耀。道路稟部送之令，關津無阻滯之憂。斗轉參橫，悲風振而遙林淅瀝。河澄月淡，輕煙裊而遠岫參差。正永漏之將中，恍清宵之未半，靈旛颭颭，寶鐸琅琅。禮亦宜之，盍通微於萬類。時亦可矣，須普集於群靈。共歆霞供之芬芳，式煥雲壇之清靜。天恩無外，地域遐開，法衆運誠，志心召請。

志心召請，一切天仙道，一切神明道，一切人倫道等衆，各及眷屬。惟愿仰承三寶力，今夜今時，齊附靈旛，來赴玄壇。和：受茲開度功德。

志心召請，一切地獄道，一切餓鬼道，一切畜生道等衆，各及眷屬。惟愿仰承三寶力，今夜今時，齊附靈旛，來赴玄壇。和：受茲開度功德。

志心召請，一切胎生之衆，一切卵生之衆，一切濕生之衆，一切化生之衆，各及眷屬。惟愿仰承三寶力，今夜今時，齊附靈旛，來赴玄壇。和：受茲開度功德。

志心召請，四海九州，荒郊曠野，孤魂滯魄，諸類傷亡，無鞅之衆，各及眷屬。惟愿仰承三寶力，今夜今時，齊附靈旛，來赴玄壇。和：受茲開度功德。

志心召請齋主九玄七祖，歷劫種親，宿世今生冤仇等衆。惟愿仰承三寶力，齊附靈旛，來赴玄壇。和：受茲開度功德。

召畢，引旛至壇前



將天炁以制天魂，遊精莅止。開地關而來地爽，逝識均臨。如聞警歎之音，似認步趨之影。相呼相喚，行赴蘭湯。將翽將翔，爰朝芝座。然念根塵積染，業垢交周。病寇生前，或五藏百骸之未復。冤繫死後，有三生四負之猶迷。致神炁之支離，覺形骸之臭腐。非假攝聚，曷復本初。盍遵紫極之金符，遍布清微之玉敕。整全異類，完復人身，庶冤病以兼除，可形神而受煉。

#### 宣五府煉形章

東方紅杏育蒼英，南方襍臘養炎精。西方磨針司瑞澤，北方墨黑度玄津。中央靈寶玄元始，五炁旋虛妙入神。癱攣跛痾蒙伸曲，耳目無聰反慧明。自害自刑俱復體，墮胎傷折得回魂。中毒夭亡皆強體，雷嗔暗惑得全靈。青帝護魂肝木旺，赤帝養炁心火亨。白帝侍魄生成肺，黑帝通血腎玄清。黃帝中主脾土安，梵炁彌羅白合真。起死迴屍煉離坎，白骨成人萬炁盈。濟度垂死無生滅，九和十合結胎嬰。五老運靈監受度，逍遙變化宴上清。

消病魔，驅冤鬼，既清淨以無憂。灌生炁，全真神，可從容而有喜。百關通暢，萬竅華敷。再惟久滯陰關，易淪陽性。襲紛埃之浩蕩，周而萬形。染塵垢之迷縈，粧嚴百體。匪灌煉於神水，俾澄湛於華池。曷返故根，頓回新質。池開八解，玲瓏而三景流輝。水灌五香，清靜而諸天降彩。即使受浴等衆，泓澄陽景，沐浴陰塵，端容體以逍遙，肅神儀而朝覲。受事官將，引靈受煉。

#### 沉丹陽符於水中

#### 宣丹陽煉度大呪

龍漢蕩蕩，無形無名。眇眇億劫，黃道開清。神燈朗耀，九魂吐精。玉虛澄輝，太霞高明。元始開化，諸天齊臨。三元道養，二象攝生。未度者度，未成者成。已死即化，已枯復榮。蠢動蝸息，一切冥靈。懷胎含孕，咸得受形。亡者命過，魂歸三清。魄受鍊度，南宮變形。今日大吉，皆得光明。五帝鑒映，普告萬靈。天地神祇，及彼河源。五嶽四瀆，及諸名山。洞源洞虛，洞空洞仙。無極大聖，至真尊神。無極無窮，普鑒度生。地根斷絕，玄都記名。衆神普應，一切咸聽。

窮，普鑒度生。地根斷絕，玄都記名。衆神普應，一切咸聽。

#### 焚水煉符 宣呪

#### 焚化衣符 宣呪

浴質儀備，水鍊功圓，六銖昭上衣下裳之功，八芒含內方外圓之象。容止端正，步武輕盈，宜旅進於楓宸，即參朝於芝座。鈞容振響，羽葆流明，法衆運誠，皈依朝禮。

#### 志心朝禮

太上無極大道。

#### 志心朝禮

三十六部尊經。

#### 志心朝禮

玄中大法師。

望虎關而稽首，九拜承恩。覲獅座以傾心，一忱徼福。上帝鑒勤渠之悃，下愚彈激切之恭。然念久墮陰鄉，遠辭陽境。莫逢蒸膳，寧無希望之心。久闕精羞，難免食求之想。幸承檄召，來屆壇場。諸天之妙炁羅敷，萬聖之真光覆映。輝華變現，等月露以無塵。神化靈奇，象雲霞之有耀。靡間三華。

之妙席，無殊六甲之芳筵。異果陸離，奇葩錯落。金童旅進，羅玉箸以鋪飴。玉女朋從，列金匙而餽飼。即使受食等衆，飢虛頓絕，想念都除，烝爽神清，食足願滿。絕塵心之祭饗，悟法性之空無。受事官將，引靈受食。

宣甘露通真呪

宣法食六梵咒

誦中篇

品類臨妙化之筵，隨念飽滿。靈爽集神奇之席，復性周圓。寬億劫之飢虛，濟千靈之苦惱。允爲欣幸，實藉提携。然念宿墮迷津，遂淪惡趣，業機交織，冤網互繫，匪陶冶於陽精，曷斷除於陰翳。俾離地暗，快睹天光。石景金精，已澄淪於五體。玉眸流火，更鎔鍊於百骸。南乾射丹鳳之輝，東離耀金烏之彩。炎光升降，陽耀飛沉。即使受鍊等衆，體履金光，質還玉潤，惡塵何有，猶紅日之行天。罪垢無存，若壽蟾之照地。淵澄泓湛，變化超凌。受事官將，引靈火鍊。

起水中丹陽符 置火池中焚之

宣丹陽煉度大呪  
焚火鍊符 宣呪

陶形儀備，火鍊功圓。悟六用之無成，人我解脫。蕩一塵之不染，表裏澄清。所宜夙駕於火龍，疾俾高躋於金虎。爰念琅函藥笈，瓊韞芝圖。有妙戒之梯津梁，悟之則超凡入聖。有寶錄之梯級，佩之則駕景凌虛。今當先演戒條，次宣錄訓，永爲身寶，如律受持。法衆運誠，人各恭敬。

宣九真戒

九戒宣傳，一心諦聽。真脩途之穩駕，洪波之方舟，炎亢之甘霖，疾病之良藥。生前身佩，徑上天堂。死後心操，不經地獄。即有察命童子，護戒威神，五帝考官，六宮掾吏，隨逐動履，覆護行藏，歷劫弗誤，永無輪轉，凌霄有便，飛行可期，寶錄敷宣，所宜端念。

宣生天錄

見前衆類，幸承陽光，克離陰都。禮道禮經禮師，一真日皎。鍊形鍊神鍊烝，萬妄風清。餐法味以濟飢虛，聽玄音而消冤病。真戒敬佩，寶錄恭參。行

御景以高升，即凌空而直上。可謂夙生慶會，萬劫遭逢。更宜葆粹以夷猶，少俟運神而發遣。伏惟珍重，無忘道恩。

寶華圓滿天尊

臣聞神樞鼓動，會超無上之奇。聖籥裁成，廣扇又玄之奧。萬國仰瞻於聖日，十方高拱於真風。動運隆仁，曲徼淵鑒。臣向來奉爲某，修崇祭鍊，開度幽靈。荷真聖之傾光，遂凡庸之受度。功滿德就，道備恩隆。雲歛璇霄，覺清杓之欲下。星移銀漢，嗟玉漏之將殘。萬乘戒嚴，諸天復位。伏望霓旌羽葆，却返鬱羅。月蓋風旂，即旋劫仞。臣等瞻依徒切，控挽無從，謹稽首再拜奉送。

送真頌

謹召本靖臨壇，受事主將副將，護道監壇，疾速嚴裝顯服，部衛所度幽靈，前赴南昌上宮朱陵火府，遵承帝敕，隨果受生。

宣護送牒

誦上天度人章

送亡靈如儀

回壇

向來

靈寶領教濟度金書卷之一百十四

靈寶領教濟度金書卷之一

百十五

洞微高士開光救苦真人甯全真授  
靈寶通玄弘教水南先生林靈真編

科儀立成品

血湖道場用

冥官醮儀

步虛 洒淨

請稱法位

具位某謹上啓北陰玄天酆都大帝，東嶽天齊仁聖帝，地府十宮真君，溟泠大神，五道大神，九幽地獄主者，大鐵圍山無間硤石血湖地獄主者，血湖掌罪籍冤對冥官，翻體大神，擲尸大神，食心啖腦鬼王，某州社令尊神，本州本縣城隍主者，當境土地里域主者，遠近廟貌祀典神祇，齋主家土地司命六神，一切威靈。伏以清微御極，羅敷三洞之慈雲。赤明開圖，煥耀十華之慧日。拯死魂於北鬱，鍊生魄於南昌，恩浹千

生，仁同一視。茫茫苦海，孰砥柱於迷津。杳杳血湖，曷津梁於彼岸。玉籙

侈度人之典，金章勒司殺之曹。昭天漏泉，雖荷元皇之德澤。承流宣化，猶資冥職之慈悲。庸即玄壇，爰伸禱祀，靈光洞煥，開八極之陽春。神馭駢羅，離九幽之長夜，不違丹悃，剋赴清筵，法衆運誠，志心奉請。

請神

初獻 散花

某上啓北陰玄天酆都大帝，東嶽天齊仁聖帝，地府十宮真君，溟泠大神，五道大神，地司列曹冥官主職，州縣城隍，當境土地，醮筵內外一切真靈。伏以清教紫府，陽光儼先聖之居。黑壤黃泉，陰暗號鬼神之宅。受中免分於迷悟，生神遂判於升沉。十宮六洞之森嚴，班聯赫奕。五苦三塗之沉滯，憲令昭彰。惟血湖之幽牢，連鐵圍之朔境，業風振蕩，產魂顛冥。飲穢吞腥，考訊無關於貴賤。含冤茹苦，拘囚莫記於春秋。不聞三寶之名，永隔九清之境。雖繇報對，實累生成。帝矜祖炁之分

靈，忍置陶鎔之外神。稟天符而度命，悉歸膏澤之中。伏願體道好生，法天救死。霹靂雷霆之怒，刀化樹而劍爲騫。敷雨露之恩，冰靜波而火息焰。終藉三天之蔭，獲超九地之幽。除罪簿，滅惡根，契度人於十轉。開生門，塞死戶，符救苦於十華。請命勤渠，陳詞激切，某不勝虔祝之至，謹當亞獻。

酌酒 散花

某上啓北陰玄天酆都大帝，東嶽天齊仁聖帝，地府十宮真君，溟泠大神，五道大神，地司列曹冥官主職，州縣城隍，當境土地，醮筵內外一切威靈。伏以大哉乾，至哉坤，極資死資生之效。保其神，貴其炁，成唱恭唱奉之功。兩平合而天粹混成，二五凝而神光爛若。既獲胚暉之種子，皆期橐籥以成人，何十月之未周，胞胎遽殞。或百粹之尚遠，母子俱亡。驚神識之沉淪，歎穢腥之陷溺。終天負痛，扣地儔矜。雖三生之冤業使然，亦一念之根塵致爾。血池浩蕩，聖經已迷其寒心。幽域淒涼，帝赦徒煩於側耳。非由曲度，曷副

私祈。今齋主某，伏爲亡故某，崇建玄壇，敷陳素悃。金真演教，植萬劫之津梁。玉匱告齋，開九幽之徑路。朱章靈奏，玉簡風飛。請三炁以流光，告三元而赦罪。願遵帝旨，慨歛靈威。凡係薦之真魂，與見禁之囚爽，普消業債，俾出冥途。淨尸魄而部衛形魂，斬根伐滯。復元神而超凌溟滓，受化更生。悉由提拯之恩，敢昧獻酬之敬，謹伸終奠。

終獻 散花

禮周三獻，詞不再陳，元始玉符，謹當告下。

告符

飛空步虛頌

宣疏

某謹重誠上啓醮筵內外，合座威靈。伏以無私覆無私載之恩，不言善應。不在大不在小之罪，與物爲春。惟元始之真符，實幽關之曲赦。扣地扃而誕布，驛吏星馳。奉天命而對揚，冥曹雷動。望回惠澤，普濟幽靈。時刻升遷，賴侍衛送迎之力。天人欣慶，無拘留逼合之憂。奠獻有彝，忱恂可罄，恪祈

洪造，永翊玄風。某不勝瞻戀之至，謹當奉送。

復爐

回輶頌

送聖

向來

關血湖燈破獄儀

步虛 洒淨

焚降真召靈符

具位臣某謹焚香，供養太上無極大道虛無自然元始天尊妙無上帝，虛皇玉晨大道君妙有上帝，萬變混沌玄元老君至真大帝，東極青玄老君，太乙救苦天尊，運明保元上帝，無上元皇上帝，南極真王朱陵大帝，玉清真王長生大帝，九微太真青童大道君，靈虛玉女丹皇大道君，迴風混合九霄玉帝道君，無上帝人三十二炁玉帝道君，五靈五老五炁天君，天地水三官帝君，中天九皇上真道君，上清靈寶五師真君，三天門下泰玄樞機三省列相天君，大慈大悲救苦真人，大惠真人，普救真人，普度真人，南宮度人，不死尊神，度世司馬大

神，好生韓君丈人，迴骸起死監生大神，三洞四輔經錄法中高真上聖，流傳至教經籍度師，名山洞府考較真仙，北陰玄天酆都大帝，東嶽天齊仁聖帝，三界應感宣德承符一切威靈，仗此寶香，普同供養。伏以精粹混凝，一炁運無

形之表。玄黃剖判，三靈開有物之先。陽運乾而陰運坤，明爲人而幽爲鬼。顛躋塵路，鑿混沌以蕩百神。報對冥關，隨輪轉而迷一性。矜唱奉敬順之質，忘保身貴炁之方。因胞胎而蕩生，茫茫慾海。致形神而趨死，渺渺血湖。扣地誰矜，終天莫籲。是以元皇流光於三炁，清微破暗於五元。玉匱啓齋，金真演教。俾脫塗炭而處衽席，鶴赦昭宣。爲作砥柱而植津梁，龍恩曠蕩。爰啓然燈之式，庸資度命之功。今齋主某伏念亡故某，溥及十方一切產魂。受質女身，驚心宿命，四大倏罹於產厄，五神或滯於血尸。恭潔玄壇，肅揚清範。神燈朗耀，開九幽不夜之天。寶炬騰輝，幻四澤長春之景。伏願衆真矜憫，列聖垂憐，舒靈寶之妙光，煥

朔單之慧燭。重昏遇朗耀，血池變作清涼。幽暗沐陽和，陰境化爲天界。傾心接引，穩步逍遙。臣不勝瞻望，懇祈之至。

### 元皇開度天尊

### 焚開陰曹符

具位某謹焚香，供養北陰泉曲九幽地獄主者，二十四大地獄主者，八十一大地獄主者，三塗五苦地獄主者，大鐵圍山無間地獄主者，大鐵圍山硤石地獄主者，大鐵圍山血湖地獄主者，翻體大神，擲尸神王，食心啖腦鬼王，百萬鬼卒等衆，城隍社令，囚禁攸司一切主者。仗此寶香，普同供養。伏以八絃

九極，班聯赫奕於冥曹。萬劫千齡，罪對權衡於陰府。宣化稟彤墀之令，持平敷赤縣之仁。奮威神而御黔黎，雖秋霜之凜。若昭憲章而定善惡，亦冬日之溫。如受中以生，惟人爲貴。焚天和於五賊，循人欲於三彭。生也有涯，孰念分靈之祖炁。死而後已，難逃置對於元辰。況茲苦海之飄沉，莫甚血湖之腥穢。是以玄元啓運，雲錦開

囊，龍章昭三炁之符，鳳篆燦五元之令。煥恩綸於九地，玉籙流光。凝道炁於三天，金真演教。庸啓然燈之式，以爲度命之階。今齋主某，伏爲亡故某，普及十方一切產魂。蒲柳微生，荊麻弱質。宿命倏罹於產厄，天魂未離於血尸。恭按齋盟，恪修妙範。沙鋪炬開明於硤石。伏願冥官赦罪，考吏停刑，體上帝之好生，矜一愚之趨死。化血湖作清涼之沼，道炁周流。變苦具爲寶騫之林，靈光洞煥。俱被晨陽之照，悉超寒夜之鄉。某不勝虔祝之至，稽首皈依無極大道。

### 大聖元始天尊

### 大聖靈寶天尊

### 大聖道德天尊

三尊聖號，萬劫難聞。九壘冥曹，一心皈命。準天尊之玉敕，降破獄之金符。開赦幽關，放拔罪爽，剋時定令，風火無停。謹伸關啓靈寶青玄持符破獄一行官吏，疾請駕空馭景，來赴玄壇。恭按天符，下開地獄。遂齋主皈依之悃，

宣帝真化育之仁。所有太上敕破血湖符命，依科告下。

宣符 關發

衆誦隱語旋繞

元皇開度天尊

引至無間獄前

焚慧光符

謹按經云：酆都大鐵圍山之南，別有一獄，號曰無間。世人造罪，死入其中，奚分男女貴賤之殊，均受水火陰陽之考。一晝一夜，萬死萬生，盡大地投芥拂石之期，絕終天乘昏凌空之望。陽耀弗燭，常赦不原。今有齋主某，資薦亡故某，普及一切產魂。稱揚金容聖號，然點玉籙神燈。假此慧光，照彼幽獄。俾諸罪爽，咸睹陽明。悟多生恣情縱欲之愆，爲善最樂。迴一點受中命靈之性，與道合真。北鬱削名，南宮受化。仗茲無盡功德，開度係薦亡靈。清衆運誠，玉音讚嘆。

仰啓三天主，元皇無上尊，願臨無間獄，開度產亡魂。和：往生神仙界。

法師執策杖行持

焚迴光符

鐵圍南際列層城，無間幽牢考吏明。上翊九霄司禁律，下提八極職章程。周旋業網難迴死，了悟玄機定返生。珍重元皇宸澤溥，疾辭黑鬱上朱陵。

元皇開度天尊

引詣硤石獄

焚慧光符

謹按經云：大鐵圍山無間地獄東南，復有一獄，號曰硤石。世人造罪，死入其中。上大下尖，開一縫而業風攝入。中空外固，聚百藥而毒汁周流。長夜冥冥，終天慘慘，坐閱億劫之久，不聞三寶之名。今有齋主某，資薦亡故某，普及一切產魂。稱揚金容聖號，然點玉籙神燈，假此慧光，照彼幽獄，俾諸罪爽，咸睹陽明。悟多生污漫水漿之愆，慧日破暗。迴一點滅除煩惱之性，法雨清塵。玉簡上生，金書度命。仗茲不盡功德，開度係薦亡靈。清衆運誠，玉音讚歎。

仰啓三天主，元皇無上尊，願臨硤石獄，開度產亡魂。和：往生神仙界。

執策杖行持

焚迴光符

鐵圍硤石鎮幽都，位列東南跨海隅。赫奕威章翻惡簿，紛紛憲令勒刑書。九天煥紫鸞臺耀，十地勾朱犴室虛。珍重元皇宸澤溥，寒池部衛上天衢。

元皇開度天尊

引詣血湖獄

焚慧光符

謹按經云：大鐵圍山硤石地獄極北之地，又有一獄，積血成湖，號曰血湖。世間婦女因產亡，身魂墮其中。腥波飛濺而浩渺無涯，穢浪飄流而杳冥莫測。帝命弗至，天赦罔臨。神彰翻體擲尸之名，鬼備啖腦食心之號。劫運有極，罪對無終。今有齋主某，資度亡故某，普及一切產魂。稱揚金容聖號，然點玉籙神燈。假此慧光，照彼幽獄。俾諸罪爽，咸睹陽明。悟多生觸穢三元之愆，名消黑壘。迴一點具足五明之性，魂度朱陵。飛空步虛，登真悟道。仗茲不盡之功德，開度係薦之亡魂。清衆運誠，玉音讚嘆。

仰啓三天主，元皇無上尊，願臨血池獄，開度產亡魂。和：往生神仙界。

執策仗行持

鐵圍極北血湖牢，宣化威靈職憲曹。  
雨露無私恩廣大，雷霆有赫業周遭。  
龍符駕夜周三際，鳳詔乘晨遍八遙。  
珍重元皇恩澤溥，玉虛光裏任翱翔。

元皇開度天尊

歸位誦清靜經

向來神燈破暗，丹簡開幽。陰庭烜赫於陽光，夜壑昭回於晝景。神王稟命，獄卒歡顏。鐵壁銅牆，化寶節綵幢而接引。水池火沼，變祥雲甘露以沾濡。荷上聖之提携，仰玄真之援拯。伏願亡故某，及一切產魂，灌沐晨輝，澄清業垢。等虛空而更無染着，達生生化化之機。悟真常而不礙去來，造有無無之妙。耀驪珠於滄海，朗兔魄於青霄。見性成真，迴光度命，三塗罷對，十極同仁，稽首皈依無極大道。

念善

靈寶領教濟度金書卷之一百十五

靈寶領教濟度金書卷之一

百十六

洞微高士開光救苦真人甯全真授  
靈寶通玄弘教水南先生林靈真編

科儀立成品

血湖道場用

請降赦赦玉札立幕頒告儀

壇前立班

步虛 上香

具位臣某，誠惶誠恐，稽首頓首，再拜上言。臣聞化機密運於三天，妙陰陽而橐籥。帝渥昭回於萬有，極生死以陶鎔。永爲硤石血湖之牢，實連無間鐵圍之境。終天考對，歷劫幽囚。非渙汗於德音，曷超凌於滯識，今有齋主某，伏爲亡故某。稟生女質，沒命產傷。形神穢腥，慮沉淪於幽域。冤憎結習，難解脫於冥關。乞就玄壇，恭依金籙，頒元皇之赦赦，宣壁魯之靈書。提彼幽靈，來臨陽境。重念臣偶緣宿運，叨莅真階。

幸慶會於風雲，羽儀八表。盍承宣於雨露，澤潤三塗。期敷化育之功，密贊生成之德。況茲亡爽，實可驚神。業蘊客塵，隨六入而六因自現。識繫報障，墮九夜而九死誰扶。豈無悔過之忱，孰導登真之路。擬依玉格，宣告金符。流三炁而蕩五元，赦除業垢。煥七星而開九壘，攝取真魂。欲望上帝垂矜，聖真曲憫。敕下羅酆寒夜，泉曲幽庭，地水職司，城隍社令，依準開度，時刻升遷。玉龍飛躍於天衢，恩流夜壑。金虎奔騰於地域，威制冥曹。副齋主激切之忱，遂微臣開度之念。臣不勝瞻天望聖，激切屏營之至，謹伏案前，恭伺天恩報應。

拜伏

誦大行梵炁章 三拜起

填赦

侍職喝

上清靈寶玄壇，恭奉道旨，頒行元皇赦赦，三炁流光真符，玉元蕩滌血湖真符，北斗玄冥太乙混元玉札，開度亡故某，及一切產魂。地水職司，城隍社令，

冥關幽路，主者萬神，各宜整肅，拱聽宣布。

宣疏光符 宣血湖符

宣赦赦 宣玉札

吟飛空步虛頌

元皇敕赦煥三天，萬道靈光照九泉。

丹鳳銜來承詔渥，金鷄飛下湛恩宣。

血池化作青蓮沼，鄽域翻爲七寶園。

草鞠園扉生意溥，幽明萬類盡春妍。

元皇開度天尊

引符簡赦札詣驛吏幕上香

焚香供養三炁流光符吏，玉元蕩滌血湖符吏，某日日直天丁，地道功曹，玄壇承受，符檄合屬真靈。恭望聖聰，俯垂鑒映。伏以清微日近，玉符昭晰於天光。驛吏風馳，金簡開明於地暗。

欲普好生之德，爰依錫類之仁。今有齋主某資薦某，肅建玄壇，惠徼洪貺。宿冤浩浩，既因產以傷生。幽域沉沉，莫登真而度命。叩閣竭蟻忱之切，啓肩祈鶴赦之頌。已荷天休，俯從民欲，爰念提携夜壑，雖繇丹禁之疏恩。奈何宣唱皇靈，尤賴玄曹之贊化。諒遵

帝敕，來莅齋壇，法衆運誠，志心奉請。請神 三獻茶酒 步虛 某啓三炁流光符吏，玉元蕩滌血湖符吏，某日日直天丁，地道功曹，玄壇承受符檄合屬真靈。伏以丹鳳自九天而下，帝渥敷羅。玉龍遍十地而馳，神威赫奕。敢忘皈命，庸拯傾心。以今奉爲齋主某，痛念亡故某。身抱宿冤，命沉產厄。血湖浩渺，陽光永隔於腥風。業海汪洋，天吏不臨於穢浪。非由特赦，曷俾乘晨。朱章期上帝之同仁，白簡荷元皇之大德。欲拯提於魂識，實傳送於威靈。伏望風馬雲車，瞬息遍黃泉之境。金盞鐵騎，須臾開黑壤之關。身負恩綸，手提仁救，五元滌罪，三炁開幽，帝命有嚴，神聽毋忽，所有牒文，謹當宣示。

宣天丁牒 宣符吏牒 焚符簡赦 誦上天度人章

壇檄告備，玄憲森羅。宜疾其驅，俾冥曹之敬聽。徑離所部，提幽魄以來臨。萬累清明，一真呈露。某不勝虔祝之至。

元皇開度天尊

引玉札至神虎幕上香

焚香供養北魁玄範倒生玄司追攝產魂徐玉女，主行玉札周吳徐三大神，靈寶如意萬司追攝散魂王陸胡徐周李馮七大神，九天普度院追攝產魂桓真人，金將軍，本靖主將副將，玄壇追攝總局合屬威靈。恭望聖慈，俯垂鑒映。伏以金書啓運，昭回三洞以垂文。玉札破幽，主宰七靈而制命。法雨欲蘇於黑部，仁風宜賴於清曹。今有某資薦亡故某，肅建玄壇，惠徼洪貺。念沈寥鄽域，沉沉莫睹於晨陽。况腥穢血湖，杳杳難離於夜暗。惟九天列普度之將，而萬司崇如意之神。權統紫英，職尊素渥，皆承宣於帝闕，以拯拔於幽關。綸綍誕敷，已下赦過宥罪之令。憲章昭示，盍施張門毀鎖之威。召役有期，忱恂是切，諒遵玉敕，來莅玄壇。法衆運

何宣唱皇靈，尤賴玄曹之贊化。諒遵



誠，至心奉請。

請神

三獻

某上啓北魁玄範府九天溥度院靈寶如意萬司追攝產魂一行官吏，主行玉札三大神，本靖主將副將，追攝諸大元帥，合屬吏兵。伏以東極列飛龍之吏，宣德承符。北魁立神虎之司，追魂攝魄。既列曹而聯事，宜協力以書勛。以今伏爲齋主某，痛念亡故某，質賦女流，命淪產厄。業風鼓血湖之浪，萬死堪憐。慧日爍鐵網之圍，千冤可釋。非由神力，曷詣玄壇。庸宣壁魯之金章，遍告靈虛之玉篆。嘯命十宮六洞，提携五苦三塗。伏願鐵騎奔雲，極風輪而迅如掣電。金戈耀日，遵火令而去若流鈴。威制群魔，仁敷列壘，部衛魂魄，脫離幽沉，帝命有嚴，神聽毋忽，所有牒文，謹當宣示。

宣諸司牒

焚玉札

誦上天度人章

壇檄告備，天律有嚴。攝北艷，檢鬼

營，不得容隱。度南宮，除罪籍，自在超凌。帝有恩言，神毋曠職。某不勝虔祝之至。

向來頌

立六司幕召魂拯治沐浴朝禮儀

壇前序立

步虛

上香長跪

具位臣某，誠惶誠恐，稽首頓首，再拜上言。臣聞下民惡死，動之死地而不知。上帝好生，示以生方而無已。睠彼幽塗之滯魄，孰非祖炁之分靈。忍使沉淪，或孤化育。今有某崇建道場，開度亡故某。飛章籲帝，頒札追魂。諒綸綍之肆馳，敕仙靈而受役。載惟久淪地暗，負隔天光，業對未清，形神猶穢，五行顛錯，百體支離，非資神變以返生，難俾超凌而度命。欲望慈悲廣運，德澤周流。申命有司，疾分形而化景。合恭乃事，庶體道以度生。召役有期，忱恂再露，仰希淵默，俯賜允俞。遂齋主激切之情，副微臣開度之願。某不勝虔祝之至，再拜謹言。

元皇開度天尊

引詣解結司上香

焚香供養靈寶解冤釋結靈官，五經博士，能談善說靈官，聚魂攝魄斷邪歸真顯靈大神，震雷開黑絕道生光忠德招義大神，分釋冤對斷結除冤升濟大神，九天解冤大神，玄壇解結司一切真衆，仰冀威靈，特垂鑒映。伏以巍巍閭闔，昭宣一視之仁風。赫赫班聯，參贊三乘之化雨。玄壇羅列，丹悃敷宣。以今某資薦亡故某，及一切產魂。痛慾海之塵迷，冤仇報對。致血湖之波漲，形神穢腥。非依開釋之仁，曷遂超升之樂。朱章露奏，玉敕風馳。期飈馭之從容，鋪陳綠席。諒威靈之迅邁，莅止玄壇，法衆運誠，志心奉請。

請神

三獻

步虛

某上啓靈寶解結司靈官真衆。伏以度生死海，孰操彼岸之慈航。越人我山，亶賴昏衢之慧燭。亡故某及一切產魂，采蘋賦質，坐草傷生。慮三生四負之纏縈，有萬劫千齡之汨沒。將行攝召，

來詣司存。願劍佩之暫留，勒旌旗而少駐。齊同慈愛，開黍珠雨露之恩。衣被寵光，慶藥闕風雲之會。某不騰懇祝之至。

元皇開度天尊

引至監生司上香

焚香供養九天監生大神，衛房聖母，定生大神，感化大神，變胎大神，六甲神吏，送生童子，送生君，順生君，速生君，全生君，南昌分胎功曹，主產功曹，迴骸功曹，起死功曹，玄壇監生司一切真衆。仰冀威靈，特垂鑒映。伏以仁涵三極，企丹闕之天開。炁灌九霄，煥清曹之星列。修齋激切，請命勤渠。以今某資薦亡故某，及一切產魂。昧天精天粹之神奇，顛冥業海。致地魄地魂之臭腐，沉滯血湖。宣依提拯之仁，庶遂逍遙之樂。金符夜下，朱剡晨馳。期召役於威靈，丹忱昭徹。諒鋪陳於儀衛，綠輦低回。法衆運誠，志心奉請。

請神 三獻

步虛

某上啓靈寶監生司靈官仙衆。伏以負陰抱陽，生化權衡於一炁。出生入死，樞機發育於九天。亡故某及一切產魂，稟質女流，失身產厄，萬劫而穢腥莫滌，千生而顛踣誰扶。行攝神儀，來參聖幕，望慈悲之曲映，期鹵簿之遲留。已生未生皆得生，契十轉回靈之妙。專度曲度無不度，符九華救苦之仁。某不勝懇祈之至。

元皇開度天尊

引至天醫司上香

焚香供養天醫尚藥靈官，主辨形候靈官，隨病製藥靈官，修合鍛鍊靈官，生形博士，復肌主者，治病功曹，收毒將軍，三五功曹，敷藥靈官，察脉論病靈官，請藥療病靈官，砭石小吏，扁鵲官吏，仙藥童子，玄壇天醫司合屬真衆。仰冀威靈，俯垂鑒映。伏以天聽無私，羅千官而贊化。神功莫測，扶三極以同仁。齋律有嚴，真忱畢露。以今某資薦亡故某，及一切產魂。三彭內訌，秋風自剪於交梨。二豎潛攻，朝露溘先於坐草。非皈依九轉，曷平復於一元。

誠籲丹墀，恩頒玉敕。靈光洞煥，玄壇僉聯事之儀。梵炁扶搖，綠輦簇前驅之仗。法衆運誠，志心奉請。

請神 三獻

步虛

某上啓靈寶天醫司靈官仙衆。伏以地水火風，病不離於四大。神聖工巧，醫實贊於三才。亡故某及一切產魂，緣愛傷生，因胎殞命，痛五臟六腑之榮衛未復，致三部八景之靈識莫完。行攝神儀，來生參聖幕，期同仁而拯治，勒仙仗以遲留。補劑息黥，符上品生成之妙。迴尸起死，證生天化育之功。某不勝懇禱之至。

元皇開度天尊

引詣混元司上香

焚香供養玉清混元十二炁化生大將軍，玄壇混元司合屬真靈。仰冀威靈，特垂鑒映。伏以玉清啓運，煥慧日於中天。金闕升班，布慈雲於大地。聿嚴齋福，先控哀忱。以今某資薦亡故某，及一切產魂。思夜壑莫痛於血湖，慨五神之枯朽。乘晨陽雖離於苦海，

奈九氣之飛揚。非返本以生成，曷登真而快樂。露章一奏，風驛四馳。鑒丹悃之敷羅，玄關命駕。勒瓊輪而迅邁，紅帟停驂。法衆運誠，至心奉請。

請神 三獻

步虛

某上啓玉清混元大將軍，一切真衆。伏以一氣周流，聚散奚分於生死。六陽變化，生成密佐於乾坤。亡故某及一切產魂，身抱宿冤，命沉產厄，諒精神魂魄意之顛頓，致金木水火土之飄零。行攝神儀，來參聖幕。願威靈之暫駐，拯神變之無方。理五炁，混百神，符仙化成人之妙。離三途，超八難，證登真度命之玄。某不勝虔祝之至。

元皇開度天尊

引詣浣濯司上香

焚香供養靈寶沐浴靈官，玉清攝魔屏穢靈官，九鳳破穢靈官，天河東井君，浣濯夫人，黃華玉女，石景水母，仙花玉女，五方五帝，解穢君，五靈童子，玉女使者，九天運穢神君，斬穢神君，滅穢神君，洗穢神君，蕩穢神君，四靈解

穢神君，玄壇浣濯司一切真衆。仰冀威靈，特垂鑒映。伏以丹闕端嚴，法雨羅敷於象外。清曹赫奕，慈風浩蕩於寰中。齋列黃壇，誠通朱表。以今某資薦亡故某，及一切產魂，沉淪萬劫，宿根之塵垢紛葩。奄忽一朝，血湖之穢腥跋蹇。非仗神威之蕩滌，曷令魂識之清明。一札心馳，九重敕下。鋪張六帟，諒雲馭之遙臨。提拯黃泉，挽天河而曲度。法衆運誠，至心奉請。

請神 三獻

步虛

某上啓靈寶浣濯司靈官真衆。伏以定水湛八解之池，澄清業垢。玄泉灌五靈之液，蕩滌心塵。亡故某及一切產魂，身列女流，命沉產厄，慮性識縈纏於腥穢，而魂靈漬染於腥臊。將攝神儀，來參聖幕。願從容於仗衛，祈灌沐於精華。九鳳徘徊，挹東井方諸之粹。五龍橐籥，注南宮流汨之英。某不勝虔祝之至。

元皇開度天尊

引至巾笥司上香

焚香供養靈寶巾笥司靈官，青玄金木仙衣玉女，仙帶玉女，仙車玉女，冠帶仙官，一切真衆。仰冀威靈，垂慈鑒映。伏以清微下度人之令，十極歸仁。靈寶列如意之曹，萬司贊化。玄壇肇啓，丹悃潛孚。以今某資薦亡故某，及一切產魂。神淪沒於血湖，衣裳腥穢。識浮沉於業海，容止恟惶。期衣被於天光，盍皈依於神貺。朱章啓奏，玉敕宣傳。駐景前帷，幸從容於再宿。承流中陞，庶蔭覆於九垓。法衆運誠，志心奉請。

請神 三獻

步虛

某上啓靈寶巾笥司靈官真衆。伏以冥關鬱絕，九幽杳隔於陽光。列職森羅，萬劫提携於陰暗。亡故某及一切產魂，命淪穢境，神墮寒庭，莫全五體之威儀，安望六銖之纖麗。行將攝召，來欵司存，願騶御之傾光，布繭絲之正化。配乾坤上衣下裳之妙，佩服陸離。成坎離陽變陰合之功，容儀濟楚。某不勝虔祝之至。

元皇開度天尊

引詣壇前，向門外行催召

靈寶領教濟度金書卷之一百十六

靈寶領教濟度金書卷之一

百十七

洞微高士開光救苦真人甯全真授

靈寶通玄弘教水南先生林靈真編

科儀立成品

血湖道場用

催召儀

舉召魂旛，在門前立

上香

焚香上啓靈寶追攝總局一行官吏，諸省府院司追攝吏兵。仰冀神聰，俯垂鑒映。伏以龍漢開圖，列星曹而贊化。鶴鳴啓運，敷雲篆以度生。靈寶立如意之司，玄冥列倒生之職。提魂攝魄，玉龍飛躍於幽關。出陰入陽，神虎駿奔於寰極。抱紫英之鐵券，承遣玉之金符。威令風行，冥曹雷動，以今奉爲某，資薦亡故某。痛苦海之顛零，致血湖之沉沒，期行攝召，疾俾超凌。預奏朱章，已親承於帝命。曾頒玉札，庸召

役於仙曹。諒體德音，副茲哀悃。今則蘭場嚴潔，夜炁淒涼。拔領幽沉，宜剋時而定令。開通冥漠，盍走錄以飛符。不違方寸之私，式副再三之禱。法衆運誠，志心奉請。

志心奉請某靖靈寶追攝總局、北魁玄範府、神虎倒生玄司、龜真素握徐玉女，如意萬司無義斷恩收魔攝精解釋追攝王大神，正精火目攝炁聚英解對釋愆陸大神，震鼓喧雷閃日出電聚體長肌胡大神，真性梗靈淨濁破穢生清徐大神，威靈通感眷義全形洗浣周大神，解釋冤愆生精致魄全形復體李大神，解冤釋對正魄生形致影長津復體馮大神，九天普度院八門開度桓真人，收魂召魄金將軍，本靖主將副將，護道監壇，城隍社令，當境土地，里域真官，司命六神。惟願以慈悲心，妙靈通力。來臨法會，洞格虔祈。

三獻

伏以元始威章，溥昭天漏泉之澤。青玄敕詔，實開幽破暗之樞。惟應度之

魂靈，慮元神之淪陷，血湖硤石，東岱羅鄴。或九幽六洞之拘囚，或五苦三途之輪轉，或鐵圍之大小，或阿鼻之重輕，或縻向於岳瀆靈祇，或羈連於城隍社令。悉憑追攝，庸顯威靈。凡宿劫之冤仇，暨多生之執對。普行提命，來詣壇場。即赴旛而現形，疾生神而受度。聯雲鐵騎，風馳三界之中。耀日金旌，電掣八紘之表。無遠弗届，有礙皆通，玄壇牒文，謹當宣示。

#### 宣催召牒

#### 誦上天度人章

帝命森嚴，宜冥曹之敬聽。神威昭晰，諒地界以恭承。風火無停，瞬息有待，明彰報應，疾速奉行，一如靈寶無量度人律令。

#### 元皇開度天尊

#### 出門外召魂如儀

#### 召畢，引魂旛詣壇前

洞章聲徹，靈識歸來，承元始之寶光，離鬱單之幽暗。乃因產厄，遽致身亡。冤憎會而形神穢腥，疾病沾而經絡枯朽。容儀未潔，冠服尚虧。莫能朝覲

於天墀，詎可聽聞於經法。盍依齋格，遍欵真曹。仗仙靈神變之功，成亡爽清靜之相。庶蠲宿累，獲領善功。法衆運誠，慈悲引導。

#### 元皇開度天尊

#### 引旛詣解結司上香

某上啓靈寶解結司靈官真衆。伏以萬生萬死，元神輪轉於終天，一是一非，冤累纏綿於厚地。非由解釋，真證真常。見前亡故某，及一切產魂。神棲女質，跡染世塵，縱五賊以焚天和，歸七情而滋人偽。或負財而負命，成謀身而謀家，觸目冤增，舉心恨積。報對有同於影響，鈎連靡失於毫芒。倏際惡緣，遂罹產厄。幸鴻鈞之有造，頒鶴赦以無方，獲離血湖，來臨陽境，慮積債冤之累，難膺開度之功。恭欵聖帷，曲祈靈貺。伏願體天行道，與物爲春。握承流宣化之機，敷解冤釋結之惠。輒言調伏，頓令異骨以成親。和氣融怡，坐見視人而猶己。千生執對，一旦消磨，元始真符，謹當告下。

#### 元皇開度天尊

#### 宣解冤釋結符

陰景長夜，幽幽冥冥。億劫無光，黑風飄零。元始開化，諸天齊明。玉符所至，萬神敬聽。冤結解釋，執對和平。業垢消蕩，斬絕地根。身乘玉虛，上度福庭。

#### 宣拔罪解冤符

元始符命，制魔奉行。保舉亡魂，度品南陵。鄴都落燼，三官解刑。赦縛閉業，受化更生。隨品受煉，上登玉庭。

#### 元皇開度天尊

#### 衆誦隱語

金符度命，黑簿除冤。荷帝力之潛加，仰神威之密被。伏願亡故某及一切產魂，形神夷曠，性識昭融，塵盡鑑明，宴御虛無之境。波澄月現，逍遙寥廓之鄉。稽首皈依無極大道。

#### 宣疏

#### 元皇開度天尊

#### 引旛詣監生司上香

某上啓靈寶監生司靈官真衆。伏以出青入玄，一炁姤精於混沌。迴黃轉赤，五靈孕粹於虛無。一有天傷，坐增冤

累。見前亡故某，及一切產魂。既賦女身，乃罹產厄。或結胎先十月而殞，或分身未胥睥而亡，故子母之俱傷。或神形之遽壞，或瞑眩於毒藥，或期罔於野巫，神染穢腥，含冤黑壤，識繁業債，置對黃泉。幸金闕之流光，頒玉符而

破暗，獲朝陽景，出離血湖。慮胞胎之未清，致魂靈之難度，敬趨聖幕，虔候洪恩。伏望德佐三靈，仁同一視。握

宣化承流之柄，成扶顛持危之功。未

生者生，俾形神而自在。已化者化，無冤對之相連。保命生根，迴尸起死，元始玉符，謹當告下。

如正度子母未分娩，則先告監生破胎出胎符，如已分娩而亡，則先告生成度生三塗符。

宣監生符

玉清有命，靈光耀羅。生化神功，二象

輝和。紫霞絳霄，百神巍峨。三陽肇映，萬化崇阿。宿根受報，昭化惡魔。冤纏未解，長夜陰那。嘯命九陽，監生衛房。解散結滯，子母混康。時刻昇遷，上乘天光。急急如元始度人律令。

宣破胎符

太上有敕，蓬黃二神。女爽抱胎，未離形神。破胎急出，子母速分。急急如元始度人律令。

宣出胎符

天地之靈，陰陽之精。死炁受煉，變化安寧。未分者分，胎元急生。混沌流行，金光玉嬰。急急如元始度人律令。

宣皆得生成符

陰陽施化，祖炁運精。十月成胎，生根和平。已生未生，皆得生成。惡根復連，中傷夭傾。血穢陷沒，魂魄飄零。虛皇有命，灌溉胞英。五臟調泰，百節和寧。急急如元始度人律令。

宣監真度生符

元始符命，時刻升遷。胎根生化，返靈向真。斷邪除穢，變化形神。死魂受煉，仙化成人。急急如元始度人律令。

宣永度三塗符

靈寶玉符，永度三塗。產尸之鬼，出離幽都。紫文羅映，梵炁召敷。上帝有敕，急詣仙廬。返胎更生，與道同符。急急如元始度人律令。

元皇開度天尊

誦靈書

玉符保神，青編定錄。荷帝恩之曲赦，仰聖化之潛扶。伏望亡故某，及一切產魂，五體和平，三田通暢。永離地中之地，地界無拘。送登天上之天，天光下接。稽首皈依無極大道。

宣疏

元皇開度天尊

引詣監生司幕裏右廂，過天醫司

某上啓靈寶天醫司靈官真衆。伏以天地陰陽，乖炁每流行於愚俗。金石草木，神功端藉於良醫。倘有疾傷，敢忘調理。見在亡故某，及一切產魂，賦質女流，縈心世網，鼓愛河之濁浪，翻業海之狂瀾。產後胎前，宿乖攝養。陽左陰右，遂致傾危。或胎未拆而雙亡，或身已分而倏殞，或庸醫之失手，或毒藥之傷生。抱痛終天，雪冤無地。雖幻形之已滅，奈心病之未除。敢詣聖帷，庸依洪貺。伏望好生大德，超死深仁。握承流宣化之權，施續絕補傷之

惠。君臣佐使，收十轉迴靈之助。針砭膏湯，符二象攝生之效。玄功育物，白骨成人。元始玉符，謹當告下。

### 宣天醫使者符

天醫神仙，攝化靈通。扶生衛真，元氣鬱充。金芝玉露，倒景凌空。救療百疾，天地齊功。五關通理，百體調豐。沉尸產鬼，胎元惡攻。長夜寥寥，抱痛無終。神功補治，經絡和同。急急如元始度人律令。

### 宣治病功曹符

治病功曹，上承九天。扁鵲官吏，天醫神仙。尚藥童子，神應保元。丹芝療治，玉晶延年。萬病急除，百灾莫干。胎傷產魂，金液瓊丹。鬼債速滅，病者安然。急急如元始度人律令。

### 宣醫子母俱亡符

若正度不係子母未分身亡，則後告此符。

靈寶符命，天醫通靈。榮衛乖傷，經絡血腥。號曰產尸，惡根沉零。玉芝金液，調和安平。未分者分，已生者生。不死神藥，鍊真返形。南宮受化，萬炁齊並。急急如元始度人律令。

### 宣醫產死血尸符

若正度子母未分，則先告此符。

靈寶符命，濟度幽冥。陰陽化感，胞胎混凝。冤牽所召，命殞血腥。天醫神吏，九轉齊靈。玄泉灌注，起死迴生。三田快暢，五炁充盈。來受帝敕，注生神庭。急急如元始度人律令。

### 元皇開度天尊

### 誦靈書

玉簡遐頒，沉痾頓愈。荷天光之宏被，仰聖力之潛加。伏望亡故某，及一切產魂，五炁混全，一真湛寂。識破生前之虛妄，心月孤明。翻思身後之恩綸，性天朗耀。稽首皈依無極大道。

### 宣疏

### 元皇開度天尊

### 引籙詣混元司上香

某上啓靈寶混元化生大將軍，靈官真衆。伏以元精混沌，函三尊萬物之靈。祖炁流行，玄一冠九霄之粹。非由神變，曷副生成。見前亡故某，及一切產魂，稟生女質，涉迹世塵。千劫轉輪，冤未消於宿累。一朝報對，神遽墮於

幽關。惟四大已歸於虛無，故萬炁莫存於汗漫。柰形離於產厄，而神喪於驚危。孰爲委炁而聚功，難俾升真而度命。幸天闈之降旨，開地戶以疏恩。獲離血湖，來朝陽境。慮經絡之未復，致性識之尚偏。爰詣聖惟，恪祈真蔭。伏望仁心發越，生意周流，握承流宣化之機，昭攝炁聚神之效。歷三塗五苦而八門度命，符靈寶之權衡。備五臟六腑而一時生神，妙混元之化育。全形復質，證品度真。元始玉符，謹當告下。

### 宣化生腎符

委炁之聚，神之最靈。混神六合，生化腎經。身運自水，大道生明。亡魂受化，返故復生。急急如元始度人律令。

### 宣化生心符

赤帝之宮，聚炁爲王。散亂無動，百神皈降。萬國朝禮，一體定康。亡魂受化，道相堂堂。急急如元始度人律令。

### 宣化生肝符

青炁鬱秀，輔翼萬仙。百骸之首，肝腑爲先。神精形聚，炁化成仙。亡魂受

化，道德自然。急急如元始度人律令。

宣化生肺符

一白之炁，混合肺房。長意生志，公子無忘。玉樓相串，金室同鄉。亡魂受化，升入天堂。急急如元始度人律令。

宣化生脾符

帝君有命，敕下中黃。安鎮營衛，肢體鮮光。安魂侍鎮，使神無藏。亡魂受化，反生福鄉。急急如元始度人律令。

宣化生膀胱符

青黑之炁，交結膀胱。鎮於靈府，毫竅混康。玉清攝景，泥丸附旁。亡魂受化，聚魄神昌。三魂安泰，大道生光。急急如元始度人律令。

宣化生小腸符

赤白之炁，二炁交從。結我腸腑，與胃相通。大腸合度，纏絡和中。亡魂受化，改體容隆。急急如元始度人律令。

宣化生膽符

靈炁所聚，神炁混康。鎮於膽腑。赤書交光。精魄自樂，魂形堂堂。亡魂受化，玉膽生芒。急急如元始度人律令。

宣化生大腸符

黑白二炁，結生大腸。混合表裏，一體同堂。光散萬國，交盤七廊。亡魂受化，改貌形芒。急急如元始度人律令。

宣化生胃符

黃淡之炁，胃管生津。安神鎮室，一體全真。魂魄歸伏，神精效靈。亡魂受化，大道自明。急急如元始度人律令。

宣化生三焦符

淡白之炁，三焦無藏。生津自然，往來混昌。重樓通道，骨節開張。亡魂受化，更生人鄉。急急如元始度人律令。

宣化生胞絡符

黃白之炁，結胞絡生。五谷所變，一體光明。神寧魄靜，靈氣魂清。亡魂受化，與道合并。急急如元始度人律令。

宣全形符

混元施化，經絡還真。迴骸起死，整具形神。內外周備，榮衛滋身。大道自然，上朝天門。急急如元始度人律令。

元皇開度天尊

誦中篇

玉符告命，祖炁生神。荷帝力之潛加，

藉聖功之密贊。伏願亡故某，及一切產魂，三關充悅，六氣舒調。飛空步虛，孰礙去來之路。登真證果，永超劫運之津。稽首皈依無極大道。

宣疏

元皇開度天尊

引籙詣泮濯司上香

某上啓靈寶泮濯司靈官真衆。伏以達生死岸，津梁棗籙於天工。成清靜身，湯沐皈依於聖化。非由定水，曷滌根塵。見前亡故某及一切產魂，分流女質，命厄產傷，幻形淪沒於污腥，元神沾染於穢厭。九泉抱痛，幽幽莫睹於陽光。千劫羈囚，慘慘常居於幽暗。況業塵之浩蕩，與俗垢之紛紜，總是罪緣，故罹惡趣。幸德音之雷動，頒詔敕以風行，獲離血湖，來遊陽境。慮氛葩之未洗，致開度之猶稽。敬歛聖帷，恪祈神化。伏望慈悲應物，澤潤存心，握承流宣化之機，溥破穢清塵之效。靈光洞朗，黃華飛石景之精。道炁彌羅，甘露洒玉胎之氣。表裏瑩淨，生死澄清。元始玉符，謹當告下。



宣元皇淨血屍沐浴符

太上神水，日月星光。灌沐血尸，腥穢潛藏。萬罪清淨，百垢澄芳。反形濯質，上登南宮。急急如元始度人律令。

宣淨血尸清神符

扶桑合明，七元流精。光布三景，天河西傾。清神去垢，輪轉五行。日有赤童，中藏陽晶。光彩洞耀，陽炁炎升。混合玄元，二炁交并。東井黃華，玉醴金津。澡煉魂魄，日月高奔。急急如元始度人律令。

宣淨血尸解污符

元始符命，鍊化自然。宿塵惡積，天河蕩捐。今日沐浴，腥穢光鮮。玄水下注，流衍無邊。流汨之沼，黃華之源。清淨血污，上朝帝軒。急急如元始度人律令。

宣蕩胎符

日精月華，甘露金泉。天漿下注，灌沐靈源。化羅洞妙，形神昭宣。胞胎腥穢，洗蕩神全。宿業罷對，來詣帝前。急急如元始度人律令。

誦中篇

玄符晃朗，真體澄清。仰帝澤之無私，荷聖恩之有造。伏願亡故某，一塵不染，五蘊皆空。悟人世之虛花，回頭猛省。認天根之實果，着意超升。稽首皈依無極大道。

宣疏

元皇開度天尊

引旛自浣濯幕裏，過巾笥司上香

某上啓靈寶巾笥司靈官真衆。伏以金容玉體，原九陽混化之精神。霧縠煙綃，應七寶自然之衣服。欲端容止，必藉莊嚴。見前亡故某，稟資女質，沒命產傷。春秋逼而性命凋，心未忘於粧飾。日月馳而生死隔，神孰備於威儀。抱痛冥都，懷冤夜壑。況以腥穢之質，猶懷濟楚之恩。幸天尊舒白玉之光，而地祇稟清微之運。獲來陽境，免墮血湖。慮冠服之未周，致形神之虧欠。恭趨聖幕，期拜神功。伏望五彩彰施，二儀合景，握宣化承流之柄，拯運神攝化之機。佩六銖而映三光，儼上界神仙之服。舒八芒而含二景，端清都冠

帶之儀。氣象雍容，步趨閑雅。元始玉符，謹當告下。

宣化衣符

九曜扶衰，真炁變衣。四時合衛，五緯交輝。炁分羅綺，綵集宣威。六合扶挾，三炁玄微。至真煥爛，仙女齊飛。雲章冠帶，嚴潔天機。圓華素明，元始慈悲。

宣變衣符

金晶冶鍊，炁散玄黃。沐浴丹池，真炁芬芳。二景冠帶，天爲隱藏。左振玉佩，右策金璫。浣除諸穢，遊行紫房。雲霞鮮耀，飛玄羽章。九軒洞煥，流金振芒。

宣天皇象符

帝君玉女，皇象靈符。以合元炁，運轉精軀。萬年嬰孩，飛仙天樞。生宮大神，披丹絡朱。首戴紫冠，與我同符。

誦中篇

真符施化，仙衣攝身。荷帝力之潛敷，仰聖威之密運。伏願亡故某，德容自在，道炁相扶。舉手謝世，人遊宴藥珠之闕。振衣朝上帝，逍遙閬苑之池。

稽首皈依無極大道。

宣疏

元皇開度天尊

引旛詣壇前

伏以巍巍大梵，九重高拱於龍宸。翼翼小心，五體合嚴於虎拜。見前亡故某，靈分祖炁，命奄重泉。垂金符萬道之靈光，羅敷洪澤。離黑都千重之幽暗，莅止玄壇。無人相我相而適意逍遙，滅身心病而迴靈快樂。形神清淨，冠帶鮮明，亶由曠蕩之恩，可昧皈依之敬。虔趨玉陛，恭對金容，稽首一忱，皈命三寶。

道寶讚

稽首皈依道，大羅元始尊。杳冥開祖劫，混沌立天根。願垂清靜力，開度此亡靈。和：往生神仙界。

大聖元始天尊

經寶讚

稽首皈依經，靈寶洞玄君。鍊成金鳳篆，揉玉寫龍文。願垂清靜力，開度此亡靈。和：往生神仙界。

大聖靈寶天尊

師寶讚

稽首皈依師，靈寶洞神君。先天傳大教，後地指迷津。願垂清靜力，開度此亡靈。和：往生神仙界。

大聖道德天尊

寶號既聞，宿塵俱靜。東諸耀九華之輝，南上注金編之字，歸真知命，入聖超凡。宜肅威儀，前趨幕帟，聞經受食，傳戒升神。法衆慈悲，玉音引導。

天垂開度天尊

引旛至靈帷，施食安奉。

此科只為血湖設，須先三日前，依此科用。三日後，方見明真黃錄。

靈寶領教濟度金書卷之一百十七

靈寶領教濟度金書卷之一

百十八

洞微高士開光救苦真人甯全真授  
靈寶通玄弘教水南先生林靈真編

科儀立成品

五鍊生尸齋用

早朝行道儀

燒香頌

各禮師存念如法

衛靈呪

青陽虛映，耀日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今清旦，陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，二十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞玉匱流光，煥玄靈於碧落。金真演教，施惠露於黃垓。沛北單有造之恩，散中極無垠之化。萬帝設禮，尊靈寶而幽顯咸宗。

諸天下觀，貫玄元而陰陽共仰。瓊科井井，寶範昭昭，實生死之津梁，爲古今之柱石。臣等風梧漏質，霜柳衰姿。鍊景虛無，未遂經丘尋壑之志。役神埃壙，尚縈蹈朝履市之心。嗟隙駒之難留，驚織鳥之飛迅。聖恩若水，未賜誅夷。玄澤如天，尚承眷遇。誓勤修而進寸，宜精練以惜分。凡有皈投，敢忘敷奏。況奉詞旨，敢不上聞。齋意青詞，謹當敷露。

宣詞

按如詞旨，備極忱恂。臣聞滅度藉五鍊之玄，斷除死炁。安鎮賴九光之妙，還返生神。緣會合而五藏重榮，時節到而百骸再肉。凌雲步武，成清淨之真身。躡景形神，證騰凌之法體。經彰聖軌，義貫靈篇。臣伏見某，欣際昌時，生逢慶運。錄傳三洞，內鍊已以求真。經演一乘，外度人而領教。善功莫就，仙品未充，俾歸長夜之關，身返太陰之室。茫茫歲月，杳杳升沉。孝子某義重人倫，情鍾天屬。弟子某等情切師恩，義均父愛。痛音容之迴隔，念神識以

何之。雖聖造垂慈接引，諒超於神域。而凡情起孝懺祈，合叩於天闈。庶九死之沉淪，獲千生之快樂。爰徵淨侶，肅奉明科。寶齋恭按於生尸，瓊冊期超於死魄。紫煙上下，羅龍簾以鳴金。綵仗後先，列鳳繒而曳玉。霄衢日近，雲路風清，降鬱羅妙有之尊，拱劫初虛無之相。肘行膝步，露民欲於再三。目遡心馳，輅天恩於萬一。祈亡故某，復還治職，早覲宸居，脫水火之苦輪，登陰陽之樂界。以今清旦，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝宗祧先聖，社稷尊靈。伏願雲路飛霄，風環翳景，鳳葆擁朝元之駕，金闕凝真。龍旂驂拱極之輶，瑤京侍聖。福皇圖而遙遙廣甸，蔭聖祚而葉葉英君，野無鴻鴈之悲，朝有鳳凰之喜。今故燒香，自皈依師尊大聖衆，至真之德，得道之後，保天長存。和：與道合真。

以今清旦，陞壇行道，請法衆等，運茲

二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流齋主九玄七祖，億劫種親。伏願性海無波，心天有耀，削黑簿而六根何有，移青簡而五蘊皆空，垂文獻以流芳，演詩書而毓秀。今故燒香，自皈依師尊大聖衆，至真之德，得道之後，升入無形。和：與道合真。

以今清旦，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流臣等三師四友，五族六親。伏願神觀清夷，天姿遽整。出煩惱網，朱宮駕景以逍遙。登解脫山，紫府刊名而快樂。已往者散罪花而金閨通籍，見在者圓善果而玉策登圖。提後覺以流芳，紹先猷而挺秀。今故燒香，自皈依師尊大聖衆，至真之德，得道之後，長享自然。和：與道合真。

禮方  
懺方

三啓

樂法以爲妻，愛經如珠玉。持戒制六情，念道遺所欲。澹泊正氣停，蕭然神靜默。天魔並敬護，世世享大福。

又

鬱鬱家國盛，濟濟經道興。天人同其願，縹緲入大乘。因心立福田，靡靡法輪升。七祖生天堂，我身白日騰。

又

大道洞玄虛，有念無不契。煉質入仙真，遂成金剛體。超度三界難，地獄五苦解。悉歸太上經，靜念稽首禮。

三禮

臣等至心稽首，禮

太上無極大道。

臣等至心稽首，禮

三十六部尊經。

臣等至心稽首，禮

玄中大法師。

重稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道

大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞紫微鍊真之錄，格拯奇民。青華救苦之章，律超俊士。神霄希夷之鳳簡，玄虛微妙之龍符，皆帝師垂八極之卿雲，故仙聖溥十華之慧日。況生前汨沒，未收學道之良勳。致死後淒涼，期衍返形之妙法。尤蒙矜軫，欲拯提携。今亡故某，夙奉真宗，屢揚正教，幾依光於玄座，曾綴武於彤墀。修己功微，莫遂坐在立亡之志。度人行淺，未明神遷尸解之心。忽爾遺生，倏焉謝世。山林榮衛，依五鎮以飛玄。兆域周旋，期千齡而嘯傲。尚慮有生之後，積劫以來，罪網輕迷，縱六情而飄浪。業機自織，恣三毒以流吹。徇蝸角之虛名，貪蠅頭之微利。

傳經授道，香火不修。設醮修齋，禁戒莫守。精炁神日煎於玉樹，玄元始雲散於金花。二十七官彭仇交戰，三十九戶豎寇潛攻。昧奔晨躡景之奇，忘會道運元之妙。生根遽殞，命蒂斯凋。筆鼓三官，已紛紜於朱墨。編書六洞，遂流煥於丹青。自非哀籲於人間，曷獲超凌於天上。建齋行道，願滌前愆。燒香散花，覬徽後祉。所冀羅敷鶴赦，昭曠龍恩。鑒其皈命之勤渠，錫以升神之自在。無留陰夜，永證陽天。歷丹陵而受書，詣青諸而效職。依榮紫府，永無輪轉之期。宴景清都，常享太平之運。敕地司而拱護，勒土府以衛持。俾亡故某，形體安寧，墓域平靜。緣運不絕，俾骨肉以生華。冥數有期，庶形神而再合。褰衣空碧，振袂虛玄，實允佩於恩私，可永無於報對。上願天元朗晏，地理清平，日月輝華，山林靜謐。桑麻雨足，熙熙藏富於三農。榆柳春閑，蕩蕩收烽於四鄙。方域之綠林絕警，園扉之青草堪鋤。動植飛潛，各全樂意。龍仙人鬼，俱脫輪迴。

則上明天尊大慈之化，下副臣等皈命之誠。謹啓以聞。

#### 舉願念

一念爲道四大合德，齋主七世父母，免脫憂苦，上升天堂，衣食自然。  
二念帝王國主，道化興隆，庠序濟濟，皇教恢弘，威儀翼翼，普天所瞻，民稱太平，四夷賓伏，妖惡自滅，賢聖日生。  
三念法師功德大建，教化明達，俱獲飛仙。  
四念同志學人，早得仙道，更相開度。  
五念九親和睦，好尚仁義，貴道賤財，行爲物範。  
六念損己布施，道士及飢寒者，天下人民，各得其所。  
七念蠕動跂行，一切衆生，咸蒙成就。  
八念赦贖前生今世罪對，立功補過。  
九念家門隆盛，宗廟有人，世生賢才。  
十念尊受師經，不敢中怠，平等一心，廣度一切，剋獲飛仙，白日登天，拜見太上，永成真人，雲車羽駕。和：與道合真。

#### 存神燒香

香官使者，左右龍虎君，侍香諸靈官，當令臣早朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香烟，傳臣向來所啓之誠，速達徑御太上無極大道至真玉皇上帝御前。

#### 出堂頌

#### 回靜默

靈寶領教濟度金書卷之一百十八

靈寶領教濟度金書卷之一

百十九

洞微高士開光救苦真人甯全真授  
靈寶通玄弘教水南先生林靈真編

科儀立成品

五鍊生尸齋用

午朝行道儀

燒香頌

各禮師存念如法

衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破袄，明耀元功。金符召制，躡雲乘龍。謠歌慶會，散花太空，神化冥運，四極安隆。伏御帝前，罔有不恭。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今臨午，陞壇行道，願得玉清道炁靈寶妙光下降，流入臣等身中，令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞赤明開圖，耀靈光於混洞。清微御運，弘祖炁於洪濛。斡天經地緯之機，拯陰施陽生之健。希夷變化，芒八角而玉字浮沉。

微妙神奇，蔭十華而金書遐邇。大哉玄元之道，至矣靈寶之宗。幽顯咸資，天人是賴。臣等木雞未粹，芻狗已陳。負神龍雲葉之書，志期高蹈。混野馬風埃之俗，迹尚卑棲。徒誓地以學真，尚憲天而領教。宮商帝載，宜慶丹忱。黼黻皇猷，庸符素願。庶懇勤而補過，期黽勉以立功。凡有皈投，敢忘敷奏。況奉詞旨，謹爲宣聞。

宣詞

按如詞旨，備切忱恂。臣聞運滅度以返生，功繇五鍊。神返還而起死，期邁千齡。倏然而骨肉同翔，忽爾而形神共舉。山林宴御，爲天上之仙宗。雲漢飛流，超寰中之塵俗。事陳妙法，義載真經。臣伏見某，名徹九清，道該三洞。學無積善，神遊大夜之墟。道背明師，身掩九泉之域。升沉寂寂，歲月茫茫。孝子某一炁相關，百身莫贖。弟子某等事死非生，奉師若父，荷生成之重德，感教誨之深恩。雖上聖提携，諒不替紫樞之職守。而下愚冥昧，恐或淪黑鬱之條章。故殫請命之勤，擬拜升神

之惠。肅遵雲笈，爰建星壇。修生魂崆峒之齋，超死魄飛玄之爽。雲鋪激響，飛翠葆以翩翩。月籟虛徐，耀珠幢而搖曳。千枝艷簇，百和芳騰。拱獅御於霄衢，輅鸞和於禁路。誠殫螻蟻，願垂雨露之仁。惠藹鴻厖，期拜日星之德。即俾亡故某，斷除宿累，普被新釐，錫劍履以朝天，端佩環而謁帝。以今臨午，陞壇行道，請法衆等，運茲初

捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝宗祧先聖，社稷尊靈。伏願瓊輅驂龍，瑤駟泛鳳。登崑丘而問道，流慶璇圖。升瓊圃以參玄，垂祥寶祚。萬國拱無爲之化，八紘歌有道之年，等虞俗於時雍，並夏謨於元治。今故燒香，自皈依師尊大聖衆。至真之德，得道之後，保天長存。和：與道合真。

以今臨午，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，

歸流亡故某。伏願一性虛靈，萬緣蕩寂。業障報障煩惱障，風散秋雲。惡根毒根生死根，日融曉雪。黑朔勿淪於地域，朱陵徑上於天關。開七葉以流芳，茂五枝而挺瑞。今故燒香，自皈依師尊大聖衆。至真之德，得道之後，升入無形。和：與道合真。

以今臨午，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊，願以是功德，歸流臣等三師四友，五族六親。伏願道貌春融，德容晝潤。金花益茂，交離坎於黃庭。玉蘂長新，耀乾坤於絳室。既往者登小有清虛之域，見在者宴大乘空洞之鄉。翼鳳牒以天齊，贊龍函而地久。今故燒香，自皈依師尊大聖衆。至真之德，得道之後，長享自然。和：與道合真。

禮方 懺方 命魔 步虛  
控轡適十方，旋憩玄景阿。仰觀劫仞臺，俯盼紫雲蘿。逍遙太上京，相與坐

蓮華。積學爲真人，恬然榮衛和。永享無期壽，萬椿奚足多。

又  
大道師玄寂，昇仙友無英。公子度靈符，太乙捧洞章。舍利耀金姿，龍駕倏來迎。天尊盼雲輿，飄飄乘虛翔。香花若飛雪，氛靄茂玄梁。頭腦禮金闕，携手遨玉京。

又  
騫樹圓景園，煥爛七寶林。天獸三百名，獅子巨萬尋。飛龍躑躅吟，神鳳應節鳴。靈風扇奇華，清香散人衿。自無高仙才，焉能耽此心。

三啓 二禮 重稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上

傅，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞靈杖神鋒，實代形之奇術。真砂聖藥，乃遺世之良方。習五解而碧落飛翔，脫六道而玄虛遊宴。皆上聖提携於九軌，欲下愚超邁於三天。況好道求靈，未造神奇之變化。致趨陰皆死，繼歸臭腐以尋常。忍使沉迷，不加拯援。今亡故某幸生樂土，獲際昌期，誓修七部之瓊綱，獲佩三乘之玉策。風清琅陛，幾隨龍尾之班。月冷瑤壇，曾侍獅頭之座。倏歸死錄，莫返生方。卜宅兆於九京，密藏形體。法衛嚴於五鍊，潛護神魂。願法體之再生，庶冥期而重合。深慮積生之後，宿劫以來，人我紛紜，縱罪根而六情雨集。是非顛倒，飄業蒂而五賊雲滋。行無一善之堪書，身有千愆之可錄。濟存度往，自亂威儀。拜表上章，遏遵俯仰。悅名韃利鎖，而不思禁戒。溺恩膠愛漆，罔念科條。擅役神靈，冒策將吏，字紀陰陽之錄，名

刊水火之曹。寂寂寒庭，恍形神之考對。茫茫夜壑，致性識之推研。匪上叩於穹玄，曷下殫於衷素。修齋謝過，請命十華。懺罪祈恩，皈心九禁。所冀誕敷紫綉，申錫丹綸，削簡書而昭曠仁恩，毀簿籙而登紀善績。亟辭地禁，祇拜天光。即受化於南陵，俾飛行於北闕。申飭里域，為營護其形軀。告命司存，尚衛扶其體魄。倏契陰運，即合陽神。逍遙玄碧之中，嘯咏虛無之上。允繇覆翊，亶賴生全。上願玉虛高澄，金粟靜晏，儀璘光耀，風雨均調。鴻鴈相安，慶田疇而富足。貔貅自樂，毋疆塞之烽驚。鳶魚游泳於生生，草木鮮榮於化化。幽關苦爽，均證仙鄉，陰域囚徒，悉登樂國。則上明天尊大慈之化，下副臣等皈命之誠，謹啓以聞。

發願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦自修，預以同學，普得升虛，與天相保，長存無憂。

二願諸天結氣澄清，高虛廣覆，保真固

靈，烝候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民興從，養生安死，惠周十方，禾稼滋植，營運日豐，咸得覆載，萬類皆從。

四願日月二景高明，無有孛蝕，虧盈安靖，光照諸天，洞消暗冥，保固劫運，世祚和平，普加潤澤，惠洒衆生。

五願星辰與天齊光，轉燭照耀，朗映十方，各安其位，經緯直行，保鎮家國，無有災傷，四海寧一，普願昌隆。

六願四時隨節推遷，景烝和調，無有災患，疫毒消滅，普天安平，五穀豐熟，國富民歡。

七願浮雲結烝聚煙，飛空高澄，蔭覆玄玄，隱則無為，散則彌天，神仙同居，結友衆真，惠流一切，興國愛民，普濟群生，人同劫年。

八願風雨徧洒無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長為仙



宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。

十二願蝗飛蠹動，已生未生，咸蒙安全，普得生成，皆見元炁，受陽之形，草木果林，經冬不零，一切濟度，靡不鮮榮。和：與道合真。

#### 存神燒香

香官使者，左右龍虎君，侍香諸靈官，當令臣午朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣所啓之誠，速達徑御太上無極大道至真玉皇上帝御前。

#### 出堂頌

#### 回靜默堂

靈寶領教濟度金書卷之一百十九

### 靈寶領教濟度金書卷之一

#### 百二十

洞微高士開光救苦真人甯全真授  
靈寶通玄弘教水南先生林靈真編

#### 科儀立成品

五鍊生尸齋用

#### 晚朝行道儀

#### 燒香頌

各禮師存念如法

五星高耀，瑞炁飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩卻消。摧怪伐惡，道炁周流。神光照夜，陰翳俱收。萬仙降格，扇景乘飈。群生咸遂，惠遍神州。和：與道合真。

#### 鳴法鼓二十四通

無上三天玄元始三炁木上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓

玄壇天帝君，當召此間土地里域真官正神，急上關啓臣今奉爲入齋意。以今落景，陞壇行道，願得玉清道炁靈寶妙光下降，流入臣等身中，令臣所啓之誠，速達徑御太上無極大道至真玉皇上帝御前。

#### 請稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞玄元授道，分三洞以流光。靈寶傳經，周十華而散彩。溥鑿玉裁金之妙，示風纏雲絡之玄。十部飛天，仰中乘於微妙。五篇鎮地，翊上士於希夷。實由仙聖之心

傳，竄賴真靈之曲授。邇遐咸賴，幽顯均資。臣等知白心紆，探玄志鬱。煙霞獨嘯，未藏林岫以怡神。日月同流，入混樊籠而淬性。懼尚縈於玄律，莫慨被於丹書。證誓丹青，憲天補過。微盟金石，勵志立功。勉勳行之早圓，副勤修之素志。凡有投告，敢不上聞。

宣詞

按如詞旨，備切忱恂。臣聞五鍊生尸，鎮形骸於陰域。萬神返炁，合魂魄於陽宮。超骨肉而長嘯青冥，全音容而飛登碧漢。如夢之覺數百載，恍若等閑。若醉之醒歷千年，殆猶頃刻。經彰妙應，事載奇文。今某夙植慶基，生逢昌運。瑤壇鳳卮，曾振履以高躋。瓊笈龍函，久摳衣而朗咏。未敦良效，莫策奇勛。遽爾終朝，徒有乘晨之想。溘然一旦，倏爲積夜之遊。生死既睽，升沉斯速。孝子某恩深鞠育，誠切薦修。弟子某等分同父道，宿佩師恩。悵天高以難升，恨地迴而莫問。百骸忍死，五內無生。雖玄造包容，宜錫靈光而接引。奈黑鬱沈寂，懼淪陰翳以沉

埋。非沛澤於高穹，曷登真於厚土。爰崇藥笈，肅建芝壇。遵滅度鍊尸之科，修空洞升神之典。旛花搖曳，借尺地以球鳴。旌葆葳蕤，露寸天而玉立。風雲會合，水月交羅，瞻妙相於玉毫，覲視輝於金彩。碧霞旋絡，重殫翼翼之小心。紫霧翩翻，仰叩巍巍之大梵。爲亡故某，返還祖炁，辟斥陰塵，爲金闕之良臣，侍玉皇之香案。以今晚朝，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝社稷尊靈，宗祧先聖。伏願天關叅妙，宸闕登真。驂玄駟而策瑤臺，神超渺渺。駕彩鸞而升瓊圃，炁入玄玄。延寶曆於千年，蔭璇源於萬葉。歌九功而俗臻大定，舞七德而化洽平康。今故燒香，自皈依師尊大聖衆。至真之德，得道之後，保天長存。和：與道合真。以今晚朝，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首

體投地，仰依太上三尊。願以是功德，歸流亡故某，業網停張，冤輪息運。朱陵度命，無拘留逼合之憂。黑朔升神，有侍衛送迎之喜。超陽清於萬載，脫陰濁於一朝。垂燕翼而詩禮誥誥，攀龍鱗而弦歌袞袞。今故燒香，自皈依師尊大聖衆。至真之德，得道之後，升入無形。和：與道合真。以今晚朝，陞壇行道，請法衆等，運茲三捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，歸流臣等三師四友，五族六親。伏願道德娛情，中和悅性。壽基永茂，鍊龍虎於偃月之爐。福祉長開，育烏兔於明霞之館。既往者書名紫策，見在者紀善青編。永遊宴於天和，獲優閑於地樂。今故燒香，自皈依師尊大聖衆。至真之德，得道之後，長享自然。和：與道合真。

禮方

懺方

三啓

三禮

重稱法位

具位臣某，與臨壇官衆等，謹重誠上啓  
虛無自然元始天尊，無極大道太上道  
君，太上老君，高上玉皇，十方已得道  
大聖衆，至真諸君丈人，三十二天帝  
君，玉虛上帝，玉帝大帝，東華、南極、  
西靈、北真、玄都、玉京、金闕七寶瓊臺  
紫微上宮靈寶至真明皇道君，三十六  
部尊經玄中大法師，上相上宰上保上  
傅，太平下教二十四真人，西城總真王  
君，太元真人，東嶽上卿司命茅君，定  
錄、保命二真人，名山洞府得道神仙，  
三界官屬一切真靈。臣聞函三御炁，超  
萬物以標奇。得一分靈，稟五行而毓  
秀。涉世人推於俊傑，濟時天錫於英  
雄。皆上帝加賴以行道之權，故下民  
密會其修真之迹。況身參三洞，未合  
却老延齡之方。致軀瘞九原，徒羨受  
化更生之術。尤蒙眷軫，曲賜扶持。  
今亡故某，夙慕真宗，久參正教。幾侍  
虛無之座，獲依妙有之墀。降真召靈，  
久頒玉簡。飛元會道，屢咽金符。何

大數之難逃，致餘生之易滅。五方榮  
衛，期肢體以無傷。九域護持，使形神  
而再合。獲登妙境，可脫塵緣。尚慮  
積劫以來，有生之後，劫塵滓性，隨五  
賊以飛奔。世網縈心，依六淫而流蕩。  
虧忠孝而賤名檢，輕仁義而叛綱常。  
禱雨祈晴，莫遵玄律。驅魔馘祟，弗守  
丹章。靜無功行之堪書，動有冤愆之  
可錄。羊腸岐路，常萌戒謹之心。蟲  
臂功名，每逞貪高之念。惟思趨下，罔  
識受中。致明涉於是非，而幽罹於鬼  
責。天年倏殞，既陽域之永辭。地禁  
忽逢，慮陰關之或繫。匪拜恩書於帝  
闕，曷消刑籍於冥曹。壇建十門，歸誠  
十極。階崇三級，請命三元。所冀彩  
鳳銜來，金雞飛下。罪無大小，均冰釋  
於丹書。過有顯微，悉風清於黑簿。  
亟離澤壘，高宴虛玄。登劫仞而身廁  
駕班，覲鬱羅而神升螭屺。永陟真仙  
之列，克爲聖皇之臣。天上仙官，遵德  
音而翊衛。地下令長，體道旨以護持。  
俾運會以攸逢，使形神之再邁。飛行  
碧落，宴坐清都。蒙旌萬一之祈，允佩

再三之造。上願三光高耀，四氣朗清，  
八海澄輝，五山靜彩。犬無夜吠，息烽  
燧於疆陲。鳳有朝鳴，動犁鋤於隴畝。  
萬姓謳歌而齊躋壽域，兆民鼓舞而俱  
宴福鄉。蝸息歧行，各全生意。蛸翹  
蠢動，均樂化機。五道停閑，三塗清  
謐。則上明天尊大慈之化，下副臣等皈  
命之誠，謹啓以聞。

舉願

一願大道流行，普天懷德。二願一切  
有生，咸皆悟道。三願九夜幽魂，一時  
解脫。四願孤爽無依，咸得受生。五  
願天下太平，五穀豐熟。六願臣忠子  
孝，君仁父慈。七願四海通同，冤親和  
釋。八願潛胞處卯，咸得生成。九願  
積疾新痼，旋即痊愈。十願孤露衆生，  
豐衣足食。和：與道合真。

存神燒香

香官使者，左右龍虎君，侍香諸靈官，  
當令臣晚朝行道之所，自然生金液丹碧  
芝英，百靈衆真交會，在此香火爐前。  
令臣學道得道，求仙得仙，齋主受福，幽  
顯沾恩，十方仙童玉女，侍衛香煙，傳臣

向來所啓之誠，速達徑御太上無極大道至真玉皇上帝御前。

出堂頌

回靜默堂

靈寶領教濟度金書卷之一百二十

靈寶領教濟度金書卷之一

百二十一

洞微高士開光救苦真人甯全真授  
靈寶通玄弘教水南先生林靈真編

科儀立成品

五鍊生尸齋用

謝恩醮儀

衆官序立

陞壇如式

燒香頌

各禮師存念如法

衛靈呪

五靈列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金錄定籍，玉宇除殃。朱陵鍊質，飛神太蒼。三官九府，無極神鄉。普受開度，上生天堂。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今設醮謝恩，願得玉清道炁靈寶妙光下降，流入臣等身中，令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠上啓聖位。臣聞三洞流光，扇仁風於六合。九清演化，流慧日於八圓。運天地而膏澤群靈，幹陰陽而扶持庶品。上無復祖，凝道炁於鬱羅。中有度人，耀靈光於澤壘。敷雨露無私之惠，成日月有造之恩。今古攸遵，幽明共賴。今齋主某伏念亡故某，命奄重泉，神歸積夜。生無善績，學道未契於良機。死有惡緣，胎責恐招於深考。遂按生尸之典，庸修度命之齋。期脫冥曹，復還治職。幸拜提携之造釐，事慶成曲。

垂衣被之恩，沉魂飛度。輒奉嚴於禴祀，庸祇降於飈旂。伏望湛露清塵，靈風扇靄。丹輿綠輦，翩翩齊下於玄虛。羽蓋瓊輪，絡繹並離於碧落。月駟擁山林之駕，雲龍彰洞府之轅。俱會道場，不遺德愆。臣無任激切，望恩之至，謹稽首再拜奉請。

### 請聖

三界衆真，醮筵列聖，適伸拜請，諒沐光臨，請各整於仙班，共祇迎於帝馭。

### 降九位

鸞輿至止，鶴駕臨軒，與醮衆真，如儀朝禮，朝禮既周，請陞醮席，齋主上香，設拜初進酒。

### 初獻

具位臣某，謹重誠上啓三清上聖，十極高真，玄穹之帝座師尊，洞府之仙真主宰，醮筵內外一切真靈。臣聞大道希夷，簸洪鈞而騰汗漫。至真微妙，立鰲極以報鴻濛。二儀分經緯之精，四象結陰陽之運。上羅仙聖，周霄漢以生成。中列真靈，溥寰瀛而化育。故垂玄教，曲軫蒼生。幽明總被於卿雲，今

古均沾於法雨。無文不立，有感斯通。今齋主某，伏爲亡故某。哀慕情深，薦修志切。慮修真學道，未探蹟於瓊綱。而律己希仙，莫均深於瑤笈。倏淪鬼域，遂殞神鄉。既喪本以離真，乃殞生而謝世。音容既遠，歲月如馳。孰明陟降之殊途，誰識升沉之異路。恩依帝力，庶慰民情。爰蠲潔於蓬衡，庸款延於芝御。三時行道，愆隨懺以冰清。一日趨朝，福因齋而雲委。果沐返生之惠，曲超起死之恩。爲錄善功，俾消惡考。神識既超於北鬱，形魂直上於南陵。仰荷陶鎔，若爲報稱。列蘋蘩而事帝，少效珠環。罄葑菲以答天，敬依瑤玖。謄詞青璽，寓悃丹毫，爰有青詞，謹當宣奏。

### 宣詞

按如詞言，備陳衷素。茅茨不剪，僭陳綿蕝之儀。黍稷非馨，庸寓絲毫之敬。伏願鸞輿日監，龍馭時歆。察其報對之忱，錫以流恩之惠。珠彝縷玉，伶華鳴空洞之音。翠斝流金，符寶擁飛玄之仗。月磬琳琅之韻，合雲鏞搖曳以

聲揚瓊彩，流明琅輝朗耀。三辰在上，施濟下之玄釐。六甲旁臨，鑒由中之素禱。一忱請命，九拜陳情。臣下情無任虔禱之至。

### 亞獻

臣某謹重誠上啓聖位。臣聞天聽難諶，既曲聆於黃混。民情可見，宜直露於清虛。幸鳴鞘俯降於瑤墀，而曳履仰朝於玉陛。大鈞坱圠，能回九死之淒涼。小物怡愉，當暢千生之快樂。先願亡故某，福編容與，罪籍清夷。錄生前學道之功，開死後登真之徑。移名青簡，騰步武於芝班。列字丹圖，振精神於楓卮。受書朱火，發策青華。真秩高躋，任仙僚於洞府。玄品峻陟，充靈職於雲霄。贊化育而洞輔開宣，仗生成而天人加賴。神遊眇莽，形隱沈寥，天府龍神密爲榮衛，地司僚屬潛與周旋。反掌間歷數百期，指顧頃猶一二日。五體重榮而再合，萬神復集以更生。煙霞褰衣，山林振袂。飛步碧虛之上，遊行玄極之中，永爲種民，常居道境，蒙鑒百千之悃，實符萬一之

忱。次願臣等三師四友，五族六親，福履長春，德容照夜。玄關御景，虎龍飛離坎之精。丹谷凝華，烏兔育乾坤之粹。既往者千載，佐英猷於天上。見在者百年，享榮樂於人間。次願臣領教無魔，學真有驗，七部暢天寶靈寶神寶之道，嘯咏金科。三乘昭玉清上清太清之文，恢弘玉律。絕陰陽之二寇，削隱顯之千愆。立玄功而壽等靈椿，書丹績而慶延仙桂。功成名遂，家緒綿綿。行滿勛圓，派宗袞袞。流英氣於高厚，播道譽於邇遐。天必從之，臣所欲也。上願風雲藏靜，日月輝澄，川嶽晏安，山林清謐。天無氛穢，景星昭晰以開祥。地絕妖塵，甘露零灑而薦瑞。犬無夜吠，鳳有朝鳴。檢關絕飲馬之聲，麥隴息遺蝗之影。詩書自樂，家給人足。以無憂弦誦相歡，國泰民安而有喜。沈苦聲於地獄，享大福於天堂。臣下情不勝虔禱之至。

終獻

臣某謹重誠上啓聖位。臣聞聽聰無遺，昭至敬無文之實。鑒觀有造，明大禮

必簡之儀。幸圓闡事之真忱，式遂傾光之厚德。返生可卜，起死堪明。仰依赫赫之恩，嘉拜灑灑之惠。香殘寶篆，燈散金缸，雲笙收縹緲之音，月籟散舒徐之韻。諸天復位，萬聖戒途。飛雲丹霄，回旋空際，綠輿羽蓋，還返仙都。臣等徒企靈光，莫陪法從。運元會道，百神混合於泥丸。入妙識真，萬烝齊仙於玄牝。臣下情不勝虔禱之至，謹稽首再拜奉送。

存神復爐

迴輶頌

送聖

化財

靈寶領教濟度金書卷之一百二十一

靈寶領教濟度金書卷之一百二十一

洞微高士開光救苦真人甯全真授  
靈寶通玄弘教水南先生林靈真編

科儀立成品

陰宅土神醮儀

洒淨

衛靈呪

五星列照，煥明五方。水星却災，木德致昌。熒惑消禍，太白辟兵。鎮星四據，家國利亨。名刊玉簡，字錄帝房。乘飈散景，飛騰太空。出入冥無，遊宴十方。五雲浮蓋，招神攝風。役使萬靈，上衛仙翁。和：與道合真。

請稱法位

具位臣某謹焚香，上啓土府太皇上帝，五方土府大帝，太歲尊神，太陰神后夫人，九宮飛遁九星君，土中公卿丞相大夫，二千石令長功曹主簿神君，土中公土母神君，土中八卦、十干、十二支、

山家禁忌神君，白虎、朱雀、玄武、騰蛇神君，山家三十六將神君，今年今月飛遊鈞替二十四山吉凶神君，新舊造作干犯山家方隅諸部神君，本山土地山皇，諸部奏記香火有位神祇，看望隨喜無鞅聖衆。伏聞皇窮廣覆，羅經緯於圓虛。后土丕承，列罔巒於方峙。八卦辨疆維之勢，九宮周井野之形。環拱天星，典吉凶者三十六將。旁羅地煞，司禍福者二十四山。是爲陰宅之區，實映陽居之域。悉奉承於清微妙化，皆統部於紫極靈光。有感斯通，無文不度。今醮官某，伏爲亡故某。運應滅度，擬百靈返炁之期。神墮沈寥，遵五鍊生尸之法。長夜之關寂寂，太陰之室茫茫。宅兆神靈，盍承符而榮衛。禁隅龍鬼，宜稟令以周旋。既叨衛護之功，盍罄皈依之悃。輒陳禴祭，恭輅靈旂。欲望呼嘯山林，翩翩來下。震動草木，淅淅齊臨。采萬一之芹忱，鑒百千之葵志。某不勝懇禱之至，謹伸奉請。

請神

初獻

某謹重誠上啓聖位。伏聞壬丙子午，中分天地之綱維。乾坤坎離，外列陰陽之境界。定十元於狐首，異五行於龜圖。白虎青龍，左拱右揖。朱雀玄武，後坐前朝。高低而山別去來，遠近而水分向背。悉有神司而主宰，皆稟帝令以權衡。粵若威靈，夙標神聖。詭形異狀，喜彰福德之期。譎服怪名，懸示凶災之兆。範圍瑩域，典領山林。今醮官某，伏念亡故某，學道末生，參真數紀。善功莫積，難令策景以乘晨。惡過或鍾，倏爾沉幽而駕夜。哀號奚極，攀慕何終。念宿被於深恩，曷痛酬於大德。林幽峰竊，幸圖宅兆以歸藏。歲邁時遙，終擬形魂之返復。遂遵聖法，庸按神經。磨五方安鎮之文，刊諸天光明之字。榮衛五體，團束百骸。俾緣會之倏來，體魄再合。庶時節之或到，骨肉重甦。振衣上造於玄虛，鳴佩高躋於碧落。全憑神用，爲暢靈威。草草盃盤，媿莫殫於衷素。昏昏燈火，曷克罄於懇祈。情見乎辭，儀不及物，

恭陳亞獻。

亞獻

某謹重誠上啓聖位。伏聞萬炁無歸，痛音容之已遠。百身莫贖，幸性識之猶存。故於此日之經營，猶擬他時之遇合。今亡故某，幽基長往冥路，倏遊遂遵五鍊。以修齋期滿，百齡而契合。猶慮土中妖怪，地下魔精，動搖形體而靡獲康寧，損惱肉骨而易蕩形炁。林木振撼，罔隴傾摧。斧斤入山而觸忤真靈，金石移位而有損禁以。致真魂之靡定，與沉魄之難安。全藉威權，肆回吉慶。同心呵護，俾無侵擾之虞。叶力隄防，須有平安之喜。斷除地怪，辟斥飛魔，閱百歲而無異一朝，逾千載而殆猶俄頃。因緣會遇，倏然而枯骨成人。時節相逢，忽爾而游魂合體。無異前生之炁象，何殊昔日之音容。五藏重榮，百骸再肉，高躋林表，等閑長嘯於雲衢。徑躡巖幽，容易振飛於霄路。遊神洞府，御炁虛無。垂文獻於雲仍，傳聲猷於胤嗣。蒙如丹禱，允佩洪恩。某不勝虔祝之至，恭陳終獻。

終獻

某謹重誠上啓聖位。伏聞禮貴乎簡，既殫莫獻之將。敬尚乎誠，尤罄懇祈之切。荷神靈之傾聽，慰黎庶之私懷。月淡河澄，遐想飛驂之順。動參橫斗，轉坐聞整轡以迴旋。某不勝激切之至，謹稽首奉送。

迴輶頌

向來

十方懺儀

陞壇

步虛

東方

臣等今故燒香，皈身皈神皈命，東方無極太上靈寶天尊，懺悔亡故某。爰從無始，迨至有生，三業紛紜，六情流浪，齋戒弗守，科律多違，浮好聖文，每訾真教，背叛師友，傲忽仙靈，行檢有虧，貪得無耻。致使愆書十界，釁結三官，長夜冥冥，莫繇解釋。以今修齋行道，燒香散花，皈命東方無極太上靈寶天尊，九炁天君，東鄉神仙諸靈官。伏冀上聖流恩，至真宥過，告下東方無極世界

一切玄曹，特爲亡故某，疾除罪簿，落滅

惡根，削字黑單，紀名朱火，升進品秩，

任職歸班，佐佑聖皇，扶持洞輔。今依

靈寶滅度五鍊生尸經法，安鎮宅兆，嚴

固歸藏。更願敕勒地司，營衛體魄，因

緣會遇，再合形魂。宴景虛無，飛步霄

漢，不經輪轉，長處逍遙，得道之後，升

入無形。和：與道合真。

十方同。只改方名。總懺亦同，只

改十方。

靈寶領教濟度金書卷之一百二十二

靈寶領教濟度金書卷之一

百二十三

洞微高士開光救苦真人甯全真授

靈寶通玄弘教水南先生林靈真編

科儀立成品

度星齋合用

早朝行道儀

燒香頌

各禮師存念如法

衛靈呪

青陽虛映，曜日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香



官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今清旦，陞壇行道，願得玉清道炁靈寶妙光下降，流入臣等身中，令臣所啓之誠，速達徑御太上無極大道至真玉皇上帝御前。

### 請稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞清微御運，慈雲融五劫之春。赤明開圖，慧日照十華之旦。耀金書於碧落，浮玉字於紫虛。敷八威空洞之篇，演三籙飛玄之

韻。奔晨遷景，混九室之迴風。度命登真，洒六宮之惠露。碧玉地彰於聖化，黍珠天啓於神機。慶浹天人，仁周幽顯。臣等緣諧宿運，生際昌時。探囊中紫鳳之章，佩肘後蒼虬之籙。林泉高蹈，宜存修以競辰。塵土卑棲，迺遜而玩歲。功無毫髮，過有淵陵，尚涵覆燾之恩，俾贊樞機之化。凡有投告，敢不上聞，齋意青詞，謹當敷露。

### 宣詞

按如詞旨，備極忱恂。齋主某憫斯亡靈，罹茲奇疾。神聖工巧，生根莫返於三彭。地水火風，命蒂遂凋於二豎。舟藏何在，水逝不回。痛肝肺之俱摧，嗟音容之莫睹。陽精陰粹，既顛倒於生前。地魄天魂，懼輪迴於死後。致故炁之流染，與注殃之累連。自非聖真垂洗濯之恩，曷俾身家膺清淨之福。爰涓穀旦，恭潔蓬居，依玉匱之明科，演金真之冲範。瓊音九奏，蘭煙芬馥於玄中。瑤壇三成，蓮炬熒煌於空際。十絕舞玄龍之駕，九光翻朱鳳之輶。獅座端臨，駕班肆覲，宛若浮黎之會，

奚堪龍幄之游。敷民欲於再三，覬天休於萬一。恩疏白簡，期超陰壑之形神。名紀青編，願福陽庭之步武。以今清旦，陞壇行道，請法衆等，運慈初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝社稷尊靈，宗祧先聖。鸞驂汎景，鳳馭飛霄，登蓬丘以尋真，躡瑤臺而問道。流祥寶祚，演慶璇源。皇帝德邁懷胥，功高軒燧。五山鎮地，齊御極之脩齡。八海浮天，並朝宗之洪福。文軌同仁於禹跡，梯航慕義於堯疆。內掖外朝，共昌帝業。文僚武佐，永贊皇圖。今故燒香，自皈依師尊大聖衆。至真之德，得道之後，保天長存。和：與道合真。

以今清旦，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，奉祝齋主家九玄七祖，億劫種親。伏願騫林高步，芝沼融真。騰碧漢以怡

神，玄雲翼乘。宴朱丹而受記，紫策躋攀。流芳文獻之宗，濟美詩書之澤。齋主某五福天錫，三壽山齊。漱玉液以

酣和，朱顏霞粲。茂金花而御景，玄谷雲生。凝瑞炁於門闌，藹光風於庭宇。

永絕陰陽之寇，常開經緯之祥。今故燒香，自皈依師尊大聖衆，至真之德，

得道之後，升入無形。和：與道合真。

以今清旦，陞壇行道，請法衆等，運茲

三捻上香。願此香煙騰空徑上，供養無上至真師寶。臣等皈身皈神皈命，首

體投地，仰依太上三尊。願以是功德，歸流臣等三師四友，五族六親。伏願玄

雲披拂，道月舒明。既往者悟一性之圓通，永辭有漏。見在者瀰六情之纏

累，克證無爲。以至七趣三塗，九幽六洞，均登樂境，等定水之無塵。疾脫苦

輪，免業山之有障。今故燒香，自皈依師尊大聖衆。至真之德，得道之後，長

享自然。和：與道合真。

禮方

懺方

三啓

樂法以爲妻，愛經如珠玉。持戒制六情，念道遣所欲。澹泊正氣停，蕭然神靜默。天魔並敬護，世世享大福。

三禮

臣等志心稽首，禮

太上無極大道。

臣等志心稽首，禮

三十六部尊經。

臣等志心稽首，禮

玄中大法師。

重稱法位

具位臣某，與臨壇官衆等，謹同誠上啓。虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虚上帝，玉帝大帝，東華、南極、西靈、北真、玄都、玉京、金闕七寶瓊臺紫微上官靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞九霄降炁，驚

天駭地以稟形。三景流輝，負陰抱陽而賦命。職生死於三十五分，紀善惡於二十四時。垂象無私，校錄揭水衡之正。秉陽有赫，圖編昭冰鏡之明。承符上贊於玄元，宣化下陶於黎庶。但勤皈向，必藉綱維。今玄壇所度亡故某，切慮分炁天中，寓形宇內。浮沉業海，莫穩駕於慈航。跋扈昏衢，罔高張於慧燭。致性天之雲擾，而心地之塵飛。顛冥百非，周遭三惑，違五常而千人紀，觸三光而犯天文。愆書司殺之曹，過紀典老之錄。六隆伺間，人久瘁於沉痾。五鑿乘危，形遂凋於戾證。牽連注訟，積逮考殃，孰伸援手之仁，惟抱驚心之痛。念下民趨死超凌，望切於雲霓。而上帝好生提拯，恩踰於雨露。庸依藥笈，式建芝壇。殫皎日之丹盟，宣度星之玄範。鳳縵環列，龍璧羅敷。瞻象緯以輸誠，遡雲層而效款。冀垂睿澤，恪軫哀衷。恩綸頒紫禁之朝，罪籍削黑艷之夜。出離地戶，無拘留逼合之憂。徑入天門，有侍衛送迎之樂。昇神受化，返胎更生。絕

塚訟於家庭，息注殃於眷序。齋主某合家男女，權衡二炁，蕭勺五官，梨棗長新，視履啓福庭之日。松筠益茂，耆頤開壽域之春。消九厄而釋三灾，導千祥而迎百福。紹箕裘於已往，垂詩禮於方來。長幼咸寧，姻親泰定。上願乾坤澄晏，日月光華，甘露沾濡，卿雲覆冒。三軍鼓舞，烽煙沉榆柳之關。萬姓謳歌，膏雨潤桑麻之隴。息化機於動植，融生意於飛潛，五道停輪，三塗罷對。則上明天尊大慈之化，下副臣等皈命之誠，謹啓以聞。

舉願

一念爲道四大合德，齋主七世父母，免脫憂苦，上昇天堂，衣食自然。  
二念帝王國主，道化興隆，庠序濟濟，皇教恢弘，威儀翼翼，普天所瞻，民稱太平，四夷賓伏，祿惡自滅，賢聖日生。  
三念法師功德大建，教化明達，俱獲飛仙。  
四念同志學人，早得仙道，更相關度。  
五念九親和睦，好尚仁義，貴道賤財，

行爲物範。

六念損己布施，道士及飢寒者，天下人民，各得其所。  
七念蠕動跂行，一切衆生，咸蒙成就。  
八念赦貫前生今世罪對，立功補過。  
九念家門隆盛，宗廟有人，世生賢才。  
十念尊受師經，不敢中怠，平等一心，廣度一切，剋獲飛仙，白日登天，拜見太上，永成真人，雲車羽駕。和：與道合真。

存神攝香

香官使者，左右龍虎君，侍香諸靈官，當令臣早朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御太上無極大道至真玉皇上帝御前。

出堂頌

回靜默

謝師 回向

靈寶領教濟度金書卷之一百二十三

靈寶領教濟度金書卷之一百二十四

洞微高士開光救苦真人甯全真授靈寶通玄弘教水南先生林靈真編

科儀立成品

度星齋合用

午朝行道儀

燒香頌

各禮師存念如法

衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破祿，明耀元功。金符召制，躡雲乘龍。謠歌慶會，散花太空。神化冥運，四極安隆。伏御帝前，罔有不恭。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香

官，各三十一人出。出者嚴裝。關啓  
玄壇天帝神君，當召此間土地里域真  
官正神，急上關啓臣今奉爲入齋意。以  
今臨午，陞壇行道，願得玉清道炁靈寶  
妙光下降，流入臣等身中，令臣所啓之  
誠，速達徑御太上無極大道至真玉皇  
上帝御前。

請稱法位

具位臣某，與臨壇官衆等，謹同誠上啓  
虛無自然元始天尊，無極大道太上道  
君，太上老君，高上玉皇，十方已得道  
大聖衆，至真諸君丈人，三十二天帝  
君，玉虛上帝，玉帝大帝，東華、南極、  
西靈、北真、玄都、玉京、金闕七寶瓊臺  
紫微上宮靈寶至真明皇道君，三十六  
部尊經玄中大法師，上相上宰上保上  
傅，太平下教二十四真人，西城總真王  
君，太元真人，東嶽上卿司命茅君，定  
錄、保命二真人，名山洞府得道神仙，  
三界官屬一切真靈。臣聞靈層峨峨，元  
始御太無之祖炁。龍漢蕩蕩，虛皇舒  
妙有之真精。上浮圓蓋以高澄，下奠  
方輿而厚濁。函三御極，潛宰制於陰

陽。得一分靈，昭權衡於經緯。大矣  
紫清之鳳牒，妙哉玄碧之龍圖。鼓舞  
真風，融怡聖日。實古今之柱石，爲生  
死之津梁。臣等道域師參，慶基天啓。  
紫霞絳寶，莫朝玉液於玄關。白日紅  
塵，徒滓金花於神室。望洋自嘆，入谷  
懷慙。惟蚊負以淵臨，期鵬搏於海運。  
憲天宏道，佐國立功。凡有皈投，敢忘  
關奏，午朝詞旨，謹爲宣聞。

宣詞

按如詞旨，備極忱恂。齋主某義重天  
倫，情鍾人極。痛魂靈之沉滯，嗟影響  
之沈寥。蛾火摧殘，莫際生還於九轉。  
駒陰暗老，惟傷死別於千齡。五炁散  
於天元，百體歸於地大。茫茫幽夜，驚  
心解脫之無門。寂寂冥宵，側耳超凌  
之有路。倘冤愆之未釋，致注訟之潛  
興。惟陰都度命以登真，庶陽居保身  
而集慶。非賴玄元之造，曷符丹赤之  
忱。象地法天，舞旌旗於寶壇。鳴金  
扣玉，飛旂葆於瑤壇。龍煙飄玉桂之  
香，鳳炬粲金蓮之影。投誠十極，皈命  
三元。肖躡傳聲，降虛無之上聖。紫

霄簇仗，近浩劫之慈尊。敷下民哀痛  
之詞，覲上帝矜憐之澤。飛金雞於闔  
闔，丕顯恩言。豎丹鳳於鬱單，式彰仁  
聞。以今臨午，陞壇行道，請法衆等，  
運茲初捻上香。願此香煙騰空徑上，  
供養無上至真道寶。臣等皈身皈神皈  
命，首體投地，仰依太上三尊。願以是  
功德，上祝宗祧先聖，社稷尊靈。伏願  
汎景六淵，怡神三秀。凝珠旒於太漠，  
密蔭瑤圖。飛羽蓋於重霄，廣延寶祚。  
皇帝德參覆載，恩浹華夷。翠浪千層，  
擁蒼溟而並福。青山萬疊，聳岱華以  
齊齡。九圍敦孝悌之風，百辟罄忠良  
之彥。中圍列御，克著徽音。太子諸  
王，共扶昌運。今故燒香，自皈依師尊  
大聖衆。至真之德，得道之後，保天長  
存。和：與道合真。

以今臨午，陞壇行道，請法衆等，運茲  
二捻上香。願此香煙騰空徑上，供養  
無上至真經寶。臣等皈身皈神皈命，首  
體投地，仰依太上三尊。願以是功德，  
奉祝齋主家九玄七祖，億劫種親。伏  
願琳琅御景，瑤圃棲真。襲霓裳以飛

遊，鞭笞鸞鳳。漱雲漿而戲宴，嘯傲煙霞。垂芳祉於家庭，藹英猷於孫子。齋主某五靈孕炁，三極陶形。潤屋潤身，袞袞熙朝之簪紱。學詩學禮，綿綿聖世之箕裘。歷花甲以循環，益椿年而蔓衍。望隆桑梓，惠逮松蘿。今故燒香，自皈依師尊大聖衆。至真之德，得道之後，昇入無形。

和：與道合真。

以今臨午，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，奉祝三塗五苦，六洞十宮，夜壑寒庭，幽關冥路。伏願根塵風散，累垢冰清。襲卿雲於生門，春回寒谷。擁祥煙於死戶，陽滿幽都。玉龍馳白簡之綸，金馬迅朱臺之詔。飛行宴景，辭北府以登真。策駕凌虛，詣南昌而受化。歡騰鬼域，慶浹神鄉。今故燒香，自皈依師尊大聖衆。至真之德，得道之後，長享自然。

和：與道合真。

禮方

懺方

命魔

步虛

控轡適十方，旋憩玄景阿。仰觀劫仞臺，俯盼紫雲蘿。逍遙太上京，相與坐蓮花。積學爲真人，恬然榮衛和。永享無期壽，萬椿奚足多。

又

大道師玄寂，昇仙友無英。公子度靈符，太乙捧洞章。舍利耀金姿，龍駕倏來迎。天尊盼雲輿，飄飄乘虛翔。香花若飛雪，氛靄茂玄梁。頭腦禮金闕，携手遨玉京。

又

騫樹圓景園，煥爛七寶林。天獸三百名，獅子巨萬尋。飛龍躑躅吟，神鳳應節鳴。靈風扇奇華，清香散人衿。自無高仙才。焉能耽此心。

三啓

三禮

重稱法位

具位臣某，與臨壇官衆等，謹同誠上啓虛無自然元始天尊，無極大道太上道君。太上老君，高上玉皇，十方已得道

大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上官靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞道生一以函三，惟天爲大。物並三而次萬，惟人最靈。擬混洞以流形，稟沖和而賦命。青房紫戶，精思飛霞外之輪。玉緯金經，密運策雲端之駕。生神永固，炁死何干。自季運之風漓，致畏途之日闕。雨滋叢棘，罔知策馬之玄。鍊鑠交梨，豈識牧牛之妙。六根罪府，五體冤都，奏黑簡於三元，削青編於四極。下愚蒙昧，曷逃淪墜之憂。上智慈悲，爰啓拔靈之請。長夜既開於玉匱，明真遂演於金科。今古蒙恩，天人受惠。今玄壇所度亡故某，切慮塵籠涉跡，世網謀身，不知尊炁以貴神，安識保精而固命。三元紆鬱，五賊搶攘。冥行或叛

於四維，妄動或干於五紀。罪無大小，實伐命之斧斤。過有陰陽，皆傷生之刀鋸。或先世之遺殃流注，或宿世之罪業牽連。元臘無懺謝之文，節會乏朝修之典。一朝奄忽，九夜沉淪。驚萬炁之各離，恨百身之莫贖。陰官二十四治，憲網高張。岱曹七十四司，法機密布。茫茫孰告，感感誰矜。惟仰藉於天光，庶俯開於地禁。苦稽度星之式，惠徹懺罪之恩。燒香散花，轉經行道。詔頒北闕，策天吏以飛馳。魂度南宮，勅地祇而侍衛。永絕家庭之注咎，頓消眷序之考殃。齋主合家大小，二景流輝，五靈錫羨。精神爽潤，寇永絕於陰陽。步武高華，福並隆於山海。迓方來之百順，絕既往之千災。老安少懷，慶荀氏八龍之盛。尊寧卑睦，等于公四馬之榮。遣門外之風波，宴壺中之日月。蒙如丹禱，仰荷玄恩。上願天度圓清，地紀澄晏，儀璘煥彩，河漢流祥。犁雨滋春，布歡聲於四鄙。烽煙沉夕，集喜炁於三陲。野息遺蝗，朝多鳴鳳，草木遂生生之性，飛潛離化

化之機。山川鬼神，永護持於道日。林泉隱逸，疾證悟於真風。則上明天尊大慈之化，下副臣等皈命之誠，謹啓以聞。

### 發願

一願大道淡泊虛無，安閑空寂，澄清自居，廣開法門，教導頑夫，皆蒙惠澤，精苦自修，預以同學，普得升虛，與天相保，長存無憂。

二願諸天結炁澄清，高虛廣覆，保真固靈，氣候調節，四運和平，國安民豐，普天閑寧，廣濟一切，惠達有生，保天長存，億劫不傾。

三願土地覆載無窮，安平不陷，海淪不崩，保鎮家國，兆民興從，養生安死，惠周十方，禾稼滋植，營運日豐，咸得覆載，萬類皆從。

四願日月二景高明，無有孛蝕，虧盈安清，光照諸天，洞消暗冥，保固劫運，世祚和平，普加潤澤，惠洒衆生。五願星辰與天齊光，轉燭照耀，朗映十方，各安其位，經緯直行，保鎮家國，無有災傷，四海寧一，普天興昌。

六願四時隨節推遷，景氣和調，無有災患，疫毒消滅，普天安平，五穀豐熟，國富民歡。

七願浮雲結炁聚煙，飛空高澄，蔭覆玄玄，隱則無爲，散則彌天，神仙同居，結友衆真，惠流一切，興國愛民，普濟群生，人同劫年。

八願風雨洒潤無窮，普加施泄，受其發揚，萬物滋生，國儲民豐。

九願五嶽各安其方，巍巍包藏，長爲仙宮，安鎮國祚，保天無終，護度一切，莫不仰宗。

十願江海蕩蕩無極，含容恢廓，無細不植，淵奧柔惠，潤加蠕息，天人獲慶，年同劫石。

十一願帝王國主日昌，四鎮安睦，兵革不揚，天人歌唱，吉應來翔，敷教濟濟，威化揚揚，兆庶稱慶，長樂未央。

十二願蝗飛蟲動，已生未生，咸蒙安全，普得生成，皆見元氣，受陽之形，草木果林，經冬不零，一切濟度，靡不鮮榮。和：與道合真。

### 存神燒香

香官使者，左右龍虎君，侍香諸靈官，當令臣朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋官蒙福，幽顯沾恩，十方仙童玉女，接待香煙，傳臣向來所啓之誠，速達徑御太上無極大道至真玉皇上帝御前。

出堂頌

引至幕

謝師尊

舉回向

靈寶領教濟度金書卷之一百二十四

靈寶領教濟度金書卷之一百二十五

洞微高士開光救苦真人甯全真授  
靈寶通玄弘教水南先生林靈真編

科儀立成品

度星齋用

晚朝行道儀

燒香頌

各禮師存念如法

五星高耀，瑞炁飛浮。元始集神，天地交周。玉符寶節，嘯命微幽。擲火揚威，奸凶無留。萬魔振伏，紛葩却消。摧怪伐惡，道炁周流。神光照液，陰翳俱收。萬仙降格，扇景乘飈。群生成遂，惠遍神州。和：與道合真。

鳴法鼓二十四通

無上三天玄元始三炁太上道君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓

玄壇天帝神君，當召此間土地里域真官正神，急上關啓臣今奉爲入齋意。以今落景，陞壇行道，願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，大元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞翠鸞鳴七寶之林，紫霄御炁。朱實輝五明之座，丹谷凝真。七經洞妙於神機，八緯混茫於聖化。大矣虛無之祖，妙哉靈寶之宗。高拱彌高，上極無上。自帝師湛

八員之惠露，故仙真扇三洞之仁風。出有入無，道肆彰於瓊笈。開幽濟顯，教斯煥於琅函。萬劫攸宗，千靈共仰。臣等玄樞快睹，道紀欣承。莫葆粹於林泉，面墻凜凜。尚和光於埃壚，入室悠悠。退堅補過之心，進勵立功之志。憲天育物，體道度生。凡有皈投，敢忘關告。晚朝心詞，謹當跪奏。

宣詞

按如詞旨，備殫忱恂。齋主某籲天激越，扣地凌兢。哀三生骨肉之親，倏九死形神之隔。須緣疹烝，遂惹沉痾。採神藥而弗靈，抱聖著而自嘆。膏之上，盲之下，開死戶以幽幽。衛之後，榮之前，迷生門而寂寂。魂歸廣漠，魄逐沈寥。三思蘊集於陽庭，寧無悔悟。百感鍾情於陰域，諒望超昇。敢殫赤素之忱，庸扣紫清之邃。載觀寶典，遙睇璇霄。稟形既藉於神輝，度命宜陶於恩紀。壇崇拱日，齋按度星。俾回一性之真，爲懺萬形之咎。紫煙縹緲，飛百和於鸞籥。丹焰熒煌，燦千枝於鳳炬。奏鈞天之廣樂，雨大地之寶華。

圓壁周羅，方繒列奠。輅龍輦於紫極，雲路無塵。騶虬乘於碧虛，霄衢有耀。重罄方寸之禱，仰殫咫尺之威。覬沛天恩，爲寬地禁。以今晚朝，陞壇行道，請法衆等，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，仰依太上三尊。願以是功德，上祝宗祧先聖，社稷尊靈。伏願觀妙始青，凝真太素。乘玄龍而遠汎，流慶皇基。騶朱鳳以上征，輔元帝所。皇帝三皇齊聖，五帝同仁，垂衣而式九圍，車書拱極。朝元而來萬國，玉帛充庭。福源符東海之深，壽域等南山之峻。青宮仁孝，彤掖徽柔。槐幄駕行，忠貞紀雲臺之績。柳營龍旅，威聲騰月塞之勳。今故燒香，自皈依師尊大聖衆。至真之德，得道之後，保天長存。和：與道合真。

以今晚朝，陞壇行道，請法衆等，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，仰依太上三尊。願以是功德，奉祝齋主家九玄七祖，五族六親。伏

願偃月怡神，明霞高步。詣玄都而聽法，朱火登名。游碧玉以聞經，青華覲聖。益茂芳猷之潤，永揚世澤之長。齋主某視履優閑，澄神邁逸。朱顏綠鬢，坐希寶桂之輝。華翠幌珠，屏行映莊椿之悅。茂名列五靈之簡，身膺十善之書。七葉連榮，一枝挺秀。今故燒香，自皈依師尊大聖衆。至真之德，得道之後，升入無形。和：與道合真。

以今晚朝，陞壇行道，請法衆等，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，仰依太上三尊。願以是功德，歸流溥天率土，內宇外寰，三農四民，六軍萬姓，山林隱士，湖海高人。披拂玄雲，融怡道日。耕食鑿飲，歌帝力以優游。雨笠煙簑，襲天和而遐逸。巾箱富詩書之潤，舟車贏金帛之饒。極天覆地載之區，悉爲禹迹。遍日照月臨之境，盡屬堯疆。慕冠帶之華風，脫氈裘之污俗。漱流枕石，考槃精進於無爲。鈞月耕雲，出岫扶持於有路。今故燒香，自皈依師尊大聖衆。至真



之德，得道之後，長享自然。和：與道合真。

禮方

懺方

步虛

三啓

三禮

重稱法位

具位臣某，與臨壇官衆等，謹重誠上啓。虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傅，太平下教二十四真人，西城總真王君，大元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞一元凝妙，融萬象於虛無。五大開光，育群生於混沌。御運而包羅經緯，提封而囊括玄黃。道日昭明，玉宇浮沉於空際。真

風披拂，金書隱顯於人間。皆由元始之神輝，悉稟虛無之祖炁。津梁生死，柱石人天。自三籙之興行，與九幽之流演，膏雨潤炎池之爽，陽輝開寒域之和。拓生意以無垠，敷仁心而莫極。凡伸歸戴，更藉陶鎔。以今玄壇所度亡故某，切慮生戴一星，命陶七緯。唱恭奉，敬諾順，合尊貴於天真。取死壞，離本根，乃驅馳於人僞，日貪黼黻，耳亂宮商，玩好紛於心田，馨香參於鼻觀。口耽滋味，身慕輕肥，惟知猿馬之騰驤，豈念兔烏之迅速。心心業網，步步塵機，三元水火之推研，六洞陰陽之考校。北艷慘戚，東岱幽寥，致注訟之潛興，或考殃之滋至。匪由懺滌，曷遂超凌。對揚獅座之端嚴，幸諧人願。申錫龍符之輝煥，願暢天光。勅地水之法曹，勒山川之憲吏。焚茲罪錄，釋彼冤書，鬼官送迎，度上南宮之境。神鄉落滅，徑朝北闕之都。衣食自然，形神太定。故炁不交於眷序，注殃永息於家庭。齋主某合家大小，天錫龜齡，神扶鴻祉。三宮月皎，行藏無撓於三

仇。五氣春融，動靜莫縈於五累。衍芳猷於百世，鍾餘慶於一門。中外泰然，公私咸若。允拜生成之造，敢忘化育之恩。上願覆載清寧，日星輝潤，風雨調順，夷夏熙平。疫癘潛蹤，物物遂天機之性。鬼祆滅爽，生生蒙化治之仁。澤被鳶魚，惠孚草木。變幽關之刀劍，鬱鬱春林。化冥路之炎涼，遲遲溫圃。千靈有喜，一炁無私。則上明天尊大慈之化，下副臣等皈命之誠，謹啓以聞。

舉願

存神燒香

香官使者，左右龍虎君，侍香諸靈官，當令臣晚朝行道之所，自然生金液丹碧芝英，百靈衆真交會，在此香火爐前。令臣學道得道，求仙得仙，齋主受福，幽顯沾恩，十方仙童玉女，侍衛香煙，傳臣向來所啓之誠，速達徑御太上無極大道至真玉皇上帝御前。

出堂頌

回靜默

謝師

回向

靈寶領教濟度金書卷一百二十五

靈寶領教濟度金書卷之一  
百二十六

洞微高士開光救苦真人甯全真授  
靈寶通玄弘教水南先生林靈真編

科儀立成品

度星齋用

謝恩醮儀

衆官序立

陞壇如式

燒香頌

各禮師存念如法

衛靈呪

五星列位，煥鎮五方。始皇護魂，丹老衛形。皓靈侍魄，黑帝攝生。中央黃帝，統御萬真。元皇誥下，幽夜開光。罪消北府，名列南昌。金籙定籍，玉字除殃。朱陵煉質，飛神太蒼。三官九府，無極神鄉。普受開度，上生天堂。和：與道合真。

鳴法鼓二十四通

無上三天玄元始天炁太上老君，召出臣等身中三五功曹，左右官使者，侍香金童，傳言散花玉女，五帝直符，直日香官，各三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今設醮謝恩，燒香行道。願得玉清道炁靈寶妙光下降，流入臣等身中。令臣所啓之誠，速達徑御太上無極大道至真玉皇上帝御前。

請稱法位

具位臣某，與臨壇官衆等，謹同誠上啓太上無極大道虛無自然元始天尊，太上道君靈寶天尊，太上老君道德天尊，玉皇大天尊玄穹高上帝，紫微中天北極大帝，紫微上宮天皇大帝，南極長生大帝，東極青華大帝，九天生神上帝，三十二天上帝，五靈五老大帝，日宮太陽帝君，月府太陰皇君，五方五德星君，南斗六司星君，北斗九皇星君，天罡大聖，節度奎光帝君，二十八宿星君，天曹諸司真君，天地水三官大帝，三洞四輔經籙法科上聖高真，神仙將

吏，五嶽五帝，洞天福地靖廬治化仙

官，本靖祖玄真師，經籍度師列位真人，城隍社令，地水職司，三界官屬，一切威靈。臣聞一炁凝精，御洪鈞而朗照。三靈孕粹，開鰲極以恢張。帝江鑿混沌之根，聖海鼓洪濛之運。昭昭臨下，敷化育於陰陽。赫赫受中，稟生成於經緯。與無聲無臭而並立，秉有物有則以咸資。道大難明，功高莫極。今醮官某鋪張祕範，疏瀹塵襟。崇榆柳槐杏之壇，已承洪渥。秩蘋蘩蘊藻之席，更露丹衷。庶以謝而以祈，式可羞而可薦。欲望龍旂鳳葆，翩翩齊下於玄虛。鸞輅虬輪，縹緲均臨於碧落。十極之風驟混合，八紘之月駟周流。乘梵炁以彌羅，企靈光而流演。臣無任激切，望恩之至，謹稽首再拜奉請。

### 請聖

三界衆真，醮筵列聖，適伸拜請，諒沐光臨，請各整於仙班，共祗迎於帝馭。

### 降九位

鸞輿至止，鶴駕臨軒，與醮衆真，如儀朝禮。朝禮既周，請陞醮席，醮官上香

設拜，初進酒。

### 初獻

具位臣某，謹重誠上啓三清上聖，十極高真，玄穹之帝座師尊，洞府之真仙主宰，醮筵內外一切真靈。臣聞始青變化，煥靈寶之神功。大赤飛玄，耀真元之聖治。玉字開光於龍漢，金書敷妙於鶴鳴。教雨膏濡，溥八紘而躋壽域。德風鼓動，合九壘而登春臺。皆綱紀於清微，用權衡於紫極。無所不度，有感皆通。臣等四象陶形，九霄孕炁，學真宴坐，敢修獨善之功。領教行持，誓勵同仁之力。凡有投告，敢不關聞。齋意青詞，謹當宣奏。

### 宣詞

按如詞旨，備殫素衷。以今齋主某，心軫陰靈，情鍾陽眷。念夜臺寥泬，未清注訟之塵。致夏屋團欒，莫備復連之垢。祈恩惠澤，均被慈光。庸宣藥笈以皈神，肅建芝壇而請命。期涓穀旦，齋按度星。懺宿釁於十華，輅新釐於三寶。曲蒙善應，用副真忱。玉札開幽，冀提魂於黑府。金符委炁，復鍊魄

於朱宮。既往承雨露之恩，見在徯慈

風之被。茅茨不剪，重罄折以秩瓊章。黍稷非馨，庸翹傾而臨寶座。既初忱之已肅，故終惠之敢祈。伏願龍仗傾光，鸞旂駐景。不在大不在小之咎，悉冀海涵。無私覆無私載之恩，亶祈河潤。庶令存亡而皆泰。均俾幽顯以沾恩。臣下情無任，虔禱之至。

### 亞獻

臣謹重誠上啓聖位。臣聞無聲無臭，昭視聽之自民。有翼有嚴，覺禍福之由己。鳳渥期敷於方澤，蟻忱盍籲於玄虛。重念亡故某，萬炁飛奔，百神披散。六因十習，既感召於業根。五苦三塗，悉顛冥於畏境。冀拜天關之厚德，獲離地禁之深冤。伏願宴坐青華，棲真碧漢。超恩愛網，毋延累於凡居。出煩惱輪，祈圓成於勝果。陟翠騫而問道，入珠黍以聞經。悉契真常，免罹劫運。次願齋主某，簾櫳日麗，院宇春酣。紫炁玲瓏，散千灾於已往。神煙馥郁，迎百福於方來。椿萱崇不老之年，蘭桂耀長新之景。歲功七十二候，常沐

繁釐。道炁百千萬重，永膺純嘏。無蟲臂鼠肝之微慮，有龍鱗鳳翼之光榮。陰陽免寇於福田，公私俱安於壽域。祖玄超邁，永無考對之憂。眷屬和寧，自在幽閑之樂。鎮鐵簡而故炁飛遁，佩金符而新社來翔。慶藹絲蘿，懽騰桑梓，人所欲者，天必從之。臣等綴武鴛班，承顏獅座。慮過彰於丹憲，或塵冒於玄儀。亶賴聖明，曲矜愚魯。玄風丕振，帀九極以飛騰。聖日昭融，布八遐而彩煥。上願二儀呈晏，三景開明，薦時雍於卿雲，耀大和於甘露。重輪重暈，祥光照圓蓋之中。同軌同文，耀煥遍方輿之上。岡鳳鳴而朝多吉士，流鴈集而野乏饑民。庭宇謳歌，鞠圓扉之青草。里閭絃誦，靜方域之綠林。動植均被於生生，飛潛溥成於化化。寒庭春到，夜壑朝輝，永孚經緯之靈，咸登陰陽之運。臣下情不勝虔禱之至。

### 終獻

啓聖。臣聞至敬無文，僭露葵傾之愫。大禮必簡，庸伸芹獻之儀。曲承小物

之不違，允藉大鈞之有造。以今香殘玉篆，燭散金輝，銅烏沉夜漏之聲，玉蟾散霄輝之影。前瞻翠節，將返景於霄衢。後從珠旛，漸迴光於輦路。諸天復位，三界回班。臣等迹履塵闈，躬辭聖陛。肘行膝步，莫攀法從之光華。目迴心馳，惟企恩波之浩蕩。臣下情不勝虔禱之至，謹稽首再拜奉送。

存神燒香

迴輶頌

送聖

靈寶領教濟度金書卷之一百二十六

## 靈寶領教濟度金書卷之一百二十七

洞微高士開光救苦真人甯全真授靈寶通玄弘教水南先生林靈真編

### 科儀立成品

度星齋用

### 官將幕三獻儀

洒淨

稱法位

具位姓某，謹焚香上啓上清紫庭院斷注陳將軍，斷尸葛將軍，九天甘露將，補炁將，護命將，三十二員大將，守護銅牛鐵簡官將吏兵，本靖主將副將，護道監壇諸大將，日直功曹，當境土地，里域真官，齋主家土地司命六神，一切威靈。伏以臨下昭昭，仰神功之羅絡。受中翼翼，本祖炁之恢張。自混沌日鑒於天機，故鴻濛風瀉於地網。民情欲壽，多罹黑鬱之辜。帝心同仁，遂設紫庭之局。布慈雲而開生塞死，鼓法

雨而反陰旋陽。爲苦海之舟航，作迷塗之燈火。今齋主某伏爲某，期微純嘏，爲解復連。金馬朝馳，已進朱函之禱。玉龍夕迅，諒飛丹簡之嚴。申飭威靈，丙宣德惠。茲恪陳於菲禮，庸少致於葵忱。伏望旌鉞前驅，翩翩來下，旂旄後從，赫奕齊臨。鑒萬一之真忱，副再三之精禱。某不勝虔祝之至，謹當奉請。

請神

初獻

伏以紫極恩隆，布德曲周於綱紀。玄曹望峻，宣仁弘贊於權衡。洪惟聰明睿知之崇，誕著文武聖神之妙。玉清輔化，肅劍佩而振蕩乾坤。金闕承符，擁旄麾而動搖山嶽。秋殺雷轟於陰魅，春生日耀於陽靈。寅亮天工，裁成帝政。今齋主某建某齋，業輪展轉，有注訟之徵呼。愛網交周，或考殃之流逮。三彭遨遊而伺釁，二豎陸梁以乘危。害結家庭，禍連姻黨。培銅牛而標鐵簡。恭按瓊科。奔金馬而進琅函，欣承玉敕。期關宣於威令，庸斷絕

於復連。將欲行持，先伸召役。僭寓粟絲之敬，惠徼海岱之恩。伏願俯鑒樽罍，曲歆籩豆。馨符明德，莫殫庸敬之神交。享契克誠，庶罄協恭而絜合。儀不及物，情見乎辭。某不勝虔祝之至，謹陳亞獻。

亞獻

伏以函三凝粹，最靈標處一之奇。得一分靈，爲貴表並二之妙。出青入玄，啓天關而御景。迴黃抱紫，開地域以離塵。生滅本無，去來何有。奈六賊搶攘於神舍，致五官溷溺於靈臺。遽操入室之戈，貪欲恣性。孰執破關之斧，恩愛謀生。忽四大之各離，驚九泉之莫返。不思解脫，惟極沉迷。是以碧落流慈，紫虛垂憫。敷度星之玉典，弘滅罪之瓊科。俾已往飛霄，獲逍遙而離夜。庶見存宴景，俱安樂以乘晨。今齋主某，上叩蒼穹，下敷玄澤，願威靈之密贊，期神聖之潛扶。稽首清微，遵虛無自然元尊之教。傾心紫禁，乘節度奎光大帝之威。靈光混合於華燈，正炁貫通於彩縷。玉符保命，和陰陽

而榮衛安康。金簡藏形，扶榦枝而精神泰定。六遁七隱於華蓋，千和萬合於泥丸。凡斯精微，亶依甄別。所冀炁辟斥，納庭戶之祥光。故炁消除，來門闌之瑞色。耄倪均享於安樂，尊卑咸底於康榮。分人鬼以斷復連，別幽明而截流逮。倘違霄律，徑送酆刑。庶彰有造之仁，永被無爲之化。拳拳心禱，切切神依。某不勝虔祝之至，恭陳終獻。

終獻

以今玉醴三周，瓊章四奏。既蟻忱之畢露，諒鴻渥之克孚。願駐檐帷，暫留幕帟，候宣行於妙化，潛扶翊於玄功。帝有恩言，已拜降祥之賜。神無曠職，當昭遷賞之常。某不勝虔祝之至。

向來頌

關祝神燈儀

步虛

洒淨

伏以煙凝華蓋，篝飛蘭篆之花。霧藹霄虛，玉鼎舞芝煤之彩。丹誠鬱勃，玄貺羅敷。先炷寶香，供養太上無極大

道三清上聖，十極高真，東方蒼龍，角、亢、氏、房、心、尾、箕七宿星君，南方朱雀，井、鬼、柳、星、張、翼、軫七宿星君，西方白虎，奎、婁、胃、昂、畢、觜、參七宿星君，北方玄武，斗、牛、女、虛、危、室、壁七宿星君，中斗勾陳，魁、魼、魍、魍、魍七宿星君。仗此寶香，普

同供養。伏聞百千萬重，道炁彌羅於八陞。三十五分，靈光洞煥於九垓。周黃道以幹神機，拱紫垣而孚靈澤。函三臨下，既昭命蒂以凝精。得一受中，斯保生根而孕粹，自天和之流蕩，致人僞之奔馳。不思養炁御神，始繫七星之妙合。遂使離真喪本，終隨六賊之玄迷。陰夜倏淪，陽神斯滓。心繫骨肉，流殃注以無終。惟戀姻親，致復連而莫已。故上聖示紫庭之典，令下愚遵玉匱之條。矜往憐存，爲降天元之正炁。濟今度古，俾除地禁之游氛。丹有徵呼，永行繼絕。今齋主某勤拳請命，激切投誠。遡列宿以鳧趨，望中樞而虎拜。燈然寶燭，依稀梵唱之飛揚。罪滅金科，彷彿羽章之激響。

恭願灾凶退舍，福祿臨門。長幼咸寧，襲祥光之動靜。尊卑泰定，遏故炁於起居。衍百世以蕃昌，合九親而輯睦。先亡超邁，後裔綿延。稽首皈依無極大道。

福生無量天尊

臣等志心皈命，蒼龍東井，角、亢、氏、房、心、尾、箕七宿星君，星中神仙。和：諸靈官。

伏聞蒼龍垂象，流靈炁於肝魂。碧落凝芒，嘯神津於皮爪。惟六鑿奮搶攘之變，故百關虧恬淡之常。凋瘵斯彰，復連攸啓。今有齋主某建某齋，斷絕復連，超升往逝。故遵玉範，肅建燈壇。皈命東方角、亢、氏、房、心、尾、箕七宿星君。伏願炁風清，考殃雲散，神扶步武，四時開壽域之春。天賦精神，五世衍福庭之旦。宗親宴喜，眷序和平。稽首皈依，虔誠讚詠。

信禮高上太虛天東方七宿星君。

焚符

角亢氏房，心連尾箕。位司震域，職贊坤輿。領兵九萬，隊仗前驅。流殃注

毒，古埋伏尸。星光所指，立即勦除。臣今皈命，願降神威。和：斷絕復連。

福生無量天尊

臣等志心皈命，朱雀南斗，井、鬼、柳、星、張、翼、軫七宿星君，星中神仙。和：諸靈官。

伏聞朱雀垂象，流正炁於心精。丹藹凝華，嘯神津於毛髮。惟三業逞紛紜之擾，故七官迷真粹之和。顛頓既彰，復連攸萃。今有齋主某建某齋，斷絕復連，超升往逝。故遵玉範，肅建燈壇。皈命南方井、鬼、柳、星、張、翼、軫七宿星君。伏願流逮無虞，徵呼克絕。天開地闢，常凝和氣於門庭。日居月諸，永殄憂氛於眷序。四魔煙滅，萬礙雲臻。稽首皈依，虔誠讚詠，信禮高上太虛天南方七宿星君。

焚符

井鬼柳星，張翼軫星。垂象離方，太陽之精。領兵三萬，受任玉清。徵呼豕訟，遏人年齡。光輝下照，隨即摧傾。臣今皈命，斷絕復連。和：願保康寧。

福生無量天尊

臣等志心皈依，白虎西斗，奎、婁、胃、昂、畢、觜、參七宿星君，星中神仙。和：諸靈官。

伏聞白虎垂象，流靈氣於音聲。素靄凝華，哺神津於肺魄。惟六欲恣飄流之苦，故五官荒保御之奇。沈迷斯彰，復連攸啓。今有齋主某建某齋，斷絕復連，超升往逝。故遵玉範，肅建燈壇。皈命西方奎、婁、胃、昂、畢、觜、參七宿星君。伏願毒根疾除，注芽隨萎。雲籠宗戚，簾櫳融樂事之多。日永姻親，庭院茂懽聲之洽。常居吉慶，永殄凶災。稽首皈依，虔誠讚詠，信禮高上太虛天西方七宿星君。

焚符

奎婁胃昂，畢宿觜參。流輝照西，萬神所欽。領兵七萬，佐助天心。伏尸故炁，病鬼妖淫。星光所指，何敢克當。臣今皈依，享福何窮。和：願保康寧。

福生無量天尊

臣等志心皈依，玄武北斗，斗、牛、女、虛、危、室、壁七宿星君，星中神仙。和：諸靈官。

伏聞玄武垂象，流正炁於腎精。黑靄凝華，哺靈津於齒骨。惟八識恣奔馳之擾，致六淫亂清淨之源。殄瘁斯彰，復連攸染。今有齋主某建某齋，斷絕復連，超升往逝。故遵玉範，肅建燈壇。皈命北方斗、牛、女、虛、危、室、壁七宿星君。伏願考逮不生，注殃無染。一真呈露，門庭曉拂於光風。萬妄消澄，眷序秋迎於霽月。松蘿同慶，桑梓均懽。稽首皈依，虔誠讚詠，信禮高上太虛天北方七宿星君。

焚符

斗牛女虛，危宿室壁。位列坎方，贊司神極。五億萬丘，飛戈飄戟。故炁流殃，承光永釋。律令所加，罔有拒逆。臣今皈依，願降神力。和：願保康寧。

福生無量天尊

臣等志心皈依，勾陳中斗魁、魁、魍、魍、魍七宿星君，星中神仙。和：諸靈官。

伏聞勾陳垂象，流靈炁於股經。黃靄凝華，哺神津於脾意。惟五蘊縱纏縈之害，故百骸失澄湛之玄。冥晦斯彰，

復連攸逮。今有齋主某建某齋，斷絕復連，超升往逝。故遵玉範，肅建燈壇。皈命中央魁、魁、魍、魍、魍七宿星君。伏願絕逮沉凶，除殃斷注。行住坐卧，永居夏屋以渠渠。出入起居，常陟春臺而侃侃。姻親冥樂，院宇澄寧。稽首皈依，虔誠讚詠，信禮高上太虛天中央七宿星君。

焚符

魁魍魍魍，魍魍魍星。位司中極，部領天兵。一十二萬，隊仗紛紜。復連故炁，流注家門。星光所指，永滅無存。臣今皈依，願保長生。和：斷絕復連。

福生無量天尊

誦大聖北斗七元君  
能解復連厄四十九遍  
行持

伏以七星介祉，降真炁於五方。五斗扶衰，襲華芒於七舍。離玉緯之升沉，橐籥，皆金經之隱見綱維。稟精炁以流形，既資變化。保沖和而固命，宜藉生成。況正炁煥爛於朝陽，而邪炁零灑於曉露。依科辟斥，如律告行。仰

憑神運之靈，敢忘聖恩之謝。臣向來奉爲某，宣行祕訣，關祝神燈。請降星真，斷除注逮。荷垂鑒映，克獲圓成。中垣輝斥絕之威，九光下照。外舍奮驅除之武，萬象旁臨。伏願齋主某，視履相權，淳熙自樂。庭戶斥陰陽之寇，起處優游。宗親逃經緯之虞，公私迪泰。克臻家慶，永際昌和。爲如上緣，志心稱念，

福生無量天尊

五方懺儀

入壇如式

東方

臣等今故燒香，皈身皈神皈命東方九炁天君，青龍東井角、亢、氏、房、心、尾、箕七宿星君。懺悔亡故某，稟命以來，賦形之後，五靈降炁，七星哺津。不能貴炁養神，尊生保命。流吹慾海，飄浪愛河，三業六情，顛冥忘返。致使愆書黑簡，過紀玄曹，不盡天年，遽罹地禁，冥冥長夜，解脫無期。因今燒香修齋，轉經行道。伏願青帝九炁天君，斗中衆聖，上告三天三十六曹典戶長侯，監

生舍人，左右司命。依女青詔書，敕下東方風雷之獄，泰山考對之府。拔度亡故某，洗濯魂儀，赦除愆對，不經幽暗，長處光明，衣食自然，形神俱妙，復連斷絕，考注消平，利佑見存，常蒙貞吉。得道之後，升入無形。和：與道合真。

南方

臣等今故燒香，皈身皈神皈命南方三炁天君，朱雀南斗井、鬼、柳、星、張、翼、軫七宿星君。懺悔亡故某，稟命以來，賦形之後，五靈降炁，七星哺津，不能貴炁養神，尊生保命。流吹慾海，飄浪愛河，三業六情，顛冥忘返。致使愆書黑簿，過紀玄曹，不盡天年，遽罹地禁，冥冥長夜，解脫無期。因今燒香修齋，轉經行道。伏願赤帝三炁天君，斗中衆聖，上告三天三十六曹典戶長侯，監生舍人，左右司部。依女青詔書，敕下南方火翳之獄，衡山考對之府，拔度亡故某，洗濯魂儀，赦除愆對，不經幽暗，長處光明，衣食自然，形神俱妙，復連斷絕，考注消平，利佑見存，常蒙貞吉。

得道之後，升入無形。和：與道合真。

西方

臣等今故燒香，皈身皈神皈命西方七炁天君，白虎西斗奎、婁、胃、昴、畢、觜、參七宿星君。懺悔亡故某，稟命以來，賦形之後，五靈降炁，七星哺津，不能貴炁養神，尊生保命。流吹慾海，飄浪愛河，三業六情，顛冥忘返。致使愆書黑簿，過紀玄曹，不盡天年，遽罹地禁，冥冥長夜，解脫無期。因今燒香修齋，轉經行道。伏願白帝七炁天君，斗中衆聖，上告三天三十六曹典戶長侯，監生舍人，左右司命。依女青詔書，敕下西方金剛之獄，華山考對之府。拔度亡故某，洗濯魂儀，赦除愆對，不經幽暗，長處光明，衣食自然，形神俱妙，復連斷絕，考注消平，利佑見存，常蒙貞吉。得道之後，升入無形。和：與道合真。

北方

臣等今故燒香，皈身皈神皈命北方五炁天君，玄武北斗斗、牛、女、虛、危、室、壁七宿星君。懺悔亡故某，稟命以來，



受形之後，五靈降炁，七星哺津，不能貴炁養神，尊生保命。流吹慾海，飄浪愛河，三業六情，顛冥忘返。致使愆書黑簿，過紀玄曹，不盡天年，遽罹地禁，冥冥長夜，解脫無期，因今燒香修齋，轉經行道。伏願黑帝五炁天君，斗中衆聖，上告三天三十六曹典戶長侯，監生舍人，左右司命。依女青詔書，敕下北方溟泠之獄，恒山考對之府。拔度亡故某，洗濯魂儀，赦除愆對，不經幽暗，長處光明，衣食自然，形神俱妙，復連斷絕，考注消平，利佑見存，常蒙貞吉。得道之後，升入無形。和：與道合真。

### 中央

臣等今故燒香，皈身皈神皈命中央一十二炁天君，勾陳中斗魁、魁、魁、魁、魁、魁、魁七宿星君。懺悔亡故某，稟命以來，賦形之後，五靈降炁，七星哺津，不能貴炁養神，尊生保命。流吹慾海，飄浪愛河，三業六情，顛冥忘返。致使愆書黑簿，過紀玄曹，不盡天年，遽罹地禁，冥冥長夜，解脫無期。因今燒香修

齋，轉經行道。伏願黃帝一十二炁天君，斗中衆聖，上告三天三十六曹典戶長侯，監生舍人，左右司命。依女青詔書，敕下中央四維九幽之獄，嵩山考對之府。拔度亡故某，洗濯魂儀，赦除罪對，不經幽暗，長處光明，衣食自然，形神俱妙，復連斷絕，考注消平，利佑見存，常蒙貞吉。得道之後，升入無形。和：與道合真。

### 舉法事

靈寶領教濟度金書卷一百二十七

## 靈寶領教濟度金書卷之一

### 百二十八

洞微高士開光救苦真人甯全真授  
靈寶通玄弘教水南先生林靈真編

### 科儀立成品

度星齋十回度人道場

### 第一時升壇儀

靜默堂序立

華夏引至師前

參幕

旋遶

入都門

入地戶

入天門

上十方香

上天寶臺香

燒香頌

三皈依

啓白

具位臣某，恭焚寶香，供養奏啓太上無

極大道虛無自然元始天尊妙無上帝，太上玉晨虛皇大道君妙有上帝，萬變混沌玄元老君混元上德皇帝，高上玉皇大帝，十方無極太上靈寶天尊，三寶丈人，三寶天君，五方五老上帝，三十二天上帝，木公尊神，金母元君，上聖高尊，諸天真衆，太陽、太陰、五星道君，主算、記名、落死、上生、大魁五斗星君，護魂、侍魄、養炁、通血、中主五帝真君，諸天丞相，南昌上官韓司主錄監生大神，度人不死尊神，南極長生大君，度世司馬大神，好生韓君丈人，南上司令、司錄、延壽、益算、度厄尊神，迴骸起死無量度人君，玄中大法師，三天大法師，天真皇人，妙行真人，玄一三真人，太極太虛真人，太極左宮仙翁沖應真人，三界五帝大魔王，十方無極飛天神王，長生大聖，無量度人君，飛天神人，飛天使者，飛龍騎吏，玄都紫微上官侍經玉郎、玉童、玉女、神仙、靈官，靈寶經籍度三師真人，名山洞府領教真仙，三十二天玉童玉女、功曹使者，左右龍虎君，三界直符使者，四直

玉文功曹，玄壇內外一切威靈。臣聞赤明開圖，耀虛無之祖炁。清微啓運，敷靈寶之神功。御浮黎而山林緬平，駐騰勝而風雲藏靜。翠鸞霄映，十華振響於靈風。珠黍空浮，萬類觀瞻於聖日。二章煥希夷之旨，三篇彰微妙之音。玄之又玄，八緯回靈而道備。上極無上，七經御景以仙飛。符雌雄混合之功，契陰陽生成之妙。振玉音於節候，凝金丹於卦爻。辟斥六天，檢鬼營而嚴攝。開明九地，遡帝所以升遷。家國咸資，幽明均賴。聖修凡誦，成種種之禎祥。灾消害禳，顯巍巍之功德。無文不度，有感斯通。今齋主某，伏爲亡故某，崇建十迴度人道場。祈仗真乘，普消妄業，其諸情悃，已錄奏聞。今當肅款玄壇，恭邀清侶。敷十華之盟信，遵三籙之威儀。異口同音，咸潔縹於慧性。調聲正氣，均疏淪於塵襟。洞朗玉章，鋪張瓊範。伏願紫虛鬱秀，碧落空歌。開紫微典禁之藏，容其嘯咏。啓瓊闕飛天之衛，許以宣揚。雲鏞奏而焚唱凌空，玉磬調而步虛駕景。

聲聞五億，響徹三千。即使亡故某，耳聽天音，身清地累。生善心而歸仰，滅罪性以超凌。眇眇高飛，泛九清之道炁。勃勃俱入，離五濁之根塵。毫光瞻白玉之輝，妙相覲紫金之瑞。南宮度命，北鬱刊名。無去無來，步武克超於碧漢。不生不滅，形神徑上於朱陵。普拯陰關，均超陽境。臣不勝激切，望恩之至。

宿命贊

玄蘊呪

仰惟靈寶本章，有諸天內音之微妙。洞玄上品，著百魔隱韻之希夷。功加而天地咸寧，慈周而死生蒙惠。巍巍大梵，赫赫深仁。以今奉爲某，崇建十迴度人道場。臣等職在宣揚，理宜修奉，合遵依於玉訣，庸開啓於琅函。期周十過，以召十方。一乘該貫，俾度三途，而超三界，萬劫逍遙。敢乞衆聖下觀，諸天遙唱。生成道備，符始青出教之玄。體用仁周，契大赤垂科之妙。露丹忱於素表，沛洪澤於青符。封菲不遺，仰藉生生之大德。芻蕘可聽，願

殫翼翼之小心。稽首皈依無極大道。

### 舉三啓頌第一首歸位

臣聞上無復祖，超三極以包羅。中有度人，集萬真而校錄。仰玄元之臣澤，沛靈寶之弘功。欲藉提携，敢忘修誦。今有齋主某，崇建十迴度人道場，資度亡故某，普及幽明，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特爲係薦亡靈，落滅夙劫以來，上犯東方無極世界一切玄司，陽罪陰愆，悉令消蕩。離風雷之苦趣，登惠靜之樂鄉。仰冀隆慈，俯垂淵鑒，清衆運誠，平坐如法。

### 平坐讚

### 請轉寶經

### 舉寂寂至無宗

### 經題

### 轉經畢

### 度人無量天尊

仰惟三寶高尊，十華上聖，曲回鑒映，克副傾投。臣向來奉爲亡故某，普及幽冥，冤親平等。轉誦《太上洞玄靈寶無

量度人上品妙經》。落滅夙今所犯東方無極世界一切玄司，陽罪陰愆，悉令清蕩。人各一過，咸已周圓。伏願蒼藹流晶，青華御炁。惡根風散，削死籍於陰都。善藥雲敷，注生名於陽界。旁資品物，並受生成。爲如上緣，請聖作證。

### 舉大步虛一首過東方

### 舉臣衆等 宣懺

### 宣表 關發

### 靈符赦罪天尊

某重誠上啓東方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道場。依按經科，頒宣符命，告下東方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私，一如浮黎侍座之時，無忘元始度人之訓。嘯命飛天使者，承領白簡金馬。驛呈如律宣行，普垂開度。庶得冥曹敬聽，鬼官披承，永停霹靂之威，徑上太清之界。某不勝虔祝，恭俟恩榮，所有真符，謹當

### 宣告。

### 宣符 宣關

### 飛空步虛頌

### 出堂頌

### 第二時升壇儀<sup>①</sup>

### 入壇同前式

### 燒香頌

### 舉三啓頌第二首歸位

臣聞開明三景，分妙化於天根。周迴十方，耀真光於梵炁。仰玄元之臣澤，弘靈寶之深仁。欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特爲係薦亡靈，落滅宿劫以來，上犯南方無極世界一切玄司，陽罪陰愆，悉令消蕩。離火翳之苦趣，登端化之樂鄉。仰冀隆慈，俯垂淵鑒，清衆運誠，平坐如法。

### 平坐讚 請轉寶經

### 誦經畢

### 度人無量天尊

仰惟三寶高尊，十華上聖，曲回應感，願賜證明。臣等向來奉爲亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯南方無極世界一切玄司，陽罪陰愆，悉令清蕩。人各一過，咸已周圓。伏願朱火刊圖，丹陵定錄。黑編削過，離溟漠以逍遙。紫簡書名，登虛無而快樂。恩資動植，澤被飛潛，爲如上緣，請聖作證。

舉大步虛第二首詣南方

舉臣衆等

宣懺

宣表

關發

靈符赦罪天尊

某重誠上啓南方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道場。依按經科，頒宣符命，告下南方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私。一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣

行，普垂開度。得冥曹敬聽，鬼官披承，永停炮烙之威，徑上大丹之界。某不勝虔祝，恭俟恩榮，所有真符，謹當宣告。

宣符

宣關

飛空步虛頌 出堂

度人無量天尊

舉三啓頌第三首歸位

臣聞普告三界，除罪簿以超凌。歷關諸天，絕地根而保舉。仰玄元之巨澤，弘靈寶之深仁。欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特爲係薦亡靈，落滅夙劫以來，上犯西方無極世界一切玄司，陽罪陰愆，悉令消蕩，離金剛之苦趣，登利益之樂鄉。仰冀隆慈，俯垂淵鑒，清衆運誠，平坐如法。

平坐讚

請轉寶經

誦經畢

度人無量天尊

仰惟三寶高尊，十華上聖，曲回應感，普賜證明。臣等向來奉爲亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯西方無極世界一切玄司，陽罪陰愆，悉令清蕩。人各一過，咸已周圓。伏願瑤圃登玄，金門宴景。一真開悟，凝定水於靈臺。萬妄虛融，摧業山於幽壘。群靈舞手，萬類懽顏，爲如上緣，請聖作證。

舉步虛第三首詣西方

舉臣衆等

宣懺

宣表

宣關

靈符赦罪天尊

某重誠上啓西方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道場。依按經科，頒宣符命，告下西方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵鑒無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣

行，普垂開度。庶得冥曹敬聽，鬼官披承，永停考掠之威，徑上太素之界。某不勝虔祝之至，恭俟恩榮，所有真符，謹當宣告。

宣符 宣關

飛空步虛 出堂

度人無量天尊

### 第三時升壇儀

入壇同前式

燒香頌

舉智慧頌第一首歸位

臣聞中理五炁，期保命以成真。上開八門，冀生身而受度。仰玄元之巨澤，沛靈寶之弘功。欲藉提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一遍。特為係薦亡靈，落滅夙劫以來，上犯北方無極世界一切玄司，陽罪陰愆，悉令消蕩，離溟泠之苦趣，登救度之樂鄉。仰冀隆慈，俯垂淵鑒，清衆運城，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯回應感，曲賜證明。臣等向來奉為亡故某，普及幽冥，冤親平等。轉誦《太上洞玄靈寶無量度人上品妙經》。落滅夙今所犯北方無極世界一切玄司，陽罪陰愆，悉令清蕩。人各一過，咸已周圓。伏願黑鬱消愆，玄臺煥渥。冤書風散，除簡對以高躋。生籍天開，乘飈輪而上邁。澄清五道，澤潤群生，為如上緣，請聖作證。

舉步虛第四首詣北方

舉臣衆等

宣表

靈符赦罪天尊

某重誠上啓北方無極飛天神王，長生大聖，無量度人君。伏望慈悲，俯垂洞鑒。以今奉為齋主某，崇建十迴度人道場。依按經科，頒宣符命，告下北方無極世界一切玄司，超度亡故某，普及幽冥，冤親平等。原赦夙愆，出離苦趣。

欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停凜冽之威，徑上太玄之界。某不勝虔祝，恭俟恩榮，所有真符，謹當宣告。

宣符 宣關

飛空步虛頌 出堂

度人無量天尊

舉智慧第二首歸位

臣聞元綱流演，普迴度於五常。梵炁彌羅，實開張於萬範。仰玄元之巨澤，沛靈寶之弘功。欲藉提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一遍。特為係薦亡靈，落滅夙劫以來，上犯東北方無極世界一切玄司，陽罪陰愆，悉令清蕩，離鑊湯之苦趣，登長樂之福鄉。仰冀隆慈，俯垂淵鑒，清衆運誠，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯回應感，曲賜證明。臣等向來奉爲亡故某，普及幽冥，冤親平等。轉誦《太上洞玄靈寶無量度人上品妙經》。落滅夙今所犯東北方無極世界一切玄司，陽罪陰愆，悉令清蕩。人各一過，咸已周圓。伏願玄梵流華，蒼旻委炁。鸞圖紀善，辭夜壑之幽寥。鶴赦疏恩，登晨垓之煥爛。恩周三極，惠澤九幽，爲如上緣，請聖作證。

舉步虛第五首詣東北方

舉臣衆等

宣懺

宣表

宣關

靈符赦罪天尊

某重誠上啓東北方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道場。依按經科，頒宣符命，告下東北方無極世界一切玄司，超度亡故某，普及幽冥，冤親平等。原赦夙愆，出離苦

趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永離煮瀆之威，徑上始青之界。某不勝虔祝。恭俟恩榮，所有真符，謹當宣告。

宣符

宣關

飛空步虛頌 出堂

度人無量天尊

第四時升壇儀

升壇同前式

燒香頌

智慧頌第三首歸位

臣聞拔出地戶，離鬼關以更生。無拘天門，朝帝鄉而飛度。仰玄元之巨澤，沛靈寶之深仁，欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特爲係薦亡靈，落滅夙劫以來，上犯東南方無極世界一切玄司，陽罪

陰愆，悉令清蕩，離銅柱之苦趣，登碧霞之樂鄉。仰冀隆慈，俯垂淵鑒，清衆運誠，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯垂應感，曲賜證明。臣等向來奉爲亡故某，普及幽冥，冤親平等。轉誦《太上洞玄靈寶無量度人上品妙經》。落滅夙今所犯東南方無極世界一切玄司，陽罪陰愆，悉令清蕩。人各一過，咸已周圓。伏願紫極垂祥，綠羅煥渥，銅關摧毀，開風澤之陰幽。玉札羅敷，躋雲層之陽梵。生成庶類，化育群昌，爲如上緣，請聖作證。

舉步虛第六首過東南

舉臣衆等

宣懺

宣表

宣關

靈符赦罪天尊

某重誠上啓東南方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道

場。依按經科，頒宣符命，告下東南方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停火焰之威，徑上始丹之界。某不勝虔祝，恭俟恩榮，所有真符，謹當宣告。

宣符

宣關

飛空步虛頌 出堂

度人無量天尊

智慧頌第四首歸位

臣聞五文開廓，遂普植於群生。十轉迴靈，可齊仙於萬炁。仰玄元之巨澤，弘靈寶之深仁。欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特為係薦亡靈，落滅夙劫以來，上犯西南方無極世界一切玄司，

陽罪陰愆，悉令消蕩，離屠割之苦趣，登耀真之樂鄉。仰冀隆慈，俯垂淵鑒，清衆運誠，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯垂應感，曲賜證明。臣等向來奉為亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯西南方無極世界一切玄司，陽罪陰愆，悉令清蕩。人各一過，咸已周圓。伏願天闕超神，月庭御景。祥煙塞死，除罪簿以焚如。慶雲開生，注福編而蔚若。普辭有漏，均證無為，如上良緣，請聖作證。

舉步虛七首詣西南方

舉臣衆等 宣懺

宣表 關發

靈符赦罪天尊

某重誠上啓西南方無極飛天神王，長生大聖，無量度人君。伏望慈悲，俯垂洞鑒。以今奉為齋主某，崇建十迴度人道

場。依按經科，頒宣符命，告下西南方無極世界一切玄司，超度亡故某，普及幽冥，冤親平等。原赦夙愆，出離鬼趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停割切之威，徑上始素之界。某不勝虔祝，恭俟恩榮，所有真符，謹當宣告。

宣符

關發

飛空步虛頌 出堂

度人無量天尊

第五時升壇儀

入壇同前式

燒香頌

智慧頌第五首歸位

臣聞巍巍大梵，鼓萬化以周流。落落高張，幹五篇而獨運。仰玄元之巨澤，弘靈寶之深仁。欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦

《太上洞玄靈寶無量度人上品妙經》，人各一過。特為係薦亡靈，落滅夙劫以來，上犯西北方無極世界一切玄司，陽罪陰愆，悉令消蕩，離火車之苦趣，登妙道之樂鄉。仰冀隆慈，俯垂淵鑒，清衆運誠，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯回應感，曲賜證明。臣等向來奉為亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯西方無極世界一切玄司，陽罪陰愆，悉令清蕩。人各一過，咸已周圓。伏願碧落開光，朱陽委照，六塵披散，辭金剛之神鄉。十善昭明，朝太華之帝所。陰靈利樂，陽曜輝澄，為如上緣，請聖作證。

舉步虛第八首過西北方

舉臣衆等 宣懺

宣表 宣關

靈符赦罪天尊

某重誠上啓西北方無極飛天神王，長生大聖，無量度人君。伏望慈悲，俯垂洞鑒。以今奉為齋主某，崇建十迴度人道場。依按經科，頒宣符命，告下西北方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停刀輪之威，徑上始玄之界。某不勝虔祝，恭俟恩榮，所有真符，謹當宣告。

宣符 宣關

飛空步虛頌 出堂

度人無量天尊

智慧頌第六首歸位

臣聞無幽無影，凝道炁於洪濛。若存若亡，昭天光於混洞。仰玄元之巨澤，弘靈寶之深仁。欲望提携，敢忘修誦。今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦

《太上洞玄靈寶無量度人上品妙經》，人各一過。特為係薦亡靈，落滅夙劫以來，上犯上方無極世界一切玄司，陽罪陰愆，悉令消蕩，離普掠之苦趣，登紫霄之樂鄉。仰冀隆慈，俯垂淵鑒，清衆運誠，平坐如法。

平坐讚 請轉寶經

誦經畢

度人無量天尊

仰惟三寶高尊，十華上聖，俯回應感，曲賜證明。臣等向來奉為亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯上方無極世界一切玄司，陽罪陰愆，悉令清蕩。人各一過，咸已周圓。伏願丹禁頒符，紫微煥令。北都部衛，停萬劫之冤輪。南上超凌，享億齡之福運。仁敷飛躍，恩被幽明，為如上緣，請聖作證。

舉步虛第九首過上方

舉臣衆等 宣懺

宣表 宣關

靈符赦罪天尊



某重誠上啓上方無極飛天神王，長生大聖，無量度人君。伏望慈悲，俯垂淵鑒。以今奉爲齋主某，崇建十迴度人道場。依按經科，頒宣符命，告下上方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停考對之威，徑上虛無之界。某不勝虔祝，恭俟恩榮，所有真符，謹當宣告。

宣符

宣關

飛空步虛頌

出堂

度人無量天尊

第六時升壇儀<sup>⑤</sup>

入壇同前式

燒香頌

智慧頌第七首歸位

臣聞衆真侍座，感一國以聞經。諸天臨軒，檄三元而定錄。仰玄元之巨澤，弘靈寶之深仁。欲望提携，敢忘修誦。

今有齋主某，崇建十迴度人道場，超度亡故某，普及幽冥，冤親平等。臣等謹率見前清衆，升壇行道，燒香散花，轉誦《太上洞玄靈寶無量度人上品妙經》，人各一過。特爲係薦亡靈，落滅夙劫以來上犯下方無極世界一切玄司，陽罪陰愆，悉令消蕩，離無間之苦趣，登水蓮之樂鄉。仰冀隆慈，俯垂淵鑒，清衆運誠，平坐如法。

平坐讚

請轉寶經

誦經畢

度人無量天尊

仰惟三寶高尊，十華上聖，俯回應感，曲賜證明。臣等向來奉爲亡故某，普及幽冥，冤親平等。轉誦《太上洞玄靈寶無量度人上品妙經》，落滅夙今所犯下方無極世界一切玄司，陽罪陰愆，悉令清蕩，人各一過，咸已周圓。伏願圓蓋流輝，方輿被澤。龍符照地，洗宿債以冰清。鳳詔頒天，戴新釐而日皎。有情均慶，無識同亨，爲如上緣，請聖作證。

舉步虛第十首詣下方

舉臣衆等

宣懺

宣表

關發

靈符赦罪天尊

某重誠上啓下方無極飛天神王，長生大聖，無量度人君。伏望慈悲，俯垂洞鑒。以今奉爲齋主某，崇建十迴度人道場。依按經科，頒宣符命，告下下方無極世界一切玄司，超度亡故某，普及幽冥，冤親平等。原赦夙愆，出離苦趣。欲望慈觀有造，淵聽無私，一如浮黎侍坐之時，無忘元始度人之訓。嘯命飛天使者，承領白簡金馬，驛程如律宣行，普垂開度。庶得冥曹敬聽，鬼官披承，永停囚禁之威，徑上太黃之界。某不勝虔祝，恭俟恩榮，所有真符，謹當宣告。

宣符

關發

飛空步虛頌

出堂

度人無量天尊

舉智慧頌第八首歸中

結經

臣某謹重誠上啓三清上聖，十極高真。願賜慈悲，俯垂洞鑒。臣聞迴骸起死，

金剛承湛露之恩。監真度生，玉隆溥慈雲之潤。開瓊顏而妙感，振玉韻以迴旋。生成密契於玄黃，十華慶會。化育潛敷於幽顯，萬品周圓。死魂飛五戶之幽，生魄升八門之廓。天昭瑞應，地耀祥符，實三洞之根宗，為九清之柱石。鋪張奚極，讚詠難容。臣向來奉為某，崇建十迴度人道場。祇率見前清衆，升壇行道，燒香散花，轉誦《太上洞玄靈寶無量度人上品妙經》。莫不

澡雪五關，澄虛百體，肅精炁神而朗詠，攝身心口以歌揚。威儀自然，經已周於十過。存念如法，誠惟罄於一忱。玄符召制於十方，白簡開明於九壘。功德具足，科禁周圓。當願亡故某，普及幽冥，冤親平等。聽天音之琅琅，發神輝之爍爍。法橋穩駕，超苦海之層瀾。道岸先登，越愛河之濁浪。累劫之愆尤風釋，千生之冤債冰清。乘靈寶光，即逍遙於樂界。悟玄元道，疾出入於福鄉。永無輪轉之期，常享太平之運。齋主某精神松茂，步武椿榮。注訟煙收，集祥光於庭宇。考殃雲散，融

瑞炁於門闌。膺鼎新革故之華，享否去泰來之樂。權騰蘭桂，慶藹松蘿，垂詩禮之芳猷，宴琴書之樂事。蒙如丹禱，允荷玄恩，稽首皈依，聞經讚詠。

三聞經

靈寶領教濟度金書卷之一百二十八

①②③④⑤儀：底本無此字，依卷首目錄補。

靈寶領教濟度金書卷之一

百二十九

洞微高士開光救苦真人甯全真授  
靈寶通玄弘教水南先生林靈真編

科儀立成品

度星齋用

真靈醮儀

燒香頌

各禮師存念如法

衛靈

鳴法鼓二十四通

發爐

請稱法位

具位臣某，謹重誠上啓。臣以宿慶攸鍾，獲逢昌運，瑤圖琅簡，身佩心修。未能結友空山，餐和鍊景，相期高蹈，遊宴虛無，尚履塵寰，與時俯仰。駒陰暗老，動冒玄章，曲荷慈觀，密加涵育。山立班著，奏對宸嚴，激越寸衷，岱溟無斃。凡有投告，敢不關聞。臣昨為齋

主某，崇建十迴度人道場。宣賴天恩，慶成釐事。輒修菲醮，庸致微忱。敢冀飈旂，俯垂鑒映。臣誠惶誠恐，稽首頓首，再拜奏請。

臣謹奉降

太上無極大道虛無自然元始天尊，太上大道君，太上老君，十方靈寶天尊，三寶丈人，三寶天君。伏乞應感分輝，降臨醮座。

臣謹奉降

昊天玉皇上帝，紫微大帝，天皇大帝，五方五老上帝，三十二天上帝，四梵天君，木公金母，諸天衆聖，天真大神，上聖高尊。伏乞應感分輝，降臨醮座。

臣謹奉降

太陽、太陰、五星道君，五斗星君，二十八宿星君，南斗六司真君，北斗七元真君，璇璣玉衡周天星象。伏乞應感分輝，降臨醮座。

臣謹奉降

諸天承相，南昌上宮韓司主錄監生大神，度人不死尊神，南極長生大君，度世司馬大神，好生韓君丈人，南上司命

司錄延壽益算度厄尊神，迴骸起死無量度人君。伏乞應感分輝，降臨醮座。

臣謹奉降

青帝護魂君，白帝侍魄君，赤帝養炁君，黑帝通血君，黃帝中主君，五天五帝大魔王，三界大魔王，十方無極飛天神王，長生大聖，無量度人君，飛天神人，飛天使者，飛天騎吏。伏乞應感分輝，降臨醮座。

臣謹奉降

三十六部尊經、玄都紫微上宮侍經玉郎、玉童、玉女、典禁、靈妃、神仙、騎吏，三洞威神，三寶官屬。伏乞應感分輝，降臨醮座。

臣謹奉降

玄中大法師，三天大法師，天真皇人，妙行真人，玄一三真人，太虛真人，太極左宮仙翁，沖應真人，名山洞府領教真仙，得道聖衆，本靖祖玄真經籍度三師真人。伏乞應感分輝，降臨醮座。

臣謹奉降

靈寶三十二天玉童、玉女、功曹、使者、直符、香官，五方五靈、玉童、玉女，諸

天飛龍騎吏，三洞天地神真，日月星宿、江河湖海、嶽瀆九宮五帝、兵馬乘騎。伏乞應感分輝，降臨醮座。

臣謹奉降

靈寶領仙監齋諸君吏，六部治職仙官，赫奕仙曹，施用仙曹，三界所向仙曹，仙靈官吏，伏乞應感分輝，降臨醮座。

臣謹奉降

靈寶玄壇香官使者，左右龍虎君，四直玉文功曹，三界直符使者，直壇土地，虛空監察，應感真靈。伏乞應感分輝，降臨醮座。

初獻

臣謹重誠上啓。臣以緣會天開，依光紫極，授法初志，金石微盟。弘道度人，終天無怠，叨恩領教，激越寸衷，職守所縻，敢云瘳曠。今有齋主某，情鍾天屬，痛軫亡靈，四大各離九原，長往羅鄩泉曲。幽路冥關罔測，升沉懼罹憲網。非憑洪造，曷克超凌。伏聞靈寶本章，洞玄上品，惠周幽顯，萬道之宗。十遍周迴，生成數備，迴骸起死，白骨成人。冀按科儀，曲垂援拯。臣等澡澄

一念，率勵衆官，嚴潔瑤壇，鋪張玉幣，法天象地，呼陰召陽，吟詠琅函，宣揚瓊範，經周十遍，科按六時，白簡開幽，金符度命，功圓果滿，魔試不干。春到寒庭，陽回夜壑，靈光明耀，祖炁彌羅，鬱絕風輪，俄成道境，十華鼓舞，喜慶難言。帝力巍巍，神功蕩蕩，戴銜徒劇，環草莫酌。改藉包荒，僭修淪祭。蘋蘩可薦，黍稷非馨。有翼有嚴，凌兢萬坐。伏願高真月鑒，列聖時歆，曲采丹青，俯原凌躡，亶垂終惠，普濟存亡。臣不勝虔祝之至。

亞獻

臣謹重誠上啓。伏以視聽自民，禍福由己。叩關哀籲，既罄忱恂。丹絳昭回，諒蒙善應。今玄壇所度亡靈，承恩紫闕，超迹黑單，聽法參真，聞經悟道，千生際遇，踊躍弗緩。更冀敕制地祇，疾除罪簿，制魔保舉，魂度朱陵，受化更生，超凌三界，千冤解釋，萬罪清夷。惠藹三途，澤覃六道，火山息焰，冰池靜波，劍變騫林，刀化玉樹，飛輪停運，飄戟摧鋒，水絕盟言，地除簡對。寒林

滯魄，曠野窮魂，動植飛潛，胎卵濕化，均離惡業，共證生方。更願地紀安寧，天圖朗晏，星宿輝潤，風雨調平，河洛昭符，山川效順，物無疵癘，塞絕烽煙，衆賢和朝，三農樂野，玄綱丕闡，道化興行。蒙如懇祈，恪昭感應，臣不勝虔祝之至。

終獻

宣都疏

臣謹重誠上啓。以今香殘蘭篆，燭暗蓮輝，璧磬收聲，瓊鍾息響，道還金闕，經入琅函，十極傾光，諸天復位，寂無所寂，玄之又玄。臣等迹返凡籠，身辭聖陛，靈光煒燁，攀戀無階。臣下情無任激切之至，謹稽首再拜奉送。

舉願

復爐

迴軒頌

出堂頌

十方懺儀

東方

臣等今故燒香，皈身皈神皈命，仰謝東方無極太上靈寶天尊，九炁青天太清玄元無上三天無極大道太上丈人，天

帝君，上皇老人，三十九真，七十二聖，九老仙都君，高玄真君，九炁丈人，始生青真，東華玉真，高晨大道君，司馬上相青童君，元老九玄主仙真人，無鞅數衆，百千萬重道炁，千二百官君，太清玉陛下青宮九炁五門神仙，四司真人，諸天至極上聖大神，俯謝地司東鄉無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結東方九幽長夜之府，魂繫東鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下東方三官九署百二十曹，宿世罪根，咸與落滅。青天司命，注上生名。飛度南宮，永辭北府。不經輪轉，衣食自然。見在懽榮，普天康泰。得道之後，升入無形。和：與道合真。

南方

臣等今故燒香，皈身皈神皈命，仰謝南方無極太上靈寶天尊，三炁丹天太清南極皇上老君，洞靈玉帝，上元禁宮三

炁丈人，始老玄真，萬福君，萬福丈人，赤帝丹靈高仙高真，諸天至極上聖大神，俯謝地司南鄉無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結南方九幽長夜之府，魂繫南鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下南方三官九署百二十曹，宿世罪根，咸與落滅。丹天司命，注上生名。飛度南宮，永辭北府。不經輪轉，衣食自然。得道之後，升入無形。和：與道合真。

#### 西方

臣等今故燒香，皈身皈神皈命，仰謝西方無極太上靈寶天尊，七炁素天太清西華高上皇帝，太靈元始老君，始老先生，太素三元君，金闕七寶後聖帝君，主仙丈人，太和玉女，西靈金母，白帝高仙，四極真人，諸天至極上聖大神，俯謝地司西方無極世界、五嶽四瀆神仙至真。懺悔亡故某，普及幽明，冤親

平等。積劫循環，歷生報對，六根三業，五欲七情，陰過陽愆，日增月累，罪結西方九幽長夜之府，魂繫西鄉諸大地獄之中。苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下西方三官九署百二十曹，宿世罪根，咸與落滅。素天司命，注上生名。飛度南宮，永辭北府。不經輪轉，衣食自然。得道之後，升入無形。和：與道合真。

#### 北方

臣等今故燒香，皈身皈神皈命，仰謝北方無極太上靈寶天尊，五炁玄天太清太上高皇五帝，虛皇道君，太上老君，太上丈人，太上大道玉晨君，北極真公，萬聖道主，太陰真人，妙行真人，太陰司命，典死錄籍君，注算司馬，總司主煞大神，太皇真人，神仙玉女，北方無極世界一切神仙，俯謝地司北方無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結北方九幽長夜之

府，魂繫北鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下北方三官九署百二十曹，宿世罪根，咸與落滅。玄天司命，注上生名。飛度南宮，永辭北府。不經輪轉，衣食自然。見在懽榮，普天康泰，得道之後，升入無形。和：與道合真。

#### 東北方

臣等今故燒香，皈身皈神皈命，仰謝東北方無極太上靈寶天尊，東北方始蒼天太清無極虛無自然大道至真上聖，靈寶始青老君，九靈先生，玉華真人，萬帝高真，諸天至極上聖諸神，制靈賢都統神人，萬度萬生君，皇上元老君，真人玉女，俯謝地司東北鄉無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結東北方九幽長夜之府，魂繫東北鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下東北方

三官九署百二十曹，宿世罪根，咸與落滅。梵天司命，注上生名。飛度南宮，永辭北府。不經輪轉，衣食自然，見在懽榮，普天康泰。得道之後，升入無形。和：與道合真。

東南方

臣等今故燒香，皈身皈神皈命，仰謝東南方無極太上靈寶天尊，東南方始丹天太清洞極虛無自然至玄道君上聖，靈寶始丹赤陽元老君，南極老子，太和先生，三靈玄上萬福皇老丈人，丹靈高皇，太陽真人，好生度命司馬，玄真三元君，紫宸大道君，南明洞靈虛皇道君，朱宮赤精，南宮司命，四極真人，諸天至極上聖尊神，俯謝地司東南鄉無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結東南方九幽長夜之府，魂繫東南鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下東南方三官九署百二十曹，宿世罪根，

咸與落滅。梵天司命，注上生名。飛度南宮，永辭北府。不經輪轉，衣食自然，見在懽榮，普天康泰。得道之後，升入無形。和：與道合真。

西南方

臣等今故燒香，皈身皈神皈命，仰謝西南方無極太上靈寶天尊，西南方始素天太清無極元皇真君，至真上聖，太靈虛皇，靈寶始素老君，洞虛太陽尊神，俯謝地司西南鄉無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結西南方九幽長夜之府，魂繫西南鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下西南方三官九署百二十曹，宿世罪根，咸與落滅。梵天司命，注上生名。飛度南宮，永辭北府。不經輪轉，衣食自然，見在懽榮，普天康泰。得道之後，升入無形。和：與道合真。

西北方

臣等今故燒香，皈身皈神皈命，仰謝西北方無極太上靈寶天尊，西北方始玄天尊上元皇道君，九天元虛洞寶太上真老君，無量大華靈寶始玄老君，至真上聖，靈寶尊神，俯謝地司西北方無極世界、五嶽四瀆神仙至真。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結西北方九幽長夜之府，魂繫西北鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下西北方三官九府百二十曹，宿世罪根，咸與落滅。梵天司命，注上生名。飛度南宮，永辭北府。不經輪轉，衣食自然，見在懽榮，普天康泰。得道之後，升入無形。和：與道合真。

上方

臣等今故燒香，皈身皈神皈命，仰謝上方無極太上靈寶天尊，太上無形無名無頂無極至真太上帝，太上無形無名天尚父，元始天王，元始丈人至真，靈寶洞玄太上元靈老君，無極大聖至真

諸君丈人，諸天至極上聖尊神。懺悔亡故某，普及幽明，冤親平等。積劫循環，歷生報對，六根三業，五欲七情，陰過陽愆，日增月累，罪結上方九幽長夜之府，魂繫上鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下上方三官九府百二十曹，宿世罪根，咸與落滅。梵天司命，注上生名。飛度南宮，永離北府。不經輪轉，衣食自然，見在懽榮，普天康泰。得道之後，升入無形。和：與道合真。

下方

臣等今故燒香，皈身皈神皈命，仰謝下方無極太上靈寶天尊，已得道大聖衆，至真尊神，無極大道下方玄黃洞玄靈寶高皇，九土四司五帝，十二仙君，太靈皇母，四司真人后土，九地元皇九君，四瀆五嶽佐命十仙，儲佐丈人，三十六洞天、七十二福地、三百六十名山、二十四治化真人，九江四海十二溪真，靈洞山澤一切神仙至真。懺悔亡故某，普及幽明，冤親平等。積劫循環，

歷生報對，六根三業，五欲七情，陰過陽愆，日增月累，罪結下方九幽長夜之府，魂繫下鄉諸大地獄之中，苦惱備嬰，莫由解贖。因今轉經行道，懺悔首陳。伏冀上聖矜憐，列真開宥，告下下方三官九署百二十曹，宿世罪根，咸與落滅。梵天司命，注上生名。飛度南宮，永離北府。不經輪轉，衣食自然，見在懽榮，普天康泰。得道之後，升入無形。和：與道合真。

出堂如式

靈寶領教濟度金書卷之一百二十九

靈寶領教濟度金書卷之一

百三十

洞微高士開光救苦真人甯全真授  
靈寶通玄弘教水南先生林靈真編

科儀立成品

度星齋用

經法煉度儀

靜默堂序立

贊引至壇前

設鍊度醮

贊引升座

祝香

具位小兆臣某，謹焚香再拜，奏啓虛無自然元始天尊，虛皇玉晨大道君，萬變混沌玄元老君，高上玉皇大帝，運明保元青玄上帝，南極真王朱陵大帝，元陽慈父，九微太真木公尊神，九光玄女，紫微元靈金母尊神，無上三十二天上帝，十方飛天神王，長生大聖，無量度人君，南昌上宮朱陵火府真宰，諸天丞相，妙行真人，度人不死尊神，南極長

生大君，度世司馬大神，好生韓君丈人，迴骸起死尊神，青帝護魂君，白帝侍魄君，赤帝養炁君，黑帝通血君，黃帝中主君，靈寶度人無鞅真衆，北魔大神王，非魔大神王，靈魔大神王，制魔大神王，太玄大魔王，三界大魔王，五帝大魔王，靈虛仙曹衆真，監度司，敕制地祇司，斷地逮役司，十二河源司，上解祖考司，疾除罪簿司，落滅惡根司，不得拘留司，時刻升遷司，北都寒池司，部衛形魂司，度品南宮司，死魂受鍊司，仙化成人司，生身受度司，隨劫輪轉司，永度塗苦司，超凌三界司，逍遙上清司，欣慶受度司，歷關諸天司，請滅三惡司，斬絕地根司，飛度五戶司，名列大玄司，魔王監舉司，無拘天門司，青帝護魂司，白帝侍魄司，赤帝養炁司，黑帝通血司，黃帝中主司，萬神無越司，擲火萬里司，明檢鬼營司，普受開度司，死魂生身司，身得受生司，名度南宮司，魔王保舉司，飛升太空司，過度三界司，魔王敬形司，拔出地戶司，七祖升遷司，永離鬼官司，

魂度朱陵司，受鍊更生司，普度天人司，大勳保舉司，無所不度司，玄局主宰，內外應感真靈，願運慈悲，俯垂鑒映。臣聞七部流光，靈寶扇慈風於夜壑。三天御運，虛皇舒慧日於昏衢。金真明化育之仁，玉匱溥生成之德。巍巍妙道，拯提北鬱之群靈。蕩蕩神功，橐籥南陵之二炁。皈依有自，覆幬無邊。伏念臣緣運天來，希夷師授。三田九室，學真紹運於東華。八緯四玄，領教承流於西極。拊煙霞而自樂，傲泉石以怡神。風靜雲藏，湛見玉清之境。龍吟虎嘯，密凝金鼎之胎。精神肯逐於紛葩，步武甘同於象罔。惟立功而度無間，帝有恩言。敢自足而守空山，律存至戒。凡伸哀籲，合爲關聞。以今奉爲齋主某，克卜今宵，奉宣冶鍊。欲望傾光迴駕，監真度生。羽蓋瓊輪，駐景清虛之上。丹與綠輦，凝玄碧落之中。指揮東井之仙靈，策役南昌之官吏。容臣恭依師範，密運神功。提鬱儀，携結璘，降英華而膏沐。挹方諸，映陽燧，藉精神以陶鎔。庶俾

正度亡靈，洗滌塵根，圓明正性。一得永得，克離三十六壘之幽深。六塵不塵，徑陟八十一天之寥廓。副齋主皈依之悃，遂微臣開度之忱。臣不勝懇禱之至。

平坐讚

上清靈寶玄壇，焚香關啓：朱陵火府，南昌上宮，流火神庭，黃華東井，流汨西池，主鍊真靈，主水大將軍，水沼神將，水沼童子，黃華玉女，石景水母，十二河源大將，主火大將軍，火池神將，火池童子，火鈴靈童，九光仙吏，擲火萬里大將，鍊度合局應感威靈。願遵玉敕，蒞止玄壇，化景分輝，宣通役使。伏聞三洞開圖，玉匱啓度人之典。千官轉極，玄曹揚濟物之仁。惟朱陵鍊度之司，實清微化育之任。我以夙因慶幸，妙旨修持。金液鍊形，受炁幸符於子午。玉華散景，坐忘嘉運於乾坤。既膺濟度之權，盍贊生成之德。以今奉爲齋主某，克取今宵，奉行鍊度。瞻茲逝魄，孰非祖炁之分靈。忽墮幽途，忍使天元之喪本。已荷帝師之廣運，



更資聖力之溥施。隨我神機，廓彼妙化。五龍橐籥，黃華飛東井之精。九鳳徘徊，炎光射南閭之炁。水上火下而虎龍混合，陰升陽降而烏兔飛奔。爲洗滌於根塵，更陶鎔於冤垢。形成神而神成炁，飛步紫清。散成炁而聚成人，遊行霄極。體天尊大慈之化，副齋主真切之忱。各運神功，當局行事。

度人無量天尊三聲

衆誦大行梵炁至諸天臨軒三遍

咨爾真靈，隨我神運，變化水池，蕩滌亡靈，鍊形濯質。

侍職捧水，洒水池

衆誦中篇

焚建水池符

靈池無鏡，神龍之淵。運東井華，以滌幽魂。攬姿運容，太和流津。玄和玉女，灌之于神。

焚降真水符

東井黃華，玄龍飛津。蕩滌幽魂，灌塵淪形。玉清仙將，服御華新。上承帝敕，降炁鍊神。石景水母，流汨之英。

焚真水合同符

太陰正炁，壬癸流精。上接東井，下注八冥。蘭池混合，玄英至靈。天漿潤洒，華景鮮澄。

度人無量天尊

咨爾真靈，隨我神運，變化火池，陶冶亡靈，鍊神返炁。

侍職捧水洒火池

衆誦中篇

焚建火池符

南方天真，火府大神，降炁變易，流火神庭。亡魂鍊質，逍遙上清。金光煥落，玉眸回形。

焚降真火符

赫赫妙府，南上將軍。丹天流化，降御神庭。主宰鍊魂，表裏清明。炎池崇景，換育胎嬰。陶冶萬翳，結仙固精。

焚真火合同符

陽精凝化，一炁合陳。九鳳翔舞，炎煙散新。陶魂鍊魄，符契融神。天光下照，妙合儀璘。

度人無量天尊

引旛壇前立

水火變鍊，形神疾證於朱宮。劫石轉

輪，冤業慮存於黑府。欲期超度，先盍解除。亡故某涉迹世緣，縈心俗網，有形有累，寧無舉動之非彝。謀身謀家，易致運爲之背正。上則九玄七祖之冢訟，外則三生四負之冤仇，名書考校之曹，過紀憲章之格。倘不經於和釋，必有累於超凌。庸按金科，誕敷玉篆。陰關幽域，既無考對之虞。坎粹離精，可受陶鎔之樂。仰惟大道，同賜證明。

焚解先世家訟符

太上符命，普告十方。先亡冤債，冢訟興殃。乘惡流注，魂墮幽鄉。鐵圍銅鎖，萬劫無光。今日受度，同登吉昌。

焚解身後冤業符

冤對惡業，罪累相縈。九幽五苦，八難沉零。仇讎執對，展轉無停。神符一下，爲友爲朋。齊同慈愛，異骨成親。

焚解生前呪詛符

陰暗漸萌，呪詛神靈。受冤含苦，終天莫伸。元始有敕，玉符紫文。普爲解釋，曲赦冤親。同生福鄉，永與道并。

焚解宿今罪簿符

天地陰陽，日月星辰。光明照耀，幽夜

春新。疾除罪簿，焚化爲塵。曹局停閑，亡爽升真。北都寒池，萬劫慈氛。豕訟消平，冤仇和釋，呪詛頓解，罪簿疾除。可謂一身優游，萬緣空寂。天和內映，自然嘯傲於虛無。人僞外除，指日夷猶於寥廓。宜受鍊度，庸助超升，請肅威儀，恭行科法。

度人無量天尊三聲

咨爾真靈，部衛亡故某，隨我神運，右赴水池受鍊。

焚水鍊符

北方之君，水府之精。辰星使者，壬癸將軍。玄武陰神，肅肅清音。五行造化，萬物發生。天帝有敕，使者須聽。攝召亡魂，灌鍊身形。

焚黃華蕩形符

金體玉津，森羅淨霑。玄龍灌溉，百關澄清。滌垢豁塵，萬炁齊新。育鍊華池，真源自澄。

焚月簡符

太陰含化，八景齊臨。玄老祕諱，結璘通明。璇璣運轉，招真合靈。陰光降炁，變鍊鬼魂。天漿下注，流燭利貞。

焚十二河源符

崑崙高映，上接天津。流演六合，羅絡支分。石景水母，東井澄奔。舒光萬里，瓊華瀉傾。濯鍊亡魂，淪妄還嬰。出死入生，精神潔清。金精飛化，玄華散靈。

焚水鍊變仙符

金晶石景，日月合靈。三奇凝光，四象中盈。甲乙木孕，丙丁火成。庚辛金冶，壬癸水形。戊己中土，白元無英。桃康司命，太乙返生。會合自然，上造芝庭。

焚魂度朱陵符

紫元黃華，陰炁固凝。蘭湯沐陶，形魂潔清。九陽齊化，飛登朱陵。永度三塗，五苦超凌。遂遙太無，洞觀長生。

度人無量天尊三聲

咨爾真靈，部衛亡故某，隨我神運，左赴火池受鍊。

焚火鍊符

南方之君，赤帝之精。熒惑使者，丙丁將軍。朱雀陽神，赫赫乾英。五行造化，萬物發生。天帝有勅，使者須聽。

攝召亡魂，陶鍊身形。

焚玉眸鍊質符

同炁濯魂，金晶通明。四象成真，丙丁鍊神。閻浮玉詵，洞妙自真。陶鑄塵翳，飛步南辰。

焚日簡符

鬱儀鍊化，妙朗陽精。炎熾丹天，晃耀朱陵。冶鍊離貞，配合日星。玄幽那漠，萬焚敷陳。流鍊死魂，上造日庭。

焚擲火萬里符

擲火萬里，流鈴八衝。朱光激耀，洞煥玄空。炎炎陽燧，上混丹宮。瓊霞彌布，紫煙奔風。降炁流鍊，妙合神功。金華洞照，玉眸易容。升都宣化，安坐蓮宮。

焚火鍊變仙符

朱明上景，火鍊合真。二七飛化，仙度成人。丙丁招儀，壬癸揖璘。龍契甲乙，虎混庚辛。中黃戊己，帝一元君。官府通徹，周布百神。配合自然，飛步玉宸。

焚死魂受鍊符

南離委炁，結貞飛輪。炎神之精，大陽

流煙。火鍊金冶，清淨死魂。萬炁回靈，飛行瓊軒。洞觀帝鄉，乘運高奔。

度人無量天尊

引旛居中

咨爾真靈，部衛亡故某，隨我神運，迴尸起死，結炁成神。

焚元君鍊身符

三才兆質，二炁乘天。布化鍊胎，百關備仙。九魂儲精，藏府周全。太一司命，桃康合延。長生大君，無英白元。統御我身，飛度丹天。

焚受鍊更生符

南陵丹天，黃華神庭。鍊質冶炁，朗耀流英。故爽受化，返胎更生。出入福鄉，飛翔太靈。天地有終，根源無傾。

焚仙化成人符

幽爽遐歸，陰魄沉淪。不遇陽光，鐵圍無春。元始鍊化，北斗南辰。尸垢斷除，塵翳離真。即得返形，炁聚成人。

焚迴骸起死符

元始玉符，萬里散輝。骨朽重榮，肉腐攝歸。迴黃轉紫，萬神攸依。逍遙人天，舉形仙飛。不墮苦輪，朱紱羽衣。

焚無量度人符

元尊慧日，流照重泉。故爽新識，萬罪俱蠲。普攝普度，疾駕飛駟。遊行自在，上征瓊軒。曲觀九壘，道炁彌綸。

焚中理五炁符

業氛蒙真，昏翳飛揚。五行蕩失，棄離天常。帝君品命，五神鎮陽。理炁攝生，百骸吉昌。迴生起死，混合神光。

焚混合百神符

金樓玉室，百神所居。惡根衝激，萬炁散殊。迴風混合，瓊煙含虛。會萬歸一，司命流珠。舉形寶仙，宴景帝廬。

度人無量天尊

臣謹上啓：青帝護魂君，白帝侍魄君，赤帝養炁君，黑帝通血君，黃帝中主君，仰冀慈觀，特垂洞鑒。伏聞五靈列位，司金木水火土王之權。百體成神，賴魂魄炁血中主之造。惟應度之亡爽，幸承恩而鍊形。行脫塵蹤，上躋仙域。然念離真喪本，形骸久滯於幽陰。今期起死成人，神炁必資於生化。非繇橐籥，曷遂返還。望普運於慈悲，冀曲施於覆幬。庶正度某，魂寧魄靜，炁

定血舒。百骸混凝，化胎仙而妙合。三宮潤澤，復祖炁以輝華。稽首皈依，恭祈玄應。

度人無量天尊三聲

謹請青帝護魂君，東方無英制魂少陽木精歲星之炁，納化亡故某身中，以處肝木。神九人，神吏九千人，主治其中，衛護三魂，外潤皮膚毛髮，仙化成人。

焚護魂符

東望重拜手，蒼帝玉皇君。靈風鼓橐籥，育物布元春。靈龍轡嚴駕，玉衛擁瓊輪。枯萌汎沾及，大惠無不均。萬仙歌以道，委曲戒天人。心根迷自固，拱跪戴洪仁。

謹請白帝侍魄君，西方白元營魄金精太白之炁，納化亡故某身中，以處肺金。神七人，神吏七千人，主治其中，侍衛七魄，外潤筋骨牙齒，仙化成人。

焚侍魄符

六甲抱金闕，七政守靈壇。流鈴擲火化，威劍巨龍蟠。邈彼素靈真，明憲孰敢干。束制祆鬼魔，凜落霄風寒。診

炁既已息，萬天俄而安。真儔荷天庇，抵賴相歌歡。

謹請赤帝養氣君，南方太一司命太陽火精熒惑之炁，納化亡故某身中，以處心火。神三人，神吏三千人，主治其中，養護衛炁，外潤耳目鼻口，仙化成人。

### 焚養炁符

太景開玉樞，洞堂啓金除。騫林蔭瑤砌，丹鸞蹈瓊珠。寶房名曲麗，明堂神所居。飛遊豁雲道，引日盼真都，天日永不夕，重煙鎖清廬。太上敕印開。帕几羅簡書。裊風樹玄化，慇懃諒有餘。

謹請黑帝通血君，北方桃康納晶太陰水精辰星之炁，納化亡故某身中，以處腎水。神五人，神吏五千人，主治其中，流通榮血，外潤孔竅精神，仙化成人。

### 焚通血符

天質統有物，淵兮上帝心。不啓不發道，蘊妙化機深。恐爾漏未盡，陰想勿侵淫。輪轉無涯波，苦道相迷尋。萬

年常謹約，一旦自湮沉。無沖落鬼境，殃遣不可任。

謹請黃帝中主君，中央黃常化靈君，中和土精鎮星之炁，納化亡故某身中，以處脾土。神一十二人，神吏一萬二千人，主治其中，萬炁長存，百神混合，內外翁冥，返胎復嬰，上朝帝君。

### 焚中主符

萬天拱中宸，控駕玉化根。翹機貫億曆，洞朗闢四門。太有混皇真，糾制星宿魂。非帝道不運，有方賴之存。威忿即霜和，和煦爲陽春。生成握元紀，仰荷載無垠。

### 度人無量天尊

亡故某鍊除宿垢，蕩滌根愆，假五帝之靈光，復一元之精粹。陰和陽合，氣備神全。回思塵境之纏縈，一笑不直。注意太羅之清淨，三界超凌。可謂萬劫因緣，一朝際遇，徑道遙於無上，永飛步於太空。本司領教度人，合行保舉，敢有遏截，束送羅酆。一如元始度人律令。

發勅制地祇，發普告三界。

發元始符命，發歷關諸天。

### 度人無量天尊

臣謹上啓無上三十二天上帝，恭望天慈，曲垂省覽。臣聞旋斗歷箕，梵炁彌羅而罔外。分精布化，仁恩曠蕩以無邊。睠茲亡靈，幸陶帝貺。受二炁之密鍊，承五帝之靈光。全性復神，發符保舉，行升金闕，上侍玉虛。顧惟歷關之司存，允屬帝師之主宰。盍伸奏告，宣仗維持。降妙炁以淨其根塵，布神輝以清其結習。俾扶搖而直上，徑快樂於虛玄。臣下情不勝俟命之至。

### 度人無量天尊

謹上請太黃皇曾天紫微宮黃色元陽之炁下降，爲所度亡靈，淨一欲根，歷關天中，度命登真。

### 焚符

梵行冠大羅，淳風抗玄紀。無形有常存，觀世翻然理。屢踐不終劫，探幽度生死。三乘通便路，清虛無塵滓。長夜息對魂，地獄五苦解。劍樹不搖條，刀山不傷體。門有浩劫公，地無天年子。今日慶斯會，諸天並歡喜。不勝

情欣悅，高唱稽首禮。

謹上請太明玉完天紫房宮綠色上陽之  
炁下降，爲所度亡靈，淨二欲根，歷關  
天中，度命登真。

焚符

宴景玉完上，遊輪躑玄都。逍遙大明  
中，長燈煥翠羅。靈風拂重雲，龍阜鬱  
嵯峨。上有飛天人，羽衣互紛葩。下  
有龍漢民，皆是浩劫家。五道息對魂，  
九幽罷三途。天馬運東井，長源無巨  
沙。不聞孤魂聲，俱作興樂歌。斯樂  
今無極，當奈來運何。

謹上請清明何童天元晨宮青色太陽之  
炁下降，爲所度亡靈，淨三欲根，歷關  
天中，度命登真。

焚符

無色何童上，梵元理太清。華綺麗玉  
京，黃雲纏四駟。紫林翠南阜，颺風振  
朱瓊。鳳嘯長夜開，十轉九幽明。鳥  
毋遏天河，龍負寒井餅。五道絕對根，  
三塗不羈兵。迴旗徵天魔，黃幡校北  
營。洞章度幽魂，三界無謠聲。上有  
福德堂，下有更生形。是爲元始法，妙

哉空洞經。喜慶稽首誦，高唱歡萬齡。

謹上請元胎平育天元景宮赤色青陽之  
炁下降，爲所度亡靈，淨四欲根，歷關  
天中，度命登真。

焚符

平育抗三曾，迴神度十方。上披長夜  
戶，下朗九幽房。苦魂乘慶歸，飛行入  
福堂。山無對怨人，但有浩劫公。元  
始迴玉駕，黃旗名靈風。掃除五道場，  
緣對乘運通。飛天並歡樂，慶我長生  
宮。

謹上請元明文舉天廣寒宮蒼色洞陽之  
炁下降，爲所度亡靈，淨五欲根，歷關  
天中，度命登真。

焚符

圓網儻空洞，紫輪偉玉庭。文舉敷丹  
暉，三便理玉清。離羅耀長庚，九夜煥  
高明。三界無死魂，億劫皆成靈。巍  
巍十聖公，焚行飛天經。一誦諸天禮，  
十轉枯骨生。七玄昇朱宮，享福入無  
形。  
謹上請上明七曜摩夷天太陰宮黑色通  
陽之炁下降，爲所度亡靈，淨六欲根，

歷關天中，度命登真。

焚符

乘晨遊三素，高奔日月宮。七曜煥上  
清，鬱儀晞琳房。消魔非洞友，結璘爲  
我朋。迴度十天人，齊啜飛華煌。朝  
餐五雲炁，夕噲三晨光。摩夷元世界，  
偏無五道場。億劫並皇民，稱爲福德  
堂。

某重誠上啓欲界大魔王，惟願不捨慈  
悲，曲垂拯濟。俾所度亡靈，過度欲  
界，免試其身。飛空之音，謹當讚詠。

焚符即合麼符

誦第一界魔王章

度人無量天尊三聲

謹上請虛無越衡天太無宮碧色建陽之  
炁下降，爲所度亡靈，淨一羸塵，歷關  
天中，度命登真。

焚符

虛無焚大羅，飛網儻天關。推度總元  
紀，四炁晝夜分。九會非常運，號曰越  
衡門。天地理自之，歡樂豈常存。此  
爲福德界，自生不惡根。奈何來運促，  
代謝不齊辰。慶今悼來生，故誦哀樂

文。

謹上請太極濛翳天元都宮紫色極陽之  
炁下降，爲所度亡靈，淨二麤塵，歷關  
天中，度命登真。

焚符

濛翳煥重虛，曜靈映朱扉。三十二天  
童，錦帔飛青衣。把旛執命籍，攝召苦  
魂歸。長夜披五戶，朗朗九幽開。太  
極長生宮，名入並仙飛。法門度人天，  
億劫自相隨。七祖離苦根，長歌昇紫  
微。

謹上請赤明和陽天長明宮白色始陽之  
炁下降，爲所度亡靈，淨三麤塵，歷關  
天中，度命登真。

焚符

赤明開元圖，和陽迴上虛。元始敷靈  
篇，十部飛天書。開度九幽祖，萬徧道  
自居。玉阜秀琳宮，生死福德廬。自  
無黃籙簡，苦根焉得除。長齋誦靈章，  
五靈互相扶。功成天地基，世世慶有  
餘。

謹上請玄明恭華天東華宮綠色陽輝之  
炁下降，爲所度亡靈，淨四麤塵，歷關

天中，度命登真。

焚符

恭華十方經，迴解諸天音。敷行萬遍  
過，披度好尚心。黃麾徵天魔，赤書滅  
寒林。三界通玄路，天無悲魂吟。超  
過八難庭，逍遙玉綺琴。身入衆梵行，  
長樂七寶林。永享無極慶，劫劫自相  
尋。

謹上請曜明宗飄天昊玄宮黃色洞陽之  
炁下降，爲所度亡靈，淨五麤塵，歷關  
天中，度命登真。

焚符

曜明高映，宗飄通玄。元始開圖，敷落  
五篇。赤書償錄，黃雲四纏。八威備  
衛，靈獸侍真。華光飭發，反香拂塵。  
綺合長阜，旋迴十天。高唱空洞，飛步  
入玄。枯魂昇陽，灰骸還人。神王度  
命，乘虛駕煙。禮誦靈章，與劫同年。

謹上請竺落皇笏天清元宮青色陽明之  
炁下降，爲所度亡靈，淨六麤塵，歷關  
天中，度命登真。

焚符

皇笏攝元，竺落總神。白簡度品，青錄

定仙。黃江迴靈，赤書招真。靈風鼓  
旗，十絕遶騫。日精煉魂，枯骸生津。  
十轉拔難，功登飛天。洞章命魔，稽首  
上玄。滅落九夜，斷除胞根。名度南  
宮，保命三便。

謹上請虛明堂曜天重華宮赤色陽演之  
炁下降，爲所度亡靈，淨一細塵，歷關  
天中，度命登真。

焚符

虛明大梵，梵行大館。元公臨正，司命  
執算。是日嘉慶，五道披散。錦雲仰  
迴，月華下觀。朱童度苦，靈章拔難。  
七玄昇軒，十轉登漢。七寶林中，歡樂  
璀璨。

謹上請觀明端靖天光華宮蒼色陽明之  
炁下降，爲所度亡靈，淨二細塵，歷關  
天中，度命登真。

焚符

端靖理運，十迴觀明。龍漢蕩蕩，五慾  
不生。下有純民，上有三靈。滅度九  
道，轉輪魂形。五帝監度，魔王保明。  
息宿緣對，運乘福生。樂無盡已，逍遙  
天庭。諸天衆聖，稽首誦經。

謹上請玄明恭慶天開闔宮黑色陽浩之  
炁下降，爲所度亡靈，淨三細塵，歷關  
天中，度命登真。

焚符

玄明洞虛，流輝九霞。恭慶承梵，靈風  
散華。長麾迴仙，赤文攝魔。召龍負  
水，鳥毋卑河。九幽開度，休息三途。  
五苦長解，地獄清和。斬根絕對，反生  
王家。

謹上請大煥極瑶天帝康宮碧色陽極之  
炁下降，爲所度亡靈，淨四細塵，歷關  
天中，度命登真。

焚符

太煥既振，極瑶承浮。開清九門，三便  
飛流。長庚續夜，玉燈朗嶠。員華瑩  
映，黃雲四敷。迴風混合，百神召元。  
公子執籍，太乙度符。司命拔死，生骸  
起灰。逍遙七寶，林中熙遊。十聖齊  
真，飛天同儔。出入法門，萬劫何憂。  
謹上請元載孔昇天延命宮紫色少陽之  
炁下降，爲所度亡靈，淨五細塵，歷關  
天中，度命登真。

焚符

元載衆梵炁，孔昇綱八羅。敷雲迴金  
門，紅映煥朱霞。上有採生童，飛天互  
參差。食炁長阜穴，咽津黃水華。開  
夜拔朽骸，還童反素牙。身入不死劫，  
名係玉靈都。神王定仙錄，五帝符大  
魔。保明三界難，世世爲仙家。  
謹上請太安皇崖天開明宮白色太陽之  
炁下降，爲所度亡靈，淨六細塵，歷關  
天中，度命登真。

焚符

太安皇崖天，紫微映朱日。上有八會  
炁，靈風鼓慶室。五老携寶駕，宴景西  
鬱察。金童敷帝席，神公輔太一。命  
靈盟五符，攝魔度仙秩。寒庭開夜窗，  
對魂披幽出。萬萬善緣生，億億惡根  
絕。天有福堂寶，地無牢獄結。不勝  
三界清，五神權且悅。

焚符

謹上請顯定極風天大赫宮黃色浩陽之  
炁下降，爲所度亡靈，淨一輕塵，歷關  
天中，度命登真。

極風羅八圓，碧雞起扶搖。風轉八圓  
迴，長庚朗幽遼。天通九夜清，衆聖命

羽颺。飛步七寶園，大小悉逍遙。高  
唱誦靈章，一徧諸天朝。十轉衆生度，  
苦魂返舊條。朗朗大有明，惡緣應時  
消。斯運真難喻，奈何來運凋。  
謹上請始皇孝芒天太丹宮綠色洞陰之  
炁下降，爲所度亡靈，淨二輕塵，歷關  
天中，度命登真。

焚符

始黃元一炁，上梵玄中精。運周恒沙  
劫，開化度衆生。龍漢承康界，開圖號  
赤明。妙哉元始公，倏歎敷三靈。五  
帝承符會，赤書朗長冥。十部大乘門，  
衆聖讚洞經。飛步旋玄都，三周繞宮  
城。神王稽首唱，魔王伏真形。三途  
息不掠，朽骸自然榮。南堂多福寶，世  
爲懽樂庭。但恐恒沙訖，福盡天地傾。  
運來非時求，苦哉難爲情。

焚符

謹上請太黃翁重浮容天華蓋宮青色開  
陰之炁下降，爲所度亡靈，淨三輕塵，  
歷關天中，度命登真。

太皇翁重天，德爲三界宗。上有監天  
君，總領鬼神君。開度生死戶，安置善

惡方。緣對互相尋，勞心總陰陽。諸天並慶集，懽樂不比常。於是三途解，罷對五道場。刀山落鋒刃，九幽開夜光。苦魂披重出，飄飄昇福堂。輪我三乘門，世生仙王。

謹上請無思江由天明堂宮赤色玄陰之炁下降，爲所度亡靈，淨四輕塵，歷關天中，度命登真。

焚符

無思無色界，眇眇元始初。江由映高玄，煥落五篇舒。十天綠羅室，羲和皎重虛。五老食玄宮，妙童餐靈墟。仰喻長庚餅，練胎返嬰孩。太一保命錄，南陵拔夜居。九幽無死魂，門有更生軀。宿對五苦斷，劫劫生仙廬。諸天並稱慶，蕭條誦靈書。

謹上請上揲阮樂天靈運宮蒼色浩陰之炁下降，爲所度亡靈，淨五輕塵，歷關天中，度命登真。

焚符

阮樂飛玄景，丹雲敷三羅。迴旗徵萬靈，鍾鼓召天魔。掃通九幽徑，龍鳥負長河。飄飄無色上，清元蕩難波。紫

微煥七星，騫樹秀玉霞。衆聖集琳宮，金母命清歌。雙成揚妙曲，一唱飛天和。十唱五苦解，夜魂披重羅。七神返靈胎，朽骨還更華。福堂饒清賓，地獄無對家。運役自然炁，於是息三途。一唱萬劫感，慶賀西玉那。

謹上請無極曇誓天中元宮黑色極陰之炁下降，爲所度亡靈，淨六輕塵，歷關天中，度命登真。

焚符

曇誓高澄，虛落十迴。青精始周，元炁敷輝。大有通明，赤帝徘徊。五符流煥，元公放威。萬靈伏爽，群魔消摧。天清地除，九幽廓開。億劫苦對，承運各歸。斷根絕胞，死尸生輝。七祖受靈，皆得仙飛。滅度無極，福慶巍巍。

度人無量天尊

某重誠上啓色界天大魔王，惟願不捨慈悲，曲垂拯濟。俾所度亡靈，過度色界，免試其身。魔王之章，謹當讚詠。

誦第二界魔王章

焚符

度人無量天尊

謹上請皓庭霄度天瓊瑤宮碧色陰生之炁下降，爲所度亡靈，清淨心業，歷關天中，度命登真。

焚符

皓庭映十，素輝西浮。朱童振杖，策靈九丘。飛步攝魔，制靈召無。總炁御運，元始熙遊。倏欵四八，大象交周。歷度開生，五帝煥符。十轉迴玄，清澤霧流。地藏發泄，金玉滿塢。死魂競歸，白骨生軀。逍遙高臺，飛天爲儔。

謹上請淵通元洞天真元宮紫色陰儀之炁下降，爲所度亡靈，清淨心識，歷關天中，度命登真。

焚符

元洞浩明，太白上精。金仙黃母，號曰素靈。右挾月女，左帶扶生。七元吐光，日童擲鈴。威振淵通，煥赫奔星。總監萬萬，受度仙庭。炁不絕死，梵行生生。金闕積簡，上有劫名。功滿升度，月宮鍊形。欲得羽衣，當識朱嬰。朱嬰相度，簡入華清。五帝携別，降致飛駟。七祖同懽，俱行上清。

謹上請太文翰寵妙成天靈幽宮白色陰



明之炁下降，俾所度亡靈，入於炁觀，歷關天中，度命登真。

焚符

妙哉上京，玄範化通。周迴梵行，彌樂十方。無形乘運，觀世大公。左日右月，項有威光。一朗天地，生死普隆。諸苦拔難，長離北鄴。冠帶南冶，沐浴朽容。枯骸起步，飛登太空。逍遙玄虛，衣食福堂。元始同運，世世仙王。謹上請太素秀樂禁上天化靈宮黃色陰洞之炁下降，所度亡靈，升入虛無，心業俱淨，歷關天中，度命登真。

焚符

秀樂劫運，禁上迴神。周歷諸天，三十二關。輪舞空洞，倏欵上軒。諸聖朝慶，齊禮玉門。飛行步虛，蕭條靈篇。慶霄流明，反香拂塵。月水瑩華，日精鍊仙。飛景四霽，金玉纏旋。大運冥會，萬劫蒙遷。生死同樂，熙怡欣欣。飛天提携，遊宴紫宸。握運留年，永享自然。

度人無量天尊

某重誠上啓無色界大魔王，惟願不捨慈

悲，曲垂拯濟。俾所度亡靈，過度無色界，免試其身。魔王之章，謹當讚咏。

誦三界魔王章

焚符

度人無量天尊

謹上請太虛無上常融天萬福宮綠色陰靈之炁下降，俾所度亡靈，斷除結習，惟存性識，歷關天中，度命登真。

焚符

常融灌靈炁，諸天承其真。集採日月華，奔景步結璘。上啜無上道，長更續暮年。不樂騰天飛，取度經北玄。蕩蕩龍漢始，無有惡對民。但患仙者苦，樂爲遊方圓。飄飄乘運歸，亦不爲苦辛。經右履來會，今得同天賓。齊景西那都，肆懽善因緣。常融無地官，皆是聖皇臣。生死三色上，斯樂豈可陳。謹上請大釋玉隆騰勝天日蓋宮青色陰魂之炁下降，俾所度亡靈，喜樂清淨，與道合并，歷關天中，度命登真。

焚符

玉隆何崔嵬，騰勝萬道基，三炁生杳煙，紫微煥鬱儀。無色飛空上，眇眇難

可思。中有不死神，姓桃字迴孩。自非玄都民，色內莫能知。爲人正命籍，勒算延康期。運爲長樂世，相與同一時。自以開皇去，萬劫各何之。雖是不終界，下世將難治。諸天欲救苦，勤禮七寶臺。

謹上請龍變梵度天靈寶宮赤色陰結之炁下降，俾所度亡靈，隨炁升降，與道俱生，歷關天中，度命登真。

焚符

龍變重霄上，梵度行劫端。三羅飛天界，總開十仙門。眇眇入定炁，唯有帝一君。運度諸天紐，長迴億劫關。大會元始交，玉臺簡靈魂。上聖旋七寶，飛行誦靈文。一唱衆仙和，十轉死生分。拔出無窮幽，開度七祖奔。萬始集福堂，冠帶飛天裙。振翻洪波上，麾我度命旛。俄頃二儀判，倏欵謁帝君。謹上請大極平育賈奕天天寶宮蒼色陰極之炁下降，俾所度亡靈，洞入道境，無爲自然，歷關天中，度命登真。

焚符

眇眇大羅上，太極玉清畿。賈奕沌元

炁，八通坦幽微。梵行無景色，高固無傾危。數盡大劫交，獨爲澄清暉。天地並化消，衆聖皆競歸。旋繞七寶臺，躡空振羽衣。遨遊玉園圃，瓊林何淒淒。熙怡不覺朝，倏歛大度迴。此時樂何樂，靈寶煥真儀。五文植玄根，豁落諸天開。生遇大羅分，大小悉仙飛。今日衆真會，元始難常希。拊掌和空洞，絃歌一何悲。高唱稱萬劫，太上命長麾。

度人無量天尊

知磬舉四梵偈

種民梵境冠諸天，道炁鴻濛入自然。心識兼忘惟性在，業塵俱淨獨真存。三灾不染無終劫，萬炁齊仙入妙門。惟願亡靈超上境，更升金闕禮元尊。和：不可思議功德。

侍職移旛，來座前

亡故某宿植良因，生逢道化。諸天上帝，既保舉以歷關。三界大魔，復慈悲而免試。可進上清之境，升入大羅之都。所宜證悟大乘，圓明一性。萬形有弊，惟道妙以長存。千劫無終，隨元

炁而獨運。永侍玉皇之案，克爲金闕之臣。勿生塵心，再罹世境。升天有路，入門合符，請整威儀，恭行給授。

宣升天左右券

宣功曹關 發天門牒

宣靈寶升天大券

負玉券以合符，萬魔屏跡。登金門而穩步，千聖同遊。既飛空之匪伊，盍凌霄而直上。玄壇符牒，一一披宣，宜肅身心，勤拳佩奉。

給付符籙

宣功德牒

某重誠上啓十方無極飛天神王，長生大聖，無量度人君。願賜慈悲，同垂鑒映，一如始青法會之日，不忘元始付祝之言。部衛亡靈，時刻升遷。逍遙上清，永無輪轉。更俟召役官吏，同爲送迎。穩步天衢，逍遙雲路，好去好去，毋忘道恩。

度人無量天尊

臣肅建瑤壇，宣行寶範，仰祈玄澤，俯拯亡靈。以今度品功圓，生尸事畢。荷帝師之景貺，承大道之甄陶。喜慶難

言，皈依奚極。馳心清漢，注想層霄。雲車已返於瓊都，羽蓋高升於絳闕。臣恭謝天恩，下情無任激切之至，謹稽首再拜奉送。

迴駟頌

謹召靈寶天仙內院三界所向仙曹，施用仙曹，赫奕仙曹，疾詣玄壇。關同本靖主將某，副將某，護道某，監壇某，會合十方無極飛天神王，部衛亡故某靈魂，上登聖境。具有文檄，恭爲敷陳。

宣護送文檄

鍊度事畢，魂儀高躋。得爲天上之種民，勿墮人間之妄見。隨劫受化，克爲金闕之臣。返胎更生，常侍玉皇之案。慶流後嗣，澤被宗親。再拜謝辭，伏惟珍重。

送靈如儀

師下座，超度如法

回靜默堂

向來

靈寶領教濟度金書卷之一百三十

靈寶領教濟度金書卷之一

百三十一

洞微高士開光救苦真人甯全真授  
靈寶通玄弘教水南先生林靈真編

科儀立成品

度星齋

講經儀

入座並同說戒儀

喝座

玄座空浮寶黍中，齊仙萬炁證玄功。  
靈虛何幸承宗旨，此日高躋步武同。

金闕化身天尊

升座祝香

初捻香讚

此香先天孕粹，太極流精，寶黍凝玄化之根，仁涵三極。金鏡照長生之錄，祥衍千齡。爇向鑪中，供養元始法王，至真天寶。上祝皇帝陛下，伏願乾坤呈彩，河洛煥符，慧日舒明，八表被無爲之化。仁風披拂，萬方歌有道之年。

扶持三洞以光明，化育四民而安樂。

二捻香讚

此香元功不琢，祖炁潛敷，靈風開死戶之陰，祥流九壘。湛露潤生根之秀，澤被八冥。爇向鑪中，供養太上玉宸至真靈寶。奉祝齋主，係薦亡魂，伏願明心離妄，見性回靈。黑鬱升神，白簡削多生之垢。朱陵度命，丹臺標萬劫之勳。超凌宗祖以逍遙，蔭佑雲仍而利樂。

三捻香讚

此香靈分瑤圃，秀毓瓊都。空歌騰嘯咏之奇，韻周黃幅。真神混細微之妙，炁貫清都。爇向鑪中，供養道德高尊至真神寶。奉祝齋主某人，伏願東華衍慶，南極增齡。勳業無涯，桂殿快飛黃之樂。詩書有種，蘭階看戲綵之榮。雲臻萬福於方來，風散千殃於已往。

超度頌

恭爇寶香普伸，供養三寶上帝，十極高真，諸天神仙，九霄聖宰，日月星宿，北斗南辰，省府院司，三官四聖，南昌真衆，飛天神王，地水職司，城隍社令，虛

空鑒察，無鞅仙靈，並願監真度生，傾光迴駕，俯降寥廓，曲駐玄虛。接引亡故某人，乘元始慈悲妙光道炁，來詣壇所，澄淪一心。飽聽微妙之法音，密悟希夷之勝果。

平座讚

洞玄上品，靈寶本章，混沌赤文，百魔隱韻。七經八緯之妙，十玄七事之奇。攝炁聚烟，八景契玄而冥合。開圖御運，五篇敷落以長存。萬炁齊仙，八門度命，範圍造化，斡運樞機。蓋巍巍大梵，蕩蕩乎無能名也。而要其統宗會元，提綱振領，則一言以蔽之曰仁而已。仁者何，元始上帝生物之至德，度人之妙用也。元始立乎虛無之表，凝乎太極之先。道體妙融，真精獨運。歷劫應化，三洞開光，以《度人上品妙經》，乃赤明劫中第一會說經之目也。祖炁分靈，化生諸天，其數八十有一。今焉敷落神真，普度天人，乃獨御始青天何哉。蓋始青之天，即東北玉隆騰勝天，而三陽至仁，發育之會也。元炁潛凝於戊亥，天門肇萌。於子至寅而

開泰。於四時爲春，於五常爲仁。生意羅敷，陽光浩蕩，群動繁育，萬物舒榮，而天地生物之仁，自此周遍寰宇。故玄師謂玉隆天其色青，表木之德。而天真皇人釋內音玉字，碧落浮黎，空歌保珍，以配建寅月立春節，其應泰卦，宜乎。天尊敷弘之妙，普化天人，必於此土。傾光駐景，周十過，以召十方也。御至仁之真土，說至人之妙化。是以一遍而聾者聰，二遍而盲者明，三遍而瘖者言，四遍而跛者行，五遍而病者痊，六遍而髮黑齒生，七遍而老壯少強，八遍而孕生胎成，九遍而金泄玉露，十遍而枯骨成人。其神化妙感，蓋自然而然，有不知其所以然而然者矣。何以言之。一者水之生數，水旺於坎，主腎應耳。今天尊運一迴度人之仁，符天一生水之妙，宜乎。真水流潤，滋榮上宮，而聾者聞聰也。二者火之生數，火旺於離，應心主目。今天尊運二迴度人之仁，符地二生火之妙，宜乎。真火發越，光明內景，而盲者目明也。三者木之生數，木胎於酉，應金主聲。今

天尊運三迴度人之仁，符天三生木之妙，則金木互用，宜乎。肺金通暢，重樓利順，而瘖者能言也。四者金之生數，金胎於卯，應木主動。今天尊運四迴度人之仁，符地四生金之妙，則木金交應，宜乎。肝木豐茂，四肢順適，而跛痾積逮，皆能起行也。五者土之生數，土旺四方，寄位中宮，應化於脾。今天尊運五迴度人之仁，符天五生土之妙，則榮衛和適，經絡安平，宜乎。久病痾疾，一時復形也。醫家以手足痿痺，名爲不仁。而草木之實，其中有精能發生者，世皆名之以仁。今天尊之仁運於此，而五行之仁應於彼。凡不仁之疾，皆發生而歸諸仁，非神化妙感，疇克臻是哉，水生於一而成於六者也。水至於成，則膏髓周流，津液滋潤，易衰情而爲充悅也。今天尊運六迴度人之仁，符地六成水之妙。安得不髮白反黑，齒落更生耶。火生於二而成於七者也。火至於成，則血氣光明，精神輝煥，轉枯瘁而爲強盛矣。今天尊運七迴度人之仁，符天七成火之妙。安

得不老者反壯，少者皆強耶。木生於三，而成於八者也。木至於成，則動植飛潛，發育暢茂，萬物各得其所矣。今天尊運八迴度人之仁，符地八成木之妙。安得不婦人懷孕，鳥獸含胎，已生未生，皆得生成耶。金生於四，而成於九者也。金至於成，則華彩光芒，煥耀映發，土地難藏其寶矣。今天尊運九迴度人之仁，符天九成金之妙。安得不地藏發泄，金玉露形耶。土生於五，而成於十者也。土之生也，脫沉痾而復形；土之成也，迴枯骨而成人，皆自然之理。今天尊運十迴度人之仁，符地十成土之妙。則夫迴尸起死，白骨成人，其神應密感，又豈可以形容擬議哉。說經周十遍之功，萬類受十全之賜。舉覆載間，蓋無一物不囿於天尊仁意中矣。雖然此仁之用也，其體何如觀。夫未說經之前，三景停輪，四氣朗清，風靜雲藏，化機澄寂，是仁之體凝真於太極也。及夫既說經之後，寶珠空懸，黍米取象，勃勃俱入，不知所

在，是仁之用返真於太無也。動靜互

舉，體用兼該，何者非天尊開度之仁哉。萬物芸芸，而玄珠比喻，獨指黍米，何也？得非黍爲五穀之長，人所資以爲命。而天地生物之仁，在是耶。由是衆真監度，授於道君，欲共溥此仁也。道君叙述，下教至學，欲共溥此仁也。聖修凡誦而禎祥有別，灾消害穰而功德難勝。無非欲十極三際，共被此仁之澤也。而況於北都羅酆，河源泉曲，三塗五苦，八難九幽，尤天尊所憫念者乎！至仁無外，大德好生。當臨軒校錄之時，普告三界而不得拘留。部衛神魂，而制魔保舉，飛度五戶，無拘天門。則天尊一念之仁，其拳拳於幽爽者，可謂功矣。故曰此經微妙，普度無窮，一切天人，莫不受慶。無量之福，生死蒙惠，非至仁孰能與於此哉。若夫流精玉光，五色鬱勃，餌之而位登玉清。靈寶真土，聖胎成就，鍊之而超凡入聖，未可以言語文字形容也。

自此以後，模寫亡人平生言行善惡，以經中契合者勸懲之。及前後所修功德，皆以經語發明鋪叙，待詳贍爲

佳。

經曰：夫末學道淺，或仙品未充，運應滅度，身經太陰。同學至人，爲其燒香，誦經十過，以度尸形如法。魂神逕上南宮，隨其學功，計日而得更生，轉輪不滅，便得神仙，非虛語也。以今鸞籙收聲，鯨音息響。殘千枝於鳳炬，飄百和於龍煤。萬帝回光，諸天復位，靈宜端嚴容止，款曲几筵，俟召役於真靈，爲奉行於鍊度。傳符受券，保舉登真，毋忘妙道之恩，永宴大羅之上。顧惟鄙野，夙奉玄元。登聖域以優游，幸叨入室。乘神機而嚙味，僅免面墻。雖洞輔之克諳，顧舉揚而奚敢。若曰黼黻玄妙，非不可悅作者之聽聞。奈何融暢淵源，然後可覲人天之應合。深漸朴素，恐負回青，總是知音。何妨與點大衆，且道今日。若幽若顯，是冤是親，俱會道場，聽法聞經，然後作麼生。

一顆玄珠耀太虛，十方勃勃入無餘。  
神光寂照秋蟾似，天外閑雲任卷舒。  
伏惟珍重。

出堂頌下座

靈寶領教濟度金書卷之一百三十一

# 靈寶領教濟度金書卷之一 百三十二

洞微高士開光救苦真人甯全真授  
靈寶通玄弘教水南先生林靈真編

## 科儀立成品

師友命過合用

### 早朝行道誦經儀

燒香頌

各禮師存念如法

衛靈呪

青陽虛映，曜日回靈。神虎辟邪，飛天流鈴。摧奸滅試，萬魔束形。九微回道，八威攝精。千真校錄，三元蕩清。左嘯中黃，右策六丁。七轉八合，周旋天經。聖化巍巍，三道順行。慶雲流布，合景黃庭。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今清旦早朝。陞壇行道，燒香誦經。願得玉清道炁靈寶妙光下降，流入臣等身中。令臣所啓所奏，速達逕御太上無極大道至真玉皇上帝御前。

謹稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道神仙，三界官屬一切真靈。臣聞清微御運，宏化日於九靈。赤明開圖，散真風於八極。鳳韞示希夷之粹，鸞圖傳玄妙之精。蕩蕩神機，巍巍聖運，凡囿範圍之

內，悉歸陶冶之中。臣等級武彤墀，承顏玄座。憲天弘道，期堅金石之忱。宣德承符，願證丹青之誓。凡有投告，敢不上聞。

宣意

按如詞言，深可矜憫。故三洞弟子某人，奄忽一朝，沉淪九夜。修真學道，幾殫立雪之勤渠。通玄究微，徒負凌雲之超邁。業惟趨於涉世，術莫際於延生。致墮幽寥，倏歸滅度。臣等痛切肝肺，義重師資。同學則云，義猶師友，恩若父兄。修齋誦經，合闡薦嚴之典。祈恩懺罪，宜伸悲悼之情。爰潔芝壇，肅伸葵志。旛花摇曳，鳴清蹕於雲衢。旌蓋翩翩，耀朱幢於禁路。擎拳再拜，稽顙一心，願殫庸敬之忱，爲導克誠之愀。專爲三洞弟子某人，消除往過，迎輅新釐。並天地以同流，合幽明而共慶。以今清旦行道，燒香誦經，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，願以是功德，上祝皇帝陛下，道邁懷義，德尊炎燧。日觀高躋於壽

域，玉帛朝元。雲瀛旁接於福鄉，車書拱極。掖庭參贊，藩服承宣。今故燒香，自皈依師尊大聖衆。至真之德，得道之後，保天長存。和：與道合真。

以今清旦行道，燒香誦經，運茲二捻上香。願此香煙騰空上徹，供養無上至真經寶。臣等皈身皈神皈命，首體投地，願以是功德，歸流嶽牧守宰，庶政群工。伏願朝多鳴鳳，野絕空駒。面棘位槐，獻納政成於朝著。種花剖竹，承宣化洽於郊圻。八表歸心，四夷稽首。今故燒香，自皈依師尊大聖衆。至真之德，得道之後，升入無形。和：與道合真。

以今清旦行道，燒香誦經，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，願以是功德，歸流庶民萬姓，邊戍三軍。伏願九穀豐成，百昌樂育，歡生四鄙，耕田無負未之憂。慶浹三邊，尊枕息控弦之警。蟲魚咸若，鳥獸攸寧。今故燒香，自皈依師尊大聖衆。至真之德，得道之後，長享自然。和：與道合

真。

### 按人各恭信

#### 三皈依

具位臣某，恭焚寶香，遙瞻奏啓太上無極大道虛無自然元始天尊妙無上帝，太上玉宸虛皇大道君妙有上帝，萬變混沌玄元老君混元上德皇帝，十方無極太上靈寶天尊，三寶丈人，三寶天君，五方五老上帝，三十二天上帝，木公尊神，金母元君，上聖高尊，諸天真衆，太陽、太陰、五星道君，主筭、記名、落死、上生、大魁、五斗星君，護魂、侍魄、養炁、通血、中主五帝真君，諸天丞相，南昌上宮韓司主錄監生大神，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神，迴骸起死無量度人君，玄中大法師，三天大法師，天真皇人，妙行真人，玄一三真人，太極太虛真人，太極左宮仙翁冲應真人，三界五帝大魔王，十方無極飛天神王，長生大聖，無量度人君，飛天神人，飛天使者，飛龍騎吏，玄都紫微上宮侍經玉郎、玉

童、玉女、神仙、靈官，靈寶經籍度三師真人，名山洞府領教真仙，三十二天玉童、玉女、功曹、使者，左右龍虎君，三界直符使者，四直玉文功曹，玄壇內外一切威靈。臣聞靈寶本章，肇希夷於騰勝。洞玄上品，敷玄妙於浮黎。七經扣玉以乘晨，八緯鳴金而駕景。雲藏風靜，上彰玄蓋之符。山緬林平，下紀方輿之瑞。虬輪四會，獅座中臨。黍珠開鬱勃之音，騫翠振琳琅之句。上無復祖，存亡承開泰之恩。中有度人，動殖被裁成之德。故誦之者道尊德貴，感諸天之下觀。詠之者灾消害攘，致上帝之遙唱。無文不度，有感斯通。以今伏爲亡故三洞弟子某人，崇建師友命過修齋誦經道場。謹按玄科，轉誦《太上洞玄靈寶無量度人上品妙經》。周回十方，提携萬類，滌先靈之宿垢，掃幽爽之深愆。俾仗真乘，頓消妄業。臣等莫不滄澄心妄，澡滌性真，遵三籙之威儀，雍容朗唱。按二篇之軌範，窈窕吟哦。靈光開五億之春，梵炁遍三千之夜。即使某人頓明覺地，開悟靈

天，智慧圓通，克侍紫金之相。冤愆消釋，永登碧落之墟。臣下情無任祈恩激切，屏營之至。

宿命贊

舉雲篆太虛

仰惟靈寶本章，有諸天內音之微妙。洞玄上品，著百魔隱韻之希夷。功加而天地咸寧，慈周而死生蒙惠。巍巍大梵，赫赫深仁。以今奉爲亡故三洞弟子某人，升壇轉誦《太上洞玄靈寶無量度人上品妙經》，人各周迴十過。伏願天無氛穢，地絕妖塵。開紫金典禁之藏，十回演奧。啓玄都飛天之衛，五譯敷玄。即俾係薦亡靈，普及冤親幽爽。惡根冰釋，善藥雲臻。度魂神而上南宮，永辭有漏。圓性識而超北府，逕悟無爲。稽首皈依無極大道。

舉三啓頌第一首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇轉誦《太上洞玄靈寶無量上品妙經》，人各一卷。專

爲亡故三洞弟子某，消除多劫以來，故作誤爲宿罪重過，上犯東方無極世界一切玄曹，悉祈赦宥，仍乞開度東方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲亡故三洞弟子某，消除所犯東方多劫罪咎，普及東方幽爽靈識，咸希清靜，獲遂周圓。伏願青極垂慈，蒼旻流惠，罪無大小，均削落於簡書。功有顯微，普登陳於簿錄。式宴華林之境，面朝玉寶之尊。爲如上緣，請聖作證。念

三清無上天尊 十方 朱陵

度人 逍遙 不可思議功德

舉大步虛第一首詣東方

禮方 方懺 啓神王

某上啓東方無極飛天神王，長生大聖，

無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣東方飛天使者，下降玄壇，承領符命，下告所司開度，故三洞弟子某，溥及東方幽爽靈識，上登仙都。所有真符，謹當告下。

告符 宣關 焚簡頌

三啓頌第二首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇燒香散花，轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過，上犯南方無極世界一切玄曹，悉祈赦宥。仍乞開度南方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦



《太上洞玄靈寶無量度人上品妙經》，各一過。專為故三洞弟子某，消除所犯南方多劫罪咎，普及南方幽爽靈識，咸希清靜，獲遂周圓。伏願丹極垂慈，朱陵流惠，黑單赦過，等曉鑑之無塵。青簡書功，若秋蟾之有耀。式宴梵天之境，面朝萬福之尊。為如上緣，請聖作證。念：

三清無上天尊 十方 朱陵

度人 逍遙 不可思議功德

舉大步虛第二首詣南方

禮方 方懺 啓神王

某上啓南方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣南方飛天使者，下降玄壇，承領符命，下告所司，開度故三洞弟子某，溥及南方幽爽靈識，上登仙都。所有真符，謹當告下。

告符 宣關 焚簡頌

三啓頌第三首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛

靈靈之弘功。欲藉提携，敢忘修誦。以今謹率見前清衆，升壇燒香散花，轉誦《太上洞玄靈寶無量上品妙經》，人各一卷。專為亡故三洞弟子某，消除多劫以來，故作誤為宿罪重過，上犯西方無極世界一切玄曹，悉祈赦宥。仍乞開度西方無邊奕識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專為故三洞弟子某，消除所犯西方多劫罪咎，普及西方幽爽靈識，咸希清靜，獲遂周圓。伏願素極垂慈，金門流惠。蠲消往過，敕清府以移名。收拾前功，勒玄曹而紀字。式宴金光之境，面朝太妙之尊。為如上緣，請聖作證。念：

三清無上天尊 十方 朱陵

度人 逍遙 不可思議功德

大步虛第三首詣西方

禮懺 方懺 啓神王

某上啓西方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣西方飛天使者，下降玄壇，承領符命，下告所司，開度故三洞弟子某，溥及西方幽爽靈識，上登仙都。所有真符，謹當告下。

告符 宣關 焚簡頌

舉七真讚第一首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功，欲藉提携，敢忘修誦。以今謹率見前清衆，升壇燒香散花，轉誦《太上洞玄靈寶無量上品妙經》，人各一卷。專為亡故三洞弟子某，消除多劫以來，故作誤為宿罪重過，上犯北方無極世界一切玄曹，悉祈赦宥。仍乞開度北方無邊奕識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回映鑒，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲故三洞弟子某，消除所犯北方多劫罪咎，普及北方幽爽靈識，咸希清靜，獲遂周圓。伏願玄極垂慈，黑靈流惠。過消尺籍，浴曉露於春陽。功紀寸符，開晨輝於秋霽。式宴真靈之境，面朝玄上之尊。爲如上緣，請聖作證。念：

三清無上天尊 十方 朱陵

度人 逍遙 不可思議功德

大步虛第四首過北方

禮方 方懺 啓神王

某上啓北方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣北方飛天使者，下降玄壇，承領符命，下告所司，開度故三洞弟子某，溥及北方幽爽靈識，上登仙都。所有真符，謹當告下。

告符 宣關

焚簡頌 歸位

再稱法位

具位臣某，重誠奏啓太上無極大道虛無自然元始天尊，太上玉宸虛皇大道靈寶天尊，萬變混沌玄元老君道德天尊，十方無極太上靈寶天尊，三寶丈人，三寶天君，五方五老上帝，三十二天上帝，木公尊神，金母元君，上聖高尊，諸天真衆，太陽、太陰、五星道君，主筭、記名、落死、上生、大魁五斗星君，護魂、侍魄、養炁、通血、中主五帝真君，諸天丞相，南昌上宮韓司主錄監生大神，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神，迴骸起死無量度人君，玄中大法師，三天大法師，天真皇人，妙行真人，玄一三真人，太極太虛真人，太極左宮仙翁沖應真君，三界五帝大魔王，十方無極飛天神王，長生大聖，無量度人君，飛天神人，飛天使者，飛龍騎吏，玄都紫微上宮侍經玉郎，玉童玉女，神仙靈官，靈寶經籍度三師真君，名山洞府領教真仙，三十

二天玉童玉女，功曹使者，左右龍虎君，三界真符使者，四直玉文功曹，玄壇內外一切威靈。臣等生際清時，欣逢盛世。佩三洞之龍策，過有淵陵。膺七部之鸞書，功無圭黍。莫拊煙霞之高蹈，乃隨塵土以卑棲。負荷恩榮，未加明譴。僥倖寵遇，恭領真符。期上贊於紫虛，庸下裁於黃混。今與故三洞弟子某，情鍾父道，義拜師恩。同學一生，莫圓成於百行，五行內滓，十戒中迷。度死濟生，乏良勳於方寸。朝真謁帝，欠成效於刀圭。元臘無懺謝之文，節會慢朝真之典。天常遽殞，地變斯罹。凜黑簿之書名，致玄曹之校過。匪由天貺，曷慰民情。故修命過之齋，庸致升神之禱。伏願鴻恩錫羨，鶴赦誕敷。收一二之勳庸，南宮定籍。宥千萬之過咎，北府刊名。敕三官九府之崇嚴，勒五帝四司之隆重。高躋碧落，入侍紫宸。爲金闕之元臣，侍玉皇之香案。蒙如丹悃，仰荷洪恩。上願天清地寧，風調雨順，山川秀潤，草

木蕃鮮。犢隴翻雲，慶三登於文治。鴈陞舞月，閑四塞於武功。五道昭明，三途安泰。則上明天尊大慈之化，下副臣等皈命之誠，謹啓以聞。

發願

復爐

出堂頌

回靜默

謝師

回向

靈寶領教濟度金書卷之一百三十二

靈寶領教濟度金書卷之一

百三十三

洞微高士開光救苦真人甯全真授  
靈寶通玄弘教水南先生林靈真編

科儀立成品

師友命過齋用

午朝行道儀

燒香頌

各禮師存念如法

衛靈呪

丹靈朱火，炎霞激風。赤輪剛運，天光八衝。迸威包羅，交變萬方。流金豁落，群魔滅蹤。辟奸破妖，明耀元功。金符召制，躡雲乘龍。謠詞慶會，散花太空。神化冥運，四極安隆。伏御帝前，罔有不從。和：與道合真。

鳴法鼓二十四通

無上三天玄元始三炁太上道君，召出臣身中三五功曹，左右官使者，侍香金童，傳言玉女，五帝直符，直日香官，各

三十二人出。出者嚴裝。關啓玄壇天帝神君，當召此間土地里域真官正神，急上關啓臣今奉爲入齋意。以今午朝，升壇行道，燒香誦經，願得玉清道炁靈寶妙光下降，流入臣等身中。令臣所啓所奏，速達逕御太上無極大道至真玉皇上帝御前。

謹稱法位

具位臣某，與臨壇官衆等，謹同誠上啓虛無自然元始天尊，無極大道太上道君，太上老君，高上玉皇，十方已得道大聖衆，至真諸君丈人，三十二天帝君，玉虛上帝，玉帝大帝，東華、南極、西靈、北真、玄都、玉京、金闕七寶瓊臺紫微上宮靈寶至真明皇道君，三十六部尊經玄中大法師，上相上宰上保上傳，太平下教二十四真人，西城總真王君，太元真人，東嶽上卿司命茅君，定錄、保命二真人，名山洞府得道真仙，三界官屬一切真靈。臣聞元始垂科，泱三靈而潤澤。虛皇演教，傳九軌以裁成。昭天經地緯之文，顯霞卷雲舒之象。真穢莫測，靈運難量，上提六合以

均沾，下被萬方而普攝。臣等夙叨化育，允戴生成。佐國立功，合盡贊襄之力。承天效法，誓殫佐翊之忱。爰有青詞，謹當宣奏。

宣詞

按如詞旨，備拯忱恂。故三洞弟子某，夙稟生根，倏飄死蒂。尋師結友，雖云好道以求靈。練景學仙，莫能離世而違俗。期日宣於帝紀，庸時暢於皇靈。遂及陰途，永辭陽景。臣等奉師猶父，事死若生。同學則云：義染同學，精切一家。行香誦經十過，願周於經律。建齋懺罪三朝，庸按於壇章。爰潔蘭場，肆揚葵志。彤芝曳玉，輅龍伏於玄虛。丹籊鳴金，飛鳳輪於碧落。誠攄螻蟻，惠藹鴻雁。罄濟拔之小心，希升遷之巨貺。專爲亡故三洞弟子某，辟除塵障，斷絕妄緣，合幽顯以蒙恩，溥邇遐而受度。以今臨午升壇，誦經行道，運茲初捻上香。願此香煙騰空徑上，供養無上至真道寶。臣等皈身皈神皈命，首體投地，願以是功德，上祝皇帝陛下。伏願堯雲廣覆，舜日齊明。三極

仁周，化時雍於兆庶。四郊武洽，彰大定於黔黎。澤被諸藩，慶覃列御。今故燒香，自皈依師尊大聖衆。至真之德，得道之後，保天長存。和：與道合真。

以今午朝，行道誦經，運茲二捻上香。願此香煙騰空徑上，供養無上至真經寶。臣等皈身皈神皈命，首體投地，願以是功德，歸流朝廷公卿，侯甸守宰。伏願惟忠惟良，同心同德，經邦佐政，書麟閣之元勳。守塞宣威，紀虎垣之偉績。翼扶帝祚，保乂王家。今故燒香，自皈依師尊大聖衆。至真之德，得道之後，升入無形。和：與道合真。

以今午朝，行道誦經，運茲三捻上香。願此香煙騰空徑上，供養無上至真師寶。臣等皈身皈神皈命，首體投地，願以是功德，歸流庶邦萬姓，九野三農。伏願同穎呈祥，雙岐挺秀。普天鼓舞，絕流鴈於郊圻。率土謳謌，息遺蝗於隴畝。芝生方域，草鞠圓扉。今故燒香，自皈依師尊大聖衆。至真之德，得道之後，長享自然。和：與道合真。

舉七真讚第二首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過，上犯東北方無極世界一切玄曹，悉祈赦宥。仍乞開度東北方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲故三洞弟子某，消除所犯東北方多劫罪咎，普及東北方幽爽靈識，咸希清靜，獲遂周圓。伏願始青垂慈，太霄流惠。昨非風掃，削積過於丘山。今是雲行，紀宿勳於尺寸。式宴長樂之境，面朝上聖之尊。爲如上

緣，請聖作證。

舉大步虛第五首詣東北方

禮方 方懺 啓神王

某上啓東北方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣東北方飛天使者，下降玄壇，承領符命，下告所司，開度故三洞弟子某，溥及東北方幽爽靈識，上登仙都。所有真符。謹當告下。

告符 宣關

焚簡頌

七真讚第三首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇燒香散花，轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過，上犯東南方無極世界一切玄曹，悉祈赦宥。仍乞開度東南方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲故三洞弟子某，消除所犯東南方多劫罪咎，普及東南方幽爽靈識，咸希清靜，獲遂周圓。伏願始青垂慈，碧霄流惠。地塵永斷，無顯過之可書。天澤昭臨，有微勳之堪錄。式宴碧霞之境，面朝度命之尊。爲如上緣，請聖作證。念

大步虛第五首詣東南方

禮方 方懺 啓神王

某上啓東南方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣東南方飛天使者，下降玄壇，承領符命，下告所司，開度故三洞弟子某，溥及東南方幽爽靈識，上登仙都。所有真符，謹當告下。

告符 宣關 焚簡頌

七真讚第四首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今謹率見前清衆，升壇行道，燒香散花，轉誦《太上洞玄靈寶無量上品妙經》，人各一卷。專爲亡故三洞弟子某，消除多劫以來，故作誤爲宿罪重過，上犯西南方無極世界一切玄曹，悉祈赦宥。仍乞開度西南方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲故三洞弟子某，消除所犯西南方多劫罪咎，普及西南方幽爽靈識，咸希清靜，獲遂周圓。伏願始青垂慈，景霄流惠。受書朱火，蠲消過於百千。定錄玄圖，紀往功於萬一。式宴輝真之境，面朝太靈之尊。爲如上

緣，請聖作證。念

大步虛第七首詣西南方

禮方 方懺 啓神王

某上啓西南方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣西南方飛天使者，下降玄壇，承領符命，下告所司，開度故三洞弟子某，溥及西南方幽爽靈識，上登仙都。所有真符，謹當告下。

告符 宣關

焚簡頌

七真讚第五首歸位

臣聞上無復祖，超三極以包羅。中有度人，集萬真而校錄。仰玄元之巨澤，沛靈寶之弘功。欲藉提携，敢忘修誦。以今率領見前清衆，升壇行道，燒香散花，轉誦《太上洞玄靈寶無量上品妙經》，人各一卷，專爲亡故三洞弟子某，消除多劫以來，故作誤爲宿罪重過，上犯西北方無極世界一切玄曹，悉祈赦宥。仍乞開度西北方無邊爽識，同遂超升。清衆運誠，平坐如法。

平坐讚 靜念如法

開經 誦經 經畢

度人無量天尊 結經

仰惟三寶高尊，十華上聖，曲回鑒映，克副傾投。臣向來祇率清衆，升壇轉誦《太上洞玄靈寶無量度人上品妙經》，人各一過。專爲故三洞弟子某，消除所犯西北方多劫罪咎，普及西北方幽爽靈識，咸希清靜，獲遂周圓。伏願始玄垂慈，琅霄流惠，宥過無大，均承曠蕩之恩。錄功必詳，永被綿延之澤。式宴妙道之境，面朝無量之尊。爲如上緣，請聖作證。念

大步虛第八首詣西北方

禮方 方懺 啓神王

某上啓西北方無極飛天神王，長生大聖，無量度人君。恭望真慈曲映，俯鑒微衷，一如浮黎法會之時，不忘元始付祝之訓。特遣西北方飛天使者，下降玄壇，承領符命，下告所司，開度故三洞弟子某，溥及西北方幽爽靈識，上登仙都。所有真符。謹當告下。

告符 宣關

焚簡頌歸位

再稱法位

具位臣某，恭焚寶香，重誠奏啓虛無自然元始天尊，玉宸大道靈寶天尊，混元皇帝道德天尊，十方無極太上靈寶天尊，三寶丈人，三寶帝君，五方五老上帝，三十二天上帝，木公尊神，金母元君，上聖高尊，諸天真衆，太陽、太陰、五星道君，主筭、紀名、落死、上生、大魁五斗星君，護魂、侍魄、養炁、通血、中主五帝真君，諸天丞相，南昌上宮韓司主錄監生大神，度人不死尊神，南極長生大君，度世司馬大神，好生韓君丈人，南上司命司錄延壽益筭度厄尊神，回骸起死無量度人君，玄中大法師，三天大法師，天真真人，妙行真人，玄一三真人，太極太虛真人，太極左仙翁沖應真君，三界五帝大魔王，十方無極飛天神王，長生大聖，無量度人君，飛天真人，飛天使者，飛龍騎吏，玄都紫微上宮侍經玉郎，玉童玉女，神仙靈官，靈寶經籍度三師真君，名山洞府領教真仙，三十二天玉童玉女，功曹使者，

直符香官，領仙監齋諸君吏，靈寶玄壇香官使者，左右龍虎君，三界直符使者，四直玉文功曹，玄壇內外一切威靈。臣等幸際明時，叨居樂土。野馬風葩之跡，徒積惡緣。神龍雲葉之書，未成善積。強遷喬而出岫，似濯沼而濫巾。玉律霜明，懼罹重譴。金科日皎，惟負深文。誓萬劫以皈依，豈三生而感戴。臣與故三洞弟子某，親猶父愛，分若師嚴。同學則云：派推益友，道切相師。慮從歷劫以來，逮至有生之後，五關雲擾，七竅煙迷。溷善惡而不分，綱常易失。捨是非而莫辨，禁戒多違。建齋醮而弗虔，飛符章而不謹。致干憲網，遂墮苦輪。凜五帝之書，愆紛三官。而校過非由聖敕，曷道威靈。修命過齋結友，盡薦嚴之敬。舉遷拔格同學，殫修奉之勤。伏願俯賜玄恩，鑒茲丹悃。錄一生之功行，雖小無遺。原萬劫之愆尤，或大必赦。入真靈職，爲聖皇臣。俾預直於禁林，即橫飛於帝闕。蒙加采菲，極荷詢堯。上願日月輝華，風雲藏靜，河海澄晏，林木緬

平。絕遊農於閭閻，犬無夜吠。萃奇材於朝著，鳳有朝鳴。德被幽途，化熙陲域。則上明天尊大慈之化，下副臣等皈命之誠。謹啓以聞。

發願

復鑪

出堂頌

回靜默

謝師 回向

靈寶領教濟度金書卷之一百三十三

(李遠國點校)

